

近代中國史料叢刊第十輯

沈雲龍主編

端忠敏公奏稿

端方著

文海出版社印行

端忠敏公奏稿

戊午長至日

楊鍾羲謹題

宣統三年十一月十九日奉

旨署四川總督端方才猷敏練學識宏通由部屬外任監司洵膺疆寄庚子之變在陝西護撫任內保護維持厥功甚偉嗣充出使各國考察政治大臣南北洋大臣後因案革職旋以候補侍郎充督辦粵漢川漢鐵路大臣川中事起派令馳往查辦並署理四川總督宣力有年勤勞素著茲因帶隊入川中途遇害死事情形慘不忍聞殊堪憫惻著加恩予諡追贈太子太保並賞給二等輕車都尉世職照總督陣亡例從優賜卹任內一切處分悉予開復應得卹典該衙門查例具奏靈柩回旗時沿途地方官妥爲照料准其入城治喪伊子外務部參事繼先著以四品京堂候補監生陶磐著以主事補用伊弟三品銜河南候補知府端錦隨行入川因救兄同時被害允屬忠義可風著照三品官員陣亡例從優議卹

年見海刀三希

以慰忠魂欽此

典禮院謹

奏爲奏請

賜卹事宣統三年十一月十九日內閣奉

旨署四川總督端方才猷敏練學識宏通由部屬外任監司洵膺疆寄庚子之變在陝西護撫任內保衛維持厥功甚偉嗣充出使各國考察政治大臣南北洋大臣後因案革職旋以候補侍郎充督辦粵漢川漢鐵路大臣川中亂起派令馳往查辦並署理四川總督宣力有年勤勞素著茲因帶隊入川中途遇害死事情形慘不忍聞殊堪憫惻著加恩予諡追贈太子太保並賞給二等輕車都尉世職照總督陣亡例從優賜卹任內一切處分悉予開復應得卹典該衙門察例具奏伊弟三品銜河南候補知府端錦隨行入川因救兄同時被害尤屬忠義可風著照三品官員陣亡例從

欽定大清會典事例

優賜卹等因欽此欽遵鈔出到院除該故員等卹廕應均由內閣陸軍部辦理外臣等查總督陣亡照一品官給予一次致祭銀二十五兩全葬銀五百兩

遣官讀文致祭凡予諡者內閣撰擬諡號給碑價銀三百五十兩本家自行建立祭文碑文交翰林院撰擬並行查旗分事蹟造冊送交翰林院立傳文職三品以上行內務府製造牌位工竣劄監擇吉禮部官送入

京師昭忠祠八旗二品以上入祀

京師昭忠祠者仍入祀陣亡地方府城昭忠祠又查例開陣亡三品官給予一次致祭銀十六兩全葬銀三百兩並行查旗分事蹟造冊送交翰林院立傳文職三品以上行內務府製造牌位工竣劄監擇吉禮部官送入

京師昭忠祠各等語今署四川總督端方因帶隊入川中途遇害伊弟河南候補知府端錦因救兄同時被害欽奉

諭旨端方著加恩予諡照總督陣亡例從優賜卹端錦著照三品官陣亡例從優賜卹復奉

諭旨端方著予諡忠敏應照例給予該故督端方碑價銀三百五十兩全葬銀五百兩一次致祭銀二十五兩

遣官讀文致祭祭文碑文交翰林院撰擬入祀

京師昭忠祠並入祀死事地方府城昭忠祠行查旗分事蹟送交翰林院立傳該故員端錦應給予全葬銀三百兩一次致祭銀十六兩入祀

京師昭忠祠並行查旗分事蹟送交翰林院立傳恭候

命下臣院行文各該衙門遵照辦理爲此謹

奏請

旨等因於宣統三年十一月三十日奏本日奉
旨依議欽此

端總督傳

錢塘吳慶坻撰

公諱端方字午橋號匄齋姓託和洛氏滿洲正白旗人廕生用主事遷工部員外郎中光緒八年舉人丁父憂逾年復遭母喪哀毀柴立山東巡撫張勳果公聞其才特疏薦命發山東辭不赴服除補官充張家口監督擢本部郎中二十四年

記名御史

簡直隸霸昌道京師創立農工商局

賞三品卿銜開缺回京筦局務未幾

簡陝西按察使二十五年護理陝西巡撫補陝西布政使署巡撫如故拳匪亂作晉豫繹騷公察幾先多爲文告反復曉譬俾士民毋惑境內晏然

兩宮西巡駐蹕幾年而七噫不驚者公之力也調河南布政使未之任二十七年授湖北巡撫明年兼署湖廣總督三十年調江蘇巡撫尋署兩江總督移撫湖南銳意新政所至以興學爲急在湘遣出洋遊學生尤衆賓禮耆碩調和新舊湘人士多頌之三十一年

詔赴東西洋各國考察政治時所稱五大臣者也擢閩浙總督未之官與諸大臣分道浮海周歷各國八閱月而歸成書

奏進之是爲中國議改立憲政體之始尋授兩江總督宣統初元調直隸總督以事爲言者劾罷三年

命以候補侍郎督辦川漢粵漢鐵路事宜時郵傳部議以鐵路歸國有而收路章條蜀與湘異蜀人大譁□民乘之以作□公至漢

口

詔率師入川查辦尋罷蜀督

命公署理八月至重慶而

作九月進次資州經郡縣輒召父

老宣

朝廷德意解散資境□□數萬人蜀人頗感動而所部□□陰懷
反側十月初七日晡時兵官劉怡鳳率軍隊持械入室語不遜公
嚴詞訶之遂迫公至旁小屋拘係之公終不屈遂被戕弟端錦同
及於難□□函公首送武昌而州紳廖承瓌斂公與公弟忠骸渴
葬州城外獅子洞明年□□感公忠義迎公之喪至漢口歸元而
改斂焉先是蜀督以公死事狀聞

上震悼加恩予諡贈太子太保賞給二等輕車都尉世職照總督
陣亡例從優賜卹子外務部參事繼先以四品京堂候補陶磐以
主事用尋

予諡忠敏

舊史氏曰公性豪邁不拘小節篤嗜金石書畫海內孤本精拓宋元明以來名蹟聞風從萃悉歸儲藏豐碑斷碣輦致京邸度廊廡幾滿尤好客建節江鄂開閣延賓文酒之會無虛日遭時承平亦阮太傅畢尙書之流風也晚丁杞陞兵威不揚肘腋之間皆爲□
□ 忼愾捐軀有弟同殉赫赫雙忠遂與顏平原兄弟千古爭烈矣

端忠敏公奏稿序

端忠敏公兩爲江督皆招予入幕初甫一月後則年餘予與公初不相識乃待以殊尤特加優禮至可感也公晝則接賓客見僚屬夕則治文書其治事也幕僚數人執案牘以次進旋閱旋判有疑義隨考核加諮諏焉謀慮旣得當機立斷未嘗見其有所濡滯亦未聞其事之有遺誤也公事旣畢乃齎集朋儕摩挲金石評隲書畫考訂碑版典籍把酒詠歌詼調談笑有時商略古今縱論時事俯仰百世往往通夕忘倦予以衰老相約不卜夜亦偶一預焉熙熙然幾疑乾嘉盛世置身於尹文端畢鎮洋所矣予旋奉召入都未幾公移直督又相見於都門乃忽以微罪去官築歸來菴於西山若將終焉川漢粵漢鐵路事權不一官商有異議特詔起公督辦至鄂而蜀□作又

端忠敏公奏稿 序

命往察治革命之謀遽與公以不屈死而社稷竟隕矣嗚呼悲哉雖然使公而富貴終其身不死於國天下後世亦惟置之尹畢諸公之間而已今則千古矣在公固可以無憾也所慨者後死故人傷心桑海如謝皋羽之哭文信國耳比者沈冤士楊子勤家筱濂諸君以公奏稿編次付印自護陝撫至直督凡十六卷歷年政蹟多見編中其間犖犖諸大端於國家大計得失尤有所關編成屬予弁其端予居公幕不久於公一生德業未窺其全而卽其治事之精敏立節之忠貞觀之則洵足爲我朝二百七十年大臣之後勁也披循遺墨回首當年不知其涕泗之何從也已歲在屠維協洽陬月桐鄉勞乃宣序

端忠敏公奏稿目錄

卷一

暫護陝西巡撫謝恩摺

請建周臣召公爽專祠摺

奏劾在籍劣員摺

請展提二成釐金續辦積穀片

奉撥軍餉及認歸洋款請變通辦理摺

請將耆儒事蹟宣付史館摺

籌議裁提釐金津貼銀兩摺

遵議籌款六條摺

覆陳練兵情形摺

請予牛兆濂等京銜片

遵 旨籌備 西巡及籲請迎 駕摺

請截餉發帑改撥摺

救荒重農辦法片

請 卹辦賑委員片

護理陝西巡撫謝 恩摺

敬陳管見摺

遵 旨查明提督參款摺

遵查災賑情形覆陳摺

請設官車局摺

請變通賑捐發照章程摺

遵 旨覈議賑務條陳摺

保薦于式枚等摺

節烈婦女請 旌片

請懲官弁以肅軍紀片

籌議變通政治摺

遵查孟縣官弁捏報軍情摺

卷二

籲請赴豫迎 鑾摺

派員赴汴迎 鑾摺

保舉人才摺

防護荊州萬城大隄三汛安瀾摺

揀員調補省會知府摺

職官創辦善舉請獎摺

辦理牙釐局員請獎片

端忠政公奏稿 目錄

賞給平定粵匪擒回方略謝恩摺

遴員請補撫民同知摺

請旌表孝子摺

查明知州參款摺

敬舉賢才摺

修築沿江隄岸涸復田畝摺

改籤捐爲賠款捐摺

購買通商場地畝摺

遵籌清丈屯田照完契稅摺

勒令道員回籍片

請獎洋務人員片

請獎書院監督分教摺

遵保經濟特科人才摺

請獎書院院長摺

請補撫民同知摺

揀員調補省會知府摺

籌辦屯田稅契量爲變通摺

酌保辦釐出力人員摺

請加鄉試中額摺

謝賞緞皮福字摺

請旌表節孝摺

請改撥克薩銀兩片

敬舉賢員摺

酌保辦釐人員片

端而只改入卷高

目錄

火車貨捐飭部立案摺

卷三

兼署督篆謝恩摺

奏留知縣差遣摺

出省查勘鐵路情形片

裁革陋規酌給公費片

武職大員請卹摺

菸酒糖捐提留經費片

奏調知府辦理學堂片

劃撥准餉片

請改撥邊防經費摺

選派學生游學摺

撥給毅軍槍礮藥彈片

獎勵洋務人員摺

鄂岸鹽釐請飭部改撥片

續加二成土稅請免徵摺

部撥鹽釐請分別改撥摺

淮軍協餉請減解摺

謝 賞御筆畫扇等件摺

道員請送部引見片

保薦使才片

擴充鑄造銅元片

選派學生赴德片

綠營兵丁分別裁汰片

籌辦荊州駐防學堂摺

屯糧撥充學堂經費片

胞弟考取特科謝恩摺

民隄潰漫搶築情形摺

調撥武建營赴廣西摺

進呈書籍摺

揀員請補道員摺

奏派德國游學生監督片

民隄潰漫籌辦情形片

保薦將才片

已故提督戰功卓著摺

選生赴比學習實業摺

請補道員摺

仍請改撥邊防經費摺

選派八營備調並江防情形摺

統辦膏捐充槍彈廠經費摺

槍礮局廠情形片

學堂籌建完備摺

籌辦礦務情形摺

請獎菸酒糖捐局員片

請獎學堂監督片

續選學生學習實業摺

荊州駐防學堂情形片

選派日本游學生監督片

游學日本學生學業摺

保薦在籍道員片

日本畢業生請獎摺

武備學堂請獎摺

荊州駐防官弁一體教練摺

獲匪懲辦並請獎摺

卷四

署理江蘇巡撫謝恩摺

抵蘇接篆日期摺

釐金礙難一律改辦統捐摺

進呈農學書籍摺

設江蘇學務處片

署提督節制留防水師片

職員捐田贍族請建坊片

整頓蘇省積弊摺

練兵要需請推廣鼓鑄摺

無錫辦學抽捐滋事片

孝子崇祀鄉賢摺

嚴辦梟匪整頓營務片

變通知縣參革留缺摺

開鑄經費撥欸片

清查田畝籌辦情形摺

清理丁漕片

整頓警察摺

褒揚耆儒摺

暫署江督謝恩摺

接受督篆日期摺

臚陳前署督政績摺

查明蘇省參案摺

關道庫欸存息摺

選派學生出洋摺

江西鐵路經費摺

學生學習水師片

學官宣付史館立傳摺

駐防緩扣馬乾銀兩片

開復被參教職摺

省城設立初等小學片

咨送師範生及教員片

議裁官缺辦法摺

代陳徐州設行省摺

遵查嘉湖漕務積弊摺

遵查秀水縣參案摺

辦學滋事辦理情形摺

南菁書院改學堂片

保薦道員片

現辦擠荒新賦增收片

現辦學堂情形摺

裁併各營籌辦情形摺

端忠政公奏高

手錄

七

懲辦梟匪保獎員弁摺

開辦初等小學片

京口駐防興學練兵片

臚舉道員勤績片

卷五

湖南巡撫到任摺

謝 賞福壽字等件摺

調補省會知府摺

調員辦理營務摺

湘省邊防安謐摺

代遞在籍大員遺奏摺

獲匪懲辦保獎員弁摺

遵查州縣出考摺

捐助學堂經費請獎摺

防務解嚴片

查明知州參款摺

改練新軍籌辦情形摺

設立督練處片

謝賞 御筆墨扇等件摺

代遞在籍侍郎遺奏摺

派員辦理學務片

建設初級小學片

籌辦罪犯習藝所摺

籌辦警察情形摺

保薦將才片

敬舉監司大員摺

查明提鎮各員摺

自開商埠籌辦情形摺

報効學堂經費請獎摺

湘省礦務自保利權摺

遵改監獄羈所摺

參革直隸州片

卷六

考查政治調員差委摺

調員隨同考察片

紫禁城內騎馬謝恩摺

開用關防片

請立停科舉摺

設法收回關稅郵政摺

條陳學務片

放洋日期摺

奏調知府飭令回省片

行抵美京情形摺

在美考查情形摺

調員赴俄片

美國派精琦接待片

接見各華商片

到德考查情形摺

高宗文、高宗

目錄

L

游歷丹馬瑞典那威情形摺

到奧情形摺

到俄情形摺

到義情形摺

游歷荷蘭情形片

比主贈送寶星片

謝 賞眉壽字等件摺

請定國是以安大計摺

請改定官制以爲立憲預備摺

請設編制局以資籌議摺

考查學務擇要上陳摺

軍政重要請取法各國以圖進步摺

謝 賞學堂匾額摺

請 賞洋員寶星摺

酌 保隨員摺

參 將因公身故請 卹片

擴 充翰林院經費摺

進 呈歐美政治要義摺

編 輯各書經費片

繳 銷出洋關防片

請 褒美洋員片

卷七

調 補江督謝恩摺

兩 江到任接篆摺

崇 恩政公序高 目錄

公司參款查明辦理摺

截漕賑撫並展辦各捐摺

籌辦南洋大學堂摺

淮北災重款產摺

撥款辦旗營工藝片

糾參辦賑不力各員摺

寬免鹽務提解銀兩片

懲辦逆匪酌保員弁摺

查明教案妥籌辦理摺

華僑分送肄業片

京口駐防學堂籌撥經費摺

請停道員分發摺

浦廠饑民遣散拍照呈覽片

查明水勢妥籌辦法摺

海防經費請改撥摺

擴充新軍辦法摺

水師學堂照案請獎摺

謝賞福壽字等件摺

籌撥學務公所經費摺

整理財政歸併各局摺

冬賑就緒接辦春賑摺

關稅議結並減收情形摺

查勘河道並籌辦工賑摺

嚴禁冒賑片

肅清文八、高、

目錄

一、一

辦賑玩誤隨時查參片

被災州縣借給公費片

淮南鹽務籌擬辦法摺

淮北銷鹽例限展緩片

曹匪竄徐痛剿聚殲摺

旗地預備陸軍建設中學摺

籌撥駐防學堂及習藝局經費摺

浚浦經費分派認解摺

胞弟補授郎中謝恩摺

華僑助賑請獎片

遴充留學生監督摺

率屬攤捐助賑摺

卷八

江西萍匪肅清摺

撥銀改建駐防校舍營房摺

趕借南鹽濟銷片

織呢廠請立案片

推廣上海華界巡警摺

密陳上海整頓警務片

僑商助賑請獎摺

瓷器公司立案片

籌設暨南學堂片

請給和比領事寶星片

籌撥復旦公學經費摺

端忠公長高

目錄

十一

籌撥中國公學經費摺

勦辦海州匪徒酌保員弁摺

江北工賑平糶辦理完竣摺

裁撤提塘另行設局摺

采辦黔米濟賑片

上海填河築路關門片

講武堂支撥經費片

謝賞 御筆畫扇等件摺

親貴出洋等款仍懇截留漕折摺

請補河務道員摺

請獎督辦賑務人員片

考驗庫儲火藥片

承襲世職請改文職片

敬舉人才摺

甄核條陳代奏摺

甄核條陳附奏片

獎勵賢能摺

保薦使才摺

歸併釐卡統收分解摺

均滿漢以策治安摺

請定 皇室典範摺

已故職官請卹摺

駐防要政各款照案籌解摺

卷九

端忠敏公奏稿

目錄

十三

請飭維繫僑情摺

禁米出口辦法摺

上海推廣巡警添撥經費摺

奏保道員片

江甯駐防旗營改建校舍請仍准動撥漕折片

親貴出洋等費請仍截留漕折銀兩摺

請賞辦理洋務人員卿銜片

變通缺產處分片

補救州縣虧累辦法摺

請獎辦賑義紳摺

籌議長江巡緝章程摺

試辦銅冶山礦務片

請飭保護華僑片

歸併農工商局事宜摺

甄錄條陳代奏摺

謝 賞大緞江綢摺

請獎辦賑人員摺

請褒美外臣片

運商報効銀兩片

請展鹽務交代期限摺

請嘉獎洋員片

請獎敘辦賑人員片

藉紓商力片

籌設甯垣鐵路片

認捐振款請核獎片

請開復道員摺

卷十

關稅援案議結摺

撤銷船會總理片

水師總兵開缺摺

飭解學堂協款片

撤銷革員處分片

選派學生留學摺

遷民實邊無庸置議片

變通武職補缺摺

請建已故撫臣專祠摺

請飭照解協撥銀兩摺

捐輸展限摺

查明局董參案摺

辦賑報銷摺

捕治梟匪通力合作片

籌辦地方自治局摺

預備議會片

實行禁煙摺

請給船主寶星片

製造局添購機器摺

改撥銅本片

改獎領事實星片

學堂畢業請獎摺

請賞辦學人員卿銜片

調員差委片

膏捐無礙禁煙摺

開挑運河片

改設礦政局片

官辦煤礦片

捐輸展限摺

製造淺水巡輪片

學務經費動用庫款摺

奏請歸宗片

故紳請入文苑傳摺

故員請卹並宣付史館摺

官築鐵路物料免稅片

卷十一

籌辦罪犯習藝所摺

創設南洋方言學堂摺

練餉支絀摺

改編巡防營隊摺

查辦江西教案摺

道員辦理教案出力片

參劾總兵不職摺

派員查辦餘孽片

剿辦梟匪情形摺

請賞假半箇月片

創辦法政學堂摺

駐防興學練兵照案撥款摺

淞崇安設無綫電片

上海貧兒院立案片

保舉道員片

開辦商業學堂片

運河工程片

酌保隄工員弁片

採辦米糧報銷摺

薦舉人才摺

及時用人片

胞弟以道員用謝 恩摺

勸捐員紳請獎摺

勦辦梟匪得手地方安靖摺

提臣宣付史館摺

援案撥補並飭催欠款摺

已故提臣請 卹摺

維持茶務片

敬陳軍政大綱摺

謝 賞紗疋摺

釐定茶捐摺

撫恤風災片

搜捕蝗蝻片

卷十二

遵查藩司參款摺

暨南學堂經費作正開銷片

保獎長江水師員弁摺

暨南學堂辦理情形摺

請撥華僑學堂經費片

紳商捐設貧兒院請獎摺

審明縱匪各官定擬摺

海軍添造辦公房屋奏銷摺

振款第三案報銷摺

查明運司參款摺

續造兵輪配募員役摺

改辦巡警教練所摺

改辦女學及幼稚園摺

搜捕蝗蝻片

設立衛生學堂及獸醫學堂片

顧岸銷而保鹽利摺

測繪學堂辦理情形摺

遵查商約大臣參款摺

勒拏戕官兇匪片

保獎製造局人員摺

日本贈送寶星請旨片

緝匪誤斃多命定擬片

辦理農業試驗場摺

創建圖書館摺

請將候選中書革職片

設立調查局片

改編長江要塞摺

請派員監視要塞工程片

謝 賞江綢庫緞摺

請給領事寶星片

皖省榨油公司立案摺

織呢請免重徵片

查明學堂借用祠宇摺

辦理初級師範學堂摺

模範小學辦理情形片

卷十三

杜官虧而重吏治摺

臆陳賢吏政績摺

捕蝗淨盡歲收中稔摺

工振報銷摺

密保將才片

總兵請卹片

撥款興修運河隄工摺

查明勳臣後裔摺

謝 賞大緞江綢摺

奏留補用知府片

恭慰 大孝摺

籌辦南洋勸業會摺

賞穿帶膝貂褂謝恩摺

調補省會知府摺

總兵請卹摺

請開復已故運司摺

徐州舉辦清鄉片

獲匪審明懲辦摺

查明司道參款摺

密陳被參司道可用片

教務長請獎摺

請開復已故撫臣摺

懲戒道員片

謝 賞遺念冠服物件摺

奏給領事寶星片

臚列籌備事宜片

請給領事寶星片

法政學堂辦法摺

諮議局籌辦情形摺

駐皖營隊回防片

京察議敘謝 恩摺

續籌推廣上海巡警摺

擬改縣名及城門名片

密陳力保主權片

籌撥京防要需片

遵查皖省參案摺

卷十四

賞給大清會典謝 恩摺

籌擬新兵出伍情形摺

捐輸分別停止展限摺

自來水由官經理片

從優議敘謝 恩摺

請徵銀解銀另收公費摺

查明知縣參款摺

省城巡警情形摺

暨南學堂添收學生摺

遵辦禁煙情形摺

請減行豫准鹽加價摺

開辦清理財政局片

密陳華僑事宜片

籌辦南洋印刷官廠摺

請頒發圖書集成片

藩司呈請開缺代奏摺

戊申綱展緩奏限片

試辦建昌官運片

以工代賑援案報銷摺

籌備南洋勸業會摺

赴賽物品免完稅釐片

賽會有裨實業片

解送京師圖書館書籍片

請給華僑學生官費片

請建殉難知縣專祠摺

捕治蝗蝻不致損稼片

已故大員籲懇 恩施摺

陸軍第一案報銷摺

卷十五

酌加湘鄂引票片

蘇撫出缺代遞遺摺摺

寬免道員處分片

查明知縣參款摺

審明革員按例定擬摺

審明管弁懲辦摺

徐屬清鄉情形摺

籌辦工科大學摺

模範監獄開辦摺

勦梟由甯用款奏報摺

鐵路渡淮修建轉橋片

敬陳管見摺

商業學堂款項立案摺

酌保水師出力各員摺

禁種鴉粟情形摺

改設高等巡警學堂摺

臚舉所知片

端忠政公奏稿

目錄

保獎辦匪清鄉員弁摺

請賞紳士卿銜片

保薦武員片

請將職商革訊片

道員被參免議片

文科高等學堂立案摺

請補河務道缺摺

暨南學堂添籌經費摺

會奏籌備憲政情形摺

卷十六

到津接印謝恩摺

胞弟記名謝恩摺

賞給寶星謝 恩摺

請選碩德通才以備顧問摺

請蠲旂租並給籽種銀兩摺

報撥俸餉米折銀兩摺

報撥 西陵兵丁錢糧摺

遵查知縣參款摺

臚陳籌備事宜摺

搶辦險工添撥經費摺

永定河大汛安瀾摺

酌保陸軍小學堂員弁摺

查明喇嘛參款摺

劃撥牧地摺

遵查知縣參款摺

陵差報銷摺

覈減局所薪費摺

請賞游學生監督京堂摺

武員憂憤捐生請卹摺

請給洋員寶星片

陵差沿途預備情形摺

查辦鄉民聚衆情形片

請速設禁中顧問摺

軍鎮籌擬辦法摺

端忠敏公奏稿卷一

暫護陝西巡撫謝恩摺
光緒二十五年九月

奏爲暫護撫篆恭摺叩謝

天恩仰祈

聖鑒事竊八月二十九日護撫臣李有棻聞訃丁憂當經臣電請

總理各國事務衙門代奏並將巡撫關防敬謹封存九月初一日

欽奉電寄

諭旨陝西巡撫着端方暫行護理欽此於初二日准西安府知府

童兆蓉撫標中軍參將祝鑑廷將關防

王命旗牌文卷等件齎送前來臣恭設香案望

闕叩頭謝

恩祇領受事訖伏念臣滿洲世僕曹部司員當臬事之時陳復藩

條之忝攝涓埃未報悚息方深茲迺渥荷

殊恩暫權疆寄竊維陝省爲九州上腴之壤撫軍乃千里連率之司昔年之稂莠交臻則務本訓農必圖豐於旣匱近日之操防重要則明恥教戰宜備患於不虞謹利權則劑其盈虧接寮屬則區其循酷胥關緊要曷可因循臣自愧庸愚每虞隕越念時艱之孔亟冀紓吾

君嘗瞻之憂懼臣力之弗勝益塵斯職仔肩之重惟有遇事會商督臣虛衷辦理以期仰答

高厚鴻慈於萬一除接護撫篆日期恭疏

題報外所有微臣感激下忱謹恭摺叩謝

天恩伏乞

皇太后

皇上聖鑒謹

奏

請建周臣召公奭專祠摺

光緒二十五年十月

奏爲請

旨敕建古名臣專祠以光祀典而順輿情恭摺仰祈

聖鑒事竊查接管卷內據鳳翔府知府傅世煒申據岐山縣知縣歐炳琳詳據紳士舉人段維等稟稱周臣召公奭以王室懿親分陝而治夾輔之績媲美元公裔孫召虎忠誠納誨輔政共和迄今讀大雅江漢之詩與召南蔽芾之什後先輝映史策榮之查岐山城南八里許有召亭村卽召公之采邑也村右有甘棠樹據水經注括地志諸書皆證爲當日芟憇之所攷諸邑乘召亭村舊有召公亭一區同治初年燬於兵燹現在祠宇僅留廢址而老樹婆娑

華實並茂巍然獨存都人士緬想前徽亟思崇德報功規復舊制惟查卷阿有周公邸因其爲公之采邑建祠奉祀早經列入祀典由地方官春秋致祭在案今召亭同爲采邑而輪奐無聞馨香莫薦未免相形見絀該紳等合詞稟懇擬請勅建專祠列於中祀並懇

頒賜匾額昭茲來許專祠擬卽建於甘棠之側正殿奉祀召公爽偏殿卽以穆公召虎附祀至建祠一切經費均由該紳士等自行籌捐不敢動用公款並請事竣免其造報等情由前藩司李有棻與臣前在臬司任內會詳請

奏撫臣魏光燾前護撫臣李有棻均未及核辦旋准移交臣竊維漢元始間詔祀百辟卿士有益於民者蜀郡以文翁九江以召信臣應詔至民自爲祠則自朱邑祀桐鄉始是皆本功德則祀之文

以彰遺愛難忘之美我

朝典肅明禋不特臣下立功

准予建祠致祭凡古名臣勲德不朽者靡不禮隆報饗闡發幽光
近復欽奉

上諭各直省大吏當以師長自居訓教州縣臣以爲近取師資更
宜遠規曩哲卽以召公奭等而論早於

歷代帝王廟東廡下列位從祀

曠典殊恩實爲前代所未有茲岐邑紳耆以召亭村爲周臣召公
奭采邑棠蔭依然擬新廟貌又以召虎重興周室數典無忘公請
捐建專祠並議附祀永前哲之烝嘗啟後人之觀感其於世道人
心不無裨益合無仰懇

天恩俯准岐山縣紳耆在於召亭村捐建召公奭專祠卽以召虎

附祀如蒙

俞允俟落成後再行陳請

頒給匾額

飭部增入中祀由地方官春秋致祭以光祀典而順輿情除咨部查照外所有請

旨勅建古名臣專祠緣由謹會同陝甘總督臣陶模陝西學政臣

葉爾愷恭摺具陳伏乞

皇太后

皇上聖鑒再此項工程均由該紳等自行捐辦事竣應請免其造

冊報銷合併聲明謹

奏

奏効在籍劣員摺 光緒二十五年十月

奏爲在籍道員劣迹昭著請

旨革職懲處以儆官邪恭摺仰祈

聖鑒事竊臣前在臬司任內訪聞商州在籍紳士甘肅試用道張慶煥爲富不仁聲名惡劣倚恃摺紳恣行鄉里正飭查間旋奉督

臣陶模批據商州紳耆鄉保商民人等稟訐張慶煥貪劣各款飭令確查等因當經前藩司會同臣扎委調署商州直隸州知州潼關廳同知焦雲龍按照稟控各節認真查辦據實稟覆不准稍涉迴護去後茲據該署州稟稱奉扎後逐款確查或稽核卷宗或考證輿論張慶煥除結交官長把持公事招養親兵關說通賄等款查無實據外惟該紳富甲一州於認借昭信股票翻覆取巧拆毀月隄移修

文廟照牆致水冲入淹倒民房辦理實爲荒謬此外承修官路充

當團總均被人告發有案至姦佔民婦另室而居行止有虧尤爲無恥訐稟間有失實之處而以上各節均確鑿可指不敢曲爲之諱稟請懲辦等情由署藩臬兩司請

奏參前來臣查在籍紳士張慶煥職任監司宜如何砥礪廉隅爲一鄉所矜式乃任性妄爲屢次被人訐告且以職官姦佔民婦煽處自如略無忌憚實屬有玷衣冠似此劣迹昭著若不從嚴參辦何以正風紀而肅官常相應請

旨將商州在籍紳士甘肅試用道張慶煥卽行革職並交地方官嚴加管束以免滋生事端正任商州直隸州知州羅壽昌雖查無與該紳交通往來情弊惟地方有如此劣紳未能及時稟辦究屬失於覺察並請將商州直隸州知州羅壽昌交部議處所有查明在籍道員劣迹昭著據實糾參緣由謹會同陝甘總督臣陶模恭

摺具陳伏乞

皇太后

皇上聖鑒訓示謹

奏

請展提二成釐金續辦積穀片

光緒二十五年十一月

再查陝省自兵燹後民力凋敝戶鮮蓋藏近年屢遭水旱雹霜各災愈形疲困光緒二十三年撫臣魏光燾奏請酌提二成釐金採買積穀以備荒歉原請自二十三年起至二十五年止三年限滿即行停止計二十三年提銀八萬五千八百餘兩二十四年提銀七萬五千九百餘兩本年釐金尙未截數將來約可提銀七八萬兩三共約提銀二十三萬兩此項酌提款內二十四年辦賑魏光燾已奏准動用銀六萬餘兩本年各屬災賑仍復無款可籌臣

昨又援案奏請動用銀六七萬兩所餘買穀之資僅止十一二萬兩銀數既屬無多定限又已屆滿若不預懇展緩早爲籌備將來再遇偏災憑何補救當此物力虛耗之時公家固無閒款可籌民力亦復艱難未逮惟展提釐金銀兩以本省旺收之款辦本省切要之務於歲解常額既無所虧於備荒要政復有可恃據署藩司升具詳請奏前來臣查秦民沃土不材本有惰農自安之習比年復昧於本計廣植罌粟樂歲僅足自贍一遇災歉艱食堪虞陝境山河阻塞舟楫不通不惟乞糴鄰疆輦運匪易卽移粟本境亦輸輓甚難光緒三四年間關輔奇荒重煩宸慮固屬天災流行亦因倉儲未備故一旦猝遇災祲立覺情見勢絀追維已事可爲殷鑒是積穀之舉萬難置爲緩圖而舍釐金一項又無從籌有的款伏維

皇太后

皇上軫念民依深維邦本議蠲議賑歲不絕書

湛恩龐鴻遠軼前古臣忝權疆寄敢不力顧秦民之本計冀少紓西顧之憂勤相應籲懇

天恩俯准自光緒二十六年起至二十八年止在於百貨釐金項內照前酌提二成績發各屬買糧存倉專備荒政餘事不准擅用一俟展限屆滿卽行停止以示限制除歷年提支銀數並買糧價值各屬存倉糧數有無因災動用之處行司催造各冊至日再行送部查核外所有現擬展提二成釐金續辦積穀緣由是否有當謹附片具陳伏乞

聖鑒訓示謹

奏

奉發軍餉及認歸洋款請變通辦理摺光緒二十五年十一月

奏爲陝省奉撥董軍月餉及認還加增洋款擬請變通辦理恭摺
仰祈

聖鑒事竊臣接准部咨俄法英德借款因佛郎磅價昂貴奏准陝
省加撥銀五萬五千兩又籌撥董軍來年月餉奏撥陝省鹽勛加
價銀七萬兩督糧道報効節省銀初次四萬兩來年一萬二千兩
共計十二萬二千兩均經臣先後行司遵照在案伏查償款月餉
均屬要需陝省雖庫款支絀敢不分任其難惟鹽勛加價從前以
二文計算約有六七萬金屢與晉省籌商迄無成議昨復電催始
允加增一文加數旣形短少撥款自無着落卽以督糧道報効節
省銀兩全數撥歸董軍而所短尙鉅值此時事多艱庫藏奇絀實
屬搜羅殆盡無款可籌再四思維惟有稍事變通以期兩無貽誤

查陝岸鹽厘一項每年約有二萬金向由河東代收交陝鹽飭加價仍照陝省原議每觔二文約得七萬金之譜擬請將此項徑由河東解赴董軍作爲陝省撥解來年月餉以歸簡便不敷之數擬在於加收土藥釐稅三成項下湊撥足數由陝補解清款非不知土藥稅釐向應專案報部惟當此智盡能索之時不能不爲挹彼注茲之計况陝省艱窘情形久邀

聖明洞鑒今以本省甫議加收之款暫濟添派協餉於常年土釐額數仍屬無虧似於帑項軍資兩有裨益至鹽飭加價明知晉省頗費經營然當時局多艱想夙具公忠者必能不分畛域力顧大局如謂商人藉口疲困有礙捐款乃自加價之議起陝省食鹽每觔已漲至三四文不等陝西徒受虛名晉商已陰獲實利况路鹽引地惟陝省溢銷數百名素稱暢旺無慮虧折引課既有增益票

立止... 捐自無窒礙騰出督糧道節省銀兩自本年秋季爲始計銀二萬兩來年通算四萬兩擬將此項專爲加撥洋款之用下餘不敷仍由藩庫另行籌足按期批解以濟急需似此盈虛酌劑月餉既不致虛懸償款亦無虞遲誤據署藩司會同釐稅局司道詳請具奏前來正核辦間復准部咨嗣後經部奏定籌餉各條及向來報部候撥之款非奏明核准不准擅自留用等因臣查部臣此奏因恐各省外銷動用是以慎重公帑豫爲之防今該司道等擬將鹽釐及鹽觔加價提解董軍月餉騰出督糧道報効一項備解加增洋款雖與部臣原奏稍有未符然於部中指撥之款均已分別籌備與留作本省外銷用款者截然不同可否飭部立案出自
天恩再督糧道報効一款原奏聲明自奉

旨之日爲始初年應繳銀二萬兩現奉部咨係滿年計算併請更正除咨戶部查照外所有陝省奉撥董軍月餉及認歸洋款加增銀兩擬請變通辦理各緣由理合恭摺具陳伏乞

皇太后

皇上聖鑒訓示謹

奏

請將耆儒事蹟宣付史館摺

奏爲已故耆儒學行純備懇

恩宣付史館立傳以彰樸學恭摺仰祈

聖鑒事竊維關中士氣純篤謹守禮法者多馳騫奇表者少間有一二茫昧無識之儔誤入歧途妄肆簧鼓學者莫不羣相鄙夷避之若浼抑邪與正實出人心之所同然比者屢奉

諭旨諄諄以屏斥異端昌明正學爲亟承學之士益復震聳悚惕
喁喁向風此以見

教澤之涵濡靡已而畝宮環堵歌獻於壇席間者所繫非淺鮮也
昔漢儒有言經師易遇人師難遭宋儒有言師道立則善人多老
成之典型實後生所則倣四方之觀聽雖曠代而如新及身未竟
厥施沒世宜豐其報茲查有長安縣已故舉人柏景偉卓然自立
學有本原由舉人大挑選授訓導謝職歸田所居卽明臣馮從吾
故里力宗所學爲之崇飾祠宇搜求遺書創立少墟書院刊布關
學編並及關學續編生平不空言性命躬行實踐期於有用咸豐
季年回捻交訐修堡築砦爲堅壁清野之計嘗上書當事請招撫
北山亡命用爲先驅事格不行其後卒如所議大軍西征轉輸絡
繹釐定里局章程費省而事集光緒二三年關輔大祲官私賑務

皆其擘畫其各鄉各邨互相保卹之法尤足便民先後主講關中
味經各書院科條整峻範以規繩巾褐景從多致通顯其行事儒
而非俠其立言切而不迂綜其生平有宋儒張載之風迄今嘉言
懿行猶爲秦人士所馨祝洵足以振興末俗增重儒林等情由署
藩司升允詳據紳士分省補用知府高增爵等合詞稟請具奏前
來臣查該舉人私淑先賢師資後學與已故廩生賀瑞麟分主講
席同負時名賀瑞麟生平事蹟經前學臣黎榮瀚奏請
宣付史館已蒙

俞允該舉人事同一律合無仰懇

天恩將柏景偉生平事蹟

宣付國史儒林列傳出自

逾格鴻慈除將該舉人履歷行實著述咨部查照外謹會同署陝

甘總督臣魏光燾陝西學政臣葉爾愷恭摺具陳伏乞

皇太后

皇上聖鑒訓示謹

奏

籌議裁提釐金津貼銀兩摺光緒二十六年二月

奏爲遵

旨籌議裁提釐金津貼等項銀兩以濟要需恭摺仰祈

聖鑒事竊臣前准部咨江蘇等省籌餉已有成數請

旨飭下各省一體仿照辦理各就本地情形詳細籌畫比較每年
入項究能增收若干比較每年出項究能減支若干迅卽指定款
目核明確數一律存儲預備提用等因光緒二十五年十月十三
日具奏奉

旨依議欽此欽遵咨行到陝當卽行司籌議去後茲據署藩司升
允會同善後釐稅等局司道詳稱竊維今日籌款之難莫難於下
洽輿情而上存
國體恭繹迭奉

諭旨無非嚴剔中飽慎節虛糜惟恐搜括民財致妨本計卽戶部
綜覈度支循名責實亦惟以地方之繁簡不同物產之豐嗇互異
飭令就地籌畫并不強以所難陝西司庫所入歲有常經近年解
款增多比較光緒二十年以前已增至四五十萬加以本年續撥
洋款籌解董軍月餉綜計數目不下六十餘萬兩之多是陝省於
未奉文以前實已歷次遞籌未留餘隙至於年例放支陝西爲估
餉省分本係量入爲出部臣在所深悉從前遵
旨裁併局所又復力爲撙節僅敷辦公刻下收支各款如戶部所

謂侵漁浮濫尙無此種情弊悉心籌畫唯有從前釐金改章之始各局卡酌給津貼每年共支銀一萬三千數百兩均在一成項下開支現擬一律裁免又光緒初年陝省銀價每兩換制錢一串七八百文客商納釐有銀有錢其完錢者每兩連火耗折合制錢一串七八百文至一串八九百文不等局員自行易銀報解相安已久遂成定規近來銀價較低商民仍照常交納局員亦仍舊征收藉補局用之不足并擬將此項折收箇頭錢文每銀一兩提錢二百文歸公每年約可提錢一萬數千串文二共合計滿年約可得銀二萬三四千兩現在部撥加還洋債銀兩卽指此款以資挹注等情請奏前來臣查關中四塞之區與沿江沿海各省情形迥殊物力有限辦理不無爲難伏讀光緒二十五年九月初五日諭旨各省情形不同宜於東南者或不能宜於西北其可行者自

當切實奉行而實有窒礙者亦當剴切敷陳等因欽此是籌款之
難易數目之多寡貴因地制宜不能執彼例此久在
聖明洞鑒之中若操切從事格外誅求轉不足以副

朝廷愛民恤商之至意此次裁提各項津貼係前此所本無箇頭
亦近年所始有現在辦法不過返向來之舊不至辦公竭蹶貽誤
事機倘有藉詞巧取累及商民者卽當從嚴參辦此外如有應增
應減之款臣仍當細心察核隨時奏報以期少佐公家之急而濟
時事之艱所有陝省就地籌款緣由除咨部查照外謹會同署陝

甘總督臣魏光燾恭摺具陳伏祈

皇太后

皇上聖鑒訓示謹

奏

欽定大清會典事例
卷一百一十一
一
遵議籌款六條摺

奏爲部議籌款六條遵

旨分別籌辦恭摺仰祈

聖鑒事竊臣前准部咨以帑項奇絀奏擬籌款六條請通行各省

將辦理情形及籌集銀數專案奏明報部核辦等因具奏奉

旨依議欽此欽遵抄錄原奏咨行到陝內除顏料緞疋兩淮鹽務

陝省無庸置議外所有田房稅契各條遵卽分飭藩司暨釐稅局

司道刻速遵照妥辦去後茲據署藩司詳稱田房稅契一條陝省

幅員遼闊閭里充盈近年民屯更田房稅契歲約征收銀四千八

百餘兩數本不多匿稅之弊恐難盡免現在通飭各屬申明定例

嚴立章程并剴切示諭嗣後置買田房立契後隨卽赴官納稅請

領司頒契尾典當之產一過十年亦呈請稅契粘尾其從前置買

及典當已逾十年之田房各契均自出示之日起予限半年一律請補免究既往如仍不隨時納稅及逾限不行補報者查出照例治罪補稅追價入官并嚴禁書差不准稍有需索通飭遵照在案如此切實整頓稅課當有起色惟稅本於契契出於民買賣之加少加多既難逆料價值之忽貴忽賤亦無定衡祇能嚴杜弊端實難預定確數至匯兌核減一條陝省向僅籌還洋款歸票商匯解每萬兩酌給匯費銀一二百兩不等在留外辦公一成款內動用并未作正開支前因留外一款入不敷出商人承匯現銀本屬有利可圖已將洋款滙費與票商議明停止不給此外再無發商滙解之項本無虛糜自屬無從核減又據釐稅局司道詳稱秦民廣植罌粟商販遠來價值甚昂獲利較厚烟酒傷生之物亦非日用所必需果因釐數增加返而重農貴粟非惟無妨本計并且有益

民生現擬遵照部議土藥加收三成稅銀烟酒兩項亦按照從前抽釐之數加增一倍通行各局卡均自二十六年正月初一日起一律舉辦惟土釐旺衰視乎收成之歉豐尤視乎銷路之暢滯烟酒兩宗亦必年穀順成乃能貨多釐旺每歲增收若干事後可以按籍而考先事實難刻舟以求至洋藥煙膏以及洋煙洋酒陝省尙無此種貨物土藥煙膏亦係零星售賣并無大宗販運出境可以量抽釐金各等情詳請奏咨前來臣伏查部議六條內陝省所辦稅契土藥煙酒各項皆係征自商民人事天時兩難前定其不能估計成數自屬實情當此庫儲奇窘籌款維艱惟有督同司道嚴飭僚屬各宜體念時艱束身自愛不得於所收之數稍有侵欺更不准於定章之外少有浮勒處處核實滴滴歸公以期上助餉需下卹民隱無論數目多寡均爲另款存儲聽候撥用除咨部查

核外所有陝省遵議籌款緣由謹會同署陝甘總督臣魏光燾恭摺具陳伏乞

皇太后

皇上聖鑒謹

奏

覆陳練兵情形摺

奏爲遵

旨覆陳陝省練兵情形恭摺具陳仰祈

聖鑒事竊臣於光緒二十六年二月十七日承准軍機大臣字寄

二月初六日奉

上諭練兵爲當今最急之務迭經諭令直省認真訓練勒限具奏并聽候次第調取來京閱看旋經各直省陸續覆奏現在時局艱

難餉需支絀雖未能多練大枝勁旅誠能就現有各營勤加訓練精益求精自足以備緩急之用著各直省將軍督撫懍遵前旨加緊訓練本年入秋以後除遠省另行派員校閱外其餘各省定當次第調取來京逐加閱看倘所練各營陳法技勇并無起色定惟該將軍督撫是問將此各諭令知之欽此遵

旨寄信前來仰見

皇太后

皇上建威銷萌整軍經武

廟謨深遠欽佩莫名伏維時局日艱練兵最爲先着而因敵爲用洋操尤屬要圖陝省改練十三旗哨經撫臣魏光燾及臣先後縷陳在案當此改絃更張之始苟非痛除積弊善立始基勢必徒襲虛名仍無實用撫臣魏光燾於兵事閱歷最深陝軍教練章程一

一經其手訂且各將領多劉錦棠舊部其上者頗有忠義奮發之氣其次者亦不忘廉恥自厲之懷臣猶恐日久生懈復經繕發簡明教誡若干條重申禁約或指陳兵家要旨或力斥軍營積習而尤爲諄諄致戒者則在禁虛伍嚴剋扣兩端節經臣隨時點驗暗加訪查尙無此種弊竇前咨調江甯陸師學堂高材生數名分撥各旗以資教練現復不時親加校閱或優予賞拔以示鼓勵或立予降黜以示懲儆或分操以觀其技藝之優絀或合操以究其陣式之正變或試爲主客攻守之勢以察其布置之疏密雖未能遽臻精詣而步趨準則漸有可觀誠能持久罔懈精益求精不難由門徑以窺堂奧近奉次第調閱諭旨秦中將士益復爭自濯磨感奮圖効至中操本各營旗所素習亦當抽暇演習勿任生疏期於相輔爲用隨時查閱其刀牌矛

復事遠遊以曠子職仍辭不行孺慕依依終其父之生絕口不言
試事現在父服已闋哀戀之誠初終無間見者敬禮聞者感慕至
其經術湛深文詞爾雅猶爲餘事興平縣歲貢生候選訓導張元
際天資穎異潛心宋五子書確有心得從遊多至自遠方居喪散
遣生徒不獲乃築學舍墓旁一遵朱子家禮朝夕拜掃其講學深
戒空疏之病專以修齊自勵以小學近思錄大學衍義迪學者兼
及天文算數兵法輿地農桑水利諸端居恆則淡泊寡營無汲汲
求名之念華州歲貢生候選訓導楊桂林以孝友著聞累世同居
長幼五十餘人白髮垂髻怡然自樂鄉里言家法者咸推廣秀里
楊氏往者秦中大饑桂林經辦賑務屏餽遺絕請託勸捐富室加
惠貧民州人服其公溥教授生徒未嘗責及脩贄灌園藝桑不慕
榮利以是士多親附之等語由署藩司升允具詳請奏前來臣伏

查該舉人等學有本原里稱孝友衡其品概猶具老成之典型樹之風聲宜爲國人所矜式溯查前廩生賀瑞麟等經前撫臣鹿傳霖前學臣柯逢時稱其經明行修疏請

特恩予以京銜均邀

俞允茲牛兆濂張元際楊桂林行誼敦篤尤爲風化所關可否量予恩施

賞加京銜以彰懿行而厲薄俗出自

聖裁是否有當謹會同署陝甘總督臣魏光燾陝西學政臣葉爾愷附片具陳伏乞

聖鑒訓示謹

奏

遵 旨籌備 西巡及籲請迎 駕摺

奏爲遵

旨籌備

西巡事宜並籲請朝謁

行在恭摺仰祈

聖鑒事竊光緒二十六年八月二十二日承准軍機大臣字寄七月二十九日奉

上諭朕恭奉

慈輿暫行巡幸太原本非久計長安爲自古帝王州山川四塞雄據上游著端方審度形勢於西安府城酌備駐蹕之所沿途蹕路所經並飭地方官豫爲籌備現在時事多艱度支竭蹶朝廷嘗膽臥薪務崇儉德該署撫當仰體憂勤惕厲之懷一切概從省約毋許稍涉奢靡是爲至要將此由六百里諭令知之欽此遵

旨寄信前來跪聆之下欽悚莫名伏念此次

聖駕出京率土臣民莫不汗淚交流置身無地而

天恩體恤於播越倉皇之頃仍寓恭儉撙節之思爲臣子者慚不

勝慚罪當萬死先是署督臣魏光燾在巡撫任內卽有營建

萬壽宮之議時方無事未及舉行今年五月團教紛爭大學士榮

祿知釁隙已開而兵凶戰危宜爲不虞之備密遣幕僚來陝令臣

未雨綢繆時當海上交鋒恐懈軍心未敢顯爲陳奏臣卽在滿城

內相度地勢畫定規模擬卽次第建置而經營伊始已電傳

鸞輅西來雖

行宮一時難以鳩工而省城新舊巡撫衙門南北兩處尙堪備暫

時

駐蹕其餘公所地方亦可備隨扈臣工棲止臣當於八月初四日

未奉

詔旨以前會同署督臣魏光燾恭摺籲請

乘輿西巡以遠寇氛由驛六百里馳陳在案陝省河山四塞古稱
奧區而自荒燹以來不免樸陋狹隘之誚仰蒙

聖明洞鑒戒供億之繁費恤物力之艱難關內臣民咸戴

聖德以如天彌覺慚惶之無地現與兩司商榷設立支應局一處
專辦迎

鑿事宜業已粗具條目固不敢奢靡以貢諛亦不敢輕率以將事

近來臣痰濕泄痢諸症略已就痊體氣尙弱犬馬戀

主之忱迫於星火擬請馳詣

行在瞻覲

天顏如蒙

欽定大清會典事例 卷一百一十一
俞允卽將應辦緊要事宜部署就緒其巡撫印信可否暫交署藩
司馮光通護理俾臣卽日東行恭迎

聖駕無任迫切瞻仰之至所有遵

旨籌備

西巡事宜及籲請迎

駕緣由謹繕摺具陳伏乞

皇太后

皇上聖鑒訓示謹

奏光緒二十六年八月二十四日奉

硃批俟西巡有日卽著在潼關迎駕毋庸遠來欽此

請截餉發帑改撥摺

奏爲陝省餉匱災重饑黎待哺籌款維艱瀝懇

天恩分別發帑改撥以甦民命而廣
皇仁恭摺仰祈

聖鑒事竊查陝省歲比不登去年秋冬間雨雪稀少本年三月至
今益形亢旱臣於八月間奏請開辦賑捐維時尙盼秋成未敢冒
昧請帑現在災區日廣各屬紛紛請賑而司庫奇絀無款可籌八
月二十日據署藩司馮光通詳稱竊照陝省司庫入款歲有常經
近年出款遞加無已二十五年地丁奏銷案內計已長支不敷八
萬餘金今年錢糧災緩過多釐金亦以時值年荒困而銳減約計
入款較上年所短甚鉅出款更比上年增至十餘萬之多茲算至
年底爲止待支之款如旗營綠營練軍入衛新募各營旗俸餉募
費甯夏採運糧石以及董餉洋款等應解之項約計不下一百餘
萬兩應入之款則僅有山西未解河東鹽釐及新辦潞鹽加價共

約九萬兩釐局裁節津貼約一萬數千兩尙爲有着之款督糧道未解報効屯墾經費銀三萬兩則因屯糧災緩能否籌足尙在未定此外向所恃爲大宗者厥惟地丁釐金兩項以往年入數推之尙應征抽八十餘萬兩無如夏秋酷旱連接成災各屬未完地丁紛紛稟請停緩釐金則因大局牽掣商賈不通百貨滯銷幾至無可抽收綜計丁釐兩款年內能收若干實無把握萬分僥倖亦不過能收三四十萬之譜出入相權加以上年長支之數約已不敷七十萬兩之多且尙有奉文飭籌迄無着落之款如保定協餉十萬北洋練餉每月一萬善後局籌製槍砲軍械約估九萬均不在內此陝省餉匱難支之實在情形也陝省地多磽瘠水旱偏災無歲蔑有上年秋間水雹旱霜平原北山各屬大率成災冬間雨雪無多糧價因之而貴本年春初淫霖雪澤三月間亦得透雨方期

二麥豐收稍資蘇息不意三月至今亢陽少雨乾嘆日甚以致麥豆禾苗夏收全行失望秋糧未種種者亦鮮長成官民盼澤昕夕禱求初則烈日炎風近則秋高氣爽夏秋兩熟業已全荒來歲麥收卽爲命脈乃今節屆秋分麥籽未能入土若再經旬不得透雨後患更不堪設想民間承連歲荒歉之後元氣未復蓋藏空虛茲復迭遇凶災遂已有剝掘樹皮草根以延殘喘者西同鳳延榆五府乾邠鄜綏四直隸州所屬四五十州縣赤地千里哀鴻遍野察其危迫情形竟與光緒三四年災情相似此陝省災重且廣之實在情形也陝省素號瘠區物產稀少財賦有限故出款素亦無多從前每年出入恆足相當甲午以來迭奉派撥月餉洋款等項及添建學堂挑練洋操諸務出款歲增鉅數曩故安常勢難應手於是整頓釐稅講求墾荒重辦土票捐輸議加潞鹽價值以及裁節

糧餉撤併局所凡有可以開源節流之處無不次第舉辦搜括靡遺今則源無可開流無可節而事變猝起要需迭增遂致庫儲條空勢成坐困至於辦賑必以籌糧籌捐爲先查光緒三四年之災其時甘肅有糧尙可藉以挹注今則甘肅與晉豫同一苦旱糧食竟無來路本省興漢二屬雖夏收尙稱中稔亦承積歉之餘與地近南山之商州等屬均僅能自顧且山谷阻深不通糧運勢難賴以接濟從前西同鳳翔各屬富戶尙多中戶尤夥不難捐集鉅款今則殷富日卽衰微中戶且將待賑是籌糧籌捐之難皆有甚於丁戊奇荒之歲矣前請提二成釐金積穀一款本可用以辦賑無如此款每年不過七萬金之譜二十三四五年所提分別撥發買糧因災動用所存亦已無多杯水車薪斷難濟事此陝省籌款維艱之實在情形也本署司職掌度支責無旁貸現查司庫正雜各

款僅存銀十餘萬兩不敷旗綠防練各營兩月餉需賑款更分毫無着雖已請開賑捐不特值此時艱捐務久成弩末抑且緩難濟急陝西居天下上游山河四塞尤宜保其完善培養國脈以振全局用敢瀝陳下情等因具詳請前來臣伏查該署司所言均係實在情形惟時艱如此苟可不煩

聖慮何敢以截留改撥等情冒昧奏瀆無如數月以來旱象已成祈禱無應如再過半月不雨則雨雖降而亦無濟麥雖種而亦不茁秦民曾經丁戊奇荒至此益形惶懼幸值

鑿輿西蒞關中士庶聞知忍饑待

澤如盼雲霓均有

後來其蘇之望緣見

上諭凡

車駕所經之地悉免錢糧是以全陝窮黎欣欣相告以爲無災者
尙邀豁免有災者何患流離延頸企足惟盼

西幸臣等亦得仰借

宸慈鎮撫黎庶不至因飢饉而別出事端實爲至幸合無仰懇
天恩俯念災情過重庫儲久虛准將應解京二十五年土釐煙地
稅煙酒糖釐共銀一十七萬三千六百六十五兩一錢六分又新
海防捐二十三四五次共正項銀三萬五千八百九十七兩一錢
全數截留并請

飭部通籌酌劑迅撥巨款分飭解陝以充短餉辦賑之用仍將前
派保定協餉十萬兩北洋練餉每月一萬兩均予改撥他省以資
挹注而恤兵民出自

逾格鴻慈除咨部查照外所有陝省遘災司庫支絀懇請截餉發

帑改撥各緣由理合恭摺瀝陳伏乞

皇太后

皇上聖鑒訓示謹

奏

救荒重農辦法片

再據籌賑總局司道詳稱案查前因陝省被旱成災饑黎待賑孔亟渥蒙

恩旨飭於城關內外設廠煮粥以拯阡危當經欽遵辦理在案茲查自上年十月設廠以來迄今已滿四月就食貧民增至十餘萬人賑糧多至三四萬石

皇仁浩蕩感頌同聲惟查歷屆開辦粥廠向自冬月起至二月春暖止令各歸農自謀生計本年節候較早農事將興若令戀此饘

粥致荒東作殊非所宜且值春氣勃發聚十數萬衆於會垣尤慮熏蒸釀疫所有城關內外粥廠除外縣就食災黎業經資遣回籍領賑外本處食粥貧民擬酌量變通放至正月底止自二月初一日起改爲統散乾糧每半月散給一次庶日期稍展俾得乘時力田且免羣居致疾似於農務賑需兩有裨益等情會詳請奏前來查該司道等所擬辦法係於救荒重農統籌兼顧自尙可行除飭切實照辦外理合附片陳明伏乞

聖鑒謹

奏

請 卹辦賑委員片

再據署藩司馮光通呈據略陽縣知縣涂耀庚詳稱查縣屬去秋亢旱成災經前署縣陳貽香稟請發款賑撫因地廣災重饑民衆

多公款不足必須勸辦捐借方能濟事當商令在籍原掣湖南改
 掣河南大挑知縣趙賈芳幫辦賑務並清查戶口就地勸捐該員
 誼篤梓桑慨任其事無論官款民捐一手經理捐資者爭出私廩
 就賑者人免阻饑絲毫不欺全活甚衆自去秋以至今春該員遍
 歷鄉村昕夕靡間勞瘁不辭詎本年辦理春賑該員於三月初四
 日覆查戶口回縣經過東鄉黃家營地方山路崎嶇馬行失利將
 該員翻跌崖下受傷甚重醫治罔效旋即因傷身故聞者無不歎
 惜懇請奏卹等情由司轉詳前來臣伏查從前山東等省委辦工
 賑積勞病故之員一經奏懇無不立沛恩施今該員趙賈芳襄辦賑務墜崖殞命較之積勞病故者情
 尤可憫合無仰懇

天恩俯准

飭部從優議卹以慰幽魂而昭激勸出自

逾格鴻施除將該員履歷並原領執照咨部查照外謹附片陳請
伏祈

聖鑒訓示謹

奏

硃批著照所請該部知道欽此

護理陝西巡撫謝

恩摺

光緒二十七年正月

奏爲叩謝

天恩仰祈

聖鑒事竊光緒二十七年正月二十三日內閣奉

上諭山西巡撫著岑春煊調補陝西巡撫著端方護理欽此伏念

臣調任豫藩已於本月初九日請

訓仰荷

聖慈諭勉

賚予駢蕃緣戀

闕之情殷致首塗之期緩何幸仍留

輦下權撫關中犬馬有心本不忍於辭

主雁鴻滿目慚無術以安民臣惟有益矢慎勤力圖報稱作牧而

當京兆喜長依

日月之光愛

國而祝年豐庶徧愜雲霓之望所有臣感激下忱謹繕摺恭謝天

恩伏乞

皇太后

皇上聖鑒謹

奏

敬陳管見摺

奏爲和議恐難速就要地宜思預防謹就管見所及恭摺具陳仰祈

聖鑒事竊維此次拳教相仇釀成奇變直東一帶彌望寇氛每念主憂臣辱之言益思懲前毖後之計自七月下旬京畿不守

車駕播遷

皇太后

皇上百姓是憂力申和議將以敦槃之好易戎馬之爭薄海臣民莫不冀望款局之就緒近一二月戰備鮮修敵遂因之暗啟戎心益行詭道不折一矢遂入保定矣不絕一弦且到正定矣彼既多方相誤而愈張其兵不血刃之狂我復曲意相從且愈形其如入

無人之勢查正定西來之道有二一由山西一由河南山西防務仰荷

聖謨密運策畫周詳井陘本天險之區宋慶馬玉崑亦老成之將彼族輕入重地亦未必不隱有戒心唯自正定至河南府中間所過順彰衛懷諸府地勢平行既無奇險之足憑防守空虛又乏重兵之可據狼貪鷹顧逐逐其來衣帶河流何能禁渡夫事前而爲之備則每易有功及變乃爲之防則恆嫌不及河南河南府洛陽縣東漢西晉於此建都其地西衛長安北通直隸東達湖北襄樊通衢數省古所謂四戰之國也明知

六飛幸陝

駐蹕關中拱衛之師星聚雲集而眈眈虎視西不敢窺函谷者東可以擾襄樊清浦漕糧改由漢口中途隔絕餽饟何從是猶關而

被扼其吭也臣俯念時艱深維地勢欲固陝省不能不兼顧洛陽可否請

旨特派知兵重臣來河南南府城駐紮河南河北各軍統歸節制敵既節節進占我亦節節預防而進可以聚天下之兵徐圖規復退亦不失據封疆之險自固藩籬大約護楚以伊闕爲先衛秦以新安爲重二處皆不出府治百里依山阻水有險可憑自應分布勁兵安置砲位其餘要隘亦當依次設防統冀

欽派有人因地制宜用專責任至洛陽雖力籌捍衛而襄樊亦誼屬輔車欲收助臂之功先張犄角之勢查湖北督撫皆駐省城襄陽本其轄郡若蒙

諭旨就督撫中選擇一人分率勁旅移駐襄陽既可保運道之西通亦可杜敵人之東擾上兵伐謀孟珙所謂不爭之爭也或謂湖

北省城濱江地重督師遠出覘國有人不知武昌固在臨江仍居腹內必長江各省被擾而武昌乃以次相延兼之武昌雖安而襄樊有事則建瓴之勢已爲人操襄樊無事卽武昌已危而扼要之權仍歸我有蒙古不得襄陽不可以入宋羊祜必守襄陽乃可以攻吳此皆前事已然者矣我

聖祖仁皇帝之削平三藩也先欲

親幸襄陽後仍

特簡重臣移駐其時天下騷然震動十三行省卒以形勝在握遂收大功地利之言詎不重哉又况襄陽之去江陵步道計五百里勢同唇齒無襄陽則江陵可虞江陵者長江之上游而西蜀之門戶也

朝廷巡方至陝方將恃西蜀爲內府託長江爲外援而安危皆繫

之襄陽故控制經營實與洛陽爲並重臣知識謏陋報稱毫無祇以渥受

國恩仰蒙

聖訓返躬循省非息心緘口所敢安而

宸居爲首善之地

皇躬爲出治之源必

九重能就萬安而四海始歸一治臣謹就管見所及恭摺具

奏伏乞

皇太后

皇上聖鑒訓示謹

奏

遵 旨查明提督參款摺

奏爲遵

旨查明開缺喀什噶爾提督余虎恩被參各款據實覆陳恭摺仰
祈

聖鑒事竊查接管卷內前撫臣岑春煊於光緒二十六年十二月初一日承准軍機處交片本日軍機大臣面奉

諭旨前據榮祿奏參喀什噶爾提督余虎恩當經諭令袁世凱就近查辦現在余虎恩業已來陝著改派岑春煊按照原參各節據實查明具奏欽此相應傳知欽遵辦理等因由岑春煊扎飭藩臬兩司會同善後局司道轉令余虎恩將應查各節逐一遞具親供確切核議旋經山東撫臣袁世凱將查辦參款情形奏請勒限追繳十二月十九日奉

硃批著岑春煊歸案查辦欽此經岑春煊抄錄原奏行令余虎恩

將應還銀兩如數繳足案未辦結適岑春煊調任山西巡撫奏請將此案移交臣欽遵辦理光緒二十七年正月二十六日奉硃批著端方認真查辦覆奏欽此欽遵轉行查明該提督被參各節並催繳冒領銀兩去後茲據藩臬兩司會同善後局司道詳稱遵卽按照原參及覆奏各節詳加稽核逐一確查其自開招以至成軍先後領銀三萬五千兩或係批准有案或係照章開支無所用其朦混惟所領遣費較原限萬兩之數溢領銀一萬八千兩有奇爲此案緊要關鍵迭經行令據實移覆並催將溢領銀兩照數報繳嗣據該提督逐款移覆遞具親供清摺前來如大學士榮祿原奏內稱該提督招募五營七月初成軍在京領銀二萬五千兩七月底開赴保定領銀一萬兩該軍自開招以迄成軍閱時不過二月先後已領銀三萬五千兩一節查該提督清冊內開光緒二

十六年六月初十日由中軍糧餉處領京平銀五千兩六月二十一日由中軍糧餉處領京平銀二萬兩八月初在保定由大學士榮祿行營支應處領湘平銀一萬兩核與原奏三萬五千兩數目相符其馬隊左營自光緒二十六年六月十一日開招起十九日成軍止步隊前左中三營自六月二十四日開招起七月初一日成軍止馬隊右營自六月十七日起至八月初五日止先後共計支發招募小口糧湘平銀二千九百五十兩二錢六分又支製辦軍裝京平銀一萬八千八百四兩九錢一分又支總統辦公薪水巡捕差弁等自六月初十日起至七月三十日止計五十日共湘平銀二千九十三兩三錢三分又支馬隊左營自六月二十日起至七月三十日止月餉馬乾夫費湘平銀四千五百四十九兩六分六釐又支步隊三營七月初一日起七月三十日止大建月餉共

湘平銀一萬四百八十五兩六錢以上總開共支湘平銀三萬八千八百八十三兩一錢六分六釐內除申年銀二百六十八兩一錢四分四釐實不敷銀三千六百二十兩一錢七分二釐核其招募勇數起止月日所支銀兩尙無浮銷之弊至薪水辦公月餉均按照武衛軍向章開支惟中列文案巡捕帳房差弁等名目稍有不同曾經該提督稟明軍務處批准有案按冊逐一查算數目均屬相符所稱實用實銷並無侵蝕等情似尙可信又如大學士榮祿原奏內稱遣費係屬向章飭由直隸藩庫另籌借銀一萬兩以爲該軍資遣之費並限定遣費不得過所籌萬兩乃該提督向廷雍借銀一萬五千兩已逾原定萬兩之數又電商兩江總督撥給五千兩復在東省另索遣費一節准山東撫臣袁世凱覆奏該提督於遣費一款在保定領銀八千德州領七千又電借江督五千

復由東省兩次領銀八千四十八兩於原定萬兩之外溢領銀一萬八千餘之多請飭勒限追繳等語查該提督移稱當大學士榮祿奏請裁撤之時曾經先後稟請借銀二萬二千兩以爲支發月餉遣費之用未蒙批准嗣經飭赴德州遣散限定遣費不得過萬兩若議遣時卽行遣散此數尙屬不敷况至保定始行先領銀八千兩距原議之日已逾半月是時陣亡逸去之外約存五營弁勇一千九百六十餘員名除找發七月分餉銀三千六百餘兩又發前八月半箇月正餉外就銀遣勇計開去勇丁四百七十三名長夫五十名共發口糧遣費銀三千二百九十五兩三錢五分其時尙在八月半間及二次在德州領銀七千復電借江督五千又收本軍鞍馬價銀二千八百五十兩復行遣散勇丁一千四十七名長夫三百四名共發口糧遣費銀一萬三千二百七十六兩已屆

閏八月十四五等日守候日久款愈不敷所餘四百二十名因無款可籌始行專摺奏請於閏八月二十九日行至恩縣經東撫移知奉

旨籌發恩餉兩月計銀八千四十餘兩是爲第三次報銷之期其時有督糧道尙其亨會同監放且尙有不敷餉銀四千餘兩經提督將隨員差弁帶赴河南借款補發始得一併開遣此時距奏撤之日已經兩月有餘閱時旣多遣費自重兼之道路梗塞文報不通未及請示奉批從權辦理委無侵蝕欺朦情弊等語該司局等覆加查核所稱尙係實在情形惟遣費於大學士榮祿原定萬兩之數並未遵照辦理致溢領銀一萬八千餘兩雖據聲稱均係實銷實報並無侵蝕欺朦惟究係未奉批准之款內除八千四十八兩係屬奉

旨給發且有督糧道尙其亨監同散放應請從寬免議外其餘溢支銀一萬兩有奇迭經移令該提督照數報繳據稱挪湊得湘平銀三千兩作爲賠款餘實無法稱貸等語除將已繳銀三千兩先行驗收聽候報撥外其未繳銀七千餘兩既據移稱因守候日久需費愈多其情不無可原應否俯念事出有因免予追繳請查核具奏等情前來臣覆加查核該提督余虎恩前領募勇經費銀三萬五千兩或係照章支發或係批准有案既經該司局按冊核算數目相符則所稱實用實銷尙屬可信惟遣費一層較原定萬兩之數溢領銀一萬八千餘兩內除奉

旨籌發銀八千四十八兩應予免議外其餘溢支銀一萬兩屢經司局移催僅據報繳湘平銀三千兩其餘銀七千餘兩雖按之原限銀數核計本係溢領之款惟據聲稱實緣領款未齊不能及時

資遣爲日過久需費太多至未經請示之由又因道途梗塞文報不通所致其情均尙可原可否仰懇

天恩俯念該提督事出有因准將未繳溢領銀七千餘兩免予追繳之處出自

聖裁至該提督被參各款詳加考查均無確據業經奏參開缺應請毋庸置議所有查明開缺喀什噶爾提督余虎恩被參各款緣由謹恭摺具陳伏乞

皇太后

皇上聖鑒訓示謹

奏

遵查災賑情形覆陳摺

光緒二十七年正月

奏爲遵查陝省現辦災賑情形恭摺覆陳仰祈

聖鑒事竊查接管卷內光緒二十七年正月初五日內閣奉

上諭本年山西陝西被災甚重適值駐驛差務較繁河南亦有偏災且係運道所經均不免藉資民力業經該撫等奏請分別蠲緩錢糧小民諒不致失所惟念今春青黃不接之時民情恐形困苦著錫良岑春煊于蔭霖卽飭各該藩司迅速查勘應如何酌量撫恤之處分晰具奏候旨施恩用副朝廷陽和布闔嘉惠黎元之至意欽此當經前撫臣欽遵飭司查覆茲據署陝西布政使胡湘林詳稱遵查陝省被災州縣至六十餘處之多徧野哀鴻嗷嗷待哺渥蒙

恩頒巨帑截撥南漕百萬饑黎甫有來蘇之慶所有受災州縣應行豁緩銀糧及

巡幸恩免錢糧均經分飭確查專案辦理其各屬災情輕重及籌

款辦賑各節亦經隨時詳奏各在案茲奉前因復經會督局員悉心查覈如西安府屬之三原高陵興平同州府屬之大荔朝邑郃陽白水潼關鳳翔府屬之扶風岐山郿州及所屬之洛川中部乾州所屬之永壽邠州及所屬之淳化長武十七處或社義各倉尙有存糧或購買糧石未盡動用或賴就地勸捐或請義紳助賑皆能支至三四月暫可不煩公帑麟遊郿縣二屬被災較輕業經酌撥銀兩分別調濟汧陽隴州二屬未據報災而外來貧民較多以致糧價昂貴現亦買糧平糶足資補助其餘咸甯等四十四州縣所存銀糧兩項數均無多通盤籌畫仍非得有大宗來源不敷救濟竊以爲今日撫恤之法仍不外於續撥賑銀力催糧運實辦捐輸三端上年冬間預慮各屬災廣賑繁曾經分撥銀三十萬兩藉備春賑復恐分布不周因就各屬災情重輕續於賑款內籌撥銀

十六萬兩綜計先後籌撥春賑之款將及五十萬兩似可稍資補
苴然奉發賑款雖有餘剩而賑務截止無期勢須續請發帑方足
以竟全功此撥銀以籌撫恤之一端也陝省東西各路採買糧石
業已分別就近撥濟所有轉運南糧前經詳請飛飭設法挽運現
值春水方生運道當較順利但能於二三月間運到數萬石以上
則以糧項濟銀款之窮可期顧全危局此催運以籌撫恤之一端
也捐輸一事各屬就地勸捐恆苦觀望現值賑需緊迫不能拘泥
成規曾經由局多方設法廣爲招徠並分發各屬實官虛銜等項
實收各數百張俾令隨收隨填期於捐生踴躍輸將以輔公款之
不繼此勸捐以籌撫恤之一端也總之賑局方長庫儲奇絀目前
事勢雖略可支持而此後春澤稍缺糧價日昂億萬饑黎彌殷呼
籲應如何請

旨施恩之處詳請察覈具

奏等情前來臣查該署司所陳係屬實在情形辦法亦極周妥此
次陝省奇災幸值

翠華蒞止疊荷

發帑撥糧俾百數十萬饑黎免爲溝瘠

湛恩汪濊固已薄海同欽當茲時局艱難苟可勉力支撐何忍屢
爲瀆請第慮本年節候較早儻或春雨稍遲麥收又歉則賑務益
形喫緊而款項實慮不敷

朝廷軫念民依有加無已應如何破格
施恩以宏博濟出自

聖裁非臣所敢擅請所有遵查陝省現辦災賑情形理合會同護
理陝甘總督臣何福堃恭摺具陳伏乞

皇太后

皇上聖鑒訓示謹

奏

請設官車局摺

奏爲陝省因災暫免差徭擬請設立官車局以顧差需而蘇民困
恭摺仰祈

聖鑒事竊據陝西善後局司道詳稱陝省各州縣向設里民局徵
收差徭以備供支各項差使車輛之用歷經詳定章程奏明辦理
在案自上年五月以來秦隴諸軍赴援北上征調紛繁九月後各
省餉差貢差輻湊來陝東西大路衝要各州縣供億繁重十倍尋
常兼值歲歉民窮地方凋敝每遇各項要差過境所需車輛動輒
以百數十計局中所備長車此挪彼絀兼顧不遑州縣恐要差延

誤每責成里局供支里局既無錢僱車每強向鄉間借覓事竣之後此項車價地方官固無力挪墊里民局復無款可籌民間賠累實已不堪卽如本月間調任山西巡撫岑春煊率誠信軍赴晉需用差車數在三百輛上下均未付價以有限之財力應無窮之供支值此饑饉薦臻閭閻重困流離瑣尾方且自救不暇安有餘力應差在州縣智能盡索原非故事煩苛在地方羅掘悉窮猶必勉爲支付民情困苦殊可憫矜本司道等再四籌商計非設法變通無以顧差需而紓民氣擬請

奏明於本省東西大路起潼關廳以迄長武縣擇地方設官車局派員專辦每處各先預備差車五六十輛凡有往來差務專歸該局供支如有不足隨時以市價招雇通年經費約計需銀四五萬兩現司庫久經告匱而民瘼所繫萬難置爲緩圖應請無論何款

先行動用咨行戶部准其作正開銷一俟年歲稍豐各屬徭差徵有盈餘再行酌復舊章用權緩急據該司道等會詳請奏前來臣覆查陝省災區過廣民間杼柚皆空若復攤派差需勢有不給計惟變通設法庶期供張無乏而民力藉以稍舒至該司道等所陳需款孔亟擬無論何款先行動用之處係爲顧恤民瘁起見似宜准令動支作銷以期簡捷如蒙

俞允臣當飭令該司道等詳定章程妥協舉辦一俟年歲稍豐卽行查照舊章辦理除咨部查覈外所有因災暫免差徭擬設立官車局緣由是否有當理合恭摺具陳伏乞

皇太后

皇上聖鑒訓示謹

奏

請變通賑捐發照章程摺

光緒二十七年三月

奏爲秦晉賑捐現擬變通發照章程以歸簡一而祛弊端恭摺仰祈

聖鑒事竊據陝西籌賑局司道詳稱前因秦省開辦賑捐奉部頒發空白執照三萬五千張旋以分發不敷擬再續請一萬五千張准部咨覆查捐輸空白執照開辦偶有不慎弊竇卽因而叢生此次陝省請頒空白執照紙先後已發給三萬五千張如果利弊兼籌自可俟勸辦有效再行續請等因遵查此次秦晉賑捐前經調任撫臣岑春煊飭局逕填執照不給實收原爲鼓舞捐輸起見第思名器所關宜求詳審現以空白執照分給委員雖填發不致稽時而儲藏究虞非地兼之取攜自便散漫無歸誠有如部臣所慮者從前籌餉事例頒發空白執照承辦人員往往折減無已轉礙捐

途侵蝕相尋致成參案百端弊混不可勝窮自應遵照部咨慎始圖終妥籌辦法擬請除南洋等處捐務仍由該大臣照前經理外其各省辦捐分局及勸捐各委員均先發給實收俾資勸辦應領空白執照統交各省藩司計數收存編號蓋印遇有捐生報捐准由各局填發實收持赴本省藩司衙門換領部照每屆三月各省藩司將填發執照號數及所收呈繳實收開單咨陝局備覈應收捐款責成各分局及勸捐委員按照秦六晉四奏章分解兩省備用如有短解卽由兩省自行催提遲滯者奏參追繳似此量爲變通於事局藉期整一於弊蠹胥可蠲除據該司道等會詳請奏前來臣等公同覆覈前擬逕填部照原期鼓勵捐輸惟是賑需固待勤籌流弊必宜預戢如因始謀未審一旦捐路壅塞欲速不達轉虞無裨賑需該司道等係爲慎重名器以維捐務起見自宜允爲

變通辦理以期杜絕弊端除咨部查照並分咨各省藩司遵章舉辦外所有擬議變通給發部照緣由是否有當謹會同會辦賑務大臣刑部尙書臣薛允升山西巡撫臣岑春煊合詞恭摺具陳伏乞

皇太后

皇上聖鑒飭部覈覆施行謹

奏

遵 旨覈議賑務條陳摺 光緒二十七年三月

奏爲遵

旨會議具奏仰祈

聖鑒事竊於光緒二十七年二月二十二日准軍機大臣片交是

日面奉

諭旨內閣代奏中書尹克昌條陳陝省賑務等語著薛允升端方覈議具奏欽此相應傳知欽遵辦理等因前來當以該中書等所陳條目頗多飭令陝西籌賑局司道等妥爲查覈就現辦情形分別議覆去後茲據該司道詳稱竊以爲陝省此次被旱成災情形極重待賑者計六十餘州縣饑黎至百數十萬之多朝廷頒帑截漕恩至優渥加以各省協款義賑次第遄來力謀拯救凡屬智慮所及悉皆次第施行茲查該中書所陳四條有業經再三籌備者有尙宜斟酌舉辦者有持議宏達而覈諸現在事局未能遽爲辦理者謹特縷晰陳之有如通盤籌畫一節本年正月間曾由局詳請奏陳災區情狀聲明屢次給賑銀數並以撥帑催運勸捐三大宗爲目前救急之計通盤覈算賑至四月底止極重之地尙須四十餘萬兩次重之地尙須十餘萬兩業經詳懇續撥

賑銀未准部覆至於極次戶口隨時更徙增減不同約計在一百七八十萬以上嗣後如能隨時請帑兼以各省運糧濟之似尙可稍支時日藉救阡危此擬議通籌之大略也又如開通糧道一節陝省辦災原以籌運爲第一要義上年秋冬以來於龍駒寨潼關分設轉運局以挽江浙鄂豫濟陝糧米猶慮運行有滯是以又有樊城周家口亳州三途起運之奏現在各局運到糧石視奉撥之數僅及二三成近雖潼局招集大幫車輛得以源源而來然終不如江海漕轉之利捷亦因地勢限制然也至於川蜀及洵陽一路山徑崎嶇運道艱阻勞費特甚濡滯非常當此財力不敷勢難舉辦該中書所請備米一百萬石備麥一百三十萬包覈計糧價腳費需款約三百餘萬兩萬無此大力採集惟多儲糧石卽多濟阻饑似須咨請戶部另籌銀款以作多方採辦之資於賑需不無所

裨此籌議運糧之大略也又如所陳採辦雜糧一節前於上年冬月閒疊經委員赴甘肅秦州河南陝州採買包穀綠豆等項雜糧各數十萬觔陸續轉運到陝正資補救現幸渥澤已霑疊經通飭各將夏禾秋糧早爲播植無籽種者官爲酌給以冀收穫但冀入夏以後膏雨應時疊購之雜糧足敷散貸續種之雜糧可事補苴足以裕民時而資補助此擬議採辦之大略也又如所陳以工代賑一節查所謂手車肩挑木溜之法卽係夫運規程現在龍駒寨轉運南糧除驟運外擬定夫運章程十條至爲詳密行之亦頗有效至水利一端本屬要務前經通飭各屬察度妥辦河北地高利於開井河南地窪利於濬渠前大荔二華均經辦有成績近如涇陽之開鳴玉渠岐山之修召公祠皆係藉工作以資賑卹此擬議工賑之大略也據該司道等覆議詳請覆奏前來臣等覆查陝省

災重款絀凡可爲補救之法自當博採兼收以期利濟察覈該中書所陳各節多已見諸施行其餘闊大繁費之談似未便輕議措置除仍設法集捐招車利運並將條陳中應行事宜分飭辦理外所有遵

旨會同覈議緣由謹合詞恭摺具陳伏乞

皇太后

皇上聖鑒訓示再此摺係端方主稿合併聲明謹

奏

保薦于式枚等摺

光緒二十七年三月

奏爲遵

旨保薦人才以裨時局恭摺具陳仰祈

聖鑒事查上年秋閒屢奉

明詔飭各督撫切實保薦有用之才以備錄用冬閒臣仰蒙召對
恭承

溫諭飭令保薦人才仰見

朝廷立意振興求賢若渴之至意竊思迂瞽固執鮮通世務不足
以應

旁求卽曉暢機宜研覈外務而立身或未盡精純亦不敢率行陳
奏惟查有江南道監察御史于式枚久參戎幕熟審外情辦事則
具有條理立身尤有本末洵爲濟變之才又前安徽青陽縣知縣
湯壽潛敦信樸學廉幹有聲研求經世之書一歸切實可用該二
員體用賅備才識兩優儻荷

聖明鑒及

特予擢用俾奏所長於事必有所濟再于式枚一員現官御史例

崇禎忠文公、高

卷一

三二一

不准疆臣保奏第人才難得既有見聞亦未便拘泥舊章不以上陳合併聲明所有臚舉人才以裨時局緣由理合恭摺具陳伏乞皇太后

皇上聖鑒訓示謹

奏

節烈婦女請旌片

再臣訪聞孟縣喬上村李根源之母孀居多年茹苦守節此次吳景琦潰勇到時任意作惡該孀婦卽避往山谷潰勇等躡踪而至意在行強該節婦卽投崖自殞又白文盛之妻死於山谷徧體鱗傷力拒情形可以想見該二婦矯然風節不受強暴之污一則畢命懸崖比潔連城之玉一則甘心飲刃難柔百鍊之鋼衆口一辭同聲感歎臣職司查訪未敢壅遏不言應請

特恩給予旌表以慰貞魂並飭該縣造具事實冊結詳由撫臣送部察覈其有續經查出節烈婦女應由地方官詳明撫臣照例辦理是否有當謹附片具陳伏乞

聖鑒訓示謹

奏

請懲官弁以肅軍紀片

再營官既有鈐轄之權哨弁亦有分管之責乃營官既逃各哨弁遠縱容勇丁橫行無忌軍法之謂何除已與敵遇之孤山口哨官李公敏楊勝林孫慶德尙屬力不能敵情有可原姑請從寬免議外其李成金之幫帶李萬書哨官劉同智吳金斗謝寶德項恩承姜元和侯寶義李鴻堃劉攀龍之哨官桂成江何振江陳大發楊森桂哨長陳鑑清李升恆郭如珍李發長等以臨敵潰退而論已

屬畏蕙無能以縱勇搶掠而言尤屬行軍無紀擬請

旨將遊擊銜補用都司李萬書花翎補用副將劉同智補用守備
吳金斗藍翎守備桂成江均革職永不敘用藍翎五品銜千總謝
寶德藍翎五品銜把總項恩承藍翎五品銜外委姜元和侯寶義
李鴻堃藍翎千總何振江陳大發楊森桂藍翎把總陳鑑清李升
恆郭如珍李發長均斥革遞籍管束以示懲儆其吳景琦一軍淫
掠不法人所共憤哨弁等亦不免有助虐情形臣飭取該營弁銜
名覈辦據太原府知府吳匡覆稱該營隸晉節制未久尙未造具
弁兵花名冊籍無憑詳送等語查該營現經潰散統領該軍之候
補知府吳炳鑫駐紮靈邱其閒應行質訊者人數較多劄提傳訊
易滋紛擾應請

飭下山西巡撫岑春煊責令吳炳鑫將該營幫帶哨官等按名交

出從嚴審辦其尤爲不法者審明確情亟宜寘之重典以紓怨憤而肅紀綱是否有當謹附片具陳伏乞

聖鑒訓示謹

奏

籌議變通政治摺

光緒二十七年三月

奏爲遵

旨籌議變通政治條列辦法敬陳管見恭摺仰祈

聖鑒事查上年十二月初十日恭讀

上諭著軍機大臣大學士六部九卿出使各國大臣各省督撫各就現在情形參酌中西政要舉凡朝章國故吏治民生學校科舉軍政財政當因當革當省當併或取諸人或求諸己如何而國勢始興如何而人才始出如何而度支始裕如何而武備始修各舉

所知各抒所見通限兩箇月詳悉條議以聞等因欽此本年三月初三日續奉

上諭此事予限兩箇月現已過期其未及陳奏者著迅速條議具奏等因欽此跪誦之下欽悚莫名仰見

朝廷軫念時艱勤求治理懷襲故蹈常之戒措窮變通久之規

綸綍昭垂宙合鼓舞臣近承

明詔切究時宜嘗深維艱大之投遺當求合

創垂之制度爰恭讀

高宗純皇帝三禮義疏序文云夫禮之所爲本於天殺於地達之人倫日用行於君臣父子兄弟夫婦朋友之間斯須不可去者天不變道亦不變此其本也其制度品節服物采章隨時損益屢變以適其宜者禮之文也紬繹

祖訓與

聖意如合符節乃知紹

天闡繹之規卽法

祖勤民之至竊本此意衡量世務綜覈事機欲精求損益屢變之
采章以蘄合終古不變之道術揚推其間蓋得固本之事二因時
之事二去弊之事四興利之事四敬爲我

皇太后

皇上陳之一曰分藩以支危局周分支庶祚延八百最爲後衰漢
置郡國春陵一呼卒復舊物自時厥後莫不以衆建而強孤立而
弱南宋之季議四鎮以經邊遼元之衰賴諸王以延祚其明效也
本朝龍興東土築五城環衛而居用貝勒治兵任宗親議政蓋不
泥分藩之迹而師其意故武功震耀悉出勳舊三藩之變勒爾錦

喇布諸王實勤其事咸豐同治之際削平大難恭忠親王密勿樞機厥功尤偉良以任事則識練識練則事濟也近時宗王漸不任事賢者事文墨而不知大體食租稅而不知民事甚或沈溺聲伎跳刀撫視以爲笑樂馴至今日非偶然也應請援引宋元比附舊事分建四藩以固疆圉川滇通邛夔之奧南走百蠻吳逆資以倔強宜置一藩以策印緬荆襄居江漢之上形勢天成古爲用武之國天下有事視爲重輕宜置一藩以控馭之他如閩粵雄紀南服竟豫坐控中原宜分置兩藩以備緩急無事則練習邊事攷察民情可祛錮蔽之習有事則首尾策應互爲聲援以固磐石之宗所謂百足之蟲死而不僵况親王皆壯佳氣鬱然及今補救尙易圖功一日遊學以擴見聞溯查開國之始火器所勝卽係取資西洋日紅衣大礮曰天祐助威大將軍師行所至無不攜之止武定功

實在於此

聖祖仁皇帝天縱睿智雖當征討未遑之際不廢

經筵外人歷算之微亦資國用使圖理琛報聘而知異俗設鄂羅斯學館而懷遠人迄今頌

聖僉無異詞今歐亞諸王無不以遊學爲興邦之基大彼得潛往英荷船廠工作學成而返遂爲強國日本伊藤山縣破幕府之局遊學以興東瀛弱如暹羅亦遣世子學英國水師各國敬禮有加遂息狼顧今若派令王公貝子貝勒自就傅以後出洋三年責以略識西文西例編作日記以資考究並飭出使大臣隨時照料其經費卽由四成洋稅項下開支懿親濡染西事則識解旣通轉移自易歸國後上可裨助機務次亦經營部旗使有師法可循自收觀摩之益誠以分親則無內畔之疑位尊則得任事之力較之多

遣學生易染洋習情事隔閼無由自見所費同而得失異矣此爲宗藩籌教養所謂固本之事也一日分旗移屯查往時京旗馬甲不下十五萬人各省駐防亦不下三四十萬此皆仰食縣官每歲糜餉約二千萬宜其豐富殷實異於齊民臣生長京旗服官陝右所至之地詳加詢訪莫不以生計維艱爲言京師則苦米確房煙錢鋪之盤剝陝西則苦回民之盤剝每放甲米糧米出倉已入人橐蓋不農不商終身寄居坐食未有能存活者譬如一家子弟衆多皆遊惰仰食被父兄亦未有不受其困者况以一人養八旗世子子孫不令別營生業名爲廩餼之優實則生計之絀此阿桂所以歎息於盛時沈桂芬欲補苴於晚近也茲者都城兵火伍籍散亡上年僅放兩月半餉馬甲之苦至不可言倉庫之給已不足恃極其流弊尙難逆料宜及今爲因勢利導之謀作亡羊補牢之計

則莫如移屯便移屯之利有四教以稼穡可復滿洲樸厚之風勞以力作可收務農講武之效衣食出於自謀則不苦帑藏歸於覈實則不費且民旗雜居耕作與共婚嫁相聯可融滿漢畛域之見尤利之利也甫離兵事之後生計蕩析室家仳離則動衆可以不疑樂土可以共適較之承平尤爲易辦此實移屯之一大機會滿漢之一大生機也各省不乏閒曠之地可耕之土如陝西之平原北山遇此災荒尤多廢絕之戶可以撥充至酌給行裝子種建宅安屯則有五常堡前例在可以援辦一曰并官加俸查天聰五年始定官制立六部每部設管部一員滿蒙漢承政三員啓心郎一員承政以下設參政八員辦事筆帖式一員順治初翰林院二十員侍讀學士二員侍講學士二員侍讀侍講各二員修撰三員編檢各四員此舊制也不聞廢事今各衙門官冗而無專責事雜而

無專例日日求自強而自強無日歲歲求人才而人才日消此豈
運數使然耶法制有以驅之也今擬請并省職事專任士人每署
酌設二三十員略如國初之制優予俸薪其餘作爲額外行走概
不給俸裁省之俸錢卽以加額缺之廩祿務令官能其事祿稱其
官官外無身家之謀事外無求備之義則奔競息而職業舉矣其
署置之法但論賢愚不問資格不分滿漢均由各衙門長官辟薦
本署之員略仿兩漢郡守自辟丞掾之例滿歲但課其殿最不問
所從來近日西人設官治事卽師此法一賢進而其黨無不畢進
所以能措置合宜事無不治也大約國家之利曰簡與要其害曰
繁與密盛強之世無不簡要積弱之世無不繁密簡要則提挈綱
領而事治繁密則互相牴牾而事廢此爲八旗籌生計所謂因時
之事也然使固本因時兩事次第舉行而無實學以緯之真才以

幹之則固本猶屬空言因時亦無實濟於是不得不急籌祛弊不
得不急籌興利祛弊之事奈何曰學校科舉則例胥吏凡四事學
校爲人才之源各行省郡縣有學轡軒有使庠序之外又造以書
院學官之外又敦聘山長法制最密本無可議惟考課以八股爲
棄取則所講者科目之學決非身心之學若令書院學塾皆以通
才敦行之士居之其選聘之法令紳富公推由郡縣以達督撫
朝廷從而決擇之其課程之法當用鹿洞舊規並採用各國新法
大約縣學習四子書通中國地理史略算數圖繪格致之粗淺者
學成給文憑升之郡學郡學習五經通鑑政治之學習外國語言
文字算學格致稍深者學成給文憑以升之國學國學又兼肄數
事而加精分門隸事以待各衙門之取求如此則考課之事積分
數而可用學校之士積公論而不僞然後無用非所習習非所用

之歎學校既定請進言變科舉科舉爲銓政之源朱子嘗言若要
恢復須廢三十年科舉何言之切也近今文字惡薄儒習備贅談
義理則高揭孔孟談治法則訟言堯舜而問以方域時事法律治
道則瞽然不知各護其短各是其私聚歲舉千餘之衆不聞有一
爲國捍患救傾者則科舉誠不可以不變變之之法莫妙於以學
校本師爲考官以學校功課層級爲官階層級如一時難得師範
之才無以慰生徒應舉之望則莫如師歐陽修隨場去取之法湖
廣總督張之洞曾詳言之其武科改演槍礮宜歸併各省武備學
堂各省不能同時並舉則先就沿海各省學堂演之大學士榮祿
兩廣總督陶模曾詳言之裁定別擇無待他求科舉既定可進言
刪則例則例者圖治之條目如匠氏築室先畫宮於堵而衆工運
斧斤焉宜令各衙門舉舊有之則例與新行之事宜彙總呈送政

務處揀擇仿修訂會典之例博徵通達大體之儒與明習律令之士爲編纂官必須貫通本末歸於簡要戶部歲計當列表以究款目分出入爲兩大綱常年支銷之款當列預算表以備經用年清年款不准前後牽混吏部銓政亦須立專格以備職掌其捐納班次繁雜保舉案牘叢積宜令畫分爲兩班各據年勞捐資先後以次選補刑部立法最爲矜慎惟近時華洋雜處教案繁興彼此刑律輕重懸殊比擬難期允洽辦理殊形棘手擬略加變通定一中西參合之公律訊辦教案易於就緒亦不致偏枯則例既刪可進言裁胥吏胥吏者以則例爲舞弊之護符以成案爲把持之利券官司不能訶當局無從詰顧炎武日知錄所詆爲胥吏之天下也人人知其害而不能去者何耶以

朝廷任法不任人也今世變日亟勢不能持咫尺之案以治紛例

案之局破胥吏自無從窟穴其間不言裁而自裁今日之事是也
第以備稽科舉之士任素不相習之事其勢仍不能不委之於胥
吏是胥吏實與科舉學校相終始有八股之人才卽不能少今日
之胥吏裁之之法有顯棄其身有隱消其黠兩事如六部胥吏何
止數千訛索把持是其慣技今當大亂之後簿籍皆空另立冊檔
一委士人永遠不再招致此輩是謂顯棄其身或仿照方略館總
理衙門供事僅司書寫不准擬稿不立科房公事隨到隨辦永無
積壓是謂隱消其黠康熙年間嘗有意於散吏矣然不變科舉不
刪例案則事繁而雜官冗而昏不久旋復是變科舉刪則例尤爲
裁胥吏之根也以上諸弊旣任人而力祛則興利之事亦當任人
而畢舉興利之事奈何曰裁兵節餉京旗駐防旣分旗移屯則每
年可省二千萬綠營現在需餉無多每省仍不下二三十萬防勇

不下七八十萬通各行省計之歲餉不下三千餘萬又占歲入之強半戊戌以來人人言自強將將言練兵方領之迂生乳臭之小兒亦復奮臂鼓勇侈言攘夷養成而食行餉烏合而糜鉅資省省有之一遇事變未見敵面已先作賊矣以敲骨吸髓之餉養虎狼賊盜之兵此葉適所謂養兵如故和親亦如故也臣以爲國之強弱在政不在兵政事修明則雖無尺錘寸鐵必強政事墮壞雖招募至萬萬益弱今擬一切裁去十成之五需以數年齒日加長再挑選裁汰遞減以至於盡歲可省銀五千萬以開武備學堂以開礦山鐵路以與民休息十年之後則成莫富之國莫強之兵又何懼而不爲耶使強鄰偪處不修聘問日以干戈陵我是誠不可以裁而敵固未嘗不以仁義市我也何苦而不裁又使市械招勇果有足恃雖繁費亦所不惜今則未見敵而已潰且淫掠焚殺洩爲

民害者十營而九則又何愛而不裁曰包釐并卡查各省釐卡林立密如蛛網尺天寸地盡入包羅酷矣哉民力之窮也然考釐金之歲入僅千八百萬其外銷於有司及漏卮中飽約贏兩倍而強說者謂一切徵歛無不倍入於官約計四萬萬衆婦女老弱不計外而丁男之力作以輸者八千萬人則每人出一金有奇較英人重賦略相等窮膏血以供國用猶可言也至窮膏血以供中飽不可言也然則爲國用謀一日之贍而斯民不致大傷其惟包釐并卡乎每省立一總局凡分卡比較歲入之數責之殷實坐賈認捐總其成於省局一切分卡之擾累巡役之婪索委員之中飽悉可裁汰每歲總計所入於司農者數必見盈而客旅少一稽禁之累近時江浙兩省閒有行之尙無弊竇民頗稱便若能推廣行之亦節用愛人之道也一日興稼勸農開國之初

太宗文皇帝篤念田功每言專務農業以足民用
大哉王言可爲萬世法程自捐例大開人盡得官農去其一召募
繼與人離南畝農又去一佚爲商賈窮爲盜賊農又去一其能負
耒耜以耕者十無二三民如之何不窮國如之何不困一逢洊饑
窮於賑貸東南徵斂不知紀極又益以賠款之鉅爲日之久憫然
傲然而不知懼何耶宜雜採元郭守敬之修河北塘濬明左光斗
之興沿海屯田就遣撤之隊伍遊惰之貧民以兵法部勒擇地興
屯略如前直隸提督周盛傳之開唐官屯水田辦法近可繼軍食
之不足遠可興地利於無窮或再募富民開荒能開百畝者給以
軍職寵銜能開千畝者更加優異如漢之武功爵如此則不費帑
藏銖黍之用而閭閻已得邱山之利况兵興之後奉直一帶曠地
日多山陝沿邊如伊克昭烏蘭察布二盟尤多腴地可耕屢經臣

工條奏開墾決非鑿空之言若能酌量撥給移民興屯利賴尤溥至於農學一門尤當聘師研講日求進步水利一事尤當因勢利導以備旱乾此又農事之極不可緩者雍正年間分遣勸農之使警察遊惰之民歲以豐穰民無菜色其明效也今宜參用西法先舉化學之淺近者以開民智而策農功富教之良圖實基於此一日興鑛勸工伏讀方略

景祖翼皇帝居赫圖阿喇地始開金銀鑛鐵冶以利國用丕基嗣服罔有不遵錢流地上厥猷茂焉今中國產鑛之區日出不窮其豔稱於章奏日報者已數十處西北邊地最多山陝尤旺盡富媪寶藏之積挾鴻蒙未發之奇天殆留此菁華以待

聖清之裒益擬請

旨飭下礦務局大臣集股招商募兵開採其辦理之法當先立礦

學兼用鑛屯何謂鑛學延訪熟悉鑛務之員兼聘化學技師招集學生分班測驗必須熟諳鑛綫之層折化分之精粗足勝開採之任試有實效款不虛糜名曰鑛學何謂鑛屯調集防營兵士開採未開鑛產用土法陶鍊不須遠購機器就原有之將領爲鑛務之表率辦事不須添人則局用省工作不須用餉則工費省由小而大由一處而至多處名曰鑛屯其取稅章程可訪漠河辦理目前雖覺竭蹶十年之後收利必豐足國阜民可以操券此興利之事也以上各節非敢泛引遠舉好爲高論以駭物情亦不敢持祿養交拘泥舊章以塞觀聽蓋必將深究利弊之所窮與本末之所在必詳必審毋固毋我遲之又久始敢出此第事體重大古今雜施參合博會恐其博而不純也又必考之祖宗成法之所有與方策之所書始敢採摭敷陳爲芻蕘一得之

獻大致論制度則不分古今不分中西歸於求是焉而已論學術則不問新舊不問異同歸於務實焉而已我朝法制章明

聖賢繼踵其間沿襲之要增損之宜與世變通未嘗稍執成見卽如上海則設招商局京師則設同文館皆我

皇太后垂簾以來剏設之善政虛心延納不可殫紀我皇上仰承

慈訓宏展

廟謨因時制宜與天合德茲者事變益亟

天聽日聰廣延接之風

垂救時之諭乃知殷憂所以啟

聖多難所以興邦臣尤不勝區區大願謹條列變通事宜用備

聖明採擇所有籌議變通政治敬陳管見緣由恭摺具陳伏乞

皇太后

皇上聖鑒謹

奏

遵查孟縣官弁捏報軍情摺

光緒二十七年四月

奏爲遵

旨查明孟縣文武各官捏報軍情各節恭摺仰祈

聖鑒事竊於光緒二十七年三月十八日承准軍機處片交軍機

大臣面奉

諭旨岑春煊奏查明孟縣文武各官捏報軍情各節請旨懲辦一

摺著端方前往確切查明詳細具奏原摺著鈔給閱看欽此

臣謹

於二十八日恭請

聖訓並奏帶隨員於四月初二日出省分途密訪一面飭令各地
方官將民間稟報案據檢齊賚覈二十三日行抵壽陽縣屬之太
安驛據前派查探委員分省補用知府曾廉陝西候補知縣李志
高先後稟覆前來臣復經遍詢州縣參考卷宗按歷村墟廣資輿
論逐一平情查覈如岑春煊原奏初四五等日曾有洋兵至直隸
平山屬之十八盤地方距孟縣城尙有一百餘里而駐防該縣之
李成金劉攀龍吳景琦所帶各營遽謂洋兵大股來攻因之譁潰
一節查已革千總劉攀龍一旗駐十八盤內之關臺村而孤山口
黃安口皆其分防已革守備吳景琦一營駐車輪口已革提督李
成金馬隊一營駐孟縣城十八盤在孟縣東北距城五十八里其
關內坡下八里卽關臺村偏東爲黃安口距孟縣城七十五里再
東爲孤山口距孟縣城九十五里皆與直隸平山縣接壤車輪口

在孟縣城北八十五里劉攀龍派哨官李功敏分守孤山口桂成江分守黃安口孤山口地最險要又有孟縣練勇哨官潘錫三李成金哨官楊盛林孫德慶先後前往協防黃安口則桂成江所領一哨之外有近村民團百餘名同駐初五日孤山黃安二口同有洋兵進犯孤山口先到洋兵馬隊數十名各營哨出隊防堵及洋兵步隊分路進攻各軍卽退至二十五里之莊頭地方各軍陣亡五人受傷五人洋人進至五里之燒磁窰將關門焚毀初六日仍由原道退出關外聞是役洋兵亦陣亡十餘人教民死者二人馬斃二十餘匹該委員周歷查訪之時親見倒馬尙在溝中犯黃安口之洋兵來勢亦盛桂成江督令民團充當前敵致爲洋兵攻潰陣亡民團三十一人帶傷十四人是夜洋兵進關至二十里之攔頭起住宿初六日由大背坡進攻關臺村劉攀龍探知卽於巳刻

帶隊回縣洋兵午刻到關百姓已逃竄幾盡洋兵掠取牛十三頭猪數頭爲食初七日仍出黃安口回平山車輪口亦於初六日有洋兵約六百人進口開炮至七里之碑子嶺吳景琦聞信先退至三十五里之上社鎮洋兵過棗兒溝炮傷鄉民四人是夕卽駐兵該處亦搜民間牛羊猪雞等物初七日仍復退回查孤山口黃安口攔頭起皆距孟縣城不及百里關臺村更近在五十里之內洋兵旣已闖入何至距城尙有一百餘里且孤山口陣亡軍士五人黃安口陣亡團勇三十餘人已經岑春煊委員祖繩武撫卹每陣亡一名給銀二十兩每受傷一名分別輕重給銀十二兩十兩以下不等其並非未見敵蹤遽爾譁潰可知至黃安進口洋兵一食至牛十三頭猪數頭其數當亦不下千人謂爲大股尙屬可信且亦經祖繩武親查每失牛之家給銀三兩均有冊案可憑李成金

劉攀龍忱於敵勢不能保其防地而又懼有失律之愆先後稟詞張皇其事則有之然不必概屬捏報也又原奏李成金劉攀龍吳景琦之兵譁潰知縣張壬林聞信亦卽帶印潛逃於是該縣人心洶懼相率遷徙李成金劉攀龍吳景琦各營遂趁風淫掠所過村莊搜括一空本地土匪繼之而起各營潰勇並擾及忻州壽陽一帶等語李成金駐兵孟縣城內聞黃安口孤山口同時報警初五夜派勇出探初六上午回報洋兵進口各營已潰之信李成金卽出城西去孟縣知縣張壬林典史倪衍蕃亦同時潛逃下午該營馬隊進城因無人統率恣行搶奪土匪亦乘機而起計初六日在城夥搶團防局允豐公布店錦生瑞估衣店東關萬恆當西關興泰郝雜貨店是日劉攀龍帶隊自前敵退回城內商民因留劉攀龍駐縣彈壓至初七日劉攀龍又去其部下兵亦因與馬隊潰勇

本地土匪相結復搶城內德興永錢店其專控劉攀龍潰勇搶掠者牛村爲興昌當香河村爲田國俊家縣城西關爲萬益當至吳景琦一軍前派赴車輪口防地在上社等村已不免有姦淫情事三月初六日率潰退之兵到上社鎮共四五百人搶併生劉克慎家武舉李樹楨所開之萬盛永德興隆悅勝永源盛永各店又搶鋪戶瑞凝福福和泰瑞生昌復和永義泰泉謙泰亨謙福當泰和瑞三德公天德店德源成同德店大德興所掠財物無算其地婦女被害尤慘言之令人髮指是日大隊復由上社村起行又搶柴莊村搶蕭家滙搶磨盤村搶教場村宿店上村搶掠一空之外復肆淫害根錠保之母被逼跌傷白文盛之妻拒污斃命其衆所共知者也初七日住喬上村逼姦節婦李根源之母未成李節婦投崖殞命村中各戶擄掠一空初八日復至店上村毀壞所餘器物

過磨盤村鎗傷一人蕭家滙鎗傷一人柴莊鎗傷一人至上社鎮
 爲民人逐至柴莊河中潰勇開鎗民用農器石塊彼此互打各斃
 數人鄉紳來縣具稟似謂吳景琦死於是日當時軍務倥傯縣官
 又逃無人相驗應卽以來稟爲憑吳景琦既死該潰勇等益形散
 漫遲至十一二日始到忻州僅住一宿因忻州駐有防營尙無騷
 擾之事李成金原止駐紮孟縣城內倉皇遠遁考其勇丁搶劫之
 案轉在壽陽居多計在董家莊搶董聚榮董家興兩家在解愁鎮
 搶天和遠鋪及安鳳竹家在宗艾鎮搶永長駝店及張濤家其在
 孟縣城內搶劫之案則皆夥同練勇士匪爲之又有專控練勇哨
 官潘錫三率勇搶者爲南關雙合永布客及牛村鎮鋪戶六家專
 控土匪搶者城內爲義和隆布店東關爲興隆當牛村鎮爲昌興
 當現在孟縣計正法者潰勇二人團練哨官一人土匪三人拒捕

格殺者練勇一人土匪數人鬪毆致斃者營官一人潰勇數人而民氣彫殘失者不能復得損者不能復完污者不能復潔小民雖懦飲恨難消臣每檢閱卷宗思之心痛非張壬林之輕棄其地各營官之輕棄其師何至於此夫李成金劉攀龍吳景琦當洋兵進攻各口身爲營官既不能堅守不搖使敵人有撼山之歎又不能嚴師徐退使斯民有安堵之形潰勇所經恣爲搶劫本三人所同罪而吳景琦則更任勇擾害無所不爲甚至嘖有煩言謂姦淫一層吳景琦卽爲禍首使其尙在已當立正軍法今既罪孽貫盈激成衆怒因而致斃其下手主名屢經訪查民間畏罪不肯指出其實上社鎮鄉紳來縣具稟謂打死五人內一騎馬者許是吳姓卽無異其自首但吳景琦恣行強暴蹂躪民家天理人情皆罪不容於死準以格殺勿論之條應請毋庸置議其李成金劉攀龍二人

與吳景琦同一縱勇搶劫之愆而尙不至如吳景琦之不法已極
臣細心察訪各商民於劉攀龍猶有恕詞宗艾一鎮則更謂其不
 但無搶奪之事並同稱其有彈壓之勞至張壬林平日招勇練團
 以保衛地方自命請款斂費商民恃爲長城一旦警信遙傳身先
 逃逸地方無主城邑爲墟因之潰勇益得恣其橫行土匪從而增
 其毒燄同聲憤恨實非苛求岑春煊謂不予以嚴懲以後地方豈
 尙有捍守孤城爲

國效命者誠慨乎其言之也現張壬林尙未緝獲而李成金劉攀
 龍二人已由岑春煊遵

旨解赴刑部審訊相應請

旨飭下刑部按照臣所查各節逐一質訊勿任飾詞狡展以成信
 讞所有遵

旨查明孟縣文武各官捏報軍情各緣由謹恭摺由驛五百里馳陳伏乞

皇太后

皇上聖鑒訓示再臣於拜摺後取道澤潞直下襄樊到湖北巡撫新任又晉省自四月初間已得透雨十六十七復連降大雨民間大可補種雜糧於年歲不無補效合併陳明謹奏

端忠敏公奏稿卷一終

端忠敏公奏稿卷二

籲請赴豫迎

鑾摺

光緒二十七年八月

奏為籲請馳赴河南迎

鑾隨扈恭摺仰祈

聖鑒事竊臣恭讀七月初一日欽奉

上諭准改於八月二十四日恭奉

慈輿啟蹕回京等因欽此伏念臣受

恩深重未報涓埃去歲

鑾輅西巡備員關輔幸得依光

禁籞時觀

天顏

賜予便蕃階資屢晉自維何許被此

端忠敏公奏稿

卷二

一

殊榮茲當

翠華啟蹕之有期實爲溥海臣民所共慶查湖北毗連豫省密邇程途臣擬請先期馳赴開封恭迎

聖駕籲懇

天恩准令隨扈附羽林之後勁效犬馬之微勤瞻戀之私實深激切如蒙

俞允湖北巡撫印務擬請移交督臣張之洞兼署以重地方所有臣籲請迎

鑾隨扈下忱謹恭摺具陳伏祈

皇太后

皇上聖鑒訓示謹

奏

派員赴汴迎 鑾摺 光緒二十七年八月

奏為專派大員齋摺赴汴迎

鑾恭請

聖安仰祈

聖鑒事竊照光緒二十七年七月初一日欽奉

諭旨准改於八月二十四日恭奉

慈輿啟蹕回京等因欽此凡在臣民莫不欣舞 臣等心殷趨扈先

後奏請赴汴迎

蹕藉展微忱未邀

恩允依戀之情曷能自己邇者

六飛載道萬姓咸歡 臣等職守攸羈未伸瞻就謹率同提鎮藩臬

諸 臣具摺恭請

端忠政公奏稿

卷二

一一

聖安專派湖北安襄鄖荆道朱其煊赴汴齋呈惟祝

輦路澄清

慈輿安健讀

行在憂勤之詔

成湯首勵夫日新慰普天愛戴之忱

大舜賡歌夫復旦臣等不勝瞻仰歡抃之至所有派員齋摺迎鑾

緣由謹合詞恭摺具陳伏祈

皇太后

皇上聖鑒謹

奏

保舉人才摺 光緒二十七年九月

奏爲保舉人才懇

恩錄用仰祈

聖鑒事竊維致治首在得人方今百度維新庶政待舉尤非多求明體達用之才不足以資振作臣等悉心考察查有現署安襄鄖荆道在任候補道漢陽府知府余肇康在漢陽府任時整躬率屬於民生利病屬吏良否實能盡心考覈及調署武昌府篆益復振刷精神聽斷明允案無留牘所結京控省控各案不下百餘起其才思精力最爲絕人操履亦能不苟湖北候補道趙濱彥秉性剛直植品端嚴遇事勇敢有爲毫無瞻顧在鄂有年歷辦川鹽局及善後牙釐局並兼綜營務學堂諸事任怨任勞卓著明效該員爲予諡忠節照巡撫陣亡例議卹福建督糧道趙景賢之子世承忠孝報

國情殷趨向不同流俗才力尤有足稱以上兩員皆爲鄂省不可

多得之才當此時局阡危臣等均有以人事

君之責用舉該員行能之實冀副

朝廷求治之誠可否仰懇

天恩優與錄用出自

聖裁臣等爲時艱需才起見是否有當謹合詞恭摺具陳伏祈

皇太后

皇上聖鑒訓示謹

奏

防護荊州萬城大隄三汛安瀾摺光緒二十七年十月

奏爲荊江三汛安瀾萬城大隄防護穩固恭摺具陳仰祈

聖鑒事竊照荊州萬城大隄濱臨荆江爲閩郡及下游民田廬舍

保障最關緊要本年輪應巡撫前往督防維時前兼署撫臣張之

洞以省城事務尤爲重要必須在省督率司道局員隨時籌辦不克分身前往奏明飭委荊州府知府舒惠代防並飭署荊宜施道陳兆葵隨時查察督辦臣到任後又經檄飭加意防護在案茲據荊州府知府舒惠稟稱本年荆江水勢三汛期內惟夏汛節次陡漲最大之時高過楊林洲石磯一丈三寸所幸晴霽日多各隄逐年增高培厚雖間有風浪撞擊坍塌殘缺之處經舒惠親駐隄所督率在工文武汛委員弁隨時設法搶築防護均保無虞現已節屆霜降水漸消退全隄穩固普慶安瀾等情具稟前來除仍飭實力防護俟水落歸槽卽將應修各工詳細履勘照章派土興修以禦來年汛漲外所有本年防護荊州萬城大隄三汛安瀾緣由理合會同湖廣總督臣張之洞恭摺具陳伏祈
皇太后

皇上聖鑒謹

奏

揀員調補省會知府摺

光緒二十七年十二月

奏爲省會知府要缺揀員調補恭摺具陳仰祈

聖鑒事竊准

行在吏部咨光緒二十七年八月十九日奉

上諭湖北武昌府知府員缺緊要著該督撫於通省知府內揀員
調補所遺員缺著梁鼎芬補授欽此遵查武昌府知府係衝繁難
省會要缺政務殷煩且時有京控發審要案以及中外交涉事件
非精明練達才識兼優之員弗克勝任臣等於通省知府正途各
員內逐加遴選查有漢陽府知府余肇康年四十四歲湖南長沙
縣附生光緒八年舉人十二年進士以主事分工部學習十五年

遵鄭工例報捐同知本班先選用襄辦
大婚典禮奉

旨免選同知以知府分省補用捐指湖北領照到省十九年於直隸籌賑案內獎敘花翎前於十六年海運漕糧在事出力案內保奏俟補缺後以道員補用二十年正月二十九日奉

旨允准二十一年委署荊州府知府二十二年加捐三品銜八月十八日奉

上諭補授湖北武昌府遺缺知府旋補漢陽府知府二十六年正月調署武昌府知府二十七年九月委署安襄鄖荆道十二月初二日到任該員心細才長循聲卓著實係知府中最爲出色之員且係正途出身以之調補武昌府知府洵堪勝任據湖北布政使瞿廷韶按察使李岷琛會詳請

奏前來合無仰懇

天恩俯念武昌府知府員缺緊要准以漢陽府知府余肇康調補實於地方吏治均有裨益所遺漢陽府知府遵

旨卽以梁鼎芬補授謹合詞恭摺具陳伏祈

皇太后

皇上聖鑒訓示謹

奏

職官創辦善舉請獎摺

光緒二十八年二月

奏爲職官創辦善舉勸集鉅款年久效著懇

恩獎勵恭摺仰祈

聖鑒事竊查湖北補用從九品余永清自光緒六年稟准官給月捐自募樂輸在於距省六十里之淮山磯地方創立救生官局二

十一年添辦黃陂黃安黃岡麻城四縣毘連之武湖一局二十三
年添辦湖北監利與湖南臨湘交界之楊臨一局各設紅船護划
建造局屋望樓督率救生全活甚多其各局經費均係該員一手
籌定經營二十餘年成效久著現在該員年近八旬求卸仔肩將
歷年募置產業歲入稞數暨各署月季捐款並原定章程分晰開
造冊摺稟明立案將該三局事務歸由各處附近善堂接辦期垂
久遠洵屬實心爲善徹始徹終查定例士民捐修橋梁道路銀至
千兩以上請

旨建坊給與樂善好施字樣等語今該員余永清籌辦淮山武湖
陽臨三局救生事務勸獲欸項綜計銀逾二萬兩其自將薪水捐
作善舉亦數千金利物濟人較之捐修橋梁道路更爲廣溥核與
建坊之例相符據湖北布政使瞿廷韶鹽法武昌道凌卿雲會詳

請

奏前來合無仰懇

天恩俯准給與湖北補用從九品余永清樂善好施字樣令其自行建坊以示

旌獎而昭激勸除咨部查照外謹會同湖廣總督臣張之洞湖南

巡撫臣俞廉三恭摺具陳伏祈

皇太后

皇上聖鑒訓示謹

奏

辦理牙釐局員請獎片

光緒二十八年七月

再查鄂省釐金自前撫臣于蔭霖極力整頓剔除中飽裁汰陋規收數始漸有起色曾於光緒二十六年四月間奏明辦理情形並

請綜計收數果能較二十四年增收至四十萬串卽擇尤酌保數員以資鼓勵奉

硃批著照所請該部知道欽此欽遵在案臣到任後督飭總局各員加意講求盡心稽覈凡遇抽收不力及有意侵蝕者卽經分別撤參追繳從不稍事寬假是以收數月有加增綜計上年所收銀錢並計較之二十六年有閏年分不相上下而較之二十四年實已增收錢五十餘萬串近年撥款日增本省用款不敷仍屬甚鉅專賴此項增收之款稍事補苴推其增收之故固由各局員潔已奉公爭顧比較而總辦牙釐局務候補道趙濱彥遇事認真不辭勞怨尤爲難得蓋理財之任必以精覈爲先然苟無公忠之心卽不免有見好同僚之念鉤稽稍不經意短絀每出無形該員於各局卡利弊無不了然於胸考覈嚴明始終弗懈若不先予獎敘何

立見每刀一考和
十一
以激勸羣倫相應請

旨將三品銜候補道趙瀆彥

賞給二品頂戴以示優異其餘辦釐出力收數最多者臣當悉心
稽核再行撥案擇尤酌保一二員斷不容稍涉冒濫是否有當謹
會同湖廣總督臣張之洞附片具陳伏祈

聖鑒訓示謹

奏

賞給平定粵匪擒回方略謝

恩摺 光緒二十八年七月

奏爲恭謝

天恩仰祈

聖鑒事竊准外務部咨光緒二十八年四月初九日軍機大臣面
奉

諭旨平定粵匪擒匪回匪方略前由外務部刊印現在所存尙多
著賞給各省將軍督撫每人各一部卽由外務部知照頒發等因
欽此經臣委員齎領到鄂當卽恭設香案望

闕叩頭祇領欽惟我

皇上躬行

孝治不顯

聖謨

特頒秘府之琅函俾覩軍興之

廟略乃

文乃

武因多難而造

邦家

不愆不忘用

繼承而垂宇宙臣濫膺疆寄叨沐

恩施家有

賜書欣見

成功之燦著

國如磐石願看

景運之常新所有臣感激榮幸下忱理合繕摺恭謝

天恩伏祈

皇太后

皇上聖鑒謹

奏

遴員請補撫民同知摺
光緒二十八年九月

奏爲遴員請補改設撫民同知恭摺仰祈

聖鑒事竊准吏部咨截缺單開湖北漢陽府夏口撫民同知四項最要缺改設於光緒二十七年二月十四日奉

硃批坐二月十九日行文按湖北省照限減半計算扣至二十七年三月十三日爲奉文開缺之期係衝繁疲難四字最要缺例應由外揀員請補查定例州縣以上應調缺出俱令於現任人員內揀選調補如無合例堪調之員始准以候補人員題補如候補無人亦准於應升人員揀選題升又道府同知直隸州如係奉

旨命往或督撫題明留於該省候補者均無論應提應調應選之缺令該督撫酌量才具擇其人地相宜者悉准補用各等語茲查夏口廳駐紮漢口係九省通衢爲長江行輪停泊總埠又爲火車鐵路發軔之區地密人稠商賈輻輳游勇會匪最易潛蹤華洋錯

居尤多交涉現當改設伊始非得精明強幹熟悉情形之員實不足以鎮懾商民進求治理臣等督同藩臬兩司在於通省現任同知並各項候補以及應升人員班內逐加遴選實無堪調堪補之員惟查有候補班前補用知府新海防試用同知現署夏口撫民同知馮啟鈞年三十二歲廣東南海縣附貢生遵新海防例報捐同知指分湖北試用光緒二十二年十二月初十日引見奉

旨著照例發往欽此二十三年正月二十日到省試用期滿甄別留省補用嗣於勦捕長江自立會逆匪在事出力案內保奏請免補同知以知府仍留原省歸候補班前補用並加鹽運司銜二十八年正月十一日奉

旨依議欽此臣等覆查該員馮啟鈞強幹精明才堪肆應自署理

斯缺以來舉凡辦理交涉通商緝捕諸事無不措置裕如民教相安中外輯睦以之請補是缺可期衆望翕然立觀成效該員係免補同知保獎知府尙未送部引

見擬請銷去免補字樣仍以試用同知請補改設撫民同知要缺雖與常例稍有未符但事關交涉且係創設之缺初次擬補遴選爲難人地既實在相需似未便更拘成例合無仰懇

天恩俯念漢陽府夏口撫民同知員缺緊要准以試用同知馮啟鈞補授實於地方洋務均有裨益該員原係試用應毋庸送部引見據布政使瞿廷韶按察使李岷琛會詳前來除咨吏部外臣等爲因地擇人起見是否有當謹合詞恭摺具

奏伏祈

皇太后

皇上聖鑒敕部核覆施行謹

奏

請旌表孝子摺 光緒二十八年九月

奏爲大臣長子以身殉母籲請

旌表並懇

宣付國史館立傳以彰孝行而維風紀恭摺仰祈

聖鑒事竊據湖北漢黃德道岑春煊報稱伊姪花翎分部主事改

捐湖南試用知府辛丑科並補行庚子

恩科舉人岑德固係已故雲貴總督岑毓英之孫現署四川總督

廣東巡撫岑春煊之長子於本年六七月間奉其母來鄂其母中

途感患時疾德固日夕躬侍湯藥衣不解帶目不交睫以醫生誤

投熱劑八月十六日其母在鄂病故德固椎心泣血哀毀異常水

漿不入口者數日自以不能審察母病寒熱之分誤進藥餌致母不起悲慟難釋竟於九月十九日殉於其母殯所年始二十四歲臨終著有絕命詞一篇並經錄送查閱前來臣等伏查岑德固世席簪纓家傳詩禮讀書勵志新掇乙科居家侍親生有至性此次奉母來鄂驟遭母喪乃引不諳藥性之微愆竟完欲報昊天之大義舍生就死純孝無虧閱其所爲絕命詞內有是誰之過誤奉湯藥信醫士言作不孝賊及造物於人有生有死全受全歸母心安矣兒大不孝以身殉母男罪當誅母勿自苦等語屬詞之沈痛賦性之真純洵足使誠動天閭哀感行路夫搢紳之族行事固不同於鄉愚以岑德固之忘身殉親賦詩明志苟不由於素養必難出以從容迹其視死如歸不啻求仁而得雖非庸行實出至情方今卮說暴興人紀敗壞不聞申孝悌之義且欲平父子之權禮教浸

衰未知何極岑德固獨能成茲苦節障彼橫流不僅於綱常名教
之防絲毫無忝而實於世道人心之大關係非輕合無仰懇

天恩俯賜

旌表並將岑德固生平孝行

宣付國史館編入孝友列傳以勵薄俗而示來茲則既慰泉壤之
孝思益彰

朝廷之風教門閭表式不徒一姓之私榮史冊昭垂允作羣流之
軌範矣除將岑德固履歷事實並所爲絕命詞錄咨禮部查照外
謹會同湖北學政臣胡鼎彝合詞恭摺具陳伏祈

皇太后

皇上聖鑒訓示謹

奏

查明知州參款摺 光緒二十八年九月

奏爲遵

旨查明知州被參各款確切情形恭摺覆陳仰祈

聖鑒事竊 臣等准軍機大臣字寄光緒二十八年五月十八日奉
上諭有人奏湖北蘄州知州凌兆熊疏懶糊塗信任丁役積壓公
事縱盜弛刑以致持械搶劫之案層見疊出請飭查參等語著張
之洞端方按照所指各節確切查明據實參奏毋稍徇縱原片著
交給閱看將此諭令知之欽此遵

旨寄信前來 臣等當卽札飭布按兩司確查密訪一面遵委湖北
候補道趙濱彥馳赴蘄州按照原參各節切實查明稟復茲據湖
北布政使瞿廷韶湖北按察使李岷琛會查覆稱按照原參各層
核明案據覆加訪查如原參蘄州知州凌兆熊歷官之處士民皆

呼之爲凌糊塗嗜好最深俾畫作夜信用家丁差役賄賂公行一節查凌兆熊於光緒十九年到任二十六年調省二十七年回任先後在任十年於地方公事均能斟酌辦理且起家科目文理優長心地明白惟秉性寬和近於舒緩尙無糊塗之名該員平日性好觀書公餘時恆手執一卷又愛育士林一遇考試必親自衡文每至夜深不寐所稱嗜好最深俾畫作夜者或卽此傳聞之誤又該員操守謹飭素知自愛前在任時有家丁江靜菴性好游蕩該員當卽驅逐此外實無信用丁役賄賂公行之事又如原參州署背水面山向稱勝境該員復構園亭專以遊宴自娛一節查該員到任以來曾於州署後院造樓一座南門外構亭一椽均就原有基址自行捐廉修葺無關政事得失此外別無營造訪之本地士民僉謂偶一登臨亦未見其常往遊宴又原參兩造爭訟聽斷不

明輒推案曰不管每年上控之案多至七八十起一節查凌兆熊此次回任審斷頗勤上控案件每月均有報冊可稽檢查尙不甚多至推案不管等語訪之曾經涉訟到官者據云並無所聞又原參州紳江樹芳繆樹人陳沛霖王金英及民人吳姓張姓等十餘家皆被匪持械搶劫巨賊雖經報案獲犯並不懲辦一人以致盜風日熾一節查該州於光緒二十四年十月十二日據永福鄉職員江樹芳二十三年二月初三日據安平鄉貢生陳沛霖二十四年四月初十日據青山鄉孀婦繆洪氏二十四年九月初六日據安平鄉監生王金華先後呈報被盜搶劫均經勘驗通詳繆樹人當係繆洪氏之誤王金英當係王金華之誤惟陳沛霖一案尙未獲犯其餘三案均經獲盜供詞忽認忽翻致未定讞現仍勒緝逃盜質審究辦並非獲犯不行懲辦此外查無吳姓張姓等十數家

被劫呈報之案又原參今年三月州紳許以唐家被盜匪陳鳳林陳爲普等迭次偷竊後糾衆劈門搜括一空並將婢媪輪姦幾至斃命委驗獲犯該牧仍欲釋放一節查光緒二十八年三月二十日據監生許棣華遣抱許藻卿呈報本月十六日夜被陳鳳林糾匪陳爲普等執械劈門入室先將門客許藻卿雇工許賢佑等繩縛置地球玉金銀衣服罄搶一空等情許以唐當卽許棣華之誤原呈未敘及輪姦婢媪情節凌兆熊親詣勘驗拿獲陳爲普張許氏係許棣華已嫁之婢先據供稱與其夫在逃未獲之張耀德串通勾搶嗣經獲犯孫發枝柴四爾賈宜元華中元等訊明持械夥劫許棣華家得贓不諱並起獲原贓給主認領續又拿獲艾癩瘰袁天佑李宜元李容元等犯雖據艾癩瘰供稱華桂元李容元輪姦婢媪等語尙未質訊明確然僉稱並無陳鳳林糾劫情事查陳

鳳林因陳爲普屢竊許姓許姓向其理論積有微嫌此次被搶之夕事主本不在家但據抱告許藻卿擬議之詞率行指控未可盡信_臣等以案關重大節經批飭臬司將全案提省審辦以昭詳慎一面嚴飭務緝張耀德等到案質訊凌兆熊並無獲犯後仍欲釋放之事以上各節案卷具在委無掩飾等語並據道員趙濱彥稟復前情核與司詳大致相符_臣等覆加體訪該牧凌兆熊兩任蘄州尙能謹慎從公不失爲安靜之吏被參各節或尙屬有因或並無其事均可勿庸置議惟查蘄州地方濱江近年長江輪船日增扒手游匪附搭往來每多滋事以故在今日沿江緝捕尤爲喫重凌兆熊性情和緩於該州不甚相宜相應請旨將蘄州知州凌兆熊開缺另補以重地方除飭司督飭武昌漢陽兩府將許棣華呈控被劫案內已獲解省盜犯研訊確情另行

擬結懲辦並各案在逃夥盜仍飭勒拿分別究治外所有遵查知
州被參各款並擬議辦理緣由謹合詞恭摺具陳伏祈
皇太后

皇上聖鑒訓示再所遺蘄州知州係衝煩難三字要缺例應由外
揀員請補合併聲明謹

奏

敬舉賢才摺 光緒二十八年九月

奏爲敬舉賢才以備

任使恭摺會陳仰祈

聖鑒事竊吏治在於得人真才見於明試故人材從牧令歷練而
出者最有實際近年疊奉

諭旨飭令各督撫薦舉人才以備任用凡遇臣工保薦一經

藻鑒均蒙

破格遷擢仰見

聖主厯懷吏治鼓舞羣才之至意臣等身膺疆寄日擊時艱當此吏道淆雜之時尤以不染習氣爲貴苟有廉能之可舉曷敢壅蔽於上

聞茲查有在任候補直隸州調署江夏縣事本任羅田縣知縣陳樹屏勤求民瘼絕無官氣歷任繁劇卓著循聲向來省會守令專以伺應上司爲務不復以措置民事爲心該令自調任江夏以來屏絕應酬勤於聽斷官民浹洽壅蔽悉除志節清卓迴殊俗吏所爲調署鍾祥縣事本任襄陽縣知縣李祖蔭愛民如子疾惡如仇所至以戢暴安良爲急故於緝捕尤勤生平不畏強禦地方劣紳巨棍從不絲毫徇縱故能使豪強斂迹良懦懷恩至操守端嚴猶

其餘事委署大冶縣事湖北候補知縣蕭端澍幹濟才長實心任事繩治不避權貴風節卓然其經理縣屬礦產不動聲色能將全境礦山收買歸公杜絕外人覬覦保持自有權利洵屬才力過人有裨大計委署黃岡縣事湖北候補知縣寶豐心術端良才猷敏練深明時局應變有餘上年冬間攤籌賠款該縣首先認解但知急公不敢畏難並未擾累民間而鉅款立集尤見其智略優裕規畫精能以上四員均屬明體達用爲守兼優足以膺艱鉅而立事功爲臣等所真知灼見自應據實保薦以勵賢能合無仰懇

天恩俯准將湖北知縣陳樹屏李祖蔭蕭端澍寶豐四員給咨送部引

見應如何

破格擢用之處出自逾格

鴻慈_臣等爲任事需才人材難得起見謹合詞恭摺具陳伏祈

皇太后

皇上聖鑒訓示謹

奏

修築沿江隄岸涸復田畝摺

光緒二十八年九月

奏爲修築湖北省城外沿江隄岸九十餘里工程完竣涸復官民田地數十萬畝恭摺具陳仰祈

聖鑒事竊照湖北省城之南保安門外白沙洲至金口五十里省城之北武勝門外新河起經紅關至青山三十里省城外江岸南起鮎魚套內之熊家渡北抵塘角十二里餘沿江一帶南路舊堤年久殘廢僅有堤形可按北路間有小埂每年夏間必爲江水灌入隄內之田數十萬畝悉成湖蕩坐棄膏腴居民耕種失業極形

困苦且其中有撫標江夏縣馬廠各數十里亦被淹沒畜牧無從
實於民田官地關係甚大查南隄爲前督臣周天爵所築現竟日
就坍塌前人苦心經營澤民惠政何容聽其湮沒且鄂省前數年
疊被水災各屬貧民流離失所鬻聚武漢間深虞滋生事端因思
將此堤修復既可以工代賑養無數之窮黎又可永安耕鑿得無
數之良民維時湖北賑捐尙有存款是以力籌大修之舉爲一勞
永逸之計經臣之洞於光緒二十五年春間先將紅關至青山之
隄分作八段派委各員興修是爲北路之隄民間舊日於沿江偶
因春漲築作土埂全不足恃一經夏漲或春水稍大便致漫淹將
沙湖大小郭鄭湖連成一片自江岸直抵磨盤諸山一帶一片汪
洋現於北岸三十里築爲長隄皆係以平地爲基因地勢之低昂
定隄身之高卑高一丈至丈七尺隄面一律寬二丈旋復於秋冬

水涸將白沙州至金口之隄分作十段分別委員興修是爲南路之隄南隄較北隄地段尤爲廣遠隄內地段東過東湖門南抵八風山督標馬廠卽在其內有南湖湯孫湖黃家湖青林湖巡司河夏間江水內灌則諸湖及河道連成一片其舊存隄址大半距江岸甚遙今則於沿江附近改作新隄使舊日濱江被淹之地併包於新隄之內涸出田畝不可勝數計南隄綿亙五十里增築一丈餘不等隄面一律寬二丈工程尤爲浩大諄飭在事文武員弁督率民夫日夜趕築晴雨無間倍極辛勤得以歲事數年以來南北兩隄新隄之未穩者則復令翻築隄身之衝刷者則復令培厚隄身之較低者則復令加高南北兩隄之隄面皆經屢加測量務令一律砥平現已一律工竣隄外令其種植柳樹柳樹之外栽種蘆葦以禦風浪而護隄根惟外江之水既有隄以禦汎漲內湖之水

須有閘以資宣洩因與南北兩隄擇地建閘數座因時啟閉蓄洩有資而石閘工費尤爲艱鉅臣端方抵任後察看情形與臣之洞公同商酌以爲興大利不當惜重費固始基乃克垂久長因復委員詳加勘查按段培修長隄悉臻穩固臣等每於閘隄出有險工親往查勘督飭各員極力搶險幸保無虞此先後修築南北長隄及石閘各工之情形也至省城附郭一帶江岸十餘里向來舊有石礮岸之處尺寸較低且不盡有礮岸當江水盛漲雨潦日久之際城內之湖塘溝渠城外之濠梁港汊積水漫溢淹沒路衢不能啟閘以洩之入江而外江之水繼長增高乃至泛及岸路浸入城闔不可不籌抵禦之方因將沿江舊有石礮之處增修加高使內水可洩外水不入并於武勝門外未有石礮岸之處一律加修石礮俾資捍衛其南北兩端與新隄之南北兩長隄相接之處則加

築高厚土隄俾與長隄相等至石岸雖屬堅定惟以江水之激盪石岸內之沙土椿木不免有年久坐卸之虞仍須歲時撥款量加修補以期永久鞏固此又增修中段之城外附郭沿江石礮岸之情形也南北兩隄既成之後涸復田土甚多有官地有民地有無主之地從前湮沒既久一時驟難分晰若不詳細清查實啟民間紛爭之端復經臣等派員設立清丈局按地勘丈詳加考察清出官地或仍舊爲畜牧之場或撥作通商場界址之用或撥作農務局耕牧之需其民地驗有契據糧券者照契管業無主無契者分別發給執照令其繳租墾種現計南北兩路共清丈有官民田地近二十萬畝之譜俟今冬暢放湖水後南北兩隄沿湖之地涸出者尙多其未及清丈及民間舊業無待清丈從前被淹現可免淹者殆不可以數計以後永澹沈災長安田宅程工雖艱受益甚鉅

此又清查田畝之情形也其最有益者則北路紅關至青山一帶爲粵漢鐵路發軔之所此隄不築將來修造鐵路塞水填土工程甚鉅所費殆將以數十百萬計今築成此隄於鐵路經費所省極多裨益至非淺鮮尤有益者省城迤南之金口爲上游自湘岳入鄂之門戶省城迤北之青山爲下游自黃州到武漢之要隘金口之山名大軍山江狹嶺峻青山地方岡阜重疊此兩處皆可以置礮屯兵他日若武漢江防有事則由省城南至金口北至青山此九十里中皆有高岸平隄兵隊及馬車礮車可以晝夜通行往來援應調度捷速尤爲省防勝算至此項南北中三段隄岸工程長逾九十里修至二三次加以建造石閘增修石礮經費實爲不貲幸賴以工代賑之款動用賑捐銀兩藉資挹注得以竟此全功應由藩司籌賑局核明確數彙同工賑案內詳請開單奏銷茲據湖

北布政使瞿廷韶暨籌賑局司道具詳請

奏前來臣等謹合詞恭摺

奏陳伏祈

皇太后

皇上聖鑒謹

奏

改籤捐爲賠款捐摺光緒二十八年九月

奏爲鄂省州縣籤捐酌議改爲賠款捐辦理一切情形恭摺仰祈
聖鑒事竊查新案賠款鄂省攤派奇鉅前因籌措艱迫曾請於繁
盛通達各州縣酌量試辦籤捐以資湊補附片具陳奉

硃批着先行試辦欽此欽遵在案當經臣等督飭司道於善後局
設立籤捐所將通省州縣分別大中小三等發給籤捐彩票酌定

票價次第開行本期酌取有餘以相挹注既可有益於國兼可無損於民乃自開辦以來疊據各該州縣稟稱地方紳民僉以此舉雖係恤民之政而鄉僻難以徧喻不免意存觀望致形滯銷行之既久更恐相率裹足必致有誤要需不若各就地方情形量力籌捐按年攤解以濟公家之急等情前來臣等伏查湖北地方瘠苦民力困窮羅掘之艱已非一日此次奉派之欵爲數甚鉅不得不取之於民經與司局再四籌商原擬試辦籤捐藉以稍紓民困今辦理既多棘手自不能不略事變通又經督飭司道卽將籤捐停籌另飭州縣就地抽捐以爲抵補並將原定籤捐之數大加裁減各就地方情形與紳民妥籌不爲抑勒大抵抽捐之法以串票爲大宗而舖戶亦居其三四務使欵皆有着不累窮檐並不欲專責農民轉遺富商此項捐輸卽改名爲賠欵捐以昭核實使小民知

官府之籌畫實出於萬不得已而取之民者亦得以顧名警省爲振作自新之計經臣等疊次籌議督催近始據各屬具稟到齊約計通省所籌計數似不爲少究竟實能收到若干此時尙難豫料而此次所捐之欸要皆與紳民籌商出自樂輸或不致漫無把握現在惟有先就已籌之數實力稽徵並嚴定各該州縣逐月勻攤批解及解欸遲速功過章程通行試辦期免貽誤除仍飭司局認真催解並將未盡事宜趕緊籌辦外所有酌改州縣籤捐爲賠欸捐辦理情形謹合詞恭摺具

奏伏祈

皇太后

皇上聖鑒謹

奏

購買通商場地畝摺 光緒二十八年九月

奏爲購買武昌城外商場地畝以保治權而儲鉅款恭摺仰祈
聖鑒事竊查湖北省城北武勝門外直抵青山濱江一帶地方與
漢口鐵路馬頭相對從前美國人勘粵漢路時卽擬定紅關一帶
爲粵漢鐵路馬頭是武昌爲南北幹路之中樞將來商務必臻繁
盛等於上海近年洋行買辦託名華人私買地段甚多此處若由
外人請開口岸設租界距省太近營壘不能設法令不能行有礙
防守查岳州係自開口岸名通商場不名租界自設巡捕地方歸
我管轄租價甚優年年繳租各口所無一切章程尙屬妥善曾經
臣於光緒二十六年十月間援案
奏請准將湖北省城北十里外沿江地方作爲自開口岸庶不失
管理地方之權奉

旨照議辦理等因欽此欽遵在案當經籌議開辦大致章程專設商場局派委湖北藩司瞿廷韶總辦局務洋務委員候選道梁敦彥署武昌府知府梁鼎芬充當提調督飭江夏縣妥爲經理首先嚴禁奸商莠民不准冒名私買嚴飭地方官不准印契其時武勝門外一帶江隄築成涸出官民各地先已設有江岸局清查官荒收買民地迨江岸局將清丈收地給價立界事竣卽行撤局將契據文卷移交商場局管理並經雇募英國工程師斯美利來鄂飭令丈量地段將建築馬頭填築砌岸興修馬路一應工程詳切勘估測繪細圖核辦茲查通商場共計查出收買官民各地三萬餘畝共計用過地價局費錢二十三萬餘兩因籌款無出借撥漢口米商平糶捐銀七萬餘兩其不敷之數俱係息借華洋各商之款應付俟將來售出地價歸還目前之費雖鉅而將來之利無窮查

沿江沿海各租界當外人開辦之始經營草創費亦不貲其後商務一興地價驟漲上海一畝之地且有值至萬金者武昌東西扼長江上下之衝南北爲鐵路交會之所商場既開商務日繁地價之昂可坐而待已嚴札飭行司局府縣立案目前無論華洋商人以及何項官局紳商意欲承領決不准輕給賤售總宜堅持數年待至五年之後鐵路大通北達歐洲南窮香港羣商趨之若鶩自然爭先訂租今日一畝之價異時百倍其值統計此地三萬餘畝合二百餘萬方此外如有可推廣收買者仍當體察情形相機擴充收買將來或租或售應視其遠近高下臨時酌定價值貴賤之等差若鐵路公司需用者亦須照議定通行之價承買卽官設之馬頭局所行棧亦一律付價其餘之地由各洋商領租各華商領買約估所得地價多少牽算以最廉之價每地一方值銀十兩計

之計所繳租價買價亦值銀二千餘萬兩除撥還借款之外贏餘甚巨可供開辦此項通商場修砌岸造馬路設巡捕房設工部局設渡江火輪之用及本省興學練兵暨興辦農工商務等事經費此_臣等所以亟圖經營不敢惜目前之費而忘久遠之謀者也尤可慮者此時如不預爲布置匪特失大宗之財用抑且損自主之治權浸假各地悉爲外人冒購勢必又蹈租界故轍侵我統轄地方之權其流弊後患殆不可問今既由官收買斟酌出租既有開辦商場之資且免治權旁落之患實於大局有裨除以後興辦事宜隨時妥籌辦理隨時詳細具

奏外所有商場局收買地段暫借商款辦理情形_臣等謹合詞恭摺具陳伏乞

皇太后

上聖鑒謹

奏

遵籌清丈屯田照完契稅摺

光緒二十八年九月

奏爲籌辦鄂省清丈屯田增收契稅並酌定兼抽經費各情形恭摺仰祈

聖鑒事竊照光緒二十八年正月十七日內閣奉

上諭各省衛所屯田原爲轉漕養贍運丁而設自南漕改由海運以來屯衛弁丁半成虛設此項田畝私行典賣輾轉膠轕弊端百出現又定章改折漕糧亟宜認真清查改歸丁漕以昭覈實而裕賦課著漕運總督陳夔龍會同有屯衛省分各督撫將各省屯田地畝逐一澈底查明令該屯戶報官稅契聽其管業將屯餉改爲丁糧統歸州縣官經徵如有盜賣私售者亦飭據實報明完納正

供不究既往更須嚴禁胥役需索苛擾等因欽此又於五月二十六日承准軍機大臣字寄五月十四日奉

上諭有人奏各直省衛所屯田請飭清查繳價以裕國帑一摺據稱近來各省屯田半係民戶頂替其私售價值約得民田常價之半現在衛所既已裁撤若將屯田一律清查可得巨款於籌餉大宗不爲無補等語著各該督撫迅卽認真清查分別妥籌辦理詳晰具奏毋稍延宕原摺著抄給閱看將此通諭知之欽此遵

旨寄信前來節經臣等轉行司道遵照辦理並先將湖北各衛分飭同城各州縣兼署接收交代又以各衛屯田情形不一頭緒紛繁另設清理衛田局派委湖北候補道朱滋澤總辦局務與司道酌商籌辦以專責成各在案茲據布政使瞿廷韶督糧道譚啟宇會同該局詳稱湖北各衛多在水鄉歷有冲塌荒廢之區額徵屯

糧蠲緩已經及半軍戶人口繁滋率皆藉耕爲活非必家有餘財若責令按畝繳銀不獨貧戶無此力量即小康之家亦非盡售田地不可至於民戶頂替雖屬不少然未必家皆素封且歷年久遠其中輾轉轉轆非惟難以究詰亦恐徒滋騷擾窒礙甚多繳銀一層鄂中實難措手現擬先將此項屯產議令遵

旨據實報官由司發給印契完納契稅一面由司局派員分赴各衛所屯坐州縣會同地方官澈底清查責成屯頭戶首先將屯坐地方戶畝數目無論本軍頂民一律開冊報明按屯逐戶勘丈以一戶管業之畝爲一塊造具魚鱗塊冊統一冊之塊數以歸戶別爲歸戶冊俾有田者實數報完無田者虛糧豁免其徵契稅之法則以軍田向無買賣契價應查比該地方民田價值如每畝值二十千以外者均照二千五百之價完稅值十千以外者照十五千

之價完稅值十千以內者照十千之價完稅並照本年正月奏准成案統按六分徵收田價就地定估每一千卽收錢六十文並隨抽清丈經費錢文以資辦公契紙由司局刊發蓋印給領聽其管業得相轉售另繳契紙經費比擬契稅章程以畝爲斷十畝以上者繳銀三錢二分五畝以上者二錢五畝以下者一錢二分此外不准需索分文其替軍頂糧私典轉售之戶悉照軍戶一律辦理如有刁健之徒匿地不報卽將田地充公按法治罪等因詳請奏咨前來臣等覆查各衛屯產本屬公田今改完丁糧卽准報官管業此後田值得與民田相比較私行典售之價約高一半產價驟增卽產資加裕是該屯戶荷

朝廷寬大之德世世無窮僅令按照民田完納契稅實爲力所能給分所樂輸之舉其所抽清丈契紙經費亦皆別無可籌不爲苛

索自應責令迅速開辦以期早就清釐至原摺所稱照值勘估定價追繳一層就事理論之則以公產而化爲私田取之誠不爲虐而就情勢論之則必售田而始能繳價出者實不能堪既據該司局體察情形恐形窒礙似可毋庸置議除仍督飭司局認真經理並咨戶部查照外所有遵籌清丈屯田照完契稅各情形謹合詞恭摺具陳伏祈

皇太后

皇上聖鑒謹

奏

勒令道員回籍片

光緒二十八年九月

再湖北試用道任子齡向在湖南充當刑幕以臬司幕友而兼充長沙府讞局幕友廣通聲氣冠蓋盈門通省州縣幕友大半皆薦

其學徒爲之非其門下者公事輒加挑駁是以通省各官場畏之趨承恐後聲名素劣曾經被人參劾列款多端經前任湖南撫臣查復幸免深究嗣捐納道員指分湖北試用初到之時尙屬安靜一年以後其狡悍情形日漸發露語言謬妄變亂是非通省要政無一不加梗阻該員若久在湖北必致官場習染敗壞風俗致蹈他省候補道把持全省公事之惡習方今屢奉明旨掃除書吏積弊查劣幕之頑謬自是事事以因循搪塞爲宗旨專舞空文不辦實事與蠹吏同而其悍黠則又過之故欲除蠹吏必先自除劣幕始相應請

旨將湖北試用道任子齡勒令卽回江蘇原籍

敕下吏部將該員分發湖北省分注銷不准在湖北逗留免致敗羣生事以肅官常臣等謹合詞附片具陳伏祈

聖鑒訓示謹

奏

請獎洋務人員片 光緒二十八年九月

再竊查南北洋成案隨辦洋務人員三年奏獎一次近時山東省奏請彙獎洋務人員亦經奉

旨允行各在案鄂省商埠久開惟從前交涉尙簡辦理較易故未敢將承辦洋務之員率請獎敘自近年創興鐵路武漢爲南北樞軸長江商務日闢已駸駸直達上游於是天下大勢日漸趨重於鄂中各國之賓從駱驛電牘紛紜幾於日不暇給而鄂省洋務之煩重亦遂不下於南北兩洋迨至前年拳匪事起

畿疆告警全局爲之震動臣之洞等幸秉

聖謨保疆定約其事甫經就緒而富有票匪輒乘機煽亂黨羽遍

布長江巢穴潛藏租界維時事幾倉猝瞬息變更當督飭在事各員密籌妥辦均尙克殫心力不負委任嗣又因湘省教案屢見節經揀派熟諳條約之員與各國領事教士等一再磋商分別議結其時西北鄰近各省凡商埠未開之處遇有交涉事件均歸漢口各國領事兼管責言日至往復籌商以及平時之函電交馳無不以鄂省爲驛騎於是鄂中洋務且不免有兼顧鄰省之勞臣等核計近十年中變故旣多情形迥非昔比所有隨辦洋務各員洵屬始終奮勉著有微勞合無仰懇

天恩准予援照南北洋成案將歷年隨辦洋務各員併案擇尤奏獎並請此後每屆三年照章請獎一次以示鼓勵如蒙
俞允應俟

命下之日再由臣等開單奏請獎敘斷不敢稍涉冒濫謹合詞附

片具陳伏祈

聖鑒訓示謹

奏

請獎書院監督分教摺

光緒二十八年九月

奏爲兩湖書院監督分教勤苦數年卓著成效懇

恩優獎以勵作育之功恭摺仰祈

聖鑒事竊惟敬教勸學二者相資古來興國者欲圖自強其端必
基於此近者屢奉

諭旨令各省建立學堂海內聞風欣欣相告此誠文教昌明人才
蔚起之會也查湖北省城兩湖書院係臣之洞到湖廣時所創建
其規模較各書院爲最大初時有齋課而無堂課有月課而無日
課設立數年諸生學業文藝雖已斐然可觀惟是世變孔亟道術

宏深不通博則無以開心知不專精則無以得實用於是恪遵光緒二十四年九月三十日

懿旨酌改章程區別門目於經史二者之外立天文輿地兵法算學四門又於兵法一門分爲三子目一兵法史略學專講歷朝史事之言兵者一兵法測繪學專講測量圖畫理法以爲行軍之用者一兵法製造學專講化學有關製造槍礮火藥之法者凡八門每門延聘分教一人以監督董率之又立行檢一門監督司之每日早午兩堂分班講授每月總計分數及行檢有無過失第其高下嚴其去取又以文士多弱習武可以自強於院後闢操場一所派武備學堂優等學生及營中武弁每日傍晚時教體操法行軍步法操槍法乘騎法使之文武會通冀復古制而監督分教督率經營於其間自朝至暮無時不與學生相左右風雨與偕甘苦與

共蓋闔院師生無一人不勤無一人不勞者此卽仿東西各國學堂之意爲之以故學生一百數十人皆能恪守院規不辭煩苦既治禮法又中課程學業日益精進志氣日益堅強數年以來成材甚衆臣端方奉

命撫鄂屢到講堂考察功課見其整齊勤密文武兼資他年院中人材必有出而匡濟時艱酬答

國恩之一日今年鄉試臣端方正充監臨官榜發後優等生中式至三十名其文字多能發抒忠君愛國之忱博通中外古今之故目前兩湖書院改爲兩湖大學堂院中儲養有素取材甚便且皆願遵奉新章不以爲難不以爲苦是該監督分教等積年講解化導之功不可沒也竊思教育既有成效所有監督分教各員似應優予獎敘方足以勸將來謹開列清單恭呈

御覽合無仰懇

天恩俯准照擬給獎以勸師範而廣成材實於今日學堂要政不無裨益臣等謹合詞具陳伏祈

皇太后

皇上聖鑒謹

奏

謹將兩湖書院監督分教各員酌擬獎敘開列清單恭呈

御覽

監督內閣中書銜直隸霸州訓導紀鉅維文學淵雅品行方嚴課士盡心終始不懈擬請

旨以內閣中書用

經學分教廣東順德縣廩貢生馬貞榆研精左氏之學人品端篤

守正不渝擬請

旨賞給國子監學正銜

史略學分教江南江浦縣訓導陳慶年史事博洽經世之才擬請
旨賞給內閣中書銜

天文學分教布政司理問銜江蘇南匯縣附貢生賈文浩家學專
門殫心訓課擬請

旨以教職選用

輿地學分教五品銜分省補用知縣鄒代鈞曾到歐洲游歷熟知
險要博學通才擬請

旨仍以知縣儘先選用

算學分教通判職銜湯金鑄有學有法啓迪擅長

兵法測繪學分教通判職銜羅照滄思密學精成就甚衆以上二

員均擬請

旨以通判選用

遵保經濟特科人才摺

光緒二十八年九月

奏爲遵保鄂省人才恭應經濟特科恭摺仰祈

聖鑒事竊照光緒二十七年四月十七日欽奉

慈禧端佑康頤昭豫莊誠壽恭欽獻崇熙皇太后懿旨爲政之道首在得人况值時局阡危尤應破格求才以資治理允宜謹遵

成憲照博學鴻詞科例開經濟特科於本屆會試前舉行天下之廣何患無才其有志慮忠純規模宏遠學問深通洞達中外時務者著各部院堂官及各省督撫學政出具考語卽行保薦並著政務處大臣擬定考試章程請旨辦理等因欽此又六月初四日御史陳秉崧奏保薦經濟特科請飭破除夤緣積習一摺復奉

上諭著各督撫學政於保送時虛心採訪果係物望素孚確有實學者方准保奏等因欽此仰見

聖朝宏獎人倫綜覈名實之至意臣等伏念鄂省居天下之中江漢會歸人才最盛近年自創辦學堂以後士知嚮學材智輩興其中根柢槃深研求有得者固自不乏而平日講學宗旨尤以克端趨向力屏浮華爲急務是以學堂卒業各生成材更夥茲值

特開曠典爰於鄂中人士就臣等平素諮訪所深知者保薦六人得候選知縣前黃岡縣訓導楊守敬刑部候補主事姚晉圻國子監監丞前歸州學正推升知縣劉德馨翰林院庶吉士饒叔光陝西補用知縣丁禧瀚兵部郎中劉國柱等又於學堂肄業各生中悉心甄錄保薦十人得舉人劉邦驥舉人胡鈞附生陳毅舉人陳問咸舉人田吳炤舉人盧靜遠附生吳元澤舉人陳曾壽分省試

用同知宋康復舉人萬廷獻等皆就其學問品詣出具切實考語
分別敬繕清單恭呈

御覽倘蒙

俯允召試必能罄其所長臣等忝竊疆符考核詳確與有以人事
君之義力存循名責實之心用特縷晰詳陳伏候

聖明采錄所有遵保鄂省經濟特科人才緣由除咨政務處外謹
合詞恭摺具奏伏祈

皇太后

皇上聖鑒訓示謹

奏

謹將鄂省保薦經濟特科人才各員生出具切實考語敬繕清單
恭呈

對是每乃... 卷二

御覽

計開

四品頂戴候選知縣前黃岡縣訓導楊守敬 湖北宜都縣人壬戌舉

人

老成夙望博覽羣書致力輿地學數十年於列朝沿革險要洽熟精詳著書滿家卓然可傳於世

刑部候補主事姚晉圻 湖北羅田縣人壬辰進士翰林院庶吉士

品行端謹不入公門奉母居鄉日以讀書為樂研精史部識解甚

高治亂興衰能知其故可謂閎達雅才

國子監監丞前歸州學正推升知縣劉德馨 湖北漢川縣人庚午舉

人

治家嚴整鄉望咸孚平日讀書教人以忠君孝親勤儉耐苦為本

故一家兄弟子姪皆能好學勵行爲湖北名門經史之學皆所殫
心得其要領又能留心時事才識不凡

翰林院庶吉士饒叔光

湖北武昌縣人戊戌進士翰林院庶吉士

心地慈良品詣端潔熟精歷史於歷朝

國朝名臣奏議尤所究心志在用世洵爲品學兼修之士

陝西補用知縣丁禧瀚

湖北江夏縣人癸巳舉人

文章爾雅內行修明素性耽書於算學一門采貫中西精思獨運
又嫻習吏事志識卓越用世之才

兵部郎中劉國柱

湖北黃岡縣人

肆力古書留心時事志氣開廣文字清華少年遠到之器

舉人劉邦驥

湖北漢川縣人

天性至孝母喪三年不茹葷係兩湖書院優等學生院章十日放

假一日劉邦驥每遇書院放假日必上母墳祭掃鄉人咸嗟敬之
平日攷求經史及用世之書嗣派往日本游學四年在成城學校
畢業復在礮兵聯隊畢業於礮學兵學測繪學算學化學醫學譯
書學皆能深究其理確可見諸實用又能主持正論以忠君大義
勸勉同輩雖邪說紛起恐嚇百端不爲少動忠肝義膽無愧古人
現派充湖北大學堂教習

舉人胡鈞

湖北沔陽縣人

志趨高遠才品俊拔係兩湖書院算學領班學生經史文章皆有
功力派往日本游歷二次攷求學堂教育要政精思卓識所得良
多於測繪學算學譯東書學最長治事之才尤爲精敏現派充湖
北師範學堂堂長

附生陳毅

湖北黃陂縣人

學博思沈志氣高邁西北輿地最爲精熟係兩湖書院優等學生曾派往日本游歷兩次於教育一門盡心講求細密詳實曾觀日本教科書數百種所有辦理大中小學堂之法心中皆有規則不爲空談一時才雋罕能幾及現派充湖北師範學堂堂長

舉人陳問咸

湖北安陸縣人

學問雅整氣質溫純係兩湖書院測繪學領班學生在兩湖書院數年安謹循禮從不犯規無近日學生囂凌習氣人品可貴曾派往日本游歷兩次能譯教育書兼知其理所繪各圖工細準切經史俱有根柢文章亦斐然可觀現派充湖北自強學堂中學教習

舉人田吳炤

湖北江陵縣人

才志沈毅守道不移係兩湖書院優等學生經學文學皆能講求有得曾派往日本成城學堂游學二年又派游歷一次學堂辦法

及一切教科書能譯能讀才又足以副之尤精算學理法通明可
以致用現派充湖北自強學堂中學教習

舉人盧靜遠 湖北竹谿縣人

質性聰穎心思精銳係兩湖書院優等學生算學本有根柢嗣派
往日本游學四年成城學校畢業復在礮兵聯隊畢業於礮法戰
法圖算皆能精熟每次畢業皆名列第一日本校官咸贊美其才
現派充湖北大學堂教習

附生吳元澤 湖北保康縣人

心地質樸志趨端嚴係兩湖書院優等學生派往日本成城學校
游學四年畢業復在步兵聯隊畢業武事精能不避勞苦心術正
大不附訛邪學成返鄂無矜誇之容偏謬之見論事辦事皆有條
理實屬緩急可倚之材現派充湖北將弁學堂教習

舉人陳曾壽 湖北新水縣人

性行孝謹志趣光明係經心書院優等學生經史理學皆有工夫
文筆亦復茂美近更博考西國諸政觀書有識宅心無邪尤於兵
事勤求不懈所著有歷代兵事圖略表指陳得失利害俱見懷抱
英特慨然負經世之才

分省試用同知宋康復 湖北漢陽縣人

品行修謹志趣清超係經心書院優等學生研究經史饒有心得
所爲文章天骨開張才氣英偉大有宋陳亮薛季宣一流人氣概

舉人萬廷獻 湖北武昌縣人

志氣不俗品行謹飭係湖北武備學堂優等學生兵法已知梗概
又能習體操工算術嗣派往日本游學四年在成城學校畢業又
在礮兵聯隊畢業於礮法戰法用心學習親身試演實得要領可

以辦事現派充湖北普通中學堂教習

請獎書院院長摺

光緒二十八年九月

奏爲湖北書院院長品節可風懇

恩獎勵以端教化恭摺仰祈

聖鑒事竊維

朝廷設立學校慎選師儒所以培養士風修明學術湖北地方居
長江之上游天下之中樞形勢雄偉人文秀蔚其間圭璧之彥舟
楫之才必有先達爲之津梁名師示之模楷故能養成楨幹炳耀
膠庠臣等先後來治此邦問俗思賢時加采訪亟欲表章師範垂
示方來茲查有興國州處士疊山書院院長萬斛泉曾於咸豐九
年經前撫臣胡林翼專疏奏稱萬斛泉結茅山中讀書講道賊至
時正襟端坐賊不敢近自相引去仰蒙

文宗顯皇帝賞給頂戴光緒九年前督臣涂宗瀛又專疏保奏仰蒙

皇上賞給國子監博士銜是其學行端純一鄉感化曾荷先朝之寵賚復承

聖主之恩言公論久昭士林翕服臣等聞萬斛泉今年已九十有三精神強健尙能日課諸生議論則正而不偏教思則老而彌篤及其門者類皆廉隅自勵不入公門以胡林翼所舉之耆儒至今猶在可謂楚國之蘭荃人間之星鳳矣又查御史銜蒙泉書院院長吳兆泰居心溫厚持論正直主講省城經心書院有年每論國事寤寐不忘江湖有魏闕之思松柏存歲寒之節前學臣王同愈重其爲人疏稱其課士盡心成效卓著仰蒙

賞還原銜吳兆泰感激涕零益自淬勵今年甫五十若聽其優游

講舍不能效力

國家實爲可惜倘荷

起用必不孤

恩以吳兆泰立朝有節居鄉有教求之今日蓋不甚多邇來風氣大開學堂廣設通知時務之士講求變法之時果能有辨邪正明義利者維繫其間收益更爲閎遠臣等區區之愚實在於此合無仰懇

天恩將國子監學正學錄銜萬斛泉一員

賞給五品卿銜或國子監司業銜至御史吳兆泰一員可否

飭令送部引

見優加錄用出自逾格

鴻施臣等爲表章師儒整頓士習起見謹合詞奏請伏祈

皇太后

皇上聖鑒謹

奏

請補撫民同知摺

光緒二十九年二月

奏爲改設夏口撫民同知員缺緊要仍請以原擬之員補授恭摺
仰祈

聖鑒事竊照湖北夏口撫民同知係改設衝煩疲難四項最要缺
前經臣會同本任督臣張之洞請以候補班前補用知府新海防
試用同知馮啟鈞補授在案旋准吏部咨馮啟鈞已保免補同知
以知府仍留原省歸候補班前補用其試用同知原班已斷所請
補授漢陽府夏口同知之處應毋庸議行令另行揀員等因於光
緒二十八年十一月二十日奉

旨依議欽此臣督同藩臬兩司覆加察核該廳駐劄漢口濱臨大江陸則爲鐵路發軔之區水則爲輪船聚泊之埠中外商賈輻輳其間會匪遊勇最易溷跡且各國租界俱在該廳境內華洋交涉政務尤繁非精明幹練熟悉情形之員斷難勝任計自改設以來隨卽揀選一時難得其人以致要缺虛懸未經請補茲復在通省現任候補各項同知班內逐加遴選實無堪以升調請補之員惟查該員馮啟鈞強幹精明才堪肆應於交涉緝捕等事尤擅專長去年正月以試用同知委署斯缺至今已逾一年民教相安中外輯睦措置一切無不裕如前因拏獲自立會匪出力保歸知府候補惟其試署斯缺係在未准部復之前現在雖已經部議准究未引見過班其同知原資未得謂爲全斷且查勞績保舉人員部章本

有准其註銷保案仍歸原捐班次序補之文前請將該員候補知府銷去仍以試用同知請補改設撫民同知要缺似於部定章程無甚刺謬伏讀光緒二十八年正月十七日

上諭著各督撫接見僚屬擇其賢者量加委任不必盡拘資格等因欽此誠以時局艱危非才莫濟與其拘泥成例貽誤方來曷若任用得人收效切近今夏口廳係創設要缺一切交涉事宜倍形繁重因應苟有未當大則動爲全局所關小亦足爲地方之累馮啟鈞署理年餘卓著成效人地實在相需合無仰懇

天恩俯念員缺緊要准將馮啟鈞候補知府註銷補授漢陽府夏口撫民同知實與地方洋務兩有裨益據湖北布政使瞿廷韶按察使李岷琛會詳前來除咨吏部外理合恭摺具陳伏祈
皇太后

皇上聖鑒再湖廣總督係臣兼署毋庸列銜合併陳明謹
奏

揀員調補省會知府摺 光緒二十九年四月

奏爲省會知府要缺揀員調補恭摺具陳仰祈

聖鑒事竊准吏部咨光緒二十九年正月初十日奉

上諭湖北武昌府知府員缺緊要著該督撫於通省知府內揀員
調補所遺員缺著琦璋補授欽此遵查武昌府知府係衝繁難省
會要缺政務殷繁且時有京控發審要案以及中外交涉事件非
精明練達才識兼優之員弗克勝任臣於通省知府正途各員內
逐加遴選查有現署武昌府知府漢陽府知府梁鼎芬年四十五
歲廣東番禺縣監生光緒二年順天鄉試中式舉人六年中式進
士

殿試二甲

朝考一等改翰林院庶吉士九年散館奉

旨授職編修十一年六月二十四日以言事獲咎降五級調用二十六年經前湖北學政臣王同愈奏保十二月十五日奉

上諭賞還原銜復經本任督臣張之洞奏保送部引

見二十七年七月二十八日由吏部帶領引

見八月初二日蒙

召見一次奉

上諭以知府發往湖北遇缺補用十九日奉

上諭補授湖北武昌府遺缺知府領憑到省委署武昌府知府二十七年十月初八日接印旋補漢陽府知府二十九年正月復委兼署鹽法武昌道是月初十日到任該員學問淵通才堪肆應實

係知府中最爲出色之員且係正途出身以之調補武昌府知府洵堪勝任據湖北布政使瞿廷韶按察使李岷琛會詳前來合無仰懇

天恩俯念武昌府知府員缺緊要准以漢陽府知府梁鼎芬調補實於地方吏治均有裨益所遺漢陽府知府遵

旨卽以琦璋補授理合恭摺具陳伏祈

皇太后

皇上聖鑒訓示再湖廣總督係臣兼署毋庸列銜合併陳明謹

奏

籌辦屯田稅契量爲變通摺

奏爲鄂省籌辦屯田稅契查照部議核與山東繳價數目量爲變通恭摺具陳仰祈

聖鑒事竊鄂省前因籌辦屯田清丈增收契稅並酌定兼抽經費章程經臣會同本任湖廣督臣張之洞具奏光緒二十八年十一月二十五日奉

硃批戶部知道欽此當經札行司局遵照辦理在案本年四月初一日接准戶部咨具奏湖北屯田繳價數目擬令仿照山東章程酌核辦理一片光緒二十九年三月初七日奉

旨依議欽此粘鈔原奏咨行到鄂復經檄行司局遵照核議去後茲據湖北布政使瞿廷韶督糧道譚啟宇會同清理衛田局補用道朱滋澤等詳稱遵查戶部原奏湖北屯田比照民田價值完納契稅統按六分征收按照所擬稅契等則核計其地值二十千以外者照二千之價完稅錢九百文值十千以內者照十千之價完稅錢六

百文較之山東屯田繳價之數所短尙多若照山東屯田繳價比擬核定則每畝二十千文以外者不過繳價三千文值十千以外者不過繳價二千文值十千以內者不過繳價一千文飭將該屯田繳價納稅章程覆加酌核無論如何變通辦理總期於山東屯田繳價數目不甚懸殊等語自係整頓屯賦實事求是之意惟各省情形不同因地制宜有不能與山東相提並論者山東地多高原湖北地多低窪武黃漢沔荆襄等處無歲不籌費築隄農民苦累爲他省所無故田價較賤從未聞有每畝值至三十千以上者一也濱江濱湖此坍彼淤田畝變遷無定二也坍者良田賦早蠲緩淤者荒地僅長蘆菱祇可酌收蘆課兼以積淤成沙全荒者多三也此岸坍陷彼岸淤長有軍戶過江墾種者有民戶隱佔私墾者以致有田沒糧存有田無糧田少糧多等不均之弊輾轉膠轕

難以究詰四也凡此情形與山東顯有區別均須熟籌審處變通辦理前曾奏明澈底清查迅速舉辦以期早就清釐欽奉硃批戶部知道欽此節經遵照出示曉諭派員勘丈通飭一律照辦惟民情囂悍歷年過久積弊甚深尙多觀望遷延現准部咨距開辦時已四閱月若更議令繳價加收必致相率驚疑枝節橫生益難就緒竊以丈田清賦政之大經但求無漏無隱稅款日盈似不在一時繳價之多寡查湖北屯田民間頂購者十千之價歲收租息錢五六百文今繳稅錢六百已輸一歲之租又因派員勘丈經費無出原議照畝價十千加收費錢二百文戶部原奏只計稅款尙未計及此項丈費如稅費併計核與山東繳價章程十千以內繳價一千之數止減十分之二在部臣之意亦知各省情形不同但期彼此相較不甚懸殊原不能顛若畫一茲復加酌核鄂省

原奏聲敘稅則僅指地值二十千及十千以外並十千以內三等現擬請於以上三等外續增價值十五千以外者照二十千完稅價值二十五千以外者照三十千完稅加此二等是值十千以內者共繳稅費錢八百文值十千以外者繳稅費錢一千二百文值十五千以外者繳稅費錢一千六百文值二十千以外者繳稅費錢二千四百文較之山東繳價數目不甚相懸並令分三限清繳於丈清領契時先繳三分之一以後分作兩忙繳清以紓民力至全荒之洲地除作官荒開墾非易如民間有願領者應准給領酌收稅費等情詳請具奏前來臣查鄂省素稱澤國災歉頻仍近復重以償款民間生計倍極艱難該司道等所陳均係實在情形現經查照部議增加稅款稅費併計核與山東繳價數目僅減少十分之二實屬不甚懸

殊仍當嚴飭印委各員認真清丈俾隱糧悉數清出雖目前之價費未遽取盈而將來之稅款收效甚大合無仰懇

天恩俯准照辦實於恤民清賦兩有裨益除咨部外所有籌辦屯田稅契核與山東繳價數目量爲變通緣由理合恭摺具陳伏祈
皇太后

皇上聖鑒訓示再湖廣總督係臣兼署毋庸會銜合併聲明謹
奏

酌保辦釐出力人員摺

奏爲遵

旨酌保辦理釐金尤爲出力人員懇

恩獎勵以昭激勸恭摺仰祈

聖鑒事竊照鄂省釐金自前撫臣于蔭霖極力整頓收數日有起

色當經奏明綜計收數能較光緒二十四年增收至四十萬串卽擇尤酌保數員以資鼓勵臣到任後因收數加增復經附片奏請將總辦牙釐局之候補道趙濱彥保獎二品頂戴並聲明其餘辦理出力收數最多者擇尤酌保一二員等情先後均奉諭旨允准在案查鄂省釐金收數自光緒二十六年以來逐年遞加去年一年收數較之二十四年已增收錢七十萬餘串本年上半年收數比之去年又復加多湖北省自宜昌鹽釐抵還洋債撥補之欸半歸無著江漢關茶稅減徵課收又復驟短新案賠欸雖經設籌而收數盈絀無恆往往不能濟急全賴此項釐金隨時挹注得以無誤要需裨益大局良非淺鮮所有釐局在事各員查有收數短絀及有心欺隱任意侵蝕之員均經隨時分別撤參未敢稍涉寬假其收數最多異常出力者自應遵

旨擇尤酌保一二員懇

恩破格優獎始足以示鼓勵而資觀感茲查有辦理鸚鵡洲竹木
釐局委員湖北候補知府王元常一年期滿比較定額溢收錢十
萬八千餘串又辦理蔡甸釐局知府用湖北候補直隸州知州和
文一年期滿比較定額溢收錢十萬六千餘串該二員守潔才長
通達商情綜核精審收數最多實辦理釐金不可多得之員合無
仰懇

天恩俯准將湖北候補知府王元常送部引
見聽候

錄用知府用湖北候補直隸州知州和文仍以知府留於原省歸
候補班補用以昭激勸出自逾格

鴻慈除咨部外理合恭摺奏陳伏祈

皇太后

皇上聖鑒再湖廣總督係臣兼署無庸會銜合併聲明謹
奏

請加鄉試中額摺

光緒二十九年七月

奏爲鄂省紳民完納賠款銀兩援案籲懇

天恩遇科准加鄉試中額以昭激勸恭摺仰祈

聖鑒事竊查鄂省新案賠款前經本任督臣張之洞會同臣將籤
捐改爲賠款捐督飭司局飭令州縣各就地方情形籌辦抵補其
抽捐之法以串票爲大宗而舖捐亦居其三四奏奉

諭旨允准欽遵辦理在案伏查湖北本係中省非他省繁富可比
近年以來解款日增庫藏久絀關稅丁漕等項歲入之數撥解多
有定款已難供本省支銷奉派新案賠款較之湖南近省多至五

十萬兩民力困窮地方瘠苦驟攤鉅款籌措尤難且期限綦嚴稍一羈遲動至貽悞全局幸通省紳民洞明大義忠愛性成咸曉然於此項捐輸係屬萬不得已無不共體維持勉圖報効計光緒二十八年收賠款捐銀四十九萬七千餘兩本年捐數亦皆按月解清預計至歲底較之上年當必有盈無絀通共每年收銀約計五十萬兩成效昭然實非臣等始願所及此皆

朝廷深仁厚澤久洽民心亦由紳民紆難毀家形爲風俗故當物力凋劫之餘咸能踴躍急公歲輸鉅款得以按期滙解無悞要需是鄂省紳民因事效忠不違私計實較他省爲難查同治十三年部議捐輸加廣中額章程一省捐銀至三十萬兩者准廣一次文武鄉試中額一名又光緒二十七年四月部議四川督臣奎俊奏川省紳民捐輸鉅款請照章加廣鄉試中額一名奉

旨允准近雲南撫臣林紹年以滇省按鹽隨糧捐輸請照每三十萬兩加文武鄉試一次中額各一名又以武科已停請併入文鄉試辦理業經奉

旨飭部核議茲鄂省紳民按年捐輸賠款銀兩與滇省鹽糧捐事同一律且與川省成案亦屬相符合無仰懇

天恩俯准敕部立案將鄂省紳民完納賠款捐銀兩按照捐銀三十萬兩推廣文武鄉試一次中額各一名章程併爲文鄉試中額二名以資觀感而勵輸將出自逾格

鴻慈如蒙

俞允應俟每年銀數收齊截數後由臣核明應廣額數報部於下屆舉行正科時辦理至長餘銀兩仍俟下屆併計據署湖北布政使岑春煇會同善後局司道詳請援案具奏前來謹會同湖北學

政臣胡鼎彝恭摺具陳伏祈

皇太后

皇上聖鑒敕部覈議施行再湖北巡撫係臣本任無庸會銜合併

陳明謹

奏

謝賞緞皮福字摺

光緒三十年正月

奏爲叩謝

天恩恭摺仰祈

聖鑒事竊

臣於光緒三十年正月初六日齋摺差弁回鄂奉到

慈賞大緞四疋貂皮八張同日復奉到

恩賞福字一方又於正月初九日由兵部火票遞到欽奉

慈賞福字一方壽字一方均卽恭設香案望

端忠政公奏稿

卷二

十一

闕謝

恩叩頭祇領伏念臣忝膺疆寄屢被

寵榮值令序之開韶復

恩綸之疊賁祥徵洪範

頒春帖而

寶墨增華品貴貂襜染

御香而宮袍倍艷沐

光榮於累歲益感戴以無涯際此時事方艱邊陲多故

蕃釐徧德慰茅檐望

澤之思被服生溫念鐵甲屯邊之衆臣惟有勉圖匡濟仰答

殊施祝

福壽於

璇宮願上

日月升恆之頌布

仁恩於轄境冀竭壤流報塞之忱所有臣感激榮幸下忱謹

恭摺具

奏叩謝

天恩伏祈

皇太后

皇上聖鑒謹

奏

請旌表節孝摺

光緒三十年四月

奏爲孝子節婦萃於一門籲請

旌表以彰風紀恭摺仰祈

聖鑒事竊據湖北補用道繆嘉玉署均州知州本任竹谿縣知縣湯炳堃等稟稱已故雲南舉人楊履寬至性過人年十二喪父奉母徐氏僑寓湖北曲盡孝養母病刲臂和藥以進比遭母喪哀毀骨立居廬年餘卒以身殉其妻席氏事姑能得歡心經紀夫喪百計營慮憂悴成疾相繼不起去其夫之歿僅百日該員等誼切梓桑見聞真確開具事實呈懇奏請

旌表前來臣伏查該孝子楊履寬系出清門生有至性賢書早列備廕菽水之歡子職克供遽感蓼莪之詠陟屺而瞻望罔極居廬則哀毀以終信孺慕之克敦宜人言之無間該孝子之妻席氏動與禮游靜緣貞立感增風木方抱憾於重泉節凜霜筠遂盟心於皦日孝子殉母節婦從夫匪惟萃奇行於一門實足維倫常於千古用彰風教宜荷

旌揚合無仰懇

天恩俯准將孝子楊履寬節婦楊席氏給予

旌表出自

鴻慈除將事實清冊咨送禮部查照外謹會同湖廣總督臣張之洞湖北學政臣李家駒恭摺具陳伏祈

皇太后

皇上聖鑒訓示謹

奏

請改撥克薩銀兩摺

再准戶部咨光緒三十年應還克薩欸本息銀兩查照上年指撥各欸數目撥湖北鐵路費五萬兩船廠經費五萬兩行令滙解滬道兌收等因當查湖北省奉撥以上兩項雖均有此名目早已無

欵業經奏咨在案惟以欵關中外交涉光緒二十七八九三年分均勉由司道關局竭力騰挪湊撥匯滬原不能作為常年認解的款上年又經

奏明嗣後應邀免再派旋奉部咨免派一節應俟明年屆期再行酌度情形辦理各等因在案茲准指撥本年應還前項本息如鄂力稍可騰挪決不敢意存歧視惟查鄂省進款以丁漕釐金關稅為大宗近歲時有水旱偏災丁漕不無緩欠藩糧兩庫度支久形困竭百貨釐金半為子口洋旗所奪加以日俄現有戰事貨物阻滯收數頗形減色江漢關茶稅歲歲減徵上年所入之數較之最旺之年短至七八十萬宜昌鹽釐自光緒二十四年抵還洋債之後歷年雖經戶部指欵撥補而他省之欵大都無著統計欠解之數積有百餘萬兩之多其餘雜捐多係湊解新案賠欵往往收不

及額按月尙須挪移應急至奉撥之京協各餉四國洋款加撥鎊價新舊東北邊防經費等項在在均關緊要而新添奉調北上之常備八營餉需皆由鄂省支給爲數至鉅刻不容緩支絀情形實不堪言狀查鄂省本非財賦之區舉辦各項要政較爲認真久已東挪西湊不敷應付似此進欸日短撥欸日增司道關局各庫已羅掘一空息借商欸爲數正復不少至今尙難籌還所有克薩本息銀兩委實無從籌解臣等非不知此欸爲中外交涉所關何敢稍鄰諉卸惟原撥之款本係無著而鄂省民力庫儲祇有此數若因此將別項應解之款截留抵解顧此失彼貽誤更非淺鮮惟有仰懇

天恩飭部准速改撥以期無誤大局據湖北布政使李岷琛督糧道譚啓宇鹽法武昌道繼昌漢黃德道江漢關監督梁敦彥善後

局司道會詳請

奏前來除咨戶部外謹合詞附片具陳伏祈

聖鑒謹

奏

敬舉賢員摺 光緒三十年四月

奏爲敬舉賢員懇

恩擢用以襄治理恭摺仰祈

聖鑒事竊念世變孔亟須才甚殷自強國競爭卮言日出中國外交內治之策實與從前有難易之殊是以安靜之吏勤勤懇懇勉從公者所在雖不乏人而求其宏濟艱難練達治體奉行新政措置咸宜者已寥寥罕覩誠以處此時局非有過人之才而濟之以忠君之志則鮮有足與言治者矣臣等任鄂稍久又值

朝廷更新百度之時遇事考覈於屬員中見其才識卓越堪勝重任者近得兩人一爲湖北荆宜施道余肇康該員才具優良吏事精敏以折獄見稱到任數月清理積案訊結者八十餘起升任荆宜施道後講求外交動得大體辦理交涉中外皆無間言所屬各府學堂督率興辦不遺餘力荆州駐防所設中小蒙養學堂及方言工藝學堂該員襄助經理具有規模尤能勤於民事凡地方要政不憚煩瘁實有綜覈之能一爲湖北武昌府知府梁鼎芬該員學問深通秉性剛正當在鄂主講兩湖書院時值亂黨初熾莠言四起卽首以闢邪崇正爲事每爲亂黨所忌該員全力相持曾不少動履任後感激

朝廷錄用之恩竭力圖報往往日昃不食深夜不寢於公家之事任勞任怨不分畛域創辦省城警察爲通省之倡匪戢民安成效

大著於所屬各州縣察吏嚴明讞獄精審近年臣等遵旨籌辦學堂該員無役不與殫心籌畫苦口勸諭迄今鄂省學堂得較他省完備出洋學生得較他省稍有成就流弊尙少趣向尙端者皆得該員佐理之力生平存心忠愛辦事血誠凡遇一事真能奮不顧身令人感發同僚實無其選以上二員臣等相知有素用將其治行據實臚陳不敢有所溢美如蒙

天恩擢用

畀以重要之任必於治理有裨所有敬舉賢員各緣由臣等謹合詞恭摺具奏伏乞

皇太后

皇上聖鑒謹

奏

酌保辦釐人員摺

再湖北釐金自前撫臣于蔭霖極力整頓收數日增當經奏明俟
年終綜計收數能較光緒二十四年增收至四十萬串卽擇尤酌
保數員以資鼓勵臣到任後因二十八年收數較之二十四年增
收錢七十餘萬串當將辦理釐金出力人員遵
旨擇尤兩次酌保先後均奉

硃批著照所請該部知道欽此查鄂省釐金收數自二十六年奏
准酌保予獎之後雖獲邀獎敘不過二三人而承辦各員互相奮
激積弊頓清全省釐政頗爲整肅歷年收數遞有加增現計二十
九年分全年共收銀三十三萬餘兩收錢二百六十九萬餘串銀
錢併計較之二十四年已多收至一百萬串卽較之二十八年亦
多收錢二十餘萬鄂省按年應解之京協各餉及本省營餉欸目

繁多時虞不給加以新案賠款周轉爲難全賴此項釐金藉資挹注得以無誤要需所有二十九年分承辦釐務在事出力人員自應遵

旨照案擇其異常勤能裨益大局者懇

恩給予優獎以示鼓勵茲查有總辦牙釐局湖北補用道趙瀨彥秉性公忠不辭勞怨各局利弊皆能了然於心綜核復極精審以故辦釐各員賢者得盡所長不肖有所嚴憚鄂省釐金之旺趙瀨彥一人之力爲多又湖北候補道張賡颺辦理鸚鵡洲竹木統捐事務一年期滿比較定額多收至十二萬餘串商民悅服毫無間言又湖北大挑知縣借補荆門州州同朱金祺辦理總局文案收支事務歷年最久任事最勤於各局文牘及出入款目攷覈鉤稽昕夕罔懈其居心正大條理精詳各局員皆奉爲表率以上三員

臣皆考察有素欲規後效既未敢沒其勤能獎敘成勞亦不敢出以冒濫合無仰懇

天恩俯准將二品頂戴湖北補用道趙濱彥仍以道員歸候補班補用湖北候補道張賡颺

賞給二品頂戴湖北大挑知縣借補荊門州州同朱金祺在任以同知候補以昭激勸出自逾格

鴻慈除將出力較次之員酌給外獎外謹會同湖廣總督臣張之洞附片具陳伏祈

聖鑒訓示謹

奏

火車貨捐飭部立案摺 光緒三十年四月

奏爲鄂豫兩省籌辦火車貨捐已著成效懇

恩飭部立案恭摺具陳仰祈

聖鑒事竊臣等於光緒二十五年五月間因蘆漢鐵路已由湖北漢口通至河南信陽楚豫來往商貨多由火車販運以致湖北境內漢陽德安等府所屬各釐局收數頓絀當以陸路火車與水路輪船運貨完稅事同一律令飭鄂省牙釐總局酌量於漢口地方設立貨捐局以期挽回利權開辦之初華洋商人因屬創設不願認捐經臣之洞臣端方電請外務部特派總稅司赫德襄助經理并飭由江漢關稅務司安定章程格外寬恤將釐章改輕凡由火車運貨者無論華洋商人均只按海關稅則納值百抽二五之半稅一次此外鄂省皆不重徵並於海關人員中選派一員幫同委員監察以通商情經理數月始克勉就繩尺上年因鐵路逐漸展長貨源日旺鄂豫交涉事宜必須會同商定沿途分設分卡亦須

預爲查勘由臣端方檄委湖北候補道左元麟前往河南會同豫省司道詳細商籌並與前河南撫臣張人駿往復電商議定由鄂委專辦豫委會辦核實稽徵自確山開車之日起所收貨捐豫鄂各半分撥該委員等循照章程遇事因應已將河南境內之駐馬店漯河灣河鄆城各分卡次第設立近來華洋商人曉然於統捐之法簡而易行絕無留難阻滯貨物闐闐爭先恐後按月收數逐漸增加計自二十八年七月起至本年二月止共收貨捐錢十二萬七千餘串除去開支局用豫省先後劃分之欸由釐稅項下彙案奏銷鄂省則按月解交善後局充餉彙入釐金正欸報銷伏查鄂豫兩省應解京餉協餉及本省營餉各欸半恃釐金爲大宗而鄂省比額較多收數最旺盈絀之間關係尤重自火車暢行附近鐵道之水路各釐局向來應徵之釐半歸無著若不設法抵補則

本省應用之款必至驟形竭蹶貽誤要需現幸火車貨捐極力經營規模粗定將來蘆漢鐵路接通之後各局釐金雖必日見其絀而火車貨捐當可日期其旺是失之東隅尙不難收之桑榆挹彼注茲於餉需不無裨益上年鐵路總工程司沙多來鄂曾以鄂省火車貨捐辦法最善爲詞近來各省議修鐵路亦均來鄂查取章程臣等默察情形此項貨捐不惟外人無所藉口足以塞貨稅之漏卮抑且各省皆可仿行足以省無形之唇舌有利無弊成效昭然而其創辦之初事事掣肘種種爲難雖經一意堅持亦未料其悉就範圍遽有成效至於如此所有在事出力人員勤慎從公始終不懈不無微勞足錄合無仰懇

天恩俯准飭部先行立案由臣等隨時考查擇其尤爲出力者酌保數員以示鼓勵出自逾格

鴻慈據湖北河南藩司會同兩省釐局司道詳請具
奏前來除咨外務部查照外謹合詞恭摺具陳伏祈

皇太后

皇上聖鑒訓示謹

奏

端忠敏公奏稿

卷二

三十一

端忠敏公奏稿卷二終

端忠敏公奏稿卷三

兼署督篆謝

恩摺

光緒二十八年十月

奏爲恭報

微臣

兼署督篆日期叩謝

天恩仰祈

聖鑒事竊照光緒二十八年九月初六日承准軍機大臣電開奉
上諭兩江總督著張之洞署理迅速赴任湖廣總督著端方暫行
兼署欽此當經具摺恭謝

天恩茲於十月初一日准督臣張之洞將湖廣總督關防

王命旗牌文卷派委署武昌府知府梁鼎芬署督標中軍副將吳
元愷賚送前來當卽恭設香案望

闕叩頭祇領任事伏查湖廣爲南北交衝之會中外綰轂之區自
督臣張之洞調任以來竭力經營造端宏大舉凡興學練兵勸工

製造諸務皆係新政應辦要需而籌款萬難觀成非易加以時艱孔亟交涉日繁因應維持均關緊要臣才幹智短深懼弗勝惟有勉竭血誠遇事認真經理不敢以暫時兼攝稍事因循以期仰答高厚鴻慈於萬一所有微臣兼署督篆日期並感激下忱謹摺叩謝

天恩伏乞

皇太后

皇上聖鑒謹

奏

奏留知縣差遣摺

光緒二十八年十月

奏爲知縣循聲卓著現在籤升京職懇請開去底缺仍以知縣留於湖北差遣恭摺仰祈

聖鑒事竊查接管卷內據湖北布政使瞿廷韶按察使李岷琛詳稱前宜都縣知縣李天柱由陝西鎮安縣知縣丁憂起復於光緒二十三年十一月選授宜都縣知縣二十四年七月到任茲於二十七年十二月奉文籤升太常寺博士當經飭令交卸自應遵照定例詳請給咨赴京供職惟查該員自到宜都縣任以來善政及民實心任事輿情愛戴士論翕然屢經前撫臣于蔭霖奏保二十六年

上諭著傳旨嘉獎欽此二十七年奉

上諭著送部引見欽此是該員才能卓越久在

聖明洞鑒之中湖北州縣中人員似該員之操守謹嚴性情純正老成練達物望交孚者正不數覩如蒙奏請開缺留省差遣可收相觀而善之益等情詳請具

奏前來本任督臣張之洞未及核奏旋即卸事當經移交伏念該員服官兩省卓著循聲此次籤升京曹在

朝廷任官惟賢京外本無歧視而以治行素優之良吏置諸責任較簡之清班雖該員職有專司自能報効而鄂省值此政務煩興之日忽少一精明廉幹之員不無可惜合無仰懇

天恩俯念鄂省循良難得臂指需人准將李天柱開去太常寺博士員缺仍以知縣留於湖北差遣委用出自逾格

鴻慈除咨吏部並太常寺外理合恭摺具陳伏祈

皇太后

皇上聖鑒訓示再湖北巡撫係臣本任毋庸會銜合併陳明謹奏

出省查勘鐵路情形片

光緒二十八年十一月

再九月二十九日欽奉

上諭現在各處開辦鐵路關係重大其鐵路經過地方兵政稅項利權一切政事著南北洋大臣湖廣兩廣總督督辦各專責成隨時妥籌辦理等因欽此臣查盧漢鐵路現已由漢口造至信陽州以北將抵確山縣地方購地造路赴工頗速由鐵路運送貨物逐漸增益應徵稅釐事須早日籌定臣於十一月十八日自漢口乘坐火車啟行於申刻馳抵信陽十九日乘原車駛回是晚卽渡江返省沿途查勘情形路工甚爲堅實民情亦均欣悅鐵路附設之德律風線等項從前間有宵小割損情事經湖北所派之鐵路兩營按段分紮彈壓並飭地方官隨時查禁現在悉臻安謐臣至漢口時順道查勘各國新拓之租界並接晤各國領事商酌一切其應暫徵稅釐事宜亦經與河南撫臣往復電商歸併鄂省代收明年南省會試士子由漢赴豫如能附搭火車至確山殊省跋涉之

煩亦經督飭鐵路總會辦道員與洋工程司商明尅日趨工以便寒峻所有出省察勘鐵路情形理合附片陳明伏乞

聖鑒謹

奏

裁革陋規酌給公費片

光緒二十八年十一月

再前准戶部咨光緒二十八年八月十一日內閣奉

上諭國家設官分職原期大法小廉潔已奉公乃該管上司收受陋規視爲故常無怪吏治日益頹壞著仿照直隸奏定章程將各項陋規一律裁革仍酌定公費以資辦公等因欽此恭錄咨行到鄂遵查湖北省道府各官經前署督臣卞寶第及本任督臣張之洞兩次酌定辦公經費所有陋規等項久已革除第恐日久弊生飭司確查議覆去後茲據湖北布政使瞿廷韶按察使李岷琛會

詳稱查軍興以後道府等官養廉減成減平所餘無幾一切辦公
日用等項竭蹶異常遂致收受州縣陋規相沿已非一日光緒九
年經前署督臣卞寶第酌定辦公經費將陋規永遠革除內惟鹽
法武昌道荊州府荊門直隸州向無陋規漢黃德道荊宜施道先
已裁革安襄鄖荆道每年酌定公費銀三千兩糧道一千兩武昌
府三千八百四十兩漢陽府三千三百四十兩黃州府五千九百
四十兩德安府二千九百二十兩安陸府二千九百兩襄陽府三
千九百三十兩鄖陽府二千二百八十兩宜昌府一千七百二十
兩施南府二千五百二十兩均由缺分較優之州縣衛在於錢漕
平餘項下酌量勻攤按季徑解各道府衙門應用舉向來之積弊
固已廓然一清光緒二十五年本任督臣張之洞以鄖陽宜昌施
南三府所屬各州縣無不瘠苦自己辦公常患無資豈可津貼上

官更增苦累飭將原定本府辦公經費免其攤解另由善後局撥給不准再向州縣重索分文溯自定章以來屢經考查各該道府州縣均尙恪守成規罔敢僭越似可毋庸再議更張至各該道府公費向由州縣自行按季徑解尙稱簡便現若查照直隸章程改解藩司轉發反多周折未便仿行再各衛官現雖裁撤應解公費仍由兼署衛事各州縣照數攤解以符原額等情詳請覆

奏前來臣覆加查核湖北省道府各官自裁革陋規酌定公費之後尙無另立名目藉端攤派州縣亦無意圖見好餽獻嘗試情事至各省情形不同該司等所稱解由藩司轉發反多周折亦係實在情形應請仍照向章辦理嗣後仍當隨時嚴密稽查儻有私相餽送情事卽行從嚴參辦以期仰副朝廷懲貪除弊之至意所有湖北道府各官久已裁革陋規酌給

公費緣由謹附片具陳伏祈

聖鑒再湖北巡撫係臣本任毋庸會銜合併陳明謹

奏

武職大員請卹摺光緒二十八年十二月

奏爲武職大員戰功素著請

旨從優議卹恭摺仰祈

聖鑒事竊據長江水師湖南岳州鎮總兵魯洪達詳據岳州營中
軍游擊趙俊秀等稟稱長江水師已故湖南岳州鎮總兵張捷書
原名得勝湖南長沙府善化縣人咸豐五年由營伍隨胡林翼蔣
益澧克復武昌漢陽等城七年克復彭澤望江諸縣八年克復九
江首先登城嗣是捷舒桐援穎霍攻潛太克黃州無役不從同治
元年隨李續宜經營水師旋平苗逆於懷遠蚌埠擊股捻於宿遷

欽定四庫全書
卷三
三
郟城積功至提督並得巴圖魯勇號東南肅清仍統澄清水師各營並江防兵輪爲前兵部尙書彭玉麟所賞異以將才薦舉光緒十二年補授長江水師湖南岳州鎮總兵在鎮十三年勤閱操防兵民愛戴旋於二十五年積勞因病出缺茲據臚陳事實詳請奏卹前來臣查已故總兵張捷書束髮從軍迭著勳績名城巨壑克獲尤多九江一役髮曾林啟榮恃險死守我軍屢攻不克胡林翼建議以敢死士逼城誘戰潛由地道轟擊火舉城穴該鎮衝鋒履焰奮不顧身首先登陴諸軍從之遂復堅城懷遠之捷雉河之援皆以計斷賊糧道苗逆就殲張總愚不敢回顧舊巢卒用敗遁謀勇兼勝遂以軍閥知名當世厥後轉戰宿郊屢奏功績統師長江尤資鎮懾迹其生平在營三十年克復城隘數十處大小攻戰身被槍痕有如刻畫在事危苦實與中興諸將共之查長江水師

前瓜州鎮總兵吳家榜湖口鎮總兵丁義方漢陽鎮總兵謝濬奮均經奏奉

恩旨優卹該故總兵事同一律擬援案請將已故岳州鎮總兵張捷書照提督軍營立功後積勞病故例從優

賜卹生平戰蹟宣付史館並於湖南原籍及安徽省城附祀彭玉麟專祠以彰忠蓋出自

逾格鴻慈所有武職大員立功後積勞病故擬請從優議卹緣由理合恭摺具陳伏祈

皇太后

皇上聖鑒訓示謹

奏

菸酒糖捐提留經費片

光緒二十九年正月

再湖北省前因宜昌鹽釐抵還洋債所有撥補之款半多無著經
本任督臣張之洞於光緒二十五年

奏准加抽菸酒糖三項出產落地稅款一面選委委員分赴繁盛
市鎮設立籌餉局一律舉辦在案茲據湖北善後總局司道詳稱
查鄂省菸酒糖三項稅款計自光緒二十五年十一月開辦以來
現已三年漸著成效所收稅項均經解局撥充緊要餉需惟各該
局需用局董司事巡丁薪工飯食以及租住房屋置備器具並一
切雜用雖經迭飭樽節開支然若不爲酌定劃一章程殊無以示
限制而垂久遠擬請仿照牙釐局提留八分經費成案於正稅項
下每百兩提給八兩核實開支俾資辦公等情詳請
奏咨前來臣覆核無異除咨部外理合附片具陳伏祈
聖鑒再湖北巡撫係臣本任毋庸會銜合併陳明謹

奏

奏調知府辦理學堂片

光緒二十九年二月

再湖北處江漢之衝學堂爲觀摩所集事務日形繁重且當羣言
龐雜之秋尤非有文行敦飭之士相與講明裁正不足以閱造就
而收得人之效查有浙江候補知府楊鍾羲制行廉樸經術修明
於教課諸端深見講求該員由編修截取知府分發浙江現在丁
憂服闋擬調令來鄂派辦學堂事宜以資整理仰懇

天恩俯念鄂省學堂辦理需人准予該員調鄂差委出自

逾格鴻慈是否有當理合附片具陳伏祈

聖鑒訓示遵行謹

奏

劃撥准餉片

光緒二十九年二月

再准直隸督臣袁世凱電開直隸省需用小口徑毛瑟步槍六千桿馬槍二千桿無煙藥無箭槍彈六十萬顆又刺刀一千五百把請飭局分別撥發趕造所有價值由江漢關應協准餉內劃撥等因當經轉飭遵照辦理查此項步槍馬槍子彈刺刀等項共需庫平足色銀二十一萬四千二百五十兩自應由江漢關應解協餉項下抵撥惟查江漢關應徵大宗茶稅奉文減徵課收驟形短絀應協准餉無可撥解上年經本任督臣張之洞開單瀝陳接准戶部覆奏以該關茶稅驟短銀四十萬上下出入不敷係屬實情自難仍令將應解各款如數撥解除攤派洋款及稅務司經費仍按原數報解外其餘各款均准審察緩急暫行分別減解等因是前項應協准餉銀兩係在戶部核准減解之中本屬力難籌撥惟直隸爲

京師屏障槍彈乃軍實要需不敢不勉爲其難隨飭由江漢關設法湊集銀十萬兩於上年十二月撥解湖北省槍礮局作爲劃抵光緒二十八年分應解淮餉其餘不敷銀十一萬四千二百五十兩擬俟江漢關二十九年稅課收有成數再行陸續撥解槍礮局歸款卽作爲劃抵二十九年分應解淮餉據湖北漢黃德道江漢關監督岑春煇會同槍礮局具詳請

奏前來除分咨外理合附片具陳伏祈
聖鑒謹

奏

請改撥邊防經費摺

光緒二十九年二月

奏爲湖北糧道庫南糧項下奉撥光緒二十八年及豫撥二十九年東北邊防經費銀兩無款可解仍請改撥以免貽誤恭摺具陳

仰祈

聖鑒事竊前承准軍機大臣字寄光緒二十八年十一月三十日奉

上諭戶部外務部奏各省關欠解東北邊防經費請旨嚴催一摺著按照欠解銀數趕緊籌解等因欽此計單內開湖北南糧米折銀四萬兩未據報解同日奉

上諭戶部奏豫撥東北邊防經費照案指撥湖北南糧米折四萬兩著按照指撥銀數批解等因欽此當經轉飭遵照辦理茲據督糧道譚啟宇詳稱查東北邊防經費一項從前因南糧米折項下集存有款是以歷年如數籌解並無短絀貽誤近來所積之款久已羅掘一空上年因奉撥光緒二十八年邊防經費銀四萬兩無款籌解詳經

奏請另行改撥旋奉行准部咨邊防經費關繫東三省防軍要需務仍照案設法騰挪如數籌解倘糧道庫實無款可籌應在於本省解支各款內酌量緩急迅卽湊撥足數依限解交部庫以供餉需等因查南糧米折供支滿綠各營兵食既屬入不敷出此外道庫徵存之項亦均各有專支無米之炊殊難措手至令在本省解支各款內酌量湊解鄂省財源枯竭撥款日增近來宜昌鹽釐抵還洋債所有撥補之項大半多係無著江漢關因茶稅減徵收數又復驟短而應解之京協各餉四國洋款鎊價等項在在胥關重要新案大賠款尤復數鉅期長刻不容緩司道各庫久已悉索無遺屢經息借商款勉籌應付是各處指撥之款因應尙屬萬難此項經費實無款可以挹注所有原撥二十八年東北邊防經費銀四萬兩及豫撥二十九年之四萬兩惟有仍請一併

奏咨另行改撥免誤要需等情前來臣覆查無異合無仰懇天恩俯准飭部將光緒二十八九年東北邊防經費項下所撥湖北南糧米折銀八萬兩一併改撥俾免貽誤除咨部外理合恭摺具陳伏祈

皇太后

皇上聖鑒再湖北巡撫係臣本任毋庸會銜合併陳明謹

奏

選派學生游學摺光緒二十九年二月

奏爲遵

旨選派學生前赴美德俄三國游學恭摺具

奏仰祈

聖鑒竊臣伏讀光緒二十七年八月初六日

上諭造就人材爲當今急務前據江南湖北四川等省選派學生出洋游學用意甚善著各省一律辦理務擇心術端正文理明通之士前往學習學成領有憑照回華卽由該督撫學政分門考驗咨送外務部覆加考驗奏請獎勵分別賞給進士舉人各項出身以備任用而資鼓舞等因欽此仰見

朝廷培養人才振興實學之至意查同治年間美國所立條約第七條內載中國人欲入美國大小官學學習各等文藝須照相待最優國人民一體優待等語維時前大學士李鴻章與曾國藩會奏選派聰明子弟赴美肄業又選派游擊卞長勝等赴德肄習軍械技藝又與船政大臣會奏選派閩廠生徒分赴英德官廠學堂及兵船學習均經奉

旨允行在案近日中國人士怵於日本之自強往往徑赴東洋游

學其不由官派自備資斧者亦復不少人類既衆學術易歧實則日本學制亦皆步武泰西惟其厚視同洲故於學生不無寬待泰西則中國肄業者較少功課亦極認真臣每接見從前在歐美游學之人其得有卒業文憑者大半學問精深心術純正頗多可用之材現在中國力行新政所求正在此輩若不廣圖造就勢必習於近便繼往無人臣欽奉

明綸追思前事謹就湖北各學堂學生中選得錦銓楊祖謙李人鐸吳連慶善明賓步程陳籙馬德潤等八人派往德國游學其陳籙一名並擬令順道至法國考求學問又選得劉慶雲姚臣懋程毓璘陶德琨朱啟烈徐家琛張繼業楊恩湛雷以綸盧靜恆等十人派往美國游學蕭煥烈夏維松嚴式超劉文彬等四人派往俄國游學該學生等志趣遠大於各國語言文字及各種西學門徑

已有基緒使其盡心講求不難儲爲大用臣於臨行接見時勛以
淬厲忠愛之忱深究國論之要並於其出洋入塾時派令曾在美
國肄業學成而歸之候選同知施肇基偕往經理其英法兩國游
學學生俟派定後再行奏明辦理至學費一層泰西各國本較爲
浩大近年鎊價奇貴受虧尤多統計此次出洋學生每年約需銀
六七萬兩再三樽節無可裁減明知鄂省用款支絀萬狀此項費
用甚屬不貲然爲大局起見不敢惜此鉅款惟有飭司局竭力籌
畫以備應付其餘一切事宜悉遵照外務部議覆出使各國大臣
籌議出洋學生章程辦理除咨外務部並咨行出使美國德國俄
國大臣隨時照料考察約束外所有選派學生出洋游學緣由謹
會同南洋大臣署兩江總督臣張之洞恭摺具
奏伏祈

皇太后

皇上聖鑒謹

奏

撥給毅軍槍礮藥彈片

光緒二十九年三月

再前承准政務處咨總統毅軍甘肅提督姜桂題所部營隊需用槍礮子彈行令由江鄂各局所撥濟茲據提督選派都司遲雲鵬先往寧滬各局所試驗事竣卽順道赴武昌局所試驗等因當經轉飭會同都司遲雲鵬試驗詳辦去後旋據善後槍礮兩局詳稱格魯森三生五開花礮彈庫儲僅一千顆本省現存礮二尊子彈自應酌留擬勻撥四百顆又格魯森五生七開花礮彈庫儲僅存數百顆本省儲礮二尊未能勻撥惟漢廠所造五生七開花彈據都司遲雲鵬稱與格魯森子彈尺寸大小一律頗爲合宜擬將庫

儲此項子彈撥付二千顆又曼利夏槍彈庫儲僅十九萬餘顆本省現存槍二百枝尙需酌留擬勻撥八萬顆又黎意槍彈庫儲僅十一萬餘顆本省現存槍五十九枝自應酌留擬勻撥八萬顆以上四項經都司遲雲鵬驗明據稱尙屬合用並將隨帶來鄂之五生三五生七礮彈二顆存鄂換帶鄂省庫儲二項子彈二顆又將曼利夏黎意二項子彈酌帶數顆回京較試如果適用卽請派員來鄂撥解其餘庫儲各項子彈均不合用毋庸請撥等因當由善後局飭令軍裝所照撥格魯森五生三開花礮彈四百顆漢廠所造五生七開花礮彈二千顆曼利夏槍彈八萬顆黎意槍彈八萬顆並因拉火一項爲操礮必需之用現在北洋無可製造又酌撥拉火五百顆點交都司遲雲鵬領解回京查鄂省儲彈無多本難撥解而槍礮局

奏撥款項爲數無多經費異常支絀曾經本任督臣張之洞於光緒二十四年

奏明各省及各路軍營如有取用鄂廠槍礮者應照外洋現時價值酌減二成給價撥付欽奉

諭旨允准上年九月又經本任督臣張之洞申明

奏案將鄂廠槍礮藥彈價值分咨各省查照在案誠以鄂廠經費只有此數萬一各省紛紛咨取均不給價用款一竭應付立窮值此外洋禁運軍火入口之時若鄂廠再因款絀停工關係實非淺鮮今毅軍呈由政務處咨取鄂廠槍礮藥彈因該軍屯防

畿甸所關甚重不得不酌量勻撥以資濟用只得在善後局軍裝所存儲軍械內撥濟嗣後各省及各路軍營需用鄂廠槍礮子彈仍應遵照

奏案付給價值庶經費不致短絀得以源源製造足備緩急之用
保全鄂廠正所以維大局等情由湖北善後局司道會同槍礮局
總辦請

奏前來臣覆核無異除咨呈政務處外謹附片具陳伏祈

聖鑒再湖北巡撫係臣本任毋庸會銜合併陳明謹

奏

獎勵洋務人員片光緒二十九年四月

奏爲鄂省歷年隨辦洋務人員異常出力遵

旨併案開單懇

恩給獎以示鼓勵恭摺仰祈

聖鑒事竊照鄂省洋務交涉日益繁重歷年隨辦洋務人員異常
出力經本任督臣張之洞會同臣附片奏請援照南北洋洋務出

力人員三年奏獎一次成案懇將各員併案請獎並請此後每屆三年照章請獎一次以示鼓勵光緒十八年十一月十一日奉硃批著照所請欽此查鄂省地據上游綰轂南北附近湘豫等省遇有洋務均歸漢口領事兼管交涉事宜本極繁重自光緒二十年以來荊州沙市增設馬頭事變迭起漢口票匪煽亂潛匿租界各屬教案紛紜兼以湘省之衡州辰州河南之泌陽案情重大幾開衅端節經鄂省派員與漢口領事密商妥辦函電交馳成就妥帖近年鐵路開行商務日闢各國爭拓租界議添馬頭凡有辨論率皆言詞堅悍因應稍有失宜貽誤卽非淺鮮各該員等熟精條約研究事理斟酌緩急辦理悉協機宜實屬異常出力歷年既久人數較多謹遵

旨併案奏請獎敘擇其更事最久勞動卓著者援照江南成案分

別異常尋常勞績開具清單恭呈

御覽合無仰懇

天恩俯准照獎以示鼓勵出自逾格

鴻慈除將各該員履歷分咨外務部吏部兵部外理合恭摺具陳
伏祈

皇太后

皇上聖鑒再湖北巡撫係臣本任毋庸會銜合併陳明謹

奏

鄂岸鹽釐請飭部改撥片

光緒二十九年四月

再前准戶部咨開循案撥補釐金一摺單一分於光緒二十九年
二月十一日具奏奉

旨依議欽此清單內開撥補宜昌鹽釐一款計宜昌關洋稅銀六

萬兩又鄂岸鹽釐一款撥宜昌關洋稅銀三萬一千兩當經轉飭遵辦茲據湖北荆宜施道宜昌關監督余肇康詳稱查撥補宜昌鹽釐銀六萬兩經前道濮子潼解至光緒二十七年止其二十八年未解銀兩並從前積欠及本年奉撥此款查看關稅情形極爲短絀徵不敷解應俟稅收暢旺除先提解部滬各要款外再有徵獲自當照案撥解以濟要需至另撥鄂岸鹽釐三萬一千兩一款光緒二十七年以宜昌關稅收爲數本不甚多而應解應支之四國洋款內務府經費出使經費槍礮廠經費沙市關借撥經費並本關經費傾鎔折耗存票抵稅等款皆爲必不可少之需供支已甚竭蹶近復加撥鎊價不敷加增稅務司經費撥補宜昌鹽釐爲數甚鉅實屬無可騰挪應解撥補宜昌鹽釐積欠甚多並未解齊以本省之關稅撥補本省之鹽釐自顧且有不暇更何能認解撥

補江南鄂岸鹽釐之款前經

奏請

飭部改撥免致有誤要需光緒二十八年戶部仍以此款照前案指撥又經前道濮子潼以宜昌關所收土稅少徵銀二十餘萬兩應解京滬本省各款尙多不敷奉撥鄂岸鹽釐實屬無力籌解請仍照二十七年奏案另行改撥各在案茲復奉部循案指撥查宜昌關每年徵收貨稅爲數甚微專賴土藥稅爲大宗上年稅課短收甚鉅本年正二三月徵數寥寥前任撥解已羅掘一空現籌解三月俄法洋款六萬兩卽已挪墊及半察看稅收一時難有起色而撥款浩繁供支萬分爲難所有奉撥江南鄂岸鹽釐之宜昌關銀三萬一千兩委無的款可籌仍請援照二十七年成案奏明改撥以免貽誤等情具詳請

奏前來臣覆核無異惟有仰懇

天恩俯准飭部將撥補江南鄂岸鹽釐之宜昌關稅銀三萬一千兩另行改撥他省的款免致有誤要需理合附片具陳伏祈

聖鑒再湖北巡撫係臣本任毋庸會銜合併陳明謹

奏

續加二成土稅請免徵摺

光緒二十九年五月

奏爲宜昌關土稅短絀解款不敷擬請將續加二成免徵以輕商本而廣招徠恭摺具陳仰祈

聖鑒事竊據湖北荆宜施道宜昌關監督余肇康詳稱宜昌關徵收稅銀以上藥復進口稅爲大宗約占徵數十分之九舊章川土每百觔完復進口稅銀四十兩光緒二十五年奉准戶部咨將土藥稅加收三成當蒙

奏准仍留宜關湊解部撥各項並撥補鹽釐不敷之用嗣於二十七年又奉准戶部咨新案賠款數鉅期迫行令將土藥再加抽三成等因維時因恐稅增本重有礙商情稅收實數轉致減少電奏請將宜昌關土藥加收二成奉

旨允准轉行欽遵辦理在案詎自第二次加收二成以後土稅頓形短絀核計光緒二十八年共僅收銀四十餘萬兩比較二十七年徵銀八十餘萬兩幾至短收一倍卽此項加收二成之稅自二十七年十一月初一日起至二十八年八月二十九日第一百六十八結止計十箇月僅收銀四萬七千六百九十餘兩冬春兩季收數亦甚寥寥是明加之數甚微殊無裨於賠款暗減之數甚鉅轉有礙於要需推原其故由於各省土稅多未一律照加亦有僅加收二三成者惟鄂省先後共加五成輕重懸殊土商繞避他道

遂至歲收稅款短至三四十萬之多查該關每年應解英德俄法洋款內務府經費出使經費及本省槍礮廠經費撥補鹽釐等項均賴此項土稅應付迭經升任道員濮子潼及現任道員余肇康與該關稅務司再四籌商若令各省一律照加勢難辦到惟有將續加二成土稅暫予免徵俾商不稍輕聞風踵至不致仍前繞越明知續加之二成專以湊解關款苟非萬不得已何敢輕議減收惟日擊川土稅收日短一日再不亟圖挽救馴至無稅可收權衡利害與其因循貽誤解款終有無著之虞曷若設法招徠闢稅庶有轉圜之望等情詳請
奏懇減收前來臣覆查宜昌關徵收稅銀以土藥復進口爲大宗該關應解各項要款全恃此項土稅暢旺方敷應付今因兩次加抽五成而各省未能照加土商畏葸不前繞道趨避遂致稅收短

絀甚鉅若不設法維持應解要款將歸無著合無仰懇
天恩俯准將宜昌關續加之二成土稅暫予免收以輕商本而廣
招徠出自逾格

鴻慈除咨外務部戶部外理合恭摺具陳伏祈

皇太后

皇上聖鑒再湖北巡撫係臣本任毋庸會銜合併陳明謹

奏

部撥鹽釐請分別改撥摺

光緒二十九年五月

奏爲戶部撥補湖北宜昌鹽釐無著之款爲數甚鉅擬請分別改
撥及由湘逕解部庫以免虛懸恭摺具陳仰祈

聖鑒事竊准戶部咨具奏循案撥補釐金一摺單一分光緒二十
九年二月十一日具奏奉

旨依議欽此計單內開宜昌鹽釐由湖北收款內抵銀七十五萬兩撥湖北裁兵節餉銀十萬兩湖北丁漕錢價平餘銀三萬三千兩湖南丁漕折錢平餘銀三萬兩湖北鐵廠由商局繳還官本銀十萬兩湖南鹽觔加價銀二萬兩湖南漕項銀四萬兩宜昌關洋稅銀六萬兩湖北當稅銀一萬四千兩江漢關洋稅銀十萬兩湖北鹽釐銀六萬兩荆州滿營餉項減平銀四萬三千兩共銀六十六萬兩尙不敷十五萬兩准在湖北省田房契稅土藥加稅茶糖菸酒加稅各款內如數截留等因咨行到鄂當經分別轉飭核議詳辦去後茲據湖北布政使瞿廷韶署鹽法武昌道梁鼎芬督糧道譚啟宇漢黃德道江漢關監督岑春葵荆宜施道宜昌關監督余肇康暨善後牙釐兩局司道會詳稱遵查湖北省光緒二十四五兩年奉撥抵補宜昌鹽釐款多無著迭經詳請奏咨改撥嗣復等

定每年認抵銀七十五萬兩請撥補有著的款各在案迨二十六年奉撥各款無著仍多適值時事孔棘未便瀆陳上年又奉派新案賠款搜索多方更難兼及而鹽釐應支各餉刻不容緩不得已息借商款應付年復一年虧累伊於胡底茲查奉撥各款內如湖北鐵廠由商局繳還官本銀十萬兩此項官本早經遵照奏案陸續撥還華洋各緊要欠款卽續有繳銀亦應歸還槍礮織布兩局各要款迭經咨明戶部有案並無存項可撥其湖南丁漕折錢平餘鹽觔加價漕項共銀九萬兩歷年均未照解積欠甚鉅上年曾蒙奏請將此項撥補鹽釐由湘省逕解部庫作爲湖北鹽釐京餉部議未准而嚴催湘省趕解嗣僅據解到銀四萬四千兩尙欠銀二十三萬兩本省荊州滿營餉項減平銀四萬三千兩查滿餉減平每年於報銷後扣解司庫僅二千餘兩自二十三年七月奉

到新章起每年添扣二萬六七千兩亦祇二萬七八千兩計不敷銀一萬五千兩以上共銀二十萬五千兩實爲無著之款至裁兵節餉銀十萬兩從前係連舊案併湊現截至本年九月止已可裁竣自當照撥丁漕錢價平餘銀三萬三千兩每年尙有不敷嗣後擬在上年奏請規復丁漕減徵並加提平餘項下如數湊足當稅銀一萬四千兩原額每年約收四千餘兩歸入地丁項下充餉前曾奏經部駁謂係新增聽候撥用之款似指續收質當捐項應卽遵照分別提解江漢關以茶稅爲大宗近自奉文減徵短收甚鉅上年撥補之款係屬勉力搜羅宜昌關因去年土稅大減未能籌解業經奏明有案如本年稅收稍贏當卽儘先解濟至釐金一款本有應支餉項年來力加整頓收數較增尙可分撥田房契稅土藥加稅菸酒糖加稅亦當督飭局員核實經理俾濟要需以上款

雖有著而仍難全恃者共銀五十四萬五千兩應如何分別奏請改撥俾免貽誤詳請核辦等情前來臣覆查撥補宜昌鹽釐一項向係解付部撥鹽釐京餉滿營兵餉及各項餉需在在均關重要綜計撥補無著之款共銀二十萬零五千兩幾占三分之一其餘五十四萬五千兩仍屬緩急難恃值此時艱孔亟惟有督同司道各局就有著各款隨時設法挪湊勉爲其難至無著之款內有湖北鐵廠繳還官本銀十萬兩滿餉減平不敷銀一萬五千兩自光緒二十六年指撥以來歷歲虛懸無著已積至三十四萬兩若不懇請改撥勢必愈積愈多有誤解支各款其湘省歷年應解撥補銀九萬兩積欠甚多任催罔應雖經戶部專咨嚴催而籌解仍屬有限現共欠銀二十三萬餘兩本年撥補之款尙不在內上年本任督臣張之洞與臣奏請將湖南省撥補鹽釐令其徑解部庫

原因湖南則任意欠延湖北則萬分竭蹶萬一貽誤要款而湖北反代湖南受過殊非情理之平且以應解湖北之撥補鹽釐解作湖北之鹽釐京餉名實相符無虞牽混其尤便者由湘解部可省輾轉撥解之費而部臣易於稽核無著之款卽成有著部中旣免改撥之煩鄂省仍受撥補之益一舉而數善備不得不作再三之續相應請

旨飭部將本年撥補鹽釐中無著之鐵廠應還官本銀十萬兩滿餉減平不敷銀一萬五千兩另行改撥有著的款免致貽誤要需所有湖南應解湖北撥補鹽釐銀九萬兩請自本年起

飭部改令由湘徑解部庫交納作爲湖北應解鹽釐京餉鄂省卽於應解鹽釐京餉銀二十萬兩減解銀九萬兩抵還賠款至二十八年以前湘省積欠銀二十三萬餘兩並由部嚴催分年陸續解

還湖北至少須每年解銀八萬兩庶使各項要餉湊解無缺歷年
息借商款得以次第償還大局幸甚除咨戶部外理合恭摺具陳
伏祈

皇太后

皇上聖鑒訓示再湖北巡撫係臣本任毋庸會銜合併陳明謹

奏

淮軍協餉請減解摺

光緒二十九年五月

再前准戶部咨議覆直隸總督袁世凱奏協餉短解請分別改撥
飭催一摺查年來各省有著的款均已搜括一空實無可以改撥
應請
飭下該督撫嚴飭關道務將本年應協各餉如數解足毋稍短欠
等因具奏奉

旨依議欽此欽遵咨行到鄂查江漢關應協准軍月餉上年經戶部減爲每年解銀二十萬兩旋因茶稅減徵歲入之項照旺收年分約短七八十萬兩又經開單奏准戶部核覆該關茶稅驟短係屬實情自難仍令將各款如數撥解除攤派洋款及稅務司經費仍按原數報解外其餘均准審察緩急暫行減解等因去年冬間准直省電購鄂局槍彈令將價銀由江漢關協餉劃抵當飭該關竭力籌撥銀十萬兩解交湖北槍礮局驗收劃抵二十八年應協准餉尙欠槍彈價銀十一萬四千餘兩業經奏明俟本年稅課收有成數再行撥解槍礮局清款作爲本年協餉在案惟近來茶商虧折甚鉅湖北產茶各縣本年所開茶莊較上年少三分之一稅收勢必愈形短絀前項槍彈價銀十一萬餘兩現尙不知如何設法騰挪方敷此數何能再行撥解准餉且前此茶稅減徵曾經商

約大臣呂海寰盛宣懷奏明與稅務司設法於別項出口貨稅酌量加增藉以抵補而至今尙未籌有切實辦法該關應解要款極多所有淮餉一項惟有仍照上年戶部原議准其審察緩急暫行減解據湖北漢黃德道江漢關監督岑春煇具詳請奏前來除咨戶部外理合附片具陳伏祈

聖鑒再湖北巡撫係臣本任毋庸會銜合併陳明謹奏

謝 賞御筆畫扇等件摺 光緒二十九年五月奏爲叩謝

天恩恭摺仰祈

聖鑒事竊臣於光緒二十九年五月二十一日齋摺差弁回鄂奉到

慈禧端佑康頤昭豫莊誠壽恭欽獻崇熙皇太后

恩賞

御筆畫扇一柄大卷紗袍褂料兩卷普洱茶兩團當卽恭設香案

望

闕謝

恩叩頭祇領伏念臣忝綰疆符頻叨

異數愧無微效稍濟時艱茲復渥荷

殊施特膺

懋賞記

時巡於三輔曾邀寶扇之

頒冠名卉於羣芳再覩

天章之燦龍團待賜邁宋臣倬直之榮蟬翼章身勝唐代輕容之

製沐

恩光之

特賁益感戴以無涯臣惟有宣布

皇風奉揚

德意廉泉自挹冀蘇民力之煩疲向

日彌殷願廣

皇仁之衣被所有微臣感激榮幸下忱謹恭摺具

奏叩謝

天恩伏祈

皇太后

皇上聖鑒謹

奏

道員請送部引見片

光緒二十九年五月

再鄂省辦理洋務向以江漢關道爲樞紐承啟因應任重責專現任江漢關道岑春煇由湖北督糧道調補斯缺自光緒二十四年到任以來承辦各國交涉事務識周慮遠攸往咸宜庚子拳匪之亂漢口爲九省通衢五方雜處謠言四起一夕數驚加以富有票匪潛匿租界民心益爲惶擾岑春煇明習外情綏靖內訌處危疑震撼之交一切均持以定靜地方得以轉危爲安近時交涉日益繁難岑春煇熟籌審處舉重若輕措置悉臻周妥而端謹廉退任事誠懇尤爲僚屬所推服前經署理湖北臬司兼署藩司極爲本任督臣張之洞所倚重兼管槍礮廠接辦轉運局均能精研利病任怨任勞其才具風力洵足獨當一面該員前因大計卓異稟請給咨赴部引

見當以漢口新拓租界未便遽易生手經臣附片奏請暫緩赴部
奉

硃批著照所請吏部知道欽此此次遵

旨併案請獎洋務各員岑春煊係實缺道員宣力最多政聲卓著
仰懇

天恩俯准送部引

見應如何量加擢用之處出自逾格

鴻慈如蒙

俞允臣卽飭該員將經手事件妥速料理清楚給咨送部引

見謹附片具陳伏祈

聖鑒謹

奏

保薦使才片

光緒二十九年五月

再此次遵

旨併案請獎辦理洋務各員歷年既久臣詳加考察其中實有才猷卓著體用兼賅堪以備使才而儲大用者爲鹽運使銜候選道梁敦彥該員係同治年間頭班出洋學生在美國克弗大學堂肄業十年於格致測算商約公法等學博涉多通聲譽甚著自光緒十五年隨同本任督臣張之洞自廣東來鄂迄今十有餘年凡交涉糾紛棘手難辦之事一經該員籌議靡不迎刃而解如荊州沙市焚毀關局之案宜施兩府焚搶教堂之案情節重大均經梁敦彥妥速議結而挽回沙市租界增築隄岸之事尤爲裨益宏多竊以專對之才絕域之使自古所重當此智力競爭之世尤賴有熟習外情有爲有守之員出使各國始足以折衝樽俎和會敦槃該

員梁敦彥游學歐美兩洲最久諳其語言文字則情易通悉其風土人情則事易舉承辦交涉歷有年所明習條約辨論事理輕重緩急悉協機宜而耿直清介各國領事均所推服洵堪膺出使之選查該員業經張之洞奏保送部引

見恭閱電傳邸鈔光緒二十九年五月十七日奉

上諭本日引見之候選道梁敦彥著發往湖北以道員補用並交軍機處存記欽此仰見

聖主甄拔羣才授方任能之意臣到鄂三年迭經督同梁敦彥籌辦洋務深悉其操履器識克副使才謹就此次遵

旨請獎洋務人員之案據實保薦以備

朝廷采擇任使臣爲使才需人起見是否有當謹附片具陳伏祈聖鑒謹

奏

擴充鑄造銅元片

光緒二十九年五月

再湖北省前因錢少價昂商民交受其困經本任督臣張之洞奏明設局鼓鑄制錢以濟民用旋因銅鉛價值增高成本過重虧耗甚鉅復經奏准暫停鑄造近來銀價愈賤錢價愈昂市肆各錢店乘機多出錢票動輒虧折倒閉商民受害日深至官鑄之銀元本爲輔助制錢而設乃民間持向錢店易錢又每爲奸商所抑勒以致錢價日漲一日終不能平迭經張之洞與各前撫臣先後籌商在於省城設立官錢總局專派委員經理而以藩司善後局督率稽核備價向日本購製錢票銀元票精加刊印連板運寄回鄂加用藩司印信編立密號錢票以制錢一千文爲一張銀元票以銀元一大元爲一張通行鄂省內外使用准其完納丁漕釐稅及支

發一切官款商民取携甚便而又無錢店虧倒之虞頗稱通行無滯上年秋間又經欽遵

諭旨籌撥工本鑄造當十銅元一切規制及字樣質地均與廣東福建江蘇等省毫無二致惟於邊上改鑄湖北省造四字以示區別飭發官錢局與錢票銀元票相輔而行近來鐵路自漢口至河南信陽州確山縣一帶業已開車通行所有路工支用及商人赴信陽等處購貨者俱帶鄂省官票銅元前往而羊樓崗茶市開莊商人入山辦茶亦行用此項官票銅元均稱利便臣伏查錢價之過昂由於現錢之缺乏雖多鑄制錢應用苦於虧耗不貲雖嚴禁抬價居奇又慮商情不便當此時勢艱難民窮財匱之際自非廣爲設法變通不足以資周轉茲鄂省製造之錢票銀元票新鑄之當十銅元與原鑄之大小銀元業於鄂省及鄰近各處一律通行

洵足濟現錢所不足至當十銅元一項行用尤便現已由臣飭令添購機器擴充鑄造以維圜法而濟民用據湖北布政使瞿廷韶按察使李岷琛會同善後局司道具詳請
奏前來除咨戶工二部外理合附片具陳伏祈

聖鑒謹

奏

選派學生赴德片

光緒二十九年五月

再臣前選派湖北各學堂學生出洋游學業經

奏明在案茲復選得武高等學堂學生蕭安國丁文璽松俊等三人派令前赴德國游學時值該學堂洋教習何福滿請假回國卽令率同前往該學生等於普通學均經畢業並嫻習德國語言文字派往德國學習專門實爲事半功倍臣於臨行接見時諄諄勗

以中國力圖自強取法歐美不惜寬籌學費資令遠游務當激勵忠愛盡心講求以期仰副

朝廷培養人材振興實學之至意除咨外務部並咨行出使德國大臣隨時照料考察約束外所有選派學生赴德游學緣由謹附片具陳伏祈

聖鑒謹

奏

綠營兵丁分別裁汰片

光緒二十九年閏五月

再本年三月二十二日承准政務處咨議覆湖廣總督張之洞等會奏分年裁汰綠營兵丁員弁一摺於三月初四日具奏奉旨依議欽此欽遵咨行到鄂查原奏請自光緒二十九年將湖北湖南兩省綠營兵丁每年裁汰一成分爲十年裁盡其中曾經

挑選之練軍每年裁汰半成分爲二十年裁盡被裁之兵每名酌給恩餉一年以資改業既經奉

旨允准自應按成裁汰惟政務處咨文於本年三月間奉到層遞轉行距省較遠各營約計奉文日期須在五月左右所有本年春夏兩季各營餉項業已支給無從核扣若令於應給恩餉內照數扣除則被裁之兵所得無幾難以別謀生業更恐流蕩爲非應自光緒二十九年七月初一日起按原奏辦法將營兵分作十年截至光緒三十九年六月三十日止練兵分作二十年截至光緒四十九年六月三十日止一律裁盡應裁之餉飭由藩司糧道善後局先期按成扣存彙案詳請奏報除通飭遵辦並分咨政務處暨戶兵二部外所有湖北湖南兩省綠營兵丁分成裁汰緣由理合會同湖南巡撫臣趙爾巽湖北提督臣夏毓秀湖南提督臣婁雲

慶附片具陳伏祈

聖鑒再湖北巡撫係臣本任毋庸會銜合併陳明謹

奏

籌辦荊州駐防學堂摺

光緒二十九年閏五月

奏爲籌辦荊州駐防中小蒙養各學堂並撥定常年經費恭摺具
陳仰祈

聖鑒事竊臣等欽奉光緒二十七年八月初二日

上諭作育人才端在修明學術著各省所有書院於省城均改設
大學堂各府廳直隸州均設中學堂各州縣均設小學堂並多設
蒙養學堂切實通籌舉辦等因欽此查湖北設立文武及實業各
學堂業經臣端方會同本任督臣張之洞擬定規模奏奉

諭旨次第興辦在案惟荊州駐防應設學堂尙未籌定辦法竊維

荆州據長江上游駐防多勳舊後裔承平日久戶口繁滋近年人數多至四萬有奇生計既艱教育尤爲急務且京師宗室覺羅八旗官學前經奉

旨改設中小學堂荆州地據形勝輩出人才近年生齒較他省駐防又最繁盛非多設學堂不足以培根本而宏作育亟應遵

旨就原有書院改設興辦查該駐防舊有輔文書院一所八旗義塾十所各牛衆官學五十六所輔文書院成效素著得士最盛擬改爲中學堂其學生以生監俊秀中學已有門徑文理清通者充選年限十五歲以上至二十四歲止在學四年畢業義塾十所擬歸併爲小學堂四所其學生以秀良子弟能備誦經書一兩部文理粗通者充選年限十一歲以上至十四歲止在學四年畢業官學五十六所擬歸併爲蒙學八所其學生凡八旗童蒙年七歲者

皆入此學亦在學四年畢業此項學堂在外國謂之義務教育又謂之國民教育用意最深立法甚嚴凡幼童已屆學年不入學者罪其父母將來擬參用其意庶幾教育普興中小兩學堂暫時考選入學數年之後卽以蒙學畢業學生升入小學小學畢業學生升入中學以蘄普通學階級程途漸有端緒查外國官設學堂多注重普通教育以凡民之性中材爲多惟此可以徧及有是學以立基址上焉者固深造無難其次亦資生有具而且省城設有高等學堂中學畢業應就近咨送省垣以資造就惟是興辦學堂經費爲先凡諸建置首重衛生又必適於教授便於管理乃有功效可程原有書院規模多不適用增拓改併諸費經營迭經派員勘估約計需銀二萬餘兩常年經費尤關緊要每年非一萬數千兩不辦各學舊有經費統計不過三千餘兩所短甚鉅荆防丁多餉

繼就地無款可籌臣端方竭力籌維查有已裁缺之荊州正左右三衛守備向有屯糧平餘一項每年共錢一萬串內外屯糧現應改歸丁漕征收分坐十二州縣臣端方檄飭荆宜施道余肇康查明此項平餘約有錢一萬串分飭各該州縣撥充荊州駐防各學堂常年經費第一年所收之錢並書院等處原有經費均作建置學堂之用學堂改建既成卽撥爲常年經費臣瑞興前在護理將軍任內節經與臣端方往返函商臣綽哈布道出武昌復得面加商榷意見均極相同現經督飭將應改各學堂趕緊興工當此時艱款絀固不敢稍涉鋪張亦不敢過從簡略其規制課程均查照京師大學堂頒行

欽定章程及鄂省奏定章程參互舉辦以期教成駐防八旗驍武之通才仰副

朝廷百年樹人之至計除將籌撥荊州三衛屯坐各州縣平餘辦法另片奏明立案外所有遵

旨籌辦荊州駐防中小蒙養各學堂並撥定常年經費緣由謹合詞恭摺具陳伏祈

皇太后

皇上聖鑒再湖北巡撫係臣端方本任毋庸會銜合併聲明謹奏

屯糧撥充學堂經費片

光緒二十九年閏五月

再已裁缺之荊州三衛守備屯糧平餘撥充荊州駐防學堂常年經費經臣端方檄飭荆宜施道查明詳辦去後茲據荆宜施道余肇康詳據兼理荊州三衛衛官江陵縣知縣張集慶稟查荊州三衛屯田分坐江陵公安石首監利松滋枝江宜都及荊門直隸州

當陽鍾祥京山潛江等十二州縣共計額田六十四萬五千餘畝坐落江陵額田十二萬餘畝除歷年水淹沙壓荒廢蠲緩之田不計外現在成熟完糧之田四萬餘畝將來改歸丁漕按科則計算江陵平餘約計制錢二千串此外屯坐各州縣就江陵額田十二萬畝例之屯坐僅十分之二改歸丁漕即可得平餘二千串以十二州縣屯田約略計算分提平餘不難足萬串之數目下正值開辦清丈將來事竣某州縣熟田若干荒田若干卽有依據其分坐江陵之田丈畢如果熟田有多則平餘自可加增仍全供駐防學堂之用以期涓滴歸公等情查荊州駐防興辦學堂培植八旗材武英俊關根本之至計爲強幹之要圖籌撥經費尤爲先務此項平餘本非州縣所有撥充學堂經費最爲允當現值開丈軍戶不免觀望今年應飭儘力催徵餘款若干全數報明專款留備駐防

學堂之用明年改歸丁漕分坐十二州縣屯田各應得平餘若干令各該州縣據實開報按年照江陵縣一律提充學堂經費以昭畫一如開報不實一經發覺卽將該州縣嚴行參處清丈事竣熟田有盈平餘加增亦令悉數全充駐防學堂常年經費應自明年開征丁漕之日起由各該州縣分認解交藩司衙門轉解荊州將軍衙門彈收分發駐防各學堂備用各牧令遇有交替專案列入交代不得短少並由藩司嚴行稽核與近年各州縣所提丁漕平餘一同批解駐防學堂得此款經費有著裨益實非淺鮮等情詳請

奏咨立案前來除由臣端方檄飭藩司立案及分飭屯坐十二州縣一體認解並咨明戶部外謹合詞附片具陳伏祈

聖鑒謹

奏

胞弟考取特科謝

恩摺

光緒二十九年六月

奏爲叩謝

天恩恭摺仰祈

聖鑒事竊臣恭閱電鈔光緒二十九年六月初十日內閣奉

上諭此次考試經濟特科本日引見之禮部額外郎中端緒著俟留部後以郎中卽補等因欽此伏念特科之設迥異常名經濟之才專期實用臣胞弟端緒素無學殖濫廁剡章幸脫穎於百八十人之中得預名於廿有七人之列儀曹待次有愧郎潛引對承

恩遂踰資序沐

光榮之曲逮實感悚以難名臣渥被

隆施俯循故事在昔康熙鶴徵之選惟八旗未與旁求亦越乾隆

鴻博之科彼七士未蒙甄錄非獨家門之私幸實爲里黨之殊榮兄弟並舉於制科尙有慙夫曩哲京外各勤其職守冀稍答夫聖慈所有臣感激榮幸下忱謹恭摺叩謝

天恩伏乞

皇太后

皇上聖鑒謹

奏

民隄潰漫搶築情形摺

光緒二十九年六月

奏爲襄河盛漲潛江等縣民隄被水漫潰現經籌款搶築以工代賑恭摺具陳仰祈

聖鑒事竊湖北省地方襟江帶湖素稱澤國本年入夏以來大雨連番江漢之水同時並漲迭經臣電飭有隄各州縣多備物料認

眞防護詎五月初間襄河盛汛猝臨數日之內水漲至四五丈汹湧異常先後據潛江天門監利等縣稟報潛江縣屬之永豐垸隄天門縣屬之孫家灣隄監利縣屬之易家灣隄均因水勢過大漫過隄頂兼之風狂雨驟人力難施各被漫潰成口田地多遭淹沒房屋間有倒塌居民幸已先遷高阜人口尙無損傷等情臣查本年襄水之大爲十數年來所未有潛江等三縣民隄均因水漫過頂以致決口尙非該縣等防護不力體察情形其口門之寬被淹之廣尤以潛江縣爲最重且江陵監利沔陽漢川等州縣俱在該隄下游有高屋建瓴之勢亟應速籌堵築以爲數縣保障之資該隄雖係向由民辦惟甫被水災民情困苦責令就地籌修實恐力有未逮當與司道商酌在於兩湖賑糶米捐項下提撥錢一萬餘串津貼隄費以工代賑派委熟悉隄工之候補知府彭覺先前往

潛江督同該縣畢井田在潰口處所退修月隄一道廣集人夫併
工修築俾期及早斷流且使被水之民得以工作餬口至天門之
孫家灣隄監利之易家灣隄亦經勒令各該縣設法搶修茲據稟
報潛江監利兩縣潰隄均已堵築合口現仍培厚加高俾期穩固
經_臣覆查屬實此次三縣民隄先後漫潰災民蕩析離居深堪憫
念現經極力督催已將潛江監利潰隄修復其餘被淹之區並經
分飭地方官妥爲安撫民困稍舒無虞失所惟天門潰口雖不如
潛江之寬而水流甚急近來晝夜搶修亦已漸有把握仍當由_臣
嚴催趕築務使迅速完工以資保衛所有各處積水並令設法疏
消俾得乘時補種雜糧接濟民食除俟秋後督飭查勘輕重情形
分別應否賑恤蠲緩另行

奏報外所有襄河盛漲潛江等縣民隄先後漫潰籌款搶築情形

理合恭摺具陳伏祈

皇太后

皇上聖鑒再湖北巡撫係臣本任毋庸會銜合併陳明謹

奏

調撥武建營赴廣西摺光緒二十九年六月

奏爲遵

旨調撥湖北武建八營赴廣西助剿恭摺具陳仰祈

聖鑒事竊臣於本年閏五月二十九日欽奉電

諭旨岑春煊電奏調湖北武建八營助剿月餉由廣西支發等語著端方迅飭該營拔隊馳往歸岑春煊調遣欽此當經轉飭欽遵辦理查湖北武建八營經前本任督臣張之洞於光緒二十六年開招成軍所派營哨官均係北洋大臣袁世凱舊部得力將弁前

由山東電調來鄂八營勇丁均挑選年力青壯樸實勇健之人充當所有營規操法迭經張之洞加意講求頗稱嚴整臣接署督篆後復經隨時勤加訓練該軍原分左右兩旗現經派委管帶左旗第一營之選用知府劉承恩專充左旗四營督帶官管帶右旗第一營之選用直隸州知州鍾麟同專充右旗四營督帶官其兩營營官均另行遴員接帶以專責成適值溽暑該軍遠道長征其弁勇糧餉飭卽查照鄂省護軍左旗章程發給應領六月分餉項因行軍需用甚急先由湖北善後局代爲墊發並加給恩餉一箇月以示體恤臣於六月十三日親赴該營校閱左右兩旗勇丁諄諄告戒此次爲湖北新軍出省剿匪之始大局攸關勉以同仇敵愾之方勗以立功揚名之義各勇丁感奮振興均有勇往赴敵氣象所有軍裝槍彈均令配足帶往以資應用並商准北洋大臣袁世

凱飭派泰順飛鯨公平海輪三艘到鄂裝載該軍武建八營於六月二十八日先後拔隊展輪赴粵聽候署兩廣督臣岑春煊調遣助剿除分咨外理合恭摺具陳伏祈

皇太后

皇上聖鑒再湖北巡撫係臣本任毋庸會銜合併陳明謹

奏

進呈書籍摺光緒二十九年六月

奏爲遵

旨進呈書籍恭摺仰祈

聖鑒事竊臣於光緒二十九年閏五月二十一日承准外務部簡

電內開軍機大臣面奉

諭旨所有江寧江蘇江西浙江湖北廣東四川各省官書局刊刻

書籍著各該督撫擇要刷印進呈欽此欽遵電寄前來伏查湖北官書局設自同治初年歷年刊刻類多經史有用之書當卽札飭該局將所刻書籍擇要刷印兩分茲已裝訂成帙計書一百一十六部共二百零七函委員齋解赴京交納恭呈御覽除另繕清單並咨軍機處外務部外所有遵

旨進呈書籍緣由謹恭摺具陳伏乞

皇太后

皇上聖鑒謹

奏

謹將遵

旨進呈書籍繕具清單恭呈

御覽

計開

御纂周易折中

欽定書經傳說彙纂

欽定詩經傳說彙纂

欽定春秋傳說彙纂

欽定周官義疏

欽定儀禮義疏

欽定禮記義疏

欽定康熙字典

御批通鑑輯覽

欽定明鑑

欽定大清會典

御製人臣做心錄

御製勸善要言

滿漢文

御製勸善要言

大字本

御製勸善要言

袖珍本

庭訓格言

聖諭廣訓直解

聖諭廣訓

大字本

聖諭廣訓

小字本

御定歷象考成

御製大雲輪請雨經

十三經讀本

十一經音訓

御製大雲輪請雨經

三十一

誠齋易傳

宋楊萬里撰

儀禮鄭注

仿宋嚴州本

儀禮圖

張惠言撰

禮記鄭注

仿宋撫州本

春秋左傳杜注

單注本

爾雅義疏

郝懿行撰

說文解字

段玉裁注

說文義證

桂馥撰

說文通檢

黎永椿編

積古齋鍾鼎彝器款識

阮元編

史記

仿震澤王氏本

舊五代史

宋薛居正等撰

新五代史

宋歐陽修撰

明史

仿殿本重刊

資治通鑑

仿鄱陽胡氏本

明通鑑

夏燮撰

明通鑑目錄

夏燮撰

國語

仿宋明道本

國策

仿剡川姚氏本

十六國春秋

魏崔鴻撰

稽古錄

宋司馬光撰

大清律例彙輯便覽

通行本

皇朝祭器樂舞錄

嚴樹森撰

文廟祀位

通行本

光緒湖北輿地記

湖北輿圖局本

光緒湖北輿地圖

湖北輿圖局本

洗冤錄詳義

許棧注

實政錄

明呂坤撰

康濟錄

倪國連撰

荒政輯要

汪志伊纂

救荒補遺

宋董煟編

捕蝗要訣除蝻八要

錢忻和校

籌濟編

楊景仁撰

荆楚疏修

胡祖翮撰

丁漕指掌

通行本

名法指掌

徐灝編

近思錄

江永集注

小學輯注

張伯行注

讀書分年日程

元程端禮編

朱子年譜

王懋竑撰

趙子言行錄

陳廷鈞撰

日知錄

顧炎武撰

五種遺規

陳宏謀撰

手札撮要

陳宏謀撰

人壽金鑑

陳德齡撰

養蒙金鑑

林之望撰

童歌養正

通行本

童蒙必讀

李子潛撰

雙節堂庸訓

汪輝祖撰

湖北節義錄

黃昌輔撰

紀效新書

明戚繼光撰

讀史兵略

胡林翼撰

牧令輯要

徐棟編

佐治藥言

汪輝祖纂

學治臆說

汪輝祖纂

學治一得編

何耿繩纂

庸吏庸言

劉衡纂

讀律心得

劉衡纂

大清律例歌訣

潘爵編

洗冤錄歌訣

潘爵編

算學啟蒙述義

朱世傑撰

四禮翼

明呂坤撰

初等心理學

譯本

叢書三十三種

附唐語林

通行本

湖北叢書

趙尙輔編

百子全書

通行本

巢氏病源

隋巢元方撰

徐氏醫書八種

徐大椿撰

沈氏尊生

沈金鰲纂

溫熱經緯

王士雄纂

外科

王洪緒纂

男科

傅山撰

女科

傅山撰

拯嬰圖說

通行本

文選

唐李善注

太白集

仿繆日芑刻本

龍川文集

宋陳亮撰

張文忠全集

明張居正撰

瞿忠宣集

明瞿式耜撰

洪北江全集

洪亮吉撰

大雲山房文稿

惲敬撰

胡林翼遺集

胡林翼撰

樂府詩集

宋郭茂倩撰

唐四家詩

王應麟撰
孟宗魯撰
元然撰

文章軌範

宋謝枋得編

唐宋八大家類選

儲欣編

容齋千首詩

李天馥撰

讀雪山房唐詩鈔

管世銘編

八旗文經

盛昱 楊鍾堯同編

鶴歸來詞

武進瞿氏本

輜軒語

張之洞撰

勸學篇

張之洞撰

江楚會奏變法摺稿

劉坤一 張之洞稿

揀員請補道員摺

光緒二十九年八月

奏為揀員請補道員要缺以資治理恭摺仰祈

聖鑒事竊照湖北漢黃德道岑春蓂升任湖北按察使所遺員缺

係繁疲難三項要缺例應由外調補接准吏部知照在案查漢黃
德道一缺兼管江漢關監督及各國通商交涉事務駐劄漢口責
重事繁非明體達用熟悉洋務之員難期勝任臣督同藩臬兩司
於湖北實缺道員中逐加遴選如鹽法武昌道繼昌荆宜施道余
肇康安襄鄖荆道貴壽均歷俸未滿於例未符督糧道譚啟宇現
在辦理清丈屯田事宜端緒甚繁正資清理且於洋務交涉事宜
未有歷練未便更調一時實無堪以調補之員惟查有湖北補用
道梁敦彥現年四十五歲廣東順德縣人由監生遞保知縣光緒
二十四年湖北槍礮廠告成在事出力各員案內奏保免選本班
以直隸州知州儘先選用二十七年請獎勦捕長江富有票匪出
力各員案內奏保免選直隸州以知府儘先選用並加鹽運使銜
是年六月在順直賑捐案內報捐道員雙月選用二十九年二月

經本任湖廣總督臣張之洞在兩江總督署任內奏保送部引見五月十七日由吏部帶領引

見奉

旨梁敦彥著發往湖北以道員補用並交軍機處存記欽此本年五月經臣於請獎湖北辦理洋務各員案內附片奏保該員堪勝使才奉

旨梁敦彥著交軍機處外務部存記欽此查該員識練才長宅心端正係同治年間頭班出洋學生曾在美國克弗大學堂肄業十年深通泰西語言文字曉暢各國情事承辦湖北洋務十餘年交涉糾紛該員不激不隨措置悉臻妥洽以之請補斯缺洵堪勝任雖調缺請補於例稍有未符惟人地實在相需例得專摺奏請且查斯缺同治元年六月前督臣官文前撫臣嚴樹森會奏以候補

道鄭蘭請補十年正月前督臣李瀚章前撫臣郭柏蔭會奏以候補道李明墀請補先後均奉

特旨允准在案近來漢口鐵路通行交涉事務繁難十倍從前現值改訂商約展拓租界之際尤非明習外情深識大體之員不能因應咸宜該員事理詳明操守廉正久爲各國領事所推服經手辦結交涉艱鉅之案多起洞中肯綮裨助宏多與斯缺人地相宜一時實無有出梁敦彥之右者合無仰懇

天恩俯念員缺緊要准以梁敦彥補授漢黃德道兼管江漢關監督事務實與吏治商務均有裨益該員係

特旨補用道員請補道缺銜缺相當毋庸送部引

見所有揀員請補道員要缺緣由理合恭摺具

奏伏祈

皇太后

皇上聖鑒訓示再湖北巡撫係臣本任無庸會銜合併陳明謹
奏

奏派德國游學生監督片
光緒二十九年九月
再江鄂兩省前經遵

旨遴派學生出洋游學計游學德國學生江南派往八人湖北原
派七人續派三人江鄂兩省共派往德國游學生十八人查德國
勃興數十年間政藝等學日新月異較各國進步尤速各學生萬
里游學人數既多必須派委專員監督就學生性質之所近分別
門徑端正趨向督催功課始能嚴防流弊成就通材不致虛糜鉅
款近准出使德國大臣蔭昌電稱使館事繁游學生監督必須另
派專員臣等往復函商擬由江鄂兩省合籌經費共派監督一員

前往考察鈴束隨時稟承出使大臣妥慎經理查有奏調湖北差委戶部候補員外郎閻海明植品端嚴宅心純正歷在西洋充當出使大臣隨員有年兼通泰西語言文字堪以派往應支薪水擬照奏定二等參贊章程每月支給銀四百兩以資辦公其因公雜用電費應准其核實開報作正開銷該員三年期滿辦有成效懇恩准照獎勵出使大臣隨員章程一律給予保獎以資鼓勵除咨明外務部大學堂外謹合詞附片具陳伏祈

聖鑒謹

奏

民隄潰漫籌辦情形片

光緒二十九年九月

再本年五月間因大雨連番襄河盛漲潛江縣永豐垸天門縣孫家灣監利縣易家灣各民隄先後被水漫潰經臣嚴飭分別搶修

並酌撥公款以工代賑旋據稟報已將潛江監利兩縣潰隄堵築合口業將辦理情形專摺奏陳奉

硃批著卽分別撫卹毋任失所欽此當卽轉飭欽遵辦理詎七月二十七八九等日襄河秋汛漲至數丈有餘兼因江水甚大抵塞下游水無消路倍覺汹涌異常潛江縣新修之月隄經委員候補知府彭覺先潛江縣知縣畢井田極力搶護幸保無虞監利縣梁子垵民隄因水漫過頂潰決成口又天門縣孫家灣新工將合口復被沖刷殆盡幸居民先俱遷居高阜尙無損傷人口情事據監利天門等縣先後稟報前來查天門縣孫家灣潰口水流甚急施工較難前經該署縣楊悅督民搶修功甫及半旋復被水沖刷民情困苦若再責令自行籌修實屬力有未逮經臣飭司酌撥公款錢一萬八千串津貼隄費責成該署縣楊悅在潰口處所搶修

立見每乃一考和 年三
月隄廣集人夫併工修築其監利縣梁子垸潰隄亦經勒令該縣
劉延坦設法搶修俾資保障至被水災民業已飭令分別妥爲撫
恤此外未經被淹各州縣秋收尙稔米價甚平該災民等或捕魚
爲業或小貿營生餬口有資尙不致流離失所堪以上慰
慈廑所有監利等縣民隄續被秋汎漫潰分別籌辦情形謹附片
具陳伏祈

聖鑒再湖北巡撫係臣本任毋庸會銜合併陳明謹

奏

保薦將才片

光緒二十九年十月

再查光緒二十六年閏八月初三日奉

上諭整軍經武端賴將才著各該督撫務選真才有堪勝專閫之
任者卽行保奏用資采擇等因欽此茲查有記名提督現署湖廣

督標中軍副將吳元愷起家淮軍剿辦髮逆先後克復浙江平湖乍浦海鹽嘉興湖州各府縣城奮勇先登身受重傷淮軍剿平東捻西捻該員均在行間卓著戰功遞保副將迭經調赴山西廣東湖北等省差遣嗣復派赴甘肅隨升任陝西巡撫臣魏光燾攻克蘇家堡哆巴堅巢蒙

恩賞給果勇巴圖魯名號二十四年宜昌施南等處會匪鬧教作亂該員督勇攻克賊巢盪平匪亂二十六年剿捕長江富有票匪擒斬匪首游保提督二十七年經本任督臣張之洞保薦將才以該員心地樸誠長於拊循諳習外洋軍火西法營陣堪勝提鎮之任奏保在案臣查該員吳元愷係已故廣東水師提督吳長慶之舊部吳長慶講求洋操該員從之最久練習有素近年剿辦宜施會匪匪巢在長樂萬山之中地極險峻該員出奇制勝身先士卒

攻克堅碉掃平賊壘至今宜施等處士民猶亟稱之其於礮學新操極意研求均悉奧窔曉暢戎機有膽有識洵堪勝專閫之任相應據實保薦以備

采擇所有遵

旨保薦將才緣由理合附片具陳伏祈

聖鑒謹

奏

已故提督戰功卓著摺

光緒二十九年十月

奏爲已故提督戰功卓著懇

恩優恤以勵戎行恭摺仰祈

聖鑒事竊照記名提督龍恩思湖南湘鄉縣人咸豐年間投効湘軍隨同前浙江布政使蔣益澧剿辦髮匪克復杭州府湖州府武

康縣各城攻堅陷陣奮勇先登爲軍鋒之冠同治五年隨已故大學士左宗棠大軍入粵克復嘉應州城擒斬悍賊多名嗣復隨軍入陝入甘七年克復綏德州城十年攻克金積堡堅巢身受刃傷十餘處搗穴擒渠厥功最著由把總遞保副將

賞給豁勇巴圖魯勇號光緒二年肅清關隴四年盪平新疆南北兩城各城奏保總兵二十年回籍適值湘鄉勞田土匪滋事督率本籍團練平靖匪亂蒙

恩賞給正一品

封典二十一年隨同臣光燾剿辦甘肅回匪統領武威前軍攻克蘇家堡哆巴逆巢生擒逆首韓文秀馬秀山誅之奏保提督賞換法豐阿巴圖魯勇號統領陝西撫標永勝馬步各營紀律嚴整督辦蒼龍河龍洞渠兩處河工秦民頗資利賴二十三年奏署

陝西漢中鎮總兵該提督樸重精勤識斷驍果懷忠敢戰稱於一時當剿辦回甘時哆巴爲悍黨精銳所聚屢攻未下該提督用間出奇復以銳師擊其要害多所斬馘臣光燾移師搜討用收蕩平之功資該提督力爲多其任漢中鎮也當庚子拳匪之變川陝愚民構煽邪說漢中地處其衝勢尤岌岌且各處教堂林立危疑之際旦夕可以生事維時臣端方在護理陝西巡撫任內羽檄分馳與該提督力守宗旨堅明約束卒能內懾奸宄外靖浮言使陝安一帶桴鼓不鳴閭閻安堵至今軍民稱道該提督之功不衰其宅心正大馭軍謹嚴實爲宿將中傑出之選上年以傷病復發交卸署任回籍就醫本年經臣光燾電調赴寧行次武昌遽於本年八月十六日病故時局多艱將才難得深堪憫惜合無仰懇天恩俯准將該提督龍恩思照提督軍營立功後病故例從優議

恤並准於浙江蔣益澧專祠甘肅左宗棠專祠附祀以勵戎行出自逾格

鴻慈除咨部外謹合詞恭摺具陳伏祈

皇太后

皇上聖鑒謹

奏

選生赴比學習實業摺

光緒二十九年十一月

奏爲選派學生前赴比國學習實業恭摺具

奏仰祈

聖鑒事竊臣於本年迭次選派湖北各學堂學生前赴德美俄法各國游學均經先後

奏明在案查近日泰西各國講求實用教育以爲富強之基其實

業學校如工業商業農林路礦無不精研實驗各有專門比利時國在歐洲西部其教育工業技術製造礦業各有專修學校他如商業則有高等專門學校農業則有高等農會礦業及其餘工業又有實業公所故其工藝則機械最精礦產則煤鐵最富其鐵路通法國巴黎長六千餘里路礦之學尤爲他國所推許中國地大物博實甲環球惟於工藝素少講求器械未能自製開礦修路等事無不雇用洋匠以致事權旁假大利難興近年

朝廷作育人才振興實學歷年欽奉

諭旨諄諄以講求實用爲主比國實業較精學費較省誠能多派學生前往肄習他日學成而歸上足以備任用下足以裕資生實於大局無不裨益臣謹就湖北各學堂學生選得楊蔭藻吳國良汪鍾嶽羅葆寅胡秉柯魏宸組賀子才史青黃大偉祿崇姚業經

楊循祖鄧鳳池劉庠雲許熊章喻毓西程光鑫劉蔭莠李光駟王治輝胡瑞年李以祐陳寬沆李彪等二十四人派赴比國學習實業卽令派充德國留學生監督戶部員外郎閻海明兼充比國游學生監督帶同前往該學生等年力正富通曉方言臣於臨行時舉前大學士曾國藩所云以剛大作忠義之氣以精思竊製造之術二語相敦勉務使盡心研究克底於成以仰副

朝廷造就人才力圖富強之至意至川資學費所需甚鉅然時局艱危需才孔亟不得不勉爲其難當由臣督飭司道各局極力設籌以備應付其餘一切事宜悉遵照外務部議定章程辦理除咨外務部大學堂並咨行出使比國大臣隨時照料考察約束外所有選派學生前赴比國學習實業緣由謹恭摺具

奏伏祈

皇太后

皇上聖鑒再湖北巡撫係臣本任毋庸會銜合併陳明謹

奏

請補道員摺

光緒二十九年十一月

奏爲道員缺分緊要揀調乏員懇

恩仍准以原請之員補授以重交涉而裨地方恭摺仰祈

聖鑒事竊照湖北漢黃德道員缺經臣奏請以湖北補用道梁敦

彥擬補光緒二十九年九月十六日奉

硃批吏部議奏欽此茲准部咨查湖北漢黃德道缺出應於本省

現任人員內揀選調補不得以候補人員請補今請以湖北補用

道梁敦彥補授之處核與定例不符應毋庸議其漢黃德道一缺

應令查照定例辦理等因奏奉

諭旨咨行到鄂自應遵照辦理惟查此缺前經臣督同藩臬兩司於實缺道員中逐加遴選如鹽法武昌道繼昌荆宜施道余肇康安襄鄖荆道貴壽皆歷俸未滿於例不符督糧道譚啟宇正在辦理屯田清丈事務甚繁且於洋務交涉未經歷練未便擬補現任道員中實無堪以調補之員惟查有湖北補用道梁敦彥識練才長宅心端正熟諳泰西語言文字辦理湖北洋務十餘年處置精審裨益宏多前摺業經聲明與斯缺人地相宜無有出梁敦彥之右者案查光緒二十八年正月十七日欽奉

上諭爲政之要首在得人著該督撫等接見僚屬覘其才識查其品行量加委任不必盡拘資格等因欽此仰見

聖主軫念時艱破格用人之至意今漢黃德道一缺兼管江漢關監督爲洋務交涉總匯之區駐紮漢口又係各國通商萃集之所

任重事繁不得其人往往因應失宜動多貽誤是以每屆缺出不
敢不慎加選擇溯查同治元年十年迭經前督撫會奏以候補道
鄭蘭李明墀請補斯缺先後均奉

特旨照准具有成案可稽近來鐵路通行租界展拓交涉繁難十
倍於前且值改訂商約之際財政商務關係尤重該員梁敦彥游
學西洋多年曉暢外情深識大體操行耿介素爲各國領事所推
服鄂省情形尤稱熟悉以之請補斯缺洵堪勝任雖調缺請補於
例似稍有未符然遠稽成案近秉

宸謨既人地實在相需卽未敢盡拘資格致負

朝廷爲政在人之意合無仰懇

特恩

俯准以梁敦彥補授漢黃德道兼管江漢關監督事務以重交涉

而裨地方出自

逾格鴻慈如蒙

俞允該員係

特旨補用道銜缺相當無庸部引

見所有道員缺分緊要揀調乏員懇

恩仍准以原請之員補授緣由理合恭摺覆陳伏祈

皇太后

皇上聖鑒訓示再湖北巡撫係臣本任毋庸會銜合併陳明謹

奏

仍請改撥邊防經費摺

光緒二十九年十一月

奏爲湖北糧道庫南糧項下二十八年以後奉撥邊防經費銀兩
無款可籌仍請另行改撥以免貽誤恭摺具陳仰祈

聖鑒事竊准戶部電開現在奉

旨練兵需款甚急應解京餉固本餉邊防經費籌備餉需及各項解部雜款限一月內掃數解部以濟急需等因當經分飭遵照迅速籌解去後茲據湖北督糧道譚啟于詳稱查原撥邊防經費銀四萬兩前因南糧項下節存有款是以歷年如數籌解並無延欠迨至光緒二十七年南糧並無存款勉就南項驢脚水脚及漕雜各款內通融湊解並二十八年以後原撥之四萬兩無可復挪萬難籌解緣由三次詳請

奏請另行改撥均未奉部議准惟查南糧存款早已羅掘一空新收之項入不敷出本年南糧秋撥冊實存銀三萬七千一百二十九兩七錢七分四釐驢脚冊實存銀一千一百五十四兩三錢水脚冊實存銀二萬六千八百三十三兩四錢六分六釐共存銀六

萬五千一百一十七兩五錢四分以此流供滿綠各營冬季米折及裁兵恩米共銀五萬五千餘兩新案賠款指撥加解邊防經費銀八千兩已屬竭澤而漁即使各屬南項新賦解到轉瞬滿營春季米折又需解銀五萬數千兩尙恐難資周轉此外實無騰挪應付之法現既奉

旨練兵需款甚急惟有於無可設法之中勉在庫儲專支各款內暫行挪動銀二萬兩作爲二十八年邊防經費飭委管解赴部交納以應急需其二十八年尙欠銀二萬兩及二十九年原撥銀四萬兩委實無款籌解惟有據實陳明仍請一併

奏咨另行改撥免誤要需等情前來臣覆加查核均係實在情形合無仰懇

天恩俯准將光緒二十八年所撥南糧米折項下東北邊防經費

銀二萬兩二十九年原撥銀四萬兩一併改撥俾免貽誤除咨部外理合恭摺具陳伏乞

皇太后

皇上聖鑒再湖北巡撫係臣本任毋庸會銜合併陳明謹

奏

選派八營備調並江防情形摺

光緒二十九年十二月

奏爲選派鄂省護軍左旗等八營候

旨調遣並籌辦江防情形恭摺密陳仰祈

聖鑒事竊照東三省一帶自俄人強肆侵占日本注意用兵不免與之開釁中國雖難籌應付之策而干戈旣動自不能不慎守邊防多備營練以期上衛

畿甸前經臣電奏請於鄂軍預備精練兵勇八營聽候

諭旨調遣旋奉覆電令卽妥密備齊選派得力統帶俟電調時開
拔北上等因伏查鄂省營伍自上年本任督臣張之洞會同臣奏
明酌擬照日本陸軍師團兵制分撥改練以來其中多係精銳之
卒而護軍左旗四營與武防軍四營同爲勁旅護軍左旗督帶儘
先參將王得勝平日訓練士卒極爲認真武防營統帶記名提督
吳元愷曾隨前陝甘總督臣左宗棠在關外轉戰多年曉暢戎機
忠勇可恃此次防務吃緊非平時教練之兵不足以資戰守尤非
曾臨大敵之將不足以任指麾是以鄂中選調之營皆就精兵挑
選而統帶之員必取身親戰陣閱歷較深者以當其任現已派定
護軍左旗四營武防軍四營預備北上卽派吳元愷爲統領而以
王得勝副之該員等各統所部之軍教令皆其素習吳元愷又曾
有功塞外以之調度一切必能審量機宜和輯將士俾收指臂之

用業經密飭該員等妥速備齊候

旨調遣至鄂省防務則以武漢處天下之衝水陸通衢舟車沓至游勇會匪蹤跡無常從前兵力本形單弱值此有事之秋更覺不敷調遣况武建八營既已調往廣西今又選派八營入衛非另練新軍填紮不可現在一面密飭各地方官嚴清內匪力保洋人資產教堂俾不至別生枝節一面設法籌款陸續補招新軍教練成營以資填紮遇事示以鎮靜不敢稍涉張皇以期上紓宸厯所有選派鄂省護軍左旗及武防軍等八營備調暨籌辦江防情形謹繕摺密陳伏祈

皇太后

皇上聖鑒訓示謹

奏

統辦膏捐充槍彈廠經費摺 光緒二十九年十二月

奏爲鄂湘兩省合籌添建槍彈等廠統辦土膏稅捐以充經費而增軍實恭摺會陳仰祈

聖鑒事竊惟強國之要在有兵強兵之要在有械械以最精最新爲主義以自製多製爲急務製成之械槍式子彈各軍所用必須整齊畫一始足備緩急製造之廠必須在堂奧之地就煤鐵之便始可稱完善現准練兵處咨光緒二十九年十一月初六日具奏擬訂練兵處辦事簡要章程一摺本日奉

旨依議欽此查章程內開各省練兵籌餉造械尤賴地方官協力襄助竭力維持各省原設製造軍械各廠局本係專供軍實爲各軍命脈所關應督飭妥辦隨時考查整頓又准商部咨本年十一月十三日准軍機處片交本日御史徐培奏機器製造軍械招商

設局一摺奉

旨外務部商部知道欽此粘鈔原奏行令將官設機器局歷年辦法詳細查明咨報各等因前來臣等查製造軍械誠如練兵處所議爲各軍命脈攸關中國自製槍礮惟上海製造局湖北槍礮廠兩處辦有成效滬局當開辦之始前大學士李鴻章已有應建內地之議本年本任湖廣督臣張之洞在兩江署任內復有籌議分廠之奏湖北槍礮廠設在漢陽府城外槍礮鋼藥四大廠延袤二三十里規模較備槍廠係製造小口新式近年各省紛紛多向鄂省訂購實屬應接不暇且濱臨江漢地當衝要臨事尙須增添護廠兵勇若在堂奧深密之地兼擅水陸運轉之利復有大江重湖之隔礦產豐盈煤鐵近便則未有如在湘省地方添建一廠之爲美備者矣惟是兩省經費同一支絀無款可籌臣等往返籌商

斷非通力合作不可查鄂省於光緒十九年創設槍礮廠曾籌收藥土稅款充常年經費上年因新案賠款復就土預征膏捐均經奏明在案自土膏併征以來商販一律照章完納毫無異議第不免繞越湘省致抽收未能十分暢旺正思設法挽回因念湘省若一律開辦膏捐則商販無從繞越約計每年所入之款除提還鄂湘兩省釐金正稅及鄂省新案賠款籌備之數外餘款撥充添造新廠之用即可不事另籌實爲一舉兩得現飭司道籌議將膏捐一項由兩省委員合辦凡原運湖南行銷及由湖北過境運往湖南行銷土藥一律均照鄂省章程征收膏捐此項膏捐本係取之吸食之家已有成法可循決不至稍滋擾累所有征存土膏稅捐之款分別撥足鄂湘兩省按年應征應解之數其餘悉數儲爲新廠常年經費查陸軍以槍礮爲先現擬在湘省擇地先行開造槍

械及藥彈等廠一俟收有成數卽行擇定地址購運機器分別奏
明辦理再中國與外國情形不同槍礮利器自應由官逐漸擴充
製造招商設局流弊滋多實未可冒昧舉辦合併陳明所有鄂湘
兩省合籌添建槍彈等廠統辦土膏稅捐以充經費緣由謹合詞
恭摺具陳伏祈

皇太后

皇上聖鑒訓示謹

奏

槍礮局廠情形片

光緒三十年正月

再湖北槍礮局在漢陽所設之槍礮鋼藥四大廠製造日多用費
日增原撥常年經費不敷甚鉅各省需用鄂廠槍礮前經本任督
臣張之洞奏准比照外洋價值減二成收價藉資周轉近來各省

紛紛向鄂廠訂購小口徑快槍及藥彈等件迭經臣飭該廠開足
機力加工趕造所造快槍從前每日只出十餘枝近則由十餘枝
加至三十枝又由三十枝遞加至五十枝槍彈由數千顆遞加至
一萬二千顆所造快礮從前每年只出六十餘尊近亦遞加至九
十餘尊開花彈由五萬餘顆加至六萬餘顆又增購槍彈機器及
添造鋼藥兩廠儲水樓壓鋼拉鋼等廠訂購烘鋼爐抽水機等件
總期不惜工費日求進步誠以製造一項不獨新理日闢月異歲
殊卽就舊有之法勤加攷求亦自能日底於精就良去窳其大要
不外資本充足考核周詳資本足則添改機器無牽掣之虞考核
詳則配備工料有爭新之望鄂廠經營累歲雖經在事各員殫精
擘畫著有微效而仍不敢自信能與外洋爭衡者實由經費短絀
不敷展布又因各省訂購較多欲藉此項價值撥補經費不得不

加工趕製以相應付致考究之功稍少進步亦因以稍緩現在時事孔亟部臣撥款維艱惟有暫就現有之常年經費及各省兌付之減成價值騰挪應急勉強支持一面督飭局廠員工將快槍快礮等件隨時考究精益求精務令所造槍礮藥彈精堅快利速率取準與外洋所造無異俟有實在成效屆時再懇

天恩准將在局尤爲出力人員擇尤奏保數員以示鼓勵謹附片具陳伏祈

聖鑒謹

奏

學堂籌建完備摺

光緒三十年二月

奏爲湖北省設立文武實業各學堂現已次第籌建完備一律開學恭摺具陳仰祈

聖鑒事竊照光緒二十八年十月間本任湖廣督臣張之洞曾會同臣將湖北省設立文武實業各學堂籌辦事宜分別學等學門學規學期學額學師學地學費等條詳晰奏明分投興辦在案臣兼署督篆以來卽專以興辦學堂攷求推廣爲事計自二十八年十一月起三十年正月止凡前摺所舉之師範學五路高等小學文普通中學武普通中學文高等學武高等學防營將弁學方言學農學並勤成學堂仕學院等處均已次第修改學舍招考學生一律開學惟工藝學堂初建伊始尙未完工是以未能開辦此外由臣酌量添設者如幼稚園則聘請日本女師爲保姆以教五歲至九歲之幼童初等小學堂則就省城城關內外分設六十所以教十歲以上之幼童道府師範學堂則由武昌鹽法道武昌府分設以教所屬生員又因各府師範學堂一

時未能設齊亦兼收外府生員以備各地方中小學堂教習管理之用荊州襄陽各有道師範學堂一區漢陽有府師範學堂並設模範小學堂於漢陽夏口兩處以備外府州縣取法之資南省中學堂則因湘省來學之士無所歸宿專設以教湘人子弟又創立圖書館一所專度古今中外有用書籍圖畫之屬以備學者瀏覽均經陸續增設先後開辦其學堂工程惟文武高等學堂早經修築武普通中學堂農務學堂工藝學堂幼稚園四處皆係度地剏建其餘有就原有之學堂書院考棚稍加修改者亦有就地地方祠堂公所廟宇量地增設者修建之區規制必求合法增設之處布置唯取足容其學堂經費則除原籌所有常年的款及在籍提督劉維楨報効一款外不敷甚鉅前摺所舉各學堂常年經費本不能皆有的款可指開辦之始若齋舍工程講堂書器學生冠服百

度更新同時並舉財力尤有不贍現就鹽斤要政加價及銅幣局盈餘兩款項下撥用猶慮不敷其增設之區惟幼稚園經費取之公家如初等小學堂則由臣倡率司道捐款分設道府師範學堂由各該道府捐設南省中學堂由湘省官商籌設未敢輒動公款可省者不敢濫支分毫應用者亦不敢過事苟簡至學堂所聘之監督教習管理各員皆求宗旨正大學問優長者充之從前鄂中遊學卒業各生亦量其造詣深淺派充教員以資鼓舞大抵興辦學堂不外以上數端現已各有頭緒粗具規模其間隨同臣經理始終其事者以武昌府知府梁鼎芬之力爲多該員學識閎遠任事實心曩在鄂中書院主講有年此次興辦學務尤視爲切要之圖遇事考求不辭勞瘁故能於一年之中畢舉諸務臣既資其臂助士子亦均感服近日中外教育家往往因過鄂看視學堂半皆

許爲完備比較別省所立未有逾於此者此湖北省籌建學堂次第開學之實在情形也伏念中國積弱已非一日惟賴盡人知學始能養成智力與外洋競存取勝近年屢奉

諭旨均以興學育才爲急

臣仰體

聖懷俯察時變所爲日夜孜孜惟恐不及鄂省風氣開通在先各學堂亦粗有基址一切興辦較易爲力惟款項太絀尙未能事事應手而熟審緩急之宜深權得失之數斷不敢因惜小費致誤成材倘能由此擴充數年之間必可辦有成效以期仰副

聖主乘時作育之至意所有鄂省各學堂一律開學緣由謹恭摺具陳伏祈

皇太后

皇上聖鑒謹

奏

籌辦礦務情形摺

光緒三十年二月

奏爲湖北省遵

旨籌辦礦務現經派委大員督率經理并酌撥官本先購礦山各情形恭摺仰祈

聖鑒事竊照光緒二十九年八月初七日欽奉

上諭商部奏擬於各省設立路礦農務工藝各項公司請飭各將軍督撫會同籌辦等語現在振興商務全在官商聯絡一氣以信相孚內外合力維持廣爲董勸以期日有起色著各省將軍督撫於商部議設各項公司會同籌畫悉心經理等因欽此咨行到鄂伏念振興礦務爲泰西富國之成規而實今日理財之要政中國礦產素富礦質亦精外人豔稱已非一日徒以未興礦學並無礦

師初則辦礦無人任其山谷閉藏不免貨棄於地繼則開礦無術漸致豪強壟斷又不免利屬於人卽以湖北一省而論往往有借游歷爲名徧詣各處隱相查訪者設使中國不早自爲計其佳礦所在必漸爲他人佔盡加以地方奸民勾串圖騙影射訟累種種弊生欲求設法保全莫若先勘礦山購歸公家蓋一時卽無款興辦猶可存爲後圖失今不爲必至利權盡失是以購地一事又爲今日開辦礦務第一要著先事經營勢不容緩鄂省礦山惟大冶一縣早經由官圈購其餘各州縣產礦之區尙屬不少應卽查照大冶辦法先行派員查勘備價購回然後次第籌款自爲開辦現與司道熟商酌籌官本先就省城設立礦務總局派湖北按察使岑春煇綜理其事該員於鄂省情形至爲熟悉於交涉事件亦復因應得宜以之督辦勘地購山一切事宜必能勝任至礦質之精

粗礦苗之衰旺現在不能不延聘礦師妥爲勘辦鄂省已一面遴派學生赴泰西專學礦學三四年後如其成就即可不必假手外人此又因圈購礦山不得不兼講礦學以求實力興辦之情形也除咨商戶二部外所有遵

旨籌辦礦務先行酌撥官本圈購礦山各緣由謹恭摺具陳伏祈

皇太后

皇上聖鑒謹

奏

請獎菸酒糖捐局員片

光緒三十年二月

再湖北省前因宜昌鹽釐抵還洋款撥補之項半多無著奏請加抽菸酒糖各稅以資湊補當經戶部議覆准其截留撥補鄂省宜昌鹽釐於光緒二十六年二月二十二日具奏奉

旨依議欽此欽遵咨行遵照在案查菸酒兩項鄂省出產落地均屬無多蔗糖出產亦稀以外省運來者爲大宗當卽在於繁盛扼要處所分設專局委員抽收而以湖北儘先補用道朱滋澤總理其事當夫開辦之初奸販把持刁商串阻謠謗繁興動形棘手該員朱滋澤督同各局委員辨明洋貨土貨之分權量平允嚴絕留難核實稽徵商販漸覺相安收數日有起色近年以來鄂省增兵製械籌撥京協各餉償還新舊洋債及賠款等項出款日增庫儲奇絀實賴此項菸酒糖稅及釐金增收之款隨時挹注得以無誤要需裨益大局良非淺鮮查光緒二十八年釐金增收四十萬串經臣請將總辦牙釐局之候補道趙瀆彥保獎二品頂戴奉硃批著照所請該部知道欽此今加抽菸酒糖等稅事屬創辦較之釐金因舊增收者倍覺艱難且自光緒二十六年開辦起至二

十九年止綜計所收稅項亦較釐金增收四十萬串之數有盈無絀該員朱滋澤苦心籌畫殫力經營未便沒其勞勩合無仰懇天恩俯准將三品銜湖北儘先補用道朱滋澤

賞加二品頂戴以昭激勸出自逾格

鴻慈除咨部外理合附片具陳伏祈

聖鑒再湖北巡撫係臣本任毋庸會銜合併陳明謹

奏

請獎學堂監督片

光緒三十年二月

再振興學堂必先扶植師範查有內閣中書銜前直隸霸州訓導紀鉅維學問深純究心教育在湖北主講書院多年課士有效經前任學臣蔣式芬奏請

賞加內閣中書銜奉

旨允准在案嗣因書院改爲學堂臣與本任督臣張之洞復延聘爲兩湖文高等學堂監督訓課精勤成材日衆上年開辦文普通中學堂復聘兼充該學堂監督一切教課管理章程皆其手定條理縝密多士服從尤足爲各學堂所取法察其操履端嚴宗旨純正實今日師範中不多見之才合無仰懇

天恩俯准將內閣中書銜前直隸霸州訓導紀鉅維以內閣中書用俾資激勸出自逾格

鴻慈謹附片具陳伏祈

聖鑒再湖北巡撫係臣本任毋庸會銜合併陳明謹
奏

續選學生學習實業摺

光緒三十年二月

奏爲鄂省續選學生派赴德美法比各國學習實業恭摺仰祈

聖鑒事竊 臣遵

旨選派湖北各學堂學生前往德美俄法比各國游學均經先後奏明在案查泰西各國實業學校講求實用致爲精深亟應陸續選派學生前往廣圖造就以期早派一日早收一日得人之效茲復選得武高等學堂學生恩康王相楚舉人劉家佺曹實恕錢祖元將弁學堂學生占魁武普通中學堂學生陳康時周大椿張九維方言學堂學生金海等十名前往德國游學又選得方言學堂學生雷以綸南路高等小學堂學生郭泰祺等二名前往美國游學又選得文普通中學堂學生舉人湯薌銘張書年李鍾蔚耿澤武普通中學堂學生羅虔唐豸鳳俊方言學堂學生曹寶江張祥麟中路高等小學堂監學舉人向國華等十名前往法國游學又選得師範學堂畢業學生石鴻翥文高等學堂學生李藩昌潘宗

瑞文普通中學堂學生舉人石瑛松長秦國鏞王鴻猷方言學堂
算學教習胡錚學生陳執禮左德新祝乾遠廣森田吳琨陳寬璋
農務學堂學生李仁炳劉方師範學堂附屬高等小學堂學生夏
彥南路高等小學堂學生馮承鈞劉文彬羅前信東路高等小學
堂學生石龍川中路高等小學堂學生龔永煌澤長等二十三名
前往比國游學以上各學堂學生共四十五名均曾習普通學并
分習德美法比四國語言文字堪以派習各種實業專門之學路
遠費鉅鄂省財力奇絀惟事關培植人才自不得不勉爲其難隨
時督飭司局力籌應付其方言學堂學生雷以綸一名上年曾派
赴美國游學行至上海因病折回茲復派往合併聲明除咨外務
部大學堂及分咨出使德美法比各國大臣隨時照料考察約束
外所有鄂省續選學生派赴德美法比各國學習實業緣由理合

恭摺具陳伏祈

皇太后

皇上聖鑒再湖北巡撫係臣本任毋庸會銜合併陳明謹

奏

荆州駐防學堂情形片

光緒三十年二月

再荆州駐防八旗戶口蕃衍生計維艱教育至爲急務臣於上年會同荆州將軍臣綽哈布奏辦中小蒙養各學堂欽奉

硃批著卽督飭認真辦理務收實效欽此當卽欽遵辦理在案伏查荆州駐防各旗近年人數多至四萬有奇生齒日繁而資生之道常苦其絀現設有中學堂一所小學堂四所蒙學堂十所其聰穎者選送省城高等普通各學堂肄業並派往東西各國游學成材升進漸有階梯而生計通籌尙難普徧詳加體察亟應兼設工

藝學堂方言學堂各一所與中小蒙學相輔培植始基則中人以上可造通材卽中下之資亦知興藝本富教遞加之義爲苞桑本計之圖既可開通風氣不至囿於一隅而實業振興尤於八旗生計大有裨益臣與綽哈布一再函商意見相合已飭荆宜施道余肇康湖北候補道喜源將工程經費擷節核估計建設兩學堂工程約需銀一萬數千兩開辦以後常年經費約需銀二萬六七千兩事關興學育才不容不竭力圖成以臻完善所有經費卽在銅幣盈餘開支飭令興工修建其規制課程均參照鄂省現辦學堂辦理無取鋪張但求核實庶幾造就人才鼓舞興起上可備干城之選下亦增通藝之才以仰副

朝廷廩念旗僕教養兼籌之至意除咨學務大臣外謹會同荊州將軍臣綽哈布附片具陳伏祈

聖鑒再湖北巡撫係臣本任毋庸會銜合併陳明謹
奏

選派日本游學生監督片

光緒三十年二月

再鄂省派赴日本游學學生現計經臣陸續派往及從前留學未
歸者已有一百八十餘人之多歷經派有監督一員就近稽查功
課管理學費約束一切茲因所派監督准補蘄州知州查雙綏現
有要差應行調回所遺監督即經選派廣東候補道寶巽前往接
辦惟查現在學生較多於前分肄各學科亦較紛於前必須認真
考查方冀各有成就且日本一國各省皆有留學之人品類不齊
尤須隨時約束俾其不誤蘄嚮責任較重與從前微有難易之殊
寶巽心地純正器局開展足可勝任前次江鄂合派戶部員外郎
閻海明前往德國爲游學生監督曾經奏明如該員辦有成效懇

照獎勵出使大臣隨員章程一律給予保獎寶巽現往日本監督學生與閩海明事同一律如該員期滿回國實係辦有成效應請援案給予保獎以示鼓勵除咨明外務部學務大臣外謹附片具

陳伏祈

聖鑒謹

奏

游學日本學生學業摺 光緒三十年二月

奏爲湖北歷年選派學生往日本國遊學茲將留學諸生姓名學業並已經學成回國及派往遊歷之學生分別開具清單恭摺具陳仰祈

聖鑒事竊 臣迭次選派湖北各學堂學生前往美德俄法比各國遊學均經先後

奏明在案查日本近在同洲國中學校林立於兵農工商森林路礦之學靡不講求日臻強盛中國各學堂學生前往遊學接待既優學費亦省湖北學生自光緒二十四年十一月起迭經本任督臣張之洞陸續派往並經遴委委員爲遊學生監督在日本就近約束考查經理學費一切自二十八年十一月以後復經臣在湖北文高等文普通武普通將弁師範方言農務工藝及各中小學堂護軍武愷各營選派學生弁勇一百六十名前往遊學並遴派准補湖北蘄州知州查雙綏充監督之任連前數次派往遊學未歸之二十九名統計鄂生在彼已有一百八十九名之多該學生等先後派入日本國家大學校及民間高等學校肄業經臣屢次函詢查雙綏均稱該學生等志趣甚屬端正功課亦極認真必能精研所業次第造就成材以備

朝廷任使謹將湖北歷年選派遊學日本學生姓名出洋年月所
習學科分別開具清單並將學成回國之學生六十五名派往遊
歷考查學務之學生已回國者一十四名未回國者六名一併開
列恭呈

御覽除咨外務部大學堂及出使日本大臣外理合恭摺具

奏伏祈

皇太后

皇上聖鑒再湖北巡撫係臣本任無庸會銜合併陳明謹

奏

保薦在藉道員片

光緒三十年二月

再二品銜前署陝西陝安道候補道黃嗣東湖北漢陽縣人秉性
孝友學有本原才幹優長志趣清遠臣前官陝西時卽備聞其政

績嗣到鄂後見其留心時事於輪船礦務皆能講求而非公不至
品詣甚高尤所傾慕方今時局日艱人才難得黃嗣東伏處鄉里
不爲世用實覺可惜應如何錄用之處出自

聖裁理合附片具陳伏祈

聖鑒謹

奏

日本畢業生請獎摺 光緒三十年二月

奏爲遵

旨請將湖北派赴日本遊學畢業回國學生援照新定章程給予
獎勵繕具清單恭摺仰祈

聖鑒事竊照光緒二十七年八月初六日欽奉

上諭前據江南湖北四川等省選派學生出洋遊學著各省一律

辦理學成領有憑照回華卽由該督撫學政奏請獎勵等因欽此嗣於二十九年八月十六日經本任督臣張之洞遵議鼓勵遊學生章程摺內奏稱此次定章以前已經畢業回國之各省官派學生均照此次章程由各省督撫考查其品行心術所定程度照新章給以出身已有出身者給以相當官職又學務大臣張百熙等片奏遊學較遊歷尤有實際出洋遊學得有畢業憑照回國後尤宜破格獎勵先後均奉

旨允准各在案仰見

朝廷振興學校鼓舞人才既約束於規矩之中又激勵以功名之路法良意美欽感莫名伏查湖北各學堂學生自光緒二十四年十一月由本任督臣張之洞選赴日本遊學歷年續派已逾百人日本同洲同文其學校制度大半皆步武泰西而各學堂皆設有

修身倫理等科以講求人倫道德要旨故能取西人之所長而仍不悖乎中學近年以來隨時修改其科目至爲繁要其規則亦漸底純全湖北學生初次派往者皆在彼國士官學校專學陸軍亦間入聯隊學習誠欲以尙武之精神養成自強之材智較之農商工藝尤爲當務之急該學生等志趣遠大到彼以後皆能不恥相師潛心嚮學比年陸續回國領有畢業文憑經本任督臣張之洞與臣隨時考驗類皆敦品勵學不乏可用之材此次練兵處調取十人卽其翹楚其餘悉以選充湖北文武大小學堂教習臣不時親加考覈兼采輿論咸以各學生明於教授管理之法故能督課勤懇禮法整齊他日教成必能有用爲言是該學生等人品學術經臣再三察核皆與新章應給獎勵之案相符溯自朝廷釐定約束鼓勵遊學生章程以後囂張之氣漸戢有志之士

益多值茲時事愈艱需才孔亟在該學生年力正富用之固貴及時而

國家詔令既頒行之尤期有信臣恪遵

明諭仰懇

天恩俯准將湖北派赴日本遊學畢業回國學生援照奏定章程給予獎勵出自

逾格鴻慈謹繕清單恭呈

御覽所有遵

旨講獎遊學畢業各學生緣由除咨明外務部學務大臣外謹繕摺具

奏伏祈

皇太后

皇上聖鑒再湖北巡撫係臣本任毋庸會銜合併陳明謹奏

武備學堂請獎摺 光緒三十年二月

奏爲湖北武備學堂開辦七年卓著成效謹將畢業學生並出力之教習委員分繕清單籲懇

天恩敕部照章給獎以示鼓勵恭摺仰祈

聖鑒事竊查湖北省武備學堂於光緒二十三年正月經本任督臣張之洞奏准設立並援照直隸江南奏定學堂年限章程俟考校畢業照章奏請獎勵欽奉

諭旨遵辦在案計自開辦之日至今已及七年前選取入堂之舉貢生監文武候補候選員弁以及官紳子弟來學其成材者實不乏人屢經張之洞及臣常時到堂認真考查其戰法與地算學測

繪軍械臺壘體操步隊馬隊礮隊各門功課由聘請之德國教習明定章程分班講授日積月累由淺入深復添派漢文教習授以羣經大義及史傳兵法有裨實用之書使之有勇知方成爲廉恥之將各學生志在報

國不憚勤勞朝夕研求始終不懈現時湖北風氣已開羣知尙武凡遇武學堂考試各事無不踴躍爭先果能日起有功干城之寄實有賴於他日上年冬間臣督同司道親到講堂操場考試優等畢業學生凡經中西教習所授技藝既臻純熟學問均甚切實已由臣擇優派充各防營督帶管帶及各學堂教習以資歷練茲據總辦武備學堂湖北布政使李岷琛將優等畢業學生及出力之教習委員詳請具

奏請獎前來臣一再考核實無冒濫與直隸江南奏定請獎章程

相符又上年安徽武備學堂三年畢業亦經分別奏獎有案鄂皖事同一律而開辦較早成材較衆亟應援照奏案分別保獎其未經畢業之學生仍當隨時督課以期克底於成俟考校畢業後再行奏給獎勵所有學業最優品行端謹之畢業學生及教習委員之尤爲出力者分繕清單恭呈

御覽仰懇

天恩俯准將湖北武備學堂優等畢業學生並出力之教習委員照章給獎以示鼓勵出自逾格

鴻慈除分咨外理合恭摺具

奏伏祈

皇太后

皇上聖鑒再湖北巡撫係臣本任毋庸會銜合併陳明謹

奏

荆州駐防官弁一體教練摺

光緒三十年二月

奏爲荆州駐防改練新軍遴派官弁入省城學堂學習以資教練
恭摺仰祈

聖鑒事竊照荆州駐防旗營改練常備軍教練新操業經 臣等會
同

奏明在案查外洋各國軍營將弁皆由學堂出身日本士官學校
在此學畢業者乃得爲武官立法尤善今荆州駐防改練新軍所
有營哨各官必須由學堂出身教練始能合格運用始能咸宜 臣
等往返函商擬卽於駐防官弁及舉貢生監中選擇品端才敏年
在三十以內者十人送入省城將弁學堂學習三年畢業再令回
荆量身才授任委充營哨各官庶資得力再現在鄂省先後添募護

軍前鋒第一第二第三第四等營及工防第二營並由臣端方飭令增入駐防旗丁一千名分編入新募各營一體教練一俟三年操有成效飭令回荆再行輪換調遣使荆防得有師資則人盡知兵兵有實用此後荆鄂操防聯絡一氣心志齊同技藝精熟庶期緩急足恃除咨練兵處暨兵部外謹合詞恭摺具

奏伏祈

皇太后

皇上聖鑒再湖北巡撫係臣端方本任毋庸會銜合併陳明謹奏

獲匪懲辦並請獎摺

光緒三十年二月

奏爲拿獲在逃多年之自立會匪渠魁審明懲辦並將出力文武各員隨案保獎恭摺仰祈

聖鑒事竊照光緒二十六年秋間自立會匪唐才常等聽從逆匪康有爲等主謀在於沿江各省地方散放富有票糾集各種會匪同時作亂當在漢口新隄等處拿獲匪目唐才常林圭李虎生蔣惲才等及夥黨三十餘名審明正法奏報並將出力員弁分別保獎所有在逃各匪開單咨行一體查拿在案查該匪夥黨中有王漱芳卽王秀芳混名四腳豬本係紅教總頭目兼充自立會正龍頭久經湘鄂兩省通飭嚴拿並准前大學士直隸總督臣李鴻章電咨飭緝因其蹤跡詭秘黨與衆多迄未就獲去年九月訪聞該匪王漱芳潛來漢口黃州一帶密飭地方文武設法查拿旋據兼帶緝捕營夏口撫民同知馮啟鈞署撫標中軍參將補用游擊姚廣順湖北試用縣丞王允成不惜重貲購覓眼綫跟蹤追捕至江西湖口縣地方將王漱芳拿獲解鄂飭發營務處由臣督同司道

悉心研審據王漱芳供稱年三十八歲湖南湘潭縣人先年曾入紅教充當總頭目光緒二十六年秋間聽從已經正法之唐才常林圭糾約入自立會派爲正龍頭給予偽劄令其駐守新隄一帶招募匪黨散放過富有票五百張約期起事因聞武漢破案匪黨四散隨即逃匿等供據此覈與卷內唐才常等前供大致相符查該匪王漱芳卽王秀芳又卽四腳豬以紅教總頭目聽從康黨邀約充當自立會正龍頭名目較大且散放富有票至五百張之多希圖糾集匪黨同時作亂實屬悖逆不法該匪逋誅已久未便再稽顯戮當卽飭將王漱芳就地正法傳首新隄地方懸桿示衆以昭炯戒自日俄開戰欽奉

諭旨以各省匪黨游勇伏莽孔多飭令預爲防範該匪遁跡多年今復潛回漢口一帶顯係故智復萌意圖乘機煽惑幸經拿獲懲

辦得以消患未萌裨益大局良非淺鮮該員馮啟鈞等捐貲購纜
追捕至千餘里倍極辛勞亟應優加獎勵以策將來合無仰懇
天恩俯准將夏口撫民同知馮啟鈞交部從優議敘署撫標中軍
參將補用游擊姚廣順以參將儘先補用並加副將銜湖北試用
縣丞王允成以知縣仍留原省補用出自逾格
鴻慈所有拿獲會匪渠魁審明懲辦並保獎出力文武各員緣由
理合恭摺具陳伏祈

皇太后

皇上聖鑒再湖北巡撫係臣本任毋庸會銜合併陳明謹
奏

端忠敏公奏稿卷四

署理江蘇巡撫謝

恩摺

光緒三十年四月

奏爲叩謝

天恩恭摺仰祈

聖鑒事竊臣恭閱電鈔四月十一日內閣奉

上諭恩壽著署理漕運總督江蘇巡撫著端方署理湖北巡撫著張之洞兼署等因欽此當卽恭設香案望

闕叩頭謝

恩訖伏念臣猥以輕材忝膺疆寄三年任滿方慙報稱之未能九

陛恩頒更荷量移之

寵命渥叨
榮遇彌切屏營查江蘇當江海之要衝重華洋之交涉學堂未徧

待興吳會之人文財政宜修更念東南之民力自維禱昧深懼弗勝惟有候到任後殫竭血誠力圖振作不敢以暫時攝篆稍涉疏虞現督臣張之洞前赴江南會商移建槍廠事宜俟其旋鄂即當交卸篆務馳赴江蘇接受署任所有微臣感激下忱謹恭摺叩謝天恩伏祈

皇太后

皇上聖鑒謹

奏

抵蘇接篆日期摺

光緒三十年六月

奏爲恭報微臣抵蘇接篆日期恭摺具陳仰祈

聖鑒事竊照光緒三十年四月十一日奉

上諭江蘇巡撫著端方署理等因欽此臣當經具摺恭謝

天恩旋於四月二十七日交卸湖北巡撫篆均經

奏報在案隨即摒擋啟程沿途經過湖北之田家鎮江蘇之江陰
圖山象山等處均築有礮臺以爲長江守禦因卽順路查閱考察
情形又經親至江寧省城與兩江總督臣魏光燾面商地方一切
事宜兼於南京上海等處考察官辦民立各學堂於六月初一日
行抵蘇州卽於初二日准正任撫臣恩壽將江蘇巡撫關防暨
王命旗牌文卷等項委蘇州府知府許祐身撫標中軍參將仇志
鵬賚送前來臣卽恭設香案望

闕叩頭祇領任事伏念江蘇素稱財賦之區巡撫實兼政教之責
以臣沿途考察吳會雖號人材淵藪而學堂尙未勃興太湖一任
梟匪逋逃而緝捕殊多懈弛二者所關甚大臣深懼弗勝惟有勉
竭悃忱先加整頓其餘地方應辦要政亦不敢稍涉因循以期仰

答

高厚鴻慈於萬一所有微臣抵蘇接篆任事日期理合恭摺具

奏叩謝

天恩伏祈

皇太后

皇上聖鑒再臣經過湖北江西安徽各省暘雨應時民情安謐足

以仰慰

宸廑合併陳明謹

奏

釐金礙難一律改辦統捐摺

光緒三十年六月

奏爲蘇滬百貨釐金礙難一律改辦統捐恭摺具陳仰祈

聖鑒事竊准戶部咨開奏請通飭各省一律籌辦百貨統捐以保

利權而便商民一摺於光緒二十九年十二月二十七日具奏奉旨依議欽此恭錄欽遵等因當經本任撫臣恩壽札飭司局會議妥章詳復茲據復稱查百貨改辦統捐係統各省之捐須以貨出產地方可改辦統征如原奏江西現將大宗木植夏布土靛磁器等貨均已改收統捐此類與蘇屬出產之絲繭滬屬所產之棉花責成行戶就地統征之法無異又稱外省運來之麻福建所產之菸亦已改辦統捐此與各處運蘇之皮裘桐油白麻錫錠青南腿等貨認辦總捐或由進口先收四成到地再完六成或經首卡一道捐足沿途憑單驗免以及滬商包認落地捐款情形亦屬相同蘇屬土產絲繭之外尙有機織之紗緞向辦認捐每機月捐錢一千文名爲機捐實則產地紗緞捐認捐之機月出紗緞經行蘇屬各卡概免重征其他米糧一項半由湘贛等省運來曾於二十五

年冬經前撫臣鹿傳霖札飭舉辦認捐運銷本省一體照免再三勸導終因商情不願而止推其不願之故由於運銷之貨路有遠近先將所過局卡應完之捐一氣捐足成本較重商力實有未逮譬諸錫金一處爲米商會萃之區錫米運蘇止完卡捐一道今若完納統捐爲數轉鉅商民自不樂從倘或減成抽收辦理未能畫一反恐愈滋弊混捐數必至大虧此外如藥材各貨來自川廣木植磁器來自江西豆麥來自東皖均非本省所產且有轉銷浙省路過蘇屬者無從統征卽由出產之省一併統捐分撥成本更重尤非商情所願他省產貨較多就一省改辦統捐尙易爲力蘇省情形不同大宗之貨已辦認捐其餘零星貨物名目繁碎路經各卡無可統征况甯蘇向係各歸各辦卽就一省之中亦難一律舉辦統捐將來裁釐以後酌留產銷兩稅沿途無卡稽查與現辦情

形迥別必須另定妥章方免流弊據蘇州布政使效曾蘇滬兩釐局司道會詳請具奏前來除咨部查照外謹會同兩江督臣魏光燾恭摺具陳伏乞

皇太后

皇上聖鑒敕部查照施行謹

奏

進呈農學書籍摺

光緒三十年六月

奏爲京員講求農學輯有成書進呈

御覽恭摺仰祈

聖鑒事竊據候選光祿寺署正羅振玉呈稱於光緒二十三年春間邀集同志於上海創立農學會考究農學新理新法譯印報章兼譯農學新書二十四年經已故督臣劉坤一奏明改爲江南總

農會數年以來所譯農學新書日以增多茲特彙齊裝訂都爲五
集懇請進呈

御覽前來臣伏查該員羅振玉力學深純心術正大曾赴日本游
歷於學堂教育之法夙有探討近年在江浙廣東等省辦理學務
皆相倚重該員創設農學會業已有年家本寒峻雖經改爲江南
總農會公家並未助給經費而所譯農書裒然成帙皆係該員獨
力支持未嘗中輟且以實業提倡天下較之妄出報章有害人心
希圖漁利者其用心相去不啻霄壤方今

朝廷振興實學不遺餘力農學最爲民生切要之圖而以創辦維
艱言者寥寥無幾該員獨能悉心考究輯爲成書觀其考覈之勤
采取之博自應將原書恭呈

御覽倘蒙

幾餘繙閱則其所譯各書自不難風行海內俾有志之士得以相率考求逐漸推廣於齊民生計必能大有裨益所有京員彙譯農書進呈

御覽各緣由理合恭摺具陳伏祈

皇太后

皇上聖鑒訓示謹

奏

設江蘇學務處片

光緒三十年六月

再近年屢奉

諭旨飭令各省興辦學堂實爲當務之急現查蘇省各屬學堂均未認真經理規模程度在在皆待考求非設有總滙之區不能周詳畫一雖前署督臣張之洞曾于江寧省城

奏設兩江學務處一所然遠隔一江籌商匪易文牘往返動輒需時且吳會素爲人文所萃士習溫純才華蔚起正宜宏茲樂育進以文明若興辦稍有隔閼之嫌則風氣卽少開通之日應於蘇州省城添設學務處以資討究所有省城及各府州廳縣高等中小學堂暨民間私設學堂以至出洋遊學各生統歸學務處經理稽察考核凡有關教育事宜並卽責成學務處公同籌商妥辦現經札委蘇州布政使效曾署江蘇按察使朱之榛督糧道陸鍾琦爲學務處總辦並延派通曉學務深明教育之人爲學務參議以資襄助所需開辦經費由蘇藩司善後局籌撥應用除分咨禮部政務處學務大臣查照外謹會同兩江總督臣魏光燾附片陳明伏乞

聖鑒謹

奏

署提督節制留防水師片

光緒三十年七月

再蘇省梟匪充斥松江所屬一帶多係匪黨出沒之區近年捕務廢弛盜賊益橫臣到任後疊經告誡營縣分別整頓並勸諭地方興辦團練而成效未可遽覩至水師營伍習氣尤深非統率得人難期振奮前因現署江南提督楊金龍夙著威望辦事認真卽將留防太湖水師全軍委令歸其總統節制該署提督受事以來頗能不辭勞怨實力巡防松江本係提督駐紮處所得其鎮攝或可冀匪徒斂跡四境相安惟是提督衙門公費本屬無多緝捕巡防皆須經費有餘方能呼應靈便該署提督雖廉潔自持常恐不敷展布茲特飭蘇藩司按月籌給銀二百兩以資津貼現在捕梟緝匪一切最關緊要臣未敢稍惜小費期於公務有裨謹會同兩江

總督臣魏光燾附片具陳伏祈

聖鑒謹

奏

職員捐田贍族請建坊片

光緒三十年七月

再查接管卷內據江陰縣人光祿寺署正銜附貢生章成禮四品封典職銜章成駒鴻臚寺序班章成渠同姪生員章國華等稟稱職成禮成渠故父三品贈職州同銜章培慶職成駒故父三品贈職布政司理問章錦濤爲同堂兄弟存心愷悌誼篤雁行恆念同族苑枯各異貧乏者無以自存常思效法范氏置田贍族皆因力有未逮賚志以歿遺命子孫務成乃志故兄原任直隸延慶州知州成義將廉俸所入陸續積置并父遺田產集成義田五百八畝零祭田四十九畝零督率胞姪國華續成其事職成駒遵遺命將

父遺及自置捐立義田五百四畝零祭田五十一畝零共捐置坐落本邑田一千一十餘畝祭田一百畝零計契價銀一萬三千二百餘兩並於西城二保捐建莊祠三十七間地價造費合銀三千五百餘兩所有田地契據俱已投稅更立章本立義莊戶名納賦歲收田租除完賦祭埽等用外悉以充族中孤貧養贍之需以成先志呈請

奏明立案等情經正任撫臣恩壽飭據署江陰縣知縣郭曾程查取田號莊規各冊結加結鈐印具詳請

奏未及核辦移交前來臣查士民捐資贍族田粟准值銀千兩以上例得請

旨建坊給予樂善好施字樣今江陰縣光祿寺署正銜附貢生章成禮等遵其故父三品贈職章培慶四品封典同知職銜章成駒

遵其故父三品贈職章錦濤遺命合捐田畝贍濟貧族洵屬後先濟美任卹可風所捐田房并計在萬兩以上核與歷辦請

旌成案相符應照新章改題爲奏請

旨建坊旌表以維風化除鈔奏同送到田號莊規冊結咨移部科查核外理合附片具陳伏乞

聖鑒訓示謹

奏

整頓蘇省積弊摺

光緒三十年七月

奏爲查明蘇省積弊據實覆陳并現在整頓情形恭摺仰祈

聖鑒事竊臣於光緒三十年六月初五日承准軍機大臣字寄光

緒三十年五月二十三日奉

上諭有人奏江蘇地方積弊請飭嚴加整頓一摺所陳各條著端

方確切查明據實覆奏毋稍徇隱原摺著鈔給閱看將此諭令知之欽此遵

旨寄信前來臣當將原奏所稱軍政緝捕兩條密委署江蘇按察使朱之榛丁憂江蘇候補道李光瑜分別確查其學務團法兩條則與司道等一再籌商辦理茲據該員等逐一稟復前來臣覆加查核參以平日見聞謹將查明實在情形暨現在整頓辦法爲我皇太后

皇上縷晰陳之如原奏內稱江蘇撫標提標陸軍水師兵與匪嘍光緒二十八年冬間省城盜劫錢鋪撫標兵李桂亭實爲案內正兇經事主具結指拿到案前撫臣恩壽徧徇營官之請迫令該縣釋放提臣李占椿年老昏庸終歲與營官賭博松江一帶兵匪不分一節查省城恆和錢店被劫事在上年十一月間經西路總巡

委員帶同該店夥陳榮弼等指獲李桂棠一名摺內李桂亭當卽
李桂棠之訛經吳縣知縣李超瓊訊係飛划營新募勇丁供無行
劫情事質諸店夥則稱李桂棠面貌較黑曾於鏡下看清確係正
盜具有甘結存案當經稟奉本任撫臣恩壽批令俟緝獲正盜質
明辦理旋獲張鬻子等五名隔別嚴訊實未有李桂棠在內復由
該縣稟奉批准保釋遞解回籍李桂棠僅據店夥指認並無真贓
人非正盜則保釋遞解祇是照案辦理當到案時雖有管帶飛划
營黃一桂之哨官呂恆清等赴縣力求保釋恩壽並未批准實無
偏徇營官逼令釋放之事提臣李占椿少隸戎行夙著戰績蒞任
以來衰老多病平時駐防江陰吳淞一帶在署日少提標防營因
提督不常閱操不免懈弛廢事該提督總統南洋兵輪往來金陵
與各兵輪管帶遊譙鬪牌在所不免謂其終歲與營官賭博亦屬

言之過甚至稱兵與匪暱則近來鹽梟光蛋以及青紅各幫大半游勇居多與營兵容易相識且營中所用緝匪綫勇率非安分之徒駕馭得法則匪爲我用馭之失宜卽興養匪無異兵匪不分殆卽指此又稱近二年來營務敗壞匪勢日張去冬今春劫案有二百起畏事未報者不計當鋪被劫者多至五十餘家省城十餘里外之陽澄湖金雞湖等處匪艇盤踞白晝劫略非大幫商船不敢過鄉民鳴鉦示警夜不安枕有力者率遷避入城官吏無法則以招安爲事頭目就撫黨羽潛通而益橫一節查近來緝捕廢弛盜賊橫行被劫之案據報纍纍誠不爲少其中失賊不多恐受牽累因而不報者亦常有之當典貨物各有原主則無隱匿不報之理卷查二十九年正月日起至本年六月止各屬所報當鋪被劫之案實止三十餘起無五十餘家之多陽澄湖湖面遼闊水無涯際

居人散處地險民貧往往於黑夜劫掠重載商船行旅常有戒心亦聞有擄人勒贖之案至稱白晝劫掠詢之土人尙無其事金雞湖則湖身較小匪蹤亦稀招安匪目乃不得已之舉近日如凌德勝沈小阿妹等就撫後尙覺安靜大抵責以拏匪則黨羽易離亦可因以爲用此查明江蘇軍政緝捕之實在情形也至學務團法本係近年舉辦新政求其辦理盡善一時固不易言原奏所稱各節大半皆係實情臣調任以來沿途考查亟思設法整頓而應行整頓之事亦不外摺中所舉四條最爲切要查軍政緝捕兩事本屬相通現在嚴飭水陸各營卽以緝捕爲其專責一月以來曾據飛划營捕送梟匪多名業已訊明正法并於宜興縣所屬地方圍獲匪船格斃匪黨又經拏獲多名訊辦似各營已有振奮之意從此再加策勵當不至如前泄沓新募常備後軍兩營皆調武備畢

業學生爲管帶冀其認真訓練稍變湘軍舊習即可藉以勸勉現署提臣楊金龍勇於任事切實可靠頗能出力巡緝已由奏明月加給津貼銀二百兩松江一帶匪徒當期斂跡此臣整頓軍政緝捕之實在情形也學堂之設省城只有一中西學堂其餘府中學堂及長洲元和吳縣三縣小學堂亦皆規模未備亟應如原奏所陳先將中西學堂改爲高等學堂中學堂改歸蘇州府經理其應改規學科現由臣設立學務處延聘通才考查襄辦並擬建設師範學堂廣收學生分習師範本科及速成師範科以爲中小學堂師資一面分飭各州縣急設初等小學多多益善於師範學堂附設練習科擇諸生之素爲童子師者導以教授管理之法期以三月畢業俾蒙師既無失業之虞鄉曲咸獲得師之益經費稍足并擬設立方言學堂照奏定章程辦理使游學者先習語言然後赴

學既少費用亦省日時似爲要著其外府州縣學堂亦聞有辦理得法者總以經費不能充足亟須設法籌助此臣整頓學務之情形也圍法一層各省情形不同蘇省辦銅幣未及半年章程俱未周妥而其大弊則在奸商囤運遂至不能便民近年制錢日荒官鑄亦多惡劣立法誠有未善原奏所稱官賣銅元短於市價正因防私販而然而言鑄多行廣則制錢雖少而市價能平舊私雖多而銷場自減自是確論臣現在已在外洋訂購印花機器多部俾得廣爲開鑄辦有成效卽由官運銷各屬悉準市價平兌以杜私販之源一面將官鑄制錢力加整頓並擬試鑄當五銅幣俾得周轉蓋當銅元缺乏之時奸商固多屯販一旦鑄多行廣其勢又將屯聚制錢使銅元失利此數年後必有之事不可不豫爲防範者也原奏宜設局上海責成製造局道員兼管並將甯蘇兩局議

撤現在市無銅元利在廣鑄蘇省正議推廣不妨兼營並驚臣亦得就近照料似較專責滬局更有把握此臣整頓團法之情形也總之方今時艱日棘庶務繁興以蘇省事積疲誠非有振作鼓動之精神不能冀有實效事當整頓臣不敢不勉爲其難以上副聖主孜孜求治之盛意至提臣李占椿雖積有戰功然際此梟匪鴟張之日年力已衰事多廢弛恐於此缺不能勝任應否卽行開缺另

簡廉幹大員以資鎮攝出自

睿裁非臣所敢擅擬所有查明蘇省積弊及現在整頓各情形謹繕摺據實具陳伏祈

皇太后

皇上聖鑒訓示謹

奏

練兵要需請推廣鼓鑄摺

光緒三十年七月

奏爲遵

旨密籌練兵要需擬推廣鼓鑄銅元每年認解六十萬兩并縷陳
辦理情形恭摺密陳仰祈

聖鑒事竊准軍機大臣字寄光緒三十年五月二十八日奉

上諭朕欽奉

慈禧端佑康頤昭豫莊誠壽恭欽獻崇熙皇太后懿旨現在各省
空虛西北邊防尤關緊要近畿一帶非有數支勁旅難期鞏固上
年特設練兵處整齊軍制以資籌畫惟軍制以整齊爲要練兵尤
以籌餉爲先各督撫膺此重寄務須審大局之安危知軍機之緊
迫各就本省財力實心籌措每年勻出的款若干以爲練兵之用

現在時艱日棘除寬籌的款迅練勁兵實無救急之策至籌款之法尤以不擾民生不傷元氣爲第一要義事關重要不得稍有漏洩等因欽此又於六月二十一日奉

上諭朕欽奉

慈禧端佑康頤昭豫莊誠壽恭欽獻崇熙皇太后懿旨前因時事方殷需款孔急曾經密諭各督撫切實籌辦現在庫藏空虛內外同一支絀然事勢迫切練兵籌餉實在刻不容緩之時應如何移緩就急騰挪接濟之處著仍遵前旨一併速籌具奏欽此前後遵旨寄信前來仰見

朝廷宵旰焦勞憂時憂國之至意臣受

恩深重具有天良值此時世艱危自問毫無報稱若僅責以籌款猶不能殫心竭力集有成數以備

朝廷緩急之用更覺寢饋難安此次赴任時沿途考查卽已豫先籌畫到任後詳加核計幸已稍有眉目謹將認籌確數及辦理情形爲我

皇太后

皇上陳之查蘇省素稱財賦之區然轄地狹小不過三十餘州縣徒以田賦較重穀產豐饒故有膏腴之目近年民力凋敝已不如前籌款之法欲不病民無過提外銷剔中飽兩層中飽之款雖已嚴札清查然州縣辦公所需不能不留爲有餘恐亦所得無幾蘇省外銷之款最爲短絀每年所支不足十五萬一省之大事事仰給豈能敷用是以營務廢弛而不能脩新政頒行而不能舉今日稍議整頓則無一事不須另籌無一欸不須寬備司道有無米之嗟縉紳有廢食之誚此爲外省所不知抑亦臣所不料者現在

國家銳意練兵誠爲禦侮至計然以蘇省內地梟匪充斥伏莽滋多營伍不飭則教練無方學堂不興則人才日少萬一因循敷衍釀成今日粵西匪患何以自處臣朝夕憂皇不可終日現與司道籌商惟有就已辦銅元盡力推廣庶得大宗的款以應急需且鑄錢卽以便民正與

諭旨不擾民生不傷元氣之意相副查蘇省自本年二月開鑄銅元機器無多每日祇能出三十萬枚曾經本任撫臣恩壽奏明所有餘款除提還借墊銅本造廠購機各款餘請留抵釐金無著撥欸在案核計每年所餘尙恐不敷抵補自難撥作他用現由臣籌借欸項添買印花機器五十部並購馬力較大鍋鑪三具另造屋廠約計造屋及所購機器截至明年四月底卽可一律齊備儘力鼓鑄每年可得盈餘一百七八十萬卽以六十萬兩撥作練兵處

常年經費應自明年五月爲始按數分批勻解不敢有誤要需其甯蘇協籌州縣丁漕加提中飽之二十一萬兩不在此列又奉旨籌提裁併各款正在督飭司道籌辦俟辦有頭緒再與兩江督臣彙案奏陳至所餘銅元盈餘一項除提還此次造廠購機各款外應請悉數留爲蘇省舉辦要政之需大抵募練勇營興建學堂是其所急餘如添購軍械資送游學振興工藝講求水利增築滸浦礮臺以重江防趕造淺水輪船以緝梟匪所費皆屬不貲均應分投趕辦之事所留之數一時尙難以並舉蓋聚則見多分則見少如以貧戶驟興大役鮮有不左支右絀者矣且臣更有慮者銅元盈餘所恃在銅質價賤又市肆賤荒已久兌價不免昂貴是以能便民而兼能裕餉現在各省皆籌開鑄大利所在人必爭趨卽以江蘇論之甯蘇淮滬已有四廠中國銅礦未開所需銅本皆係

購自外洋一旦機廠繁興洋商壟斷居奇銅價必致奇漲加以鑄
多行廣充溢市塵銅元兌價亦恐日賤一日則行銷必滯獲利必
微况現擬增鑄當五當二銅幣以濟制錢之荒核計銅本雖減而
廠工一切用費與當十相去無幾不惟無贏兼恐有絀是此後所
鑄銅元但有便民之功並無盈餘之望此二三年間必有之事今
日所籌仍所謂苟且補苴不可持久臣又不敢不豫先籌及據實
直陳者也所有遵
旨密籌練兵要需擬推廣鼓鑄認解的款各緣由謹繕摺密陳伏

祈

皇太后

皇上聖鑒謹

奏

無錫辦學抽捐滋事片

光緒三十年七月

再據署無錫縣知縣陳詒署金匱縣知縣汪鳴鳳稟稱無錫縣紳舉人楊模等創辦埃實東林兩學堂因經費不足欲就米商原有商捐中抽撥四釐充用米商相持未允曾由楊模等於本年六月間稟請江蘇學政臣唐景崇批飭嚴提米商董事生員趙夔監生張錦釗到縣認捐完案乃趙夔等心懷不甘因楊模進省輒煽造謠言謂各業亦須一律捐輸奸徒乘機播弄突於七月初二初三等日聚集多人擁赴楊模住宅放火燒去廳屋數間又分投將埃實東林兩學堂一併拆毀並因楊模內宅未經延燒復兩次放火致將住屋後進一併焚毀一面勒令各業閉市等情經臣分別委員前往彈壓勸諭始於次日一律開市旋委候補知府許星璧前往查辦所稟情形核與該縣等所報大致相同伏查興辦學堂原

係地方要政紳商籌捐經費亦屬常情若該縣等早爲主持必不至釀成巨案乃竟坐視不顧致使紳商積不相能匪徒從而煽惑事起之後猶不能立時解散以致放火罷市肆意橫行尙復成何事體該縣等辦理不善咎無可辭應先將該員陳詒汪鳳鳴一併摘去頂戴勒令查拏匪犯賠修學堂以觀後效至匪徒動輒生事尤非地方之福本年鎮江因辦警察聚衆罷市相距不及半年復有今日之事若不從嚴懲創必至相率效尤現據該縣等陸續拏獲匪犯錢阿其施阿和等八名並有首要在內應一面飭縣嚴行審訊務得確實盡法懲治一面仍飭上緊訪拏餘犯勿令漏網俾儆凶頑而維學務其餘一切事宜隨時分別辦理除俟訊明後再將辦理情形

奏報外理合會同兩江總督臣魏光燾附片具陳伏祈

聖鑒謹

奏

孝子崇祀鄉賢摺

光緒三十年八月

奏爲公舉崇祀鄉賢恭摺仰祈

聖鑒事竊據蘇州布政使效曾詳稱吳縣已故孝子附貢生吳仁榮幼穎異年十九補諸生爲學政湯金釗所器不求聞達旋貢成均該貢生生有至性善事嗣母嘗割臂肉療母疾母歿該貢生年已逾艾猶作孺子慕道光咸豐年間兩修吳縣學因祀事簡略修廢舉墜制度聲容一遵會典學成爲吳郡諸學冠又倡立鄉約局宣講

聖諭自城及鄉民多化之道光十八二十二等年兩次水災流民鬻集該貢生力任艱鉅設廠撫卹凡里中貞孝節烈該貢生獨總

采訪之役呈請

旌表並創建節孝祠春秋祭祀以維風化其他禁淫書設義塾惜字施米各善舉莫不殫竭心力首倡居多戚友有逋負者輒鬻產代償晚歲處亂離中安貧樂道不尤不怨以詩篇自娛一生於儒先語錄實踐躬行無慚衾影同治二年卒九年奉

旨旌表孝子跡其生平行事允爲先正典型據該縣紳士潘祖謙等臚陳事實請祀吳縣學鄉賢祠以重儒修等情由縣造具冊結詳府一體加結詳司轉詳請

奏前來臣查鄉賢名宦前准部咨改爲八月前彙奏一次等因節經遵照辦理在案茲查吳縣已故孝子附貢生吳仁榮性成純孝早邀

九陛之旌學紹儒宗允稱一鄉之善觀其行修而志潔足以風世

而厲民既爲物望所歸宜與明禋之祀合無仰懇

天恩俯准將吳縣已故孝子附貢生吳仁榮入祀吳縣學鄉賢祠

以昭矜式而順輿情除將事實冊結咨移部科核辦外謹會同兩

江總督臣魏光燾江蘇學政臣唐景崇恭摺具

奏伏乞

皇太后

皇上聖鑒訓示再該貢生身故在三十年以外子孫並無現任九

卿核與例章相符現屆彙辦之期請祀鄉賢者該故貢生一人合

並陳明謹

奏

嚴辦梟匪整頓營務片

光緒三十年八月

再蘇省梟匪充斥久爲地方之害臣抵任後深知緝捕不力實由

營務廢弛兵與匪通節經撤換管帶訓飭營弁責以拏匪自效并申明賞罰冀有捕獲以靖盜風數月以來各營稍有愧奮之志屢經拏獲盜夥賭匪多名訊明正法惟現查匪黨頭目以高東山吳海鳳董刁福魏家元爲魁高東山羽黨廣布犯案纍纍其稔惡與已經正法之曾國璋相埒吳海鳳則在浙西一帶聚賭行劫拒捕官軍行爲兇悍董刁福魏家元則在太湖沿岸聚賭販私擄人勒贖私蓄快槍多桿恣爲不法皆係梟匪中最大頭目倘能按名逮案懲治必可藉寒賊膽現在正設法掩捕吳海鳳業經破案其餘購線分投密拏亦可望陸續弋獲惟是整頓捕務之際期於信賞必罰嗣後如查有通匪之營哨官但得確實憑據卽請以軍法從事俾昭炯戒若果能踴躍用命捕獲渠魁亦當優加獎敘以爲激勵之資合無仰懇

天恩准俟拏到著名匪犯審係梟匪中最大頭目卽由 臣將出力員弁核實奏保數員以示鼓勵出自

逾格鴻慈再太湖一帶地方素爲梟匪藏集之所 臣擬於九十月間親往巡視一周俾資鎮攝謹附片具陳伏祈

聖鑒訓示謹

奏

變通知縣參革留缺摺

光緒三十年八月

奏爲知縣參革留缺一項擬請變通酌補以裨吏治恭摺具陳仰祈

聖鑒事竊照知縣參革一項定例專用軍功候補人員後又改爲一咨一留相閒酌補歷經循照辦理惟軍興以來迄今垂四十年軍營著有勞績人員現已無多近年到省者尤屬寥寥無幾每遇

前項參革應留缺出往往詳加遴選不易得人蓋精明強幹之員大半敍補向盡其未經補缺者或年力漸就衰頹或才具不甚開展若不設法變通深恐無裨治理查進士卽用進士截取舉人大挑等班雖有酌補輪補班次而人數較多又爲保舉捐納人員壓班插補到班甚難卽用大挑旣不免到省多年沈淪聽鼓截取一項尤無補官之期該員等通籍入官年皆老大不乏明理之士卽多可用之才而因格於定章未能擬補於彼則諸多遷就於此則任令向隅不惟事理不得其平亦於吏治毫無所補應請嗣後遇有參革留補缺出先儘軍功勞績候補人員補用如其人地實在不宜卽於進士卽用進士截取舉人大挑三項人員內酌量抵補似於例章無甚出入而人才亦可藉以奮興據蘇州布政使效曾會同江甯布政使黃建筦署江蘇按察使朱之榛具稟請

奏前來臣覆查從前部章所以將參革留補之缺專用軍功人員者其時祇因軍務初定積有成勞不得不專列一班稍示優異蓋酬庸激勵兼而有之至於事隔多年人才垂盡來者不繼早應變通於今日而議改章不獨非輕事更張實所以因時立制况當朝廷百度維新之日更不當墨守成法阻遏人才合無仰懇

天恩俯准將知縣參革留補一項員缺如軍功勞績本班人員人地不宜卽以進士卽用進士截取舉人大挑三項人員變通酌補俾裨吏治謹會同兩江總督臣李興銳恭摺具

奏伏祈

皇太后

皇上聖鑒勅部議覆施行謹

奏

開鑄經費撥款片

光緒三十年八月

再蘇省款項支絀前於籌備練兵要需摺內請將已辦銅元盡力推廣俾資撥濟在案惟是添買機器鍋爐等件及購地建廠一切工料所需經臣核實估計總需籌墊經費銀五十餘萬方能動工開鑄蘇省司局既無閒款可籌外銷之項又復入不敷出均難移緩就急但以此次推廣鼓鑄乃係萬難刻緩之舉不獨練兵急需專賴此項盈餘以爲挹注卽蘇省應辦要政無一事不待以經營既不敢存因噎廢食之心自不能忘曲突徙薪之計現與司道熟商查有沙洲繳價收解司庫銀十餘萬兩可以提歸撥用此外不敷銀兩惟有暫由藩司糧道江海關及善後局滬釐局設法借撥濟用一俟廠屋造好機器運齊開鑄之後所得盈餘除提存練兵要需應解之數聽候撥解外卽先將前項借撥之款儘數提還再

行撥作他用庶不致有誤要工謹據實附片具陳伏祈

聖鑒謹

奏

清查田畝籌辦情形摺

光緒三十年九月

奏爲蘇省清查荒畝定章招墾切實籌辦各情形恭摺具陳仰祈
聖鑒事竊查田賦一項乃

國家維正之供蘇省地處膏腴賦入素稱繁富自光緒二十五年
漕賦以後州縣既無喫荒之術紳戶亦鮮抗租之人然猶不能實
徵及額者則以報荒之田較多而查荒之法猶未盡也現計蘇屬
四府一州荒田荒地不下二百餘萬畝以鎮江蘇州爲最多常州
次之而松江太倉爲最少大抵荒田之數有實荒虛荒之不同實
荒約分兩層一爲版荒卽歷年豁除糧賦之田畝其中有不可耕

者如義園荒塚挖廢坍沒皆是餘則高下畸零功不易施者亦所
在多有一曰災荒則熟徵歉蠲歲無定數者是矣虛荒亦分兩層
有已徵之荒如豪家巨室羞完全漕則以熟報荒者有之冊書經
造得賄舞弊則以熟列荒者有之漕書戶書侵挪私蝕藉荒彌縫
保圩甲總勒佃廢耕藉荒隱射者亦有之凡此皆弊在業戶胥吏
者也至於未徵之荒則有因兵燹以後載籍無存業戶自報以多
報少者有客民開墾未經丈量約略開報者又有零星小坵隱匿
不報或一圩兩坵報甲不報乙者此弊在業戶佃戶參半者也虛
與實較虛荒常居荒中之多數弊混既深鈎稽不易巨紳猾吏相
迫使然各州縣固不免依違其間亦實苦於無從下手惟值此時
艱餉絀之際此等國賦正欸萬不容稍存隱忍不事清查蓋不獨
別項誅求恐傷民力抑且使財賦所出之地荒熟永遠雜糅廢棄

可惜墾闢無從未免有傷政體臣與司道熟商惟有先定墾荒章程以爲擠荒地步其法先查各屬歷年報荒田畝定爲版荒由農務局提出招墾其餘新荒皆令報荒之戶指實荒地之所在准其報明豁糧由局一律招墾若本年災荒則應由各州縣於秋勘案內勘實成數或徵九減一或徵一減九總以不使全蠲錢糧不與版荒相混爲要領並於版串內載明減收數目俾民間咸沾實惠而招墾時不難稽查虛荒似可擠出大半至零星小坵隱匿之數欲大加清釐非澈底丈量不可擬俟招墾辦有頭緒版荒實數既有大宗可查然後追求小數則事前庶免紛擾屆時亦易於鈎尋丈量一層從緩再爲置議其開墾章程則分別官荒民荒土佃官佃及繳價升科各條務從便民隨時通變蘇省物力旣厚農功亦勤倘能加以考求不難化瘠爲腴易磽成沃此又地利人事更迭

爲用不宜失圖者也其餘未盡事宜俟開辦後體察情形再行斟酌辦理所有清查田畝定章招墾切實籌辦各緣由理合恭摺具奏伏祈

皇太后

皇上聖鑒訓示謹

奏

清理丁漕片

光緒三十年九月

再查蘇屬額徵丁銀二百二十九萬九千八百餘兩現除蠲減緩徵之數已徵至二百六萬四千一百餘兩約計已及九成額徵漕米一百一十九萬四千四百餘石現除蠲減緩徵之數已徵至一百萬六千三百餘石亦在八成以外均係年清年欸並無絲毫蒂欠以賦稅最重之區當丁漕積疲之後數年以來辦到今日地步

端以收人、高

卷四

民力官力皆不爲不盡他省有漕之區如浙皖江西諸省其徵收成數臣雖不能深知恐尙未能及此卽以臣從前所到之地論之陝西最爲認真所徵地丁亦只九成有餘湖北則丁漕兩項雖經逐年整頓實徵之數尙未能及八成彼此相較其情形已可概見臣伏念丁糧一項本爲

國家正供率土皆同無容軒輊自蘇省獨負財賦之名於是一言整頓丁漕無不注重蘇省其實自加籌新案賠欸以來民力已極形凋敝近年輸將恐後其事實屬難能值此餉絀時艱

朝廷宵旰焦勞臣忝任封疆斷不敢博培養元氣之名稍從寬假現在惟有嚴定章程力辦招墾設法擠荒但期多擠一分必可得一分之益所有辦法已於正摺臚陳至於歷年徵收成數及嗣後辦理棘手情形亦不敢不預爲籌計竊意各省若能年清年款徵

及九成所增當復不少似應責令一律清理庶積少可成鉅數而
辦理亦易見功於整頓丁漕一端不無裨助謹附片具陳伏祈
聖鑒謹

奏

整頓警察摺

光緒三十年九月

奏爲蘇省開辦警察及近日力籌整頓各情形恭摺具陳仰祈
聖鑒事竊照光緒二十八年九月十六日奉

上諭袁世凱奏定警務章程暨保衛地方一切甚屬妥善著各直
省督撫仿照直隸章程奏明辦理不准視爲緩圖因循不辦將此
通諭知之欽此自應遵照辦理旋准將直隸警務章程咨送到蘇
卽經本任撫臣恩壽督飭司道認真籌辦查蘇省地當衝要水陸
交通戶口殷繁良莠不一歷年省城原設有保甲總局分設總巡

以資彈壓既經改爲警察自應歸併辦理爰將城內外原設之七路總巡悉數改爲總察改段巡爲文捕員另委哨弁爲武捕員互相鈐束隨處巡防其巡捕則就原有安定營旂勇內挑選嗣又先後增募共五百名晝夜輪流站防夏防事少兼令學習槍隊體操俟冬防喫緊再行酌量停止並嚴定巡捕條規十六條責令一律遵守經費均在司局籌款撥給並未派捐民間將來銅幣籌有盈餘再圖次第擴充期臻完善計自二十九年五月辦起迄今一年有餘居民尙屬相安地方亦尙覺平靖據蘇州布政使效曾署江蘇按察使朱之榛暨警察總局詳請

奏咨前來臣伏查警察一事實爲周禮訝士擇人之遺制詰奸禁暴洵內政之要圖自東西洋各國先後創行無不著有明效蓋其學問至大故所業恆有專門其事理至繁故設官獨隸一部中國

近所仿效體格皆未完全巡捕既不出自學堂捕員亦罔知其義務因陋就簡審勢度宜雖已變警察之名仍未盡革保甲之習上年開辦之始固亦不得不然蘇省地廣人稠匪徒較多巡警尤其所急眼前既就省城經營章程亦均未妥善節輕臣設法整頓以期漸就範圍並選候補人員赴日本習學警務俾日後有所取資不至動形扞格至於巡捕一項現皆以營兵充補實難望其諸事合宜只有酌量先設警察學堂更迭訓練以策後效其餘未盡事宜一時亦難以盡行更改惟有隨時隨事妥籌辦理所有蘇省現辦警察及力籌整頓各緣由理合據實恭摺具陳伏祈

皇太后

皇上聖鑒謹

奏

褒揚耆儒摺

光緒三十年九月

奏爲耆儒年近百齡循例懇

恩褒揚以彰人瑞恭摺仰祈

聖鑒事竊據在籍紳士前工部左侍郎盛宣懷等呈稱三品封典知府銜蘇州府震澤縣附貢生沈毓桂生於嘉慶戊辰年現年九十七歲該員植品純粹潛研實學光緒五年與美國儒士林樂知在上海創建中西大書院前後掌教十有八年復與諸西儒共譯格致探原及天文算學等書三十餘種又創設萬國公報譯登中外政事學校商務諸大端當咸豐同治之際中西隔閡民智未開該員已能燭理研幾以知覺爲己任五十年來不求聞達現屆九十七歲計閏已及百齡精神強固勵學不衰呈請懇

恩褒揚前來臣查該員沈毓桂篤志潛修器識閎卓通中西之學

詣實極儒生稽古之懷躋耄耄之大年足彰

聖世作人之化况舉引年之典共稱無愧乎經師而

推錫類之仁正值宏開夫

壽宇允符人瑞宜荷

殊施合無仰懇

天恩

逾格獎賚

寵錫銜階以勵耆儒而光

盛典除咨禮部查照外理合恭摺具陳伏祈

皇太后

皇上聖鑒訓示謹

奏

暫署江督謝 恩摺 光緒三十年九月

奏爲恭謝

天恩仰祈

聖鑒事竊准軍機處電開光緒三十年九月二十三日奉

上諭兩江總督著周馥署理迅速赴任未到任以前著端方暫行

署理江蘇巡撫著效曾暫行護理欽此當卽恭設香案望

闕叩頭謝

恩伏念 臣撫鄂三年媿涓埃之莫補移蘇半載更利弊之未諳茲

復仰荷

溫綸暫權督篆

隆恩屢賁慚感交縈惟有殫矢血誠勉圖報稱驟膺重負冀竭輕

塵墜露之私仰答

鴻慈永戴

厚地高天之德所有感激下忱理合繕摺恭謝

天恩伏祈

皇太后

皇上聖鑒謹

奏

接受督篆日期摺

光緒三十年十月

奏爲恭報微臣到甯接受督篆日期叩謝

天恩仰祈

聖鑒事竊臣於光緒三十年九月二十三日仰蒙

恩命暫行署理兩江總督當於二十六日交卸江蘇巡撫篆務起程赴甯恭摺謝

出而思改入之爲高

卷四

二十五

恩奏報在案茲於九月二十八日行抵江甯省城據江甯布政使黃建筦將封存兩江總督關防一顆暨兩淮鹽政印信南洋通商大臣關防各一顆並旗牌文卷一併委員齎送前來臣當卽恭設香案望

闕叩頭謝

恩祇領任事伏念微臣知識庸愚兩江責任重大雖兼圻之暫寄實五內之慚皇惟有益矢悃忱勉圖振作不敢苟安旦夕冀存得尺則尺之思庶幾仰答

聖慈俾竭在官言官之報所有感激下忱并到甯接受督篆日期理合恭摺叩謝

天恩伏祈

皇太后

皇上聖鑒謹

奏

臚陳前署督政績摺

光緒三十年九月

奏爲前署督_臣因病出缺代遞遺摺並將歷任政績恭摺瀝陳仰祈

聖鑒事竊照署理兩江總督本任江西巡撫_臣李興銳於光緒三十年九月二十二日因病出缺當經_臣在蘇電請軍機大臣代奏欽奉

恩旨賜卹飭卽查明該署督子孫幾人候

旨施恩等因欽此伏查前署督_臣李興銳籍隸湖南瀏陽縣咸豐年間以諸生在籍辦團卽爲前湖南撫_臣駱秉章所識拔會江西賊匪由萬載上高謀竄瀏陽進窺長沙駱秉章檄李興銳集團防

堵於分界嶺截擊之賊勢雖衆終莫能逞瀏陽得保全長沙因亦無恙嗣故大學士曾國藩治軍東征聞其知兵招入戎幕令隨同湘軍由撫州轉戰而前約會於九江數月之間血戰無間日夜李興銳身在行間運籌決策多所獲捷後總理山內糧台其時徽甯各府徧地皆賊糧台駐祁門四面告警李興銳爲之轉餉不絕軍食賴以常充僞鳳王古隆賢深忌之乘雪夜襲陷祁門李興銳豫先偵知設計匿其輜重賊至無所獲卽引去論者謂李興銳雖未身臨前敵而平賊之功要以饋餉爲先與轉戰迨無多讓同治四年唐義訓金國琛兩軍在皖南鬧餉譁潰李興銳聞之卽單騎馳入軍中曉譬士卒以所欠之餉任諸一身而詰責其爲首滋事者揭報於曾國藩嚴治之事乃定金陵克復後綜計所筦糧台積存平餘銀四十餘萬悉繳諸官不以一錢自私曾國藩重其品學軍

中戰守事多諮之以行嘗以況故大學士李鴻章謂其才相頡頏也然李興銳淡於榮利相從垂二十年曾國藩屢欲興而拔之皆堅辭固拒同治九年補直隸大名府知府未到任卽以親老告養隨經曾國藩奏請開缺以道員調赴兩江委辦營務經畫長江水師事宜迄今三十餘年猶多沿用其成法旋辦上海機器製造局中國製造之學時始萌芽李興銳苦心經營凡歷十年規模大具乃以丁憂去官光緒十一年服未闋卽奉特旨召見終制北上

欽派隨同辦理中越界務循邊徼千里徧歷窮荒不辭勞瘁十三年蒙

恩派充出使日本大臣以適有足疾請開去差使時故大學士李鴻章重其才略奏留直隸隨委署津海關道補授天津道調補山

東登萊青道擢任長蘆鹽運使署直隸臬司陞授福建藩臬兩司
調任廣西藩司庚子九月奉

旨補授江西巡撫是年適值拳匪之亂行省莠民多乘機滋事江
西焚燬教堂至數十處劫掠教民財產控訴於官者不下二千餘
起辦理之棘手無逾此者李興銳抵任卽奏請具限三月一律議
結外人服其剛正未及期已帖然就範當時卹賞之費不下八十
餘萬或請責諸紳民李興銳以爲鬧教者多鄉曲無賴何有身家
苟或牽累無辜則怨毒更甚隱患將無窮期嚴飭郡縣不得苛派
分文惟奏請以開辦籌餉捐輸之款提給先是江西因庚子之變
增募防勇垂及萬人類烏合之衆無足恃者而帑藏亦不能給李
興銳到任數日卽裁去千餘人隨復陸續挑汰歲節餉需不下三
四十萬統軍將領或以操切召變爲慮李興銳毅然不爲之動士

卒懾其威望亦無敢抗之者辛丑和議既定奉派賠款累百餘萬
得以所節之餉挹彼注茲復就釐金土藥兩項大加釐剔賠款遂
得敷用實未嘗行一苛細雜捐擾及閭閻及調署廣東巡撫因廣
東上年奏辦隨糧捐原議按征數加三成於是石之米向納銀
四兩者加三成卽須銀一兩有奇而各屬丁米折價多寡不一書
吏或且上下其手民頗苦之李興銳爰爲奏定但從正額科計不
得並及耗餘民力乃減十之六七此外如豐順大埔乳源連平長
甯平遠鎮和平各州縣貧瘠之區及孤懸海外之瓊州一府悉
皆豁免其爲

國家保全元氣之心蓋天下所共見去年調署閩浙總督愛民勤
政一如治贛粵時本年七月奉調署兩江總督之
命抵任後日以辦巡警興學堂改定操法部勒營伍諸務與羣僚

籌議南洋爲外交總匯之區又值日俄構兵交涉益形重要李興銳苦心區畫恆徹夜不能安寢九月十三日兵部左侍郎臣鐵良馳抵江甯李興銳猶於一日之間接見三次籌議治軍理財製造諸政次日卽發痰咳之證又加之以喘瀉然尙力疾見外省僚屬二十一日以各國增索賠補鎊價及修濬黃浦兩事關繫重要猶復殷殷籌慮次日卽因病出缺伏念李興銳久在故大學士曾國藩戎幕以清正著稱平日更事旣多於湘淮諸軍所以立功之故及其末流之弊均知之甚深江西福建各路防軍從前頗稱窳隳自李興銳到任後爲之更定常備續備諸軍制於事頗多廣益其理財用人一以綜覈名實爲主故所至皆能廓除積習上下肅然此次蒞任兩江正可與之協力諮商整理庶務而軍事得其部署亦可望壁壘一新不圖未及兩月遽爾溘逝臣到任卽據該家屬

將遺摺呈交前來聞其彌留之際尤以時事日艱民力竭匱爲憂至於聲淚俱下忠斐之忱至死彌篤中外官民無不同聲痛惜合無仰懇

天恩飭將該故督臣李興銳生平事績宣付史館以彰忠蓋至李興銳長子嫡孫均已身故現存嫡曾孫李謨光年甫五歲次孫指分安徽試用知府李鴻扶出嗣孫指分江蘇試用道李鴻榦二人又曾孫李謨斫李謨焮二人年均幼穉應如何

量予恩施之處出自

逾格鴻慈所有臚陳前署督臣生平政績並代遞遺摺緣由理合恭摺具陳伏乞

皇太后

皇上聖鑒訓示謹

奏

查明蘇省參案摺

光緒三十年九月

奏爲遵

旨查明江蘇參案情形據實覆陳恭摺仰祈

聖鑒事竊准軍機大臣字寄光緒三十年七月十二日奉

上諭有人奏江蘇官吏貪污營兵劫掠繕單糾劾一摺所有各員劣款著端方按照所參逐一確切查明據實具奏毋稍徇隱原摺單著鈔給閱看將此諭令知之欽此遵

旨寄信前來臣當卽電調前江安糧道胡延來蘇委令照單逐款密查又因單開各條頭緒紛繁一面仍由臣嚴密鈎考務期得有確情旋據胡延查訪明白逐一具覆前來查核所稟情形證之以臣聞見大致相符如原單內開梟匪巨魁凌得勝沈阿妹王升魁

等常聚兇徒橫行村鎮名雖就撫實則公然爲盜統領吳家正杜
俞等所統各營與匪通氣及奉賢縣傅金玉南匯縣張寶瓌縱匪
擾民各節查江南匪徒有鹽梟光蛋青紅南北各幫名目初僅販
賣私鹽繼則聚衆開賭久之遂有擄人勒贖肆行劫掠之事其操
演槍礮橫行鄉鎮誠有如原奏所云者盤結日久滋蔓難圖故間
或勉事招撫冀可解散羽黨暫圖安戢亦萬不得已之舉北幫匪
首爲鄧海青南幫爲凌得勝沈阿妹王升魁上年兩黨械鬪歷時
甚多迨將鄧海青拿獲正法凌得勝沈阿妹等又由奉賢縣郭重
光諭令投營經本任撫臣恩壽電
奏奉准在案凌得勝沈阿妹現歸飛划營統領孫金彪管轄派充
哨官責令捕梟贖罪黨衆四百餘人一律就撫王升魁被鄧海青
挖目成廢不能留營亦不能爲患松江府屬孫姓被劫一案經凌

得勝獲犯杭得勝陸忠棠等十名陸忠棠係凌得勝同母異父之弟手擒送案足見真心效力實無名雖就撫公然爲盜之事各幫梟匪游勇居多大半與營兵相識一聞剿辦往往得信遠避營官卽以解散爲功積習已非一日吳家正係充浙西鹽捕營管帶尙無通匪證據杜俞統領各營馭衆素寬間因匪勢蔓延議主招撫然決其必無與匪通氣之事現經嚴飭水陸各營認真緝捕數月以來疊據飛划等營捕送梟匪多名訊明正法並於宜興縣地方圍獲賭匪逮案訊辦各營將弁似尙知激勵從事至前署奉賢縣傅鑫原參傅金玉當係筆誤訪查在任時常往上海動輒匝月不歸雖無冶遊實據而性耽佚樂不免曠廢公事上年曾示意紳董諭令沈阿妹就撫往復商勸跡近聯絡並無招飲情事土棍錢麻蘭於二十八年由縣役緝獲到案非都司劉化彪擒送二十九年

四月挖牆逃逸相傳同逃者二十九人而可查者只有四人派員密訪尙無得賄故縱情事又傅鑫任內有吳承雍被控及潘樹森私開白拉各案曾經罰助學堂經費一二百元不等均交學堂經董手收此外又有刑書盛顯質私和人命地保王耕良遲報棍徒各有罰款雖爲數甚微不問撥作何用原參謂其藉端科罰入己不爲無因其結交報館一層則因所上警察章程報館排日印傳故原參有緣飾揄揚之語尙屬無關吏議又前署奉賢縣張寶瓌訪查無沈溺煙賭縱容家丁實據搶木一案查係戴運寅任內之事卷查該縣金柏茂木船遭風漂失木植被泥城民人乘危搶取經董事王曾福協差查起差被毆傷王曾福被宋阿昌等叢毆斃命疊據屍母指明兇手宋阿昌等請拏在案惟獲宋桂樓一名供認幫毆宋阿昌迄未拏獲上年十一月張寶瓌到任由戴運寅移

交又經松江府催飭拏辦張寶琮雖曾添差協緝然未經獲到一犯原參謂其延不緝兇殆卽指此又原單內開前任蘇州府知府向萬鏢貪鄙無恥利己禍人候補知縣范守佑李筠脅懦示威責令朱翰青等攤賠鉅款各節查向萬鏢管帳之友張緯農相隨多年平日最爲信任上年夏間因賭虧空挈其公私各款潛逃向萬鏢並未拏究亦未押追家屬其誑騙金珠店萬年樓等處貨物則因張緯農向有積欠未清數止七百餘元非藉向萬鏢妻壽爲名亦無鉅萬之多向萬鏢於張緯農逃後查得虧空公款三千餘金訪聞張緯農常與本地人朱翰青何伯英等同賭飭縣拏究朱翰青聞信脫逃當由縣將其房屋封閉箱籠等件聽其家屬攜去僅將木器等物另單封儲存案飭提何伯英到案訊出同賭姓名有寶介人朱翰青等五人在內向萬鏢並未照案科以賭博之罪惟

札飭三縣勒令各犯分賠公款經候補知縣李筠范守佑爲之計畫經營由卸署長洲縣主簿周紹棠向寶介人家屬索銀一千兩在朱翰青名下追銀一千兩朱翰青在逃因其房屋發封由長洲元和兩縣各墊銀五百兩將來變房歸款又因公款尙短銀八百兩仍令周紹棠向寶姓加索四百兩李筠墊銀四百兩以李筠租住朱翰青房屋尙可抵扣也寶款繳後向萬鏐卽將原札調換故現在卷內無寶介人之名其餘不足之數聞由陸小松及汪吳各姓分賠不能得其確數原參謂有三萬四百餘兩則係傳聞失實亦查無詐索裕源錢莊及逼入西籍投教之事曹莫汪三員被劾褫職係本任撫臣恩壽年終甄別與此案無涉李筠范守佑得差均係司局詳委不盡由向萬鏐保薦再查蘇省官冊並無同知吳伯英其人原參謂向萬鏐騙其古玩玉器自無其事又向萬鏐存

滬之款派人分赴日昇昌等號詢查據稱偶有存款均經隨時提用並無生息至一二十萬之多原參既非贓賄又與正案無關礙難深究至候補知縣李筠上年委修寶山塘工經撫臣札委蘇糧道陸鍾琦前往驗收所有各項工料丈尺查與估冊開數均屬相符工程亦尙堅固惟原造佑冊載明新椿緊貼舊椿概不鋸拔當時驗明舊椿多有鋸拔之處并經李筠家丁方升乘隙盜賣飭縣嚴行訊辦起出原價洋銀一百四十五元解局歸公李筠原領經費四萬三千九百兩據報節省銀二千一百餘兩由水利工程局復核准銷尙無浮冒其前辦盤門馬路工程時顧姓老婦持券呈局一案查無此項案卷原參李筠得財老婦愁死自係傳聞之誤馬路一覽樓本係官商合辦公園後設勸工所又改爲武備學堂由公家撥還商股檢查並無案據二十七年十一月發還勸工所

商股五千兩亦無股摺收條今蘧園李商業已病故詢問其子惟記與錢莊合股之每股百金伊處二股於撥還股本時曾收銀六十兩並稱伊父在時共出股本三四千金還股時所失甚鉅均係李筠經手此時股票已繳別無憑據原參謂其乾沒不盡無因其與臬署家丁王福交結事涉曖昧經傳王福到案飭訊據供與李筠素未識面從無往來所有切結似尙可信范守佑於同鄉同知鄭述祖病故之時曾在會館公款挪銀一百元經紀其喪後將衣物託其變價歸欠范守佑亦薄有資助尙不至於吞沒又原單內開臬司幕友張翰伯沈伯陶舞文勸法迭被控告一節查臬司向延幕友二人一爲周守赤浙江山陰人一爲張廷驥卽張翰伯蘇州府廩生皆係品行端正不與外人往來不聞有勸法受賄情事亦從無被控之案沈伯陶曾從張翰伯學幕現已出外就館久不

在署且現署臬司朱之榛習於吏事刑名尤所擅長一切文牘大半自行定稿幕友不過承指筆受而已原參所謂舞文飭法惟賄是求實屬毫無影響惟張廷驤究係省城生員辦理臬幕易招彈射已由署臬司辭退另聘俾遠嫌疑又原單內開本省教職投効每有不肖舉貢在內附貢生劉燮鈞出入官場交接幕友被控有案一節查劉燮鈞於光緒二十四年委署丹陽縣訓導年滿交卸訪諸輿論平日並無劣迹及出入官場交結幕友情事二十八年劉燮鈞在海門廳與監生張如峰等因開河雇夫撥夫互相爭執曾經委員往查該廳開河向係詳准雇夫永禁撥夫張如峰以撥夫便於營私有意阻撓劉燮鈞主議雇夫以工代賑係屬照案辦理並無不合業將張如峰監生斥革完案此外別無劉燮鈞被控之案原單又開候補知府胡玉瀛辦下游釐捐私放菸葉擡高洋

價所入甚鉅一節查該局所征菸葉有安徽江西各幫之不同向於冬令陸續到鎮江行棧存儲積至年終出運希冀年關免釐是以爲數甚鉅行商中以王幹臣蔣聘三兩人爲最黠勾通司役專事包攬其弊向在年終現在無可查究至該局所收洋元歷照市價每元擡高三四文多年如此并不始於胡玉瀛亦無百文之多原單又開長洲縣捕役王小廷在蠡口鎮訛索不遂槍斃民人二命知縣蘇品仁並不嚴究恆孚金店與元順典鋪口角涉訟該縣門丁需索訟息各費一節查光緒二十九年十一月據長洲縣稟報捕役王占魁因事互鬪誤斃鄉民顧金壽一案係委元和縣驗明被戮身死該縣蘇品仁以案關縣役詳由臬司批府提審訊係王占魁因事與施阿龍互鬪誤戮在場幫毆之顧金壽身死將王占魁擬以鬪殺絞罪取供後據報在監病故王小廷卽王占魁

并無槍斃二命之案又查二十九年九月恆孚金店程炳中稟有王金奎以灌鉛金飾假冒該店牌號前往兌換因有關聲名控請查究經該縣傳訊王金奎供稱此項金飾係伊父王錦高收得託元順典夥薛慎先向兌銀洋被看破剪開送案實係誤收並非偽造等語當傳王錦高薛慎先質訊尙未到案何能索取息費至原告理直氣壯更無向索呈費之事原單又開元和縣金元煊受縣紳潘靜宜賄囑嚴比佃戶阿巧竟以大板擊斃一節查光緒二十九年十一月據元和縣報有縣紳潘紹驢稟送頑佃徐德仙在押病故奉府札委長洲縣驗明委係欠租在押患病身死並無別故誠恐或有別案復飭現署元和縣郭曾程檢查金元煊任內並無潘靜宜稟送佃戶阿巧之案原參所指當是此案之譌原單又開蘇城盜案無獲吳縣李超瓊拏獲李桂棠被官兵奪回搶劫之多

由於營勇一節查唐家巷一案係在元和縣界內光緒二十九年七月有經絲帳房學徒張二官持洋二百元行至唐家巷被匪戳傷將洋搶去旋經該縣拏獲汪興隆白老三二名將動手傷人之汪興隆就地正法至濂溪坊大井巷均係長洲縣之案一係豫康錢莊店夥蔡耀生被匪搶去洋二百元一係候補通判戴祖詒家被竊首飾等物估贓一百五十餘兩迄今均未弋獲其黃鵬坊橋街恆和錢莊被劫一案曾由店夥陳榮弼等指獲李桂棠一名該縣李超瓊訊係飛划營勇丁並無贓證營官黃一桂等赴縣力求保釋經本任撫臣恩壽批俟緝獲正犯質訊辦理旋據該縣緝獲正犯五名訊明正法各犯並未供有李桂棠在內訊據店夥供稱李桂棠與已獲之俞理卿面貌相似是以誤認並非挾嫌誣指卽將李桂棠遞籍保釋黃一桂尙無帶人吶喝情事至小滑頭一名

係該縣棗市橋顧姓劫案正盜因拏獲張貴高孫鴻本二名到案訊係小滑頭爲首該犯常在侍其巷趙武弁家出入經該縣派差在武弁趙廷玉家查拏未獲嗣由黃一桂將小滑頭卽陳光裕緝獲送縣提同張貴高等質訊供認不諱分別正法審勘並無差提某弁抗不交人之事以上各條均經嚴密考查毫無隱飾除原參吳家正杜俞之縱勇通匪張廷驤之舞文翫法劉燮鈞之交通官場蘇品仁金元煊之縱容丁役杖斃佃戶均查明實無其事應請無庸置議張寶瓌緝捕不力惟案係接緝又在參限內離任胡玉瀛辦理釐捐雖於舊弊不能剷除尙無別項劣迹業經撤差應請從寬免議外向萬鏞平日居官雖有能聲然於張緯農賭博潛逃一案既不能覺察於前迨經查出同賭之人又不科以應得之罪惟以所失公款責令賠償以致省城之內籍沒財產追捕逃人騷

然不靖而騙銀者轉得置身事外辦理太欠允協且因竇介人繳
欸較多竟復改換案卷起滅自由是非互淆大乖公論應請

旨將廣東雷瓊道前任蘇州府知府向萬鏞交部議處前署奉賢
縣知縣傅鑫擅離職守因案科罰任內逃犯既多並未稟報追捕
辦理殊屬不合候補知縣李筠承辦海塘工程違章擅拔舊釘木
椿致被家丁盜賣經手商股又多含混至向萬鏞辦理賭案事屬
猥鄙該員出而干預尤屬不知自愛雖得差不盡由此而跡近酬
勞適足貽人口實前署長洲縣主簿周紹棠承指詐銀事同一律
以上三員應請

旨一併革職候補知縣范守佑雖無劣跡而干預向萬鏞查賭之
案亦有不合應請

旨以縣丞降補以肅官方至蘇省營務緝捕廢弛已非一日經

節次整頓現在稍知振奮仍當遇事稽考認真辦理地方盜竊各案并飭承緝各官勒限嚴緝屆期不獲照例參處下游釐局菸葉弊端已飭現在接辦之員到期查明究辦并飭令將從前擡高洋價之弊卽行革除俾維權務而做效尤所有查明蘇州參案及擬議各緣由理合恭摺據實覆陳伏祈

皇太后

皇上聖鑒訓示再此摺在蘇核辦未及定稿茲於江甯繕發合併聲明謹

奏

關道庫欸存息摺

光緒三十年十月

奏爲遵照部議將江海關道庫欸分別存息藉充公用恭摺會陳仰祈

聖鑒事竊查接管卷內准商部咨稱奏請將江海關道收欸變通生息一摺奉

旨著兩江總督江蘇巡撫督飭江海關道照數撥解商部欽此鈔錄原奏行令遵辦等因當經前督臣魏光燾轉行去後嗣據江海關道袁樹勛稟稱江海關所收常洋兩稅及藥釐船鈔等項月有待撥之欸時收時放存數無定其各省所解新增賠欸及各項洋債雖間有先期解存而逾期始行解到及延欠未解請部飭催者亦復不少原奏謂關稅項下有常年存款二百萬賠欸項下有逐月存款六百萬蓋係約略估算不能執爲定數且賠欸洋債皆關要需一經到期卽須提付若盡行存放設或提繳不能應時貽誤匪細必須酌留數成實存在庫以備緩急現經傳集錢業各商公同籌議僉謂上海銀息向有早晚兩市皆在錢行公定其日息大

都以每百兩二三釐爲多縱有時貨物暢銷現銀短絀利息因之驟漲然亦係偶然之事邇來輪電交馳消息便捷銀利稍昂則輦金立至此外常存之欸則視存期久暫爲衡關稅洋欸爲數既鉅又皆暫而不常部定行息各數較之市面銀拆懸殊領欸愈鉅賠息愈多勢難遵辦經該關道再三勸諭允凡發放之欸視其生意之大小聽其酌量領存不爲強抑一切收支存放由道編立印簿逐日登記另派熟諳商情之員並酌用司事常川駐署專心經理其與各莊號往來概照商市通例全憑經摺以爲根據每屆三個月將關稅及還欸賠欸按照部奏各分收數息數開具細冊造報一次各錢商初猶疑慮繼見所定辦法與平時商家往來無異始允將三月分以前關庫所存庫銀二百七十萬兩分作三月初一十五四月初一三期具領以後各省解到洋欸隨時發放酌照英

商滙豐日本正金兩銀行存放辦法以日期之久暫定利息之多寡而略有加增凡發存一年收繳者六釐行息存六個月者五釐行息存三個月以至兩個月一個月者皆四釐行息均按長年計算收款之時於四日前豫先知照卽於知照之日停息其發存不及一月者卽照銀市拆息辦法隨市情逐日核計又該關設有源通豐裕銀號係專管經收進出口稅項並無別項生理所收稅款隨收隨撥存數無多向於月底結算以收抵放有餘再行提存內庫今既變通生息擬令仍照向章每屆月底算明結存若干卽以下月朔爲起息之期亦按存期久暫分別計息與各錢莊一律辦理惟至少以三個月爲期其發存長年之款到期時或轉或還須先兩個月知照以示體恤分擬章程呈送核辦所有該關道衙門造冊應需薪工紙張等項經費卽照商部原奏准其由息款內提

出百分之五作爲津貼俾資辦公仍嚴飭經手司事人等不得私向商家需索絲毫使費以杜流弊並據該關道另稟自三月初一日開辦起遵照部覆以三成存庫其餘七成均已發莊儘數具領生息截至五月初一日止各莊號實共領存關稅洋欸庫平銀四百三十萬餘兩各等情稟經咨准商部核覆照辦在案前署督臣未及核辦留交前來臣等覆核無異所有江海關道庫欸變通生息緣由理合恭摺會陳伏乞

皇太后

皇上聖鑒敕部查照立案謹

奏

選派學生出洋摺

光緒三十年十月

奏爲選派學生分赴東西洋學習陸軍實業恭摺具陳仰祈

聖鑒事竊近年迭奉

諭旨飭派學生出洋遊學領有憑照回華考驗奏請獎勵准將遊學經費作正開銷仰見

聖謨廣運首以作育人才爲救時要策薄海同欽臣竊見日本前四十年貧弱過於中國維新以來首派學生分赴歐美各洲遊學歸而轉相傳授一切工藝製造之門徑無不通知因而精益求精或且自出新裁幾有出藍之譽至其陸軍水師進步之速則尤爲各國所稱羨卽今國勢日強而學生之萃處於英美各國學堂者未嘗少減其注重遊學如此邇者中國行省文武實業各項學堂均已次第興辦而規模粗具研究未精自非恪遵諭旨多派學生出洋不能網羅英雋宏濟艱難早有一日之經營卽早收一分之效驗斷未可置爲緩圖當飭蘇省各學堂挑選曾

習普通並已習外國文語之學生送赴學務處嚴加考試其有紳民自立學堂及曾在學堂已畢業諸生亦准其報名投考並由江甯京口駐防旗生擇尤選送凡得八十人以四十人送赴日本半習陸軍半習實業以十二人送赴德國十人送赴英國十人送赴法國八人送赴比國各令分習武學及農工製造路礦商務各項實業其應入何項學堂則咨商出使大臣分別酌定現已於本年十月二十日由甯起程赴滬放洋卽委江蘇補用道徐乃昌送赴東洋候選內閣中書饒智元送赴西洋各帶繙譯一人幫同照料並委饒智元充當留學生監督責令隨時約束學生督察課程稟報考核並於各生臨行時諄諄勗以熱心愛國刻志勵學務成偉器勿誤歧趨所有此次選派出洋學生八十人需用治裝川費及將來按年留學經費委員薪資合之爲數頗

鉅江南庫帑支絀本不易籌惟事關根本至計遵

旨籌辦要務不得不竭力挹注臣已督飭司道熟商擬卽在司局各庫移緩就急隨時撥付按年覈實報銷除將學生姓名履歷咨外務部練兵處商部戶部學務大臣各國出使大臣查照外理合恭摺具陳伏乞

皇太后

皇上聖鑒訓示謹

奏

江西鐵路經費摺

光緒三十年十月

奏爲江西省紳籌辦全省鐵路擬將引鹽加價撥充經費恭摺仰祈

聖鑒事竊據江西省紳士前署山東鹽運使候補道梅啟熙江蘇

山東鹽運使

奏

四下

候補道歐陽霖工部虞衡司員外郎程志和戶部主事鄧福初刑部郎中伍兆鰲戶部主事陶福祖前吏部主事陳三立翰林院編修黃大堦禮部主事劉景熙等呈稱近年各省鐵路利權列強皆思覬覦是宜早自籌謀豫爲地步現擬將江西全省鐵路統歸本省紳商通力合作自行承辦惟事體重大必須巨紳主持擬卽公舉在籍紳士前江甯布政使李有棻爲全省鐵路督辦懇請會奏等因又據前江甯布政使李有棻暨該紳等呈稱開辦江西鐵路首以南昌九江爲權輿以次擴充需費甚鉅除設法招股外必先籌常年專款方可及早開辦以冀速成茲查有食鹽一項爲全省人民日用所必需若援案加價每斤定以四文則每年可得二十餘萬兩所取無幾不至病民通省照辦亦無偏私之弊且現在各州縣興辦小學堂需款甚急若以所銷引數以加價多少作爲各

州縣公股每年所獲股息卽由各州縣承領以充學堂經費及地方善舉之用是取於民者仍還之於民尤爲一舉兩得公請會奏立案並將開辦章程議定呈請核辦前來臣等查今日各省路權關係兵政財政命脈果有地方紳士公同認辦則權力不爲外人所侵利益卽爲中國所擅亟應維持保護以觀其成該紳等公舉李有棻爲督辦前准商部咨稱業經江西全省京官在京遞具公呈由部奏請奉

旨允准在案此次所定章程亦尙周妥惟是事體重大必須先有常年專款方能陸續舉辦該紳等雖經分任股本而工費繁鉅事當圖始未必能十分踴躍又非有大宗的款不能先立基礎所請援案加價自係萬不得已之舉臣等查江西引鹽前因籌墊賠欸業經先後加價十文深恐私充官滯有礙引商疊經電商兩淮鹽

運司及江西督銷局體察情形互相斟酌茲據該司局覆稱雖同有滯銷之慮而以全省路權所在不得不勉從其請惟請於緝私一層力加整頓俾圖挽回臣再四籌思竊以鹽爲小民日食所需不以價之貴賤而增減卽岸引亦不因此而暢滯贛紳以本省願出之錢辦本省應辦之事似不能多存顧慮致遏衆心況各省加價不止一次亦不聞稍有阻礙卽或偶形滯銷將來鐵路告成貨物流轉其利益亦必十倍於此仍可徐圖抵補應請准於江西引鹽每斤加價四文另欸提存悉數撥充鐵路經費俾得無誤要工早圖實效以仰副

朝廷振興商務收回利權之至意至該紳等聲請所銷引數留作各州縣公股辦法是否可行業經飭由藩司核議詳覆另行酌辦除將開辦章程分咨外務部商部戶部查照外所有江西省紳籌

辦鐵路擬將引鹽加價撥充經費各緣由謹合詞恭摺具陳伏祈
皇太后

皇上聖鑒訓示謹

奏

學生學習水師片

光緒三十年十月

再近來時局危迫首宜精練陸軍而江南當江海要衝海軍之學
尤當注意江甯雖設有水師學堂而於風濤沙綫行船駕駛之法
均未親身閱歷非選派出洋游學不能切實研求近年出洋學生
習陸軍者頗不乏人習水師者則絕無而僅有現與英領事商允
由該國水師提督電稱中國水師學生准卽送交駐滬英國水師
總兵分派各船學習等語業於江寧水師學堂中挑選合格學生
六名前往學習暫以兩年爲限所有學費卽於通州紗廠官本利

端忠政公奏稿

卷四

四一

息項下分年籌給較之派赴出洋所省正復不少該學生等一經分派各船卽不啻身親其事又且近在海上一切易於約束當可望有成就以濟時艱除咨外務部練兵處查照外謹附片具陳伏祈

聖鑒謹

奏

學官宣付史館立傳摺

光緒三十年十月

奏爲已故學官學行可風懇

恩編入國史儒林傳以勵儒修恭摺仰祈

聖鑒事竊據江南高等學堂算學教習國子監算學助教崔朝慶句容縣教諭顧鴻闈等呈稱故處州府教授內閣中書銜黃以周浙江定海廳人同治庚午科舉人主講南菁書院有年產從百越

澤及三吳孝悌根於性成言行衷諸禮訓教人無倦授學不限方隅抱道自居傳經有功巽序從遊日衆嚮學彌堅光緒十四年浙江學臣瞿鴻禨稱其素履誠樸粹然儒者奏請獎勵蒙

賞內閣中書銜十六年浙江學臣潘衍桐復稱其研精覃思物疏道親奏蒙

特恩陞用教授其所著禮說略經說略二書已經前江蘇學臣王先謙刻入經解續編此外尙著有禮書通故軍禮司馬法考徵經訓比義子思子輯解等書皆能提要鉤元津逮後學查該教授之父黃式三已入

國史儒林列傳今該教授學行久達

宸聰紹述克承家學英才樂育著述等身念潛德之宜彰懼遺書之就失謹呈故教授所著禮書通故一百卷軍禮司馬法考徵二

卷經訓比義三卷子思子輯解七卷做季雜箸五種並開具事實清冊懇請具

奏前來臣查已故教授黃以周家承通德學有本原能讀父書補乾嘉諸儒所未逮克稱師表育東南多士以成材閱其遺書有關正學考其素履無間羣言列之儒林洵無媿色合無仰懇天恩俯准將已故教授黃以周編入國史儒林傳以存舊學而勵潛修出自

逾格鴻施除將該教授遺書並事實清冊咨送

國史館查照外理合恭摺具陳伏乞

皇太后

皇上聖鑒訓示謹

奏

駐防緩扣馬乾銀兩片

光緒三十年十月

再上年因江寧京口駐防旗民生計艱難議將萬頃湖牧場改爲屯田招佃認墾酌收租錢租穀分恤孤寡其開辦經費請由江寧藩司豫借光緒三十四年分全年官兵馬乾銀兩撥解應用仍由該司於三十一二三四等年分年扣還業經前任將軍信恪會同前署督臣張之洞等奏奉

硃批允准並據江寧藩司將該旗營應領光緒三十四年分全年官兵馬乾銀五萬一千二百三十二兩零先後籌撥在案計自開辦以來已歷年餘該處牧場荒廢太久又分隸當塗蕪湖兩縣轄境流氓佔墾界址不清此次設局清理勘驗丈量頗費時日而開溝洫挑塘堰築堤塍一切工作皆非急遽所能蒞事以故至今佃墾寥寥歲租固無所入卽押租一項亦繳收無多瞬交來年正月

卽屆扣還借款之期近來百物騰踊兵丁困苦異常若再將應領馬乾銀兩扣抵借項是欲爲他日規其利賴而目前轉無以給其饗殮殊非體恤兵艱之道合無仰懇

天恩俯准將前項馬乾銀兩暫緩核扣俟萬頃湖招墾成熟租欸收清再將司庫借款分起撥還以資周恤是否有當謹會同江寧將軍臣永附片具陳伏乞

聖鑒訓示謹

奏

開復被參教職摺

光緒三十年十月

奏爲教職被參士民臚舉聲名奏請昭雪懇

恩開復以順輿情恭摺會陳伏祈

聖鑒事竊淮安府安東縣教諭唐錫晉於光緒二十九年十二月

內經本任督臣魏光燾歸入甄別案內以不知檢束奏參革職該教諭去官之際卽據該縣紳耆數十人以其在任十六年於一切善舉如施藥濟貧恤廢育嬰等事皆竭力籌辦光緒二十二三年安東大水二十四五年早稻歉收該教諭均爲倡捐募振活人無算平日秉性謹嚴能得士心並無劣迹等情分赴督臣學臣衙門稟訴臣景崇按試淮安復據該縣士民聯名公請昭雪前來詳加查考實係衆口一詞無不稱頌該教諭之賢而深惜其去者當經咨會臣端方檢查原參之案該教諭係由上年稟揭前任安東縣知縣吳大照種種貪劣經本任督臣魏光燾委員查訪屬實將吳大照撤任奏參當時復據吳大照以該教諭佔住書院不得士心爲詞互相稟揭是以一併參革查該縣教官本無衙署借住書院已非一日近因議將書院改作學堂曾據該教諭稟經批准暫留

出見每乃考和
旁舍棲止以待建屋遷移是其居住書院曾經稟明有案與平空
佔據不同若謂其不得士心何以去官之日士民紛紛爲之稟剖
且查光緒二十四年漕督臣松椿奏保倡捐助振官紳該教諭唐
錫晉欽奉

上諭傳旨嘉獎二十四年舉行

計典並經前督撫臣以該教諭唐錫晉學粹才明士林向化列考
保薦奉准部復加一級候升在案是該教諭平日政聲才具均有
可觀一旦廢棄不特人才可惜且亦無以服士民之心臣等訪查
明確理合據實奏陳合無仰懇

天恩俯准將安東縣教諭唐錫晉原參革職之案開復並免繳捐
復銀兩仍行歸部銓選以彰公道出自逾格
鴻施是否有當謹合詞恭摺具

奏伏祈

皇太后

皇上聖鑒訓示謹

奏

省城設立初等小學片

光緒三十年十月

再初等小學爲養正始基東西各國均任爲國家之義務教育其政令凡兒童已及就學之年無故不入學者責其家長用使全國人民無不具有普通知識技能其馴至富強殆非無故臣在湖北時卽於武昌省城創設初等小學六十所風氣漸開百姓咸知就學之益比來江甯考察江甯上元兩縣官立公立之蒙小學堂寥寥無幾此時財政支絀縱未能遽圖普及而江甯省會之大亦當有小學數十處乃足以宏教育而植始基當飭司道籌議就省城

分爲東西南北四區每區設初等小學堂十所共四十所卽以舊日之地方公所寺觀擇其無礙衛生而光綫容積略合程度者改爲校舍無論旗漢回民均准一律入學不得少分畛域其常年經費每所不得過三百六十兩其開辦經費不得過三百兩業經藩司籌有的款以資應用所有開辦時酌度地址購置器具延訂教員招致學徒釐定規則監督課程均經遴派官紳分司其事刻日舉辦除咨學務大臣查照外理合附片具陳伏乞

聖鑒謹

奏

咨送師範生及教員片

光緒三十年十月

再各州縣設立小學堂往往因陋就簡不合程度其故皆由於師資乏人臣在江蘇先經電商本任督臣魏光燾擬於寧蘇各屬按

廳州縣咨送學生二人前往日本學習速成師範畢業回華仍分派該廳州縣充當教習當於蘇松常鎮太各屬選送學生六十八名又於京口江寧兩駐防選送旗生四名業於八月間咨送在案其寧屬各廳州縣現據學務處司道詳報亦經考選得師範生五十二名當因現派補用道徐乃昌護送學習陸軍實業各學生赴日之便派令一併督同赴滬放洋一面咨商出使日本大臣俟其到後妥爲照料送校肄業所需學費川資由各州縣分籌濟用爲數無多尙屬輕而易舉又前署督臣張之洞奏設三江師範學堂原定章程先於第一年舉辦練習教員之法俟一年後再行招考三省師範學生卽以練習之教員分科教授現在練習期滿考其程度尙未能遽底完全並經臣挑選二十一員一併咨送出洋俾令再加學習精益求精回華之日分任教員當更益臻美備所需

學費治裝川資卽由三江師範學堂經費內撥支所有咨送師範生及教員前赴日本學習緣由除分咨外務部戶部學務大臣查照外理合附片具陳伏乞

聖鑒訓示謹

奏

議裁官缺辦法摺

光緒三十年十月

奏爲遵

旨議裁官缺籌擬辦法恭摺具陳仰祈

聖鑒事竊准吏部咨光緒三十年五月二十七日奉

上諭朕欽奉

慈禧端佑康頤昭豫莊誠壽恭欽獻崇熙皇太后懿旨現在物力維艱自應力除冗濫前已迭降諭旨飭裁冗員浮費茲特嚴申誥

誠樹之風聲所有粵海關淮安關兩監督著卽行裁撤江寧蘇州兩織造同在一省著將江寧織造裁撤凡京外各項差缺有應行裁汰歸併者著部院堂官及各省督撫破除情面認真釐剔奏明裁併以節虛糜而昭核實等因欽此咨行到寧當經本任督臣魏光燾會同臣端方督飭寧蘇兩屬司道悉心核議前署督臣李興銳到任後又經往返諮商未及核辦留交前來臣等伏念

朝廷裁汰冗員之舉固以節省浮糜爲急而要當以綜覈名實爲歸蓋當設官之初本皆各有職守自吏治窳惰不能循名責實遂不免形爲冗散果使勤加考察則其中不少應辦之事卽其人亦不乏可用之材至於時異勢殊或有繁要之缺今忽變爲清簡或係荒僻之地今忽變爲要衝者則又人事地利與爲推遷不能不因時制宜量爲更易以求措置盡善者也查江安糧道員缺本以

督辦河運管轄屯衛爲專責自近年改辦轉漕停止河運本年又經戶部議定嗣後江北漕糧一律折解已無辦運之責衛所屯糧亦經裁歸各州縣清查徵收所事尤爲清簡查河南省即以鹽法道兼管糧務江寧現有鹽道似可援照裁併擬請

旨將江南糧儲道一缺卽行裁撤所有該糧道管轄之上江七府淮揚三府漕務一律併歸鹽法道兼管名爲江南鹽糧道一切事務均令按照舊章將所屬折徵漕糧認真督催存儲備撥卽或將來仍需酌辦河運亦可由鹽糧道督運北上其糧道庫大使一缺應並改隸鹽糧道管轄名爲道庫大使勿庸裁撤至糧道應領俸廉公費等項銀兩向由兩省藩庫分別動支現旣裁撤自應仍由該藩司扣存解部如蒙
允准現在

簡授江安糧儲道譚啓宇原係裁缺人員尙未抵任應懇
天恩遇有道員缺出另行補放俾免始終向隅此外各缺除府州
縣外所有佐雜教職各員缺分雖有繁簡優絀之殊出身則各有
就職考選之判仕途積壓已非一朝再事議裁不無窒礙均請一
律免予裁撤以廣

皇仁而固士氣至應行更置各缺臣等曾與司道籌商有必不能
不與時通變者如丹徒丹陽江都泰興四縣所轄之太平洲地方
孤峙江心互長百餘里距四縣所治均甚窳遠該處戶口繁庶所
有命盜詞訟須赴各該縣審理往返殊形跋涉且四面臨江匪徒
尤易竄匿亟須設官分治而蘇海防同知一缺駐紮常熟事務極
簡應將該同知改爲太平廳撫民同知移駐其地以資治理又查
吳縣所轄之洞庭西山與省城遠隔太湖該處居民甚夥應徵正

立止海刀... 雜錢糧均須渡湖來城完納風汛靡常往來不便每年由縣委角頭司巡檢代徵事權不屬呼應未能靈通至於命盜各案則向由太湖廳訊辦該廳駐紮東山與西山相距湖面數十里近年梟匪充斥出沒湖中該廳亦復兼顧難周鞭長莫及亦須添員分治而蘇管糧通判一缺自改海運以後閒冗無事應將該通判改爲靖湖廳撫民通判移駐治理又如青浦嘉定兩縣毗連之黃渡鎮地方五方雜處爲私梟光蛋鬻聚之處荆溪縣之梧桐山地方界連皖浙山岡叢雜最易藏奸均係緊要處所而青浦陽湖兩縣主簿與縣同城缺屬閒散應將青浦縣主簿移駐黃渡鎮陽湖縣主簿改隸荆溪縣移駐梧桐山以資彈壓一轉移間官無冗雜之嫌民得鎮撫之益似屬切要可行如蒙天恩俯准照辦所有各員廉俸品級相當自可照例支給毋庸更

張其移駐一切事宜容再督飭司道悉心經理務求周妥詳盡俾於地方有裨所有遵

旨議裁官缺籌擬辦法緣由除咨部查照外謹合詞恭摺覆陳伏

祈

皇太后

皇上聖鑒訓示謹

奏

代陳徐州設行省摺

光緒三十年十月

奏爲京員條陳江蘇徐州地方應設行省以資控禦恭摺代陳仰祈

聖鑒事竊據江蘇在籍紳士三品銜翰林院修撰張壽呈稱控淮海之襟喉兼戰守之形便殖原陸之物產富士馬之資材其地爲

古今主客所必爭者莫如江蘇之徐州今天下大勢英之兵艦梭織於長江德之鐵路午貫於山東謀蔽長江則勢力必擴而之北謀障山東則勢力必擴而之南南北之際以徐州爲中權平原千里俗儉而僿民強而無教盜劫亡命梟桀之徒大都以徐爲稱首近數十年復有會匪之勾結教士之浸灌設不早爲之計則禍發一隅牽動全局將欲因時制宜變散地爲要害非建徐州爲行省不可自昔東南用兵莫不由此以臨諸夏李泌陳無已蘇軾規畫江淮亦莫不注重徐州同治初年潘祖蔭請就徐州四界司設總兵兵備道凡江蘇安徽山東河南四省沿邊州縣悉歸管轄作爲重鎮顧當時之所爲患者失所無教之民今之大患則自外而內駸駸焉英將由長江而北規德將由濟南而南越各逞其強各均其勢得寸得尺而欲以一道數州縣之力一鎮之兵翼其相抵相

角必不能矣大抵建徐州爲行省約有二便海運大通鐵路卽達
輸輓不竭漕督可裁以之改爲徐州巡撫未盡事宜以巡撫兼之
原有之釐金協餉葦蕩所入以養標兵者一轉移間可資挹注升
徐州道爲布政司援鎮迪道加按察司銜例以別一道兼臬事增
官不必添員其便一也以輿圖分率準望約略計之析江蘇之徐
州海州安徽之泗州山東之沂州河南之歸德益以江蘇淮安之
安東桃源安徽鳳陽之宿州靈璧潁州之蒙城渦陽亳州山東兗
州之滕嶧濟寧之魚臺金鄉曹州之城武單縣凡四十四州縣民
氣雖不盡同較其大略皆樸嗇而勁悍苟就募萬人簡而練之作
爲游擊仿美制鄉村鎮堡練習民兵但使統馭得人比及三年可
幾有勇又河灘海墾荒地遼闊闢場牧馬可備戎需廣殖豐林足
資防禦其便二也因此二便更以訓農勸工通商三者爲地方要

政而以興學貫之庶幾標本兼圖緩急可恃等語臣察其所陳各條有關今日天下大勢未敢拘於私見不以上

聞是否

可採應請

旨飭下政務處核議以爲備禦外患之一助所有條陳徐州應請設行省緣由謹繕摺代陳伏祈

皇太后

皇上聖鑒訓示謹

奏

遵查嘉湖漕務積弊摺

光緒三十年十月

奏爲查明浙江嘉湖兩府漕務積弊情形據實覆陳恭摺仰祈

聖鑒事竊查接管卷內承准軍機大臣字寄光緒三十年八月初

一日奉

上諭有人奏浙江漕弊日深吏治日壞請旨飭查一摺著李興銳按照所指各節確查具奏毋稍徇隱原摺著鈔給閱看將此諭令知之欽此遵

旨寄信前來當經前署督臣李興銳札委江西候補知府曹樹藩前往密查臣抵任後復委江蘇候補道俞明震親赴嘉湖一帶確查情形茲據查明稟覆前來臣覆查原摺所陳漕弊五條如客荒一條調查嘉興秀水兩縣卷宗客墾荒田納租較輕比正糧每畝減收一百數十文其餘嘉湖所屬各縣大略相同嘉湖客荒征簿共載四萬五千二百四十餘畝內有主之田二萬三千六百七十餘畝早經歸入大糧報解無主者二萬一千五百七十餘畝向俱征存不解上年查提中飽該署縣瞿倬稟將前項無主客墾一律

改歸大糧報解秀水客荒征簿共載五萬四千二百十三畝零內有主之田一萬六千六百三十一畝零已歸大糧報解無主者三萬七千五百八十二畝零征存不解留抵應行支解各款嘉興原定額田八十七萬一千六百畝有零截至光緒二十九年分止僅報成熟田七十五萬四千畝秀水原定額田六十四萬四千六百九十畝零截至本年止僅報成熟田五十二萬四千四百六十畝零比較原額荒田均在十萬畝以外其餘嘉湖所屬各縣亦各有荒田十餘萬畝及二三十萬畝不等而湖州之長興一縣竟有荒田六十餘萬畝之多安吉一縣亦有五十萬畝爲數最鉅駭人聽聞兵燹之後生聚垂四十年未經墾復之地尙復如此其多則客墾之畝數必溢於所報之畝數可不問而知同治初年浙省曾設清賦局清賦而未清丈吏胥之窟穴其中者遂皆因緣爲奸雖地

方官亦無從洞悉近年藩司查擠荒田各縣往往虛報新墾名曰透報迨新墾起徵又復列入款緩搪塞率混大半有名無實此查明客荒之實在情形也又如例災一條查嘉興秀水兩縣上年報款案卷先由嘉興府委員會勘嘉興款收二分四釐八毫秀水款收二分九釐七毫稟送藩司復勘先後核實減定被款分數嘉興居十分中之八釐秀水居十分中之八釐五毫鈔單札飭該兩縣照造款區都莊圖甲頃數及緩征銀米科則各細冊送查乃該署知縣瞿倬何士循等並未遵飭復造事後亦未曉諭周知不特貽人譏評且足啟里胥以款作熟高下其手之心辦理殊屬草率至票釐之弊則查光緒十六年前浙江撫臣崧駿訪悉嘉湖各屬書吏玩法開列條款飭縣嚴禁內有減定串票一款每張只准向花戶收取錢九文爲造串紙工等項樽節支用此外不准多添分文

示諭在案後因歲修邑廟及地方善舉經費無出在減定申費之外每張加取四五文曾經稟定有案可稽並無增至二三十文與八九十文之事其斛口之弊則查嘉興府屬七縣漕斛弊端亦經前撫臣崧駿一律嚴禁現因日久弊生已將嘉興縣庫書趙幼雲姚寅卿等提省訊辦供有提袋抽斛等事定擬徒罪奏奉

諭旨依議趙幼雲等爲原參所指既經擬罪奏結斛口諸弊自能革除當無重征勒收把持漕務之理其櫃價之弊則前撫臣崧駿亦經議定每洋一元統照市價一律減算錢二十文牌示糧櫃照價算收不准再行減少遵行在案此次查案委員到郡之時正值嘉興開徵曾派人攜洋貌爲完戶赴櫃交納作價與櫃上牌示相符核之市價實止減算二十文與定章亦復脗合秀水係屬同城情形大略相等此外各縣亦訪無增收數十文之說以上各條均

經密訪鈎稽確實可據原參所指征收之弊三條或係遵照定章或已逮案訊結自可毋庸置議其例災一條則前署嘉興縣知縣瞿倬秀水縣知縣何士循辦理不無含混應請

旨將該兩員交部議處仍由浙江撫臣嚴飭各該地方官嗣後辦理秋款務須覈實詳報如經藩司本府查有不實卽行揭參以免相率效尤至於客荒一條則積弊相沿已非一日其中舛互糾結一時難以理清臣揆思其故蓋緣嘉湖兩屬蠶利素饒土著之民不暇用力於耕作以致全境田畝多由客墾實與他省漕務情形不同官旣樂其以熟作荒便於影射民亦樂其以租易糧稍得便宜客民冬去春來租皆一次完納官吏無催科之苦而有沾足之心年復一年久已積重難返此時卽有清剛之吏欲加清查亦恐無從著手惟是清丈雖不易行而改租歸糧自是一定辦法似應

酌設清查客墾局專查兩府客墾荒熟地畝坐落區處及每年呈繳客租細數以爲分期改歸大糧報解地步但求客租之著落不問新墾之有無或亦變通核實之一法倘能辦有頭緒則嘉湖兩屬荒田不下三四百萬畝除去荒歉實數糧賦所增何慮不得大宗鉅款應請

旨飭下浙江撫臣體察情形認真籌辦以祛積弊而裕度支所有查明浙省漕務積弊擬議各緣由理合恭摺具

奏伏祈

皇太后

皇上聖鑒訓示謹

奏

遵查秀水縣參案摺

光緒三十年十月

奏爲查明浙江秀水縣參案據實覆陳仰祈

聖鑒事竊查接管卷內承准軍機大臣字寄光緒三十年七月十三日奉

上諭有人奏浙江秀水縣城內有白晝搶劫戕殺事主該縣並不
上緊緝捕勒令改爲被竊希圖規避處分等語著李興銳確查具
奏毋稍徇隱原片著鈔給閱看將此諭令知之欽此遵

旨寄信前來經前署督臣李興銳札委江西候補知府曹樹藩前
往確查臣到任後又經委令江蘇候補道俞明震親赴浙省按款
查訪確情去後茲據稟覆前來臣覆查原參所指秀水縣城內酒
仙廟前白晝搶劫戕殺事主該縣並不擒拏反責事主勒令改爲
被竊一案查本年六月初四日有王店鎮航船幫夥張阿大攜帶
信洋往各家分送行至酒仙廟被人謀財殺死該縣壽椿於初次

勘驗後疑爲讎殺曾因事主抗辯暫行看管檢查全卷該縣通稟稿內敘述此案情形於盜殺讎殺語多含糊又有事主之弟及王店鎮紳失主等控府稟詞三件均有該縣欲諱盜爲讎逼令事主具結並將事主羈押扣留航船等語嗣後各失主赴縣呈報失單銀洋至三百餘元之多該縣自知辦理錯誤又經填發賞格會營通緝尙與有心諱盜始終隱飾者有間原參謂責打事主勒令改爲被竊並不會營緝捕未免言之過甚此等白晝通衢劫殺重案當時萬口喧傳斷難設詞隱諱該縣雖愚豈能以威脅從事嘉興府知府惠格於此案上控稟中未能嚴切批示且於該縣管押事主扣留航船種種謬誤之處亦未嚴加駁斥是以當時輿論不免譁然至浙江撫臣辦理此案批詞至爲嚴厲並經發電斥責派員會審一切均極認真實不至如原參所云去省雖近幾同聾瞶者

也現在府縣均經調任此案亦已獲犯惟供詞狡展尙難定爲真盜秀水縣知縣壽椿於城內白晝盜劫重案不能細心審勘轉將事主看管辦理實屬顛預應請

旨交部議處以示懲儆嘉興府知府惠格疏於考核並請交部查議至所獲之犯是否真盜應由浙江撫臣嚴飭該地方官上緊審訊分別辦理所有查明秀水縣城內盜案并擬議緣由謹恭摺縷陳伏祈

皇太后

皇上聖鑒訓示謹

奏

辦學滋事辦理情形摺

光緒三十年十一月

奏爲無錫金匱兩縣匪徒拆毀學堂米商抗捐罷市現經辦結謹

將辦理情形恭摺具陳仰祈

聖鑒事竊照前署無錫縣知縣陳詒署金匱縣知縣汪鳴鳳稟稱
無錫縣紳舉人楊模等創辦埃實東林學堂經費不敷欲就米商
原有商捐中抽撥濟用未允稟經江蘇學政臣唐景崇批飭嚴提
米商董事生員趙夔監生張錦釗到案趙夔等心懷不甘輒造謠
言謂各業亦須一律捐輸奸徒乘機播弄突於本年七月初二初
三等日聚衆罷市兩次焚燒楊模房屋並將埃實東林等學堂一
併拆毀經臣端方分別委員馳赴彈壓勸諭始於次日一律開市
旋委現署常州府知府許星璧現署陽湖縣知縣王念祖前往查
辦當經奏請將陳詒汪鳴鳳一併摘去頂戴勒令查拏匪犯賠修
學堂奉

硃批知道了欽此嗣據許星璧等會督無錫金匱兩縣勘明楊模

及其同居族人房屋共焚去大廳三間側屋二間樓房七間後偏平屋四間所有衣物器具搶毀無存估計約值庫平銀二萬餘兩埃實東林兩學堂及崇安寺蒙學堂門窗全被拆毀書器亦皆損失埃實學堂情形較重先後拏獲匪犯錢阿其岳子斌苗阿榮朱阿福曹寶大麻子阿全並應訊之丁殿臣陶彥君高隆生馮士生等解省發交蘇州府審辦至埃實東林兩學堂爲各學生講習之所不容延誤迭經催令賠修旋於九月間據陳詒汪鳴鳳稟報已將埃實東林兩學堂房屋賠修完竣並捐銀添置書籍器具等情卽經飭委許星璧等詳加查驗工程堅固書器齊全遂與紳士議訂章程於十月初一日開學所需開辦經費暫在該縣積穀生息項下借撥動用其無錫金匱兩縣米捐一項向分十釐以充善堂經費及橋工廟捐等項名雖各有專支實則中多浮冒現經許星

璧督同縣委剴切開導米商感悟痛悔前非允於廟捐內撥提二釐以充埃實東林等學堂常年經費並將橋工一釐撥歸學堂以還借墊之開辦經費均自本年九月十一日爲始按月分別繳呈又因楊模等被焚房屋衣物照律本應追賠事由米商抗捐而起該商等願籌銀洋二萬元賠償楊模所受虧損另捐洋二千元建造無錫金匱兩縣商辦學務公所並據聲稱該處市面以米業爲大宗此案一日不結人心一日不定卽商業一日不能復原籲請免究既往等語隨經批准照辦以恤商艱在案茲據蘇州府知府許祐身詳稱遵提該犯錢阿其等悉心研鞫據供本年六月無錫金匱兩縣紳首楊模因埃實東林學堂經費不足擬抽米釐未允稟經江蘇學政飭縣勒提米董生員趙夔監生張錦釗到案每年認捐洋一千元趙夔等心不甘服捏造謠言謂各業亦須一律捐

輸在逃之米商楊壽康尤根保起意罷市挾制邀允已獲之錢阿其岳子斌在逃之雷三大陳貴林劉瑤卿顧盤生朱阿金朱小雲共十人寫立名單脅令各米行一律罷市遂於七月初二日先赴公所會齊令將各行米斛挑入公所各持火把香火齊赴楊模家放火燒毀大廳三間側屋二間適遇無錫金匱兩縣前往彈壓恃衆擁鬧挾制出示免捐旋復至埃實東林兩學堂及崇安寺蒙學堂拆毀牆壁門窗等項圖籍器具多遭損失次日因知楊模住房未焚復聚衆赴楊模家放火焚毀樓房七間後偏平屋四間匪徒貧民麇至衣物器具搶毀無存陶彥君丁殿臣高隆生均各開設米行被脅罷市馮士生因往公所閒看經楊壽康令其照料茶水俱未同謀滋事維時朱阿福曹寶大麻子阿全與未獲之強頭阿順孫阿榮至楊模家探看因縣中所派巡勇王德勝持槍攔阻疑

楊姓保標之人扭住拷打致傷王德勝腦後髮際兩腿兩臂旋即釋放朱阿福曹寶大復隨同楊壽康至蒙學堂幫同毀拆苗阿榮於火起之後乘機搶得衣物兩箱嗣經事主查知反以空箱向其勒詐銀錢逞先滋鬧各等情分別按例議擬解由署按察使朱之榛審轉前來臣效曾提犯覆審無異臣等伏查東林埃實兩學堂本係縣紳勦辦經費不足自不能不由該紳就地籌捐果使紳商籌辦得宜原不至滋生事端釀成巨案乃因商民與紳士不協輒卽聚衆罷市打毀學堂並焚燒紳士房屋情節至重本年鎮江因籌辦警察罷市滋事未及半年復出此案若不嚴加懲創竊恐刁徒紛紛效尤不獨紳士興學之心因此退阻且於地方公事亦不免多所牽掣關繫大局殊非淺鮮此案錢阿其岳子斌聽從聚衆罷市打毀學堂焚燒房屋實屬愍不畏法應請依刁民假地方公

事強行出頭聚衆逼勒罷市尙無圍堂塞署並未毆官者爲從絞
監候例均擬絞監候秋後處決苗阿榮乘火搶物事後復向事主
勒詐兇鬧應比依兇惡棍徒無故擾害良人實在情兇勢惡者發
極邊足四千里安置例擬發極邊足四千里安置朱阿福曹寶大
麻子阿全拷打巡勇致傷多處雖已平復究屬橫蠻且朱阿福曹
寶大並有幫毀蒙學堂情事應比依兇惡棍徒擬軍例量減一等
擬杖一百徒三年惟查該犯等均係素不安分之徒一經解配勢
必中途脫逃仍回原籍擾害是有擬罪之名仍無懲辦之實應請
將苗阿榮改爲監禁十年朱阿福曹寶大麻子阿全各監禁五年
俾昭儆戒陶彥君丁殿臣高隆生被脅罷市應請依刁民聚衆罷
市被脅同行者杖一百例擬杖一百馮士生代楊壽康照料公所
茶水亦有不合應請酌照不應重律擬杖八十陶彥君係由文生

捐貢業已斥革免其折責仍追貢照咨銷丁殿臣高隆生馮士生分別折責發落學堂業據賠修米捐亦經照撥楊模燬失財產並據米商籌款賠償惟造謠釀禍之趙夔等起意滋事之楊壽康等現尙在逃應仍嚴飭查拏究辦其餘無干開釋未到免提省累署無錫縣知縣陳詒署金匱縣知縣汪鳴鳳雖事前辦理未能妥善而事後賠修學堂緝拏匪犯尙知奮勉惟首犯尙未弋獲例有應得處分應請

旨給還頂戴交部議處除迭具供招咨部外謹會同署理兩江總督臣周馥合詞恭摺具陳伏祈

皇太后

皇上聖鑒謹

奏

南菁書院改學堂片 光緒三十年十一月

再查江蘇學政向駐江陰縣治前學 臣黃體芳於縣境創設南菁書院實爲通省士子講肄經古之區英才多萃其中光緒二十四年

詔改書院爲學堂陞任學 臣瞿鴻禨

奏將南菁書院改爲高等學堂嗣前學 臣李殿林

奏明擬章試辦茲經現任學 臣唐景崇遵照上年

奏定章程詳加籌畫認真釐訂除總教習外增設監督添請理化

輿地英文體操諸分教於政科藝科或研求專門或補習普通學

臣唐景崇於堂內學制課程務求完備銳志圖成惟每年進款不滿一萬五千串所短經費甚鉅而講堂齋舍原就書院改設未盡合度亦尙無力擴充修改自應籌撥的款接濟俾學 臣唐景崇得

資展布藉以宏造真材臣等現飭於蘇州鼓鑄銅元盈餘項下自明年正月月起每月撥銀一千兩作為南菁高等學堂常年經費以資應用除咨戶部學務大臣查照外謹合詞附片具

奏伏祈

聖鑒謹

奏

保薦道員片

光緒三十年十一月

再查奏留江蘇補用道劉世珩才識開敏通知時務節經前督臣劉坤一署督臣鹿傳霖奏留江蘇委辦江南商務總局於長江各埠商情甚為熟悉光緒二十八年日本開勸業博覽會該員奉委前往考察時臣端方在署兩湖總督任內曾經加委該員總司江楚考察該會事宜該員於日本東京橫濱大坂谷埠查核商務貨

物及學校兵制工藝之事纖悉無遺並於會場購置鐵質木質機器回國後奏設江南工藝及實業學堂規模備具粲然可觀現充商部議員遇事考查胸有條理方今時艱孔亟佐理需才該員於商務既甚留心材智並堪錄用臣效曾亦復知之有素應如何量加擢用之處出自逾格

鴻慈謹合詞附片具陳伏祈

聖鑒訓示謹

奏

現辦擠荒新賦增收片

光緒三十年十一月

再查蘇省清查荒田前經臣端方將籌辦情形

奏明在案大抵以釐剔實荒擠查虛荒爲要領清理實荒頭緒繁雜必須按畝清丈繪圖造冊然非寬以時日悉心妥籌未易遽見

端方奏公奏高

卷四

六十一

功效至擠查虛荒隨地隨時均應考核總期無可隱混庶幾多查一分虛荒卽多徵一分熟糧當以署臬司候補道朱之榛於蘇省情形最爲熟悉辦事尤極認真飭令督辦農務總局清理田賦督同在局提調悉心鈎稽嚴查虛荒窮其究竟約有三端一曰附徵乃光緒二十五年查辦清賦案內應徵之熟田也本令一律啓徵旋據各縣以有戶無完有田無戶少則數千畝多則二三萬畝同請暫入附徵之列限於次年啟徵今又歷五年迭經藩司催報各縣畏難推宕附徵如故大率業戶書役侵蝕挪移其弊不一現經督飭入額啟徵不許業戶抗完並行責佃催徵卽將附徵名目永遠革除一曰冒荒乃相沿匿熟隱糧之病也其病以蘇州鎮江兩府屬爲甚次則常州之宜興荆溪兩縣而以松江太倉兩府縣爲少現分別確查果係新墾之區准照免糧三年之例再行升科其

本已成熟不准隱匿冒作新墾仍令啟徵一日例災乃以熟爲歉以輕爲重相沿之陋習也本年各屬收成大半有秋間有因地勢高下天時人事未能強齊不無小歉之區各屬於秋勘報歉時司局同加考核其請減徵二三釐者照准寬減其報歉分數較重者不許混請蠲免必須實查實辦務使澤可下究吏無中飽綜計此次查辦附徵之釐正冒荒之擠數例災之減報丁漕兩項較諸上屆約多徵銀二十萬餘兩該署司朱之榛綜覈精密怨讟不辭會同藩司認真稽考得使賦入有增實屬殫竭心力卓著成效臣等仍飭該署司一手經理俾得始終其事各州縣併經嚴切誥誡倘仍甘心弊混卽由司局據實糾參不得稍涉瞻徇以重正供而祛積弊除仍督飭查擠外所有現辦擠荒新賦增收緣由謹合詞附片具

奏伏祈

聖鑒謹

奏

現辦學堂情形摺

光緒三十年十一月

奏爲現辦蘇省學堂大概情形恭摺具陳仰祈

聖鑒事竊維東西各國之富強莫非發源於教育方今時勢艱難
民生日蹙風俗猥薄教案蜂起推原其故皆由人民無普通之智
識鮮謀生之技能是以初等教育萬不可緩至於各省待興之利
待舉之事不知凡幾舉凡教育實業武備諸大政皆有乏材之歎
不得已而借材於外經費既鉅駕馭尤難則高等教育尤不能不
兼籌並計比年疊奉

上諭舉辦學堂並由學務大臣妥定章程頒行各省仰見

聖主注重根本有加無已惟各省皆以經費難籌辦理不無窘手
臣等竊謂今日財政之艱窘實由民智之未開顧民智之開通當
謀教育之普及故經費雖支絀萬分而學堂究不能不辦收效雖
遠經費宜先臣端方自到蘇撫任後竊見三吳夙擅文物而士習
漸偷雖號殷庶而民生日促學堂建立尙屬無多若不急於圖維
勢且奮興無日是以與臣效曾竭力籌議數月以來略有端緒謹
將辦理情形爲我

皇太后

皇上陳之伏查現在興學第一苦乏教員故師範學堂最宜先辦
查奏定學堂章程每府須設初級師範學堂一所每省須設優級
師範學堂一所今限於經費先於蘇州省城設立兩級師範學堂
先招講習科生四十人速成科生一百二十人以濟目前興辦小

學堂之急需已於十月開學俟明年講習科卒業再招初級本科以培養小學堂完全之教員俟速成科卒業再設優級科以培養中學堂及初級師範學堂之教員更附設模範小學堂一所以爲初級師範學生練習教授之地以光祿寺署正羅振玉爲該堂監督該員明於教育管理之法若能假以事權始終經理將來必有成效可觀另於城中設立初級小學堂四十所暫選稍合用之教員迅速開辦將來卽以卒業生承其乏俟設立優級科後再以蘇州府中學堂附屬該堂以爲優級師範生練習之地如此辦理庶將來教員不至缺乏免致借材外國此設立省城師範學堂及初級小學之大概情形也至於蘇州原有中西學堂現已改爲高等學堂但學生程度與中學堂等學科亦未完備名雖高等其實難副只得暫分爲豫備科及本科兩級俟豫備科卒業乃入本科添

聘教員置備儀器務令學科完全俾得備京師大學堂學生之選其蘇州府中學堂並增添學科推廣額數由蘇州府認真經理此又業經擴充高等學堂及中學堂之大略情形也若武備學堂本爲今日最急之務蘇州舊有之學堂學科程度甚淺額亦甚少現在必須遵照練兵處奏定新章悉力整頓增廣學額方能望其材武日出以赴今日之急他若實業學堂則以蘇州工業素優農力亦頗勤勉惟不免狃於舊習不知進步現雖設有農務工藝兩局然非施以完全教育成效終不可期擬設實業學堂一所分農工兩科此舉於

國家本計民生職業地方財賦關係甚大匪可緩圖卽當擇地建堂迅速舉辦此又現擬推廣之武備學堂及工藝學堂之大略情形也此外如蘇州屬之京口駐防人口日增生計日窘去歲該副

都統設立中學堂一所其措拄艱難深可嘉許而規模狹隘尙待擴充秋間由臣端方派員前往監察學務兼理旗民生計擬推廣舊有之中學堂兼增設實業學堂及蒙小學堂俾教育一事滿漢不致偏枯旗民均可普及其省外之松常鎮太各府州之學堂或因經費不足辦理無人並當設法仗助敦迫開辦此又兼籌京口駐防及外府各學堂之大略情形也又教科各書急須編譯現在正在招聘通才擇要輯錄惟是諸務並舉需費較多臣等再四商籌惟有就銅元贏餘極力撙節撥出定款以爲興辦之用庶上不蠹國而國家得有用之人才下不病民而民間增無形之生計惟近來銅價日昂加以各省鼓鑄日廣銅元利息亦必日薄所冀風氣日開再行勸導民間俾自行興辦初等小學則帑項或可漸紓卽教育亦得以徧及臣等上承

德意下際時艱惟日孜孜如恐不及又念要政固當舉辦正款不宜虛糜是以_臣端方於到任之初卽首以推廣銅元爲事現幸稍有眉目有款可籌嗣後似不難加意講求俾臻完善所有籌辦蘇省學堂情形謹合詞恭摺具陳伏祈

皇太后

皇上聖鑒謹

奏

裁併各營籌辦情形摺

光緒三十年十一月

奏爲裁併蘇省續備各營改練步隊一協更定營制餉章先將籌議情形恭摺具陳仰祈

聖鑒事竊查蘇省防練各軍前奉

諭旨釐別各省防勇業經分別裁改所有蘇防五營親兵一營均

作爲續備軍嗣因松滬一帶防務喫緊上海原駐三營不敷分布擬照湘軍營制添募兩營屯紮浦東以顧吳淞後路均經前督撫臣先後

奏明在案臣端方到任時因奏添兩營尙未招募卽派委員分赴江北一帶按格募足兩營來蘇作爲常備軍就近訓練嗣奉練兵處

奏定陸軍章程卽飭一律遵照新章訓練惟思立軍之道必使餉章畫一營制整齊通省各營聯成一氣彼此無厚薄之分教練始能一律今蘇轄五屬所練新軍僅此常備兩營已形單薄而所改續備六營除親兵一營操法尙好餘則雖改新名仍沿舊制餉章營制各有不齊官弁兵丁皆當釐剔非量加更定難望振興擬卽將此續備六營嚴加挑選計汰弱留強僅敷新軍四營之數應卽

遵照新章改練常備四營合之先練二營共計六營分爲二標合
成步隊一協非能教操者不許充將非能識字者不許充兵平時
擇要分防臨事居中調遣庶幾有指臂相聯之效至續備親兵一
營業經裁併另選教練隊百人作爲巡撫衛隊以資模範惟欲力
除舊習必須恪守新章而新章所頒營制有蘇省成材尙少宜暫
虛以待其人者所列餉章有一時程度尙低宜酌減以勸其後者
事關軍政固不便徒惜小費亦不敢稍涉虛糜因地制宜非酌量
變通不可查新章陸軍營制統領轄一協統帶轄一標管帶轄一
營惟協統非資望較優講求兵學者不堪勝任蘇省尙乏其人應
俟改練成軍後再行酌委至每標統帶應擇才具諳練能教操者
分別任用各營管帶均擇學堂出身曾習武備者慎加選派至每
協設有參軍官一員每標設有教練官一員副軍需軍械軍醫馬

醫官各一員每營設有軍醫長一員蘇省尙無勝任之人應皆暫虛其職俟將來出洋陸軍學生卒業回國有能及格者再行添置每營又有醫兵四名應俟有事時添補駕車兵四名喂養夫四名南方不利行車應卽一併裁去餘則均照新章辦理此營制之宜酌量變通者也新章發餉皆計銀數而蘇省向用洋元若仍照舊用銀則放餉之員難保無折扣平色之弊而兵丁以銀易洋仍受虧折今皆酌定洋數而按時價銀數合計除去畸零比較練兵處所定餉章稍加裁減蓋新軍初練自官弁以至目兵皆尙不敷優等資格此時薪餉過優未免轉增驕氣若將來果成勁旅再行議加既可鼓勵軍心亦不虛糜餉項此餉章之宜酌量變通者也然而練兵尙易選將爲難將領稍不得人辦理必無成效是則培植將材尤爲第一要義至於新軍薪餉優於舊營卽以所裁之餉加

給新練之軍不敷尙鉅計續備軍五營每營每關支銀二千一百九十六兩二錢續備親兵一營每關支銀二千二百一十七兩二錢合計六營每關共支銀一萬三千一百九十八兩二錢改練新軍每營月支洋五千零二十六元二角六營月共支洋三萬零一百五十七元二角加以協標所屬官弁薪餉等項每月共支洋三千三百四十六元三角又加以教練隊百名計管帶一員月支薪水公費洋一百六十元正目十名每名月支洋八元正兵九十名每名月支洋六元五角統共支洋八百二十五元合計步隊一協衛隊百名每月共支洋三萬四千三百二十八元五角洋價時有漲落姑以每元合銀七錢計算約合銀二萬四千二十九兩零除先練常備二營月支洋一萬零五十二元四角約合銀七千三十六兩零先已另籌外計需餉銀一萬六千九百九十三兩零除已

裁併續備六營原餉作抵每月計短銀三千七百九十五兩零每年無閏計短銀四萬五千五百四十兩零此外尙有添置軍裝衣履雜支活款常年所需甚鉅應由蘇省銅元餘利項下籌補惟新軍以訓練爲主若兼顧防務則操練必難認真而所擬裁併之續備六營除親兵營及續備中營駐紮省城外其四營分駐震澤宜興黃渡楓橋等處若遽行撤回無可填紮防汛未免空虛伏查蘇省素稱澤國利用水師自太湖水師六營於光緒二十八年改爲巡警軍又有飛划蘇捕水師各營相輔水路足資震懾而提標所轄太湖左右兩營雖額設副將都司等官亦有舵工槳手什長正兵等名目實則船皆朽壞兵多缺額虛支薪餉形同贅疣若將此兩營一併裁去卽以所節之餉改練巡警陸軍兩營不敷之餉仍由銅元項下籌補合之蘇省原有巡警兩營共計巡警軍四營分

紮各處則此新軍兩標卽可以一標駐紮省城以一標駐紮省外
專心訓練庶幾操練分防兩無貽誤如蒙

俞允卽由臣效曾咨商督臣提臣妥議另案奏明辦理臣端方於

拜摺後卽於十二月初一日遵

旨赴湘所有裁併事宜不及一手料理先將更定步隊一協營制

餉章繕具清單恭呈

御覽其餘一切事宜應由臣效曾督飭接辦俟改練成軍再行詳

細奏報除分咨政務處練兵處戶部兵部查照外所有籌議裁併

舊營改練新軍緣由理合會同署兩江總督臣周馥合詞具奏伏

乞

皇太后

皇上聖鑒訓示謹

奏

懲辦梟犯保獎員弁摺

光緒三十年十一月

奏爲拏獲著名梟匪首夥各犯審明懲辦並將出力文武員弁擇尤保獎恭摺仰祈

聖鑒事竊近年蘇省各屬地方梟匪充斥日以聚賭勒贖搶劫典當爲事甚且連檣列械拒敵官軍梟匪頭目以高東山吳海鳳爲渠魁私蓄洋槍多件犯案纍纍各營捕務廢弛間有兵與匪通情事黨與廣布隱患方長臣端方於本年夏間抵蘇查悉前情迭經撤換管帶訓斥營弁責以拏匪自效一面選派長於緝捕文武員弁分途合力查拏惟整頓之方非有重賞嚴罰與爲勸懲難期遠收實效當經

奏明如查有通匪營弁請以軍法從事若果能捕獲著名匪目卽

將出力員弁核實酌保數員以示鼓勵欽奉
硃批知道了欽此數月以來各員弁咸知愧奮實力查拏先後緝
獲匪首吳海鳳瞎子阿榮卽劉阿榮匪目王松林及高東山之夥
黨楊幅憊等十二名起獲匪船槍械等項解經臣端方督同臬司
蘇州府審明吳海鳳劉阿榮王松林楊幅憊殷得勝閻得山陳道
安張開發曹廷雲吳幗倍馬得勝吳雲發等均各聚衆販私持械
搶劫或首先起意隨同上盜或行劫多次或拒捕殺人俱屬兇暴
昭著隨卽批飭就地懲辦湯王金閻世臣僅止在船看守並未同
劫情罪較輕擬以永遠監禁王得化願充眼綫發交營弁押令陋
緝去後惟匪首高東山夥黨衆多蹤跡詭祕湖北江西及甯蘇等
處地方皆有該匪巢穴迭飭嚴拏迄難弋獲臣端方諭知該匪一
日不擒梟患一日不戢又復切飭各該員弁多帶眼綫由武昌九

江安徽江北等處節節跟蹤追捕高東山聞拏嚴緊竄回上海租界藏匿該員弁等查探得實稟經飛飭江海關道照會領事簽字會拏高東山開槍拒捕勢甚兇悍已革副將歐陽成祥奮不顧身首先撲捕各弁勇繼之將高東山及夥黨汪潤卿趙滌芝萬先芝拏獲奪獲快槍起出賊衣數箱一併解省復經臣端方督飭臬司蘇州府提犯研鞫據高東山卽高崑山又卽高老六供稱光緒二十六年曾入富有票會充當頭目事敗逃竄近年聚衆販私並迭次持械夥劫川沙廳同豫典太湖廳源源典元和縣善昌典婁縣仁泰典新陽縣公和典宜興縣復濟典丹陽縣潤源典南匯縣同源典先後得賊並有拒捕殺人之案此外搶劫次數夥犯名姓記憶不清等語並據汪潤卿趙滌芝供認隨同高東山販私行劫不諱檢查各屬詳報案卷相符遂飭將高東山汪潤卿趙滌芝照章

就地正法傳首犯事地方懸杆示衆萬先芝一犯係高東山妻弟本非善類惟相從日淺尙無同刦情事從寬貸其一死擬以永遠監禁先後起獲各賊分別給領充賞槍枝存庫配用臣等伏查該匪高東山本係富有票會頭目通誅多年近復聚衆販私并搶刦典當居民多至三四十起其徒黨之衆稔惡之多與本年春間拏獲正法之曾幟漳正復相埒吳海鳳劉阿榮等販私行刦恣行不法俱係著名匪目亦屬罪不容誅去年蘇省搶刦典當之案據各州縣報案者不下三十餘起匪盜之盛爲從來所無若不亟加搜捕勢且日以蔓延釀爲巨患茲經將該匪等拏獲懲辦本年盜風漸息商民賴以粗安裨益地方良非淺鮮所有在事出力文武員弁捐資購綫躡緝至數千里之遠奮勇冒險倍極辛勞迥非拏獲尋常盜匪可比亟應加以獎敘以策將來謹擇尤繕具清單恭呈

御覽合無仰懇

天恩俯准給獎用昭激勸出自逾格

鴻慈其餘文武員弁應由臣等分別給予外獎除將各員弁履歷

咨部外謹會同署理兩江總督臣周馥恭摺合詞具陳伏祈

皇太后

皇上聖鑒謹

奏

開辦初等小學片

光緒三十年十一月

再蘇省號稱人才淵藪而各項學堂迄未能認真舉辦臣端方嚴飭各屬竭力振興又因教員一時猝難多獲其選故就蘇州省城亟設師範學堂以爲成就教員之地更益以游學外洋各生畢業回國分布各府州縣庶教育之事可期得人臣等深惟強國之要

必智其民然欲盡智其民必先盡普其學是設立蒙小學校尤爲今日第一要義此次臣端方在兩江署任內於江甯省城分設初等小學四十所籌定常年經費並遴派綜理之人實力興辦蘇省前亦議有端倪尙未舉辦茲臣端方回蘇與臣效曾商定仍照前議卽在省城分設初等小學四十所與江甯辦法相同其經費由司籌給督同官紳剋期趕緊開辦並由臣等將前訂之編制管理各規條斟酌頒示以資遵守學科一切仍照

奏定新章不准稍涉歧異庶廣作育而端始基此後如有未盡事宜當由臣效曾接續辦理謹合詞附片陳明伏乞

聖鑒謹

奏

京口駐防興學練兵片

光緒三十年十一月

再臣端方前在署兩江總督任內查考江甯駐防旗營學務營務皆因欸項不充遂致規模不備當由江甯蘇州兩銅元局每年各撥銀六千兩以資協濟曾經附片陳明在案茲查京口駐防其支絀情形較江甯爲尤甚非不知興學練兵爲當今要務而經費無出餉項難籌苟且補苴辦如不辦臣等竊謂時局日艱非廣植人才無與爲治况駐防生齒日繁生計日絀不爲之講明教育人才將有缺乏之虞近年

明詔屢頒飭各直省興學練兵亟圖自強之計各省雖辦法不同而學堂率已經營新軍半皆改練究以各該督撫就地設籌尙易爲力惟駐防旗營囿於一隅限於經費即使不甘簡陋豈能無米爲炊是欲望其振興必稍裕其財力查京口駐防與江甯事同一律而江甯於此次撥款之先尙有藩庫每月撥銀二千兩錢一千

二百餘串京口則並此無之殊覺相形見絀現與司道籌商在蘇州銅元局餘利項下每季撥銀八千兩以六千兩專爲擴充學堂之用以二千兩專爲津貼續備軍之用即自明年正月照數撥給其學堂課程規則業由臣端方爲之釐定並派明習學務之員會同該營協佐妥爲經理其新軍教練事宜應由副都統奇克伸布遵照練兵處新章認真整頓庶於駐防旗營學務營務不無有裨除咨政務處學務大臣練兵處戶部查照外謹合詞附片具陳伏乞

聖鑒謹

奏

臚舉道員勤績片

光緒三十年十一月

再現署江蘇按察使候補道朱之榛志量閎遠處事精詳少從梅

曾亮魯一同問學通習經世之務服官最早在蘇三十餘年曾爲會國藩沈葆楨所知九署按察使於地方民情極爲熟悉官書文牘從不假手幕僚皆能洞中窾要屬僚畏憚不敢稍涉欺蔽管牙釐總局多年深知利弊尤善綜覈蘇省漕務積弊最深最久巨紳蠹胥盤踞把持不可窮詰光緒二十五年前撫臣德壽辦理清賦事事皆諮之以行爲

國家歲增正供六十餘萬得該員之力居多臣到任後遇有地方事務偶相諮詢該員無不徹前徹後言之中理議論深切悉可見諸施行本年商部奏請各省分派議員臣卽以該員咨充現在蘇省辦理擠荒臣又因該員於各州縣情形洞察無遺責其盡心擘畫約計增收成數可得二十餘萬任勞任怨論者或謂其辦事精刻該員不爲之動實爲各臣省道員中不可多得之員該員屢膺

保薦屢蒙

恩交卑機處記名前督臣曾國藩於屬僚慎所獎許該員受其識拔逾三十年同時被知者今已向盡惟該員孑然尙存迄未補授一缺俾展其蘊未免人才可惜用特臚舉該員勤績可否仰懇天恩量加擢用出自逾格鴻慈謹附片具陳伏祈

聖鑒訓示謹

奏

上 凡 每 乃 考 和 卷 四

十一三

端忠敏公奏稿卷四終

端忠敏公奏稿卷五

湖南巡撫到任摺 光緒三十一年正月

奏爲恭報臣到任日期叩謝

天恩仰祈

聖鑒事竊臣於光緒三十年十一月初八日欽奉

諭旨調補湖南巡撫當經具摺恭謝

天恩十二月初一日自蘇起程泝江而上與署兩江總督周馥湖
廣總督張之洞就商防務於三十一年正月初二日行抵長沙省
城初六日准前署撫臣陸元鼎委代理長沙府知府姜鍾琇署撫
標中軍參將王榮勝將湖南巡撫關防一顆
王命旗牌文卷賫送前來遵卽恭設香案望

闕叩頭祇領任事查湘省地界粵邊防守極關重要近值長沙開

埠界務正待磋商粵漢路工舊約尙須爭執至於練兵興學開礦鑄幣諸政尤應次第經營力求進步如臣禱昧深懼弗勝惟有殫竭愚誠悉心經理冀答

高厚鴻慈於萬一所有臣感激下忱並到任日期理合繕摺叩謝天恩伏祈

皇太后

皇上聖鑒謹

奏

謝 賞福壽字等件摺 光緒三十一年正月

奏爲叩謝

天恩仰祈

聖鑒事竊臣於光緒三十一年正月十四日賫摺差弁回湘奉到

慈賞福壽字各一方大緞四疋貂皮八張同日復奉到

恩賞福字一方當卽恭設香案望

闕叩頭祇領伏念臣猥以輕材渥承

寵寄愧涓埃之未報值歲月之更新方殷向日之忱忽荷自

天之錫依

福林而受祐

奎璧聯輝託

壽寓以騰歡

星雲糾縵重以絲絃入詠傳晏粲於三英貂珥流暉衍清華於七

葉凡此非常之

寵賚實爲逾分之光榮臣惟有勉竭愚誠仰酬

高厚祝

璇宮之蕃慶游

康衢而圖備陳箕宣

朶殿之

湛恩慰蔀屋而感深挾纊所有臣感激榮幸下忱謹恭摺具

奏叩謝

天恩伏乞

皇太后

皇上聖鑒謹

奏

調補省會知府摺

光緒三十一年正月

奏爲遵

旨揀員調補省會要缺知府恭摺仰祈

聖鑒事竊查光緒三十年十二月初九日准吏部咨十一月初十日奉

上諭湖南長沙府知府員缺緊要著該撫於通省知府內揀員調補所遺員缺著清泰補授欽此查定例省會知府缺出應請旨簡放如奉

旨於通省知府內揀員調補應擇其人地相宜者無論缺項是否相同及歷俸已未滿年限俱准調補又首府首縣缺出於通省正途人員內揀選調補各等因今湖南長沙府知府係省會首郡衝繁難兼三要缺管轄十二州縣地方遼闊政務殷繁且時有發審案件現值伏莽未靖籌辦巡警事宜尤關緊要非精明幹練之員不足以資治理茲於通省正途知府內逐加遴選查有辰州府知府劉若曾年四十四歲直隸鹽山縣附生光緒乙酉科舉人已丑

科進士

殿試二甲

朝考一等改翰林院庶吉士散館授職編修二十八年十月十七日奉

上諭湖南辰州府知府員缺著劉若曾補授欽此領憑起程二十九
年三月二十五日到省四月二十五日到任三十年十一月二十五日奉

上諭著傳旨嘉獎查該員性情淑均治行卓著以之調補長沙府知府洵屬人地相宜由藩臬兩司會詳請奏前來相應奏懇天恩俯念省會首郡知府員缺緊要准以辰州府知府劉若曾調補長沙府知府俾資治理如蒙

俞允該員係現任知府請調知府銜缺相當毋庸送部引

見所遺辰州府知府缺欽遵

諭旨以清泰補授再該員劉若曾係初次請調照例毋庸覈計參罰合併陳明除咨吏部外謹會同湖廣總督臣張之洞恭摺具奏伏乞

皇太后

皇上聖鑒謹

奏

調員辦理營務摺

光緒三十一年三月

再湖南省陸軍因各將領於新操素未講求教練多不合法經兵部左侍郎臣鐵良於查閱各省營伍摺內彙案奏明奉

旨飭令按照練兵處章程悉心教練以期養成勁旅等因欽此查練習新操必須慎選將領上年臣在署理江蘇巡撫任內因蘇省

端而巨改入公卷高

卷二

營務廢弛奏調湖北補用參將姚廣順赴蘇差遣欽奉

諭旨允准迨姚廣順將在鄂經手各事料理清楚未及赴蘇值臣

已奉

旨調任湘省因思該參將本係湖廣督標候補人員而湖南又係

湖廣總督兼轄省分現在教練新操需才甚亟當即調令來湘辦

理營務期收實效又湖北遊學日本畢業生舒清阿志識遠大於

兵學研求有素亦與督臣張之洞商明飭令來湘差遣除分咨練

兵處兵部外謹附片奏

聞伏乞

聖鑒謹

奏

湘省邊防安謐摺
光緒三十一年三月

奏爲湘省援桂一軍疊獲渠魁卓著勤績并近日邊防安謐情形
恭摺具陳仰祈

聖鑒事竊查湘省防務自上年派軍援桂相機進勦疊得勝仗並
將西南兩路增兵置防各情經前署撫臣陸元鼎先後奏報在案
臣到任後正值援桂統領忠字全旂署江南狼山鎮總兵黃忠浩
一軍勦辦得手之際又經臣馳電慰勞節據該總兵報稱帶隊親
至融縣羅城一帶搜捕餘匪於四堡地方獲匪首梁日忠及叛弁
覃元章梁福源等並用火攻燒斃巨匪梁萬順卽梁濫六實爲匪
中巨魁前後共獲首要四十餘名擊斃三十餘名窮蹙出降者亦
三十餘名又於三防地方拏獲積匪劉子洪韋昌傑等二十五名
山崗匿匪搜取無遺并令匪徒繳呈槍械許其投誠所得槍械筆
碼甚多融縣懷遠等屬游匪已盡可冀肅清該軍自上年五月赴

援艱苦備嘗感受瘴癘病亡相踵而桂省客軍則以該軍爲冠岑
春煊亟稱其士氣奮厲是以立功甚多此援桂一軍搜捕餘匪漸
次肅清之實在情形也至於湘省邊防則自黔邊竄匪勦禦得宜
之後西路安堵如常現據辰沅永靖道莊賡良稟稱黔邊業已靖
謐正擬將前次調往防堵各軍分別調回並酌留數百人扼要駐
紮以資援應南路則張慶雲一軍遵

旨仍紮全州并經奏明飭令兼統江南常備右軍而以杜俞爲幫
統督帶中營該軍換統之時經臣遴委前廣西候補道沈世培前
往該軍體察情形妥商布置茲據該員與張慶雲等會商擬定辦
法又經臣電商湖廣總督臣張之洞署兩江總督臣周馥斟酌覈
定意見相同飭令照辦蓋因南路以永明縣之龍虎關桃川墟江
華縣之白芷營葫蘆口最爲險隘現祇健字旂兩哨分駐實形單

薄而永州府城則有常備軍四營并健字第七旂兵力又嫌稍厚
卽將常備軍酌留兩營駐防永州抽出兩營分駐龍虎關桃川墟
白芷營葫蘆口等處扼要駐紮歸杜俞駐永督率嚴堵粵匪由平
樂一帶竄湘之路其健字旂原駐兩哨卽行調回本旂並將健字
第七旂調回與第二旂同紮黃沙河歸張慶雲駐全督率以當粵
匪由桂林全州竄湘之路各專責成互相策應張慶雲身爲兼統
并令兼顧兩路勤加會哨徐圖整頓以成勁旅現在將領輯和軍
心亦稱安戢至劉光才一軍則仍分駐城步新甯等處俾爲聲援
嗣後桂匪漸清當不虞其竄擾足以仰慰
宸廑仍由臣分飭防勦各軍不得以匪事甫有端倪稍萌疏懈其
餘未盡各事隨時再與黔桂各督撫臣會商妥辦統計湘省此次
籌辦邊防援桂黔士卒均能異常出力一年之中疊著成效其

立見海之... 卷三
平時守禦各軍亦復殫心竭慮使地方得以相安皆有成勞可紀
一俟桂省軍事略定應懇

天恩容臣將在事出力各員弁奏請獎敘以昭激勸所有湘省援
桂一軍疊獲渠魁卓著勤績并現在布置各軍邊防安謐各緣由
理合據實臚陳伏祈

皇太后

皇上聖鑒謹

奏

代遞在籍大員遺奏摺 光緒三十一年三月

奏爲在籍大員因病身故代遞遺摺恭摺仰祈

聖鑒事竊據太子少保原任兩廣總督譚鍾麟家屬稟報該故督
前於光緒二十五年十一月在兩廣總督任內奉

旨來京

陸見并因病奏請開缺在先

賞假兩月二十六年假滿北上又經籲懇開缺奉

旨留京當差嗣因舊病復發請假回籍就醫迄未痊愈茲於光緒三十一年三月十二日因病在籍身故遺摺一扣并由該家屬呈請代

奏前來臣伏查該故督臣譚鍾麟本以翰林受

三朝知遇之

恩改官御史外放知府洊任疆圻服官四十餘年宅心中正蒞事推誠官御史時遇事敢言多所論列外任浙江知府旋授河南按察使陝西布政使陝西巡撫調補浙江巡撫所在整飭吏治勤卹民依以實心行實政當在陝西時關輔初定庫積空虛而邊事未

靖軍需尤急譚鍾麟剔蠹理紛鉤稽出入期年而軍府饒裕官民賴之及在巡撫任內積存司庫銀六十萬又令州縣辦積穀逾數百萬石其後陝省大饑卽出穀賑貸不足以存銀買穀繼之是時晉豫鄰省皆赤地千里陝西雖饑獨無流離之患臣官陝時民間父老述其遺愛猶爲稱道不衰旋由浙江巡撫升授陝甘總督因目疾告歸病愈後補吏部侍郎改閩浙總督調補兩廣總督值時局多艱海疆有事譚鍾麟從容鎮靜不假張皇官民恃以無恐地方要政尤能力持大體言論丰采爲僚輩所敬憚卒以舊疾復發開缺回里未竟厥施臣到湘後該故督病勢已深未能頻加咨訪茲竟溘逝里門湘省士紳無不同聲悼惜謹爲舉其蒞官大略並將該故督家屬繕送遺摺恭呈

御覽其儀如何

加恩賜卹之處出自逾格

鴻慈該故督長子寶箴安徽試用道三子延闈翰林院庶吉士四子恩闈從一品廕生五子澤闈分部郎中孫輔宸從二品廕生考授主事翊宸光宸均幼曾孫三人合併查明附陳所有在籍大員因病身故代遞遺摺緣由謹恭摺具陳伏祈

皇太后

皇上聖鑒謹

奏

獲匪懲辦保獎員弁摺

光緒三十一年三月

奏爲拏獲會匪渠魁審明懲辦並將出力員弁隨案保獎恭摺仰祈

聖鑒事竊查光緒三十年九月間同仇會匪入湘放飄潛圖起事

當經前署撫臣陸元鼎派員督飭營縣先後拏獲匪目蕭潰生游得潞何少卿三名訊據各供認聽從僞督辦馬幅益卽馬乾入會散飄約期謀逆等情不諱卽將蕭潰生游得潞正法何少卿監候待質所有懲辦情形業經彙案

奏報一面通飭各營縣嚴拏匪首馬幅益未獲臣於本年正月到任正值桂匪未靖邊防尙未解嚴該匪首馬幅益黨與衆多蹤跡詭祕深虞句結爲患隨經選派得力員弁懸立重賞購覓眼綫分投四路查拏茲經湖南儘先都司楊明遠湖北儘先千總赫成額補用府經歷吳章帶同眼綫跟踪追捕至江西萍鄉縣地方探明藏匿處所會同該處地方文武將該匪首馬幅益拏獲解湘經臣督同署按察使張鶴齡候補道俞明頤疊次研鞫據馬幅益卽馬乾供稱年四十歲湖南醴陵縣人曾在江南充當營勇因事革退

光緒十七年創立回崙山會開堂放飄自稱爲四路僞總統分派
匪黨謝受祺郭幅何士才尹漢庭爲東西南北四路頭目輾轉散
放飄布約有一萬餘張去年八月同仇會匪首劉姓等圖謀不軌
因該匪首夥黨甚多易於糾集派爲五路督辦並託謝受祺交給
華興飄布多張遂由該匪首分給已獲正法之蕭潰生等令其轉
散糾人約期於十月初五日在長沙省城作亂嗣因蕭潰生等破
獲懲辦匪黨四散隨即逃匿等供飭提留質之何少卿質審供情
彼此相符隨將馬幅益就地正法並摘要電

奏在案伏查該匪首馬幅益卽馬乾以軍營散勇創立回崙山會
自稱爲四路僞總統開堂放飄煽惑極衆嗣復充當同仇逆會督
辦膽敢約期在於省城作亂實屬悖逆不法茲幸拏獲懲辦匪首
伏誅逆會根株已拔夥黨瓦解人心大定裨益地方良非淺鮮查

湘省拏獲會匪歷經前撫臣遵照於光緒十七年六月初六日及二十五年五月初八日欽奉諭旨准照異常勞績保獎均蒙

俞允今該員楊明遠等隔省追捕將逆會渠魁擒獲實屬任事勇往亟應量予獎敘以示鼓勵合無仰懇

天恩俯准將湖南儘先都司楊明遠以遊擊儘先卽補湖北儘先千總赫成額以守備儘先卽補湖南分缺先補用府經歷吳章俟補缺後以知縣在任候補出自逾格

鴻慈所有拏獲逆會渠魁審明懲辦並保獎出力員弁緣由謹會同湖廣總督臣張之洞恭摺具陳伏祈

皇太后

皇上聖鑒謹

奏

遵查州縣出考摺

光緒三十一年四月

奏爲遵

旨考查州縣出具考語謹繕清單恭摺仰祈

聖鑒事竊照光緒三十年五月十四日奉

上諭朕欽奉

慈禧端佑康頤昭豫莊誠壽恭欽獻崇熙皇太后懿旨中國官民
隔絕痼習已深嗣後責成各省督撫考查州縣著自本年爲始每
屆年終各該督撫將各州縣臚列銜名年歲籍貫清單註明何年
月日補署到任經徵錢糧完欠分數及有無命盜各案詞訟已結
未結若干起監禁羈押各若干名均令據實開報其尋常公罪處
分准予寬免不准諱飾任內興建學堂幾所種植工藝巡警諸要

政是否舉辦一並分別優劣開列簡明事實不准出籠統寬泛考
語奏到後著交政務處詳加察覈分起具奏請旨勸懲前經降旨
諭令各省將書吏差役嚴行裁汰卽張之洞與劉坤一奏摺內亦
痛言此弊並恤刑獄各條何以因循不辦著一體督飭屬員認真
整頓等因欽此並准政務處咨行前來當經前署撫臣陸元鼎轉
飭藩臬兩司欽遵辦理並擬表式發令屆期造辦嗣准政務處咨
議覆河南直隸兩省請將州縣事實清冊展限辦理一片奏准通
行各省如須展限亦卽照此辦理均不得再逾次年三月之限等
因又經前署撫臣以湘省各屬下忙錢糧必須年底方能截數情
形與河南等省相同自應援照辦理附片奏明在案臣到任後疊
經飭催造報茲據湖南布政使龐鴻書署湖南按察使張鶴齡造
具各州縣事實表冊填具考語依限詳請

奏咨前來臣覆查州縣爲親民之官其治理不外催科撫字二端
湘省錢糧各屬應徵銀數均由司勒限提解覈計功過歷年奏銷
時全完者多統計全省民欠分數僅只數釐命盜詞訟及監押人
犯久經詳定章程責令據實造報前撫臣趙爾巽復經發給簡明
表式通飭造賚由司考覈功過辦法尤爲周密其餘學堂種植工
藝巡警諸要政亦經分別飭辦但事多創舉非先籌有的款不能
責其遵行由省統籌既慮不能普及就地經畫又恐徒足擾民是
以學堂不無有多寡之殊巡警更難得整齊之效皆須力加整頓
方能徐冀改觀茲謹就考察所及將各員治行優劣填具切實考
語開列簡明清單恭呈
御覽臣到任未久深恐考覈難周惟有遇事詳求不敢稍涉含糊
草率以冀仰副

朝廷實事求是之至意其事實冊臚列各款條目較繁亦均遵旨逐條摘敘一單咨呈軍機處以備

聖明諮采州縣各員閒有因公應得處分欽奉

恩詔准予寬免如有情節較重者除隨時參劾不計外仍照定例辦理至裁汰書差一條積習相承驟難議革臣歷任湖北江蘇兩省皆經飭屬舉辦雖奉行互有勤怠要未能悉予革除大抵蠹胥尙易查懲劣役則各省多有非俟警察辦有實效未易一律淘汰眼前惟有督率兩司先飭各屬大加裁汰不准稍事敷衍其恤刑獄各條現在奉有

諭旨矜恤庶囚無微不至自當飭屬欽遵辦理以上各條應俟整頓稍有眉目再行併案奏報除將各州縣事實表冊咨送政務處查照外所有遵

旨考查州縣填取切實考語繕呈清單並將事實冊另摘一單咨送軍機處存覈各緣由理合恭摺具陳伏祈

皇太后

皇上聖鑒謹

奏

捐助學堂經費請獎摺

光緒三十一年四月

奏爲命婦報捐田產充助學堂經費援案懇

恩優獎恭摺仰祈

聖鑒事竊據湖南學務處司道詳稱案據湘陰縣四品命婦鄭汪氏稟稱氏夫已故四品銜工部主事鄭祖煥由庶吉士改官工部請假旋湘隱居不仕生有二子長景崧次景奎於光緒二十七年將家產分析爲二立有分關各執爲據二十九年三月次子景奎

身故氏夫痛念少子將從孫日初改名保大擇愛立繼爲景奎之後由縣立案其時氏夫患病遺囑願將繼孫保大所承景奎關分之產報効萬金以補平生未竟之志旋即身故茲值

朝廷振興教育謹將繼孫監生鄭保大名下田業一分價值銀一萬九百餘兩報効以充湖南通省學堂經費呈請立案不敢仰邀獎敘等情查

奏定學堂章程紳董能捐設或勸設各學堂一人捐資較鉅者稟請奏明給獎等因今鄭汪氏慨捐鉅款至萬餘金之多雖稱不敢仰邀獎叙而揆諸董勸之道似應從優給獎詳請具

奏前來臣伏查地方籌辦學堂正苦款項支絀不能擴充近年風氣漸開紳富樂助鉅資皆荷

聖恩給予獎叙是以衆情鼓舞有逾疇昔查湖北江夏縣紳高文

濱捐助學堂經費一萬兩時臣適在兼署湖廣總督任內曾經奏請將高文濱之子監生高廷傑以知縣卽選奉

硃批著照所請欽此欽遵在案又湖南武陵縣候選訓導蔣積文捐助學堂經費錢二萬串候選直隸州知州李壽熙捐助學堂經費錢一萬五千串並認捐常年經費錢一千二百串亦經前撫臣先後奏請獎叙知縣道員仰邀

俞允各在案今鄭汪氏所捐田產覈之契價銀數業已過萬若以近年田價相衡所值更鉅實與高文濱蔣積文等捐數相同自應援案給獎以資激勸合無仰懇

天恩俯准將鄭汪氏繼孫監生鄭保大以知縣卽選出自

逾格鴻慈除分咨查照外謹會同湖廣總督臣張之洞恭摺奏陳伏祈

皇太后

皇上聖鑒謹

奏

防務解嚴片

光緒三十一年四月

再湘省防務自黃忠浩一軍援勦得手業將匪首梁濫六燒斃接辦柳郡餘匪漸次肅清經臣詳晰

奏報并將南路張慶雲杜俞兩軍分別布置情形附陳在案西路則自滇勇叛變撲城之後邊防甚爲安謐劉光才一軍仍在城步新甯一帶防守該軍赴防以來雖未身遇大敵然當粵匪竄擾黔邊古州戒嚴之際湘黔壤地相接城步一帶民心惶惶全賴該軍忠毅兩營并新募四旂前往填紮始得安堵如故及達營叛變正在永從左近與湘邊相距不遠亦恃該軍扼要堵紮方免內竄之

虞蓋寶靖各屬地勢袤長防務空虛處處皆恐闖入外匪致生邊患劉光才所統兵力單薄幸因威望素孚得資鎮撫故湘防西南兩路雖有戰守之不同而論其保障之功則固無可軒輊至鎮守鎮總兵周瑞龍辰沅永靖道莊廣良督率所部有事策應無事操防亦屬十分得力現據該鎮道報稱黔邊無匪湘防安靜請將前次駐防靖州鎮標續備軍四百人駐防藕團靖州協兵一百名並駐防通道縣鎮標續備軍三百人先後撤回歸伍以節糜費仍一面將原駐辰沅靖各處毅字三旅分別調防俾臻周密刻正遵照練兵處新章募練新軍其劉光才所統兩營四旅應先調回兩旅分別遣撤騰出餉項稍資挹注現在湘西一路防務解嚴地方靖謐實足仰慰

宸廑謹會同湖廣總督臣張之洞附片具陳伏祈

聖鑒謹

奏

查明知州參款摺

光緒三十一年四月

奏爲查明知州被參各款據實覆陳恭摺仰祈

聖鑒事竊照光緒三十一年正月十四日准軍機大臣字寄三十年十二月十九日奉

上諭有人奏湖南郴州知州施啓宇貪刻營私草菅人命請飭查辦等語著端方按照所參各款確切查明據實具奏毋稍徇隱原片著抄給閱看將此諭令知之欽此遵

旨寄信前來臣當卽密委衡永郴桂道譚啟瑞按款確查并將片內應行質訊之門丁差役及案內緊要人證飭令調齊卷宗提案研訊務得實情一面另委妥員親赴郴州分投密查茲據該道譚

啟瑞將所查各情及訊取各供詳晰稟覆并據委員先日查覆前來臣伏查原參施啟宇貪刻營私草菅人命地方屢經閉市上控臣如紳董因公往見需索門包並挂號銀合州捐建學堂撫臣給獎捐戶監生實收四百四十張該州飭差責令呈驗每張驗費銀八元合計得三千餘元一節查該州上年七月奉文開辦煙酒稅捐痞徒造言阻撓謂零星貨物均須收稅鄉民被惑煤米菜蔬數日未經入城嗣經該州出示曉諭亦卽貿易如常並無閉市之說飭檢上控之案甚屬寥寥紳董因公接見則多由該州訪請斷無肯送門包之理學堂捐款係前署州沈瑩慶請領實收四百四十張曾經填給三百餘張造冊申報在案其餘數十張亦均交學堂紳首勸辦施啟宇到任後並未經手調驗自無從向其需索又原參郴州烟葉加捐城內拘烟商十餘家勒限包繳稅銀五千元各

鄉鎮包繳三四千元酒捐一項亦勒捐稅銀六千餘元查其報解未及一半一節查郴州烟酒兩稅係由烟葉行絲煙店及燒酒水酒店各商家每年承認包繳統計煙酒兩業共繳稅錢五千四百四十串文取具承包各結稟定有案無原奏包繳數目之多稅由商人包抽包繳即有盈餘亦在承包商董手內該州祇按稟定之數催繳批解不計有無盈虧似無從收多報少徵存不解煙葉爲該州出產大宗豐歉亦難一致原稟本係試辦一年再酌看情形辦理更不致別滋情弊又原參總理船行首成琳該州因加增船規將其收押勒繳銀四百八十元一節查該州船行向有定章每逢新官履任應繳錢四百串文月繳銀十六元爲津貼學政差船之用施啟宇此次到任該船行祇繳一半曾令查照舊章補繳並無加增勒繳之事又原參城西周璜造屋挖出古錢四千串並古

玉金銀器物該州派勇攔入衙門假名充公實則煨造器具古錢
恐人指摘除充崇義堂五百串外餘悉入私一節查周璜現官廣
西遷江縣知縣其子周忻於上年三月因在籍造屋經工匠挖出
古錢一窖轟動多人該州恐釀事端前往彈壓隨令將錢擔入署
中當提給周忻二百七十餘斤實存古錢五百八十二串有零旋
經周忻稟請撥充小學堂經費會紳議定價值出示發售並擬俟
古錢銷竣折合銀兩爲之請獎稟明有案覈查周忻原稟並無古
玉金銀各物實無入私憑據又原參重用門丁宋姓發交歇戶截
二十具無戳不收呈詞由書差經理囑歇戶向訟者先行議費如
門房稿案等費難以悉數而書差費尙不在內兩造和息仍須將
各費繳清如雷三讓與雷溢海爭訟族衆解和而衙費仍繳一節
查門丁宋姓即現充幫辦稿案之宋彬該州向設歇戶二十家擇

誠實有身家之書役充當遇新官到任各發花押戳記一具凡投遞呈詞自向歇戶蓋戳集訊時卽由歇戶送審原以杜圖告不圖審之弊此等歇戶各州縣衙門皆沿用之不僅郴州爲然亦非施啟宇所創該州訟費每案兩造各繳洋銀五元以爲各行使用間有貧寒之家無力呈繳並皆各從其便此亦係多年舊章實無先行議費及格外需索情事調查雷三讓雷溢海訟案並無此項卷宗僅有雷三易等控雷春江等強砍墳樹一起訴呈中列有雷溢海之名嗣經當堂各遞息結無索繳衙費之說當係傳聞之誤又原參崔喻兩姓爭訟宋門丁先受喻賄一百四十元另繳衙費一百餘元初審時將崔姓契據扯毀崔姓亦賄宋二百元另繳衙費一百五十元覆審則罰喻姓一百八十元充公又斷出洋三十元幫貼崔姓一節查崔斯榮契買何姓之鳳形山安葬母棺界與喻

墳場毗連經喻懋椿查知將崔斯榮母棺挖出因而成訟該州調查崔姓契據界址不明且係道光元年白契不足爲憑塗銷附卷唯喻懋椿遽行挖發亦屬非是斷令出銀一百八十元充工藝廠經費另出銀三十元給崔斯榮以爲遷葬之資此案人言藉藉咸謂該門丁有索賄情事然無過付實據且訪聞崔斯榮人甚貧苦恐無此等鉅款以資費用又原參雷栽子被李成講之子李安榮毆斃由李長青託刑書曹林拔賄宋門丁洋銀四百四十元該州竟不往驗飭令扛屍來州驗時傷痕纍纍該州不准填格將苦主雷春彬責押迨苦主遣抱上控抱告發還該州尤怒責抱告一節查李安榮卽李安忠雷栽子七歲失父其母廖氏再醮李安忠隨母育於李家與李安忠素相親愛上年四月初九日李安忠赴田工作李廖氏喚雷栽子挑水雷栽子懶惰未應李廖氏催促雷栽

子出言頂撞李廖氏生氣用竹片毆傷其大肋有同居之李郭氏目擊解勸雷裁子氣忿服毒殞命經李安忠報知雷裁子堂妹雷春彬前來看明投保報經該州詣驗訊供取結通詳立案雷春彬聽信族人廩貢生雷成林之言藉命訛詐又經該州訊明將雷春彬責押雷成林不服因向族中斂費派雷吉昌作抱捏稱雷裁子係赴李成講家索債起衅被李成講縱子李安榮兇毆多傷斃命赴州報驗李成講戶族李長青賄串刑書曹林拔重賄門丁舞弊以致作迭報多傷不與填格用銀鉞探試係白色偏聽李廖氏一面之詞稱爲責毆後氣忿身死等語架雷春彬之名來省上控節經臬司及前撫臣覈係架捏嚴切批飭勒拿訟棍並將抱告雷吉昌押發該州收審又經該州訊悉前情詳請將雷成林衣頂褫革並取有雷春彬不願與訟切結附卷茲由該道譚啟瑞先後提

到指稱行賄之李長青刑書曹林拔作歐忠興歇戶曹明等隔別研訊李長青供與曹林拔並不認識無從託其行賄作歐忠興供原驗雷栽子屍傷實只右肋竹片毆傷一處銀針探試咽喉穀道均作青黑色委係服毒身死查閱賚到原驗銀針二枚顏色與作所供相符斷無受賄舞弊情事又原參陳姓寡婦子被痞棍誘賭寡婦控賭棍訊時押罰陳子五百元罰土棍亦五百元入私完案一節查孀婦陳楊氏之子陳澤武與陳澤東陳逢祚袁德鈞等賭博陳澤武輸銀洋五百六十元經陳楊氏查知不依情愿將其子所輸之銀充公不愿給陳澤東等控由該州訊明除求減外分期繳銀四百五十元充警務局經費同賭之陳澤東等因求免治罪亦捐廣西賑款四百四十八元如數解交賑捐總局取有批迴並按名請獎底册存案可查實未絲毫入己又原參段位坦

誤聽竊盜陳文作之言誣匡興文兄弟窩盜匡氏兄弟控州段位坦自知理屈賄宋門丁銀二百六十元訊時不准匡氏兄弟訴說各重責收監一節查段位坦於上年四月被竊彼時獲賊陳文作供認與夥賊黃性田停留匡興文兄弟家段位坦卽邀保正地鄰趕到匡興文家捉賊收贓黃性田聞聲由屋頂逃逸追拏未獲惟搜得原贓皮袍等件正擬鳴官懲辦匡興文兄弟哀求寬免立有不得再行窩賊悔結二紙分交地鄰失主收執並另書賠贓銀二百元筆據寢事嗣匡興文等因家貧無力措繳又因屋毀自行拆卸赴州控告經該州訊悉前情將匡興文等責懲勒限繳贓嚴辦並因匡氏家貧勸段位坦等將賠贓筆據繳案塗消拆毀之屋飭令自行修理取結完案無向宋彬行賄之事又原參鑛局委紳何昭模至郴州之許家洞運物何昭模將公款蕩盡又委朱紳接辦

何昭模句通店主楊運旺赴州報竊楊運旺誣指素有仇隙之楊運祿周姓李姓武姓劉姓等該州票差王才李英等率徒騷擾威逼楊運祿自盡祿叔楊景純控訴該州怒責押令將祿領葬周姓族押繳銀三百四十元武姓族押繳銀三百八十元劉姓戶族名忠准者年近八旬授蒙餬口押繳銀八十元劉忠准一憤殞命一案查衡州鍊鑛廠卽由該道譚啟瑞督辦委紳何昭模赴郴州收買清渣寓州屬許家洞楊萬利飯店被賊挖孔入室竊去收買清渣公款小洋銀三千八百角洋銀九元憑街保向該處曾經犯竊之何高子盤問據稱楊運祿曾邀伊行竊局款伊未允從等語旋覓獲楊運祿交其叔楊景純看管一面赴州報案尙未簽差楊運祿卽畏罪服毒身死經楊景純邀同地鄰赴州報明以伊姪楊運祿畏罪自盡與人無尤求免相驗並據查明鑛局公款確係周丁

古武祥拐子夥同楊運祿所竊更夫李良茂知情分贓可質旋經該州比差勒緝未獲據周姓戶族周隆平武姓戶族武供毛等以局款未便久懸情愿先代該賊犯周丁古武祥拐子變產賠繳當由周姓繳銀二百四十元武姓繳銀一百四十元申解該道發交何昭模具領完案其劉忠淮一名則因周丁古之母租住其屋該州帶案勒令交犯旋以年老患病於七月間保釋並繳銀四十元作爲賠贖之費劉忠淮因在鄉訓蒙恐賠贖有礙顏面經該州提充自新所經費後於十月身故提訊王才李英堅稱此案未奉票差無從率徒騷擾查覈原卷票差亦無該役等之名是此案局款實係楊運祿等夥竊並非何昭模將公款蕩盡勾串店主楊運旺挾嫌誣指所爲至楊運祿自盡在未經票差之前劉忠淮身死在保釋數月之後更非差役威逼及押繳斃命尤屬確鑿可憑以上

各款應訪查者均經查有根據應提訊者亦各訊有供招查覈所參情節自以信任門丁婪索贓款爲最重是以首先飭提門丁宋彬到案以便逐款推求乃經該道譚啓瑞反覆究詰惟稱該家丁跟隨施啟宇多年施啟宇向來約束最嚴從不敢有詐贓情事加以刑嚇矢口不移崔斯榮雷裁子段位坦等案原參雖有受賄銀數然既無過付之人又無告發之事似無從憑虛定案至施啟宇歷任瀘溪安仁江華武岡道州等處歷著循譽平時潔己愛民毫無貪污劣迹所參各條除收受船規發給歇戶戳記均係照章辦理應飭令將此項船規及一切訟費先行革除並飭各屬一體遵辦外此外別無營私實據卽間有科罰之案亦皆提充公款未嘗入私惟勸辦烟酒稅捐及審理何昭模被竊一案不無有操切之處又門丁名目曾經前撫臣趙爾巽及臣先後通飭各屬不許任

用施啓宇未經革除亦屬不合該員平日任事勇往頗著能聲若因此遽予廢棄未免人才可惜應請

旨將郴州直隸州知州施啓宇開缺另補以策後效門丁宋彬雖訊無詐贓情事既滋物議應卽遞解回籍其餘案內人證無干省釋如蒙

俞允郴州直隸州係邊要之缺湖南現有應補人員應卽扣留外補除咨部查照外所有查明知州被參各款並擬議緣由理合據實恭摺具

奏伏祈

皇太后

皇上聖鑒訓示再此摺因郴州地屬邊遠飭查提訊往返動需時日是以覆奏稍遲合併陳明謹

奏

改練新軍籌辦情形摺

光緒三十一年五月

奏爲湘省改練新軍現擬先練一協謹將籌辦情形恭摺具陳仰祈

聖鑒事竊前准練兵處咨送奏定陸軍營制餉章行令切實籌辦前署撫臣未及照章改練移交前來臣伏查練兵處原奏內開各省形勢不同不必拘定一鎮或先練一協一標應由各該督撫體察情形酌覈辦理又查奏定章制內變通制略一條內開如該省餉項支絀不能一時照章編立成鎮其第一年一鎮中先設步隊甲協兩標馬礮隊各一甲營工程輜重各一隊遞年陸續加增自可逐漸成鎮如三年後餉仍不敷祇可將營數隊數酌減三分之一或四分之一以此爲限不得再減各等語定章至爲嚴切原以

練兵實爲今日急務不容稍涉緩圖湘省舊有各營從前未習新操初無合格將領一時難以驟改又值粵氛未戢增兵設防邊事戒嚴不遑他顧臣抵湘後邊防稍有起色始經竭力籌辦惟是百事艱舉餉力支絀加以人才缺乏措手極難爰一面奏調參將姚廣順日本游學畢業生舒清阿來湘差遣一面照章設立督練處親加討論仍擬酌照臣在江蘇辦理先練一協卽以姚廣順爲協統該員練習新操治軍嚴整尙堪勝任第一標就湘省新募勁字四旂挑選改編不敷卽在湘威三旂及銳字旂內補挑足數委舒清阿爲標統該四旂原備填紮南路之用現在南路匪患日靖自可無須赴防其第二標則須另籌集募查尙有游學生陳其采堪膺標統之選各營管帶均用陸軍畢業及武備將弁學堂出身之學生新挑兵丁均皆合格教練務求一律不許稍涉參差至營制

餉章一切均按新章辦理其間有不得不酌加省併量予變通者仍仿照臣在蘇辦法定一暫用章程俟訓練一年驗視合格卽令永遠遵守所發餉銀則因市間銀色高低不齊數亦畸零不整難於分給一律改用銀元以昭簡易此外馬礮工程輜重各營隊亦當次第經畫惟馬匹器械既須一一購置營房更須分別改建不得其人固慮空糜鉅款兼營並舉並苦無款可籌現在只能先其所急預儲各營弁目剋期教練所幸邊防漸次撤警嗣後當可將填防各旂徐事遣撤騰出餉項陸續增練以成鉅觀湘省材智輩出素有尙武精神斷不敢敷衍因循致居人後茲先將酌練步隊一協更定營制餉章繕具清單恭呈

御覽除分咨外理合恭摺具陳伏祈

皇太后

皇上聖鑒謹

奏

謹將酌擬湖南常備新軍步隊一協營制餉章繕具清單恭呈

御覽

計開

一協之制

統領官一員

公薪 薪水銀元三百五十元

參軍官一員

薪水銀元一百元

執事官一員

薪水銀元七十元

二等書記官二員

每月薪水銀元五十元

共銀元一百元

司書生二名

每名薪水銀元十六元

共銀元三十二元

司號長一員

薪水銀元二十元

弁目一名

餉銀元十五元

馬弁六名

每名餉銀元十二元共銀元七十

二元

護目一名

餉銀元八元

護兵十名

每名餉銀元六元五角共銀元六

十五元

伙夫二名

每名餉銀元四元六角共銀元九

元二角

騎馬七匹

每匹月支餉乾銀元七元共銀元

四十九元

以上一協自統領至伙夫計二十八員名每月共支薪餉馬匹銀元一千二百四十元二角每年共支銀元一萬四千八百八十二元四角

一標之制

統帶官一員

薪水銀元二百八十元

教練官一員

薪水銀元一百四十元

執事官一員

薪水銀元七十元

掌旗官一員

薪水銀元四十元

副軍需官一員

薪水銀元八十元

副軍醫官一員

薪水銀元八十元

司號長一員

薪水銀元二十元

二等書記官二員

每員薪水銀元五十元共銀元一

百元

司書生二名

每名薪水銀元十六元共銀元三

十二元

弁目一名

餉銀元十五元

馬弁四名

每名餉銀元十二元共銀元四十

八元

護目一名

餉銀元八元

護兵八名

每名餉銀元六元五角共銀元五

十二元

伙夫二名

每名餉銀元四元六角共銀元九

元二角

騎馬五匹

每匹月支餉乾銀元七元共銀元

三十五元

以上一標自統帶至伙夫計二十七員名每月共支薪餉馬匹銀元一千二百八十九元二角每年共支銀元一萬五千四百七十七元四角

一營之制

管帶官一員

公薪費水 銀元二百五十元

督隊官一員

薪水銀元七十元

隊官四員

每員薪水銀元五十元共銀元二百元

百元

排長十二員

每員薪水銀元三十元共銀元三百六十元

百元

軍需長一員

薪水銀元三十五元

書記長一員	薪水銀元三十元
司務長四員	每員薪水銀元十六元共銀元六十四元
醫生一名	薪水銀元二十四元
司書生六名	每名薪水銀元十二元共銀元七十二元
正目三十六名	每名餉銀元七元五角共銀元二百七十元
副目三十六名	每名餉銀元六元五角共銀元二百三十四元
號目一名	餉銀元八元
護目一名	餉銀元八元

正兵一百四十四名 每名餉銀元六元共銀元八百六十四元

副兵二百八十八名 每名餉銀元五元五角共銀元一千五百八十四元

號兵八名 每名餉銀元六元五角共銀元五十二元

護兵十八名 每名餉銀元六元五角共銀元一百一十七元

備補兵三十六名 每名餉銀元四元六角共銀元一百六十五元六角

匠目一名 餉銀元十二元
槍匠四名 每名餉銀元九元五角共銀元三

十八元

皮匠四名

每名餉銀元六元五角共銀元二

十六元

伙夫三十八名

每名餉銀元四元六角共銀元一

百七十四元八角

以上一營自管帶至伙夫計六百四十六員名每月共支薪餉銀元四千七百五十八元四角每年共支銀元五萬七千一百元八角

統計一協兩標六營每月共支銀元三萬二千三百六十九元每年共支銀元三十八萬八千四百二十八元

再查排長於成軍之後一月至六月每月給餉銀元二十元六月至十二月每月給餉銀元二十五元一年以後驗視合格始給全

餉銀元三十元正目一月至六月每月給餉銀元六元五角六月
至十二月每月給餉銀元七元一年以後始給全餉銀元七元五
角副目一月至六月每月給餉銀元五元五角六月至十二月每
月給餉銀元六元一年以後始給全餉銀元六元五角號目護目
一月至六月每月各給餉銀元七元六月至十二月每月各給餉
銀元七元五角一年以後始各給全餉銀元八元正兵一月至六
月每月給餉銀元五元六月至十二月每月給餉銀元五元五角
一年以後始給全餉銀元六元副兵一月至十二月每月給餉銀
元五元一年以後始給全餉銀元五元五角號兵護兵一月至六
月每月各給餉銀元五元五角六月至十二月每月各給餉銀元
六元一年以後始給全餉銀元六元五角俾資策勵合併聲明

設立督練處片

光緒三十一年五月

再查練兵處咨送奏定陸軍營制餉章內開各省新軍練及一協以上者應於省會設督練公所一處慎選兵學諳練事理精詳各人員分任兵備參謀教練暨考覈變革各事仍由督撫督率籌辦並定立督練處應用員名各制行令酌定人數奏咨立案等因現在湘省改練新軍先成一協諸事悉出創辦佐理需人雖此時頭緒紛繁未能遽定人數而考覈章制籌備餉精審度教練一切均關緊要不能不暫分置以專責成茲經_臣遵章設立督練處遴委湖南布政使龐鴻書署江南狼山鎮總兵黃忠浩候補道俞明頤任國鈞署撫標中軍參將姚廣順爲督練處參議官並委俞明頤姚廣順等兼充兵備參謀教練三處總辦由_臣督辦其事將原有之營務處卽行裁併俾一事權而資考究除咨練兵處兵部查照外謹附片奏陳伏祈

聖鑒謹

奏

謝賞

御筆墨扇等件摺

光緒三十一年五月

奏爲恭謝

慈恩仰祈

聖鑒事竊照光緒三十一年四月二十四日蒙

恩賞

御筆花鳥摺扇一柄實地紗麻紗四疋由齋摺差弁領交到湘

當即恭設香案望

闕叩頭祇領伏念臣移撫三湘瞬經半稔乃責效未酬夫尺寸而

承

恩仍沐夫便蕃覩節物之下頒荷

隆施之屢賁

輝騰奎藻歌風迎

帝座之薰織嬾雲裳疊雪重

天家之貺仰承

寵渥彌切感慚臣惟有矢志奉揚殷懷被飾竊喜長邀

眷顧永抒傾葵向日之心所期竭盡愚誠稍効結草銜環之意所

有臣感激榮幸下忱謹具摺恭謝

慈恩伏祈

皇太后

皇上聖鑒謹

奏

代遞在籍侍郎遺奏摺

光緒三十一年六月

奏爲在籍侍郎病故代遞遺摺仰祈

聖鑒事竊據前刑部右侍郎龍湛霖家屬稟報該侍郎於光緒二

十三年十月江蘇學政任滿因病奏請

賞假兩月回籍就醫假滿病仍未痊呈請湖南撫臣代奏懇

恩開缺復蒙

賞假一月調理稍愈力疾起程行至江甯病勢增劇又經呈請兩

江督臣代奏籲懇開缺蒙

恩允准八年以來百方調治未有效驗茲於三十一年五月十七

日在籍病故謹具遺摺由該家屬呈請代

奏前來臣伏查該侍郎起家詞垣屢司文柄平時以提倡正學扶

植人才爲務自家居養病後首先捐貲建明德經正學堂使其

長子紱瑞在堂任事餘子並令入堂肄業爲鄉里搢紳之導又以

異說朋興呈請編教科書時宜恭輯
列聖

諭旨冠諸首篇經前撫臣趙爾巽奏行其事其餘地方要政靡不
留心咨討粵漢鐵路因美商轉售比法各國關繫東南全局湘紳
主持廢約收回自辦該侍郎實倡其議病革時猶殷殷籌畫此事
至死不輟湘人深爲惋惜覈其生平行事洵屬無間人言茲將該
侍郎遺摺一扣封呈

御覽該侍郎有子三人長子紱瑞三品廕生候選知縣次子紱年
正二品廕生三子紱慈附生孫二人均幼合併查明繕摺具陳伏
祈

皇太后

皇上聖鑒謹

崇恩政公奏稿

卷五

二下七

奏

派員辦理學務片

光緒三十一年六月

再湖南學務進步極速但開辦未久規制教法未能畫一承學之士類多志氣英邁專精劬學其間亦復時有議論偏宕純駁不齊者_臣抵任以來孜孜考求每於提倡之中深寓裁制之意使學生皆束身規矩勤求科學則囂張之氣自易消除惟轉移之妙用全係乎監督之能否得人省會高等學堂及中路師範學堂尤爲全省標準前高等學堂監督戶部主事彭紹宗請咨赴日本游歷旋赴京經大學堂留辦學務師範學堂監督翰林院庶吉士郭立山經學務大臣電調入京供差自應另行派員接辦查有江蘇江浦縣教諭陳慶年博覽羣籍兼綜中西在湖北各學堂掌教有年深明教授管理之法此次隨_臣來湘代辦高等學堂監督數月整飭

規則申明儀節學風爲之一變士論翕然歸之擬卽派充高等學堂監督又查有在籍丁憂翰林院庶吉士譚延闓嚴正通敏學行交修擬卽派爲中路師範學堂監督又在籍丁憂翰林院庶吉士郭宗熙游學東瀛精究學制宗旨端純擬卽派爲長沙中學堂監督該二員雖係京秩然皆丁憂在籍現經留充學堂監督與學務大臣奏定新章相符除咨吏部學務大臣外理合附片陳明伏乞聖鑒謹

奏

建設初級小學片

光緒三十一年六月

再振興學務必本末非從初等小學蒙養院入手則始基不植困難滋多臣撫鄂撫蘇及署理湖廣兩江任內莫不以倡立小學爲先務湘省官立民立各校鼓舞奮興羣材並驚其內容之完善

教育之精神均不後於各行省而浮誇囂矜之習間亦不免則無初級教育以植其基本而入學者多取成材之士無選升之法以爲之階級也 臣奉

命撫湘繼前撫 臣提倡振奮之後中學以上之學堂尙得就其成規加之擴張獨於初級小學斤斤注意當經刊布小學族學告示諭單附以簡章通行各屬督飭舉辦重在便易俾資普及先於省會建設初等小學堂附設蒙養院收教五齡以上十齡以下之學生以示模範並於省城內創立初等小學堂四十所爲各屬先導數月以來遐邇聞風頗深觀感遲之歲月成績必多統計初級小學附蒙養院應需常年經費銀一萬兩初等小學四十所共需常年經費銀一萬四千兩即在銅元餘利項下指撥應准作正開銷除咨戶部學務大臣外理合附片陳明伏乞

聖鑒謹

奏

籌辦罪犯習藝所摺

光緒三十一年六月

奏爲遵

旨覆陳籌辦罪犯習藝所情形恭摺仰祈

聖鑒事竊臣於光緒三十一年四月二十四日承准軍機大臣字
寄初三日奉

上諭翰林院撰文吳蔭培奏罪犯習藝所新章請責成各府州縣
一律分設一摺著各直省督撫督飭各屬一體認真辦理原摺著
鈔給閱看將此各諭令知之欽此欽遵寄信前來臣惟恆產恆心
古人訓爲常生之業人以失業之故而絀於生因之而陷於罪哀
矜勿喜所以憫既往之愆尤曲成不遺尤以見將來之希望臣查

伍廷芳等原奏內稱凡竊盜均令收所習藝按罪輕重定以年限俾一技能嫻得以糊口自少再犯三犯之人仰蒙

依議施行如天之仁無所不覆敢不恪遵辦理以佐

生成查湘省自前撫臣趙爾巽創設自新習藝所於省城係就局廠舊基擴充修葺規制極爲完備其中各項工藝如絡絲織緜成衣製帽造革鎔錫鈔書刻字雕竹作畫鐫石捲煙之屬均爲細工如彈花織布編蒲削篋澆燭結繩斲木塗漆製傘糊燈之屬均爲粗工各就其材予以教授所有教習或常年訂定或臨時招致成績昭著出貨豐饒至有並非罪犯而父兄求送子弟入所習藝者故省中一城之地習藝所收有二百數十名之多臣蒞任湘垣竊嘆其用心之勤收效之廣當經委派員紳分勸各屬仿照辦理數月以來次第創興略有基礎自經

明詔減罪釋囚

隆恩稠疊臣復加檄飭各府廳州縣限於一月之內將所辦習藝所及罪犯姓名事由列冊詳報計自五月初一日爲始至三十日止先後稟報到署者計長沙府屬已辦者七縣罪犯八十六名寶慶府屬已辦者兩縣罪犯十三名衡州府屬已辦者四縣罪犯三十四名永州府屬已辦者四縣罪犯三十名郴州直隸州并所屬已辦者一州五縣罪犯五十一名岳州府屬已辦者三縣罪犯二十名常德府屬已辦者三縣罪犯二十二名澧州直隸州並所屬已辦者一州二縣罪犯四十二名辰州府屬已辦者三縣罪犯二十一
名沅州府屬已辦者二縣罪犯十五名永順府屬已辦者三縣罪犯二十一名臣復密飭該管司道據實覆查並稱雖事屬草創經費不充人數無幾而各屬尙知振刷精神力圖推廣此臣遵

旨籌辦實在情形既不容略涉延閣自負初心亦不敢稍事鋪張
上淆

聰聽者也又近准學務處咨開通飭各省府廳州縣編輯鄉土志
凡物產工商各端詳悉開列以爲各學堂考鏡之資臣擬卽責成
各該地方官就鄉土志所列之品物工業令該所罪犯學習製造
分門呈驗庶可以暢百貨之流銷興一方之實業習成而後就地
取材因工覓食尤爲便利矣所有臣籌辦罪犯習藝所各緣由是
否有當理合會同湖廣總督臣張之洞恭摺具陳伏乞

皇太后

皇上聖鑒謹

奏

籌辦警察情形摺

光緒三十一年六月

奏爲遵

旨覆陳湘省籌辦警察情形恭摺仰祈

聖鑒事竊臣於四月二十四日承准軍機大臣字寄初三日奉

上諭翰林院撰文吳蔭培片奏警察爲當今急務請飭竭力整頓等語著各省督撫督飭所屬認真辦理原片著鈔給閱看將此各諭令知之欽此欽遵寄信前來臣伏查東西各國警察之法有司法警察行政警察保安警察諸端有屬於國家者有屬於地方者有普通有高等大抵探源於法律而比附於陸軍醫學諸門實已統內政外交生命產業無不兼綜條貫鉅細靡遺斯誠致治之本源矣湘省自前撫臣陳寶箴略參西國規制於省城地方試辦保衛局一時盜賊斂迹閭閻乂安嗣後陳寶箴去官漸形廢弛仍沿保甲舊名至光緒二十九年奉

旨籌辦經前撫臣俞廉三查照直隸章程將保甲局改爲警務局
派親軍後營兵丁輪流站街省城始有警察之名前撫臣趙爾巽
極力提倡通飭舉行各府廳州縣始知警察之益駸駸嚮風臣到
任伊始首先調查各屬未辦者嚴催舉行已辦者飭令推廣又因
邊防未解盜風不戢輔以緝捕章程補其未備據四月中各屬稟
報開辦按冊而稽已無遺漏臣又密派專員四出訪查知於所頒
章程既未能畫一符合而其所用警役則或抽取團丁或借撥營
勇又或驅市人而爲之故開辦雖非虛名而循覈難言實效其有
一二州縣於舉行之後成績昭著盜竊屏跡者則實該地方官及
在事員弁躬親其事昕宵督率有以致之以語夫警察自治之功
固萬不容幾及蓋不由學堂入手層累曲折而底於成譬之無源
之水朝夕之盈不足恃也臣抵湘以來訪求日本學習警務卒業

學生宗旨純正條理精詳者數人就省城開設警察學堂先行考選官生百五十名肄習速成警察法以三月畢業分派外府州縣實行警察爲第一班再續行考選三百名一年卒業分派如前兼令各屬仿辦學堂聘充教習爲第二班一面籌款建設寬敞堂舍操場招選文理通順之人分班授課學期由短而加長學課由淺而加深人數由少而加多逐次推廣凡卒業者皆有實行之責任俾知警察實非賤役而實爲治理之本原行之日久庶幾改良社會有移風易俗之機又查前撫臣趙爾巽曾選派警察專班學生前赴日本學習警務臣到湘之日即責成實力研究編纂講義課本分期寄歸以資參考又密查勤學純謹之學生多名補給學費令其加功考索漸近高深異時學成歸國當必能實心任事裨益地方此皆臣區區之愚思欲始基一簣觀成九仞者荷

訓諭之周詳益寸衷之兢惕惟有勉竭棉力冀收得尺得寸之功已耳所有臣在湘籌辦警察情形是否有當理合會同湖廣總督臣張之洞恭摺具陳伏乞

皇太后

皇上聖鑒訓示施行謹

奏

保薦將才片

光緒三十一年六月

再查現在整飭營伍將才最爲難得以臣所知如統領健字全旂兼統南洋常備左軍

記名提督張慶雲本係湘中夙將上年粵防戒嚴該統帶奉飭赴桂援剿奔馳瘴癘勞苦不辭後遵

電旨駐紮全州一帶防堵甚爲得力約束所部毫無侵擾臣屢與

該統帶接晤知其治軍嚴整頗有閱歷之談湖北常備軍鎮統
記名總兵張彪在鄂治軍多年講求西法操練最得風氣之先士
卒整齊規模嚴肅上年鐵良奉

旨調閱各省營伍推鄂軍爲首選甚加賞異該總兵平日教練之
功於此可見以上二員皆堪勝實缺專闢之選合無仰懇
天恩俯准將張慶雲張彪一併交軍機處存記遇有提鎮缺出量
加擢用出自

逾格鴻慈謹附片具陳伏祈

聖鑒訓示謹

奏

敬舉監司大員摺 光緒三十一年六月

奏爲敬舉監司大員用備任使恭摺仰祈

聖鑒事竊惟時艱日亟各行省舉辦要政庶務紛繁全在得人而
理臣到湘已及半載體察近年湘省情形如洋務礦務以及教練
新軍籌辦財政各事宜或事屬創始或情多轉轄辦理皆形棘手
所賴承辦諸員盡心摩畫得以毫無貽誤是其勤固不容沒而其
才亦必有可觀如現署湖南按察使候補道張鶴齡器識閎通才
具開敏於洋務交涉最爲留心自委辦洋務局以來正值長沙開
埠遇有交涉事件當機因應類皆內不失己外不失人辦理學務
力持嚴正多士嚮風又湖南候補道任國均操履篤實辦事認真
在湘服官有年頗著循譽湘省財力久絀邇年度支驟增數倍曾
無大宗入款挪移補綴殊費經營該員辦理善後局盡心籌畫怨
譴不辭款項支銷絲毫不苟賴以顧全大局又湖南候補道俞明
頤處事精詳究心軍事承辦湘省武備學堂科學賅備尤明於管

理之法本年五月新班學生卒業程度均能及格現正改練新軍該員委辦兵備處殫心竭慮遇事考求一切均臻妥善以上三員實爲湘省不可多得之才臣竊謂近來仕途凌雜而世事愈益艱危求其措置裕如實倍難於疇昔是以每遇實心任事迥異凡流者無不愛惜護持以期克舉厥職蓋得一人不足爲世重而債一事則見爲才難特將該員等才具勤能撮舉大略以備

聖明任使應如何

量加擢用斷自

宸衷非臣所敢擅擬謹恭摺具陳伏祈

皇太后

皇上聖鑒訓示謹

奏

查明提鎮各員摺

光緒三十一年六月

奏爲查明提鎮各員謹就所知恭摺覆陳仰祈

聖鑒事竊照承准軍機大臣字寄光緒三十一年三月初六日奉
上諭朝廷講求武備之際提鎮大員必須簡任得人方足以資整
頓所有單開之記名提督哈連陞總兵馬進祥等保舉武職人員
劉紹基等現在或在本籍或在該省著各督撫各就所知查明有
無事故其年力何如其才識何如或堪勝陸路或堪勝水師迅速
查明各具切實考語限於一月內奏到以便簡用將此各諭令知
之欽此遵

旨寄信前來遵卽按照清單詳加查訪內有

記名提督萬化林陶茂林張沛張海龍劉端冕瞿珍海姜世友曾
松明易志忠李考祥周應堂張紹堂侯祖朝楊文彪蔡金章總兵

譚用賓傅永貴業已先後病故提督郎永清岳登龍方南英總兵傅殿魁盧國泰陳國明蕭有光副將谷振傑聞在甘肅新疆江南等省差遣提督周鵬舉現在湘鄉原籍飭調來省查驗未到其年力才識若何無從深悉惟查有

記名提督吳恆山本在江南管帶南洋常備各軍前營上年隨同原統南洋常備各軍江蘇候補道杜俞調來湘省駐防永州一帶又

記名總兵梁國楨本在湘省管帶忠字第二旗上年隨同統領忠字全旂新授廣西左江鎮總兵黃忠浩赴桂援勦疊著勞動該二員均係陸軍將領現各管帶陸軍樸誠勇敢約束嚴明防勦頗資得力惜於新法操練未能加意研求是其所短又前福建水師提督彭楚漢曾膺闡寄其才具器識久在

聖明洞鑒之中現在息影田園臣曾與之晤見該提督年力雖衰精神尙好惟久以耕讀自娛意頗澹於仕進將來如果疆場有事尙願出爲

朝廷効力總兵劉達義在湘省原籍總兵李維義在長沙協標候補該二員老於戰陣營務尙稱熟悉惟從前本係偏裨之材現在年力漸就衰頹似未足當一面之寄應如何量材錄用伏候

聖裁除飭取該員等履歷分咨軍機處練兵處查照並其餘各員容俟查明續行陳

奏外理合恭摺覆陳伏祈

皇太后

皇上聖鑒再各該員等或在他省供差或居偏僻鄉邑往返調查動需時日是以覆奏稍遲合併陳明謹

奏

自開商埠籌辦情形摺

光緒三十一年六月

奏爲常德湘潭自開商埠謹將籌辦大概情形恭摺仰祈

聖鑒事竊維採買土貨訂爲專條內港行輪載於附約不獨門戶洞關卽堂奧腹地亦無不流通貿易日盛月新居交通之時代而爲閉塞抵制之謀誠非策矣顧各國約開口岸動多牽掣實費磋商或此國所索專界而別國藉口均霑或甲國業已允行而乙國又來駁議誠不如自開商埠猶足顧主權而防流弊也湘省自岳州開埠章程一切尙稱謹嚴顧地處下游於湘省全境仍隔重湖土貨貿遷無甚關係又夙爲經過孔道並非商貨聚集之場故開辦多年洋商不樂僑居關稅亦從未暢旺迨二十六年英日在上海議訂商約仍不免於長沙開埠之要求長沙固省會要區然南

來商貨率聚於長沙上游外來商輪停泊暫經仍換內港執照上駛以就市場此亦他處開埠所罕有之辦法臣查湖南全省商務本以常德湘潭爲兩大市场蓋滇黔百貨輸委中原由沅水經流以達長江流域無不以常德爲停儲改運之區湘潭則西南路煤鐵紙煙行棧所集河水寬深擅商場之形勢遠勝省垣而又萍鄉鐵路已達縣屬洙州尤爲交通要道臣往在鄂垣聞外國商家議及南省商務咸謂口岸建置地勢未宜致使土產之銷不暢交易之利不開誠爲可惜嘗爲之揣度情形知各國注意方殷恐有更端之請抵任以來卽電致上海商約大臣呂海寰盛宣懷畧謂常德湘潭兩埠因現議自開請將此兩埠劃出勿入條約一面派委司道就該兩處切實履勘查得常德東門外皇經閣一帶堪以建設商場惟地較卑下尙須填築方能合用又對河之善卷村洲形

勢略高或可預備擴充作爲租界湘潭繁盛之處在城外西南一帶袤延十餘里英日商人二年前已援照內港章程在該處租設碼頭堆棧與長沙從前情事相同雖不責令遷移而該處人煙太密品類不齊亦未便卽作爲租界止能劃定河街一段爲輪船停泊之處惟對河南岸驛枕山面水氣局較寬擬在該處指明界址爲將來各國商家租建之區以上兩處均因迫於地勢故參用內港行輪附件中沿河兩岸之說不爲指定一隅且免限制過嚴轉令範圍易越其各種章程則謹守岳州自開口岸舊章苟非於地方情勢大有不宜不欲輕爲改動而所尤爲注意者則地方巡警工程諸事必操之自我庶足泯異議而保主權至該處關務監督常德應歸岳州關監督兼辦湘潭應歸長沙關監督兼辦其開埠經費常德踞江漢岳州兩關之上流商務擴張局面自必恢闊建

置各項未便過從減省致召譏評擬請

飭下戶部先行籌撥的款二十萬兩以應要需仍責成該監督覈實動支逐款報銷不得略涉濫費湘潭與省城相離僅九十里輪船往還頃刻可達用人辦事兼顧非難應卽作爲長沙分關一切可從節省擬飭該監督暫從關稅項下提撥動支實用實銷勿稍浮冒以上籌辦自開口岸各情均於開通商務之中力存保守主權之意如蒙

俞允應請

飭下外務部先行立案一面由臣督飭洋務局司道暨該監督等會同覈議詳細章程再行咨部覆覈通咨各國駐使定期開關所有擬辦常德湘潭各自開口岸大致情形是否有當理合會同湖廣總督臣張之洞恭摺具陳伏乞

皇太后

皇上聖鑒訓示謹

奏

報効學堂經費請獎摺

光緒三十一年六月

奏爲知府報効學堂經費鉅款援案懇

恩獎勵以昭激勸恭摺仰祈

聖鑒事竊據湖南試用知府涂懋儒稟稱伊故祖湖廣總督涂宗瀛前因病奏請開缺之後曾擬卜居長沙於光緒九年置有善化縣境內稻田地方房屋二十四所並園土地基等項共值價銀一萬八千兩茲因

朝廷振興學務情願將此項屋產全數捐助學堂經費並聲明世受

國恩不敢仰邀議敘呈請

奏咨立案前來臣伏念各省開辦學堂款項皆苦支絀自紳富慨捐貲產以補官力之不足

朝廷照章給獎天下靡然嚮風近年以來報効時有所聞裨益學界良非淺鮮該員涂懋儒以祖遺屋產捐入學堂覈其所值已及一萬八千兩自非熱心教育何能慨捐如此鉅款雖據稱不敢仰邀議敘然不加以優獎實不足昭激勵而勸方來查戶部奏定報効新章凡報効萬餘金之員如係正印實官准給獎正印實官升階等語又查本年四月間河南舞陽縣知縣李文烈捐銀一萬二千兩興建學堂經河南撫臣奏請以知府在任候補奉硃批著照所請該部知道欽此欽遵在案今涂懋儒捐銀一萬八千兩覈與知府捐升道員銀數不惟有盈無絀抑且所盈甚鉅是

與李文烈捐款事同一律而數則過之合無仰懇

天恩俯准將湖南試用知府涂懋儒以道員仍留原省歸候補班
補用以示鼓勵出自

逾格鴻慈除分咨外所有知府報効學堂經費鉅款懇給獎勵緣
由理合恭摺具陳伏祈

皇太后

皇上聖鑒訓示謹

奏

湘省礦務自保利權摺

光緒三十一年六月

奏爲籌辦湘省礦務擬先將平江金礦改用西法自行開采以保
利權而杜隱患恭摺密陳仰祈

聖鑒事竊查湘省礦產饒富環球豔稱久爲外人所涎羨近年以

來疊由前撫臣設法保護設立礦務總局及礦務總公司並更定總公司詳細章程均經奏奉

俞旨允准在案臣到任後訪知湘省礦痞素多往往勾串外商私立合同朦售礦產又經將著名痞徒嚴密查拏量予懲處近雖稍知斂跡然大利所在人必爭趨抑且牽及外人動相挾制若不亟籌妥策必至防不勝防毫無實際現與該局司道熟商辦法惟有擇礦產之尤著者自辦一二處俟其成效大著樹之風聲則足以堅紳民愛護之心卽隱以消異族覬覦之志茲查有岳州府屬平江縣黃金洞金礦礦質最佳去歲夏秋之間與商璞來克英商揆士美商薩達禮三次入山窺探並有痞棍勾引希圖購地之案該礦本由礦務局用土法開辦所獲不敷成本亦經延聘外國礦師祇以技藝不精機器又不合用幾同廢置當飭該局遴聘德國著

名礦師柯和驗有該國大學堂卒業文憑與之詳立合同嚴定權
限務期周妥一無流弊又經派員偕往驗看取苗化鍊見其含金
甚富不致虧折然後令其購買新機仍兼用舊存機件開窿試辦
局本不足或挪借官款或招集商股總期竭力辦成自保地利一
俟辦有眉目再行詳晰奏聞蓋湘省今日此舉雖不免露肘決踵
之情形而實爲拔本塞源之至計事關中國利權命脈斷不敢稍
滋疑阻貽誤將來除分咨外理合恭摺密陳伏乞

皇太后

皇上聖鑒再此摺牽涉外交是以敬謹密陳應請毋庸發鈔合併
聲明謹

奏

遵改監獄羈所摺

光緒三十一年六月

奏爲遵

旨改造監獄羈所辦理情形恭摺仰祈

聖鑒事竊臣恭查疊次

諭旨凡於慎刑恤獄之事諄諄告誡三令五申薄海臣民同深感
激臣於所到地方凡監羈處所隨在留心履勘調查其有不合法
式妨害生命之處無不立飭修造以期恤有罪而甞

皇仁臣於正月履任湖南未及旬日親赴司府兩縣監獄羈所切
實審視見其湫隘卑溼較之他省尤爲加甚而其黑闇閉塞不通
光氣監管各犯蜷伏蝟縮或罹疾病情形可憐隨飭善後局竭力
設法籌撥銀二萬兩責成臬司督率府縣一律興修並參觀東西
各國監獄各圖釋其意義親加指授剋日興工正在催趨修造恭
奉四月二十二十一等日電傳

上諭伍廷芳沈家本等奏請將律例重刑酌改並禁止刑訊拖累變通笞杖辦法清查監獄羈所等條此次奏定章程全行照准等因欽此臣跪聆之下感佩莫名旋准修訂法律大臣伍廷芳沈家本等咨到原奏內稱各省監羈偏窄湫隘夏則人多穢積疫癘頻仍冬則嚴寒裂膚凍餒交迫瘵斃相繼冤苦莫伸請飭各省督撫將軍都統府尹設法籌款將臬司府廳州縣各衙門內監外監一律大加修改地面務須寬敞屋宇務須整潔等語適與臣籌辦各節意見相同因復飭令晝夜趨工限期竣事臣復經隨時親往勘視遇有未盡合法之處加意改定茲於六月初旬據署按察使張鶴齡呈報改造監獄羈所一律竣工臣覆加驗收查得監羈之處分作平房樓房兩層明爽高燥而工料堅實位置合宜於保衛生命之中兼寓嚴密防範之意實屬纖悉周到無懈可攻又各監附

設別院女監亦極寬敞潔淨另造黑屋數間以懲刁悍罪犯轉堂一所以備朝夕訓誡工廠兩處以資習練手藝操場一區兼使運動養生無不斟酌得宜臻於完善一面飭該署司按照原奏選派專官條內之意詳定管理章程通行所屬以杜凌虐剋扣諸弊并繪圖貼說頒發府廳州縣飭令竭力籌款仿照改修所有籌辦改造監羈情形理合恭摺具陳伏乞

皇太后

皇上聖鑒謹

奏

參革直隸州片

光緒三十一年六月

再靖州直隸州知州沈贊勳歷任繁劇初頗以勤能著稱近來性情堅復往往不恤人言此次湖南學臣支恆榮按臨該州考試關

防甚嚴沈贊颺所派執役人等不待考童出棚完竣強欲入內被阻不服致相爭鬧沈贊颺不加禁阻反恣意左袒丁役飾詞妄瀆幾釀事端實屬任性妄爲有干功令未便稍事姑容相應請

旨將靖州直隸州知州沈贊颺卽行革職以肅官方謹附片具陳伏祈

聖鑒謹

奏

端忠敏公奏稿卷五終

四十四

端忠敏公奏稿卷五終

端忠敏公奏稿卷六

考查政治調員差委摺

清單附

奏爲遵

旨考察政治調員差委仰祈

聖鑒事竊臣等恭奉本年六月十四日

上諭方今時局艱難百端待理朝廷屢下明詔力圖變法銳意振興數年以來規模雖具而實效未彰總由承辦人員向無講求未能洞達原委似此因循敷衍何由起衰弱而救顛危茲特簡載澤戴鴻慈徐世昌端方等隨帶人員分赴東西洋各國考察一切政治以期擇善而從嗣後再行選派分班前往其各隨事諮詢悉心體察用備甄採毋負委任等因欽此旋於六月二十五日准軍機處片交面奉

諭旨著派商部左丞紹英隨同出洋考察各國政治欽此仰見
朝廷銳意圖強實事求是之至意臣等伏維通變化裁古有明訓
方今各國政治藝術日新月異進步甚速博采而參觀之取善從
長良多裨益顧我中國近十餘年來非不派學生出洋遣員遊歷
卒未聞卓著成效者則由於提倡之不力研究之不精是以風氣
雖開而持論者或參成見規模雖狃而任事者絕少專門僅襲皮
毛難言實濟今
朝廷洞鑒於此
特命臣等分赴各國考察一切以爲先路之導俾海內人民咸曉
然於我

皇太后

皇上宵旰焦勞將實行其因革損益之方以收富國強兵之效大

局幸甚天下幸甚第_臣等自顧駑庸愧無識略渥膺寵命隕越深虞惟有勉竭血誠恪遵

聖諭於應行考察諸事博訪詳諮悉心體察以期有裨萬一上副聖厯至此次所帶人員必須擇其心地純正識見開通者方足以分任其事現經迭次公同商酌各據所知詳加選擇謹將所調京外文武各員彙繕名單恭呈

御覽俟奉

旨允准後卽由_臣等分別行知在京各衙門及各省督撫迅飭各該員剋日治裝查向章隨帶京外各員免扣資俸候選者免其投供仍應照章辦理以便分帶前往其餘各員應由_臣等另行咨調所有遵

旨酌調隨帶人員緣由理合恭摺具陳伏乞

端恩改入高

卷八

皇太后

皇上聖鑒訓示謹

奏

謹將考察政治隨帶京外文武各員繕具清單恭呈
御覽

計開

隨帶京職人員

內閣中書陸宗輿

翰林院編修鄧邦述

翰林院編修關冕鈞

翰林院檢討唐寶鐔

翰林院庶吉士熊希齡

翰林院庶吉士麥鴻鈞

商部員外郎楊道霖

商部員外郎柏銳

商部主事田步蟾

商部主事陸長備

商部主事章宗祥

商部主事錢承鈇

戶部郎中薩蔭圖

戶部主事王伊

戶部主事龍建章

兵部主事關廣麟

刑部郎中段書雲

候選郎中刑部員外郎李焜瀛

隨帶外官暨陸海軍人員

直隸候補道朱寶奎

直隸候補道姚錫光

湖南補用道金還

分省補用道袁克定

候選道王豐鎬

道銜溫秉忠

江西南昌府知府沈曾植

湖南長沙府知府劉若曾

候選知府施肇基

候選知府伍光建

候選知府關景賢

候選知府丁士源

選用同知陳琪

候選知縣岳昭燭

選用知縣田吳炤

分省試用縣丞劉恩源

湖南補用參將姚廣順

湖南常備軍統帶官舒清阿

留直補用都司程璧光

縣丞銜曹復賡

調員隨同考察片

再掌江西道監察御史周樹模掌湖廣道監察御史劉彭年志趣

正大才識明通均於泰西各國政治夙所究心臣世昌臣端方知之有素可否懇

恩飭下該御史等隨同臣等出洋考察一切以資臂助出自聖裁謹附片具陳伏乞

聖鑒訓示謹

奏

紫禁城內騎馬謝 恩摺 光緒三十一年七月

奏爲恭謝

天恩仰祈

聖鑒事竊照光緒三十一年七月初三日奉

上諭湖南巡撫端方著加恩在紫城內騎馬欽此跪聆之下悚感難名伏念臣備職臺圻依光

日月方幸承

恩入覲遂連年戀

闕之誠更欣被

命遄征厠四國行人之選乃荷

榮施逾格

寵逮非常待漏趨

朝先覲蕩平之軌入門策馬復聯

禁近之班叨

異數之頻頒極微臣之榮遇臣惟有勉圖十駕期副九能常存馭

索之心庶竭蹄涔之報此日克遵

王路策駑質而願效馳驅他時共賦皇華託旆征而每懷咨度所

有感激下忱謹具摺恭謝

天恩伏祈

皇太后

皇上聖鑒謹

奏

開用關防片

再臣等奉

命分赴各國考察政治應須刊刻關防以昭信守茲由外務部刊就木質關防二顆文曰

欽差出使各國考察政治大臣關防咨送前來臣等當卽敬謹分領均於本年七月二十六日開用理合附片陳明伏乞

聖鑒謹

奏

請立停科舉摺 光緒三十一年八月

奏爲時艱時迫亟圖補救擬請立停科舉推廣學校並妥籌辦法以期有利無弊恭摺會陳仰祈

聖鑒事竊維科舉之弊古今人言之綦詳而科舉之阻礙學堂妨誤人才臣世凱臣之洞等亦迭經

奏陳久在

聖明昭鑒之中無煩縷述以瀆

宸聽是以前奉

諭旨遞減科舉中額期以三科減盡十年之後取士概歸學堂固已明示天下以作新之基而徐俟夫時機之至所有爲興學培才計者用意至爲深遠臣等默觀大局熟察時趨覺現在危迫情形更甚曩日竭力振作實同一刻千金而科舉一日不停士人皆有

僥倖得第之心以分其砥礪實修之志民間更相率觀望私立學堂者絕少又斷非公家財力所能普及學堂決無大興之望就目前而論縱使科舉立停學堂徧設亦必須十數年後人才始盛如再遲至十年甫停科舉學堂有遷延之勢人才非急切可成又必須二十餘年後始得多士之用強鄰環伺詎能我待近數年來各國盼我維新勸我變法每疑我拘牽舊習譏我首鼠兩端羣懷不信之心未改輕侮之意轉瞬日俄和議一定中國大局益危斯時必有殊常之舉動方足化羣疑而消積侮科舉夙爲外人詬病學堂最爲新政大端一旦毅然決然舍其舊而新是謀則風聲所樹觀聽一傾羣且刮目相看推誠相與而中國士子之留學外洋者亦知進身之路歸重學堂一途益將勵志潛修不爲邪說浮言所惑顯收有用之才俊隱戢不虞之詭謀所關甚宏收效甚鉅且設

立學堂者並非專爲儲才乃以開通民智爲主使人人獲有普及之教育具有普通之智能上知效忠於國下得自謀其生也其才高者固足以佐治理次者亦不失爲合格之國民兵農工商各完其義務而分任其事業婦人孺子亦不使佚處而興教於家庭無地無學無人不學以此致富奚不富以此圖強奚不強故不獨普之勝法日之勝俄識者皆歸其功於小學校教師卽其他文明之邦強盛之源亦孰不基於學校而我國獨相形見絀者則以科舉不停學校不廣士心旣莫能堅定民智復無由大開求其進化日新也難矣故欲補救時艱必自推廣學校始而欲推廣學校必自先停科舉始擬請

宸衷獨斷雷厲風行立沛

綸音停罷科舉庶幾廣學育才化民成俗內定國是外服強隣轉

危爲安胥基於此雖然科舉停矣尙有切要之辦法數端而學堂乃可相維於不敝一在於尊經學也或慮科舉一停將至荒經不知習舉業者未必皆湛深經術但因科場題目所在不得不記誦經文又因詞章敷佐之需不得不掇拾經字故自四書五經而外他經多束置不觀卽五經亦不皆全讀讀者亦不盡能解是何與於傳經今學堂奏定章程首以經學根柢爲重小學中學均限定讀經講經溫經晷刻不准減少計中學畢業共需讀過十經並通大義而大學堂通儒院更設有經學專科餘如史學文學理學諸門凡舊學所有者皆包括無遺且較爲詳備蓋於保存國粹尤爲兢兢所慮辦學之人喜新厭故不知尊經則雖諸生備諸各種科學亦僅造成一汎濫無本之人才何濟於用應請飭下各省督撫學政責成辦理學務人員注意經學暨國文國史

則舊學非但不慮荒廢抑且日見昌明一在於崇品行也查科場試士但憑文字之短長不問人品之賢否是以暗中摸索最足爲世詬譏今學堂定章於各科學外另立品行一門亦用積分法與各門科學一體考核同記分數共分言語容止行禮作事交際出游六項隨處稽查第其等差至考試時亦以該生平日品行分數併計合算亟應申明定章請

飭各省認真遵辦則人人可期達材成德自不至於越矩偁規一師範宜速造就也各省學堂之不多患不在無款無地而在無師
應請

旨切飭各省多派中學已通之士出洋就學分習速成師範及完全師範兩種尤以多派舉貢生員爲善並於各省會多設師範傳習所師資既富學自易興此爲辦學入手第一要義不可稍涉遲

緩一未畢業之學生暫勿率取也各省設立學堂遲早不一程度不齊或卒業有期或畢課尙早若不待畢業驟加考試則苟且速化弊將日滋若必待全行畢業則各省之辦學較遲者必至缺其選舉士林又將失望今籌一通融辦法既不同科舉之敷衍故事亦不向學堂而遷就濫登要使取士仍歸學堂之中學堂不蹈科舉之弊擬請此數年內除學堂實係畢業者屆期奏請考試外其餘則專取已經畢業之簡易科師範生予以舉人進士出身既可勸教育之員擴興學之基並隱以勵績學而杜倖進外國無速成小中高等各學而有速成師範學具有深意至五年以後完全師範生畢業者已多更足以應選舉而有餘此等師範生類皆國文已優學術純謹斷無流弊且多係舉貢生員爲之本可以得科第之人亦非僥倖迨十年以後各省學堂逐漸畢業人才濟濟更

可不窮於用一舊學應舉之寒儒宜籌出路也文士失職生計頓蹙除年壯才敏者入師範學堂外其不能爲師範生者賢而安分則困窮可憫不肖而無賴或至爲非生事亦甚可憂擬請十年三科之內各省優貢照舊舉行己酉科拔貢亦照舊辦理皆仍於舊學生員中考取其已入學堂者照章不准應考惟優貢之額過少擬請按省分之大小酌量增加分別錄取

朝考後用爲京官知縣等項三科後卽行請

旨停止其已中舉人五貢者此三科內擬令各省督撫學政每三年一次保送舉貢若干名略照會試中額加兩三倍送京考試凡算學地理財政兵事交涉鐵路礦務警察外國政法等事但有一長皆可保送俟考試時分別去取試以經義史論一場專門學一場共兩場其取定者酌量用爲主事中書學正知縣等官如此則

鄉試雖停而生員可以得優拔貢會試雖停而舉貢可以考官職正科舉之名專歸於急需之學堂廣登進之途藉恤夫舊學之寒士庶乎平允易行各得其所少長同臻於有用新舊遞嬗於無形矣以上五條皆停科舉後最爲切要之端而行之可期無弊應請一併

飭下各省督撫學政切實遵辦至各省學堂未辦者宜從速提倡已辦者宜極力擴充以及各堂學生之良莠與夫辦理學務人員之功過均應隨時認真考察分別勸懲亦皆各省督撫學政所不得稍辭其責者也其一切學堂畢業考試暨

簡放考官等事自應悉遵奏定章程辦理臣等爲補救時艱妥籌辦法起見往復商榷意見相同是否尙當謹合詞恭摺具陳伏祈皇太后

皇上聖鑒訓示謹

奏

設法收回關稅郵政摺

光緒三十一年八月

奏爲關稅郵政亟應設法收回自辦以重主權恭摺密陳仰祈
聖鑒事竊自中外互市以來各口創設洋關規制初立情形未諳
一切鉤稽之役自不得不委任西人並特設總稅務司而以赫德
總攬大綱各關稅務司均聽命於赫德關道名爲監督實無權力
與聞稅務不過爲之鎮壓而已沿江沿海口岸日益增多赫德之
勢力範圍遂日益加廣而各關稅務司遂爲西人獨擅之技中國
更無能預其任者惟稅務爲國家內政主權所係不容旁假卽爲
權宜之計一時暫用外人藉收指臂之助然不宜曠日持久不思
變計也查日本初設稅關其權亦曾爲西人所有厥後國人深知

其害遂與訂立合同期滿則退今則盡用本國之人無一西人矣
赫德掌理中國稅務歷數十年當此國勢方弱之秋設無故議去
其人或虞有窒礙難行之處茲幸赫德年老自請回國正可乘此
機會優加以禮而實收其權赫德渥受

天恩應知感激必將其經手事件及所有辦法詳明開呈恭候
簡派大臣督辦並派通曉稅務人員與之交替赫德既去各關稅
務司之權力既可加以削減而以全權畀之關道凡有正副員者
留副去正其權自輕再經數載國勢稍強人才日多卽不難悉數
盡去此時最要辦法在留意於出洋學生預儲將來可用之才中
國學生游學外洋者心思才力往往駕乎西人若令資性聰穎學
業已有根據者詳求其理財之法

明示以擢用之途不出三年深諳稅務之人才當不虞其匱乏現

惟於久任海關道員中選擇公忠爲國洞明稅則之人使循其已定之章程濟以實心之考究事事認真不予西人以指摘之端斯已替之權可以漸次收回倘不趁此機會收回自辦或任赫德舉自代之人或歸他國人持征權之柄是此權永無收回之期非計之得也再郵政亦內政之一中國試辦之時恐多阻撓是以由總稅務司代理而每年入不敷出津貼至七十萬金之多又爲東西洋各國所未有夫郵政原爲交通利便而設今既假手外人設有軍國重要機關警密消息一切不行是則臨時之洩漏阻礙流弊何窮是以東西各國皆歸國家自辦日本郵便由遞信大臣主政與鐵路電政並重而郵便每年進款約一千八百四十五萬餘元爲歲入一大宗今中國既假人以權且需津貼其費所失過多殊覺非計且赫德委任洋員分辦郵信洋員不能自辦仍假手於華

人名爲郵政改良其實延俄失誤之弊仍所不免利害相權斷斷不如自辦近年學堂林立民智漸開郵稅所入可望日漸增多似不可舍此利權聽其外溢擬請於赫德歸國時由外務部飭將郵政事宜一併交出請

旨派員接管其所用洋員暫可勿去一面專派學生前往日本學習郵務此事非他專門學可比兩年之內即可回國任事固不虞接辦之無人要政之中較也歷觀古今中外歷史未有稅務郵政兩事授柄外人而能立國者果皆收回自辦挽回利權一分卽保持主權一分外人漸知中國於自治之權力能振作庶幾侵占主權之詭謀自然消泯洵抵制之一端而圖強之一策也臣愚昧之見是否有當理合恭摺具陳伏祈

皇太后

皇上聖鑒訓示謹

奏

條陳學務片

光緒三十一年八月

再近年以來外侮頻仍時艱日亟海內承學之士知非出洋游學師其所長不足強國是以不憚艱苦遠涉重瀛留學東西各國者官費自費計數千人大都忠愛

國家勤求學問卽間有跼蹐不羈者其議論或形偏激亦不過百分中之一二自上年奉

奏定約束章程咸知悚遵遂無人不專心致志切實求學查該學生等遠離鄉井或資斧缺乏或疾病偶侵備受種種困難而堅苦嚮學始終不渝其志行尤爲難得日本派遣游學之初其學生皆經國家優禮體恤無微不至故能各求專長以備器使此日富強

之效皆昔日獎勵游學生之所致今中國游學之士日見其多擬請

旨量予獎勵示以各學生學問身體無時不在

聖明屢念之中

飭下出使各國大臣隨時考察認真愛護設有資斧不濟或患疾病者無論官費自費概由出使大臣酌量情形資其費用既益發其愛國之精神兼以堅其勤學之志力再各種專門之學如政治法律財政外交教育格致農商路礦各科尙爲中國所未備並請旨飭令出使各國大臣督飭學生各視其性之所近擇一專門苦心研究學成歸國庶足分任振興之務而應緩急之需如此則成材日衆冀可以弭外侮而濟時艱臣愚昧之見是否有當理合附片具陳伏乞

聖鑒謹

奏

放洋日期摺

光緒三十一年十一月

奏爲恭報放洋日期恭摺仰祈

聖鑒事竊照臣等伏膺

簡命出使各國考察政治屢蒙

訓誨周詳仰見

皇太后

皇上銳意圖強遠稽博采

聖猷廣大欽服莫名旋經臣等慎選參隨部署行李又因八月間

未能成行並奉

旨續派大臣前往一切又須商酌更調行期展緩茲經料理就緒

出而思改入之長高

卷六

一三一

復於十月二十七日諄

訓陛辭又蒙

指示剴切愈增感悚臣等先與臣載澤等商定分途出洋卽於十一月十一日啟程出京取道天津沿途經督臣袁世凱密爲布置極其周妥於十一月二十日行抵上海購定美國公司西伯里亞輪船船票於十一月二十二日放洋先赴美洲考察一切再分赴德俄意奧等國俟考察事件稍有頭緒卽當隨時奏陳以紓宸廑所有臣等放洋日期理合恭摺具報伏祈

皇太后

皇上聖鑒謹

奏

奏調知府飭令回省片

光緒三十二年正月

再臣等此次奏調江西南昌府知府沈曾植原以該員學識淹貫欲留在滬辦理編譯事宜現在業經欽奉諭旨設立考察政治館自可毋須在滬別設譯局以省虛糜該員本係實缺人員未便久令懸宕應卽飭令銷差回省俾供職守除分咨查照外理合附片具陳伏祈

聖鑒謹

奏

行抵美京情形摺

奏爲恭報行抵美京大概情形恭摺仰祈

聖鑒事竊臣等奉

命出洋考察政治於光緒三十一年十一月二十三日乘坐西伯里亞輪船放洋曾經

奏報在案沿途風帆平順經過日本長崎神戶橫濱及美屬檀香山埠等處十二月十八日抵美屬舊金山埠登岸兩日卽行換坐火車便道查看芝加高各省工廠二十九日抵美京華盛頓先期電商駐美使臣與該國外交部定於三十日覲見美總統臣等於
是日恭齋

欽頒國書率參贊等呈遞進謁如禮此次臣等在金山登岸卽承美廷派員照料接待甚優所過各地方均由該國紳商出貲設議備極款洽及抵美京復承美總統格外優禮覲見之日慰問殷勤茗酒戲酬坐譚移晷爲從來所未見臣等告以此次銜

命西來專司考察但求隨時導觀藉資考鏡他事概不與聞美總統欣然樂允現正分投閱看排日咨詢冀參觀憲法之源流兼考立官之本末雖覺事繁時迫不敢畏難苟安至中國旅外商民自

神戶橫濱以至檀香山舊金山兩埠無不結隊歡迎輸忱恐後亦有寄居他埠電致悃誠者該商民等夙有愛國之懷因見

朝廷銳意圖強更覺人人感奮臣等奉宣

皇太后

皇上德意悉加慰勞該商民等備聞

朝廷動卹遠商無微不至衆情尤爲鼓舞足以上慰

宸厪所有抵美後大概情形理合恭摺具奏伏祈

皇太后

皇上聖鑒謹

奏

在美考查情形摺 光緒三十二年正月

奏爲敬陳在美考察大概情形並赴歐日期恭摺仰祈

聖鑒事竊臣等於光緒三十一年十二月二十九日行抵美京華盛頓曾將呈遞

國書日期奏明在案臣等於謁見美總統後卽由美廷派員導觀各處自公署學堂議院下及商肆工廠排日考求又至美之東境紐約費城波士頓等省閱視一切所至各處該國士民無不傾誠相告又得駐美使臣梁誠會同考覈盡心討論諸事更易周悉計在美境一月有餘未嘗片刻安暇其有不及調查者並派參隨各員分途前往冀收兼聽之效又於美國行政各部索取現行章程酌派參隨學生摘要譯出以資參考雖時日較促智慮不齊而於美國大要情形已可略知梗概大抵美以工商立國純任民權與中國政體本屬不能強同然其規畫之周詳秩序之不紊當日設

施成迹具在簡編要其馴致富強實非無故藉資取鏡所益甚多
至於商業之發達工作之精良包舉恢宏經營闊大一學堂一工
廠建造之費動逾千百萬金不惟中國所難能抑亦歐洲所歎畏
蓋美爲新造之國魄力正雄故其一切措施難以驟相仿效而太
平洋之商業航利則我與美實共有之此又中國所急宜注意競
爭刻不容緩者也現就所得情形略加裒輯容俟歐洲考察事畢
擇其可資取法者據實彙陳臣等卽於本年正月二十二日乘輪
放洋取道英法前赴德國并酌留參隨一二員在美考察以竟未
盡之務除俟到德後再將考察各情陸續奏報外所有在美考察
大概情形及赴歐日期謹繕摺具陳伏祈
皇太后

皇上聖鑒謹

奏

調員赴俄片 光緒三十二年四月

再臣等在美考察事畢即當前赴歐洲各國陸續調查惟奏調人員中熟於俄文者較少查有候選知府桂芳諳習俄文深明國際該員向在北洋當差出京之時業與督臣袁世凱商定惟因正議東三省條約該員須備諮問未能遽行現在議約事畢應請飭下直隸總督轉飭該員尅日束裝前赴俄國候臣等到俄之日隨同考察以資臂助謹附片具陳伏祈

聖鑒訓示謹

奏

美國派精琦接待片 光緒三十二年四月

再臣等行抵金山即由美總統派遣前充中國條議銀幣專使精

琪到埠迎接晤談之頃曾述美總統因華工禁約一事極願轉圜而工黨主持恐難如志等語臣等當告以此次歷赴各邦專爲考察政治起見餘事概不聞問嗣後游覽各處大半皆由精琪指導照護甚周初未談及他項事務察其來意不過因曾赴中國易通欸洽祇爲接待之員並無干涉之事合併附片密陳伏祈

聖鑒謹

奏

接見各華商片

光緒三十二年四月

再旅居外洋各華商去國日久類能經營學業而愛國之念則仍歷久不渝臣等接見之時遇有心地明白者無不勸其就地興辦學堂培養子弟並戒其勿染外洋習氣分立黨派或有入會情事致爲人所攻擊該商民等聞言感服頗知體會經此再三勸諭當

能不赴歧趨以仰副

朝廷愛育遠人之至意謹附片密陳伏祈

聖鑒謹

奏

到德考查情形摺

光緒三十二年三月

奏爲恭報到德後考察大概情形暨起程日期恭摺仰祈

聖鑒事竊臣等於光緒三十二年正月二十二日自美國紐約放洋道出英法因各登岸游歷旋於二月十三日行抵德京柏林適值德皇有事出游一時未能入覲當與該國首相及外部接談請其先爲派員引導俾免曠時廢事卽經該國派令水師提督蓋洛上海總領事克納貝隨事照料所有應看官署學堂工廠均由該員排日導觀仍一面督飭參隨購買書籍擇要分譯一如在美辦

法嗣德皇歸國定期覲見臣等於二月三十日恭齋

國書呈遞如儀德皇接見之頃首先敬問

皇太后

皇上安好並經設筵款待親與皇后入坐獻酬慰問殷勤交誼極形輯睦德皇論及中國變法必以練兵爲先至於政治措施正宜自審國勢求其各當事機貴有獨具之規模不在徒摹夫形式其言至爲懇切業將當時大略情形撮要電陳

聖鑒臣等即於覲見之後前赴克虜伯礮廠及德國西境各省閱視兵操調查工礦又兼旬始畢計在德國一月有餘駐居柏林之日較多而在外博覽周諮所到之區其官商之優待歡迎均與美洲相等查德國以威定霸不及百年而陸軍強名幾振歐海揆其立國之意專注重於練兵故國民皆有尙武之精神卽無不以服

從爲主義至於用人行政則多以兵法部勒其間氣象森嚴規矩整肅其人民習俗亦覺有勤儉質樸之風與中國最爲相近蓋其長處在朝無防民之政而國體自尊人有獨立之心而進步甚猛是以日本維新以來事事取資於德行之三十載遂致勃興中國近多歆羨日本之強而不知溯始窮原正當以德爲借鏡至於德皇所論適自明其強盛之由在中國雖不必處處規隨而其良法美意行之有效者則固當急於師仿不容刻緩者也此次所譯之書因德文繁重難通譯材太少恐不免於罣漏唯有多購書籍回國以待研求駐德使臣廕昌於德國情形最爲熟悉語言尤極諳練正值料理交卸在德京則尙可考究在外省則無暇覽觀深惜少一討論之助現在考察事竣定於三月二十五日啓程遵旨先赴丹國游歷仍回柏林再赴俄奧各國以期路途省便除俟

到丹後再行奏報外所有抵德考察大概情形理合恭摺具陳伏
祈

皇太后

皇上聖鑒謹

奏

游歷丹馬瑞典那威情形摺

光緒三十二年四月

奏爲恭報遵

旨游歷丹馬瑞典那威三國情形並赴奧日期恭摺仰祈

聖鑒事竊臣等在德京及瑞典途次前後准外務部電開據丹馬
瑞典那威三國懇請游歷奉

旨准其前往作爲游歷不備國書等因欽遵知照前來時值臣等
在德考察漸已就緒正擬定期赴奧探知丹馬等國界連德境應

卽先往游歷以免路途周折曾經

奏明在案臣等旋於光緒三十二年三月二十三日自柏林啟程赴丹二十四日覲見丹皇二十七日赴瑞二十八日覲見瑞皇因瑞皇年老養疴在法由其攝政皇太子接見四月初三日赴那初四日覲見那皇三國覲見之日國皇皆首先恭問

皇太后

皇上安好臣等亦敬宣

朝廷德意慰問如儀內惟丹皇初嗣大位尙在穿孝未經欵讌餘皆設筵邀飲接待極優并經各贈寶星情誼至爲懇洽至於游歷各處亦不外學堂工廠數端臣等伏查丹瑞那等國皆以弱小介居德俄兩大之間三國之中自以瑞典爲大而丹馬那威則地相髣髴其土壤之狹人民之少初不及中國一省瑞那分析未久那

威直接俄疆與我祇一俄之隔故其形迹與中國較親而亦有逼處強鄰之懼然揆其立國本末教育工業均極講求大抵學堂林立男女無不入校讀書者而商務則各占優勝丹馬之磁器皮酒瑞典之煉鋼廠德律風公司那威之紡織漁業皆爲出口貨物之大宗亦爲歐西商家所共許至其街衢寬潔屋宇整齊軌路交通帆船絡繹則又三國之所同而與歐洲大國無甚差異者也海陸各軍雖不能經營周備然各有鐵甲戰艦數隻十數隻不等魚雷快艇又十倍其鐵甲之數蓋其自揣雖必無戰勝攻取之功而實不敢忘防守自全之具况丹那之製造快鎗瑞典之操習馬隊亦皆有以自見非他國所能輕視者此次該三國之懇請游歷半緣其國與中國通商有年輪船貨物時相往來欲藉以爲聯絡商情之助在外人或謂國地褊小等諸自鄙而以臣等心目所見細加

研求則其所以競存之故實有可以不拔之基其措理甚難其經營亦復甚苦臣等於親歷各強國之後復覩此邦蓋雖不必有所取材而適足增無窮之閱歷矣茲於四月初八日遄返柏林又因德國聯邦中薩克生巴延兩國來請游覽德外部定約在前遂於初十日順道前往事畢即行赴奧除俟到奧後再行奏報外所有遵旨游歷丹瑞那三國情形理合恭摺具陳伏祈

皇太后

皇上聖鑒謹

奏

到奧情形摺

光緒三十二年四月

奏爲恭報到奧後大概情形並赴俄日期恭摺具陳仰祈

聖鑒事竊臣等於光緒三十二年四月初十日自柏林啟程途經

德聯邦薩克生巴延兩國由德外部商定順道前往游歷曾經
奏明在案旋於十一日抵薩克生十三日抵巴延兩國王均各殷
殷接見欵洽備至贈送寶星該兩國在德聯邦中立國最久名譽
著稱尤致力於學業之事聲名文物衆口交推國中藏書甚多兼
講求印刷裝訂之法備極精美各國藏書樓所有圖籍大半取給
於此實爲歐洲鉅觀嗣於十六日行抵奧京維也納十八日入覲
奧皇恭遞

國書奧皇答問

皇太后

皇上安好接待殷勤十九日贈送寶星置酒欵讌奧皇入座親陪
情誼尤爲懇洽考察各事先經臣等開單函致前駐奧使臣楊晟
預爲調查采擇各門均稍有端倪該駐使臣雖當料理交卸之時

尙能竭力相助實爲難得抵奧之後又借現任駐使臣李經邁逐日閱視各學堂工廠并往匈牙利一帶考察諸務不及親往者仍派參隨分途往看雖在奧之日較短而緊要之處已均稽覽無遺查維也納自迭主盟會蔚爲名區奧皇遠略克勤遂躋強盛其注意軍隊考求武備專用全國皆兵主義與德國如出一途論者謂其兵儉樸耐勞實爲此邦特色而工廠中則槍礮子彈魚雷鐵甲占數最多規制亦甚詳備臣等所見如史高德礮廠曼里夏子彈廠懷鐵特魚雷廠經營締構幾幾欲與德之克虜伯廠爭衡奧國海口極少其善造戰艦乃復不遺餘力現在自造頭等戰艦三艘皆重一萬餘噸機器靈便多出新式歐洲各國咸稱其所造之礮於海軍最爲相宜訂購幾無虛日卽各廠所造子彈亦大半兼應他國之求臣遇事諮詢乃知外人備戒不虞各有不敢一日忘戰

之心其能力正不可及至奧匈兩處教育均以強迫爲先辦法章程亦與德國大致相合匈牙利之幼稚園分尋常特別及夏期三種辦法制度尤爲完善蓋外人之馴致富強初無他術仍不外教育之普及製造之精良要皆不恥相師期於盡善而已茲於四月二十四日啟程赴俄除俟到俄後再行奏陳外所有到奧大概情形謹恭摺具陳伏祈

皇太后

皇上聖鑒謹

奏

到俄情形摺

光緒三十二年閏四月

奏爲恭報到俄後大概情形恭摺具陳仰祈

聖鑒事竊照臣等前在奧國准駐俄使臣胡維德函稱俄國現開

議院民氣正囂請早日前往考察等語當將應辦各事趕緊辦完
即於光緒三十二年四月二十四日啟程赴俄二十六日行抵俄
京森彼得堡二十八日覲見俄皇恭遞

國書俄皇及皇后均敬問

皇太后

皇上安好并即設筵款待贈送寶星此行所帶參隨無論隨覲與
否亦經一律普給二三等寶星情誼實形周洽考察各事臣等在
德國時即經遴選參隨繙譯四員先行馳往分門調查並函請駐
俄使臣胡維德隨時指導俾期詳盡該駐使在俄已屆三年於俄
國政界情形平時本即留心此次尤屬熱誠幫助現在俄國內亂
未靖所有學堂工廠人數稍衆之區皆已停辦臣等抵俄後所見
之事亦止陸軍馬步各隊及未經停工之船廠槍礮廠數處其餘

全賴該駐使所譯各件以資稽核且現值俄國政府組織憲政之時中國尤應格外注意已屬該駐使於此項條議不厭詳求查俄國處歐亞兩洲之間幅員最廣素以雄力橫視環球各國猜忌之萌已非一日其政體久以專制著稱從前兵力盛強民間雖懷有追求立憲之心尙不敢存暴動非常之想戰敗之後始有種種要求當時迫於事勢不能不由政府許允近則籌借國債增練新兵政府威權又稍稍復振而議院所求各事未能事事允行是以上下相持頗滋疑沮臣等曾與該國前首相維特接談據稱該國預備立憲已逾百年究之民間知識猶未盡開一時甚難合度大抵此次宣布在政府不能不曲從輿論而斷不能滿其所欲深慮亂事難以消泯此俄國現籌立憲之實在情形也至於該國雖經敗亂武備經營尙復不遺餘力自借鉅帑後訓練益勤臣等所見陸

軍卽新募之衆俄皇親加簡閱軍容亦頗雄整俄國本有船廠現正增造軍艦有重至一萬七千噸者其餘他國代造代修之船所
在多有他若槍礮子彈則購造之數尤夥臣等所至各國凡有礮
彈各廠俄國多半有定購之品并派兵官監督製造是以補苴籌
措正復謀慮周詳實有未容輕視者矣臣等現將諸事辦畢卽於
閏四月初四日起程前赴荷蘭游歷所有到俄大概情形理合恭
摺具陳伏祈

皇太后

皇上聖鑒謹

奏

到義情形摺

奏爲恭報到義後大概情形并起程回國日期恭摺具陳仰祈

聖鑒事竊照 臣等在俄考察事竣卽經前往荷蘭游歷嗣因荷蘭與比國接壤不及半日之程適值考察政治大臣載澤等正在比京遂往晤商一切回荷後於光緒三十二年閏四月十六日起程赴義途經瑞士國都順道游覽又因義國米郎地方正開會場且其地爲義國北境一大都會工廠環集較羅馬爲盛有關考察是以先至米郎小住三日於二十三日行抵義京羅馬二十六日覲見義皇呈遞國書義皇及皇后均敬問皇太后

皇上安好義皇復與 臣等坐談移時二十八日設筵款待義皇皇后入座親陪並贈送寶星禮意優渥與前至各國相等考察各事 臣等在德國時預計在義事畢將附德國公司輪船回國船期已

定或有他事耽延必至調查不及而義文須從法文轉譯兼恐匆遽難詳特派法文較優之學生王繼曾陳籙及在義留學之趙貽璿等會同駐義使臣黃誥所派譯員分任譯述大致於憲法財政學堂軍政各門期其詳盡該學生等三月間卽已抵義臣等陸續奉

旨敕往丹瑞那荷等國游歷爲時旣久船期亦屢次更移該學生等轉得於此兩月之中從容遵譯於以上所指各門大半已臻詳密臣等到義後又偕駐使臣黃誥逐日觀覽並派參隨各員分途考察以期始終弗懈查義國爲歐洲舊邦從前國人迷信宗教國勢渙散爲法奧諸國蠶食殆盡自拿破崙事敗近數十年間得賢相嘉富爾逐漸規復肇造新基督教皇退處無權而政體大變庶事克修儼然有強國之望海軍精神制度旣可與各國抗衡其財政

又復經營不遺餘力度支之數歲有溢收商務亦蒸蒸日上地處
溫帶於農蠶最爲合宜物產豐饒製煉亦有進步卽如紡織一項
所織綢緞頗與法國有爭勝之意此次米郎會場大要注意漁業
蓋濱海之國往往於漁業不憚推求實於擴張海權有絕大之關
繫臣等於羅馬事畢卽往拿波里一觀拿波里與義國舊爲聯邦
亦一都會也日前改定德公司之呂爾坡輪船卽於日內抵埠臣
等挈同參隨各員於閏四月十三日登坐此船回國統計此行在
外八月有餘除去舟車往來亦在半年以外中間德國所居最久
美國次之其餘俄奧意等國皆先派員前往考察未敢稍涉草率
至於遵

旨游歷各國雖屬小邦亦皆參觀周覽以期取鏡有資俾上副
朝廷博采旁咨之至意除將各國所得譯件再行督率參隨在途

詳加審擇分別彙陳外所有到義考察情形并啟程回國日期理合恭摺具

奏伏祈

皇太后

皇上聖鑒謹

奏

游歷荷蘭情形片

再前在奧國准外務部電開奉

旨敕往荷蘭國游歷等因當查荷蘭一國界在法比兩國之間若由奧徑往路途同一周折且與俄使約會在前是以先赴俄國嗣於光緒三十二年閏四月初四日將俄事辦畢即行起程赴荷初六日行抵荷京海牙先經駐荷使臣陸徵祥約定初八日覲見荷

國女主女主敬問

皇太后

皇上安好臣等敬宣

朝廷德意答問如儀旋經贈送寶星設筵款待情意均極殷洽臣
等并卽會同駐使臣逐日游覽查荷國濱居大海國中河渠通達
舟楫往來與中國蘇浙各省情形相似地勢低窪舉國皆注意河
防於築隄建壩造橋修岸挖泥疏水諸工考求有素並經設立專
門學科發明新法爲各國公推其國之專家曾游中國有制黃河
流漫一書雖書係荷文未能知其所論之當否然亦足見其留心
推究必有可觀此外商務工藝日有進步航業既極交通之便漁
業亦復講求政治則律法監獄是其著意之處修明整潔頗爲他
國所不逮統計全國壤地之狹殆不及中國一大府而廁居列強

之側汲汲圖存其經畫治理之方正復粲然可覩此次在荷查閱各處駐使臣陸徵祥雖係初到是邦頗能盡心訪導於應譯要件亦多抉摘之功較之丹瑞那諸國所得自爲優勝所有到荷游歷各情形謹附片具陳伏祈

聖鑒謹

奏

比主贈送寶星片

再臣等前到比國與載澤等晤商考察事宜適比主亦約臣等往見并先備筵款待臣等當率參隨於閏四月十五日入覲比主情誼甚殷在坐獻酬周旋畢至茲復贈送寶星由該國派員齎送到義臣等當即收受謹附片具

奏伏祈

聖鑒謹

奏

謝 賞眉壽字等件摺

奏爲恭謝

慈恩仰祈

聖鑒事竊臣歸國後據臣家中交到光緒三十一年十二月二十

二日

慈禧端佑康頤昭豫莊誠壽恭欽獻崇熙皇太后恩賞綢緞四卷

貂皮八張又十二月二十三日

恩賞眉壽字直幅福壽字又十二月三十日

恩賞福字又光緒三十二年閏四月二十日

恩賞御筆牡丹摺扇一柄紗四卷等件臣當卽叩頭謝

恩祗領伏念臣道路馳驅歲時綿歷遂破浪乘風之志去國方遙
賡依楊霏雪之章還

朝有日彌懷慚於專對迺

垂念夫行人覩璀璨之

璇題

錫多福而更綏眉壽拜紛披之

藻纘導

皇仁而兼染

天香珥貂則希近

寵光

賜葛則並叨珍異幸

不遺夫在遠實感荷以非常臣惟有永戴

仁慈時圖報稱差喜班超志遠竟從瀚海以言旋信知陸賈裝輕
重沐

尙方之珍賜所有感激下忱謹恭摺叩謝

慈恩伏祈

皇太后

皇上聖鑒謹

奏

請定國是以安大計摺

奏爲臚陳世界大勢中國前途請定國是以安大計恭摺仰祈

聖鑒事竊臣等奉

命出洋考察各國政治業將所歷各國考察比較大概情形

奏報在案此次先赴美洲繼由歐洲回國所經日本美國南洋各

埠凡有華民聚集之地莫不傾市歡迎謳歌

聖德以冀祖國興起庇此海外黎民臣等見其困苦之情呼籲之狀不忍之意惻然而生所至各國與其國君官吏相接亦莫不謂中國自此以後當可實行改革日進文明而頌我

皇太后

皇上之仁聖臣等自愧菲材忝膺

簡命加以中外屬望以爲中國振興之機愈不敢不悉心考察求列邦之善政可以實行於中國者以期上副

朝廷求治之心下塞中外具瞻之望今特舉聞見所悉列邦所以強盛之源中國所以阡危之故與夫內政改革之要領謹撮其大要爲我皇太后

皇上陳之竊思中國自與東西洋各國通商遣聘以來亦既數十年矣此數十年中關繫之事日益繁多交涉之途日益困難其間最著者如與法蘭西之戰與日本之戰與各國聯軍之戰莫不喪師償金甚至割地其餘各商埠軍港之失礦山鐵道航路之失教案之償命賠款月有所報日有所聞通計此數十年中外交之事中國無一不處於失敗之地此其故何哉自稍有識者論之則曰我之兵強不如彼我之國富不如彼而已矣我與之爲軍事之競爭則我敗是其兵強也我與之爲經濟之競爭則我敗是其國富也夫外國之所以能制我而我之外交日趨於困難者謂非其兵強國富之故固不可也然概觀各國之土地人民殆無一能及我國者甚或土地小於我數十倍人民少於我數十倍而其兵之強國之富乃轉有過於我數十數百倍者此其兵何以能強國何以

能富必有其不易之道焉而非論者之言所能盡也中國數十年來談洋務者亦未嘗不震驚其國富兵強之效而思有以倣之練陸軍設海軍以求強築鐵道興航路務工商以求富然求強而反以益弱求富而反以益貧者此非富強之不可期乃未知其所以致富強之原因故但能效其末而不能效其本所收之效乃與始志相反此亦勢之所必至理之所固然而不足怪者也臣等悉心觀察乃知其所以致富強者不當於其外交之敏捷求之而當於其內政之整理觀之夫世固未有政治不修而其國能富其兵能強者亦未有內政不修而外交能制勝利者欲判其內政之能修與不能修此不必問其他但問其政體之爲何而可以判之矣蓋世界政體厥有二端一曰專制一曰立憲專制之國任人而不任法故其國易危立憲之國任法而不任人故其國易安夫任人者

何以易危任法者何以易安此不可不論者也專制之國凡一國中之事無論大小皆由君主一人裁決之是君主對於舉國人民而負其責任者也夫君主既負此至重且大至難且苦之責任矣然欲以一人之心力盡治天下之事不待左右之贊助而可以爲治此其事必爲勢所不能則不得已而必當委任官吏國家之事體愈繁則官吏之委任愈多而此官吏者奉一人之命以治民事使官吏而皆仁賢能奉行上命斯猶可耳然官吏之不能盡賢此又勢所必然以堯舜之廷而有四凶之罪誠爲事之無可如何而非君主所能獨任其咎者也夫君主既對於人民而負至重且大至難且苦之責任矣而其所委任之官吏又不能得多數之賢者以任之於其治理民事之時處一事而善則人民感之處一事而不善則人民怨之小民無知不以爲官吏之所自爲而以官吏爲

君主所命之故感官吏者并感及君主怨官吏者亦并怨及君主矣且綜觀歷史賢者常居少數而不肖者常居多數官吏之中亦然因此而民之感官吏者常少怨官吏者常多至民之怨官吏者多則其怨君主亦從而多矣故專制國之君主其不爲人民所怨者合東西古今歷史計之而常爲少數然問其怨之所由來則皆其官吏有以使人民之怨其君也夫君主以官吏不賢之故而爲人民所怨則君主危君主既危則國事愈以難治官吏愈無忠實之心人民愈有離散之勢一切政事愈以叢脞而國家之危亡隨之今世各國中其初謀立憲而未脫專制政體者惟有俄國俄之先皇至有爲民怨所集遭炸彈之慘禍者今之俄皇臣等曾謁見之實不失爲中主然其危殆之狀與其先皇同每夕必數易其寢處以防人民之報怨其所以至此者亦官吏使之然而非俄皇之

咎也且亦非官吏之咎特專制政體之結果必如此也何也專制之國任人而不任法人之不能盡必其善者此無待論而欲恃此以修內政何可得也夫卽以俄國而論其內政旣如此矣故其兵強國富之可見於外者亦不足以敵他國以俄國土地之廣人民之衆幾爲世界之冠而以言乎兵強則軍事之競爭曾不足敵一新起之日本以言乎國富則經濟之競爭亦然至欲與歐美各強國爭則其勝敗之數有十於此者矣此無他專制政體有以使其君與國之兩危也夫東西洋各強國中其僅一俄國爲專制政體亦惟前日爲然耳且俄國今者因戰敗之後其君與民皆推其所以失敗之原因共求所以振興之道方日汲汲然謀改爲立憲政體各國中將無復有專制政體之存餘然追覽乎百年以前之歐美諸邦及二十年前之日本則其政體亦皆爲專制政體與我同

也其所以皆改爲立憲政體者亦無不以其君與國常危而不安故取任人而不任法者一變爲任法而不任人至於任法則其君安其國安而富強之基亦以立矣夫所謂任法而不任人者不僅君主立憲政體爲然也卽民主立憲政體亦然所重者不在君主民主之別而在立憲與專制之別立憲之所以異於專制者於憲法之有無別之所謂憲法者卽一國中根本之法律取夫組織國家之重要事件一一具載於憲法之中不可搖動不易更改其餘一切法律命令皆不能出範圍之中自國主以至人民皆當遵由此憲法而不可違反此君主立憲國與民主立憲國之所同也其所異者雖不一端而君主立憲國之所以位置君主者則其君主無責任必明載於憲法之中夫專制君主因官吏之不賢而生人民之怨致君與國之皆危如前所陳者則以君主對於人民負至

重且大至難且苦之責任故也惟立憲政體於憲法之中載明君主無責任則可以轉危爲安何也君主既無責任則官吏對於人民卽有不善之政亦非君主之咎故其君常安而不危夫非謂此等政體之政府對於人民可不必負責任也乃謂其責任不由君主負之而由其大臣代君主負之故君主立憲國之政府必有責任內閣之設所謂責任內閣者乃於內閣中設總理大臣一人及國務大臣數人國務大臣以各部之行政長官充之是之謂閣臣凡此閣臣皆代君主而對於人民負其責任者也使其行政而善乎則閣臣之位得安使其行政而不善爲人民所怨則是閣臣之責任而非君主之責任其怨毒之極亦不過變易閣臣而已無絲毫之責任可以及於君主之身故君主不僅常安而不危且神聖不可侵犯之權亦載入於憲法中此無他既無責任則自不至有

侵犯此二者相因而并至者也此所謂立憲則君主安者是也然如此君主固安矣而國家之所以安者尙不全在乎此何也責任內閣以大臣組織之大臣者固所以代君主而負責任之官吏然其行政之善與不善人民之怨與不怨未可知也既令其代君主而對於人民負責任矣則人民之意向如何不可不一視其從違以爲行政之方針而欲觀人民意向之從違又非可執國人而人問之也於是不能不設議會由人民分區選舉以爲議會之議員以議會之可決否決而覘國民意思之從違焉試舉議會之權能中之一端以論之卽如有所謂監財權者乃一國中財政上歲出歲入當有幾何政府必與議會謀之每歲以收入之數製定豫算表以何理由而始爲此收入必得議會贊成之後乃於人民徵收之每歲又以支出之數製定決算表以何理由而旣爲此支出

必報告於議會而當得其承認此各立憲國共同之制度也此制度之所由來則以政府因外交內政之繁多每苦經費之困難勢不得已必難免加稅添租之舉而租稅之所自出實無一不取諸人民者人民平日於政府所爲一切不得與聞但見其時時增索租稅而租稅之收入用之於何地何事又皆不得而知則以爲政府徒剝取吾民之資財以自利而未嘗一爲吾民謀利益也夫使政府而果如此則人民之怨也固宜使政府之取此財本非自利而盡用之於利民利國之事然而人民不知則亦不得以人民之怨爲咎也何也彼不知而責以不當怨何如使盡知之且要其贊成之不僅使之無怨且使彼踴躍以盡納稅之義務之爲得乎此各國憲法中無不以此監財權屬於議會者職是故也故一國有議會則政府之行動人民可以知之人民之意志政府亦可以知

之上下之情相通合謀以求一國之利益故國事因此而得理國家亦因此而得安矣此外制度其等於責任內閣與議會之重要者又有司法之裁判所據一定之法律以裁判刑事民事之訴訟乃以此保護人民之生命財產而其所最重要者則司法權獨立於行政之外不受行政官吏之干涉又如地方自治之制亦以國事之一部分委之人民之自理以補官吏之不及此皆所以分行政官吏之責任而使其事專而權一得盡其職而日進於賢者也凡此等類皆明載於憲法之中彼此之間各有其權能各有其職守各有其職任不能於憲法所規定者有一毫之移動有一步之出入無論何人不能於此法律之下有不善之行爲故爲任法而不任人然而行政官吏之責任因以減輕而其權力則反因以加重此何故耶則以事之不爲行政官責任者卽一切不得與聞而

其爲行政官責任者其權力反可以自由行動無復有掣肘之人故百廢可以具興國事可以大整內政如警察教育實業軍事等則有整齊畫一之規外交如宣戰媾和立約通商等則有活潑自由之妙於是政府信用官吏皆賢人民盡知政府之能如此也於是依賴其政府若牆壘之可以禦人保護其國家若巢穴之不使人入犧牲財產以謀國家之公益犧牲生命以謀國家之公安所謂人民有納稅之義務人民有當兵之義務載在憲法之中者亦有不待教而能知不待刑而自勉者矣國家如此夫復何危此所謂立憲則國安者是也夫專制之國其君危其國危旣如彼立憲之國其君安其國安又如此以此爲其原因則其結果乃對於國外而有國富兵強與否之效其故亦非難知矣何也天下未有國內不安而能致國富兵強者亦未有國內大安而不能致國富兵

強者於何證之亦可於俄日而證之俄國以專制政體之故故無
憲法因無憲法故無責任內閣及議會等制度雖有地方自治之
制實亦甚不完全以內政之不修故爲日本所勝而日本則爲君
主立憲政體與俄相反故能敗俄此立憲與否之原因卽爲兵強
國富與否之原因可以確見而無容疑議者也臣等以考察所得
見夫東西洋各國之所以日趨於強盛者實以採用立憲政體之
故因而推之於俄國其所以驟鄰於弱敗者實以仍用專制政體
之故更進而觀於我國數十年來之未臻富強而外交之事無不
失敗者亦與俄國有同一之理由專制政體之國萬無可以致國
富兵強之理也夫使歐美各國政體而猶如百年以前日本政體
而猶如二十年以前其爲專制如故則世界各國之政體如一專
以土地人民之廣狹多少爲國力大小之準則世界之最強者宜

莫如俄國與中國矣雖東西洋各國合力以謀我然我之國力足以敵數十弱小之國而有餘亦何至使我

皇太后

皇上日夜憂勤常慮他人之侵迫哉於此可知一國之內政不理則國萬不能富兵萬不能強可斷言也然使國不富兵不強於世界戰國之中仍有可以立國之理則人雖富強我雖貧弱亦無妨各自立國兩不相妨古人所謂爾無我詐我無爾虞者或猶得見於今日則中國雖爲貧弱亦何害於生存然而今日世界之大勢決非能許我如此者彼其國家以內政修明人民發達之故其國既富其兵既強國力之發展有前進而無後退凡此世界之上無論何洲何國苟有內政不修國貧兵弱者卽爲彼等投資本殖人民擴勢力爭國土之地西人謂此爲帝國主義帝國主義者卽霸

國主義攘奪人之所有以爲己有者也百年以來歐洲各國之勢力既皆以此主義而漲出於外若美洲若澳洲若非洲幾於無一尺寸之地而非列強之所有五洲之中已有其四卽在亞洲如印度緬甸等已隸屬於英矣又如安南朝鮮等本皆吾之屬國彼雖內政不修國貧兵弱然與列強固無惡也而法蘭西日本竟取之以爲己有矣其所以如此者亦由其國力膨脹迫於不得不然與其以此責法與日之橫強不如責安南朝鮮之自取滅亡也又如臺灣本我之土地乃以一戰而割讓於日本膠州灣廣州灣威海衛旅順口等皆我之最良海軍之港乃皆租借於他國名爲租借實無還期至使我國欲興海軍反無軍港矣又如山西礦產本我國之財產而皆爲外人所隱占又如海關稅務本我國自有之權而亦爲他人所把持凡此者皆他人以國富兵強勢力膨脹於外

對於他國不能不競爭此種權利以擴張其國力所謂霸國主義之結果固如此也貧弱之國立於今世卽欲不與人爭而但求自守亦不可得不能自存卽將就亡不能奪人卽將爲人所奪斷無苟且偷安而可圖生存者中國今日正處於世界各國競爭之中心點土地之大人民之衆天然財產之富尤各國之所垂涎視之爲商戰兵戰之場苟內政不修專制政體不改立憲政體不成則富強之效將永無所望俄於中國之商務不足敵歐洲一小國而其兵力亦遂不能敵一日本此可以證明之者蓋商戰恃乎民智兵戰恃乎民力欲民智民力之發達而以專制政體臨之無異欲南行而北其轍必不濟也由此論之則中國而欲國富兵強除採用立憲政體之外蓋無他術矣雖然中國爲救亡計卽於今日採用立憲政體實行憲法可乎臣等又攷列國憲政制度所以能實

施之故而竊以爲中國此時尚未可也何也中國數千年來一切制度文物雖有深固之基礎然求其與各立憲國相合之制度可以卽取而用之者實不甚多苟不與以若干年之預備而卽貿然從事倣各國之憲法而製定頒布之則上無此制度下無此習慣仍不知憲法爲何物而舉國上下無奉行此憲法之能力一旦得此則將舉國上下擾亂無章如羣兒之戲舞國事紊亂不治且有甚於今日是立憲不足以得安而或反以得危矣故謂此時卽行立憲者臣等實確見其不可而未敢主張此有虛名而無實益之政策也夫中國非立憲不可而速立憲又不可然則如何而後可乎臣等又嘗攷之於日本查日本開設國會實行憲制在於明治二十三年而豫定開設國會之期則在明治十四年然明治元年其天皇已以五事誓於國中其國是已大定矣明治十四年以前

卽已設元老院開府縣會蓋自明治元年以至明治二十三年皆立憲預備時代也其立憲以前必以五事宣示天下以定國是者蓋日本當時以西洋之相迫激起國民救國之心幕府以外交不善而受人民攻擊遂有覆幕尊王之舉及其成功國內統一而國民得聞西洋各國國家之富強人民之安樂皆由於政體之美善於是呼號奔走羣起而求政治之改革而其時日本天皇亦知非立憲不足以謀其國之安且富強也欲卽立憲則東方治國制度與此不能遽入故先以五事定國是旋乃定開設國會之期而使全國之官吏與人民於若干年中爲立憲之預備實行種種之改革焉及乎實施憲制之時而一切法制皆已周備無忙迫不及之弊此其所以能從容變專制爲立憲無絲毫之流弊而有莫大之利益故開議會後僅五年而其國力已足勝我也今日中國之情

勢實與日本當時無異我

皇太后

皇上如欲使中國列入於世界各文明國而採其立憲之政體則日本所行預定立憲之年而先下定國是之詔使官吏人民預爲之備者乃至良甚美之方法可以採而做行之者也至於定國是之

詔令所宜宣示天下者爲何等條款則各國之歷史情事不同一國有一國之國是決非可以相襲者臣等深察中國現在之國勢民情其爲國是中不可不早定之者約有六事謹爲我

皇太后

皇上一一陳之一曰舉國臣民立於同等法制之下以破除一切畛域詩曰率土之濱莫非王臣此言王者之德一視同仁對於舉

國臣民本無可以重輕歧視之處惟是各國內政未修之際國中階級制度實所難齊因而人民同處一國之中無故而生畛域之見階級既殊卽利害相反畛域不化則離德易生於此而欲求舉國一致之效必爲勢所不能各立憲國知其如此故於憲法之內皆載入人民同等之文今中國既欲爲立憲之預備則此憲法之精神亦不可不於此時預定之以示一國之標準而求人民之同德焉所謂法者凡一切刑法民法商法等之法律皆是也所謂制者凡一切官制兵制等之制度皆是也二曰國事採決於公論書曰謀及庶人又曰天聰明自我民聰明又曰后非衆罔與守邦詩曰先民有言詢于芻蕘禮曰民之所好好之民之所惡惡之孔子曰百姓足君孰與不足百姓不足君孰與足孟子曰國人皆曰賢然後察之國人皆曰不可然後察之誠以民爲邦本一國之事無

非民事苟不察其意志之從違則民必有怨抑而莫告者故帝舜明四目達四聰周禮小司寇之職掌外朝之政治以致萬民而詢焉一曰詢國危二曰詢國遷三曰詢立君凡此者皆所以通民意者也今世東西各立憲國之制度亦本此意以爲之制故中央必有議會以代表一國之情地方亦有議會以代表一方之情故一國之中下無被壅之情上無不知之狀今中國中央議會雖未可以遽設然在此預備時代中亦不可無他種之議政機關以謀合議政事此於將來憲法上之機關卽可以借此以爲基礎至地方議會中之下級者則此時卽可酌量行之使人民練習議會之事爲將來各省議會中央議會之預備焉亦所以順民意而收輿情者也三曰集中外之所長以謀國家與人民之安全發達處今日之世界而求立國非有世界之智識則決不能以自存此無論學

術政治而皆然者也然中國以數千年之古國其固有之文明實已深厚博大於世界本有甚高之價值若僅以維新之故而一切舍己從人不惟理所不可亦勢所不能即令能之而全國滔滔趨於歐化主義社會之變遷過激則人心之浮動愈甚秩序大亂國將不國矣日本變法之始人心傾於歐化社會以驟失常態惡象迭生其後深識之士乃倡爲國粹保存論以救之而後轉危爲安此前車之可爲我鑒者而况我之文明本所自有非日本得於他人之比於此而輕棄之尤爲不祥矣故必採中外之所長於學術於教育於法律制度皆然不存中外之見惟以是非爲準庶民德民智相將并進且又秩序不亂安全幸福得以保存此不僅以中國之歷史應出於此且不發達則無由得安全不安全亦無由得發達二者互相循環互爲因果而非以躁動爲發達又非以靜守

爲安全也夫以國力而使人民得其安全發達又以民力而使國家得其安全發達者此立憲政體之目的若偏重於國家則必減少人民之幸福若偏重於人民又必搖動國家之根本究之一方之安全發達亦不可得遑論二者故惟有并重而無可偏歧也四日明

宮府之體制臣聞漢諸葛亮有言宮中府中具爲一體陟罰臧否不宜異同不宜偏私內外異法此乃宮府不分體制如一後之儒者祖述斯言一切法制皆準此理沿習既久以至於今不知蜀漢當時後主劉禪昏涵不治任用宵小疏遠廷臣故諸葛亮以此諫之勸其視宮府如一此實對於昏主濁世之言而非

邳治之朝臣子所宜引用臣等攷之各立憲君主國制度其所以維持皇室之尊嚴者卽在使宮府體制劃然分明察其官制則以

一宮內部總理一切宮中之事不復分掌於他官如中國現在內務府奉宸院上駟院武備院太僕寺太醫院鑾儀衛等衙門皆合爲一署使各治一事而不復爲如此之分散者一則使爲專一之供奉而不更分心於他事得以忠其職務一則使爲合同之供奉而無散漫不統一疏忽不周繳之弊也臣等遊歷俄德奧義各國國皇欸待甚優導觀宮室規模壯麗陳列莊嚴皆由於宮內部官制之完備而其經費則又與國用分而爲二且有皇室私產之收入因經理得法而日增者故臣民之愛敬日加君主之威嚴永固此我所宜參考而釐定者也五曰定中央與地方之權限中國各省疆臣其權力較各立憲國之地方長官爲大此因土地過廣交通不便若行中央集權之制則中央統治之力終不能及而國事反將坐是不理故欲將一切之權集於中央實非中國今日之所

能行然其權限則決不可以不定蓋法治國與人治國之所以異者一切權限有無法律之規定亦其最要者也凡事無論大小職無論輕重皆必各有一定之權限於其權限之內可以自由行動而後萬事皆可著手無牽掣難行之患今中國則不然各種行政機關之間其權限皆無一定即責任皆無一定惟視事之來時因宜而與奪之即如中央各部臣與各省督撫臣皆爲一國重要職司然其間并無一定之權限因而一切外交內政其相因倚之益甚少而相牽掣之害甚多國中之事因此廢弛者不知凡幾此非參酌各國官制何者屬於政府何者屬於地方明定權限必不足以爲治然地方行政不僅官治又有自治地方自治制度中國所無而各立憲國皆有之亦不可不使於此預備立憲時代中先行演習既欲行此則其與中央行政地方官行政之權限亦不能不

一定之矣六曰公布國用及諸政務各立憲國政府其所以權力強大爲國民之所依賴者以其信用也其所以取信用之方法亦不外事事公布而已若夫關於財政之事尤爲最要夫一國之事非財不理國家所營之事愈多則其所用之財亦多然而一錢一物皆取於民苟人民不知官吏之所爲則必疑其濫用圖私而不踴躍於納稅之義務政府收稅既難生財無術則一國之財政斷無可以整理之時因而一國之政務亦斷無可以進步之時各立憲國之政府其經營財政之方法所以必用預算決算之制經議會之承諾審查者亦欲其詳知收入支出之當然而贊成其收入也今中國雖未能卽開議會然當司農仰屋百端支絀之時欲求財政之舒展亦無能出於此法之右者故臣等擬請歸併財政處於戶部以稽歲出歲入之實數擬請特立會計檢察院以圖預算

決算之卽行皆另摺奏陳亦所以求財政之發舒增政府之信用而已凡此六者皆爲中國現在最重之國是而不可不急定其方針者若必待可以立憲之時期而後行之則不惟倉卒舉行難於驟變且此國是未定憲法未布以前舉國上下茫茫如在大海之中不知東西之所向爲官吏者逐風氣談維新枝枝節節而爲之漫無方針漫無把握徒使名目繁多頭緒紛亂名爲塗飾新政實爲擾亂舊章不惟無益而且有損爲人民者日覩外人之迫壓慨國勢之凌夷人民之生命財產日鄰於危險之域所依賴以保其身家性命者政府耳官吏耳而政府官吏之無方針又如彼則希望旣絕怨望日生橫議浮動日以益甚知國之不可復存乃不惜孤注一擲以釋憾於政府亂端迭起外人從而干涉之則國事之淪胥將不忍言矣由此言之則此時而卽行立憲實爲過早此時

而獨未定國是實爲已遲至乎今日更無可再緩者矣臣等爲
國家萬年計擬請以上所舉六事明降

諭旨宣示天下以定國是約於十五年至二十年頒布憲法召議
員開國會實行一切立憲制度而在此年限中一切國事不得出
此

諭旨範圍之外其效力等於憲法令舉國臣民皆爲立憲之預備
庶幾國是既定人心大安自此以往一二十年後中國轉危而爲
安轉弱而爲強亦能奮然崛起爲世界第一等國則舉國臣民其
沐我

皇太后

皇上之福者將互億萬年而無窮矣然預備時代必以十五年至
二十年爲期者則亦以中國數千年來無憲制之習慣且地方遼

開交通不便文化普及非可驟幾若爲期過促則一切預備未周至期不能實行反爲阻文明之進步矣然自_臣等思之如前所議期限驟觀雖若稍緩實則所謂立憲預備其事萬端如改官制定法律設獨立裁判所與地方自治調查戶口整理財政改革幣制分劃選舉區域及徵兵區域等種種政務非可枚舉不預圖之則立憲等於不立使欲實行預備尙須上下一心以圖之且須竭力赴功勇猛精進乃能有濟若稍舒緩猶將不及是則此一二十年中乃最忙迫之時代而非寬暇之時代不得謂約期之非促也然若謂立憲猶可再遲而約期不妨更緩則是怠於國事爲苟安目前之計未嘗計及一國前途安危者之所言_臣等奉命考察實見各國之所以富強中國之所以貧弱實在乎此不敢有所飾詞以欺我

皇太后

皇上也 臣等爲國家安危起見故敢不避忌諱一效其忱所有請定國是以安大計緣由理合恭摺具陳伏乞

皇太后

皇上聖鑒訓示施行謹

奏

請改定官制以爲立憲預備摺

奏爲參酌中外統籌大局請改定全國官制爲立憲之預備恭摺具陳仰祈

聖鑒事竊 臣等使事所及歷查各國政治以爲中國非急采立憲制度不足以圖強又以現在如遽行立憲制度亦不足以舉實因籲請

皇太后

皇上立頒明詔先定國是以十五年或二十年爲實行立憲之期又思此議若蒙

聖明采擇則

綸綍一降天下臣民無不喁喁想望以待治化之成惟此十數年間苟不能先籌預備以新天下之觀聽則轉瞬期屆國中情狀仍與今日無殊必至欲舉一事而無可用之人欲行一政而無相當之法憲政之不能實行如故而舉國今日屬望之誠將疑

朝廷爲不可信人心一去大局愈不可問此_臣等所爲一喜一懼日夕焦慮而未能卽安者也_臣等竊觀日本之實施憲法在明治二十三年而先於明治七年明治十八年兩次大改官制論者謂其憲政之推行有效實由官制之預備得宜誠以未改官制以前

任人而不任法既改官制以後任法而不任人任人不任法者法
既敝雖聖智猶不足以圖功任法不任人者法有常雖中材而足
以自效臣等游歷所至每與其國之賢士大夫潛心討論舉以相
衡覺彼皆條理秩然事無叢脞而我則時形竭蹶弊患潛滋不盡
由於才智之懸殊當歸咎於制度之未備於是熟察其官署組織
之法參攷其行政秩序之方雖亦頗有增減異同實則無不完全
粹美而求其可以爲我法者則莫如日本之仿效歐西事事爲我
先導蓋各國國力人格自有不同而日本則能取彼之長而棄其
短盡彼之利而去其弊中國今日欲加改革其情勢與日本當日
正復相似故於各國得一借鏡之資實不啻於日本得一前車之
鑒事半功倍效驗昭然臣等不揣樛昧謹就中國所闕失與立憲
所不能預爲組織者分條縷晰敬爲我

皇太后

皇上剴切陳之

一曰宜略仿責任內閣之制以求中央行政之統一也查東西各國無不有責任內閣責任內閣者合首相及各部之國務大臣組織一合議制之政府代君主而負責任者也蓋中央政府實一國行政之總樞一切政策從茲出焉各部漠不相謀則政策萬難統一故各國每由君主自擢首相由首相薦舉閣臣一切施政之方由閣臣全體議定然後施行而得失功罪則閣臣全體同負其責所以必以閣臣負其責者一則使之忠於職任無敢諉卸以誤國一則雖有缺失有閣臣任之則天下不敢致怨於君主所謂神聖不敢干犯者此也中國內閣昔爲樞要今如閒曹比之各國固不同矣軍機處雖有類各國之內閣然對於上則僅備

顧問對於下則未受責成考其職權祇略如各國之樞密顧問院耳若夫各部尙侍實可稱一國行政長官而各部相離毫無聯絡彼此政策平時既未嘗與聞遇事或轉相矛盾且所掌者不過簿書期會所爭者不過意見參差其稍有實權者或遇應辦之事應撥之款必須相助爲理通力合籌又因素不相謀以致各不相顧機關阻遏名實俱乖若不合議一堂共謀大局則雖有開誠布公之念恐必無同心協力之時殊不足以收實效各國所以合各部於內閣以閣議爲一國政綱之所由出正爲是也且軍機處職在出謀發慮各部臣職在宣化承流雖現皆上稟聖謨實不啻

躬親庶務奉行一有不當小民難免怨咨譴責尙未能施

宮廷已先受過揆之各國責任內閣之義殆有未安者矣臣等考

日本明治二年再改官制於太政大臣外增設左右兩大臣太政大臣卽各國之總理大臣也變法之始非一人之力所能因應必有左右大臣以贊襄之迨明治十八年後一切新政均有基礎乃更定官制設內閣總理大臣及九省大臣統爲閣員一切詔敕皆令大臣副署代天皇負責任此卽今日相沿之制也竊以爲中國大於日本十餘倍其審慎機宜有不能不變通辦理者似應略采其意以軍機處歸併內閣而置總理大臣一人兼充大學士爲其首長以平章內外政事任國政責成置左右副大臣各一人兼充協辦大學士爲其輔佐以協同平章政事共任國政責成其原有之大學士則仍帶各殿閣之名銜簡爲樞密院顧問大臣以示優崇之意而令各部尙書皆列於閣臣此三大臣者常與各部尙書入閣會議以圖政事之統一會議旣決奏請

聖裁及其施行仍由總理大臣左右大臣及該部尙書副署使職權既專而無所掣肘責任復重而無所諉卸如此則行政之大本立矣

二曰宜定中央與地方之權限使一國機關運動靈通也各國行政大概可分爲中央集權地方分權兩種中央集權例如日本所有地方行政長官皆屬於內務大臣監督之下一切政策悉須稟承地方分權列如美國中央政府僅掌軍事外交交通關稅舉舉諸大政其餘大小諸務悉歸各省巡撫自行辦理二者各有所長不容軒輊要皆各有其職守而不能越出於範圍中國以軍機各部統治於內以督撫分治於外參酌於集權分權之間以中國之幅員既長處置誠爲得當然因權限不清之故各部與督撫往往兩失其權蓋有時督撫以尋常奏報遇部駁而格不能行有時各

部以管轄事宜不奏咨而遂難過問凡此等類悉數難終夫各部用其權以裁制督撫若不量地方之情勢則善政幾不得舉行督撫張其權而輕視各部又破壞一部之機關而政令幾同於虛設彼此之齟齬尙小而事機之貽誤實多臣等之愚以爲治泱泱之中國萬不能不假督撫以重權而各部爲全國政令所從出亦不能置之不理視爲具文誠宜明定職權劃分限制以某項屬之各部雖疆吏亦必奉行以某項屬之督撫雖部臣不能撓越如此則部臣疆吏於其權限內應行之事無所用其推諉於其權限外侵軼之事無所施其阻撓庶政策不致紛歧而精神自能統一矣三日內外各重要衙門皆宜設輔佐官而中央各部主任官之事權尤當歸一也各國官制凡各衙署皆有主任官與輔佐官主任官卽一署之長官輔佐官次於長官一等承長官之指揮而輔佐

其職權者也主任官一輔佐官則或有二三兩者兼重事乃畢治中國現行官制中央各部尙書似爲主任官而侍郎則其輔佐官也惟是尙侍職處平等既不能受其指揮卽不可命爲輔佐而一部之中有二尙書四侍郎又加以管部之親王大學士則以一部而有七主任官矣絕無分勞赴功之效惟有推諉牽掣之能官制之弊莫此爲甚至新設各部特置丞參尙有輔佐之意他部則惟有郎員郎員分掌各司實如日本諸省之各局局員各課課長不可謂爲輔佐官也夫主任官既已事權不一又無人爲之承乏指揮安得不以一部主權付諸吏胥之手若夫各省督撫責任至重藩臬兩司既各有職守善後局營務處等又各擔一部份之責任遂令督撫之下無一完全之輔佐官至爲可異間有宏開幕府妙選賓僚雖亦稍收臂指之功實則不受絲毫之責夫至任事而不

受其責則賢者或相率諉卸而不肖者轉得以營私推至藩臬府縣各官均有地方責任亦皆獨肩鉅細絕少分司漏略闕疏殊多未善臣等以爲現今六七堂官之制必須首先更改最善者逕采各國之制定爲一大臣一次官大臣負閣臣之責成次官綜一部之庶務其次則如商學警三部成例設一尙書兩侍郎不置管部以尙書爲主任官而侍郎爲之輔佐受其指揮更設丞參各官劃定職權丞如日本之參事專主審議立案參議如日本之局長郎員如各課其外省督撫亦當如日本臺灣之制設參事以代幕僚設秘書以代文案現有各局除應裁撤歸併外存留者悉爲專官並隸督撫如臺灣總督官署所屬之各局然其餘各官亦各量分輔佐如此則責任分明諸務畢舉而內外各衙署之規模粗具矣四曰中央各官宜酌量增置裁撤歸併也各國官制中央政府各

部名目雖各有不同而彙括言之不外內務外交財務司法軍事五者其中以內務所轄較繁於是有析教育行政爲學部者有析農工商業行政爲農工商等部者又有因交通之利大開析鐵路輪船郵政電報諸行政而爲郵部者軍事一項有析兵部而爲海軍陸軍兩部者又或領土寥廓宜有專官有於五者行政之外而別爲殖務部者中國舊有六部惟戶刑兵三部最爲切要近日新設外商警學四部體制較備於昔然尙有闕而未舉冗而無當與職權不分明名稱宜斟酌者增置裁併試舉其略內部爲民治事職要而任繁各國大率舉教育農工商及交通諸行政別區爲部中國必應仿行其留存於內部範圍者尙有警察衛生土木賑恤並監督地方行政諸大端中國地方太廣監督行政一層斷不適於措理自以警察爲一部最要之圖惟內務可以賅警察而警察

不能盡內務今中國已設警部復設內部不獨迹近駢枝亦且無事可辦然考各國之制以警部獨稱者甚希而內部不立者則竟無有臣等以爲不若改巡警部爲內政部凡戶部工部之關於丁口工程者皆併隸之是爲第一部戶部掌財務行政爲舊制所固有然以戶名其部者蓋緣舊日財政以戶田爲其專務今徵諸各國所掌則自國稅關稅以至貨幣國債銀行其事甚繁戶田一端實不足以盡之臣等以爲宜因戶部之舊更其名曰財政部而以前所設之財政處併入焉是爲第二部外務部今已設立法制略具可以因仍不改是爲第三部兵部掌軍事行政爲舊制所固有現在綠營半皆裁撤各省訓練新軍非復部臣所能稽覈然既無知兵之實徒擁掌兵之名名實不符殆同閒冗臣等以爲宜仍舊制以練兵處併入改其名曰軍部而將各國通行之軍事行政職

權應歸兵部大臣統轄者皆責成焉近世各國多以海陸軍各自爲部中國雖應采用其制而海軍初有萌芽未能獨立徒懸此職亦等虛名不若於部中分立陸軍海軍兩局暫擔責成至參謀本部及軍事教育均須依次另設專署以底完全是爲第四部刑部掌司法行政亦舊制所固有然司法實兼民事刑事二者其職在保人民之權利正國家之紀綱不以肅殺爲功而以寬仁爲用徒命曰刑於義尙多偏激臣等以爲宜改名曰法部一國司法行政皆統焉司法之權各國本皆獨立中國急應取法所有各省執法司各級裁判所及監獄之監督皆爲本部分支必須層層獨立然後始爲實行是爲第五部學務部今已設立法制略備可以因仍無改是爲第六部農工商三者爲富國之本源各國皆以殖產興業爲重要之政常以專部領之而或分或合則隨其所宜總普皆

三部分立英則僅有商部而農工隸焉日本則有農商部而工隸焉美以農部工商部分立爲二義比等國則合三者而爲一此其大較也中國自古以農立國而土地之膏腴物產之豐殖加以林業礦產漁業之盛大實爲世界農國之冠而人民精勤技巧於工最宜信義勇誠於商爲適故以我之地利民情論之三者實兼擅其長况以中國幅員之大任舉一省已足當歐洲之一國

國家若爲之維持保護一旦諸業發達誰能禦之本應各分職掌始能悉協機宜然目前農工諸學尙未講求辦事人才頗形缺乏不如仿英義各國之制統歸已設之商部管轄日後再議增設是爲第七部自輪船鐵路電報盛行而交通行政浸以繁多各國殆無不特設專部以領之者中國鐵路各國久所垂涎急起經營正恐惟日不足郵政本爲交通樞紐今尙委諸稅司之手辦理亦未

得宜其他輪船電線創辦已久而進步甚遲欲求整頓擴張正賴事權統一臣等謂宜合此數項仿日本遞信省例特設一交通部是爲第八部近世各國皆憂人滿於是殖民事業相率踵興英吉利荷蘭西班牙皆特設一部法蘭西葡萄牙則併於海軍日本舊制亦有招殖省惟專掌北海道移民事業與他國經營域外者微異中國新疆西藏青海蒙古幅員闊大地利未開若能用量錯徙民實邊之謀行李悝廣盡地力之策俾我

列祖

列宗百戰撫定之地殖我薄海內外億兆蕃衍之民不待跨越重洋已復莫能相抗乃日英俄三國實偪處此虎視眈眈我若放棄固有之權彼卽各肆鯨吞之計誠宜廣募腹地民族以實邊陲而體察外人殖民之方圖其利便大抵不外開鐵路以盡交通之用

立
明法令以收保護之效投資本以開工作之途而已茲事體大所
關亦覺甚鉅也等請參酌英法等國之制特設一殖務部而以理
藩院諸職掌併入之凡東三省蒙古青海新疆西藏開拓之政策
皆於是統焉而南洋美洲華民至夥卽於部內別設一局爲海外
殖民專司俾盡保護之責是爲第九部此九部者爲一國最高行
政官署總於內閣如各國責任內閣之制九部長官皆爲閣臣加
以總理大臣左右副大臣爲十二人上之代
皇太后
皇上負責任下之各率其職盡力於本部是爲中央政府之制此
外有宜於內閣之外增置而別爲獨立機關者一曰會計檢查院
考各國財務行政均操之戶部大臣而監督之者則爲國會及會
計檢查院凡國庫金之出入會計員之決算報告均須經本院判

決當者認可不當者使之辨正仍不改則一面奏陳君主一面牒告長官加以處分此院之職務殆與司法裁判同爲獨立之性質故能破除一切弊端中國戶部徒掌本部收支而各部歲計出入之當否戶部無從過問各省奏銷則凡外銷一項亦皆無從稽核是全國財政無一監督之機關也查普魯士於未立憲法之先卽有會計檢查院日本於明治初年亦就大藏省先設檢查局嗣因未能獨立效力頗少乃離政府而直隸君主監督之權遂由此而擴大今宜仿普日之制特置會計檢查院設正卿少卿各一人凡關於檢查會計之事各地方行政官皆受其監督指揮其官吏等於司法裁判外經懲戒裁判所判決者不受別項懲罰然後機關始稱完備二曰行政裁判院各國設此於司法行政之外上圖國家公益使行政官吏不敢踰法下保人民權利使舉國民族不致

受損雖制度各有不同而公開裁判許衆庶旁聽扶助私益許吏民對質實與中國都察院大略相等今都察院既如後所陳擬改爲集議院矣擬請設立行政裁判院置正卿少卿各一人專理官民不公之訴訟及官員懲戒處分凡內外百僚之辦事無成效者並有彈劾之責其總判官之制惟普魯士爲最善大抵其半選於司法其半選於行政皆以年三十以上者充之又定之爲終身官以保存其獨立之資格中國似宜切實仿行以圖實效三曰集議院考日本歷設公議所待詔局皆使臣庶盡言以爲國會基礎嗣又別置集議院取決公論良以國會旣難驟開若不設此機關則憲制終難成立不如先立此院以爲練習之區凡各省州縣所陳利病得失皆上達政府以備采擇而定從違亦准建議條陳兼通輿情而規衆見至於財政之預算決算亦必屬之此院議員選舉

除王公勳爵京員定額公推此外則分奉天吉林黑龍江直隸山東山西河南陝西甘肅新疆四川廣東廣西雲南貴州湖北湖南江蘇安徽江西浙江福建爲二十二選舉區每區薦舉議員八人共爲總額一百七十六人選舉時暫行投票公舉凡被舉者無論紳商士子不拘資格惟在位之實官不得被舉其議事以多數決議之制行之議長由議員中互選有代表言事之權無論平日有無職銜旣被舉爲議長則應加以優異職銜以示

朝廷殊典此集議院與國會組織之分別也將來程度日高可由國會立法自可與以立法之權另行組織今爲一時權宜之計擬請改都察院爲集議院姑照以上辦法行之是選額旣已平均意見自無畛域而本省利病亦可因此研究以補中央耳目所不逮矣至於應行歸併裁撤各署則如各國宮府體制劃然分明凡立

憲君主之國其所以保皇室之尊嚴者首在釐定此制臣等前於請定國是一摺業已詳陳日本宮內省制統一切內廷供奉之職司超然於內閣之上不與諸部同負責任臣等謂宜以現在所有之內務府改名爲宮內部而以太僕寺太醫院鑾儀衛及其他供奉

內廷之職司歸併隸屬其禮部工部舊制有奉職

內廷者亦皆別立爲司而統於宮內部則體制謹嚴尊榮無極此宜改併者一政務處係屬新設職權本未分明然會議大政以待聖裁本有類於各國之樞密顧問府法良意美允宜保存似可仿日本之制改名爲樞密院以原有大學士及各部裁缺之大員特旨簡任十日一值以備顧問惟不入內閣不受行政責成此宜改併者二吏部爲六官之長體制本崇職在進退羣僚責任亦重

惟各國選除官吏皆歸本部長官故各部皆有試驗懲戒之司各由本部考試拔用卽各由本部懲戒免除知之旣明試之尤悉是以易於得人今吏部銓除多用抽籤成法此制之敝已數百年新設之外商學警四部一切司員皆由薦辟卽不啻專救此弊臣等以爲方今

朝廷百度更新首當綜核名實請俟各部成立制度完備之後再將吏部裁撤其所管

恩賞封爵諸典不能盡廢者將來可歸內閣管理至於懲戒官吏法律必當先爲頒定分別實行此宜改撤者三禮部職司典禮兼掌貢舉事務今科舉旣停禮部職權已裁其半所存者惟典禮一項請改名爲典禮院而以太常光祿鴻臚三寺併入焉此宜改併者四工部專管工程與工藝實不相涉今工藝已暫歸商部兼領

而舊日所掌公共工程應歸內政部

宮廷營繕應歸宮內部責任攸歸體制始能不紊工部一官已無應辦之事擬請逕行裁去此宜改撤者五翰林院素號清華之選自科舉既廢新進漸稀學校廣開文衡罷掌官已近於閒冗議且加以汰裁惟各國本有學士院以待碩學者儒中國學術素號昌明將來專門名家亦必乘時輩出且

經筵進講時或需才史館編修人皆舉職擬請留存此位以勵學修此宜因仍者六大理寺之職頗似各國大審院中國今日實行變法則行政與司法兩權亟應分立而一國最高之大審院必不可無應俟司法獨立之後改大理寺爲都裁判廳以當其職此宜改併者七以上皆就臣等管見所及斟酌中外情形定爲中央官制所增置者出於事勢之不得不然所歸併裁撤者出於官司之

後長吏日多親民之官日以卑下今日州縣之上有府及直隸州府州以上有守道及兩司司道以上有督撫凡經五級而政事始達於政府試與各國互相比較則英國倫敦不及中國四川三分之一義國約比雲南一省日本亦不過四川一省所分州縣區域與吾之州縣正復相等而彼則直接中央而一無隔閡我乃展轉五級而莫識從違且彼之州郡府縣其下畫區數十置吏數百以各舉各務而我之州縣則以一人而治彼數百人之事絕無佐理之人無論材具各有短長亦且日力必多不給臣等竊參酌中外制度以爲除鹽糧關河諸道各有專責不必議裁外宜將守道及知府直隸州兩級悉行裁去而以州縣直隸於督撫采用普法等國三級之制以省爲第一級州縣爲第二級鄉市爲第三級庶幾繁簡得宜惟是舊制州縣秩卑而望輕今既使之次於督撫似宜

進其品秩以示優崇考日本有府有縣其領地大者謂之府小者謂之縣名稱雖殊職權平等臣等謂宜酌采其制將現在各州縣因地之廣狹民之多少區爲三等大縣進爲府中縣爲州小縣爲縣大縣長官改稱知府秩正四品中縣稱知州秩正五品小縣稱知縣秩從五品不相統屬而同受監督於督撫至於任用之法則凡道府州縣各班皆可爲地擇人分途並用其本爲道員者則曰管某府某州某縣事本爲知府者則曰知某府事管某州某縣事本爲州縣者則曰署某府事知某州某縣事職權既無隔閡仕路亦得疏通如此則階級太多之弊除矣又考各國內外衙署莫不有輔佐官日本經營臺灣府內有民政長官參事官長及各課課長等職與中國漢時郡縣諸丞曹掾相似後世此制湮廢自督撫以至州縣署中祇存胥役非士夫所屑爲輔助無人事多叢脞

等竊計今一省督撫之所轄足當歐洲一國而有餘故省中制置各司宜略具中央政府之規範並宜設一省議會以擬國會一切法律與國法不相違背者可任其因地制宜自行發布然後能與地方利弊相應而實收佐理之功查今之藩臬兩司雖爲獨立官署非等督撫署中之一職然位爲僚屬義等次官近設提學一司地位亦復相埒但一省要政三司猶未能賅臣等以爲每省宜設八司一曰民政司二曰執法司兼一省裁判事三曰財務司四曰提學司五曰巡警司六曰軍政司七曰外交司八曰郵遞司除執法司爲司法官軍政司應直隸中央不入行政範圍外其餘六司皆爲督撫之最高輔佐官民政司如日本之民政長官監督全省府州縣及鄉市之行政察其舉職與否越權與否而農工商一切勸勵保護之策皆出焉財務司則專管全省理財之政而撤各省

善後局以入之而提學巡警軍政外交郵務諸司皆可裁併向有局所稱名而舉其職以受成於督撫每司之下分置各局或以事分或以地分局設一長以統其屬而受成於本司爲督撫者總其大綱如挈裘而振領全省自無不舉之事至於一省之議會實有參與立法之權現在國會未能驟開而省會則必當先辦臣等以爲宜俟各府州縣議會成立後再由縣會議員中選出大縣二人中小縣一人暫充爲省會議員使立法機關草創成立夫省會之必圖成立者則以

國家既決定採用立憲政體則此十餘年間必使人民略悉憲法講明其故此會既立則討論辨難皆爲有益又如實行憲政在在需財中央之政費既已大增一省之征求正復無已若不立省會以爲豫算決算之樞紐則人民不知公益豈樂輸將其有礙於行

政機關正不亞於毫無輔佐是以二者必當兼用若夫州縣爲第二級地方行政之官縮治自治之要關係亦復甚重考日本府縣官制於知事下設書記官警部長收稅官參事官視學官典獄官等除書記參事外各官各有其屬凡州縣署中分設四部曰內務曰警務曰收稅曰監獄內務部復分五課其他警務收稅監獄三部署亦皆各有分職是其輔佐周備纖悉靡遺似亦我國州縣所宜酌量取法分曹治事而各設專官者也如此則分職不備之弊除矣又考各國之強莫不原於地方自治夫設官本以爲民而有時官爲代謀轉不若民之自謀爲得者是以必區官治自治相輔而行然後治化日進中國鄉官廢於隋唐之季今之州縣不獨以一人舉歐美數百吏之職其受治之人民亦復羣焉依賴未嘗自結團體自開智識以謀一方之公益則以未有規制無可率循民

德之衰於斯爲極臣等習聞彼中賢士大夫所以相告者咸曰中國立憲尙可需以日時而地方自治之規則固刻不容緩蓋自治制度苟發達雖不行憲法而國本已可不搖自治精神不養成雖憲法極善而推行亦且無效今考各國政體無論大而一國小而一鄉莫不分立法行政爲二事故地方自治其在鄉者必有鄉會以司立法有鄉長以司行政鄉長大率一人鄉會則置議員數人數十人不等以戶口之多寡爲衡皆由人民公舉官不過問市則人口視鄉爲多事務視鄉爲夥亦有市會以司立法有市參事會以司行政市會選舉與鄉會同市參事會則以市長一人市丞一人或二三人參事會員若干人組織而成鄉長既被公舉便可視事市長市丞則被舉之後必待朝命然後任事是鄉爲完全之自治而市已略參官治之性質矣其上爲縣官治與自治參半蓋有

縣會以司立法而行政則縣之長官與縣參事會共之長官由君命參事會由公舉也臣等以爲此實上下相維之妙用不難立時舉行應請取全國各縣而區畫之其田野散處者命之爲鄉闈闈繁盛者命之爲市皆仿置鄉會市會鄉長市長及市參事會以爲純粹自治之行政府州縣則如前所陳官治行政之大概復各立一府會州會縣會以司立法各立一參事會以輔助官長之行政一縣之中大端細務無不克舉一縣如此縣縣如此天下之治猶運諸掌矣夫以吾民自治之力本所固有若得朝廷明定法制使有率由復得良有司鼓舞發明似不難旋至立效如此則自治不修之弊除矣夫此三者變通補助皆屬要圖其迹雖有似更張其事則不能偏廢蓋中國行省與各國迥不相同設使官制不良則中央之運掉雖靈外省之推行仍阻於情勢可

謂之隔絕於政俗可謂之懸殊各自爲謀何能畫一是以臣等不憚廣諮博采斟酌盡宜擬懇

簡派內外重臣核實議定施行或令各省同時舉辦而以直隸一省爲之模型則成效必次第可覩見矣

六曰裁判與收稅事務不宜與地方官合爲一職也司法與行政兩權分峙獨立不容相混此世界近百餘年來之公理而各國奉爲準則者也蓋行政官與地方交接較多遷就瞻徇勢所難免且政教愈修明法律愈繁密條文隱晦非專門學者不能深知其意行政官既已瘁心民事豈能專精律文故兩職之不能相兼非惟理所宜然抑亦勢所當爾中國州縣向以聽訟爲重要之圖往往案牘勞形不暇究心利病而庶政之不舉固其宜矣臣等謂宜采各國公例將全國司法事務離而獨立不與行政官相麗取全國

各縣劃爲四區區區設一裁判所名曰區裁判所其上則爲一縣之
縣裁判所又其上則爲一省之省裁判所又其上則爲全國之都
裁判廳級級相統而並隸於法部區裁判所則以一裁判官主之
縣裁判所以至省裁判所都裁判廳則以數人之裁判官主之而
置一長焉各裁判所皆附設檢事局區置檢事一人縣以上數人
以掌刑事之公訴凡民間民事刑事小者各訴於其區大者得訴
於其縣其不甘服判決者自區裁判所以至都裁判廳均得層層
遞訴而以都裁判廳爲一國最高之裁判猶恐邊省人民控訴不
易則於陝西甘肅新疆四川雲南貴州諸省設巡回裁判焉略如
漢代繡衣直指之制以平天下之疑其官制不與行政各官同其
升轉事權分析兩無牽涉在上者既能各行其是小民自食其賜
又州縣定制兼徵錢糧考各國官制收稅官爲地方官之屬僚而

不躬親其事蓋自改定官制以後一切政費地方官皆得有權支銷而不得筦其出納收稅之員則但能司其出納而不復擅自支銷如此則權限釐然而自無貪酷之風矣

七日內外衙署宜皆以書記官代吏胥也吏胥舞文之弊前人已悉言之上年屢奉

明詔敕令革除近日內外各衙門大加汰革改用員司而未能革除淨盡良以從前舊例久爲吏胥窟穴之場不免因熟於例文藉以自固臣等游歷所至親見各國衙署用人至夥人治一事事不止用一人秩序昭然靡不就理考其所登進或皆取之士類或且兼用女生從不聞有勦法營私致債國事者此後中國新政施行律文昭著從前胥吏本已失所憑依萬不能容其久溷應請將中外大小各衙門悉依新設各部成例不復更設吏胥惟聘用書記

官及書記生代之必用士大夫之能知自愛者積有資勞并准與本署各官吏同其升轉庶人皆爭自濯磨而永無蠹胥之害矣八曰宜更定任用升轉懲戒俸給

恩賞諸法及官吏體制以除種種窒礙而收實事求是之效也夫制度無論若何美備苟運用不得其法則一切皆爲具文從前吏治窳壞固由官制之未備亦由立法之未周臣等請逐條縷陳以謀補救舊制官吏出身不外科第捐納蔭襲保舉諸途而科第捐納爲最廣捐納流品之雜姑不具言卽科第號稱正途而所學皆非所用至於蔭襲保舉叨濫尤多是以銓敍雖寬而人才難得今者科舉已廢捐納將停亦知其弊而思所以易之矣然易之者不得其途舉國茫然莫知所適有志仕進者不知從何道以求進身之階數年之後必多歧念此不可不急爲設法者也考日本官吏

登庸皆由試驗分高等普通兩種高等試驗科目則憲法民法刑法行政法經濟學國際法六者必須徧試而財政學商法民事訴訟法刑事訴訟法四者則任擇其一焉普通試驗一依中學校科目至於外交官裁判官等又各用其專門科目蓋凡所試者不出其所學之途而所用者卽因其所執之業是以學成入仕無不各有治事之能中國學校漸已成立一國人才將由此出且游學之士日益增多若不規其學之深淺何以別其人之用舍應請嗣後新增官職均用新法試驗以廣登進學既驗其本末人必爭自濯磨非惟吏治可以振興卽學風亦於以丕變此選官之宜闢新途者一也各國通制多以本籍之人任地方之事不獨民選之鄉市各長爲然卽長官亦初無歧異中國宋元以後始有迴避之條以數千里風俗殊絕言語不通之人來尹斯土豈能熟其情狀因應

咸宜然其爲此制者徒曰避嫌防弊耳夫人孰不愛其桑梓賢者固易增鄉里之情孰不畏其友朋不肖者亦或生人言之懼應請嗣後地方各官不必更問籍貫皆可簡補則不至視官如傳舍矣此迴避之必須豁除者二也三代以前任官者多終身其職有以官爲氏族俾長子孫者漢制亦以久任爲事賜金增秩傳爲美談近今歐美日本各國此例益嚴往往既任一職終身以之卽有遷除亦不過遞升優級或與原職相似者耳而海陸軍官外交官裁判官教育官等則他途不能驛入亦不得轉入他途蓋以一切職務必恃有專長爲之綜理不能朝拜而夕遷也中國本無專門學業入官之後又復任意遷轉不論事情之同異但論階秩之崇卑習爲固然漠不爲怪官不舉職夫何待言臣等以爲宜令各官分職久任其海陸軍裁判外交教育各官皆宜各用其長自爲遷轉

一如各國之例自餘各職亦皆既一職之長不得更冀他途之轉內而丞參郎員外而諸司府縣凡就任者必先策其悠久之功始不致有置棊之誚其有以升轉拔擢爲鼓勵之方而致疑於任滿不遷人將怠倦者考日本有爵位功勳之制前代亦有加秩晉爵之榮臣等謂宜參考其法於舊有品級之外更定勳爵名目加級者增其俸給有功者榮以爵勳或增設儀同特進上柱國金紫銀青光祿大夫等名或酌用五等封爵都尉騎尉舊制或優給夫金帛或寵錫以寶星總期多其榮途以相激勵則人自以盡職爲事而不徒以遷擢爲榮此升轉之不宜煩雜者三也中國官俸之薄爲前代所未聞外官雖各有養廉實則不足爲養京曹則并此而無之故在內者皆樂就新部在外者皆願得優差情勢之不同祿入之厚薄爲之也臣等嘗考東西各國祿俸之制雖位處最下之

官吏無年給數十兩者至於重臣長官定制尤形優厚且薪俸所入專贍身家而一切因公應用之經費使令奔走之員役無不由公家支給不待自解私囊又其車馬儀從之間酬酢餽遺之細亦無不事事簡略種種蠲除糜費既不見多潔身易於自好至於老病退職卽厚予年金在官病故則優賜恩給任官者率無子孫之計後顧之憂吏治安得不日見澄清國事安得不日臻上理臣等以爲今日中國欲求財政之充盈官方之整飭皆非從增加廉俸下手不足以正本清源其內官當一切如新設外商等部例一律增加其外官則督撫藩臬不足自給者亦宜設法增給至於州縣各官則旣升其品秩自應更定祿精力從豐厚且從前供應上官之用酬酢往來之繁羅致幕友之資輿服儉從之費一概悉予蠲減其因公需用款項仍准一一開支不令由私囊津貼而退老及

身後卹贈

恩賞亦當徐爲議定若裁判收稅等官皆不可不悉從此例使在官者別無贍家之慮但有勤事之心然後用監督之方定懲戒之律有貪婪者重罪之而不少寬嚴罰之而不敢怨蓋必使官可以不犯法而亦知法之不易犯官方澄肅庶幾有期此祿俸恩給及政費界限儀制繁文之亟應變通者四也凡此四端爲仕途之通弊卽蠹國之大源無論官制更定與否皆不可不急圖洗滌况伏遇我

皇太后

皇上勵精圖強開自古以來未有之盛治者耶書曰若藥不瞑眩厥疾不瘳臣等以爲此類無形之積弊最足以敗事蠹法倘不亟去此弊則雖有良法美意猶不足以爲治此於請改官制之後不

得不附陳及之者也以上八條 臣等皆就此次考察所及詳細參稽悉心斟酌實欲舍中國數千年之所短就東西十數國之所長且以日本變法在前成規具在不得不取法度之善以爲預備之方謹將請改內外官制名稱大略另繕清摺恭呈

御覽所有請改官制以爲立憲預備緣由理合恭摺具陳伏祈
皇太后

皇上聖鑒訓示施行謹

奏

謹將請改內外官制名稱及辦事權限大略開列清單恭呈
御覽

中央政府官制

內閣 以原有軍機處內閣改併

總理大臣一人兼充大學士平章內外政事任國政責成

左副大臣一人

右副大臣一人兼充協辦大學士協同平章政事同任國政責成
閣丞二人參議四人并設司員若干人分理庶務附設六局曰庶
務局法制局以考察政治館併入記錄局賞勳局統計局印刷局
由丞參六人分轄

以上官制大略

一內閣以總理大臣左右副大臣與各部尙書會合而成各部尙
書俱爲閣臣并有參預國政之權

一總理大臣左右副大臣仍逐日入對各部尙書按五日一入對
但各部有要政時得隨時請開閣議尙書遇有事故以左侍郎代
行

一 凡法律及要政之請

旨飭行者總理大臣及專管之尙書共署名屬於一部之行政事務者各部尙書獨署名

一 除各部尙書外非奉

特旨簡派不得列於閣議中

一 應由閣議定奪者如下

甲 新頒法律及歲出入之預算決算事件

乙 軍務緊要事件

丙 外國條約及緊要之外交事件

丁 奉

旨飭交集議院之公議事件

戊 關係官制變更及法律施行之請

旨事件

已畫定各部疑似之權限

一內閣三大臣及尙書均不得兼充繁重差缺或因一時重要需人亦只以一項爲止

以上辦事權限

內政部 以巡警部改併并以工部及戶部之關於丁口等項者併入管理地方行政事宜凡巡警選舉土木水利衛生賑卹等事屬焉

財政部 以戶部財政處改併

外務部 仍現制

軍部 以兵部練兵處改併管理全國海陸軍事務俟海軍規復再分海陸二部其參謀本部及軍事教育應依次另設專署

法部 以刑部改設管理全國司法之行政事務爲各級裁判所及監獄之監督各省執法司爲本部分支

學部 仍現制

商部 仍現制暫時兼管農務工業一切事務俟農工諸業發達後再行分設

交通部 增置管理全國交通事務凡鐵路輪船電報郵政等事屬焉

殖務部 以理藩院改併管理內外蒙古青海西藏行政事務

以上九部均設一尙書經理本部事務首任責成是爲行政長官同入內閣爲閣臣參預國政設左右侍郎各一人協理部務同任責成按部務繁簡各設丞參司員等分理庶務

會計檢查院 專任監督財政設正卿少卿各一人酌置屬官分

任

行政審判院 專理官民間行政不公之訴訟及官員懲戒處分
依法律定之凡百官之辦事無成效者并有彈劾之權設正卿少
卿各一人評定官無定員

以上兩院較各院職權隆重爲獨立機關依各國例直隸君主正
卿不入內閣按十日一入值候

旨並得隨時奏事

集議院 以都察院改設其制度大要如下

一 議員資格

甲 王貝勒貝子之已滿二十五歲者公推四人

乙 世爵勳裔已滿三十歲者公推六人

丙 京員七品以下每百人得推選五人

丁各省督撫及駐外公使保薦紳商士子有學問品望者計奉天吉林黑龍江直隸山東山西河南陝西甘肅新疆四川湖北湖南江西安徽江蘇浙江福建廣東廣西雲南貴州等二十二省每省定額八人共爲議員一百七十六人

二議員任期以三年爲一任任滿更行推選保薦

三下次推選時俱行投票公舉

四於議員中互選議長正副各一人常川駐院餘俟開會時到院
五院中應議事件

甲歲出入之豫算

乙政府提出之法律案

丙人民呈進之請求書

丁其他政府交議之事

六每年正月二十日至四月二十日爲開會之期

兩宮御駕到院行開院式宣布應議各事

七議員年俸應參考各國章程定之

八集議院議決應奏事件得隨時奏陳

以上一院爲議院基礎

宮內部 以內務府太僕寺太醫院鑾儀衛改併管理供奉

內廷事務

樞密院 以政務處改此院爲最高顧問之地以原有大學士及

各部裁缺之大員

特旨簡任十日一值以備顧問不入內閣無行政責成設正副掌

院大臣各一人餘大臣無定員

典禮院 以禮部改設并以太常寺光祿寺鴻臚寺併入專管關

涉典禮一切事務

翰林院 仍現制如各國學士院之制

以上一部三院均無行政責成

吏部 暫仍舊制俟官制大定再議改併

工部 裁撤

以上二部均擬分別裁併

內外司法官制

都裁判廳 以大理寺改直隸法部

省裁判所

府縣裁判所

區裁判所 自省裁判以下直隸於執法司

以上各裁判所暫受法部及各省督撫統轄俟司法完全獨立之

日再行更定惟現時行政各官不得兼任

地方官制

督撫 仍現制

民政司 以布政司改監督全省府州縣以至鄉市之行政察其舉職與否越權與否而農工商勸勵之政保護之策皆屬焉

執法司 暫隸督撫俟獨立後直隸法部凡一省之裁判所及監獄皆其職掌

財務司 管理財政一切事務

提學司 仍照學部新制

巡警司 省城用國家警察制度其餘各府州縣皆用地方警察制度而由司監督之

軍政司 軍政各事應直隸中央然遇有地方事變督撫亦有統

籌備局

卷六

七

率徵調之權

外交司 外交事宜應直隸外部然於地方有交涉各事亦可稟由督撫主政

郵務司 一省之航路鐵道電信均其職掌而本省驛遞應裁撤併入

以上八司皆略仿中央規模酌量增置以擬各部凡一切法律與國法不相觸背者亦有因地制宜自行發布之權每司之下置若干局局設一長以統其屬員分任各職而皆受成於本司

鹽糧河關道 各受責成不理民事除河道隸內政部外餘皆直隸財政部不歸督撫管轄

府州縣官 將道府兩級裁去而以縣直隸督撫以地之廣狹民之多少區爲三等大縣進爲府中縣進爲州小縣爲縣大縣長官

改稱知府秩正四品中縣稱知州秩正五品小縣稱知縣秩從五品不相統屬而同受監督於督撫任用之法於現在道府州縣班中通補本爲道員者曰管某府某州某縣事本爲知府者曰知某府事管某州某縣事本爲州縣者曰署某府事知某州某縣事以上各府州縣均於署中分設四所一曰內務二曰警務三曰收稅四曰監獄分置曹屬各治其事而受成於本縣

地方自治制

鄉長 爲地方初級自治置長一人以司行政凡收租稅查戶口行強迫教育均其責任

鄉會 置議員數人或數十人以人口之多寡爲比例而皆由人民選舉官不過問

市長 亦爲初級自治惟略參官治之性質

市會 議員選舉與鄉會同

市參事會 以市長一人市丞一人或二三人及市民所舉之參事會員若干人組織而成蓋用合議制以司行政

府州縣會 議員由鄉會選出以司立法

府州縣參事會 用合議制以輔助長官

以上皆爲第二級以下自治辦法再上則爲省會係仿英普兩國制度分爲三級第一級爲官治第二級爲官治自治參半第三級爲自治

請設編制局以資籌議摺

奏爲改定全國官制事體繁重設編制局以資籌議而昭詳慎恭摺仰祈

聖鑒事竊 臣等節次

召對均以實行變法必先改定官制爲請仰蒙

皇太后

皇上俯鑒微忱令得盡言無隱臣等欽服之餘尤深感激因詳考中外現行官制將中國全國內外各官大加併改酌擬制度縷晰奏陳在案伏念臣等使事所及曾綜覽東西各國立官之法而知其異同增減之故凡有六因一歷史之習慣英當日耳曼朝之世創設專務官吏因事增置制度複雜故樞密院議長愛爾蘭總裁亦列內閣德及匈牙利希臘瑞典那威以中古之世教育事務多掌於教士之手故文部亦兼宗教此原於歷史而異也二政體之各別英德以日耳曼法系重在地方分權法意以羅馬法系重在中央集權俄爲專制之國其宮內府分立法行政農工財政四局爲別一政府美爲民立之國其全國各州分立法行政司法等部

爲三權鼎立而中央內閣諸大臣則等於大統領之私屬對於國會無責任此原於政體而異也三事務之繁簡美以各州自主教育而不設文部普以德國統轄海軍而不設海部又以國力之增長社會之進步有不能不離於內閣而特立專職者德於各部外有郵政鐵道收稅銀行公債等局美於各部外有貿易勞動漁業各委員會以收分職之效此原於事務而異也四疆域之廣狹俄國領土寥闊於邊境建州爲軍務知事又合數州或數縣爲總督管區皆以陸軍大將或中少將任之美國新立之州庶教未溥定爲特別官制此外如俄之芬蘭事務大臣英之印度大臣皆另立專官以司其政此原於疆域而異也五經費之贏絀英美德法國力最富故其官制隨時隨事而增國小者不然瑞典以內務部而兼農工商西班牙則以之隸於文部荷蘭因屬地之遠而有殖部

那威因耕地之少而有工部均以土地不廣財力不足未能特立農務專官耳此原於經費而異也六時局之變遷自帝國主義之說日熾歐美各國羣起競爭商力不足則以兵力繼之故於占領地方多予以特別權力美之非律濱俄之遠東英之印度法之西貢其總督權力幾與本國中央官府相埒有統轄海陸軍及立法行政收稅之權此原於時勢而異也歐美各國制度之沿革其不同既已如此日本則起自東方仿行西法既以行政之敏斷而取單獨制以立總理大臣及地方官廳又因事務之重大而取會議制以組織內閣及參事等會大臣之下有次官次官之下分判各局局各有課課各有掛分職任事統系秩然棄短取長洵稱善變然考其全國官制亦經兩次改革始底完全誠以頭緒紛繁關係重大職權之所掌界限既欲分明法律之奉行條理尤應詳密雖

其中偶有疏闕或遇窒礙難行之處原可次第增修隨時改正而大端細目皆須預爲審定一切方有遵循中國現行官制與臣等所請改定者形式雖不甚懸殊權限則必須釐析雖日後整齊之功用可期與日本比隆而眼前複雜之原因則正與歐美無異以臣等一二人之所見不過稍陳崖略用備施行而其中創制之苦心立法之精意非經再三研究方免妄議更張且以中國變法之初全體立官之重亦非

簡派明達治體之大臣會同咨議不足以定制度而決從違應請先行設立編制局請

旨簡派王公及內外重臣入局討論選擇員司將古今中外官制之利弊詳加調查分別部居審定秩序隨時奏請

聖裁恭候

欽定然後頒示天下永永遵守庶中外曉然於

朝廷變法圖強之意確有實行之一日而無不欣然受治矣所有
請設編制局以資籌議緣由理合恭摺具

奏伏祈

皇太后

皇上聖鑒訓示施行謹

奏

考查學務擇要上陳摺

奏爲教育至關重要法意宜求精詳謹就考察所及敬抒管見恭
摺具陳仰祈

聖鑒事竊惟強富始基歸諸學術比年以來

明詔興學天下向風然辦法既多參差宗旨未能一貫宏規未定

流弊日滋可爲深慮臣等奉

命考察政治知本原所在教育爲先故於學務一端頗爲殫心研究伏念我國以二三學家創談學務已十餘年考覽未周遽爲興辦而學部設立獨後一切聽民間自爲雖欲不滋歧誤又安可得急起直追改良圖進其在今茲猶未晚也臣等查美國人格最高民風獨厚施行教育民間自有成法不煩政府之引繩至如俄義二國致力高等教育不少絕特出衆之才而於普及之方法未能周備故謀生道隘而乞丐尙多奧丹瑞哪荷蘭諸邦皆於義務之年加之強迫入其國境民俗皆整飭可觀德國則教育行政燦乎大備專門之程度既高普及之教思尤廣故在歐洲既有學界管領之稱而日本學制專仿德國至今學士博士遊歷調查絡繹相望多有著述以資改良炳焉同風遂爲強國夫皮傅外國之法以

辦中國之事其勢固有所不能顧導師具在猶復冥行摘塗紛歧
 百出欲事之治烏可得乎用敢不揣愚陋就見聞所及斟酌條陳
 務在采他國之優長資實行之方法不因浮慕高遠徒立虛名不
 以憚於更張苟安習慣謹為

皇太后

皇上陳之

一請釐定教育行政之機關以資行政也機關者何內而學部及
 所隸各司外而提學司及所屬員紳是也查東西洋教育制度內
 有學務大臣一人主管全國教育一次官輔佐之下有各司司有
 一長司長之下設參事若干人分理之此其在內之機關也一國
 之內分若干省省設視學長官一員一省析若干郡縣一郡縣析
 若干區均各設有視學官各區設有學會會有員紳隸於區視學

論其秩序則自省視學以至區學會員紳層累而下而以省視學爲主持之人論其事權則省視學直達於學部區視學直達於省視學而以區視學爲執行之地此其在外之機關也位其下者司實行之權位其上者司監察之責有統轄之形而實無箝制之苦是以教無不行人無不學我國於中央既設立學部於各省設立提學司規制可期漸備惟部中各司應辦之端千頭萬緒日不暇給竊以爲宜妙選天下實學通才及確有經驗之人責以專心一端分門研究俾於學務辦理之得失言論之當否皆能實有見地抉擇精嚴而於各省請辦之件咨詢之事應隸某司者立由某司擬議准駁俾鑿衆心至於高等專門諸司有非本國人所勝任者何妨量用東西洋專家以備考求而免廢墜蓋各國於學部分司之義設置精詳實爲全國學界系統攸關恃以決定羣疑裨益

實事若徒采納虛聲薈萃彥出入風議不求實行則全部之設將成虛車根本未培安望其發榮滋長此學部及各司宜力崇切實者也至於各省學制現正棼如素絲亟須整理提學司之設擬之外國猶一省之視學長官誼當直接學部使得有一省學務之全權現定章程凡提學司上達學部之事仍須詳由督撫轉咨而各事仍由督撫節制循是而推則各府廳州縣之學務亦仍由府廳州縣官節制臣等愚見以爲於獨立之機關既闕失而不備而於弊害之防制仍似密而實疎蓋督撫及府廳州縣地方政治辦理紛繁萬不能潛心學務提學司苟非其人則其倡率乖方亦爲督撫所不能盡悉視學員苟非其人則其旨趣不正亦非府廳州縣所能深知既非所長又非專務使之爲此業已不勝而用人行政之間多一事外干涉之人卽多一曲徇通融之弊抑其影響有

不止此者方今學風囂張論者每謂學界之人喜談政界之事實則現在辦學務者舉爲政界之人督率於上者既不能中學界之肯綮反動於下者必出而持政界之短長實不如特設機關使之自成系統政體既立觀聽隨之趨向亦隨之如是而有學界專一之志慮乃有學界專一之人才其他章程中可議者如學務公所之議長由督撫札派似不如責成提學司慎選正人徑自札派爲宜而省視學官由部派員提學出省轉須呈報學部允可始行竊恐將來省視學與府廳州縣視學別成一系不足爲統一之機關不如卽由提學司兼充省視學長官與外國制度合符免滋異同之見若學部遣派司員赴各省調查考察則隨時可行不須額設視學卽提學司派員巡查各屬亦不妨於額設府廳州縣視學之外因事出之更不須另設專員也

一請定學堂爲模範辦法以端始基也模範辦法者西人行政法學之名稱所以別於流通辦法者也西國政法家之說曰凡事名義雖屬重大而內容仍爲簡單雖以改制度易歷法更權量諸大事一言朝出萬姓夕遵此屬於流通辦法者也至於條理密緻義蘊複繁則必先立楷模再求仿倣然後推廣如母子之遞生不能驟然蕃衍此屬於模範辦法者也又曰或謂初開風氣暫用流通迨其發生歸諸模範其言近似而大亂真何也作事之功基於謀始始基一誤或經破壞而始能改良或雖破壞而不能改良若以模範辦法之事而誤以流通之法施之弊害之烈有不可勝言者故流通模範兩等辦法劃然分途不容強混也其言如此可見西國政理研究之精今考各國學制莫不星羅棋布無美不臻當其締構經營固必經幾許之豫備蓄儲始能臻此中國現在仿辦顧

可漫焉從事徒求其形似而已乎夫以近數年間稍有志識之士
熟聞維廉畢思君臣雪恥自強歸功學校共相趨慕頗著信從於
是內自京師外而行省官立民立先後相望要之普及之功千百
未得什一弊害之著秦越如在一堂苛求者謂中國之社會殆窮
於法治恕論者曰過渡之時代應有此風潮孰知法治之未得其
宜而風潮將永與終古耶究其致病之原實由不諳行政之法蓋
以屬於模範之事而誤用流通誠所謂雖經破壞不能改良者矣
臣等查東西學校之辦法重師範以裕各科教師之材急女學以
立家庭教育之本然後有幼稚園兩等小學中學高等豫備科大
學專科大學研究科以次遞行此秩序上之模範也教科之精管
理之善密如繭絲細如牛毛若何研究若何設備立法以何者爲
楷程用人以何者爲資格此制度上之模範也我國自興學以來

機關不立法令未行各省大吏賢者提倡虛聲否者熟視無睹卽其興辦之處大學高等師範實業速成永久爲時無幾而紛然並陳各府州縣中小各學官立民立一時備舉秩序旣已失當矣興校旣多需材彌衆監督教習管理諸事懸席待人校員之賢否督撫旣不能周知而所謂學務處者自總辦之司道以迄員紳大抵皆不諳學務校員中卽有略知時務亦或勦襲書報浮誕之說自命開通官長旣信爲學界之人才而新奇偏激之談又往往爲無識之生徒所怖服實則抄撮譯籍以爲講義而尙不能盡通遷就衆見以爲管理而猶不免衝突蓋以未受教育之人強之行教育之事支離蔓衍謬種流傳其弊殆不能悉數論者謂教育之功必基師範其言誠是雖然各省辦理師範學堂其校員執事取材所在又不出以上之人弊與無師範同抑不如無師範何以言之因

其不良之教科不善之管理不完全之知識不規法之論議託於師範之名以濟其流布之術者借官力助其波瀾益無畔岸不至爲風俗之大憂不止也擬請

敕下學部速於京師設立完全之師範學堂先從初級以至優級凡不勝任之教員概屏勿用惟中國文中國輿地歷史則姑取通才明識者任之其餘各科悉聘日本高等師範教員以主其席命譯人輔助高材生徒就所講授編輯完備教科書寬其畢業之時期務使所編之書極其精詳適於實用而後止一面由學部通行各省一律仿辦將來學生功課之深淺程度之高下與夫編輯之書精粗浮切均由學部考試審訂卽以優劣爲各提學司黜陟之考成以此立定根基然後俾之孳乳三五年後庶幾可議擴充十年之後或者可談普及否則浮慕西人已成之效而不先定中國

創始之方謬誤紛歧是興天下最大之政而貽天下最大之患臣
等竊不勝總總過慮蓋與其辦七八分模糊影響之事而全局皆
非誠不如辦一二分真實切當之事而本源易正或謂時機已迫
爲此似近迂圖不知我國創興學堂已及十年若使當時注力師
範蒙小以迄於今校員當有取材高等亦已具階級惟其雜糅紛
營遂致囂張凌亂及今不圖而慕普及之空名聽羣流之妄作更
歷十年天下皆似是而非之學堂遂使天下成似是而非之人格
教育之途効力絕大可爲長慮或謂興學至急必俟師範畢業始
有教員得毋遲誤竊謂速成補習兩端此時自宜並舉要之須審
定各門科學輯有定本成書初班畢業再予推行萬不宜任其參
差自爲風氣其他若女學若手工實業諸科並關急要皆宜立定
模範再令展轉滋生固非謂一切閣置以待師範之告成然決不

能一時徧設致使宗旨之殊異譬之絕大機廠製造之品甚多然各有模型均歸一律所謂模範辦法者如此

一請明定教育趨嚮以維萬法之本原臣惟國民者政治之本原也立國者法而行法者人守法者亦人觀於東西各國已成之效而歆慕之因采其致效之法而仿行之無論其法之不能真合也即得其法而舉其事矣視其形式則是而察其精神則非則一切舉辦新政彼能收富強之實效者我止爲變革之空名是何也無行法之人則名存而實亡飾貌效顰而神乃不似無守法之人則少數人倡舉之而多數人破壞之如是者雖百廢具興亦百興而百廢臣等所至各國見其國之政治往往與其人民風俗之程度互相比附及交其賢士大夫與之議論益深知其政策之行不能各國統一而微有所異同參差者非不欲盡趨於至美至善之一

域也實以人民之程度不均施措因之而微異而政法家探原竟委之說則無不以人民爲政治之原質而歸本於教育之一途蓋政治者造成治法之所也而教育者卽造成其行法人與守法人之所也綜觀英美之民活潑而富於獨立法之民奮起而勇於有爲德之民精嚴而善於自治凡所以致此者又因其立國之本原與其地位種種之歷史而教育大家因而善用之以練成其特有性質非可強致而亦不能強同顧其上下一體戮力同心以共趨富強而保父國本者則各國固有其同焉者存焉所同者維何則人民之道德與法律二者是矣道德法律者國家以之而保治安人民以之而成人格者也我國古昔聖賢儒先其所以爲人生道德之範者經訓昭垂炳如日月孝經曰非法服不敢服非法言不敢言非法行不敢行論語曰君子懷德君子懷刑皆所謂道德法

律之自治也中國自秦漢以後學校之制既廢有國家者但求政治而不及教育唐宋元明大儒輩出書院學社稍昌正學而士人提倡之功不如國家効力之大厥後士子研經以科舉爲目的而聖賢克己復禮天下歸仁之道幾疑空談上下交習於欺罔教化式微矣經曰人心惟危道心惟微言乎天人消長理與欲恆不敵也西儒社會學說曰原人之性質爲自私自利不知合羣不謀公益之動物言乎民人非有教育不能成公衆立國家也兩說參觀謀教育者可以知先務之急矣德國學家之說其造就國民之道以盡義務守秩序爲統宗無道德心則偷惰巧詐孰肯盡義務者無法律心則放僻邪侈孰肯守秩序者晚近教理不明國中人民皆自率其原人之性質圖私利破公益恣其人心之欲蕩然無復範圍數十年來我國舉行新政仿效西法犖犖十數大端豈無一

部分之事業可以鞏固發達者而其卒也成效無聞甚者乃轉生流弊彼其創辦之始亦未嘗不造端宏大謀慮周詳而奉行者仍不免瞻徇用人塗飾耳目詐僞相習放棄自由揆厥所來不能不歸咎於社會之失敗蓋語以道德則固茫昧無知繩諸法律並不能斤斤自守幾令神州種族不復可與世界之國民相遇豈不可痛乃今之辦學務者曰將以求富圖強爲目的本之不務猶冀其枝葉之發榮詎可得乎今觀各省學堂之設久者或十餘年近亦二三年其校員執事或以情面之干求濫竽而竊吹或以薪脩之肥瘠暮楚而朝秦或以自便私圖而通融及於定則或因一人枉法而曲徇及於衆人於是有多歷年所而腐敗相沿不知其咎之安屬者其修業也既以爲虛名之可市其卒業也亦復爲屆期之例行蓋道德法律之不講所謂學界者亦必同歸於敗壞加以近

日談新學者於聖賢律已治人之道懵無所知囂囂然吐棄一切
創爲新道德之說瞞然不靖蔑長上敦彝倫破律敗度而悍無顧
忌無識之子靡然向風學術未興而人心先壞矣臣等歷觀外國
學校自其童稚而尊君愛國之理深入腦筋若迷信然而其專精
學業恪守準繩絕少風潮衝突之事心竊訝之及與教育家探求
原理則謂一學生之地位亦須道德法律組合而成蓋學生之自
愛愛國卽其道德心而其力學守法卽其法律心自非然者雖有
專門名師日日授之以高深之科學其心志之放而不收囂而不
靖必無輸入學術之資格也然則今日中國之學務不言道德言
法律而輒言富言強比之施雕琢於朽株飾丹雘於糞壤必無幸
矣臣考歐洲諸國其教授兒童卽於德育一端再三措意其所指
示於行已接物之道皆精詳密緻如有律例之可持循美國於小

學中卽講求社會進化之理故其人最重於治身而以妨害公益爲不齒之事日本變法之初民志稍近浮動自教育家力主改良趨重德育大明其倫理心理諸學科而於高等小學近乃特增法學通論一門期以養成嚴毅自治之性質凡此方針真足以爲我國學界之藥石而起全國民人之沈疴臣嘗病今日談教育者動曰普及而不知持何物以普及之正本清源可久可大則道德法律之二端其庶幾乎擬請

敕下學部大臣速延中外正士通才依教育淺深之秩序纂輯倫理道德之教科以我國聖賢經傳爲綱而以中外儒先名言緯之其尤宜注意者則於社會現形應以深切著明之意爲哀痛警告之詞使種種腐敗之原因縷析條分如暮鼓晨鐘發人深省而教師生徒皆自知其惡陋之習慣實爲敗壞社會之一分子猛然有

革故從新出死入生之趣向益以近年日本通用之法學通論比附我國情形爲詳備之講義責成各省提學使分飭官立民立學堂一律通行定爲學堂第一注重之科學或者迷途未遠返道有期全國人格之增進庶可俟乎

一請核定學堂經費預爲普及之基礎 臣等遊歷歐美見其國勢隆盛者無不由於普及教育之功而教育之秩序則首先師範次卽兩等小學 臣等已詳晰言之矣夫兩等小學者卽各國所謂義務教育全國之民無人不出於其中政府以強迫之法干涉之其所注意在國民之資格與其謀生之技能西人稱之爲庶民教育學之者學爲人而已與中學師範以上學爲官學爲師學爲專門人才者迥然判爲兩事故各國小學畢業而後兵農工商惟所執業其升入中學從容以躋於大學者僅十中之一二異乎吾國科

舉之階梯主義利祿目的至有秀才爲宰相根苗之俗說也然則學途之區分以兩等小學爲一類所謂庶民教育者是以中學以上爲一類所謂人才教育者是明乎此義則小學爲最溥最公之事師範既立必當實行強迫俾無人不出此一途始足以備人格而前此大學堂之奏定章程所稱小學畢業卽爲生員不免誤矣特是庶民教育既以強迫之法行之期於無人不學而止以一州縣計大者或十餘萬人小亦幾十萬人其年限則德國通例以八年爲限日本以增設高等豫備科減節年限亦至七年幼童當就學之年而父兄不令就學或未卒業之年而父兄縱之退學者皆有罰金無金者至以拘禁代之其或滿年之日而課程不能如格亦預經視學官考察理由方准退學強迫之章程其森嚴也如此而彼中猶歆然有不滿之意蓋自不識之無以迄卒業僅此七八

年學問無多知識有限其程度未爲高美也我國實行強迫之時其不能不同出一轍也審矣其經費則西人於庶民教育特加以義務之名臣等在德國時所聞教育家之講演不惟以不收學費爲至當不易之辦法且謂貧家子弟筆墨書籍不能自備經校長視學官查實應爲酌量籌給故德國全國小學經費均由地方公款承辦力有不足猶以國家官款助之卽有富家樂輸亦均爲間接之收納在學堂則一律無二以昭均平蓋於義務二字公認公信一力擔任不稍諉也我國民力艱窘中人之產十不二三貧民子弟按期納費勢必以費艱而阻學民生因貧而失學因失學而愈益民生之貧任義務者謂之何矣乃臣考查各省兩等小學之設恆係生徒自費地方曾無籌定之款官力絕少扶助之資以是原因大多阻遏夫豈不曰創辦伊始籌措無方姑爲是權宜應急

之辦法也獨不解夫中學以上收入年長少數之人在外國爲收取學費最重之處而各省現在之高等學堂高等實業高等工業各堂以及各屬中學堂遊學預備科各國遊學生往往盡以官款公款辦之學費既無收納之文至於膳飲寄宿紙筆書籍衣袴牀褥旅行醫藥沐浴梳篦一切任之通計各堂經費遊學經費蘇鄂粵各省歲糜官款十萬至百萬小省亦十數萬至數十萬其學科程度則與小學相去無幾其人則大半學年已過徒爲鋪餒之謀其養成之學風則驕奢驚悍隨意所適抑且進退自由來去無定蓋其驕縱已極取求無疵故常不知艱難以爲分所應爾譬之紈袴子弟席豐履厚惟其所求鮮有能束身自愛者試移此款以辦輕而易舉之小學其拜嘉惠而蒙實德者不知幾千萬人矣夫小學之與中學以上各堂其爲事孰急而孰緩其獲益孰重而孰

輕其受教孰廣而孰隘其程功孰近而孰遠而顧於彼則鉅款虛擲而竭蹶以圖於此則望澤孔殷而吝惜不予辦理洵爲失當擬請

敕下學部遴派專員分往各省將所有官款公款辦理之中學以上各堂常支活支詳晰查明呈報到部卽責成各省提學使向各該學生收納學費及膳舍各項費逐年加增按所收入將原有之官款公款逐次提存專爲義務小學之用如此則中學以上之官款公款年減一年而小學之官款公款年增一年然後統籌預算量收地方捐項以充其費庶幾強迫之法可行普及之效可企且使中學以上生徒漸次以出費求學稍知愛重學堂而徐革其驕蹇汰侈之習慣事固有一轉移間而兩得平均可以興利可以杜弊者此類是也

一請訂定學堂冠服以壹民志夫冠服者表面之觀瞻民志者內容之情僞似劃然兩事不相附麗者也雖然內情之與外飾實有關繫之理而在我國今日則其關係尤若有重焉者臣等愚昧所及竊有所見用敢不辭瑣細而畢陳之夫各國學生俱有制服有徽章等級分明不容或紊自其淺義而言之則曰此以立標識便別認而已自其深義而言之則冠服定而後觀聽一觀聽一而後地位明地位明而後心志專心志專而後術業定譬之受持戒律必先披緇編隸行伍必先武服外觀改革則內情視爲轉移此學堂冠服各國所以昭垂定式而徵諸古昔則臺笠垂帶都人有威儀之思章甫縫掖國君來儒服之問其義一也自西學東漸數十年間海內靡然從風起居服御頗乃改易舊觀更從新製揣其所由一起於新奇之俗尙二出於便利之人情一倡而百和若有莫

之爲而爲者其衣服冠履一端則西國人士之論說一以爲軍國之時代非西制無以振精神二以爲交通之時代非西制無以便交際三以爲機製廣布之時代非西制無以免危險四以爲生理發明之時代非西制無以合衛生五以爲人事繁曠腦力觸發之時代非西制無以捷應赴而適機宜於是有謂人民強弱智愚文野勤惰之界從此攸分者至謂亞東守舊諸國其服飾之繁重博大足以阻進步而遏新機其言甚辨然竊謂民生精神之間未能振興改革獨取其形式之近似而汲汲更張取貌遺神誠爲目論且文學之士與兵工不同似不妨暫事因仍以守中華之文物願臣等嘗再三審度知其理甚正而勢則有所不行何也人心之好尚既不外於喜新厭故之常情而學人之識力未高決不能舍皮毛而求精粹彼日聞西人誇耀其服制之高美既無不目奪神移

又親見夫繁重博大之製於時變多未致宜則夫外說之先入爲主與內情之默爲轉變已無不共趨於棄舊謀新之一途而交通既廣凡商業之貿遷紳民之遊歷及夫各省選派學生留學於各國者又皆改易服裝以與其官商士庶相周旋幾入焉而與之俱化不覺歆之羨之而因而倣效之十餘年來學界之風尙固有然矣於是不待有改定學堂制服之明文而紛紛以西服爲文明以舊飾爲樸野一時之淺見幾以爲不改西裝不足言西學者地方官吏又以爲未見

國家功令則起而禁之乃禁者自禁而變者自變既非刑法之可強迫而宗旨奇袤之輩則藉是以爲煽鼓之機誣

朝廷以守舊之名謂政府卽不變國民亦當自變卽此區區學堂制服之一端而借以結合黨派陰用其蠱惑之謀如據上游而馳

康莊一人倡言萬喙附和蓋憑藉之勢甚順而其響應之力因以大也臣愚以爲國家變法之事有先精神而後形式者亦有先形式而後精神者斯二道者於何決之則於國民之程度決之國民之程度既高則民生注意之事多在精神而不在形式如歐美列強同一富厚而幣制及租稅之法不必相師同一精強而操練及器械之形何嘗相襲如是者則變精神不必變形式國民之程度尙淺則羣流趨向所注多在形式而不在精神如彼得堡民暴動之要求祇在議院之規制明治初國人之豔羨乃在立憲之虛名如是者則欲變精神不能不先變形式方今我國學制既甫萌芽學界知識又皆幼稚一學堂制服之問題仍舊之與更新曾無當於宏旨顧使讒慝之徒借此以守舊之名加於我百度維新之君上而地方官吏之不肯通融者斷斷然施其禁令又不啻從而

佐證其說適墮其鬼域之計而爲淵魚叢爵之敵且廣褻長裾律以學堂體操圖畫諸端實有不便其出於參差不齊也亦勢之所必然畫一整齊殆難言矣夫服色者

國家所有之權近年

朝廷銳意練兵軍界服式業已一律改變釐然煥然足以新萬衆之耳目而振一國之精神中外交推咸加欣慕足知形式一事效力未必全無今以學界競爭之心鼓舞之力初不減於軍事而願聽其自爲制度參差不齊則何如

特頒明詔咸與維新使天下曉然於我

皇太后

皇上所以爲全國振作新機者無一固執成見之意因而曉然於讒慝之徒謂

朝廷爲守舊者一皆出於謗訕之私心憑藉既失其術因以不行矣抑臣更有說者凡國家與民人之交際將有所奪必有所予禮記曰考文章易服色殊徽號此其可得變革者也親親也尊尊也長長也男女有別也此其不可變革者也方今邪說詖詞流傳學界苟欲實行教育一切裁抑激厲爲事方殷而顧以冠服一端爲衆情所歆羨者固持不下一旦爲奇衰所藉口則得失之數殊不足以及相抵且如彼西人之說則服飾之棄舊謀新於現世情形不爲無益是又外人觀聽關係所在因時制宜聖心之妙用不必與環球立異者也一請嚴定遊學章程以培真才查歐美各國互相遊學者率以某國專長某學科於本國卒業之後特往遊學以廣聞見而益參稽而已其有吸取他國之學術以爲本國之教科因而進步大增臻

於強盛者則首推日本願夷考日本變法興學之年遊學於歐美各邦者其人數不及我國今日之什一乃彼以少數之人遠涉重洋風俗殊異聲氣不通不數年間而成效卓著我以多數之人近攬同洲種族相近文字直接多歷年所而輸入甚難其故何也日本於選派遊學至爲慎重或取其腦力密緻或取其體氣強實或取其學識優長皆視其所學何門而取材務與之相副故其程格嚴又於國家所亟欲舉之政治亟欲興之工藝學術按班派遣一班之中分析科目各有擔任卒業回國卽予任事業無不修事無不舉絕無浪擲巨資爲汗漫之遊者故其目的嚴各班學生選派之時文部特頒命令飭將教科之書口授之說參考之圖籍實驗之情形各人譯述成篇紀載翔實每一星期郵寄本國文部覆加校閱按其詳略得失第其殿最卽予審定頒行故一班甫經畢業

而教科講義已風行於全國之中遞爲推演成就多數之人才其有譯錄惰廢於學術無所發明無所輸入者卽分別撤銷追繳其學費故其規則嚴我國遊學之弊害蓋不勝言矣普通之未解國文之未諳外國語言之未習官費者既以請託得資自費者違復檢查合格既無矜慎選材之意矣遊而不學輟業而嬉者姑勿具論其或心豔虛名身循故事喜民校之規則縱弛閱數月而輒得證書藉以標幟高名侈談學務陋者不察輒相引重又或去來飄忽作輟靡常畢業者僅計年期後至者又循故轍其最高者稍涉語文躡躑大學選科雖復無定而得證仍自有期夫以卒業得證之要事而僅憑外交手段之抑揚監督既擁空名而不能實施其干涉學部未定規則而無由實驗其課程進其人而試之既無當其所學循舊例而用之亦不見其所長將以興實學得真才必無

幸矣宜其流弊日滋不得其益徒得其害也始基已誤猶望補牢及今不圖將與終古擬請

敕下學部嚴定章程以後各皆選派學生以普通卒業國文完美兼通外國語文者爲主不及格者無得濫派以杜情面請求之事其自費者亦一律考驗合格方予給咨其無咨者雖畢業不得有錄用任事之權利其選派班次除師範爲教育之本法政爲應用之才酌予多派外自餘理化工農醫學文科每派一班均按科目平均分配如鐵道一班則機械建築營業不容偏廢礦務一班則探礦開採工程冶煉必須兼資不得隨意重輕致多闕漏其舊有學生亦爲之釐訂科目酌量增補不勝學業者卽予撤回認定學科者不得中改不得中輟至於肄業各生應按所肄科目譯輯講義按月呈送提學使首尾蟬聯不准間斷提學使詳加審訂記其

分數呈報學部或優或劣卽爲該生之成績分別勸懲不得僅憑外國學校畢業證書爲據其畢業回國之學生高等以下各生由提學使按其學科詳細分門考試呈送學部覆試給予出身大學專科研究科各生由學部按照學科詳細分門考試

奏請

廷試給予出身夫督察於平日者嚴則養之也豫考驗於臨時者確則得之也真如是而實學不興真才不出者無是理也要在學部暨各省提學使實力振興掃除積弊而已

以上各條皆統籌全局規畫大綱不敢剽外國之形似而稍昧本原亦不敢泥固守之成心而務求切要期以固國計民生之大本而立可大可久之遠模雖外國教育之道與日俱新名儒輩與研究改良動關精義要亦不外覘國民之程度定教育之方針損益

用中隨時補救臣等所策畫者百年之中宗旨斷難改易尙求
睿謨獨斷毅然見之施行蓋我國興學伊始一切尙無定章雜糅
參差大爲可慮羣言固宜博采而別擇須定於一尊敝法固宜改
良而紛更則適滋雜亂安危之機至宜慎重凡高遠空虛之理想
不宜嘗試於一行卽羣疑衆難之交攻亦當折衷於至當蓋外國
行之有效者或不宜於我邦將來可以徐圖者或難施於今日尤
冀

朝廷責成學部堂官遇事躬親考究毅力主持則學務之興計日
可待所有臣等周覽各國學務擇要上陳係爲整飭本原力求振
興起見是否有當伏乞

皇太后

皇上聖鑒訓示施行謹

奏

軍政重要請取法各國以圖進步摺

奏爲時局艱危軍政重要擬請擇要取法各國制度以圖進步恭摺臚陳仰祈

聖鑒事竊惟德國陸軍發端最早自彼之先皇菲哩特威廉以來代有英主經營軍事迄今八世歷三百年之久逐漸改良屢有進步官署則兵部參謀部一切經畫機關與夫各隊總監章程教育則自武中學堂士官學堂以至專科大學皆累經釐改以底完全故挫奧報法世稱雄國而其陸軍之制亦幾爲天下之所師法卽世爲仇讐之法蘭西新自建立之義大利素號強大之俄羅斯整軍經武皆不能出其範圍而效之最著者尤莫如崛起之日本日本軍事無論事之鉅細無不奉德國爲師甲午之役既經戰

勝去歲復挫強俄其效法之誠進步之猛固由日本國民素有愛國思想加以教育普及人人知當兵爲應盡之義務故其氣象奮發踔厲無前亦由取法甚高追步不懈經十數年之教練考求始得坐收實效中國知德軍制之善久矣而軍事程度去日本尙遠當此屢經挫失互啟猜疑餉械空虛將才缺乏深知

朝廷力圖整頓煞費經營然使數年後無特立之精神無實在之進步則人皆能量吾之所至而終不能收取威定霸之功國之存亡正未可料此次臣等在德最久於德之軍政考察尤詳又見各國之所以謀國無不以軍事爲第一要圖因詳考各國制度以德國爲主以各國爲輔妥籌辦法爲我皇太后。

皇上縷晰陳之

一軍事大政謹擬恭請

皇上親御戎服以振士氣也臣等所至各國考核軍政凡技術之美器械之精雖由於工藝科學之發達未易遽行企及而軍容之何由嚴整士氣之何由奮發則固不容緩圖蓋軍事至危士氣不揚軍心必先自挫是故東西洋各國治軍之法於技藝學術之外提倡士氣尤屬不遺餘力其提倡之道各國雖不一致而無論君主民主則無不戎裝軍服身爲海陸軍之總統以督率行間者誠以軍政本君主之大權非臣下所能干涉以臣等所見如德皇親率一協之軍指揮演習俄皇亦躬冒風雨校閱新軍其軍士無不激勵歡呼聲聞四野他如各國覲見宴會之日君主亦莫不以戎服從事一國之君如此臣民靡焉向風惟先有榮於入伍之心故必無怯於臨事之患國勢強盛誠有由也中國三代以來蒐苗獮

狩猶有尙武遺意我

朝

列祖

列宗親習騎射秋獮盛典昭示來茲爲曠古所未有近年外患迭起國人思與世界競爭破除右文積習學堂

頒布宗旨亦有尙武一條精神爲之一振上年北洋秋操不過初具規模然臣等於覲見各國君主之時無不殷殷下詢見臣等所帶武員冠服新制又皆嘖嘖稱美是知我國稍事變易彼等無不觸目警心固唯恐練兵或有成績莫敢余侮也現在立憲預備伊始

皇上實統有海陸軍之大權若蒙

敕下練兵處參考古今中外戎服制度敬備

御用軍服一襲恭呈

欽定爲天下臣民所瞻仰遇有覲見外國使臣大典時一進御並爲

親臨校閱軍政之需則不獨軍界中人咸仰

聖武而思振奮皆以得入行伍爲榮卽環海各邦均知我

皇上提倡士氣跨越列強無不敬畏震服自強之基莫捷於此

一軍事行政宜重加釐定機關也夫治軍之術其道有二制度與

學問而已制度者編定規畫之法學問者運用教練之方也臣等

查各國軍政必分經理參謀教育爲三端各有專司各奉其職不

相雜廁而缺一不可誠以經理爲國務行政之一端而參謀與教

育則又軍事行政之要點也故各國海陸軍部大臣分內閣之一

職而參謀總長與教育總監則每以事體重大直隸國皇或自爲

特別機關如德如日如義如奧比比然也俄以參謀教育隸諸兵部然事多廢弛政不克舉日俄之役其經大挫而受痛創說者歸咎於軍事機關之不宜爲原因之大者近亦紛然議改矣日本前主合辦而研究其理則以分治爲宜故亦劃然不紊中國兵學幼稚特甚考究固不厭精詳而改良亦不應猶豫臣等請改官制摺中曾舉兵部與練兵處合併爲陸軍部此卽各國國務行政之一部自應妥爲併設而練兵處之軍令司則應抽出爲參謀本部別置總長以監督之內分四小部第一部專司本國戰時各事第二部專考外國軍政第三部則司內國設施及參謀人員之修學養成事宜第四部則司操練及要塞事務各置一長分科設官以治其事至於教育一項中國人材尙少似不能盡仿德日辦法擬請暫設陸軍教育處一所置總監督一員分馬步礮工程輜重交通

六課課設監督一員各司本課教育且管本隊專科學堂事務又別設陸軍教育高等委員以訂定全軍教育之方針並隨時與各課監督會議整理一切教育事宜陸軍學生考試委員以試驗入士官學堂之學生及考試此項學生畢業時之成績武中學堂陸軍小學堂委員以專管全國此項學堂教育事務並有整齊畫一之責以上諸務皆東西各國辦有成效羣相仿行中國整頓之際不容自爲風氣者也

一海軍制度宜次第籌畫規復也查各國注重海軍尤視陸軍爲甚誠以處列強競爭之世不能閉關自守一旦有事赴敵應援皆惟艦隊是賴海軍之不立不徒無軍是不有其海也歐美各國視海權與國權等重軍港艦隊經營不遺餘力下至測量海綫之法駕駛風濤之方亦無不分科講求蔚爲專門之學中國海軍自甲

午一役挫失無遺人財並窮規復難望膠州旅順軍港爲人所租借論者謂中國幾於無海可爲寒心然當此時局艱窘之秋不得不爲未雨綢繆之計夫以海面懸遠爲各國之所無若陸軍漸有規模獨海軍不謀成立譬如築室者外無牆垣雖有守禦之人仍不免於重困今爲規復之計宜略分次第辦法查各國歲入款項耗於海陸軍者居其強半而其預算之法約有二端一則逐年統籌一則隨時增進中國財政短絀勢難與各國相衡然宜指定一欸爲分年籌畫之需大抵先以五年爲期造就軍官若干人兵艦若干隻軍港若干處工廠衙署若干所逐款預計決一定數分年而籌卽分年而舉不至有枝枝節節之苦此款既定不准挪移一年有一年之收數一年卽有一年之成績更不至有半途而廢之虞然後培養人材廣立軍港擴充船廠皆得循序漸進徐事經營

蓋海軍在各國爲將臻完備之期在我國祇可謂初有萌芽之候不當糜費又不當惜錢固宜謀定後動慎之又慎者也

一徵兵之法宜實行全國也查徵兵之制起於二百年前歐洲三十年戰爭之際厥後戰事日劇兵額日多德國首先行之全歐各邦羣相仿效至於今日殆無國不然矣誠以兵力與國力互爲輕重兵力不足則國力必不可恃國力愈大則兵力亦必須遞增國家歲入有常勢不能悉數以充兵費而徵兵之善則逐年退伍逐年徵召平時可以少數之費養戰時多數之兵譬如養兵經費以四十萬爲定額十年之後戰時人員可得百八十萬而費則猶是四十萬也廿年之後戰時人員且三百數十萬而費亦猶是四十萬也二三十年之間兵數十百於前費用則毫無增益而其學問程度較諸倉卒招募者不可同年而語是以各國行之莫能相易

不知實吾古者寓兵於農之成法也中國練兵處奏定軍制寓募於徵北洋勦辦於前各省踵行於後較之向來募兵之法自爲妥善而於舉國皆兵之意似尙未能實行蓋應徵者多屬單寒不及富家貴族則仍有鄙夷不屑之見而全失各盡義務之心應請明降

諭旨仿照各國徵兵之法頒定實行使人人皆知當兵爲國民義務雖富者不許僱代貴者不得邀除而兵制饒章全仿德日成法酌量釐定庶幾天下之士聞風嚮慕不復以當兵爲苦累矣
一軍事教育宜明示方針也近來

朝廷銳意練兵技術已進於嫻整然有練而無訓於德育智育不免稍形欠缺且非徒訓而已也宗旨不一精神不完猶未見其有益昔普國受創於威廉第一思雪其憤叛訓兵之旨以保守其尺

寸土地爲先設爲盡忠義正禮義尙武勇三條而注意於仇法故一戰而勝法日本維新以來宣布勅令二次爲全國軍人共守之訓其中亦分盡忠節正禮儀尙武勇崇信義守質素爲五條尤以守質素一條爲東方之國粹日人常取勅訓各條作爲精神教育教科書反覆詳解軍人奉之如金科玉律故一戰而勝俄中國當屢敗之後士氣久餒若但練習形式而不淬厲精神縱使約束嚴明猶恐未能一戰蓋人之精神奮發培養全在平時要必夙有講貫之功浸灌之具臨事始能沛然而莫禦擬請敕下練兵處釐定宗旨撮舉大綱編爲訓戒軍人之書頒示天下以爲方針上師句踐式鼂之風近法威廉仇敵之意十年教訓用之一戰或可與世界強國互相抗衡至於軍事教育本可補助普通教育所不及是以各國軍學於教育之道組織甚爲完全故雖

退伍之時亦能樂羣敬業德國今日社會氣象之整齊者實由徵兵所致使全國既辦徵兵而於教育又復留意則國家籌款徵兵卽不啻籌款興學一舉兩得計尤莫便於此

一高等兵學宜速成修習也查德國陸軍各級學堂具有深意武中學堂爲士官學生出身之地士官學堂爲初級武員養成之所專科學堂則分習步馬礮工各專科大學堂則教以帥兵參謀諸要務秩然不紊各有專長中國兵學久荒人材因之缺少近年改易軍制由學堂出身人員較多然於帥兵參謀諸學術大半詣力未底完全且各省所練新軍行將增備而學堂則祇士官粗有規制餘均未能舉行夫國家欲練數十萬大軍凡職任之重輕自當以學術高低爲差等今之材智固不足用卽處置亦未必合宜竊恐軍政日以擴張人才亦日虞不足擬請先於京師設速成陸軍

大學堂一所取各省軍隊人員入堂學習期以速成期滿卽令歸隊以所學程度轉相教授一面照奏定陸軍學堂辦法速開各級學堂俟士官學堂辦有成效再將速成名目取消按照德國辦法專設大學堂以教士官學生俾養成帥兵參謀之資格庶乎分途並進各有適用之材學者固不至有躐等倖進之思用之者亦必無僨事敗謀之慮否則程度不一駑驥同駕辦事既不免參差高下倒置趨功則尤難振奮欲求軍事之整理必無效矣

一貴胄子弟宜出洋入伍也夫出洋遊學之益盡人知之惟中國右文而不尙武數千年習慣已成風氣近年各省所派陸軍學生出洋後稍知軍人之可貴但不能循級求學徒事囂張又專以外國武員驕貴豪侈之習轉相仿效致慕其名而不能務其實耳竊惟風氣之開全賴在上者有以倡率臣等愚見不若選派宗室貴

胄先赴德日等國遊學馬步礮工各隊任學一科皆須親身入伍肄業歸國之後與陸軍學生一例任用查德國自皇子親王以及貴族子弟無不入伍從軍者士民供職軍伍則鄉里咸以爲榮此次臣等所見如德國亨利親王現充海軍二等提督而德皇二皇子亦均在陸軍充中佐少尉等職身爲貴胄位在偏裨聲譽之隆轉由此起是以舉國材智無不爭趨於軍界國安得而不強日本曾師此意所派親王貴族往歐洲習海陸軍者趾踵相接學成則名隸軍隊士氣爲之大振日俄之役有棲川宮親王督戰於旅順海口閑院宮親王復襲破俄軍預備隊海陸並捷克建殊勳而伏見宮親王黎本宮親王亦皆軍人中之錚錚者至於彰仁宮親王尤爲軍界所崇奉尊若孔孟者也我朝龍興遼瀋入關之日皆以親王貝勒典軍迄於雍乾之際武功

猶爲鼎盛士氣之類敝曾不及百年耳如蒙

宸衷獨斷派遣年望稍輕之王公貝勒出洋入伍肄習以迪前光而作士氣則天下之士必愈加感奮而不能自己而外人之敬畏不待言矣

一軍火器械宜建廠自辦也國家養兵本屬耗財之事而東西各國百計經營不遑朝夕者誠爲世運所鼓盪弱肉強食世界所同存亡之機間不容髮查美法律有云凡美國軍備必以美國材物修之德人亦云德軍衣食器械未嘗購自國外意大利能造萬餘噸之戰艦日本能造中口徑之巨礮皆近年之進步也至如奧大利俄羅斯丹馬瑞典等國兵備強弱不同財力厚薄亦異要皆無不有製造槍械船艦各廠而以美德兩國財力最爲雄富規模亦最爲宏大蓋其用意實有兩端一以供戰時之取求一以防利權

之外溢是以官廠而外亦聽商家自爲建造自爲經營德之克虜伯廠聲動環球爲海內第一名廠亦商辦之廠也中國製造廠僅有上海漢陽兩處工業未經發達製造多不精良從前遇有戰事皆自外洋購買倉卒之際不濟於用加以經手之人全未考校往往買舊式朽鈍之器以充數笑柄嘩傳可爲髮指近年教練新軍增購槍礮亦皆各省各自爲政不能盡歸畫一至子彈火藥之需在軍事中尤有性命關繫得之則生不得則死無論臨時購備種種困難而以性命屬諸他人豈復可以自保臣等思之每用危悚擬請

敕下練兵處統籌全局約計每年各省所練之兵需用槍礮若干子藥若干劃爲定數更酌定地段分設各廠多造子藥以備不虞亦如籌畫海軍之法逐年預備的款不得挪移動用經費或由各

省攤派軍械亦准各省領支并設一軍器總監所酌定額缺監督其事一面培養工廠人材倘有商家願立民廠製造者由總監所定章監督官力既可稍紓軍儲不致資敵十數年後漏卮盡塞而軍實亦充矣

一戰時計畫宜預先籌備也查各國軍政有所謂動員計畫一端事涉機密秘而弗宣故其詳細情形無從刺探然其大要在舉戰時事宜皆一一預爲準備先行計畫而已預備之法大自馬匹器械衣履戰具子藥餉糈醫藥小而篷帳炊器車輛什物以及裹創之要藥紉裂之針線無不在籌備之列至於現在軍隊與預備各軍如何接濟補充轉運輸送國中所有軍需能應若干軍之求所出軍火能敷若干日之用某地徵馬若干某地徵車若干某處可作營棚馬廐某處可容借宿會食事無巨細緩急皆須規畫井井

一目瞭然一旦有事應付始可裕如若營官隊長凡百有司則無論其籍隸現預職司大小皆令於戰時應行籌畫諸端立說作表詳陳辦法以覘其學識深淺謀畫短長故能好謀而成不致進退失據中國此次教練各軍其收效在於能戰使平時於戰備一層不能討究殊恐難協機謀擬請

敕下各省照各國辦法凡已練之軍皆當妥籌戰備逐年計畫詳著表說呈由軍令司查覈卽以每年表說計畫之疏密定各省新軍成績之等差擇其最完善者量加獎勵傳示各省一面由軍令司派員檢查其實在準備是否與其計畫相符如此行之數年後新軍規爲必可大備卽使事起倉猝亦可稍有把握紙上談兵之誚庶可免也

一軍人位置宜優定章程也處今日尙武時代爲軍官者大抵皆

有科學完全之智識乃能訓練士卒戰勝強鄰其對於國家則擔荷保國衛民之責任忠君親上之義務故不得不出於優待者勢使然也查德國優待軍人無微不至國家除賞卹特典外其佩勳章而服軍服者在朝則榮寵有加在野則禮敬不懈推之營中之酒食器具則有半價之特章輪船汽車戲場照像館則有減價之利益年老則有養老之典身後則有撫卹之恩各國大概相同無稍軒輊而軍人之貴爲執政者則昔之德相畢斯馬今之日相桂太郎尤爲人所稱羨中國習尙不同閭里瑣屑之事或者俟民智稍開再加誘勸免使眼前無學軍隊滋生事端至於賞卹恩給大典攸關似宜早爲頒示擬請

敕下練兵處查照各國章程分別釐定凡平時戰時著有功績以及能發明新械新學有裨軍政者不論將士弁兵或授以勳章或

加以恩給皆稍寓特別從優之意俾與其互相觀感之誠其有學問深純才猷卓越者並由

朝廷廣加擢用使贊戎機庶天下之士皆嚮然於文武兩途絕無畸輕畸重之見而往日不屑當兵之謬說概行剷除舉國上中之姿必無不以身許國而研求軍政者如此則兵力可恃而

國基亦於以永奠矣

以上各條皆就中國現行軍政應加輔助者擇要言之臣等伏念今日舉國關繫莫重於軍數十年來外患迭興國勢日蹙蓋已岌岌不可終日幸值

國家閒暇得以整飭軍政若訓練不能有功將一蹶必難復振故無論朝野上下皆當注力於此而其切要方法仍在不徒求形式而激勵精神不自恃完全而力圖進步有精神有進步則雖兵少

饒單亦可謂之有效無精神無進步則雖兵多饒足亦可決其無功且中國今日不重在有兵而重在能戰此後事變之起雖不必輕言用兵而至外侮相逼之時亦難置兵而不用是預備雖在於平日而收效實在於將來斷不容塗飾外觀不加傲懼區區之忱惟在於此是否有當伏祈

皇太后

皇上聖鑒施行謹

奏

謝 賞學堂匾額摺

光緒三十二年六月

奏爲恭謝

天恩仰祈

聖鑒事竊照

臣於光緒三十一年八月間在直隸豐潤縣城捐建

學堂經直隸總督袁世凱據情

奏陳仰蒙

慈禧端佑康頤昭豫莊誠壽恭欽獻崇熙皇太后賞給

御書黨庠毓秀匾額一方

皇上賞給

御書惠孚鄉校匾額一方交臣祇領伏念王制早重黨庠春秋不毀鄉校自暴秦儒風不競至今日民智猶溼一鄉之中愚者百不愚者一四民之內學者一不學者三倘一任其自安晦盲則將何以明立憲法欽維

皇太后德符坤厚

皇上治炳離明

祇奉三無

開通六蔽臣誦菁莪而思奮晷桑梓而分廉不圖十室之絃歌亦荷

兩宮之

奎藻蓋邑邑皆登教育應洗從前村學究之冥頑人人俱有是非
卽爲異日下議院之基礎雖比戶以相觀而善而凡民必有待而
興臣歸自重洋欽承

寶訓分財曰惠不如教人爲善之忠論秀而升庶幾以人事
君之義所有感激榮幸下忱謹恭摺叩謝

天恩伏祈

皇太后

皇上聖鑒謹

奏

請 賞洋員寶星摺

奏爲懇

恩賞給東西洋各國人員寶星恭摺仰祈

聖鑒事竊臣等奉

命專使考察政治臣載澤臣其亨前往日英德比等國臣鴻慈臣

端方前往美德俄奧義及丹瑞那荷等國所到之處均經該國專
派人員接待導觀各行政官署上下議院大小學堂海陸軍營官
私局廠復延請彼國政治專家分門講說以備甄採該員等均能
仰體

朝廷敦睦之懷照料一切極爲周至遇有應行諏訪之事無不竭
誠相告不厭精詳卽歸途經過英法各屬埠亦皆排隊奏樂設宴
款留情文交摯查外洋通律凡各國聘問往來皆互贈寶星以昭

欽定大清會典事例 卷一百一十五
睦誼 臣等所至之國如日比法德奧俄義丹瑞那荷各國君主總
統暨薩克生巴延兩王國亦均贈送寶星並分贈參隨等員寶星
有差先後電奏在案 臣等憑藉
國家寵靈使節所經爭相賓禮而各國人員槃敦周旋深資臂助
未便沒其慕義之忱自應宣布
朝廷德意請

旨賞給寶星藉資鼓勵除英美兩國向章不受寶星外所有各國
應請寶星各員 臣等謹按章程分別等第繕具清單恭呈

御覽 籲懇

恩施 照擬

賞給 如蒙

俞允卽由 臣等咨行外務部照章製造寶星並填執照分別發交

祇領至各國武弁商人等並有曾經照料出力者已由臣等循例分別給予功牌以示酬勞之意其奧義兩國照料人員及比國照料臣鴻慈等前往游歷各人員已經電詢三國駐使臣開具員名官職一律請給一時尙未覆到應俟覆到之日再由臣鴻慈等彙齊補請以昭公溥所有懇

恩賞給各國人員寶星緣由謹合詞恭摺具

奏伏乞

皇太后

皇上聖鑒謹

奏

酌保隨員摺

光緒三十二年八月

奏爲遵

欽定大清會典事例
卷之二
旨酌保隨同出洋出力人員開具清單恭摺仰祈
聖鑒事竊 臣等於八月二十六日具奏擬酌保所帶參隨各員請
旨遵行奉

硃批准其擇尤保獎毋許冒濫欽此欽遵在案查 臣等所至共計
九國參隨各員分任調查譯述及管理庶務收支各事均臻妥洽
謹將在事人員分列清單遵

旨擇其尤爲出力者三十一員繕具擬保銜名清單恭呈
御覽仰懇

天恩俯准照擬獎敘以示鼓勵至所派出洋留學人員並學生等
相助爲理人數尙多亦皆著有微勞業由 臣等隨時酌加獎勵未
敢稍涉冒濫除飭將各員履歷咨部查照外所有遵
旨酌保隨同出洋出力人員緣由理合恭摺具

奏伏祈

皇太后

皇上聖鑒謹

奏

參將因公身故請

卹片

光緒三十二年八月

再副將銜補用參將姚廣順前在湖北管帶護軍等營勤奮有爲夙資得力自派往日本閱操歸國益知教練之學臣端方署江蘇巡撫任內曾經奏調該員來蘇差遣旋又調赴湖南派充協統督練新軍此次臣等出洋因德國兵制素爲中外所推該員係屬有用之材特行奏調隨往考察以備他日任使該員所到各國均能悉心研究遇事講求演礮閱操尤屬不辭勞瘁方冀使事畢後可爲

朝廷得一良將不意該員甫經回國卽因公身故前經巡警部奏
明在案該員隨臣端方治軍有年勇敢樸誠忠實可靠經此閱歷
材識並增乃不及稍事展施以盡其用聞者無不同聲惋惜業經
臣等酌籌撫卹茲查歷屆出洋病故人員均蒙

恩卹有案該員情形尤爲可憫合無仰懇

天恩俯准將副將銜補用參將姚廣順照歷屆出洋人員病故成

例

敕部從優議卹

給予恩廕以爲勤事者勸出自

逾格鴻施謹附片具陳伏祈

聖鑒謹

奏

擴充翰林院經費摺

奏爲科舉旣廢編纂亟關重要請籌欸擴充翰林院衙門經費以資辦公恭摺具陳仰祈

聖鑒事竊臣恭讀八月初六日

上諭昨已有旨停止歲科考試專辦學堂所有各省學政均著專司考校學堂事務會同督撫經理等因欽此伏查翰林院衙門地居清要爲文學侍從之臣我

朝名臣賢相多出其中咸同以來曾國藩胡林翼李鴻章等皆有
所樹立見稱於時洵昔人所謂非科舉得人才實人才出於科舉也近雖奉

旨停罷科舉而文學一科屬諸國粹東西各國學制亦多注重於此凡古代書籍圖畫均列之禁令不准流入他國又於國史地理

等科於其祖宗創業之由威德之蹟皆反復教授以固其忠君愛國之心矧供奉

內廷及編纂國史方略諸大典在在皆需文學是該衙門之關係緊要有不能不爲籌及者惟在職諸員廉俸甚微房試各差又皆無望現在外部商部司員津貼尙優吏刑各部亦陸續籌有經費該衙門獨抱向隅殊非

朝廷優遇詞臣之意亟應設法籌款力與維持查各省學政出棚考試例有棚費准各州縣坐支正供造冊具報各州縣大小及數目多寡不等然集之可成巨款其夫馬火食則由各州縣於平餘項下攤派供應費亦不貲相沿成例已數十年各省合算約支銀數十萬兩今歲科旣已停止學政又駐省城各州縣減省供應之繁似可擇提歸公以棚費爲學政視學經費而以供應一項勻攤

各州縣酌定數目按年解繳藩司彙解京師專爲翰林院衙門編纂經費應由各省督撫遴委得力之員切實清查按照各州縣從前供應數目中酌提十分之四五約計其數歲又得十餘萬金每員酌給千金尙屬有贏無絀既於各州縣祿入無損又非取之於民而該衙門得此鉅款亦可專心編纂並研究教育以備

奏派各省視學之選實爲一舉兩得於新政實際有所裨益如蒙
俞允應請

旨飭令各省督撫迅速籌定提解以資挹注而垂久遠所有請撥
供應一款爲翰林院衙門編纂經費緣由理合恭摺具陳伏乞

皇太后

皇上

聖鑒訓示謹

奏

進呈歐美政治要義摺

光緒三十三年九月

奏爲敬編歐美政治要義恭錄成冊進呈

御覽仰祈

聖鑒事竊臣等此次前赴歐美各國考察政治爲期較促歷國甚多深恐博覽周咨不免掛一漏萬是以放洋之後卽注意於采譯書籍誠以耳目所得常不敵公私著述之切實可稽詳盡無憾惟是譯材較少政典彌繁參隨各員間有口譯筆受者又往往得其一端未能綜括全體且各國分譯亦不能貫串成編上備

朝廷采擇因特就各國政體薈萃編爲歐美政治要義一書酌派委員專司纂輯去其繁雜擷其精善似於政治大端業已粲然具備現奉

明詔預備立憲各國政體自應兼搜並采以備考求謹將臣等所編恭錄成冊先行進呈用備

幾餘省覽至參隨各員編譯各書門類甚夥現正詳加排比分別部居頭緒紛繁審定尙須時日容俟編齊後陸續咨送考察政治館查核再行呈進其未經譯出之各國政書有由臣等購買者有係各國贈送者名類更繁篇帙頗富亦經飭員譯出書目開列清單一併咨交政治館收錄以俟擇要編譯俾成鉅觀所有敬編政治要義成書恭呈

御覽各緣由謹繕摺具

奏伏乞

皇太后

皇上聖鑒謹

奏

編輯各書經費片

光緒三十二年九月

再臣等此次所譯之書種類甚多隨同出洋各員事務較繁有不及編輯者即由臣等陸續購歸在滬派員分纂回國後查核所編均臻妥密此項編輯經費係由前任上海道袁樹勛墊給銀四千兩以爲開辦之資又經現任上海道瑞澂續墊銀八千餘兩均經該員等聲稱所墊之款統由該員捐廉籌給毋須在使費中撥還實屬急於公義謹附片

奏聞伏祈

聖鑒謹

奏

繳銷出洋關防片

光緒三十二年九月

再臣等此次出洋考察政治曾經奏明刊刻關防以昭信守茲屆考察事竣自應循例繳銷除將關防一顆咨送外務部外謹附片陳明伏乞

聖鑒謹

奏

請 褒美洋員片

清單附

光緒三十二年十二月

再臣等赴美國考察政治時極蒙美總統及各官員紳士優禮相待路過檀香山該島總督派員迎於舟次船抵舊金山美總統遣大博士精琦爲己代表親到迎接並沿途照料伴送至華盛頓都城抵都後各部大臣各學校校長各局廠總辦於諮訪各種政務參觀各種學校察覽各種製造俱承討論講求引導指示備極殷懇歷游林肯芝加高威士頗恩安納波利士士丙非爾費城必珠

卜波士頓愛爾買拉紐約等城各該總督府尹以及紳士男女教習等均各導迎招待賓至如歸至各處學校尤極歡迎如耶路大學幹尼路大學威爾士利女學皆贈送中國學額多名哈佛大學則許三年送美金六萬元爲存款以所得利息借濟中國學生之貧者皆爲各國不多有之事此實由於

聖德遐孚無遠弗屆友邦輯睦薄海摠誠是以臣等秉節諮諏得以增光壇坫而彼都人士摯誼熱誠殊堪感佩自應仰懇

綸音優予褒美以酬其禮遇之情理合將各該文武官員紳士人等優待情形開具清單恭呈

御覽懇

恩傳旨嘉獎俾資觀感出自

逾格隆施爲此附片具陳伏乞

聖鑒訓示謹

奏

謹將_臣等赴美國考察政治時各該文武官員紳士人等銜名及優待情形開具清單恭呈

御覽

計開

檀香山總督喀特 船到該島時派中軍迎於碼頭復延至督署晤各大員及紳士

大博士精琦 美總統派該員爲代表迎至舊金山沿途照料伴送直至華盛頓都城

將軍沈麥 將軍樊士頓 均在舊金山率屬前來迎接

統帶太平洋艦隊水師提督古烈治 督辦美阿島海軍供應廠

水師提督麥可拉 先後率所屬來見均極優禮有加

管帶盧伯治 少尉懷德 奉上官命並得海軍部允准伴送至
華盛頓

尼拔拉士喀省總督 林肯城農務大學校校長晏德魯 於林

肯城考察政治查看農務大學均極相助

芝加高府尹敦 派紳士一百人前來招呼並相助考察

芝加高紳士濮倫第柱 代表全府導往觀看公立各院如瘋人
院癆病院之類

芝加高女教習阿當氏 導往察看大學校是校爲捐款設立以
教育貧民使於羣體學問道德均有進步者也

華盛頓外務部大臣 陸軍部大臣 海軍部大臣 財政部大
臣 法律部大臣 於考察各件政治極能相助

又藏書樓總辦 國家印刷局總辦 民事調查局總辦於察覽時均極助力

威士頗恩武備學堂校長 安納波利士水師學堂校長 士丙

非爾國家槍礮廠總辦 皆經遊覽極力詳細導觀

費城府尹 必珠卜城府尹 愛爾買拉城府尹 士丙非爾城

府尹 波士頓城府尹 乃阿格拉花爾士城府尹 遊覽時均

承優待

紐約省總督派代表黎挪爾 紐約城派代表奧爾谷 招待優

厚並代排定在紐約遊觀各處之單

麻士舟色省總督 設大宴會本地官紳名士畢集頗極一時之

盛

又前財政部副大臣韓麟 招呼往本省內各處察看

耶路大學校長 送中國學生學額十一名免收學費

幹尼路大學校長 送中國學生學額每年六名免收學費該學

四年畢業三年之後常有中國學額二十四名

威爾士利女學校長 送中國女學生學額三名膳費宿費學費

概免

哈佛大學畢業生 應許每年送美金二萬元連送三年共美金

六萬元以爲中國貧學生存款每年以所得利息專借與中國學

生之無資者

端忠敏公奏稿卷六終

端忠敏公奏稿卷七

調補江督謝恩摺

奏爲恭謝

天恩仰祈

聖鑒事竊照光緒三十二年七月十四日奉

上諭端方著調補兩江總督兼南洋大臣兩江地方緊要著迅赴

新任欽此欽遵跪聆之下感悚莫名伏念臣輿以輜庸過邀

寵遇列邦奉使初迴環海之槎前席敷陳屢沐

明廷之對迺昨頒

溫詔將欲仿行憲政以合萬國之歡心復仰荷

恩綸遽蒙

甄錄微勞而

界兩江之重任

榮施逾格報稱綦難臣惟有竭盡駑材勉擔要寄前此閩疆虛負
彌慙涓滴之未酬邇來江左重臨惟冀

高深之永戴所有臣感激榮幸下忱謹繕摺恭謝

天恩伏祈

皇太后

皇上聖鑒謹

奏

兩江到任接篆摺光緒三十二年九月

奏爲恭報臣到任日期叩謝

天恩仰祈

聖鑒事竊臣蒙

恩調補兩江總督於八月十二日請

訓仰蒙

召見

訓誨周詳莫名欽感遵卽起程出都茲於九月十一日馳抵江甯省城十二日准署督臣周馥飭委江甯府知府羅章署中軍副將陳煦亮將兩江總督關防兩淮鹽政印信

欽差通商大臣關防並

王命旗牌文卷等項賚送前來臣當卽恭設香案望

闕叩頭謝

恩祇領任事伏念臣前權江篆粗悉情形歸自海邦復膺

簡畀撫時艱之日亟值憲政之方新尤當力戒因循急圖整飭舉凡練兵興學課吏保商輯睦邦交開通民智在在胥關緊要現在

東南財力支絀異常徐海水災撫綏尤重惟有破除積習殫竭血誠隨時會商北洋大臣三省撫臣及江北提臣認真經理共濟艱危以期仰答

高厚鴻慈於萬一所有臣到任接篆日期理合恭摺叩謝天恩伏乞

皇太后

皇上聖鑒謹

奏

公司參款查明辦理摺

光緒三十二年十月

奏爲鎮江富潤公司被參各款遵

旨查明辦理恭摺覆陳仰祈

聖鑒事本年八月二十日准軍機大臣字寄八月初九日奉

上諭有人奏公司開築馬路謀毀鎮江城垣請飭嚴行查禁各摺片著周馥端方陳夔龍確切查明妥籌辦理另片奏丹陽練湖淤灘公司布種桑秧有妨水利等語並著該督撫查明妥辦一併具奏原摺片均著鈔給閱看欽此當經前署督臣周馥臣夔龍遵卽派委江蘇候補道趙受璋朱宜振會同調署常鎮通海道榮恆查明卷據分赴鎮江丹陽等處按照原參各款逐一確查妥議去後茲據該員等查明稟覆臣等詳加查核如原奏謂近有浮薄好事之徒誣捏多名具稟兩江總督欲於城內另開馬路三條城垣須拆數處督臣尙未批准遽有世習天主教之道員馬良創立富潤公司承辦此事查本年三月前署常鎮通海道陶森甲據丹徒縣舉人茅謙張長慶歲貢生包祖同駐防舉人崇樸歲貢生清選附生祥清等擬開築鎮江馬路以興商務就蒜山下登岸由西門入

城直出南門接大覺寺爲第一路又由京畿嶺已有之大馬路造橋過河至城下開舊西門直至東門爲第二路又議開新北門由江邊築路入城穿東門街斜出南門爲第三路當與鎮紳候選道馬良籌商馬良願聯合商界創辦此事前署道陶森甲因查西門外街道極窄市面極繁難令遷讓祇准將第二第三兩路興修由馬良會同舉人茅謙等招集華股名曰富潤公司經陶森甲刊發圖記稟報在案嗣以需款過鉅集股難成兼因開鑿城垣拆讓房屋遷葬墳墓民情亦多未洽至今尙未開辦又片奏鎮江外城表延數里近年瀕江北面半圯其餘無恙光緒二十九年郡城警察委員寶鎮山創議將外城拆毀除搭蓋兵房菜市各數十間外其高約二丈長約數里之磚石未知何往風聞委員鮑姓及匠頭張姓賣諸洋人得數萬金朋分入橐寶鎮山亦不無染指查鎮江外

城在郡城西北隅咸豐初年粵匪踞城時所築克復後藉以防江
奏請免毀惟兵燹之餘已多傾圮加以江湖之衝坍貧民之偷拆
僅西門外沿江至浮橋一帶猶存什一二十九年前常鎮通海道
郭道直籌辦城外通商場警察經費難措稟請將廢城拆讓地基
卽以磚石添蓋房屋委候補知縣鮑孝先監工創建薛家巷曹家
坡等處警察分局鎮屏瓦子兩山營房並建蓋中學堂又在所拆
城基一帶建蓋菜市房一百二十餘間沿河砌造邊岸一百二十
餘丈駁岸碼頭四道石浮橋口左右駁岸兩道鋪砌荷花塘之大
路薛家巷街道工程浩大所用磚石甚多其承修匠頭張姓卽張
貴和張子餘二人分作聞工竣時張貴和變產彌補確係虧累委
員與匠頭等無分肥情事尙屬可信至寶鎮山係候補知縣委充
警察局正辦並未經手工工程無從染指片奏謂其時該員親服未

除每夕酒肆冶游罔有禮法徧加訪詢無能指實又片奏富潤公
司擬於丹陽練湖淤灘布種桑秧究於民田水利有無妨礙應由
地方官詳勘一節查練湖縣亙四十里受長驪諸山八十四汊之
水其西南隄身設有涵洞九道以備夏秋之間放水灌田從前曾
鞠廢成田後因迭被荒旱康熙四十八年挑濬立案將湖內升科
田七千二百餘畝由沿湖得沾水利之田認完糧賦立有碑記永
爲定制具載丹陽縣志賦役全書若於湖內修築圩田將來山水
下注無從滯蓄不獨丹陽一邑水利攸關卽金壇溧陽兩縣民田
均受其害前據鎮紳馬良欲將練湖築圩以興蠶業經前署督臣
周馥飭前署常鎮通海道陶森甲親詣查勘馬良亦因工本過鉅
迄未舉辦臣等伏查原參各節雖不必盡出無因第鎮紳候選道
馬良雖係習教平素爲人聲名尙好所設富潤公司開築馬路原

欲廣拓埠場振興商務不知城垣禁令所在豈容擅自拆毀居民
深恐拆屋遷葬諸多擾累以致嘖有煩言誠如原奏所云鎮江民
情浮動萬一以仇馬者轉而仇洋致釀重案關係匪輕應飭將富
潤公司圖記繳銷嗣後如有人籌款築路另行妥議核辦永不准
開鑿城垣以符禁令前常鎮道郭道直拆取廢城磚石係移作地
方修造警察房屋公舉動用尙無不合委員鮑孝先寶鎮山匠頭
張貴和張子餘亦無朋比分肥情事均無庸置議馬良擬就練湖
築田種桑之議查核情形於民田水利大有關係實屬誤計既未
開辦應即將所稟原案注銷以備早潦而利農田所有鎮江富潤
公司被參各款違
旨查明辦理情形是否有當謹合詞恭摺覆陳伏祈
皇太后

聖上聖鑒訓示謹

奏

截漕賑撫並展辦各捐摺

光緒三十二年十月

奏爲查明蘇省各州縣水災極重籌辦賑撫需款甚鉅懇

天恩准予截撥新漕並展辦江南賑捐一年加辦七項常捐恭摺
具陳仰祈

聖鑒事竊照蘇省江南江北各州縣本年被水成災業經前署督

臣周馥會同臣夔龍電請軍機處代奏奉

旨周馥陳夔龍電奏該省徐海淮安等屬水災情形深堪憫惻著
賞帑銀十萬兩由藩庫給發妥爲賑撫毋任流離失所至所議災
區錢糧分別蠲緩及請截留漕米之處著俟秋後確查情形再行
奏明請旨欽此

聖恩渥被感戴同深遵經電商戶部在於江安糧庫漕折項下動撥銀四萬兩江蘇藩庫清賦項下動撥銀六萬兩以七萬兩分撥徐海淮安各屬以三萬兩分撥常州鎮江各屬散放急賑以拯災民一面電致各省分乞協助並切商滬上官紳廣勸賑捐俾資接濟臣方到任接准移交曾於電奏海州匪徒滋擾案內陳明各處饑民不下百萬現擬廣籌賑撫以定人心奉

旨著卽督飭各員將災民妥爲撫恤毋令被匪勾結等因欽此正籌議具奏間復准軍機大臣字寄九月十八日奉

上諭有人奏江蘇被水州縣田畝歉收請飭查勘災情分別辦理一摺著查明體察情形奏明辦理原摺著鈔給閱看等因欽此遵旨寄信前來查蘇省居長江下游歷來潦多旱少本年春夏之際川湘大水建瓴下注底水較之往歲已覺增多五六月間霪雨爲

災疇霽日少山水暴發江湖並漲積潦橫溢無計疏消低處田廬
悉遭淹沒被災情形以徐州所屬之宿遷睢甯邳州海州及其所
屬之贛榆沭陽淮安所屬之安東爲最重常州所屬之宜興荆溪
鎮江所屬之金壇溧陽淮安所屬之清江桃源次之徐州所屬之
銅山蕭縣淮安所屬之山陽阜寧松江所屬之華亭婁縣青浦蘇
州所屬之常熟昭文新陽又次之此外江寧揚州各屬亦間有帶
淹之處兼之運河迭啟閘壩洩水下游各處晚稻多淹江邊大圩
雖未漫潰而圩內積水過多民圩半遭冲決收成已屬減色合計
本年水災之鉅徧及八府一州而江北徐海淮安各屬災情奇重
難民尤多蓋該處連年災歉本屬戶鮮蓋藏今歲罹此鉅災田畝
房廬悉淪巨浸不獨雜糧蔬菜補種無從且節候已深積水未退
二麥尙難播種災民無可糊口紛紛變售牛具四散覓食甚至賣

兒鬻女者日有所聞餓殍在途流亡滿邑慘酷情形有爲原奏所未能盡者况淮徐風氣剛勁伏莽素多現海州地方已有匪徒滋擾正在派營剿辦深恐匪黨勾結饑民別釀鉅患是廣籌賑撫尤爲弭患要圖前雖酌撥款項採辦米糧

奏准免釐運回賑糶惟清查戶口散放錢米頭緒本極紛繁各州縣中辦事勤能於官賑外捐廉提倡並勸紳富捐助者固亦有人而災民戶口尙未查清撥給賑款至今未放比比皆是甚或諱災匿報希圖照舊開徵並藉平糶爲名從中漁利隨經嚴飭藩司及淮徐兩道切實查究旋聞淮安各屬災民大批南下至揚州者已數萬人飛飭設法截留資遣回籍就賑一面加籌款項撥給災重各州縣飭赴濟寧蕪湖等處採運米穀雜糧分別賑糶仍令酌發錢文以輔米糧所不足並在衝要處所設立粥廠及留養貧民各

廠俾免失所各屬圩埝及淤塞河道均關田廬保障之資舟楫交通之利亦飭勘估興修藉可以工代賑至常州鎮江蘇州松江各屬內惟宜興荆溪金壇溧陽四縣業已辦過急賑第災區較廣饑民衆多現在時屆嚴寒自非接辦冬賑不足以資安集而免流離綜計款項至少亦需二百餘萬前蒙

恩賞帑銀十萬業經散放無存此外各省協助本省賑捐積穀及滬上官紳募集義賑銀兩爲數有限現在所發之款均係督商藩司多方挪湊一面息借商款以應急需明知財政支絀異常捐事久成弩末以後不知如何歸款祇以目覩災民慘狀不能不權量重輕先其所急無如待用之款爲數浩繁百計搜羅不敷甚鉅加以來年春撫爲日方長尤應預計通籌以免臨渴掘井因思蘇省歷年偶遇偏災奏請截漕濟賑無不渥蒙

恩施此次欽奉

諭旨截留漕米著俟秋後查明再奏仰見

朝廷軫念災黎有加無已茲經臣等確切覆查本年災情之重賑

款之鉅爲數十年所未曾經見自應遵

旨據實上陳仰懇

天恩俯准於本年新漕項下截留蘇州漕米十萬石江北漕米五

萬石連同水腳運費等款一併撥作災賑之用出自逾格

鴻慈至江南賑捐現已一年期滿應請展辦一年並援照湖南湖

北成案加辦七項常捐藉資湊濟抑臣等更有請者查辦災賑全

賴官吏得人方可使款不虛糜民沾實惠現由臣等督飭司道嚴

飭各州縣認真經理一面密加考查儻有侵吞賑款入己情事查

明賊證確鑿卽請

旨明正典刑以昭炯戒其有辦理不善各員隨時分別撤換嚴參
如有辦賑得力之員以及勸募賑捐集有鉅款者亦當懇

恩從優獎勵庶期賞罰嚴明羣知鑑戒賢者益加奮勵不肖者不
敢妄爲實與勸捐辦賑事宜大有裨益據寧蘇藩司糧道會詳請
奏前來除災區錢糧分別蠲緩另行查明具奏外謹合詞恭摺具
陳伏祈

皇太后

皇上聖鑒謹

奏

籌辦南洋大學堂摺 光緒三十二年十月

奏爲擬建南洋大學堂謹將籌款與辦情形恭摺具陳仰祈

聖鑒事竊查奏定學堂章程大學堂爲教授各科學理法俾可施

諸實用泰西各國大學甚多日本有東京西京二大學尙欲增設中國地大民殷非各省設立大學不可先就京師設立一所擇繁盛重要省分增設推及各省等語直隸督臣袁世凱以天津大學堂分設專科照章作爲大學卽名北洋大學堂前經奏准在案南洋爲江海要衝人文素稱極盛各項學堂林立惟大學尙屬闕如方今世變日棘需材愈多若必待各省中學一一完備學生畢業升入分科高等由分科高等將升入大學之時始設大學較量歲月緩不濟急無以儲

國家任用之材而饜士民求學之望臣端方前赴歐美兩洲考查政治見東西各國大學所在多有且有以一人之力設立者類皆教科完美規制精詳各種學術藝能無不日有進步以故人材衆多國勢彊盛良非偶然到任以來亟謀創建南洋大學堂一所挑

選學生入堂肄業除寧蘇皖贛皆爲兩江轄境照例甄收此外如鄂湘閩浙川廣各籍學生均可貼補學費定額考取此時各省高等學堂均未畢業尙無合格學生未宜凌節失次應仿京師大學先教豫備科俟畢業後再按照分科大學辦理其建設及常年補助資本必須先行籌畫現在江南財政支絀萬分賠款方亟沉菑繼之時絀舉贏殊難著手而近覘時勢遠矚強鄰深以各項學術藝能之人才不足以供任使爲懼事關興學不得不勉爲其難現於各岸淮鹽督銷酌提盈餘每年僅籌有的款四五萬金常年經費不敷甚鉅尙須次第寬籌以資應用查從前江南鄉試江皖合闈江寧省城建置貢院規模極爲宏整自奉明詔停罷科舉專重學堂貢院遂曠棄無用各省強半改作學堂江南貢院俯瞰秦淮市廛囂雜改建學校實不相宜是以遲未舉

辦現經臣等與江蘇安徽兩省官紳悉心集議擬將貢院房舍拆卸什物變賣改闢市場環通馬路價值所入以之佐助修建之資歲收地租補助常年經費款有不敷由臣端方設法籌濟學堂一切規則悉遵奏定章程辦理其建築力求堅實不必侈語崇閱其教科不厭精深務期克臻完善謹遵

諭旨端正趨嚮造就通材爲宗旨以延聘譯才編譯科學書採訪留學各國專科畢業養成大學教員爲豫備如蒙

俞允卽將圻卸貢院築路收租各事宜發交江南商務總會承辦責令核實經理並遴委妥紳專司稽查其南洋大學堂當另擇地氣清曠面積宏敞之區如式修建督飭江寧提學使妥議章程認真舉辦以期仰副

朝廷作育人才嘉惠南服至意所有擬建南洋大學堂籌款興辦

緣由謹合詞恭摺具陳伏乞

皇太后

皇上聖鑒謹示謹

奏

淮北災重歉產摺

光緒三十二年十月

奏爲淮北災重歉產懇請

飭部寬免本年場員考覈處分仰祈

聖鑒事竊照兩淮各場產鹽均有定額淮南之鹽由煎而成端賴
草薪淮北之鹽由曬而成全靠日力是以北鹽產收既較南鹽爲
易工本亦較南鹽爲省向以小滿時節爲旺埽雖未必產足全綱
其所得總在十分中之六七故北鹺之豐歉實於此時爲全年關
鍵所謂小滿十八埽也本年小滿前後陰雨連綿閏四月二十四

五等日烈風猛雨歷數晝夜之久鹽池沖毀一片汪洋盡成澤國查悉產鹽僅祇二分之數業據運司將淮南北因雨缺產情形於六月間詳經前署督臣周馥咨部有案然果能從此暢晴猶冀以後來之贏補前此之缺乃自五月起至八月上半月大雨時行迄無旬日之晴雖疊經運司嚴飭該三場上緊督埽無如場池盡被淹漫積水驟難疏消池丁既仰屋興嗟場員更束手無策直至中秋節後天始放晴第陽光熹微曝曬無力所產亦復有限據報本年已見產數及續後收鹽約略統計不過十分中之五分淮北正綱缺銷現已籌借山東之鹽皖岸江運及滁來全官運亦擬借運南鹽以資接濟而免缺誤查淮北板浦中正臨興三場額產鹽數例定缺溢考成向於年終由該場員查數開送分司覈明彙送運司換造總冊揭詳由臣衙門

奏咨考覈凡缺額不及一分者罰俸六箇月一分以上者罰俸一年二分三分者降一級留任四分五分者降一級調用六分以上者降二級調用缺至七分者降三級調用七分以上者革職又光緒三十年前運司恩銘於查明淮南產鹽考成酌擬整頓辦法案內詳請變通處分章程請將原定缺額四分五分降一級調用改爲四分者降二級留任五分者降一級調用等因亦經前督臣魏

光燾

奏咨轉飭遵辦在案本年淮北產額連新增共該五十萬引適當歉缺之年該三場缺額俱在四五分以上若照例章考覈均干鑄級處分本年霪潦爲災淮北罹患之酷爲數十年來所未有百姓則蕩析離居場丁復停工失業嗷鴻徧野賑恤方殷困苦情形殆難盡述除將場丁量加撫恤外所有三場缺額各員委非督埽不

力自未便苛以相繩據運司趙濱彥請免覈計該三場款產處分
詳請前署督周馥未及覈辦移交前來合無仰懇

天恩俯念淮北板浦中正臨興三場本年缺產實因天時久雨非
督埽不力者可比寬免該場員等考覈處分俾昭覈實除咨部立
案外理合恭摺具陳伏乞

皇太后

皇上聖鑒飭部查照施行謹

奏

撥款辦旗營工藝片 光緒三十二年十月

再臣前在江蘇巡撫任內以京口駐防八旗官兵男婦老幼生計
維艱奏請設立工藝傳習所自光緒三十一年春季起在於蘇州
銅元餘利項下歲撥經費銀三千兩奉

旨允准在案茲准京口副都統奎芳咨該所自設立以來就學頗衆閭營得有生機惟本年因銅元限鑄經費無出勢須停止茲擬以現有紗布及機張器具爲傳習之本請再給一次銀三千兩購備紗料由營添聘技師專教上機染織縑絲各技藝統以三月爲期畢業之後卽令自備機張領紗交布按正給價由營督銷如有盈餘卽爲推廣之用庶幾閭營之人各具技能皆可自謀生計等情咨商前來臣查該營官兵傳習工藝已閱兩年若竟廢以半塗未免可惜應卽在於江寧銅元餘利項下撥給銀三千兩以竟全功而宏教育除咨由京口副都統臣奎芳督飭遵辦外理合會同江蘇撫臣陳夔龍附片具陳伏乞

聖鑒敕部查照施行謹

奏

糾參辦賑不力各員摺 光緒三十二年十一月

奏爲查明江北水災辦賑不力各員據實糾參恭摺仰祈
聖鑒事竊本年徐海淮安各屬被災極重然使地方官吏先事籌
維認真妥辦災民轉徙流離斷不至若今日之甚
朝廷設官原以爲民乃於救荒要政且亦漠不關心平日吏治尙
可問乎臣方到任兩月事事嚴加考查並經臣夔龍派員明查暗
訪其辦理不善各員亟應隨時分別撤換嚴參前於籲懇截撥新
漕摺內業經

奏明在案茲查有淮安府知府張慶勳任用丁幕紳民交怨於所
屬各縣辦賑延誤置若罔聞署海州直隸州知州江蘇補用知府
張景祐罔利營私民艱弗恤署泰州知州江蘇試用通判黃仁黼
不顧鄰荒怨聲載路清河縣知縣李世由措置失宜屢遭物議該

縣豐濟倉存款足資賑濟奉批查覈延不舉報署安東縣知縣江蘇大挑知縣堵煥辰玩視災荒積壓稟牘派發急賑低作銀價折扣散放徐州查賑委員江蘇試用知縣張珪查勘秋災大言索賄收受災規舉動謬妄署桃源縣知縣江蘇試用知縣孫喬年查災不均任董朦蔽署沭陽縣知縣江蘇卽用知縣于銘訓辦賑顛預不知緩急阜寧縣知縣季逢辛履勘遲緩迹近諱災署銅山縣知縣江蘇候補知州寶懋森催科峻急致召人言署贛榆縣知縣江蘇補用同知愷齡分查戶口未能細心安東查賑委員江蘇補用知縣邵承瀚折放賑錢會縣出示均應分別參處據江寧布政使繼昌具詳揭參前來相應請

旨將淮安府知府張慶勛署海州直隸州知州江蘇補用知府張景祐署泰州知州江蘇試用通判黃仁黼清河縣知縣李世由署

安東縣知縣江蘇大挑知縣堵煥辰徐州查賑委員江蘇試用知縣張珪均卽行革職署桃源縣知縣江蘇試用知縣孫喬年以府經縣丞降補署沭陽縣知縣江蘇卽用知縣于銘訓文理尙優以教職歸部銓選阜寧縣知縣季逢辛請開缺另補署銅山縣知縣候補知州寶懋森請撤任調省察看署贛榆縣知縣江蘇補用同知愷齡安東放賑委員江蘇補用知縣邵承瀚均請摘去頂戴以示懲儆署淮揚海道江蘇補用道丁葆元辦理河工向稱得力惟於災賑事宜布置未能周妥第到任未及兩月情尙可原應請從寬免其置議其現在經辦賑務各員仍當隨時嚴加查覈如再仍前玩忽卽行從嚴參辦儻查有侵吞賑銀實據應查照前奏請旨明正典刑以昭炯戒再淮安府知府清河阜寧縣知縣員缺蘇省現有應補應調之員應請扣留外補所有查明江北水災辦賑

不力各員據實糾參緣由謹合詞恭摺具陳伏祈

皇太后

皇上聖鑒訓示謹

奏

寬免鹽務提解銀兩片

光緒三十三年十一月

再光緒二十五年整頓鹽務酌提盈餘案內海州分司運判每年認提銀一萬兩板浦場大使每年認提銀二千兩均經按年提解在案查此項提款向因該運判等辦理江運北鹽尙有餘款是以酌定按年提解近時鹽價較貴盈餘已不如前本年淮北水災產收短缺江運改借南鹽進出款項均歸儀棧經理該運判等既不經手而南鹽成本貴於北鹽更無餘利可以挪補此項提款遂無所出歲入養廉銀兩僅敷公用再令照常籌繳實屬力有未逮伏

念提解盈餘原所以剔除中飽羨時既嚴以相繩則災歉之年自不能不略從寬假本年淮北各場因災缺產應行覈計處分業經臣奏請寬免考覈所有海州分司運判及板浦廠大使應提盈餘銀兩實係因災未辦江運與歷年情形不同合無仰懇天恩暫准寬免一年以後仍照章提解出自逾格

鴻慈據兩淮鹽運使趙濱彥具詳前來除咨部查覈外理合附片具陳伏乞

聖鑒訓示謹

奏

懲辦逆匪酌保員弁摺

光緒三十二年十一月

奏爲拏獲逆匪頭目分別審明懲辦並請將出力員弁擇尤保獎恭摺具陳仰祈

聖鑒事竊照本年十月江西湖南交界地方□□倡亂勢甚猖獗長江上下伏莽素多深慮乘機勾結密圖應附當經密飭巡警總局地方文武嚴密查拏一面選派得力員弁廣購眼線設法偵緝旋據先後拏獲匪目袁有升江佑泉龍見田傅義成夥匪趙太周江載春黎貴和形跡可疑之黎貴蘭徐福榮九名起獲票布偽印訊明該會正龍頭爲東洋自費生劉震卽劉春江副龍頭係黎兆梅卽黎肅清該匪袁有升爲會辦江佑泉爲執堂元帥龍見田爲聖賢傅義成爲盟證會中經費係□□按年接濟由劉震等刊刷偽印票布派在沿江各處煽誘趙太周江載春黎貴和均係夥匪又拏獲票匪曾斌一名並有該匪同夥之陳春生聞拏嚴緊畏罪服毒身死訊據曾斌供稱該匪在會爲執堂元帥其票係滕元壽散給令其與陳春生糾衆構亂各等供當將袁有升江佑泉曾斌

龍見田四犯卽行就地正法傅義成監候待質情罪較輕之趙太周監禁十年最輕之江載春黎貴和各監禁五年均俟限滿察看如能改悔再行釋放形迹可疑訊無通匪實據之黎貴蘭徐福榮分別遞籍管束並將辦理情形擇要電請軍機處代奏奉

旨據陳各節辦理尙屬迅速仍著密拏劉震黎兆梅暨此外逆黨頭目務絕根株並著會同沿海沿江各督撫一體認真辦理等因欽此伏查該匪袁有升等多係會中最大頭目輒乘萍醴匪徒擾亂之時潛來沿江一帶地方希圖擾亂響應實屬悖逆不法本年江北水災奇重饑民衆多兼之海州匪亂方平難保不有餘黨竄越設使被其煽誘爲患曷可勝言茲幸於事前拏獲匪目多人迅速懲辦匪黨懾伏人心漸定地方賴以謐安所有在事出力員弁盡心搜緝消患未萌裨益大局良非淺鮮現沿途上下匪黨尙多

若不酌予分別獎敘實無以弭隱患而策方來合無仰懇

天恩俯准將江南巡警局總辦署江蘇鹽巡道常鎮通海道朱恩孚江蘇候補道李國璠加二品頂戴幫辦候選道陶駿保加三品銜警法科科长

賞還原銜已革在任候選道江蘇陽湖縣知縣翁延年開復原官升階以知縣仍留江蘇省補用並免繳捐復銀兩正巡官候選縣丞朱廷燦以知縣儘先選用巡緝隊官補用都司戴鎮祥保升都司米占元均以遊擊儘先補用以昭激勸出自逾格

鴻慈除仍會同沿海沿江各督撫設法密拏逸匪劉震卽劉春江黎兆梅卽黎肅清及此外逆黨頭目務獲懲辦外所有拏獲匪目出力員弁酌擬請獎緣由理合會同江蘇巡撫臣陳夔龍恭摺具

陳伏祈

皇太后

皇上聖鑒謹

奏

查明教案妥籌辦理摺

光緒三十二年十二月

奏爲查明霍山教案情形並現籌辦法據實覆陳恭摺仰祈

聖鑒事竊臣前在京師承准軍機大臣鈔交光緒三十二年七月

二十七日奉

上諭有人奏霍山教案民懼株連逃聚六望山請飭設法解散著

周馥端方嚴切查明妥籌辦理原摺著鈔給閱看將此諭令知之

欽此並另准軍機大臣字寄到寧當經前督臣周馥派委江蘇候

補知府桂殿華往查臣到任後又派委江蘇候補道陶森甲前往

覆查妥籌辦法茲據先後查明稟覆前來臣覆加察覈並與安徽

撫臣恩銘往返函商妥籌辦理謹將此案原委並現擬辦法爲我
皇太后

皇上陳之查原奏內稱霍山張某奉教張氏修譜族長張正金不
刊入譜教士以爲阻教請逮正金知縣秦達璋拘提到案紳董說
合罰銀二千兩將正金釋放適六安知州熊祖詒到霍謂此案教
堂教民毫無損傷何得賠銀其議中止一節查前霍山縣知縣名
秦達章原奏所稱秦達璋自卽指此霍山教堂城鄉共有九處平
日均相安無事西鄉十八道教堂距城窺遠教士法國人石資訓
駐此已十餘年武斷喜事前數年該處教民張建和砍發墳樹張
正金訴於教堂與石資訓爭辨口角石資訓請縣提究正金懼遣
弟正銀赴堂服禮懸匾掛紅得以寢事非因修譜起釁上年教民
張耀賓等怨石資訓苛罰約其同黨數十人反教問計於正金正

金答以反教似不犯法張耀賓等遂出教石資訓請知縣秦達章
提辦正金正金逃避未獲至紳董說合罰銀二千兩等情係教堂
已燬之後秦達章邀集紳董與教堂議和已允給洋二千元作爲
懲罰教堂始允旋翻六安州知州熊祖詒到霍與教士言語齟齬
事遂中變並非初起之事又原奏稱教士以正金聚衆圖毀教堂
上告撫臣誠勳卽派壽春鎮馬隊保護札委知縣余鼎鏞查辦余令
家寓壽州回家留連日久正金聞風先逸及到霍卽拘正金家屬
杖斃其子母妹妻女交差管押不堪凌辱遂激衆怒將正金母妹
妻女搶回一節查撫臣誠勳所派委員係大挑知縣余鼎鏞原奏
所稱余鼎自卽指此撫臣誠勳接准上海法總領事電請保護故
調壽春鎮馬隊前往彈壓迭派大挑知縣余鼎鏞新任六安直隸
州知州熊祖詒查辦余鼎鏞由省至霍五日而到並未經過壽州

抵霍後帶領兵役下鄉因正金已逸拘其父及其妹與幼子交董事看管以期勒交正金並無杖斃之事而正金在羅田藏匿潛約多人突來黃栗杪將教民李萬生房屋打毀並波及教民數家挈其父及其妹子由原路而逸又原奏內稱撫臣恩銘因案情重大加派一旂於是霍民驚懼謠傳搜剿弓影杯蛇轉相惶惑續因聚衆愈多又加派一旂槍斃逃民二百餘一節查撫臣恩銘因聞正金逃回羅田勾結匪黨慮其復來滋擾加派防軍一旂正金果糾約羅麻匪首金同德等竄入霍境之千羅坂焚毀無人居住之傳教分堂兵隊適到匪黨拒捕卽槍斃數名擒獲放火爲首者二名奪獲槍械十餘件名簿一本餘黨由與湖北交界之甕門關而逸探聞該匪有至河南商城勾結匪黨之說復添調步隊一營至英霍一帶保護教堂正金又添勾麻城匪首李仕英並羅田商城各

匪約二千餘人經青苔關進至黃石河該軍乘夜猛攻天明時匪勢不支始退出青苔關外而遁計陣斃九十餘人查詢槍斃之人大率羅麻人居多據董保稟稱保內並無一人其爲係羅麻匪黨非本境逃民已可概見又原奏內稱霍民懼逃於六望山中蓋有萬數六望山形勢險要可屯六萬人明季避亂者結寨自保俗呼爲六萬寨近因案久未結特委知府陳某教士不願改委郭某儻游移無定恐辦理未善變將不測一節攷之縣志無六望山之名有四望山六萬寨二處四望山在縣治南六十里六萬寨在縣治西三十里均距正金肇爨之地甚遠並無民人逃避該處原奏自係傳聞之誤至派員更改緣由因始委陳麟瑞署六安州而陳現任在滁州本任故委辦理鹽河釐金候補知府劉沛然署滁州繼因展轉交替恐需時日故改委郭育才署六安郭係截取本班並無

別情尙屬可信此查明原奏所陳各節之實在情形也此案起釁甚微如地方印委辦理得宜本不致釀成重案乃該縣知縣秦達章不知奉教聽民自便載在約章輒徇教士之請操切於前而委員余鼎鏞復因正犯遠颺擅拏其合家老幼縱容差役擾累於後以致羣情惶惑激成事端實屬辦理荒謬業經撫臣恩銘會同前督臣周馥將秦達章余鼎鏞二員奏參革職並將擾民之差役從重懲辦無庸再行置議張正金窮無所之挺而走險糾結匪黨聚衆焚掠拒捕抗官自不能不用兵力現經查明所格殺者皆係鄰境匪徒並無良民在內亦無庸議現在張正金逃匿無踪地方民情已安靖如常撫臣恩銘業將兵隊陸續撤回惟暫留一營彈壓保護並撥款撫卹被擾之民迭經剴切曉諭張正金糾衆滋事實爲禍首罪止一人不得不行拏究其家屬戚族概免株累聞正金

家屬已陸續相率回里撫臣恩銘擬將被燬教堂先爲修復一面密拏張正金獲日另辦而教士必欲先拏犯而後修堂現正飭令六安霍山各該牧令與該處教士就近磋商以期就範霍山縣治偏在東北距西鄉十八道等處有一百八十九里之遠民事訴訟極爲不便故民教積嫌日深一日而無官主持易滋釁隙今擬將先經移設之上土司巡檢移回原設之上土市地方以資控制容臣會同撫臣另行具奏臣仍當會同撫臣督飭所屬訪拏正犯安撫良民申明約章奉教聽民自便不得禁阻亦不得抑勒教民犯事與平民一體按中國律例歸地方官覈辦教士不得干預以期民教永遠相安仰副聖朝綏輯懷柔一視同仁之至意所有查明霍山教案實情並妥爲籌辦緣由理合恭摺復

奏伏乞

皇太后

皇上聖鑒訓示謹

奏

華僑分送肄業片

光緒三十二年十二月

再本年十一月間據學部派赴南洋查學委員錢恂等電稱爪島學生通官音可接中學程度者約三十人志切歸國讀書選地南京川資月用自備惟請官給食宿並准學部電咨以該僑民篤志內嚮自宜因勢拊循等語伏查爪島僑民流寓遠方不忘歸國派生內渡就學金陵洵屬愛國情殷極堪嘉許自當官備食宿妥爲照料當經電飭該員錢恂等允爲照辦屬其傳語華僑益相敦勉札飭江寧提學司俟該生等來寧卽查詢志願分送各學堂肄業

嗣後南洋各島及檀香山舊金山等處僑民如有願送子弟來寧就學者並當一律收取以宏教澤而繫僑情除電復學部查照外謹附片具陳伏乞

聖鑒謹

奏

京口駐防學堂籌撥經費摺

光緒三十二年十二月

奏爲京口駐防各學堂籌撥經費以宏教育而資持久恭摺具陳仰祈

聖鑒事竊臣端方於三十年十一月間調任湖南巡撫交卸江蘇署篆時會同護理撫臣效曾合詞

奏明推廣京口駐防舊有之中學堂兼增設實業學堂及蒙小學堂俾教育一事滿漢不致偏枯旗民均可普及又以駐防旗營限

於經費經與司道籌商在蘇州銅元局餘利項下每季撥銀陸千兩專爲擴充學堂之用其學堂課程規則由臣爲之釐定並派明習學務之員會同該營協佐妥爲經理同日附片陳明在案本年九月間臣端方到任後派員考察學務京口所設立之中學堂一所兼習英文東語科目完全高初等小學堂三所兼習清文一科仍寓不忘根本之意皆有兩年程度管理教授均甚合法又蠶桑傳習所一所規模亦頗粗具並擬再加擴充隨營學堂一所於肄習武事之餘求有勇知方之略女學堂二所立家庭之模範爲姆教之權輿皆有可觀漸臻進步惟是蘇省銅元業經停鑄經費無出匱乏堪虞不爲另籌勢將中輟再三綜覈力求樽節每歲非有的款一萬六千兩不能支持前由常鎮道於鎮關稅罰款內提撥三千兩現擬將該關罰款每年再請提撥三千兩所短尙在一萬

兩之數疊經常鎮道詳請前來現飭上海常鎮兩道分認籌撥作
正開銷庶幾勉力撐措不致半途廢輟總期人無不學兵盡知書
以仰副

朝廷眷念八旗作育人材至意除咨度支部學部備案外所有籌
撥京口駐防各學堂經費情形謹合詞恭摺具陳伏乞

皇太后

皇上聖鑒訓示謹

奏

請停道員分發摺

光緒三十二年十二月

奏爲江蘇候補道員擁擠過甚流弊頗多請准暫停分發三年以
澄吏治恭摺仰祈

聖鑒事竊維今日仕途自捐納保舉兩項得官較易於是各省候

補人員視其本省額設差缺之數或相倍蓰或相什伯流品混淆奔競百出論治之士惄然憂之然未有如江蘇候補道員之甚者江蘇一省鹽巡各道缺不過七員江寧省城以督臣治所兼洋務商務鹽務軍務所設局所較多差事較繁而統計省內外局差亦祇二十餘處其候補道員乃至二百餘人之多殊駭聽聞查設立局所必以道員爲總辦但論官職之崇卑不問人材之稱否習非成是於綜覈名實之道固已大相徑庭江南舉所有局所悉以位置道員而多繡相望投牒聯翩勢等積薪仍多缺望於是又有會辦幫辦名目以處閒冗近歲財政艱窘局用浩繁勢漸不支前署督_臣周馥從藩司繼昌之請於本年八月間將各局所會辦幫辦名目大加裁汰各候補道員閒居坐食頗已騰謗_臣抵任後復加併省又因整頓鹽務查照部議以正陽關督銷五河鹽釐淮北六

岸局委員歸運司節制責以力除積弊司道同班諸多牽制改委知府以下人員前往接辦鹽卡向爲道班優差一旦失去衆情洵洵百計搖撼臣等受

恩深重義不避怨如查有挾嫌造謠之員並當立予參劾惟是吏道太雜事貴清源道員之職分較崇卽需次之資裝較費聚此二百餘人長日加益賢者驟無以自見不肖者且專務鑽營其生計較裕之員則游衍徵逐酒食誼叟弊中於吏治而害成於風俗前督臣劉坤一曾奏停道員分發蓋深有鑒於此今日情形更非昔比若不稍遏其源竊慮擁擠愈甚流弊愈多惟有仰懇

天恩俯准飭部將捐納勞績道員停止分發三年俾臣等得以從容檢察澄肅仕途其先經捐指江蘇及保留江蘇尙未分發到省人員停止限內准其改指他省照案免交離省銀兩以示體恤其

知府以下候補人員應請循舊分發毋庸議停所有道員擁擠過甚請予暫停分發緣由謹合詞恭摺具陳伏乞

皇太后

皇上聖鑒謹

奏

浦廠饑民遣散拍照呈覽片

光緒三十二年十二月

再本年江北水患淮徐海三屬被災最重當秋冬之際饑民紛紛外出扶老攜幼日以萬計顛沛流離至堪憫惻曾經臣等先後會同署提臣奏明於清江等處設廠截留俾免失所綜計設廠八十餘所收集饑民五十餘萬仰蒙

聖恩稠疊頒發帑銀截留漕項至再至三百萬災黎歡呼載路臣等仰體

皇仁誠恐清江鬻集太多易滋疫癘分派員紳於各州縣災民原籍處所查放冬賑并飭署淮揚海道楊文鼎剴切勸導酌發路費口糧遣令回籍就賑至十二月初旬浦廠已一律遣竣楊文鼎於一月之間遣散饑民五十餘萬資爲通權濟變之才業經臣等電奏俟賑竣懇

恩特加獎擢在案現查各屬冬賑均次第散放卽須接辦春撫所有浦廠饑民困苦情形不敢壅於

上聞謹拍照成圖恭呈

御覽仰副

宮廷子惠災黎勤求民隱至意謹合詞附片具陳伏乞

聖鑒謹

奏

查明水勢妥籌辦法摺光緒三十二年十二月

奏爲徐州府屬駱馬湖一帶水勢情形遵

旨查明並妥籌辦法恭摺具陳仰祈

聖鑒事竊臣等前准軍機大臣字寄光緒三十二年十一月二十七日奉

上諭有人奏江北水災實由駱馬湖一帶水失其道等語著端方陳夔龍查明實在情形妥籌辦理原片著鈔給閱看欽此欽遵寄信前來臣等查原片內稱此次江北水災與江南微有不同江南地處下游夏秋霖潦加以上游江漢湖湘同時並漲此實天災若江北之災關天時亦關人事自江安停辦河運運河歲久失修沿河地方官鮮有識水性以河道爲事者風聞本年袁大化在徐州所屬之駱馬湖一帶決水灌田不甚得法以致水失其道四散漫

溢水患徧於淮北皖北初疑是淮河洪澤湖爲患及周諮博訪乃知淮揚爲輕徐海爲重皖北亦徧地洪水其受害原因斷在駱馬湖而非洪澤湖今災民雖渥被

聖慈隆冬振撫然使湖隄不塞運道不修春水方注浸淫更甚應將駱馬湖決口如何堵塞及千里運道如何疏浚所在隄圩如何修固之處切實舉行以利民生而弭隱患等語除運河上下游及各屬河隄圩埝業經臣方先後札飭淮揚海道徐州道擇要勘估興修以工代賑欽奉前因再行札飭切實遵辦外當卽札委江蘇補用道陶森甲前往徐州駱馬湖一帶將上年升任徐州道袁大化決水灌田情形以及決口應如何堵塞湖水應如何疏消確切查明據實稟復茲據該員查明具稟前來查駱馬湖在宿遷縣境東西面積近百里南北約三四十里西南以運河之隄爲隄其餘

三面平原曠野無所謂隄地勢西北高於東南仰受山東蒙沂之水建瓴而下水涸則居民播種耕耘旱潦聽之天時就運河隄而論邳宿交界之處曰竹篾壩河水盛漲則開壩以殺水勢非爲灌田而設宿遷城西十二里曰柳園閘光緒五年圯毀僅留缺口寬八九丈湖河漲落均由此缺口互相宣洩因其自然無俟乎決現在駱馬湖水已涸僅湖心名大港者尙有餘水廣袤不過三四里詳詢居民實無決水灌田之事升任徐州道袁大化前在徐州郡城北門外馬廠湖地方濬河與墾因民情不願旋即停工其地距駱馬湖二百里且湖水甚小實與災情無關袁大化前將沛縣城東十餘里之鹽河頭督率紳董開挖深通以利舟楫商民至今稱頌尙屬有利無害之舉原片內稱決水灌田水失其道當係傳聞之誤臣等伏查山東蒙沂之水以駱馬湖爲水櫃本年山水雖大

比較光緒二十四年尙低四尺而下游被災如其重者一則由海贛各海口多被淤塞二則由六塘河淤淺水不歸槽三則由陰雨連綿三四個月之久各處消水遲緩今就駱馬湖而論宜修復柳園閘無使運河水漲灌入湖中而尤以開濬六塘河俾湖水分流下注以免漫溢爲最要至海贛濱海各口均宜擇要疏浚使衆流得歸於海現由臣方檄飭署淮揚海道楊文鼎署徐州道袁世廉趕速測量摺節估計次第興辦至各屬河工以六塘河爲最有益亟應迅速開辦估計工費約需三四十萬現經勉籌銀十萬兩專備六塘河工經費飭令刻日興工疏濬不敷之款另行設法籌濟其海沐贛應疏河道工費爲數甚鉅亦當分別酌撥務期春水未生及時工作以仰副

朝廷眷念民依振興水利之至意所有查明徐州府屬駱馬湖水

勢實在情形並妥籌辦理緣由謹合詞恭摺具陳伏乞

皇太后

皇上聖鑒謹

奏

海防經費請改撥摺

奏爲南洋防費短解甚鉅應付爲難懇

恩飭部改撥的款以濟要需恭摺仰祈

聖鑒事竊查南洋海防經費自光緒二十一年起向由戶部指撥江蘇釐金銀三十二萬兩江海關二成洋稅浙海關四成洋稅與北洋各半分撥以入抵出向屬不敷復將萬戶沱加抽四川鹽釐一款歸作防費之用藉以補苴嗣於二十四年七處鹽貨釐金抵償洋款所指江蘇釐金僅金陵釐捐局分認之八萬兩尙能照數

解齊而蘇州松滬兩釐局分認之二十四萬兩遂至無從解應二十六年萬戶沱加抽鹽釐亦經截留宜昌抵還洋債雖均經戶部撥補率多無著浙海關應解防費又以撥還洋款不能兼顧自一百四十八結起至現在一百八十四結止約欠解銀五十餘萬兩屢催罔應頻年僅有江海關二成洋稅及金陵釐捐局撥款如數照解萬難敷用迭經咨請戶部另行指撥有著的款均准循案飭解未允改撥約計南洋防費無著各款按照從前收數浙海關萬戶沱兩處每年均有十二萬餘兩蘇滬兩釐局每年應解二十四萬兩合計近來每年短收之數共有四十八萬兩之多有著之款係金陵釐局認解之八萬兩又江海關二成洋稅尙有數十萬兩然多寡不能預定設遇稅收不旺撥解卽屬無幾南洋防費關繫江海防務額支及活支有定各款斷難缺乏况現值整頓海軍修

復兵練艦艇以及礮台雷營水師陸師各學堂製造各局等用項均關切要之圖應需經費更屬刻難延緩當經通盤籌畫核實計算三十三年分前項額支及活支有定各款實在需銀八十七萬餘兩如有改造一切活支需款尙須隨時設法籌應值此寧省財力困乏挪墊俱窮此項防費實爲計授要需不能稍有短絀若非預爲籌定不獨無以備緩急亦且無以資應付必致貽誤事機所關甚重自非據實聲請另撥的款別無善策至活支無定之款自未敢另請增撥查江海關寧釐局兩處尙能按數籌解無誤擬請毋庸更改其餘撥補蘇滬兩釐局釐金及萬戶沱加抽鹽釐分撥浙海關四成一半洋稅共計無著各款四十八萬兩惟有仰懇天恩俯准飭下度支部按照約計無著數目另行指撥各省關局有著的款按年照數滙解不得稍有延欠以濟要需而裨防務除

將三十三年分需用各款清冊咨部查照外謹恭摺具陳伏乞

皇太后

皇上聖鑒訓示謹

奏

擴充新軍辦法摺

奏爲南洋新軍擬擴充混成一協謹酌議辦法恭摺具陳仰祈

聖鑒事竊臣承准軍機大臣字寄光緒三十二年十一月初十日

奉

上諭陸軍部奏各省應練新軍請飭認真籌辦一摺方今時局艱難非練兵無以立國迭經降旨飭令各省認真整頓修明武備現在專設陸軍部所有各省軍隊均歸該部統轄應卽督飭切實辦理等因欽此欽遵寄信前來仰見

朝廷整軍經武建威銷萌之至意欽佩莫名臣叨竊
深恩畀以重寄每念時局艱虞難安寢饋誠如

聖訓非練兵無以立國兩江地方一則控制江淮下則海線綿互
而南洋新軍爲臣專轄者僅有一鎮此外提臣一協祇能專顧江
北撫臣一協未足屏蔽下游居中策應責任綦重將恃以保障江
海兼籌並顧實不免兵單地廣之憂頻年長江一帶伏莽愈多亂
黨伺隙此次萍醴匪警臣遵

旨抽調新軍三營赴贛助剿其時風謠四起省城頗慮空虛復電
商江北提臣蔭昌預籌填紮之師膏秣以待徵調而清江饑民鬻
聚彈壓正在吃緊臣與提臣幾有顧此失彼之慮夫萍匪不過赤
子盜弄乃事會所乘已稍形兵力不厚幸而敕平甚速未至掣動
下游懲前毖後竊以爲增練新軍之議益不可緩明知財力艱窘

卽已成之一鎮挪墊至三十餘萬缺額至千數百人步隊僅四標馬隊祇半數餘如車輛騾馬橋樑電信凡行軍機關概多闕略欲求完備已費騰挪更練新軍談何容易惟是古人有言蝮蛇螫手則壯士斷腕今日練兵甚於饑渴之求飲食臣身任巖疆義無返顧再三籌畫惟有就巡防營隊勉力裁併尙可增練混成一協查南洋綠營改編巡防隊者共三標十一隊其零星分布於寧揚鎮一帶者彈壓巡邏均關緊要無從裁省惟上海地方舊有滬軍兩營臣到任後會商撫臣陳夔龍編爲巡防四隊歸蘇松太道節制前署督臣周馥又奏准於上海添設巡警五百名以之巡緝地面勉可敷用另有由綠營改編之巡警營一標四隊亦駐松滬迭經沙汰未加招補實額已不滿兩營此項兵丁未能盡合新軍資格而於防務尙爲習練前督臣奏設之巡警至今尙未開招擬於此

項巡防營內挑補五百名所餘當嚴行甄選並徵土著壯丁足成新軍一標之數其常年經費卽以巡防營餉撥充上海爲中國第一商埠外人觀聽所注舊有防營腐敗特甚此次新軍成立仍令築營海上旣以稍樹軍威亦庶幾緩急有備此混成協駐滬一標之辦法也又查兩江督署原有衛隊一營馬隊一哨經臣汰弱留強於江寧京口駐防旗丁中挑補足額體力格式裝械操課悉照陸軍新章辦理現擬裁撤衛隊名目撥入新軍此外兩營卽於徐海勁兵之地徵集土著此混成協駐省一標之辦法也其礮隊馬隊工程輜重均擬各編一營常年經費另行設法籌措務期於來年春夏間一律成軍俟規制喚定經費籌有的款再擬擴充成鎮獨是近時新軍通弊往往於裝械未具營房未建之先遽徵士卒不知裝械不備則教育不能實施屋宇不備則管理不能齊一於

是諸從寬假日趨懈弛及至各項完具而兵士之習慣已成嚴重之精神已失先入爲主幾於不可收拾臣此次增練新軍力矯其失必俟各項籌辦有緒始行徵集兵士既聚則訓練約束悉遵定章不得踰越尺寸軍紀軍實皆全軍命脈所繫尤當兢兢奉持其已成之一鎮當從嚴整頓力圖進步沾染習氣之并日均予隨時撤換至增練混成一協開辦經費以及常年不敷之餉暨第九鎮所短經費現正督飭司道悉心籌畫一俟議有端倪再當另摺具奏所有南洋增練混成一協酌定辦法緣由謹會同江蘇撫臣陳夔龍恭摺具陳伏乞

皇太后

皇上聖鑒訓示謹

奏

水師學堂照案請獎摺 光緒三十二年十二月

奏爲南洋水師學堂與陸軍學堂情形不同懇請將在事出力各員仍准照案請獎以資鼓勵恭摺仰祈

聖鑒事竊准吏部咨本部具奏前兩江總督周馥奏南洋水師學堂請獎各員應俟該學堂成就學員送京考驗相符再行核議一摺於光緒三十二年十一月初二日奉

旨依議欽此抄錄原奏知照前來查原奏內開政務處議奏嗣後各省武備學堂均應俟畢業成就在六七十人以上咨送練兵處考驗相符方准將在事人員請獎今辦理南洋水師學堂各員請獎業據練兵處移交陸軍部查復該學堂成就各員應由該督咨送陸軍部考驗相符知照吏部再行分別辦理等因自應遵照辦理惟查水師與陸軍二者雖統名武備情形實有不同若令水師

學堂仿照陸軍學堂辦法其中窒礙甚多事關重要不敢不考究
確實爲我

皇太后

皇上詳晰陳之查陸軍學堂爲造就初級將校以應急需故預科
功課稍從簡略三年即可畢業成就較易但有一班畢業在事各
員卽應照章開保而水師則分堂課船課兩限由英文普通漸進
至駕駛管輪專門堂課需四五年船課又需三四年前後八九年
之多方能畢業且內堂功課定章分作駕駛管輪兩門每班又分
爲頭二三班每班二十人派一教員專課如初入堂者爲第三班
授以英文普通遞升至頭班方授以專門功課俟專門功課成就
始得謂之畢業故每次畢業祇有兩頭班四十人如平時遇有因
故別退者以下程度未至卽難推升故每屆畢業時常不及四十

立見海軍之利
人之數此水師與陸軍雖屬同一學堂而章程各異功課迥別難
易顯分未便一律仿辦之實在情形也至若將成就各員送部考
驗一層查政務處奏定章程係在光緒三十年該堂第三起學生
係於二十七年畢業實在定章以前其三十一年三月四起畢業
一班適值整頓海軍經前總理南北洋海軍事務葉祖珪派員往
堂考試畢業當因水師人材缺乏分撥南北洋各兵輪練用其最
後一班又於上年冬間咨送練兵處考驗合格早經送往日本留
學海軍此外尙有駕駛學生六名經臣前在兩江署任時送往英
兵艦學習船務上年九月業已學成回國以上成就學生共計六
十七人均經將姓名籍貫先後咨部在案所有畢業各生現均派
往南北洋各兵輪當差補用並派往日本隨同監造快船若均一
一調回送部考驗不獨在差者一時難以取齊且各差均屬要職

往返需時亦恐多所貽誤若云未經考驗不足以覘在事各員之成績然畢業各生有在兵輪當差者有赴日本學習海軍及監造快船者有在英兵艦學成船務者且最後一班成就最遲且蒙練兵處考驗合格是其成效昭著皆有實事可徵此該堂畢業各生確係成就及未便調齊送部考驗之實在情形也該堂在事各員薪水均不豐厚全在優予獎勵策以勤奮此次開保實已積至六年而所保人數復經前署督臣周馥嚴行核減擇尤請獎仍照上屆續定三年一保章程辦理並未敢以年限較久稍涉冒濫如再改照陸軍保案新章辦理匪特本屆請獎各員一日不能調齊學生考驗卽一日不能議准嗣後亦勢必遷延至十年之久始得開保一次誠恐績學之士或因進取已難薪資又寡一旦相率他去海軍人材愈無成立之望臣爲海軍人材關係大局起見合無籲

懇

天恩俯准將南洋水師學堂第五屆期滿在事出力各員仍循案照原奏所擬給獎以昭激勸出自

鴻施逾格除將該堂畢業各生當差處所清冊咨部查照外謹恭摺具陳伏乞

皇太后

皇上聖鑒訓示再此後該堂成就學員若違政務處議奏章程須俟有六七十人咨送一次竊恐先後畢業年數相隔久遠不特停滯資格而海軍愈有需才孔亟之憂即使陸續咨送而在事出力人員年久更調先後見遺亦不免有向隅之歎究應如何變通辦理以期妥洽之處相應請

旨敕部核議施行合併陳明謹

奏

謝賞福壽字等件摺

奏爲叩謝

天恩恭摺仰祈

聖鑒事竊光緒三十三年正月初八日齋摺差弁回寧奉到

恩賞福壽字各一方曼壽字一幅綢緞四卷貂皮八張臣當卽恭

設香案望

闕叩頭謝

恩祇領伏念臣久綰疆符渥承

殊遇白門秉節方虞狙素之貽譏

紫禁頒春猥荷

鴻施之賁寵

此思每不素和
年一
三三三三

敷疇錫極瞻

堯文而奎壁騰華美意延年仰

義畫而儀璣煥采青紫拜尙方之

賜表裏精純銀黃

頒天府之珍襜榆溫潤

恩來日下春滿江南臣惟有仰體

皇仁勤宣

闔澤祥風布濩願年豐而共慶

昌期化日舒長閤江表而成躋

壽寓廣羣生之衣被愧無經文緯武之才忝累葉之簪纓冀竭墜

露輕塵之報所有臣感激榮幸下忱恭摺叩謝

天恩伏乞

皇太后

皇上聖鑒謹

奏

籌撥學務公所經費摺

光緒三十三年正月

奏爲籌撥江寧學務公所經費銀兩以資辦公恭摺具陳仰祈

聖鑒事竊據署江寧提學使陳伯陶詳稱案照學部

奏定各省學務官制章程內開學務公所設議長一人議紳四人
省視學六人並分爲六課曰總務曰專門曰普通曰實業曰圖書
曰會計每課各設課長一人副長一人其課員視事之繁簡少則
一人多不得過三人課員以下設司事書記公役等人各等因竊
查六課之中繁簡不一總務普通會計三課事較繁曠自應專立
寧省實業商業學堂現祇兩所尙待擴充擬將實業暫併普通課

乞

皇太后

皇上聖鑒飭部立案施行謹

奏

整理財政歸併各局摺

奏爲江南財政亟宜清理請歸併各局以資整頓恭摺具陳仰祈
聖鑒事竊維理財之要首貴綜覈名實宜統一不宜紛歧江南關
繫財政各局如支應局經管水陸各營月餉及一切活支籌防局
經管修艦築台訂購槍礮采辦各項物料籌款局統籌江南稅捐
各進款並經理牙稅房捐膏捐等項三局各不相屬及察其內容
有同一款而分收分放者有此局墊款而彼局認還者既已複雜
難稽卽不免日久滋弊且出納判爲兩事綜覈將無所施盈虧各

不相聞決算豈能密合非將三局歸併爲一則治絲而棼無從整理經臣督飭各該局司道悉心籌議將支應籌餉籌款三局事宜一律歸併改設江南財政總局以江寧藩司繼昌爲總辦以候補道翟衡璣爲參議署江寧府知府許星璧爲提調另行刊發江南財政總局關防嚴定章程責令核實整理委員分股辦事各專責成屏除冗散仍與舊局截清界限支應籌防籌款三局均於年底裁撤凡收放各款事在光緒三十二年十二月以前由該三局經辦之員分晰造報三十三年正月起統歸財政局造報自新政繁興支款日多各局出入相衡不敷甚鉅當由臣督飭財政局司道將冗濫不急之費悉心釐剔可籌之款斟酌推行總期歸併以後確有實效抑臣更有請者外省局所通病其浮支濫用者無論矣亦有實應動支之款不符部定准銷之條於是多立名目號曰融

銷作備者情非得已踵行者弊竇旋生名實乖午莫此爲甚升任
兵部左侍郎鐵良前歲奉

命來寧查察各局所款項以開報不實奏經部議飭令刪除又准
部咨此後造送款冊務與各局月報鉅孔相符等語臣現擬督飭
司道自三十三年起凡因公外銷之款由局開單呈候臣核明據
實咨部立案但求稍寬舊例庶幾宿弊一清似於綜覈名實之道
深有裨益除咨部查照外所有整理財政歸併各局緣由謹會同
江蘇巡撫臣陳夔龍恭摺具陳伏乞

皇太后

皇上聖鑒訓示謹

奏

冬賑就緒接辦春賑摺

奏爲江北徐海淮安各屬辦理冬賑就緒並擬接辦春賑大概情形恭摺陳仰祈

聖鑒事竊照本年江北徐海淮安三屬各州縣被水成災蒙

恩賞帑撥款辦理賑撫並清江浦留養饑民陸續資遣完竣情形均經臣等迭次據實電奏在案查被災之海州等十三州縣原查災民人數共一百五六十萬嗣由清江遣歸就賑者四五十萬覆查補賑者二三十萬統計災民約二百四五十萬極貧每口放給冬賑錢一千文次貧五百小口遞減一半自議定官賑義賑合辦紳任查戶放錢官任監視彈壓遴派員紳分投開辦隨查隨放不少耽延辦理尙稱順手計官賑發過銀七十萬兩合錢一百餘萬串官辦平糶米價充賑錢二十餘萬串義賑錢六十餘萬串提用淮海各屬積穀錢十餘萬串約共錢二百萬串有奇此外清江揚

州江寧鎮江等處辦理留養及資遣饑民共銀七十餘萬兩又修理運河隄防及各處民壩以工代賑銀二十萬兩有奇又迭次採辦米麥雜糧運回平糶及開辦粥廠散給棉衣收養幼孩暫當牛隻等款共銀五十餘萬兩皆不與焉迭據各屬官紳函電僉稱領賑災民咸知此次奇災得以重登衽席獲慶更生悉出自我皇太后

皇上如天之厚澤感激歡忻頌聲盈野至各屬查賑安靜不擾實惠普霑則義紳之力爲多而此次義紳之徧布各屬力任勞怨實由駐滬商約大臣呂海寰盛宣懷主持公義極力提倡之所致本年九月以後該大臣等首倡義賑於捐款弩末之時毅然認籌錢百萬串所派義紳類多樸實廉幹之才與臣等籌商賑務電音日必數至呂海寰之樂善不倦籌畫周詳盛宣懷之見義勇爲公忠

懇至_臣等實賴以集事而其視國事如家事視救災黎如救其身
_臣等尤深佩之茲查各屬冬賑戶口較少之區年內可以竣事其
戶口較多者明正亦必放完卽當覆查戶口仍用各該義紳接放
春賑以資熟手而竟全功至所辦米麥雜糧轆轤運回平糶市價
漸平地方靜謐日來連得雨雪麥苗可望滋長堪以仰慰

宸厯至賑款項下兩次蒙

恩賞銀二十萬兩准撥漕折銀三十萬兩廣西溢收實官捐銀六
十萬兩各省協助銀十餘萬兩揚州商捐銀十萬兩運庫撥借銀
三十萬兩徐海淮安各屬積穀錢二十餘萬串各處紳商捐集錢
十餘萬串合之義賑認籌錢一百萬串約共銀一百六十餘萬兩
錢一百三十餘萬串查_臣等十月十四原奏摺內約計本年冬賑
留養及修疏隄工河道等項至少需銀二百萬兩並經聲明來年

春賑尙須預計通籌不在二百萬兩之內嗣因各屬饑民紛紛南下至清江者五十萬人揚州五萬江寧鎮江亦各三四萬不等臣等恐其四散流離迭飭各處妥爲留養並設法資遣回籍就賑頭緒益繁需款較鉅綜計各處留養資遣以及工賑等項共用銀一百五十餘萬兩錢二百餘萬串較之原奏約估之數已有不敷來年春賑自正月以至麥收爲日甚長關係緊要冬賑之次貧至來春卽爲極貧約計查放春賑一次至少需錢二百四五十萬串若再加放一次爲數尤屬不資現計有著之款僅存義賑錢三十餘萬串徐海淮安各屬積穀錢十餘萬串紳商捐集錢十餘萬串勸募賑捐尙無成數銅元儘數充賑並無餘利可提臣等惟有力任其難督同司道並隨時會商呂海寰盛宣懷等悉心籌措以應要需查度支部覆奏尙此後賑款實在仍應續籌臣部亦不敢不竭

力經畫之議如果不敷過鉅再當籲懇

恩施再江南常鎮蘇松等屬業經勻撥賑款銀九萬兩又江寧之上江句溧四縣揚州之寶應常州無錫江陰交界之芙蓉圩等處地方續經查察均有偏災亦已酌量分給賑款藉廣

皇仁除導淮一事另行奏陳外所有江北各州縣冬賑辦理就緒並擬接辦春賑大概情形謹合詞恭摺具陳伏乞

皇太后

皇上聖鑒謹

奏

關稅議結並減收情形摺

奏爲淮安關徵收稅鈔一年關期屆滿請照案先行議結並下屆自上年十月後因災重貨缺稅收頓減情形恭摺具陳仰祈

聖鑒事竊查淮安關稅務自裁撤監督改派道員會同淮安府接辦後所有試辦一年整頓情形業經前署督臣周馥奏報截至光緒三十一年八月底止今自三十一年九月初一日起至三十二年七月底止連閏計十二個月又當關期屆滿自應照案辦理茲據辦理淮宿海等關稅務江蘇候補道穆克登布署淮安府知府桂殿華詳稱伏查淮宿海三關從前原定每年正額銀二十五萬四千三百六十三兩六錢二釐又加盈餘銀十一萬兩統計應徵銀三十六萬四千三百六十三兩六錢二釐嗣緣黃河改道江海通商內河往來各貨多領洋單驗免權稅情形爲之一變以故所收稅鈔大爲減色每年多則約收銀六萬兩少則約收銀三萬兩自奉

旨裁撤監督改章派委接辦後體察商情因勢利導凡舊有之浮

費或嚴行禁革或化私爲公核計上屆自光緒三十年九月初一日起至三十一年八月底止共十二個月三關統徵正稅銀十七萬四千三百四十九兩五分七釐較之定額雖屬有虧而比近數十年收數尙增幾倍詳奉奏請

飭部從寬議結當經戶部議復此次按照原額雖尙短收而衡以歷任監督收數實已大有起色應請從寬免其賠繳至應定攷成擬請俟試辦三年後由部通計其三年收數請

旨欽定稅額以重權務等因在案所有本屆自光緒三十一年九月初一日起至三十二年七月底止連閏計十二個月淮安關收數銀十九萬三千二十二兩六錢二分三釐宿遷關共收銀三萬七千五百三十一兩海關共收銀五千八百四十五兩三錢八分三釐均已連同各口徵收稅銀一併在內統計以上三關共徵正

稅銀二十三萬六千三百九十九兩六釐內有兩淮鹽鈔銀一萬兩
兩蓆抽銀四兩五錢三分未經解到又淮安倉項下徵收茶稅銀
二十三兩六錢七分二釐海關徵收樑頭鈔銀三百十六兩三錢
八分四釐以上二款遵例儘收儘解毋庸比較又加徵菸酒稅銀
二千六百二十三兩四錢五分三釐另款存儲聽候部撥不在正
額盈餘之內又正稅所收火耗銀二萬一千八百四十九兩四分
二釐定例儘數抵支經費以前往往不敷支用動撥正稅或萬餘
兩或數千兩本屆開支各款力求撙節核計所收火耗儘數動用
已敷支銷毋庸再撥正款以裕稅課復查上屆共收銀十七萬四
千三百餘兩已爲近數十年未有之旺今以本屆共收銀二十三
萬六千三百餘兩比較上屆又復增收六萬二千餘兩若衡以從
前監督歷年收數今屆增收幾近二十萬兩之多固因嚴杜中飽

化私爲公尤幸雨暘應候年豐物阜以致稅收大有起色擬請奏懇

飭部查照上屆成案先行議結俟試辦三年後再行由部通計三年收數請

旨欽定稅額以重榷務至稅課盈虧固在辦理之如何尤繫秋成之豐歉本屆稅收之旺實賴天時人事相輔而行詎料上年自夏徂秋始則陰雨連綿二麥多爲腐爛繼則大雨時行湖河並漲先後所種豆糧率皆淹損其被災情形以淮徐海爲最重查淮宿海各關稅課向以黃豆豆餅爲大宗本屆之旺餅豆收數約居十之七此有票根可稽乃夏秋雨水太多所種早晚各豆約損其九收穫者不過十分之一各留本地充饑絕無出運之理其餘北貨如油酒以及芝蔴花生金針菜等類固已一律款收間有出售皆爲

洋票護送無稅可收他如梨棗等物更屬微細至淮北鳳泗各屬亦復秋收較歉下駛之貨既已寥寥復由洪湖三河繞越而南又如山東所產餅豆大率就近出海偶由運河下駛復爲災區截留此下水各貨由北往南之實在情形也淮安以上受災較重闔關蕭條所銷南貨能有幾何且大宗各貨向持洋票驗免邇來亦復稀疎間有零星雜貨以及竹木等物刻因北路滯銷亦多裹足此外米糧又奉免稅之文概行驗放此上水各貨由南往北之實在情形也探諸商情訪諸輿論皆謂徐海等屬及長淮一帶戶鮮蓋藏尙不敷本地之食又安有餅豆運往南路如欲轉機非今秋大熟斷難指望伏思收數之淡旺本難預料今被災如此其重迥非平常可比近數月來甚有三四日無一貨船經過似此商販凋零雖欲力加整頓無從著手往年六七八九等月商貨向俱清淡每

月所收不過數千兩上年夏秋迭遭霖雨其時尚未成災虧短無幾自十月以後每月比較均在二三萬兩之多所恃者全賴餅豆暢銷今則頓歸烏有稅收遂致大絀第本屆收數之增係由歲豐貨旺力有可施後屆收數之短委因貨乏來源無從補救是前後各屆所徵稅課同係一手經理而收款盈縮大相逕庭實係時勢使然惟有竭盡心力認真辦理總期無漏無苛斷不敢稍有玩忽自取咎戾至淮關所收飯食罰款兩項向係留爲充賞公用之需曾於咸豐二年奏經部議儘收儘放歷年遵辦在案所有本屆共收飯食銀七千七百八十二兩七錢五釐又收罰款銀一千七百九十八兩八錢五分遵照定章儘收儘放並無存銀等情詳請具奏前來臣查淮安關稅務自委該道府等接辦以來切實整頓稅收倍蓰於前祇因今昔情勢不同難於規復舊額上屆截收奏報

經部議准從寬免其賠繳在案本屆收數雖尙較定額有虧而比
照上屆已增收六萬二千餘兩較近數十年更增數倍合無仰懇
天恩俯准飭部照案先行議結俟試辦三年後由部通計收數請
旨欽定稅額以重權務至下屆自上年十月後因災重貨缺稅收
頓減亦係實情已飭該道府等隨時實力稽徵藉圖補救應俟一
年關期屆滿再行核實截數奏報除飭將本屆收數造具四柱清
冊另行咨部查核外所有淮安關徵收稅鈔一年關期屆滿懇請
照案先行議結並下屆自上年十月後因災重貨缺稅收頓減各
緣由理合恭摺具陳伏乞

皇太后

皇上聖鑒訓示謹

奏

查勘河道並籌辦工賑摺

奏爲派員查勘淮河故道並籌辦工賑情形恭摺具陳仰祈

聖鑒事竊臣端方於光緒三十二年十二月初六日准度支部咨議復雲貴總督岑春煊奏江北水災請速治淮河以工代賑一摺奉

旨依議欽此抄錄原奏恭錄

諭旨咨行欽遵辦理查原奏內開淮河究竟應否疏濬河工究竟需款若干行令切實查勘奏明辦理等因臣等伏查本年江北水災極重爲數十年所未有疊蒙

聖恩頒發帑銀截留漕項飭籌賑撫臣等仰體

皇仁先後籌集官款廣募義捐分派員紳妥爲散放其淮徐海各屬河堤圩堰工程亦經分飭淮揚海徐州兩道派員勘估擇要興

修以工代賑暨委熟悉河工之員將淮河故道先行查勘以憑酌
 核興辦各在案欽奉前因查江皖兩省毗連州縣如徐海淮揚鳳
 穎亳泗等屬皆爲淮水所經按之禹貢淮水故道自桐柏歷鳳穎
 盱泗經桃源清河安東雲梯關以達於海自宋時河決澶州而河
 流遂與淮合明臣劉大夏築斷黃陵岡而河遂奪淮流淮水日益
 縮弱一遇盛漲橫決四出於是淮揚一帶時被水患同治六年前
 督臣曾國藩因紳耆之請以黃河遷徙甫閱十年舊堤尙存施工
 較易倡爲導淮之說奏請分年試辦光緒六七等年前署督臣吳
 元炳前督臣劉坤一歷輕踵行抽挑楊莊舊黃河及張福碎石等
 河數次興工僅能略資分洩前安徽學政臣徐郃請排泗沂爲導
 淮先路建議疏治大通口以暢出海之途前督臣左宗棠深韙其
 言當時以爲舊河旣通無論淮水能否復故但沂泗來源已爲分

減卽淮未復而運河亦可稍安夫復淮一案議辦多年言之非不
剴切詳明而行之不能遽收成效者蓋緣淮水墊塞歷有年所平
時河淮漲落逐歲不同同治十三年所挑揚莊河頭三百餘丈至
光緒六年已墊高數尺現在閱時愈久則從前歷辦之工河底必
更見淤高堤身必日就廢圯較之光緒六年爲尤甚工費之鉅更
不待言臣等以爲淮水挾兩省衆流匯爲洪澤自黃河淤墊地形
北高南下由三河趨入高寶以達運河久成就下之勢上游沂泗
之水一經盛漲同時下注僅恃運河東西兩堤爲裏下河州縣保
障堤單一綫岌岌可危若不亟圖經久之策誠恐下游水患未有
已時今欲導淮復故使之獨趨入海淮揚澤國旣永免昏墊之憂
而盱泗高寶數州縣昔之巨浸盡可復爲沃壤此誠江皖生民之
大利未可視爲緩圖然就臣等見聞所及有不能不縷析言之者

雲梯關下二百餘里河形高仰且有遠年沙積人力難施卽自大
通響水口入海似較雲梯關稍近然從張福口起亦三百五十餘
里節節壅礙此一難也舊黃河中法極淺處高中河底一丈六尺
高洪湖底一丈至一丈五六尺不等此同治七年勘量之數卽使
疏濬得宜能與湖底相平已非易事湖水不高不能舍高竇而入
故道不堵截三河湖水無抬高之理然使去路不暢遽閉三河則
高堰一帶臨湖石工勢更危險設有漫決爲患益深此又一難也
南北高低旣已形如側釜挽之逆流勢有不可然猶謂建萬世之
利者卽役民力而不爲勞堵三河關清口濬舊河挑尾閘多籌經
費分年程功當無不辦之事而雲梯關下舊黃河口數百年黃水
淤積沙纒縱橫潮汐所至畚畱難施此又一難也卽謂入海之路
可以暢行大修堤堰絕其南向江皖水患一旦蠲除利莫利於此

然淮揚下河一帶農田當初夏分秧之際沂泗未漲惟恃淮流爲之灌溉惜水如金往往爭競視若命源果使涓滴悉歸於海運道涇塞農民缺望害去而利亦俱去議者於是有人在陳家集下大冲地方建閘之說庶湖水入運操縱可以由人但其地沙多土鬆植基不易此又一難也綜此數端是以歷任督臣屢經建議迄未竟功前督臣曾國藩原奏內稱復淮之大利不敢必其遽興淮揚之大患不可不思稍減前督臣左宗棠奏報履勘情形謂興此不能預必之工不若因勢利導師行所無事之智老成謀國先後同符臣等竊謂今年江皖兩省濱淮州縣既已多被水災懲前毖後亟宜預爲籌備既不可因噎廢食亦不敢畏難苟安復淮之利提議數十年而未克歲事者何能一旦而期其必成但使沂泗盛漲得以分洩運河下游不受漫溢之患是亦可謂便利之一端當經飭

委署淮揚海道楊文鼎安徽候補道許鼎霖丁憂山東東昌府知府魏家驊分省補用知府劉鍾琳於清江浦設立籌議導淮局在籍翰林院修撰張謇學問淵通熱心任事於江淮水道情形考求最有心得並以爲導淮局總參議分派熟悉河工精於測算之員帶同測繪生將成子河天然引河中運河吳城七堡張福口洪澤湖高良澗三河等處及黃河雲梯關以下並大通口各處逐一較準測量分別緩急權衡利害以冀次第興辦但工鉅費繁必須詳慎勘估斷不敢草率從事虛擲帑金淮徐海各屬飢民陸續遣歸冬賑甫畢急須預籌春撫若待此項工程查勘完竣再行估辦恐嗷嗷之衆將有不可終日之勢現仍分飭淮揚海徐州兩道各就飢民處所散放春賑一面將應修之河堤圩堰各工分投估修以工代賑並將運河兩堤分段修補預防春漲特地廣災重民戶衆

多綜計工賑所需恐非三四百萬不能畢事臣等惟有督同司道分飭員紳認真經理總期實惠均霑以仰副

朝廷軫念民艱至意除原奏地方官吏匿災索稅等弊由臣等查明隨時奏參外所有查勘淮河故道並籌辦工賑情形謹合詞恭摺具陳伏乞

皇太后

皇上聖鑒謹

奏

嚴禁冒賑片

再江北各屬水災現在接辦春賑所有賑款自應專濟極貧查上年辦理冬賑往往有可以自存者亦復相率冒領一經查別輒敢聚衆滋鬧方今財政支絀籌集艱難中戶多一冒賑之人卽貧民

少霑一分實惠若不嚴行懲辦不足以杜冒濫而活災黎現經分飭各屬官紳覆查戶口從嚴釐剔並出示剴切曉諭如有並非極貧仍行冒領甚或不服剔除任意滋事卽當嚴拏懲辦庶災民得霑實惠而賑款不致虛糜所有嚴禁冒賑緣由謹附片具陳伏乞聖鑒謹

奏

辦賑玩誤隨時查參片

再前准軍機大臣字寄光緒三十二年十一月初六日奉

上諭有人奏江蘇水災至重饑民甚多江北民情強悍亟宜安集等語著端方妥籌賑撫毋任失所至所稱各州縣上下相蒙尙思秋後開徵等語並著該督從嚴查辦原片著鈔給閱看欽此欽遵寄信前來查上年江北水災各屬官吏於救荒要政未能先事籌

維臣到任後嚴加考查於十一月十一日會同江蘇撫臣陳夔龍將辦賑不力之淮安府知府張慶勛等分別糾參奉

旨允准在案欽奉前因除遵飭辦賑各員認真經理毋得玩誤外仍隨時嚴加查核如有怠玩不力以及縱容董保侵扣賑款情事卽行從嚴參辦不敢以前經參劾多員稍涉姑容現在接辦春撫各處饑民資遣回籍就賑地方尙稱安謐堪以上慰宸廑所有遵

旨查辦緣由謹附片覆陳伏乞

聖鑒謹

奏

被災州縣借給公費片

再上年江北水災海州直隸州及其所屬之贛榆沭陽淮安府屬

安東清河桃源阜寧山陽徐州府屬之銅山蕭縣宿遷睢寧邳州十三州縣災情最重地方官辦理賑濟安集流亡政務繁難倍於平日而錢糧既皆緩徵毫無餘羨自非借給公費不足以資辦公據署淮揚海道楊文鼎署徐州道袁世廉請自光緒三十二年十二月起至三十三年五月止按缺之繁簡酌給公費擬定銅山每月給銀八百兩海州清河宿遷各六百兩邳州蕭縣安東桃源沭陽各五百兩山陽阜寧贛榆睢寧各四百兩均由江甯司庫籌撥交各該管道就近按月發給應用分作兩年在丁漕盈餘內如數攤還以上各州縣年額坐支祭祀驛站俸工等項准將上忙已徵未解之銀儘數支給如有不敷並准照章赴司請領據江寧布政使繼昌詳請具奏前來臣等覆加查核所擬尙屬允協應准照辦所有被災緩徵十三州縣借給公費緣由謹合詞附片具陳伏乞

聖鑒謹

奏

淮南鹽務籌擬辦法摺

奏爲遵

旨查明淮南鹽務積弊情形並籌擬辦法恭摺覆陳仰祈

聖鑒事竊臣於光緒三十二年九月十七日承准軍機大臣字寄

光緒三十二年九月初六日奉

上諭有人奏淮南鹽務積弊滋多請飭澈底清查各摺片著端方

按照所陳各節確切查明妥籌辦理據實具奏原摺片均著抄給

閱看欽此遵

旨寄信前來並抄錄原奏摺片等因承准此遵經飭委江蘇試用

道吳學廉江蘇候補知府許星璧馳往揚州按照原奏所陳各節

先行嚴密訪查一面調集卷宗詳細考核茲據該員等將遵飭查明情形稟復前來臣復加查核如原奏內稱運商本輕利重從前簽掣之票並無票根祇須本銀七八千兩運鹽一票計五百引爲時十數月獲利四千餘兩場商事繁利薄承辦場鹽五百引由收重至售歷二三年收回鹽價僅獲利二三百千文較之運商不啻天壤一節查淮鹽從前改定行票章程當時運商原領之票本無票根數十年來轉售更名早已各有票價大約每大票一張總在一萬兩以外迥非昔日無本之時可比自各岸加釐加價以後商本較昔加增每運一票所得餘利亦祇千餘兩或二千兩之譜若場商收鹽在從前棧銷疲滯時誠有如原奏所謂由收重至售非二三年不能收回鹽價者近年岸銷較暢三十二年正月起至六月止各場商所收頂梁和碱之鹽業已給發重照趕重至棧輪銷

甚速自收至售不過一年轉輸既易獲利自豐原奏所稱蓋猶是
曩時疲滯情形近則場運兩商尙不至有天壤之別又原奏內稱
上年錢價驟跌場商虧本三百餘萬串現在章程大半似是而非
如觔重砵秤售價等事多與定章不合以致日久弊生運商從而
取巧場商因之受困一節查市面錢價漲落靡常貿易經商盈虛
互異亦不僅場商爲然上年錢價驟跌凡以錢款交易者無不暗
受虧折然既有錢跌受虧之日卽有錢貴霑潤之時似未可據爲
定論至觔重砵秤由泰壩以至儀棧均照部頒砵式庫法戥秤悉
合定章惟各岸情形不同向用曹砵比照棧秤應有申觔此項餘
觔僅於水販徵收加價而於運商釐課分毫無取升任侍郎鐵良
上年奉

旨考查鹽務卽曾核計此數當以運商加釐加課商本日重自請

咨環運起至銷竣結單止必須二十餘月所賴以維持者恃有此
餘觔之利是以未議改提現在岸銷既暢環運日期亦較昔時減
少情形既異自應酌量歸公以昭核實惟定章滷耗每引六十觔
長江險遠實有不敷容由臣飭令運司局員核明數目除再格外
優恤多加滷耗外其餘悉令歸公咨明度支部辦理若各岸售價
因償款新政或加一文或加二文均係奏准有案且款非運商所
得亦與場商無干又原奏內稱淮南各口岸現銷網分尙係十數
年前應銷之引以四岸每網銷鹽四五十萬引而論每網應徵課
釐等項數百萬兩稽壓十數網引鹽卽短收數千萬釐課運商因
無包繳包銷責任遂得置身事外一節查鄂岸現開丁酉春網湘
岸現開丙申秋網西岸現開庚子秋網皖岸南鹽現開甲午春網
北鹽現開庚子秋網以現行網分而論積壓之引誠然然票法循

環本非綱鹽包銷可比運商恃票爲業斷無不願按綱運清之理無如淮南引地自兵燹後尙未全行收復以致歷年銷數均尙不能如額是積綱之未能運竣蓋亦時局使然不繫乎運商之有無責任也又原奏內稱光緒二十六年間戶部籌計度支責令運商補交票本每引僅認捐銀二錢猶以額銷四十萬引爲請歲只合銀八萬兩無票場商每月尙能繳新捐一錢五分按引收捐並無限制現岸銷暢旺每年銷鹽增至五十餘萬引以運商每綱認繳票本銀八萬兩計之每引僅合銀一錢七分有奇與無票場商繳銀相等一節查光緒六年運商躉捐票本一百萬兩本經奏明免其常年捐輸迨二十六年戶部復令捐繳票本運商一再稟陳經前督臣劉坤一據情奏請免繳部議未准各商始勉力每年認繳銀八萬兩照銷數攤派每引捐銀二錢年終結數如有餘銀留備

下年撞解或銷不足數仍由運商補足二十七八兩年曾因銷數不敷由運商繳足有案是或盈或虧並無取巧卽以八萬兩外果有盈餘亦復爲數無幾况曾躉捐百萬又復勉認常捐亦屬不遺餘力至場商新捐每引一錢五分係光緒二十七年籌繳賠款之案運商於此案內亦認捐加釐加課每引一兩一錢什倍於場商所繳之數謂爲銀數相等似不足以服運商之心又原奏內稱應令淮南四岸商人卽以本年爲始作爲現綱仿照各食岸現行章程按綱納課包銷溢則照完缺則賠繳不准仍前套搭從前積壓各殘綱卽仿舊章帶殘辦法按綱帶銷三四成由通泰商人自行運鹽赴岸與現綱正引分成搭銷以各殘綱積引帶竣爲度每銷鹽一引照運商認捐票本銀二錢加增十倍呈繳報効一節查兩淮鹽務人人視爲利藪所以維持不敝者全恃此鹽法耳立法之

初必使場商收鹽售之票商票商運鹽達之各岸者誠以商人資
本有限課釐關繫匪輕分任則常覺有餘兼營則難免貽誤界限
極嚴不容紊越倘令場商帶運殘綱是從此破決藩籬尤恐難防
弊混詳細考核礙難照行惟推言者之意無非爲帶銷殘綱可以
增收報効課釐起見竊謂欲能多運必先求多銷從前部議收復
淮鹽引地案內曾准川淮並銷於安襄鄖荆宜五府及荆門澧州
二州由淮商酌設子店逐漸開拓乃因初辦無利迄無淮商運往
之鹽坐致因循廢棄未免可惜近年推拓衡永寶岸銷辦理有効
未嘗非人力所致臣現擬查明前案由官設法趕緊拓銷察看能
銷若干卽由官按照票章運鹽前往作爲帶銷殘綱積引照繳釐
課所得餘利概行歸公庶幾帶運之引不佔各岸正銷而歸公之
款亦不僅十倍報効似爲兩得之計又原奏內稱緝私經費每引

一百二十文又有勇糧捐每引三十二文礮船捐每引十五文儀
棧緝私捐每引十五文武衛軍雜支每引四文新字營餉每引銀
三四分不等是於常例緝私營費外又溢出五萬七千六百餘串
之多一節查運司衙門緝私經費係同治二年飭捐每引一百二
十文專備支放淮南緝私各卡員薪水局用及礮船勇丁口糧等
用從前間有盈餘近年添募勇營增撥北京練兵經費尙慮不足
此外勇糧礮船儀棧緝私武衛軍雜支新字營餉等捐皆係歷年
添設稟准有案各有指用之款與常例緝私經費並不重複前年
升任侍郎鐵良考查鹽務所有運庫收支各款均經逐款開報有
案可稽又原奏內稱沿江義渡揚州粥廠等十五款及文廟祭器
徽州會館恭善堂場鹽公所公用公所新增莫不按引抽捐而何
以又立善舉名目每引六十文一節查各項善舉內除金陵冬賑

係於光緒二十三年因省城辦理冬賑需款飭商捐繳轉解濟用
又通屬橋梁歲修一款先係由官經理現已發還場商具領自行
修辦其餘皆係紳商自行具稟願捐之款雖由官收仍係發交紳
商自辦並不干預其事至所稱另立善舉名目據運司摺開該項
善舉捐每引六十文以四十五文撥歸揚州育嬰堂以十五文撥
作立貞全節等堂之用亦非重複收捐揚州紳富故多樂善好施
是以善舉各捐名目最廣要之有一款卽有一事既經創辦於前
似難裁撤於後如果承辦員紳事事核實則繳捐之人當亦樂於
推解應飭由運司隨時考查如有不實不盡之處卽將捐款立予
蠲除又原奏內稱裁減成本一項通屬每引五十文泰屬每引三
十五文查係原任大學士李鴻章督兩江時調查場商成本將商
人場店辛工提去一半充作軍餉及至大軍裁撤曾經奉飭住提

此項卽應免捐又如委員坐薪每引四十文原係津貼候補冗員
光緒二十九年業將坐薪名目裁撤而何以繳捐如故一節查裁
減成本一項據運司摺開專備抵支揚城防兵口糧及酌留墊發
功鹽賞號等用至坐薪一項原爲津貼窮員光緒二十七年前運
司程儀洛於此款內酌提銀五千兩撥作營餉其餘改爲貧員津
貼二十九年升任運司恩銘復將貧員津貼改爲課吏館獎賞三
十二年運司趙濱彥又將課吏館獎賞改爲仕學館及出洋遊學
經費名目雖不相符而支用轉較核實化無用爲有用似未便遽
議減裁又原奏內稱儀河經費每引繳銀二分而每年冬令水涸
如築壩灌塘等事仍欲令商人繳捐又壩工每引六十文此款係
因築壩歸江之用每年極多不過萬串足矣一節查儀河經費據
運司摺開係專備疏濬儀徵河道之用每濬一次工費浩繁非積

數歲之捐不能興辦如非興工之年築壩灌塘等費僅支用數百兩或千餘兩不等再有盈餘提解償款及緝私營餉之需並無令商人另行繳捐之事其壩工經費爲修築歸江十壩之用向係察看水勢以司啟閉鹽務地方均關緊要每年用款多寡不定如遇大水啟壩較多所需經費尙不止萬串之數又原奏內稱庫硃紙硃兩項每引四十九文關係運署購買印色銀硃之用一署之內一年之中正不知當用銀硃印色幾何一節查庫硃每引現收三十五文係光緒十五年前運司福裕以鄂岸津貼緝費銀兩未能及時解司濟用稟准仍令場商復捐紙硃每引四十文二十七年減去五文按引收捐解交司庫以充委薪兵餉等用故名之曰庫硃升任侍郎鐵良考查鹽務將此款一併列入緝費連同原有緝費每引錢一百五十五文是支銷既屬因公名實卽宜相副應卽

併入緝費無庸另列庫硃名目又紙硃每引十四文係津貼運庫油硃及庫大使總局發照委員督署司署暨淮南總局各寫生辦公刷照之用聚之則見其多分之則見其少未便議裁又原奏內稱局用棧用兩項每引捐錢二百二十餘文辦公經費如此之多下至分司場官無不層層剝削如每引捐一百二十文名之曰掛號經費分司亦每引一百二十餘文以三分司二十一場計之每年已在一百二十萬串此外仍有津貼辦公經費視場分之大小每月三十五十千文不等凡遇一切供應差徭又名之曰匣費分司又有攤款派款名目每年又一百四五十萬一節查局用卽淮南總局辦公之款棧用卽儀棧辦公之款均於原設局棧時卽有此項名目歷經冊報有案並非隨後加增至分司場官掛號經費係於場商重鹽時抽收向爲分司場官津貼辦公之用由來已久

各屬數目多寡不同每引亦僅數十文之譜斷無每年一百二十萬串之多此項經費若違令全行裁革在場商所益無多而該分司大使等官其賢者或以辦公無出竟至諸務廢弛不肖者或竟別思取盈轉恐更滋流弊權衡輕重似未可徒鶩虛名擬由臣督飭運司嚴切查明除曾經呈報有案實係因公必不可少之款仍准收繳外其隨時加增之款應一律嚴行查禁至津貼費匣費及攤派各款前督臣曾國荃本經禁革有案自應重申禁令以免日久玩生已由臣通飭各分司場員不准再行收授如查有陽奉陰違定卽從嚴參辦又另片所陳緝私情形查淮南場私向由南路入於揚州以出江爲去路又由中路經運河出湖侵銷皖食各岸而各場埽灶皆在范公堤外前據運司趙賓彥稟請調撥各營沿提扼要堵緝使場私顆粒不透洵爲正本清源之論且辦理得宜

堤內州縣亦將開成引岸於課釐不無裨益臣到任後疊飭地方各官會同緝私各營認真堵緝其淮北水陸營隊並飭扼要分別堵截至原奏所稱原任刑部尙書趙舒翹撫江蘇時嚴法緝治一時梟風爲戢等語查江蘇係浙鹽引地自撫臣陳夔龍疊獲著名梟販分別嚴辦尙不至橫行無忌現又會委道員徐賡陞接統浙西緝私鹽捕等營責令實力整頓以期私梟斂戢又另片所陳兩江事務殷繁兼有華洋交涉精力慮有不逮擬由商會立總董一人副董一二人顧問官一二人凡利弊所在不致隔膜等語查鹽政本係專官道光十年因鹽政無管轄地方之責疏銷巡緝呼應不靈改歸總督兼管歷任督臣於應行整頓事宜類能殫精竭慮力圖振作近年岸銷較暢是其明徵至利弊所在尤須隨事研究已由運司於署中設立淮商研究會俾官商常時接洽痛除錮蔽

壅隔之弊其在揚場運各商挨輪重鹽照章領運雖不致如從前網商疲敝然深居樂業素鮮講求付託之夥又皆罕知遠計一時尙無堪膺會董顧問之人現已飭由運司將研究會實力提倡遇事研求以期日有進步以上各節謹就原奏所陳參酌現在情形立論其餘釐課攸關商情不便之處自當設法改良期臻妥善以紓商困而重鹺綱所有查明淮南鹽務場運積弊情形籌議辦法各緣由謹恭摺據實覆陳伏乞

皇太后

皇上聖鑒再此案往復調查致稽時日是以覆奏稍遲合併聲明
謹

奏

淮北銷鹽例限展緩片

再淮北票鹽現運新額三十六萬引部議定限十一個月造報不能稍有遲逾茲查丙午綱自光緒三十二年閏四月十二日開辦截至光緒三十三年三月十一日爲一綱限滿卽應截數造報惟上年淮北因災缺產綜計三場收鹽不過四五分除撥歸江運暨滌來全官運外正綱票鹽運壩不及三成前次借運東鹽六十萬包本歸東省包運接准部電以東省海嘯指定各場鹽引多被沖沒僅能認借三十萬包其餘三十萬包行令另行設法而東省道遠運艱卽認定之三十萬包節經電催趨運至今尙未運足復又轉借南鹽三十萬包急濟壩銷現距奏限不及三月屈計丙午綱未銷鹽數尙有七成卽使臘春銷市大旺斷難全數售清查光緒十年前督臣曾國荃因存鹽積壓奏請將庚辰綱奏銷展緩三個月造報有案本屆北鹺因災缺產借運鄰鹽又復重遭海嘯天時

交厄實與尋常情銷不力者情形不同據兩淮鹽運使撥案詳請具奏前來合無仰懇

天恩俯准將淮北丙午綱銷鹽例限展緩三個月造報由臣督飭印委各員竭力運銷以副綱額除咨部查照外謹附片具陳伏乞聖鑒訓示謹

奏

曹匪竄徐痛剿聚殲摺

奏爲山東曹匪大股竄至徐州沛縣經官軍痛剿聚殲詳細情形恭摺具陳仰祈

聖鑒事竊臣等於光緒三十二年十二月十九日據署徐州鎮總兵楊幕時署徐州道袁世廉電稟曹匪大股竄徐經官軍痛剿聚殲當將大概情形電請軍機大臣代奏二十日恭讀電傳

諭旨端方陳夔龍蔭昌等電奏悉仍著嚴飭隨時防緝以靖地方
欽此欽遵轉飭遵辦在案查徐州府豐沛銅碭各屬與山東曹州
府鄆城鉅野各縣壤地相接風氣素強又值上年水災饑民衆多
深虞不靖自曹匪蠢動經臣等電飭徐州鎮道抽調駐徐馬步隊
卽日馳往邊境嚴防竄越並飭署徐州鎮楊慕時親巡邊境仍慮
兵力太單商由臣蔭昌就近選派兩營委標統石佳華率往防禦
仍飭由署徐州道袁世廉會同布置嗣因東省剿捕得力餘匪四
竄豐縣銅山等處時有匪蹤迭經地方文武拏獲收訊並准山東
撫臣楊士驥派隊赴邊同時逐捕臣等懷遵
諭旨嚴飭扼要堵截加意安撫饑民時防煽脅十二月十五日曹
匪大股由山東滕縣竄踞沛縣之卞莊寨地方標統石佳華率隊
往剿擒獲匪首卞其爲等多名餘匪竄至沛縣城西三十餘里之

張樓該標統追至邢孤堆遇匪迎擊有匪股三百餘人持快槍抬礮佔據該莊樓房三座有持土槍者百餘人據該莊墻垣開槍轟放勢甚兇悍我軍攻擊至酉奪得樓房一座時值雨雪交加督兵力戰未卻十六日巳刻又奪樓房一座並獲外著補服內著操衣之匪首陳振山一名由署沛縣知縣陶瑞徵提訊據供鉅野縣人因傷重卽行正法是日申刻我軍全隊猛撲且擬挖濠逼樓匪知不敵將樓房縱火自焚復經槍斃匪首王九一名悍黨二三十名生擒五十一名餘匪焚斃不計其數並奪獲槍刀四十餘件戰馬七匹我軍共陣亡七名受傷二十一名臣等伏查此次曹匪大股竄至徐境據樓鏖戰極爲兇猛設使官軍稍卻勢且蔓延該標統石佳華督隊圍攻相持至兩日一夜之久奮勇痛剿匪衆聚斃署徐州鎮楊慕時署徐州道袁世廉調度有方相與殄此羣醜聲威

所播此後東匪庶不敢輕犯徐界實於江北大局關繫匪淺現准山東撫臣楊士驤派員來徐與該處文武會商聯絡嗣後匪警兩省軍隊約明不分畛域各准越界追拏務盡餘孽仍由臣等嚴飭該鎮道等加意籌防隨時巡緝以期地方靖謐仰慰

宸廑除候將傷亡兵丁查明撫卹擒獲各匪訊明嚴辦另行奏報外所有山東曹匪大股竄至徐州沛縣經官軍痛剿聚殲詳細情形謹合詞恭摺具陳伏乞

皇太后

皇上聖鑒謹

奏

旗地預備陸軍建設中學摺

奏爲擇定江寧駐防旗地預備陸軍部建設中學堂之用謹將辦

理情形恭摺具陳仰祈

聖鑒事竊前准練兵處咨行會同兵部奏定陸軍學堂辦法第七條內有由練兵處兵部會同在直隸湖北陝西江蘇分設由第一至第四陸軍中學堂四所第四中學堂收江蘇江西浙江福建廣東暨駐防各小學堂畢業生等語查各省陸軍小學堂已於光緒三十一年次第舉辦江寧省城應設陸軍中學一所以備江蘇江西浙江福建廣東各省陸軍小學卒業生升入教授之所前由教練處詳經前署督臣周馥將江西浙江等省陸軍小學堂課程分別咨查所有陸軍中學自應由部按照奏定章程酌籌辦理惟學堂需用地基必須先爲勘定以免臨時購買查得明故宮迤北附近一帶地方面積宏敞可敷建造且與陸軍小學及將備學堂練兵場工程營左右毗連以之建設陸軍中學地勢最爲合宜惟其

中有老花園菖蒲塘等處多係駐防旗營地界舍此又復別無相當地址當經派員履勘公同商酌事關經武必須得地興工將老花園菖蒲塘兩處旗地全行撥歸陸軍中學之用原有旗民房產給價購買飭令遷移毋俾失所除咨陸軍部查照外所有擇定江寧駐防旗營地段預備陸軍部建設中學緣由謹合詞恭摺具陳伏乞

皇太后

皇上聖鑒謹

奏

籌撥駐防學堂及習藝局經費摺

奏爲籌撥江寧駐防學堂及習藝局經費以資教養而持久遠恭摺具陳仰祈

聖鑒事竊查光緒三十年七月前江寧將軍臣永隆興辦八旗各學堂並創立習藝局與前督臣魏光燾籌商於江寧銅圓盈餘項下每年津貼銀一萬四千四百兩以爲常年經費由該將軍具摺奏報是年十月臣在署督任內復於蘇州銅圓餘利項下加撥銀六千兩專爲旗營擴充學堂振興工藝之用亦經附片陳明各在案三十二年秋間臣到任後派員考察學務江寧駐防所設之開通學堂一所清文學堂一所高初小學堂八所女學堂一所習藝局一所均已粗具規模隨即與前江寧將軍臣誠勳切實籌商會同札飭江寧提學使陳伯陶選派甄明教育之員爲該中學堂監督兼各小學堂總稽查以冀改良進步日起有功至習藝局事宜亦卽認真整頓使資質稚魯不能入學堂者專執一業以免流於游惰惟此項經費全恃銅圓餘利以資挹注現蘇省銅圓停鑄寧

局亦限制數目所出無多兼之銅質翔貴餘利寢微遂至無從支
應若不設法另籌何以作人才而重根本伏查京口駐防學堂經
費業經臣會同江蘇巡撫臣陳夔龍奏明在於江海鎮江兩關道
庫籌撥銀一萬六千兩作正開銷在案江寧駐防事同一律未便
獨令偏枯且學堂較京口爲多習藝局亦擬漸次推廣綜計款項
極力撙節每歲非二萬金不能支持再四籌維擬由臣飭令兩淮
鹽運使趙濱彥江海關道瑞澂在於該司道庫按年各籌撥銀一
萬兩以爲該駐防學堂及習藝局常年經費作正開銷庶幾勉力
措拄不致輟廢半途總期兵盡知書人趨實業以仰副

朝廷眷念八旗興學勸工之至意除咨度支部學部備案外所有
籌撥江寧駐防各學堂及習藝局經費緣由理合會同江蘇巡撫
臣陳夔龍恭摺具

奏伏乞

皇太后

皇上聖鑒訓示謹

奏

浚浦經費分派認解摺

光緒三十三年二月

奏爲修浚黃浦工程應需經費分派寧蘇兩屬認解數目請作正開支以濟要需恭摺具陳仰祈

聖鑒事竊查修浚黃浦工程議歸中國自辦歲需全費銀四十六萬兩光緒三十年間准戶部電撥寧蘇銅圓餘利其時臣在蘇撫任內經前督臣魏光燾往返電商蘇省財力困難銅圓餘利無多惟浚浦經費最關要需不得不勉爲分任以重公約擬蘇省每年認籌一半銀二十三萬兩由江海關在蘇省各司局應解賠款內

撥出十萬下餘十三萬無論如何爲難分派各司局竭力湊足其餘一半銀二十三萬兩請分撥各省協濟會電戶部復准照辦卽經議定寧蘇兩屬各認籌銀六萬五千兩寧屬之款分飭江藩司淮運司各歲籌銀一萬九百兩江糧道金陵釐捐局江南籌防局金陵支應局各歲籌銀一萬八百兩共合六萬五千兩之數均自三十年分起在正款內照數籌解俟將來銅圓餘利有款卽行撥還歸墊蘇屬之款自三十年分起至三十一年歲底止均由蘇藩司在蘇屬銅圓盈餘款內按數撥解嗣因銅圓停鑄餘利無着自三十二年分起改由江海關歲籌銀一萬七千四百兩蘇藩司鎮江關各歲籌銀一萬三千兩蘇省牙釐局蘇糧道各歲籌銀一萬八百兩共合六萬五千兩統於正款內設法勻撥以重要工業據各該司道關局按年照數籌解尙無貽誤應請作正開支所有修

浚黃浦經費蘇省認籌一半銀二十三萬兩除於賠款勻撥十萬兩外其餘十三萬先後分派各司道關局撥解濟用緣由除咨外務部度支部農工商部查照外理合會同江蘇巡撫臣陳夔龍恭摺具陳伏乞

皇太后

皇上聖鑒敕部查照施行謹

奏

胞弟補授郎中謝

恩摺

光緒三十三年二月

奏爲叩謝

天恩恭摺仰祈

聖鑒事竊臣接胞弟端緒家電二月二十二日禮部帶領引

見奉

旨補授禮部郎中臣接閱之下感激莫名伏念臣胞弟端緒早廁膠庠素無學殖制科

召試濫邀

拔擢之榮祠部從公謬玷清華之選茲復渥承

恩命實授儀曹容臺忝南省之清班郎官廁太微之星位考文典禮當故實之諮詢伏省含香分秩宗之職掌臣惟有勛其勤求時制益勵修名師李翱之清標法休源之獨誦少儀澄澹倖叨簪祿之殊施同氣騫騰勉副衣冠之盛事所有微臣感激下忱謹恭摺叩

謝天恩伏乞

皇太后

皇上聖鑒謹

奏

華僑助賑請獎片 光緒三十三年二月

再上年安徽鳳潁泗等屬被水成災民情困苦冬賑春撫需款浩繁當經派委江蘇候補道李宗棠馳赴日本高麗會同領事設法勸募在案茲據駐韓總領事馬廷亮申稱皖北素號瘠區拯濟至爲迫切若待李宗棠來韓再行商辦深恐緩不濟急先經勸諭漢城官商捐集日金一千八百九十八元仁川官商捐集日金一千八百四十三元元山官商捐集日金一千零陸元交由李宗棠彙解皖北充賑等情呈請奏獎前來 臣等查士民捐助賑銀至千兩以上者例准請

旨建坊今該華商僑寓鄰邦不忘祖國各湊集日金一千數百圓實屬急公好義裨益災區所捐日金核與建坊定例相符合無仰

懇

天恩俯准將寓韓漢城華商總會仁川中華會館元山華商公會一律自行建坊給予樂善好施字樣以昭激勸謹合詞附片具陳伏祈

聖鑒訓示謹

奏

遴充留學生監督摺

光緒三十三年三月

奏爲江鄂兩省歐洲留學生監督關係緊要擬遴員接充以資整頓恭摺具陳仰祈

聖鑒事竊各省派往歐洲英法德比各國留學生惟江鄂兩省最占多數前經臣之洞暨前署兩江督臣周馥先後檄委候選道員吳宗濂充江鄂兩省留學生監督凡在英法德比四國學生悉歸

該員管理現查吳宗濂已由比國參贊奉

命兼權使事其留學生監督一差亟應遴員接替伏查江鄂兩省留歐學生人數既多其奮志向學者固不乏人亦慮品詣未能齊一此時德性問學之淺深卽關他日國力人才之消長與其考核於學成之日不若策勵於就學之初監督有稽查約束之責至關緊要必其學術資望足以表率學生而後崇德辨惑可以收齊整嚴肅之效江鄂兩省候補道員中頗難其選惟查有江蘇淮揚海道蒯光典學術淹通識力沈毅堪膺監督之任臣端方與臣之洞皆知之有素往返電商意見相同合無仰懇天恩准令江蘇淮揚海道蒯光典開缺前往歐洲接充江鄂兩省留學生監督俾收實效如蒙俞允其監督辦事章程應如何切實釐訂當飭該員隨時稟承駐

使并電稟臣等斟酌施行遇有緊要事宜仍由臣等咨商學部核奪再准揚海道員缺例應由外揀補俟蒯光典奉

旨開缺當由臣端方揀員請補除咨吏學二部外所有遴員接充歐洲留學生監督緣由謹合詞恭摺具陳伏乞

皇太后

皇上聖鑒謹

奏

率屬攤捐助賑摺

光緒三十三年三月

奏爲江北春賑款絀謹率屬籌捐先行借用公款分年攤還以濟急需恭摺仰祈

聖鑒事竊維江北徐淮海十三州縣地方被災之重籌款之艱經臣等累疏續陳

崇而思改入奏高

卷上

六十三

聖聽渥荷

天恩發帑截漕並

敕部撥款接濟

皇仁浩蕩曠古稀聞臣等疆寄濫膺沈災未澹撫綏無術夙夜滋

慙臣端方抵任後卽將寧蘇皖三藩司應解總督養廉按月全數

充振臣夔龍亦捐助廉銀二千兩並飭將臣等署中供差員弁暨

寧蘇各局所員司薪水概予提捐振款一成仍苦杯水車薪無補

毫末現值開辦春賑災區印委各員飛電催款急於星火所有原

籌各款久已用罄無存雖經奏准代收免保留省兩項捐款而甫

經勸辦尙未收有成數正在萬分爲難之際據調署常鎮通海道

榮恆稟稱該關缺分尙堪勉力報効擬先於徵存稅項內動借銀

十萬兩由道不分正署每年攤還一萬按十年歸款稍濟賑需請

奏明立案等情臣等當以該員公忠體國心存康濟首倡攤捐批示嘉許仍通飭各司道一體量力攤捐並由臣端方於總督署公費項下提捐銀十萬兩臣夔龍於巡撫養廉項下提捐銀四萬兩先行移款濟用均分十年勻攤藉以表率同僚稍竭壤流之助茲據江寧藩司繼昌江蘇藩司陳啟泰各稟認捐銀二萬兩兩淮鹽運司趙濱彥蘇松太道瑞澂各稟認捐銀十萬兩調署江南鹽巡道朱恩紱稟認捐銀四萬兩江安糧道譚啟宇徐州道袁世廉江西廣饒九南道文炳會同前署道汪瑞閩各稟認捐銀二萬兩江蘇糧道陸鍾琦稟認捐銀一萬兩助濟江北災賑又安徽藩司馮煦稟認捐銀二萬兩分助江北皖北災賑各銀一萬兩又署徽寧池太廣道楊奎綬稟認捐銀二萬兩鳳穎六泗道玉山稟認捐銀一萬兩復因皖災需款之急無異江北經臣端方與安徽撫臣恩

銘會商將楊奎綬玉山捐款撥歸皖賑應用以上統計臣等與各司道共認江北春賑捐款銀六十萬兩皖北春賑捐款銀四萬兩均先於司道各庫正雜款內分別藉支濟急應自光緒三十三年正月初一日起不分正署代理各按十年勻攤歸款據該司道等先後稟請奏咨立案前來伏查江省徐海淮安各屬以及安徽皖北地方災深款絀久勞

聖廬該司道等體念時艱爭先捐助洵屬力顧大局目前春賑急迫懸釜待炊百計搜羅智盡能索暫挪公款濟用仍各分年如數攤還於庫款並無出入而於賑務裨助良多應如所請奏明立案以資遵守所有臣等率同司道分認攤捐助賑緣由謹會同安徽巡撫臣恩銘合詞恭摺具陳伏乞

皇太后

皇上聖鑒訓示謹

奏

聖諭廣訓卷之八

五

端忠敏公奏稿卷七終

端忠敏公奏稿卷八

江西萍匪肅清摺

奏爲江西萍匪肅清地方安謐恭摺具陳仰祈

聖鑒事竊照光緒三十二年十月間萍鄉縣境與湘省交界地方突有匪徒蠢動擾及宜春萬載等縣勢甚披猖經前撫臣吳重熹節次調兵往勦並臣端方遵

旨派兵與鄂軍分投赴援暨臣瑞良抵任後續辦各匪以及督飭舉辦清鄉一切事宜疊經臣等撮要隨時電奏在案現在匪患已平人心大定謹將辦理情形縷晰陳之伏查湘贛連界各屬近年因米糧昂貴生計維艱人心不免浮動而游勇痞棍時復往來其間習知長江一帶洪江會匪歌訣卽立爲會名散賣票布誘惑鄉愚以爲誑騙錢財之計其無知良民誤謂入會可保身家亦不免

投身入黨湖南醴陵匪首有李經其者爲巨端方前在湖南巡撫任內拏獲正法之馬福益死黨常游蕩於瀏陽醴陵等處曾與萍鄉上栗市之匪首饒有壽龍人傑萬載之龍定往還糾合姜守旦龔春台沈益古胡有堂呂光華廖淑保等欲爲馬福益復仇適有游學日本暑假回籍之蔡紹南乘間以革命演說李經其等遂假以爲名自稱爲革命軍原約上年十二月間起事軍分三股一踞瀏陽以進窺長沙一踞萍鄉之安源礦路以爲根據之地一由萬載東竄瑞州南昌諸郡援應長江以軍械無多未敢遽發事爲瀏陽縣知縣所聞會營追捕李經其落水溺死其黨與饒有壽等乃促令姜龔兩匪先期竊發曾函致安源著匪蕭克昌令率工黨六千人以應蕭以動非其時未之允許而湘贛邊境羣不逞之徒乃各號召附和一時湘贛接壤之境徧地皆匪遠近相傳動稱數萬

此該匪起事之情形也其時贛邊營勇僅有紮上栗市者兩哨湘邊瀏陽醴陵兩境防營亦未調齊匪卽先擾瀏陽之麻石文家市金剛頭繼擾萍鄉之高家台上栗市桐木後竄入宜春之慈化等處適吉安巡防隊左軍統領袁坦巡察至萍鄉經前撫臣吳重熹電飭督率原駐萍鄉安源之巡防左軍前營管帶胡應龍迎勦調撥駐袁州之巡防左軍後營管帶朱鼎炎帶隊馳往會勦兼飭該縣會紳多招團練以資保衛並由省派常備軍一標第三營管帶劉清泰率全營兵隊取道臨江袁州原駐新昌縣之常備軍一標第二營管帶董作泉率隊二百人取道瑞州上高萬載分途趨程前赴萍鄉特委巡防內河水師右軍統領候補道張季煜督辦防勦派出各軍均歸節制俾一事權一面電飭駐吉安之中左各營拔駐袁州聽候調遣並電商湖南撫臣岑春煇派軍乘輪舟至醴

立見每入一季和
陵瀏陽會勦當匪踞各處之初並未肆行劫掠所至祇索軍械糧食白布等項所劫殺者聞係向有仇怨之家匪皆白布裹頭白衣白旗號衣書革命軍先鋒後營及後軍前營等字樣旗書革命軍及洪福齊天等字樣匪械有刀有小手槍有擡槍鳥槍間有來福毛瑟等洋槍內有遊勇陣隊亦仿洋操到處張貼偽示糾人入會語甚悖逆正勦辦間接奉電

旨飭臬司秦炳直前往萍鄉堵勦遵飭該司帶常備軍一標第二營三百人卽以該標統劉槐森領之於十月二十八日起程直趨萬載宜春一路十一月初七日行抵萍鄉駐紮籌辦此前撫臣征調布置及匪黨竄擾之情形也該匪初起勢日猖獗所到之處脅民爲匪雲集響應未至之處謠言四布人心惶惶尤慮勾引安源礦工聯絡聲勢十月二十一日有匪三千餘人聚上栗市該處防

營以半營抵禦斃匪二名衆寡不敵兵力小挫厥後匪之竄入慈化者焚燬黃圃巡檢衙署經駐金瑞巡防左軍後營趙春芳帶隊迎勦斃匪數名擒獲李明生熊明球二名正法匪始退入桐木又經由吉安調駐之右營管帶許登雲率帶兵隊在宜春縣屬全瑞慈化一帶進勦斃匪多名其在上栗市者經巡防隊左軍前後兩營合力攻擊歷兩時之久斃匪二百餘名奪獲匪械旗幟甚多匪勢爲之一挫又在普安山桐木兩次合勦匪益不支全將裹頭白布拉去充作民人或竄匿山谷之中或回瀏陽境內羣集於牛山嶺紅綾鋪等處湘軍亦屢次得捷而匪之聚於文家永和等市者燄猶未衰探知萍鄉有備遂并力以圖萬載賴有已撥新昌防營二百人秦炳直所帶劉槐森部下兵三百人均從此路同赴前敵得以遏其來路時臣端方遵

旨派陸軍步隊三營馬隊輜重隊各一隊礮隊工程隊各一隊共二千餘人委第九鎮統制徐紹楨爲司令官率同標統艾忠琦等乘輪赴九江易舟至省其第一隊由南昌先行進發民間爭傳大兵將到羣匪震聳遂竄伏於瀏陽一隅經長沙續到常備軍兩營搜勦匪乃靡然四散其潰匪有竄入義甯州銅鼓廳一帶者由該州縣會同巡防隊左軍左營李國斌常備軍二標二營袁楚英截獲二十餘名於是贛境已無成股之匪此迭次勦辦之實在情形也方匪勢之正熾也偵探匪情頗注意於安源煤礦袁坦督巡防隊前營分一半至案山關搜勦以一半留駐礦地勢雖岌岌而逐日工作未停湖南撫臣岑春煊就近派管帶李振鴻帶隊九十人來駐安源保礦而湖廣督臣張之洞派第八鎮協統王得勝標統李襄鄰率步隊三營礮隊一隊先於十一月初三日抵萍另派步

隊礮隊各一隊專駐安源合之甯軍之陸續到萍者兵力頓厚先是前撫臣吳重熹接直隸督臣袁世凱密函謂蕭克昌爲匪中頭目近投安源營中充線黨與甚多當以該匪既與礦工聲氣相通辦理稍有不密必至有礙礦務牽動全局遂密告臬司秦炳直相機拏辦迨甯鄂軍到足資鎮懾該臬司卽密商礦局道員林志熙會同王得勝李襄鄰並督飭胡應龍設法捕獲蕭克昌斬之去一渠魁人心大定復將在礦工人切實稽查各具保結無保者退百餘人分別送回原籍以杜後患又據獲匪供稱該匪自接仗敗後巨目如陳紹莊以傷重抬回不知存亡先後拏獲之贛匪大頭目如饒有壽龍人傑沈益古胡有堂廖淑保魏宗全等二十餘名皆起意肇亂抗拒言兵罪惡昭著訊據供認不諱均於軍前正法其小頭目及得受僞職各匪訊明伏法者約近百人其情罪較輕分

別予限監禁者亦八十餘人雖姜守且等因追捕嚴緊竄往平江逸去現仍飭令懸賞購緝並將演說革命之蔡佐南一體嚴拏而數月以來鄂軍紮湘之邊境甯軍紮贛之邊境深得協同搜捕之力此安礦保護無恙疊獲著匪之各情形也惟是匪雖潰散其零星之匪潛匿他邑深恐死灰復燃十一月初十日徐紹楨到贛吳重憲以南昌九江營伍抽調過多甚形空虛商留寧軍一營駐省以資兼顧並囑撥分兵隊至義寧州銅鼓廳查有匪蹤卽行會勦其開赴萍鄉之兵隊隨時與贛軍實力搜捕曾由甯軍拏獲著名匪黨陳詳友劉先珍張公紹王俊騏李昌谷李昌年等分別懲辦當秦炳直未到萍鄉之際由張季煜分飭各管帶連合鄉團嚴拏匪首免治脅從遇有聚集之區立即痛勦並親率兩隊出案山關沿途搜索又由袁坦分飭前營回駐安源分防蘆溪一帶後營駐

桐木分防秋江陽岐山黃土左營駐上栗市分防案山關中營兩
哨分防清溪溜江張季煜親往上栗市相機策應秦炳直以萍地
兵力已厚慮萬載兵單爲匪所乘調派劉槐森前往株潭黃茅堵
勦兼派董作泉分紮黃茅慈化等處購線緝匪所有袁州府屬之
萍鄉宜春萬載等縣均與瀏陽接壤該地方文武各員疊與湘省
營縣商同勦辦以防此拏彼竄此各軍分投防堵搜勦之情形也
至秦炳直駐萍鄉以來體察地方情形匪已潰散謂治亂之道宜
寬嚴互用一以查拏解散爲主因剴切曉諭將匪徒區分三等凡
句引拜會焚掠劫殺者爲頭等特懸重賞緝拏其一時附和而平
日非甘心從逆者爲次等准其引拏首要立功贖罪無功仍按律
嚴辦若僅被誘脅入會並未爲匪者爲三等准其繳銷票布禱神
誓悔取具團族保結給予護照回家安業並卽酌定清鄉章程及

嚴禁煙賭等條刊發各營縣紳耆等飭令切實遵辦一面知會湖南醴陵瀏陽等縣同時並舉各清各鄉張季煜卽駐萍鄉宜春萬載三縣適中之地訪查糾察俾該縣等不得操切以圖功亦不許因循而貽患歷三閱月而清鄉始竣其間徐紹楨於上年十二月因甯軍各營有需商辦整頓之事經臣端方飭先回甯其督率軍隊及協同清鄉等事卽責成標統艾忠琦接辦嗣因清鄉大致就緒戶冊亦將造成臬司秦炳直以省署積牘已多亟待清理經臣等於正月十八日據情電陳欽奉電

旨准其回省仍留張季煜駐萍料理現在各處清鄉一律辦竣民情安堵各軍陸續撤回張季煜攜帶清鄉冊籍業經回省鄂軍尙有一營暫駐安源礦地亦極安靜此辦理善後之情形也伏思此次匪亂凶燄鴟張逆謀狡譎始志頗思一逞雖尙無深固巢穴快

利槍械惟軍以革命爲名意圖煽惑響應去冬臣端方拏獲匪黨
袁有升楊卓林等訊據供稱係由逆匪孫汶暗中勾結儻或日久
未平潛濟精械爲患何堪設想仰賴

聖上威福各軍將士效命得以指日撲滅掃蕩妖氛所有在事出
力文武各員不無微勞足錄可否仰懇

天恩准其分別保獎之處出自逾格

鴻施除分咨軍機處陸軍部查照暨湘境軍務應由湖廣督臣湖
南撫臣另行奏報外所有辦理萍鄉匪案贛境肅清情形謹合詞
恭摺具陳伏祈

皇太后

皇上聖鑒訓示再此摺係臣瑞良主稿合併陳明謹
奏

撥銀改建駐防校舍營房摺

再江南建造陸軍中學堂擇用駐防旗地一案業經臣方會同將軍臣誠勳恭摺具奏查該地內本有旗營常備軍營房一所本年另建新營原議以舊營房改作開通中學校舍現在既經劃歸陸軍中學所有營房校舍自應另行籌建惟另建房屋需款亦復不貲現由將軍臣誠勳咨商臣方設法籌撥查江安糧道漕折項下除湊撥賠款等項外每年尚有盈餘雖係儘數解部之款第校舍營房事關整軍興學非尋常支用可比部文原係儘數撥解本無一定數目擬卽在於此項內動撥銀貳萬兩作爲江甯駐防改建校舍營房之用除咨部外謹附片具陳伏乞

聖鑒謹

奏

趕借南鹽濟銷片

再上年江北水災海州分司所屬板浦中正臨興三場產鹽缺乏
經前署督臣周馥援案奏准借買東鹽六十萬包合北鹽十五萬
引以濟銷市原議由淮商與東商直接購運每包一百十二觔連
運費約須銀肆錢有奇嗣經該商等議定由東省各灘各島包運
至海州臨洪口交收照東省庫砵秤每一百觔價銀柒錢定立條
款咨部查照在案十一月接准部電以山東海嘯灘地淹沒借買
之鹽祇能勉運三十萬包其餘三十萬包行令設法另籌等因維
時已在冬月下旬東商包運之鹽僅到一萬五千餘包而原定之
數又復驟短一半轉瞬封凍深恐有誤岸銷情勢迫切東商遂於
此時因收買海鹽島鹽輪船火車展轉駁運每包自柒錢增價至
壹兩肆錢貳兩不等淮商迫於銷市不得不急求速運並由運司

籌議趕借南鹽三十萬包預防海口封凍東鹽運不足數之患幸於年內東鹽亦運到二十七萬九千餘包惟核計成本較重票販思暫提壩價以取償於湖販湖販又思暫提關價以轉償於豫皖兩販第關價過昂鄰私必乘虛侵灌殊於岸銷有礙近日正陽關銷市頗滯南鹽到關引岸不合尙須配成搭銷除嚴飭運司督飭正陽局員海州分司酌平關價壩價以顧岸銷外所有上年奏借東鹽六十萬包僅運一半並趕借南鹽濟銷情形理合附片陳明伏乞

聖鑒謹

奏

織呢廠請立案片

光緒三十三年三月

再據職商樊棻葉璋丁維藩熊定保等稟稱竊見近年風氣轉移

氈呢銷路愈推愈廣利源外溢不可勝計北省如甯夏歸化城張家口等處素產羊毛駝毛南省如湖州新市石門塘棲等處亦產羊毛每年輸出外洋者約三百餘萬担各國取我產料織成氈呢還銷我國邇來日本東京大阪千住諸處振興絨業日有進步所用中國毛料幾與澳洲相匹日政府又特免輸入稅以獎勵之料本既輕加以織工精美故中國氈呢銷場之廣日盛一日洋商獲利甚厚北省近已有華商溥利萬益各公司集股開辦而南省氈呢銷場較北省實相倍蓰若不速籌自織徒使外貨灌入漫無底止實爲絕大漏卮職商等現擬集股伍拾萬兩開辦之初先收一半資本銀貳拾伍萬兩遵照部定有限公司章程卽在上海南市建設日輝織呢商廠購辦機器自運湖州羊毛織造氈呢並公舉候補四品京堂鄭孝胥爲總理以期商業發達收回利權公懇

奏咨立案並擬具集股開辦章程前來臣伏查自中外通商以來洋商機製貨品精益求精往往取用中國材料還以輸之中國土貨轉爲所擁擠利益頗難挽回近年朝廷重視商政屢奉

明詔以振興工商實業爲要旨是正賴各省紳商實力實心提倡工藝庶幾中國商務漸有起色今該職商等聯合同志籌集鉅款設廠購機織呢既可挽外溢之漏卮尤足供華人之服用益國便民無逾於此擬請准予立案以示維持除將擬呈章程咨送農工商部查照並飭該職商等切實籌辦隨時報查外謹附片陳明伏乞

聖鑒謹

奏

推廣上海華界巡警摺 光緒三十三年三月

奏爲上海華界巡警關係重要謹陳籌辦推廣情形並請援案開支經費恭摺仰祈

聖鑒事竊維上海爲通商要口中外僑民日多匪類卽因而溷跡租界有工部局巡警保護華界則一無戒備經前署督臣周馥會同江蘇撫臣陳夔龍具奏於華界添設巡警五百名營制餉章照南北洋巡警章程辦理每年應需餉銀叁萬數千兩在關稅內動支彙報將來如仍不敷分布再由官紳商民另行設法籌辦非萬不得已不敢再請動支稅款奉部核准在案茲查上海華界日見發達南市而外現議更闢北市地段旣廣匪徒尤多邇來上海寶山交界處所及浦東地方劫奪橫行肆無忌憚中外咸有戒心若不亟圖挽救誠恐養癰貽患漸致蔓延不獨華界居民不能安堵

卽租界亦必波及殊非實力保護外人之道現除認真推廣巡警別無善策况此舉爲內治根本早經欽奉

明詔飭各省普設巡警是內地尙須廣辦何况上海係江海要衝華洋商民財產甲於他埠尤不得不設法保護計出萬全現以上海情形而論原定添設巡警五百名萬萬不敷分布經臣督飭江海關道將華界設巡事宜切實籌辦約計按段分區周歷勘定凡未經設巡之處固應補辦完全卽已經設巡之處亦應組織周密核其人數必須再行添募二千名左右每年約需增籌餉銀拾餘萬兩值此時艱款絀經費固不易籌然有備無患古有明徵與其貽焦頭爛額之譏不如爲曲突徙薪之計時勢所迫誠屬萬不得已惟餉銀較鉅除關稅外別無他款可籌幸近年江海關稅收較前暢旺尙可勉籌濟應前項餉銀擬請撥案每月在關稅內撥銀

壹萬兩充作巡警經費仍飭照章造冊按年報部核銷經費既充辦事自有把握至治法而外尤貴治人關道身任地方固屬責無旁貸惟開辦之始頭緒萬端加以關務殷繁兼顧必難周到亟應遴派明幹之員相助爲理以資得力查有江西候補道汪瑞闈任事實心不辭勞怨業經臣另片奏請將該員改歸江蘇補用擬卽派往上海責成專辦巡警事宜隨時會同關道妥籌商辦按照南洋巡警章程參以該處情形稍爲變通酌定辦法期於因地制宜以下各員先由江甯選派巡官及畢業學生交該員等量才委用巡士人等卽就上海原設警察學堂學生分派站崗一面續招訓練竭意經營庶幾警力漸充該匪黨等知犯法必無倖免將始而革面者且繼而革心需費雖多獲益甚大合無仰懇

天恩俯念上海治安關係中外全局准如所請敕部施行地方幸

立見每月之利
甚大局幸甚除咨部查照外所有籌辦上海推廣巡警情形並請
援案開支經費各緣由謹會同江蘇巡撫臣陳夔龍恭摺具陳伏
乞

皇太后

皇上聖鑒訓示謹

奏

密陳上海整頓警務片

光緒三十三年三月

再上海地方各國設有工部局自上次推廣租界以來得步進步
日肆覬覦近時時侵及界外設捕收捐漫無限制屢煩辨論未戢
貪心往往以我警政不修匪徒遍布恐有害治安爲言越俎代謀
其勢力範圍愈推愈廣應付爲難若不保衛萬全斷非空言所能
堅拒臣熟權利害前雖奏准添設巡警五百名按段分巡斷不敷

用且外人見我因陋就簡有名無實彼既得所藉口必更從而生心於大局深有關礙現擬推廣巡警揆時度勢實屬萬不得已之舉但能經費充足即可放手大辦將來辦有成效不獨匪徒斂跡化莠爲良實於保守主權維持交涉之中隱受無形之利益抑更有進者查日本昔與各國通商亦有租界復於租界四圍均闢爲雜居地仿照租界章程由本國自辦務求更勝於租界外人如願與本國人雜居則一律享受保護之益故當租界未廢以先旅居外人均暗歸管理不啻已放棄其治外法權此日人用心之巧深可取法中國此時欲與外人雜居求其受治於我誠未易言然上海租界商旅薈萃幾無隙地可容彼之設謀推廣租界意正爲此今華界開闢日廣治理之法必先從整頓巡警入手警務果能完善自不難百廢具舉外人擴充商務不遺餘力若見我商場一切

規制權利與彼無異今之託詞以求逞者後安知不降心以相從迨至彼既示我以雜居之意我乃相機因應所謂暗中放棄其治外法權者久之或可辦到一反觀對鏡間此舉若再不實行則外逼內訌彼之權力日以伸我之權力日以縮各國咸謂英人目的日思變上海爲香港誠非過論臣見聞既確智策俱窮用敢竭千慮一得之愚密陳至計摺中不便宣言恐一經傳播外人知我用意必且設法阻撓此片懇請邀免發抄以防漏洩無任感荷屏營之至謹附片密陳伏乞

聖鑒謹

奏

僑商助賑請獎摺

光緒三十三年四月

奏爲旅日紳商捐助皖北賑款籲懇

恩准給獎建坊恭摺仰祈

聖鑒事竊上年皖北地方災情奇重賑款支絀經臣等分別派員勸辦紳富捐輸並以海外華僑夙多義舉遴委江蘇候補道員李宗棠馳赴日本高麗一帶勸集華商捐款並咨請出使大臣設法籌勸各埠華商深知皖省災重捐款頗爲踴躍茲准出使日本大臣楊樞咨稱橫濱紳商會紀傑曾紀標奉其母鄭氏命捐助日幣貳千圓神戶紳商吳作鏞捐助日幣伍千圓麥瑞圖捐助日幣貳千圓查紳民捐款至千兩以上者例得奏請

恩准建坊旌獎該華商等捐助日幣銀數折合華銀皆在千兩以上咨請援例奏獎等情臣等查旅日紳商關懷祖國慨輸巨款裨益賑需與建坊之例相符自應奏懇

聖恩准將該紳商會紀傑曾紀標之母鄭氏暨吳作鏞麥瑞圖各

予獎給樂善好施字樣由該紳商等自行建坊以昭激勸謹合詞
恭摺具陳伏乞

皇太后

皇上聖鑒謹

奏

瓷器公司立案片

光緒三十三年四月

再據候選道曾鑄等呈稱竊查江西景德鎮瓷器公司原擬官商
合辦承辦之人屢易至今未有切實辦法去年江西候補道李嘉
德來滬集股與上海道瑞澂晤商念該公司不如改歸商辦較有
把握該員等商同擔任發起定名為商辦江西瓷業有限公司議
集股本銀貳拾萬圓每股伍圓計四萬股由發起人分認一萬五
千股俟批准後再行承集二萬五千股該員等設立公司仿造外

瓷多用機器與原有瓷器事難一律請遵部定湖北機器製麻照向章機器製造各貨辦法酌定廠稅凡有公司出口之貨完納正稅一道沿途概免重征若在江西內地零銷納稅定值百抽五之率一經完納即可照驗放行請咨明稅務處察核辦理並公懇奏明立案等情正在核辦間接准稅務處咨稱准農工商部咨同前因查機器仿造洋貨准照值百抽五完一出口正稅沿途免予重征歷經外務部及本處辦理在案今該公司既係用機器仿造外瓷自與原有瓷品不同應准其製成貨物無論運銷何處祇按值百抽五完一出口正稅沿途關卡驗明確係該公司用機器仿造西式之貨即予放行不再征收各項釐稅將來中英新約第八款施行即應照第九節完一出廠稅章程辦理咨行查照等因前來臣伏查東西洋各國最重商廠故其政府凡遇設立公司必力

爲提倡且有由國家出補助費者其稅則亦無抽收本國貨物出口之條蓋以公司設立既可存養多數之貧民又可增加若干之廠稅是公家重視公司誠爲根本至計今該道等自行集股設立江西商辦瓷業公司多用機器仿造外瓷洵足振興實業挽回利權將來此項瓷品行銷稅則既經稅務處核准統令完一值百抽五正稅沿途概免重征俟中英新約第八款施行再按照第九節出廠稅章程辦理自係爲提倡商業起見亟應准如所請奏明立案以示維持而昭激勸除分咨農工商部稅務處查照外謹會同江西巡撫臣瑞良附片具陳伏乞

聖鑒謹

奏

籌設暨南學堂片

光緒三十三年四月

再前因爪島僑民請派學生來甯就學業經附片具陳在案茲據南洋各島視學員學部專門司行走舉人董鴻禕等護送爪哇華僑學生二十一人到甯查該學生等流寓遠方不忘中土情殷內渡志極可嘉惟該生等初回內地語言驟難合一應選派教習補習國文國語及各項科學一年再行考驗程度查詢志願分送各學堂肄業且聞內嚮方殷來者日衆非爲特闢一校不足以敷教育而繫僑情當飭署江甯提學使陳伯陶差調直隸候補道王崇烈照料一切並籌撥經費擇度校舍延訂教習分科教授派員管理統合畫一名曰暨南學堂所有常年支用各款現飭由江海關籌撥樽節動用將來實用若干再行造報作正開銷除咨部查照外謹附片具陳伏乞

聖鑒謹

奏

請給和比領事寶星片

光緒三十三年四月

再據江海關道瑞澂稟稱竊照各國領事奉派來華辦理交涉事宜如能裨益中外大局准由關道查明照章詳請

奏給寶星歷經照辦茲查和國總領事阿福柯在滬已逾五年比國副領事范璧屋利曾署過總領事在滬將及四年遇事均能恪守約章和衷共濟現俱回國擬請照章奏獎寶星以示優異等情前來臣查上海各國領事任事期滿交卸領事篆務回國均由關道查明如在任時果能恪守約章辦事公允歷准聲請具奏獎給寶星有案今該領事等交卸回國業經該關道查明請獎合無仰懇

天恩俯准將和總領事阿福柯比副領事范璧屋利兩員均給予

三等第一寶星以昭激勸除咨外務部查照外謹附片具陳伏乞
聖鑒訓示謹

奏

籌撥復旦公學經費摺

光緒三十三年四月

奏爲籌撥復旦公學常年經費謹將辦理情形恭摺具陳仰祈
聖鑒事竊維各種科學以歐美爲至精游學之士以能直接聽講
爲至要查上海復旦公學自光緒三十一年八月開校係考取中
學較深之學生以英文教授高等普通科學使能直入歐洲專門
大學爲宗旨經前署督臣周馥撥銀壹萬兩以爲開辦經費本年
二月該公學幹事員葉景萊張桂辛等稟稱開校以來學者日衆
藉收學費勉力支持惟各科皆用西文教授教員薪水歲需貳萬
數千圓伙食雜用亦近貳萬圓之譜除收膳學費外尙不敷貳萬

數千圓而甲班教習亟須添聘西人尙未列入預算表內稟請撥給常年經費等情當由臣派江蘇候補道夏敬觀會同寧學司所派課員桂埴前往該校逐件詳查茲據覆稱連日在該公學參觀教授考驗所用課本皆係英文取徑直捷成就高尙實爲現在言高等教育者惟一之辦法學生共一百七十五人分爲甲乙丙丁戊五班戊班又分甲乙級所授科學有已過高等普通程度者惟教習未能延聘西人學科不能極臻完備又專以英文程度爲高下各班科學致不能齊是須詳審教科嚴定班次添聘教習大加整理膳學兩費每月約收洋壹千柒百伍拾圓紳商捐助無多經費不敷甚鉅倘蒙歲給官款貳萬兩則可增延西員廣招學生庶成立一完全學校其校舍係假用提督署管理衛生皆不合法前在吳淞口撥給官地若興工建築約需洋拾萬圓等語伏查往歲

各省派遣學生游學歐美大半先在校外預備英文耗費財力殊屬可惜若使英文全通高等普通畢業再行送往歐美直入專門大學可收事半功倍之效該公學開校兩年辦理尙爲合法據呈各班教科所用書目皆係英文課本若再改良進步成績必有可觀查有候選道嚴復淹貫中西學識閎達已派充該公學監督管理教授一切由其主持現在江南財政支絀異常建築校舍力有未逮至於常年經費爲養成游學人材起見不能不勉籌的款力任其難已飭財政局每月籌撥銀壹千肆百兩作正開銷仍當由

臣隨時督飭認真辦理以期日起有功無負

聖朝興學育材之至意除咨明度支部學部查照外所有籌撥復旦公學常年經費緣由謹會同江蘇巡撫臣陳夔龍恭摺具陳伏乞

皇太后

皇上聖鑒訓示謹

奏

籌撥中國公學經費摺

光緒三十三年四月

奏爲籌撥中國公學常年經費謹將辦理情形恭摺具陳仰祈
聖鑒事竊惟專門絕業須取資於外洋普通學識必養成於本國
環球各邦未有以普通中學留學於他國者蓋普通學識所以陶
鑄羣材使人人有愛國之心而裕他日治事之根柢者也查上海
中國公學自光緒三十二年二月由日本留學生劉棣英等稟請
在滬開辦並懇撥給經費經前署督臣周馥行前兩江學務處及
上海道酌核妥議在案十一月間據該公學幹事員留日學生張
邦傑王敬芳等稟稱生等自去冬由日歸國鑒於我國留東學生

流品不一士氣囂張亟思救弊補偏挽回積習糾合同志建立公學爲全國游學之預備高等大學之階梯嚴課品行注重德育開辦以來各省來滬入校者絡繹不絕究爲經費校舍所限不能再事擴充七月間具呈學部蒙批褒獎現在辦法約有兩端一則擴張規模一則維持現狀稟請籌集建築鉅款指撥常年經費等情當由^臣派江蘇候補道夏敬觀會同寧學司所派課員桂埴前往該校詳細調查茲據覆稱該公學學生凡三百十八人業經逾額計設高等普通預科二班中學普通四班師範速成一班理化專修一班其意注重完全高等普通專爲直入東西洋大學高等學而設雖師範理化兩班不無欲速之弊然其教授管理嚴肅整齊極能得自治之精神守純一之宗旨惟膳學兩費約收叁萬圓紳商常捐約壹千柒百圓不敷在貳萬圓之譜儻蒙照數籌給便可

措置裕如其校舍現係租用月費不貲光線空氣皆不合法若能集資建築不獨節省租金並於衛生有益等情查學部片奏內載嗣後京外派遣游學生無論官費私費皆應切實考驗性行純謹具有中學堂畢業程度通習外國文字能直入高等專門學堂者始予給咨又准學部電開預備游學之學堂或獨設或合籌應請察酌會商辦理各等語該公學宗旨辦法皆與相合所呈課程各表雖須稍事改良然使整理得人必可日臻進步查有候補四品京堂鄭孝胥學識開明博通中外已照會爲該公學監督主持一切其建築校舍之費現因財力不給一時未能代籌至於常年經費不能不設法維持爲養成游學人材之計已飭財政局每月籌撥銀壹千兩作正開銷仍由臣隨時考察督率辦理總期欸不虛糜學皆有備以仰副

朝廷廣學儲材之至意除咨度支部學部查照外所有籌撥中國
公學常年經費緣由謹會同江蘇巡撫臣陳夔龍恭摺具奏伏乞
皇太后

皇上聖鑒訓示謹

奏

勦辦海州匪徒酌保員弁摺

奏爲海州匪徒乘災煽亂調兵勦辦一律救平謹將在事出力各
員遵

旨擇尤保獎恭摺具陳仰祈

聖鑒事竊海州地方東瀕大海北接山東俗悍民貧夙稱盜藪外
來幫匪亦時出沒其間上年夏秋間淫雨成災人心不靖匪徒乘
機嘯聚輒敢張立僞號迫脅饑民裹巾起事分股焚劫村落數十

家東鄉聚至千餘人西鄉亦數百人八月下旬前署督臣周馥准海州官紳連電告急調撥清江步隊兩營馳往勦辦臣端方抵任後查悉匪勢甚張擄船守口列械拒敵所搶米石平價售給饑民意圖要結復挨村勒派助餉闖境驚惶當卽電商臣蔭昌加派步隊兩營馬隊四棚衛隊六棚前往助勦連前調兩營及駐海緝私營隊統歸參謀官候補都司鄒玉春督率調遣飭令會同淮北緝私營統領前總兵李定明署海州直隸州知州汪樹堂相機勦辦合力兜拿並以陸路兵力既厚慮該匪等劫船入海電飭海籌兵輪開往雲台山一帶嚴密巡緝當將布置情形電奏並聲明土匪乘災煽亂恐釀巨患在事文武員弁如能異常出力迅速撲滅請准給獎荷蒙

恩准在案旋據汪樹堂鄒玉春等電稟拿獲著名匪目潘步嶺綽

號大刀王並潘步俊潘步和等供認焚燒房屋槍斃營兵又據電稟續獲東鄉匪目耿祝三孫寶善莊四簍徐香仁雍玉貞孫耀田王小矮子等七名供認入會拜盟持槍糾衆迭次擄人搶糧均卽電飭就地正法又續獲狀類瘋狂羣推爲首之朱念祖飭令監候質訊自經痛勦匪蹤竄散其被脅附和呈繳槍械取保釋放者約近百人地方漸就安謐兵輪已飭回防以上情形復經臣等兩次電奏在案惟查此次海匪倡亂各鄉響應實有悍目爲之指揮已獲之朱念祖特以狂疾妄言爲該匪等假以惑衆尙非真正匪首當經訪明東鄉匪衆以嚴步恆爲之魁西鄉匪衆以趙小桂爲之魁該兩匪一日在逃地方仍難安枕自非渠魁授首不得遽稱事竣曾於電奏中略陳梗概奉旨飭令嚴緝嚴步恆等欽遵轉飭文武各員勒限獲案務盡根株

並訪知嚴步恆逃匿常州一帶飛飭下游營縣分投偵捕據統帶太湖水師前副將歐陽成祥稟稱所部弁兵帶同眼線於常州地方拿獲匪首嚴步恆解蘇由臣夔龍發交蘇州府知府何剛德審訊供認因江北水災起意糾衆搶富濟貧黨羽四五百人隨聲附和者約近千人搶過張殿臣等富戶三家連搶中小戶數十家並槍斃官兵及被拿放槍拒捕不諱其朱念祖一犯解蘇質訊據嚴步恆供稱向不相識該府察看朱念祖實有瘋疾卽經批飭將嚴步恆正法朱念祖一犯再行研訊另稟核辦又據李定明汪樹堂稟稱派弁於宿遷縣新家店地方拿獲匪首趙小桂搜出快槍小刀黨羽名摺上寫悖逆字樣訊據供認爲首糾黨豎旗飲盟立軍師元帥僞號自稱爲匪以來共殺五十餘人搶劫多案不諱又續據稟稱西鄉匪目王連喜與趙小桂聲勢相倚犯案纍纍經該員

等派勇緝於睢寧縣蔡家集地方拿獲供認係青幫頭目收徒五十餘人糾衆搶殺不諱該匪犯趙小桂王連喜均於拿案時由該印委先行電稟經臣等電飭就地正法以寒匪胆此外復據署江寧城守營都司米占元稟獲嚴步恆餘黨張廷榮等六名飭交江甯府訊取確供另稟核辦海州地方自迭獲巨匪城鄉一律安靜饑民領賑歸耕均無失所堪以仰慰

宸廑據該統將等查明出力員弁開單請獎前來臣等伏念海匪嘯聚之初臣端方與臣蔭昌甫經受任臣夔龍遠在蘇垣其時流亡遍地誘脅堪虞近則曹匪之鈎連遠則萍鄉之風鶴兵隊以備分而力薄民間或一夕而數驚倘勦辦稍遲亂民與饑民混合不特賑務無從措手且將以一隅掣動大局其勢岌岌幸在事各員異常奮勇撲滅甚速渠魁悍目次第就擒無一得漏網者尤足以

快人心而昭炯戒該員弁等奔馳半載著有勞勩自應查照前奏懇予獎敘該統將等原開員數稍多復經臣等從嚴核減現在擬保各員委係實在出力並無冒濫合無仰懇

天恩俯准照擬給獎出自

逾格鴻慈除應保千把各員由臣等咨部給獎外所有海州勦匪事竣並出力員弁懇予給獎緣由謹繕單合詞恭摺具陳伏乞皇太后

皇上聖鑒訓示謹

奏

江北工賑平糶辦理完竣摺

光緒三十三年四月

奏爲江北工賑平糶各事現已一律辦理完竣謹將籌辦情形恭摺縷陳仰祈

聖鑒事竊照江北徐海淮安各屬春振及修疏河道隄工將次就緒情形節經據實電奏在案茲據各屬官紳先後稟稱春振補振已經一律放完各處河道部隄民埝等工亦已分別告竣糧價減落二麥豐收災民感戴

聖恩歡忻鼓舞等情稟請奏報前來溯查去年夏秋之際大水爲災徐海淮安所屬之銅山邳州宿遷蕭縣睢寧山陽安東清河桃源阜寧海州沭陽贛榆十三州縣一片汪洋幾同澤國九月以前各州縣視爲例災並未上緊籌辦振撫甚且諱災匿報希圖照舊開徵淮海等處伏莽素多以致海州匪徒蠢動聚衆滋擾臣端方到任加派營隊先靖地方并委員馳往會辦振務無如災區過廣戶口衆多一時難以查竣饑民紛紛外出鬻集清江亦有散往揚州江寧鎮江等處者流離載道慘不忍言臣等因署淮揚海道丁

葆元未能得力將其撤換委楊文鼎前往接署督率趕辦冬振兼辦清江留養並委兩淮鹽運使趙濱彥督辦揚州留養江甯藩司繼昌調署鹽巡道朱恩紱督辦江寧省城留養另委江蘇候補道朱宜振會同調署常鎮通海道榮恆督辦鎮江留養撥給款項飭令廣搭棚廠安集災黎以免散至四方爲急則治標之計一面將玩視民瘼之府縣擇尤參革耳目一新始咸知振作綜計留養災民以清江爲最多共有四十九萬餘口奸宄雜處良莠不齊深慮別滋禍患楊文鼎督率員弁殫力經營一月之間將四十餘萬災民全數費遣回籍辦理妥速實非始料所及其間有義紳唐錫晉曾爲安東教職與民狎習赴浦協同遣散頗資得力此外揚州留養災民六萬餘人江寧五萬三千餘人鎮江二萬二千餘人均於本年正月經趙濱彥繼昌朱恩紱榮恆督率地方印委優給口糧

遣送到浦由楊文鼎派員設局接收分別送回原籍就振沿途安
靜並未逗遛居民亦無驚擾此各處辦理資遣留養之實在情形
也各屬冬振災民戶口先經委員會同地方官清查正散振間適
值駐滬商約大臣呂海寰盛宣懷認籌錢壹百萬串選派妥紳來
放義振係令隨查隨放甚爲簡捷兼可杜絕一切弊端且查派來
各紳熟習振務人亦樸實耐勞遂與呂海寰盛宣懷商明將所有
官發振款飭交該紳等查照義振章程一併核實散放仍由地方
官委員監視照料呂海寰盛宣懷與_臣等籌商振務電音日必數
至公忠誠懇籌畫周詳江北振務賴以漸臻就緒截至本年正月
冬振一律辦完官義合放共用錢貳百餘萬串惟自正月以至麥
秋凡四閱月爲日甚長春振尤關緊要遂責成義紳將各屬戶口
切實復查其睢寧桃源沭陽義紳不甚得力電商呂海寰盛宣懷

撤換另派接辦各義紳昕夕查放勞瘁不辭其有請增撥振款者函電交馳往往聲淚俱下而睢寧之劉鍾琳邳州之劉康遐銅山之吳憲奎蕭縣之韓景珪贛榆之胡春澤最爲得力劉鍾琳吳憲奎並能各自募捐以輔官款所不逮韓景珪兼辦碭山振務井井有條悉臻妥協綜計海州等十三州縣春振官義合放共用錢叁百餘萬串蓋以去冬次貧之戶交春已成極貧又以各處資遣回籍飢民及由山東安徽等省聞振歸來爲數尤衆是以比較冬振錢數加增此外如徐屬之碭山豐縣淮屬之鹽城揚州之寶應江寧之上江句溧常州之陽湖宜荊蘇州之常昭等縣或受有偏災或與災區毘連民情困苦均經撥給振款並就近籌捐動用積穀擇貧散給其江都丹徒交界各沙洲亦有被災之處已酌籌款項與商約大臣呂海寰盛宣懷所籌之義振一併散放並在清河沐

陽海州贛榆桃源等處設廠施粥由官籌撥米糧辦至麥熟爲止其餘如施散棉衣收當牛隻散給穀種酌發醫藥通飭典商減讓農具息錢等事隨時次第舉行徐州五屬收養幼孩一萬有奇現在振務辦竣有家屬者飭令領歸無家屬者籌款留養並經徐州道袁世廉設法開辦孤寒學堂窮民習藝所清江地方經楊文鼎設立學藝所收養年幼無依子女以宏教育春振放畢臣等仰體朝廷德意深恐查放稍有遺漏復飭官紳各就地方情形或酌加補振或設局當地總期實惠及民不使一夫失所至山陽桃源藉振滋鬧海州假造振票誑騙災民各犯情節較重均飭就地懲處其誘拐子女販賣漁利之匪徒嚴飭地方官實力查拏並派得力營弁分投偵緝已拏獲十數起分別審辦子女給親完聚一面電奏請將情節較重罪干斬決之圍戶仿照湖北省奏定章程就地

正法此籌辦各屬振撫及一切善後之實在情形也江北地方素鮮蓋藏自前年米糧弛禁儲蓄久空大災之後糧價奇昂人心惶懼岌岌不可終日且各處災民所領振款均係錢文若有錢無處購糧勢將坐困臣等督飭司道設法騰挪息借商款派員先赴燕湖鎮江等處購米數十萬石分撥災區開辦平糶清江海州兩處設局轉運水陸並進力求迅速復於近省採辦番芋糠粍運往救急又派員赴奉天山東直隸購辦高糧玉米豆餅源源接濟旋復籌借款項赴四川採辦米石分批運回卽遠至貴州之貴陽鎮遠一帶亦商請購運米穀接濟一面在於各屬多設平糶局減價出售使災民領錢一千可暗抵一千數百文之用民食無虞缺乏行店不致抬價居奇卽次貧之家亦復隱受其惠茲據各屬稟報二麥漸已登場收成七八分不等旬日之間糧價大跌幾減春初十

分之三現查各處糶局雜糧餘存三四萬石川米餘存二三萬石日久恐致霉變已飭減價一律銷售如有折耗將來歸入振務一併報銷此籌辦米糧平糶之實在情形也上年大水運河堤岸冲刷殘缺者甚多瞬屆伏汛必須預爲修築以禦盛漲業飭楊文鼎派員確切勘估自上游宿遷下迄江都瓜埠一帶擇要加培迎溜頂灣添鑲掃壩其揚州車南新三壩工程則飭隄工局道員何亮標修整鞏固六塘河爲宿遷安東桃源清河沭陽海州各屬宣洩要區年久失修一遇盛漲泛濫爲害飭派在籍紳士前山東東昌府知府魏家驊會同楊文鼎分段估修辦理甚爲核實海州沭陽贛榆各河工亦分別派員會同地方官督率紳董擇要挑疏並派在籍紳士安徽候補道許鼎霖爲總查俾臻周妥徐屬境內民埝工程由袁世廉派員辦理又江寧省城水西門外過覓渡橋至漢

西門外止河道淤淺派委朱恩紱督率委員開濬深通此外如山陽清河安東等處境內支河關係農水利均經酌給津貼並動用積穀挑辦不敷之款由地方官勸諭紳商捐資濟用並由華洋義振會捐助麵粉在工平糶亦可爲振務之補助現據稟報運河隄工六塘河工次第蒞事業經派員驗收伏秋大汛可資抵禦其餘各工均已一律完竣此籌辦各屬工程藉以代振之實在情形也竊念江北此次沈災爲近數十年來所僅見災區之廣災情之重較之光緒二十三年湖北宜施之災二十六年秦晉之災有過之無不及臣端方到任之初正值災民紛紛四出振務毫無端倪兼之海州土匪及山東曹匪先後滋擾擊獲革命匪黨復有勾結飢民響應萍匪之供人心惶惶謠言四起綜計各處災民不下二三百萬設被煽惑滋事大局何堪設想是以臣等迭次陳奏均請

以廣籌振撫安定人心爲主欽奉電傳

諭旨辦理尙屬妥協欽此無如庫款奇絀挪借俱窮危迫萬分不得已屢作發棠之請幸蒙

皇太后

皇上聖德如天周恤民隱凡所瀆陳靡不上邀

俞允

鴻慈優渥曠代無儔又賴樞部維持於內呂海寰盛宣懷援助於外楊文鼎袁世廉等布置周妥紳士許鼎霖魏家驊劉鍾琳及各義紳印委人等辦事實心卒能使各處匪亂次第肅清數百萬待斃之災黎重登衽席咸慶更生事後追思猶覺爲之心悸現在地方安謐二麥次第登場所種雜糧亦皆滋長如果雨暘應時秋收可望豐稔民間元氣漸復堪以仰慰

宸廑至辦振得力之員以及勸募振捐集有鉅款者前經奏明懇恩從優獎勵在案茲工振一律辦竣自應將最爲出力之員擇尤保獎以昭激勸除用過工振各款分別開單另行奏報外所有江北振務辦理完竣地方一律安謐緣由謹合詞恭摺縷陳伏祈

皇太后

皇上聖鑒訓示謹

奏

裁撤提塘另行設局摺

奏爲提塘疲玩誤公擬請援案裁撤另行設局辦理恭摺具陳仰祈

聖鑒事竊查江南駐京提塘經管文報凡各部院與江南來往文件皆歸接遞例有開支乃該提塘並不妥爲經理於緊要公文輒

敢任意積壓去年臣端方抵任後如撥補鹽釐部文壓閣至六十日之久此外部文到寧遲至四五十日者更僕難數良由提塘一差積玩已久所用書手類多展轉僱替莫可究詰查直隸提塘因壓閣公文經督臣袁世凱查明奏請將提塘裁撤另設文報局奉旨照准有案江南提塘玩誤情形與直隸無異擬合援案請將江南提塘卽行裁撤仿照直隸辦法由臣等派員駐京設立江南文報局此後各部院與臣等衙門來往公文除向歸驛遞者仍循舊辦理外其餘公文均交文報局接收隨到隨送以期捷速各衙門如向有規費者並予革除如蒙
俞允俟立局後分咨各衙門查照辦理所有援案請裁提塘另行設局緣由謹合詞恭摺具陳伏乞
皇太后

欽定大清會典事例

皇上聖鑒訓示謹

奏

采辦黔米濟賑片

再江北被災各屬儲峙久虛自以籌運米糧爲賑務第一要著而江海接壤之地米價同時騰踊紛紛遏糶去年冬臣訪知黔省鎮遠地方爲產米之區以運費併計仍較鄰省價廉當卽電商貴州撫臣龐鴻書代購萬石鎮遠灘河阻滯運道維艱龐鴻書深知蘇省需米孔殷力顧大局設法分路採購連日接電已陸續運至湖南岳州由臣派員赴岳轉運東下經過之湘鄂等省經臣分別電商均念江北災重米缺允免稅釐俾賑款少一宗支銷卽可多救無算生命所有采辦黔米濟賑緣由謹附片陳明伏乞

聖鑒謹

奏

上海填河築路闢門片

光緒三十三年五月

再據蘇松太道瑞澂詳據上海縣紳耆士商曹驥等稟城垣之設原所以衛民道路之修原所以便民然僅有衛民之具而不求便民之方則地方終嫌閉滯紳等世居上海西人互市以前城廂街道窄狹居民安於儉樸以步當車原無所謂馬路及至互市以後洋人經營租界開築馬路數十里內車馬馳驟四通八達商市日見繁盛始覺毗連之城相形見絀於是數年前有馬路工程局之設而築沿浦馬路一條去歲總工程局復在城內築路數條遂覺眼界一新然欲與城外交通則非添闢城門並將現有之城門放大不可伏查上海本祇六門同治初年添闢新北一門迄今該門以內市面日盛此爲闢門有效之明證今擬於道署東轅門東首

城根開闢一門名曰新東門守府署西首城根開闢一門名曰新西門九畝地大境北首城根開闢一門名曰小西門福佑路東首城根開闢一門名曰小北門又在外城根築造馬路一周並將城內不通之淤河填築馬路其原有之小東門及新北門加寬加高以便車馬往來紳等詢謀僉同都人士亦無異議繪具圖說呈祈轉詳如荷准行卽當籌措經費陸續興辦以期地方益增繁盛實於

國計民生均有裨益等情由該道轉請奏咨立案前來臣復加察核該紳耆士商等所議填河築路闢門各層辦法均爲地方公益起見自應准其照辦除咨部外理合會同江蘇巡撫臣陳夔龍附片具奏伏乞

聖鑒訓示勅部立案施行謹

奏

講武堂支撥經費片

光緒三十三年五月

再南洋新軍甫成一鎮臣抵任後奏准添練混成一協漸次擴充成鎮選派各級軍官需才孔急而察看第九鎮軍官程度高下不齊有由外國畢業者有由本省外省學堂選用者當時以急於成軍不得不稍寬其格所學既有淺深卽於命令指揮教科內務未能翕然一致自非規定軍官教育不足收整齊畫一之效應卽遵照奏定陸軍學堂章程設立講武堂一所以爲各將校討論兵學觀摩切磋之地兼爲續練成鎮各級軍官之預備經臣派委督練公所會辦總參議舒清阿爲總辦議定規則參仿北洋辦法分立研究所補習所教導隊三部責令認真講習期於軍事前途日益

完備惟建堂籌款非易而開辦不容稍遲現暫假昭忠祠開堂辦理期於速成所需開辦經費先行撥銀壹千兩修葺屋宇其應用品物續撥添辦以資應用至每年經費除活支應臨時核定外所有常支之欸飭據核明每月需銀貳千陸百餘兩已飭財政局按月支撥事關軍學應請作正開銷謹附片具陳伏乞

聖鑒訓示謹

奏

謝賞 御筆畫扇等件摺

奏爲叩謝

天恩恭摺仰祈

聖鑒事竊 臣於光緒三十三年五月 日齋摺差弁旋寧奉到

慈禧端佑康頤昭豫莊誠壽恭欽獻崇熙皇太后

恩賞

御筆畫扇一柄麻紗實地紗袍褂料共四卷當卽恭設香案望

闕叩頭祇領伏念臣忝膺疆寄無補時艱際梅夏之方炎喜麥秋

之大熟猥蒙

溫綸下賁

寵賚便蕃製勝松栢仰

聖藻而

丹青丕煥

榮頒荃葛被

慈恩而華袞同褒渥荷

鴻施莫名鼇戴臣惟有勉勤匡濟冀效涓埃奉揚蔭暍之

皇仁益勵冰華之素操瞻

崑崙思改八公卷高

卷八

二十九

外是每乃三月和

五明於

舜陛敬賡

阜財解愠之章邁什襲於齊紈愧乏疊雪含風之詠所有臣感激榮幸下忱謹恭摺叩謝

天恩伏乞

皇太后

皇上聖鑒謹

奏

親貴出洋等款仍懇截留漕折摺

奏爲親貴出洋等款無可籌撥仍懇准將部撥漕折銀兩截留動用恭摺瀝陳仰祈

聖鑒事竊上年十二月初三日准度支部咨議覆臣奏部撥漕折

運費銀兩懇將親貴出洋等費仍准截留動撥以濟要需一摺內稱此項漕折運費既經專案奏明按年解備恩賞津貼要需未便任令該省挪作別用况

恩賞一項現又有翰林院都察院等衙門津貼尤不能不恃此款以爲挹注該督請將親貴出洋北京巡警黃浦工費學堂經費機器新廠等項支欸在於江安糧道庫欸截留動撥之處應毋庸議十一月十九日奉

旨依議欽此欽遵咨行前來伏查近年江南財政異常支絀江安道庫出款逐漸加增如親貴出洋等項類皆額支的款全賴漕倉兩項酌籌動給前經臣縷晰

奏陳在案上年江北水災辦賑籌防綜計不下數百萬挪移墊用庫儲一空如遵照部議將漕折銀兩儘數解部則各項新政勢將

束手在部臣統籌全局指撥款項動關要需誠未能專顧一隅而臣忝膺疆寄酌劑盈虛新政所關尤應先事籌維免滋貽誤查親貴出洋經費以備考查政治北京巡警費所以拱衛京畿學堂經費爲造士之資黃浦工費爲利民之用上海機器局添設新廠經費將以擴張武備尤爲近今要圖凡此數端皆在需用孔亟之時亦不僅爲自顧江南之計但使別有挹注豈肯令部臣獨任其難無如蘇省近日竭蹶情形久蒙聖明洞鑒惟有仰懇

天恩飭下度支部准將親貴出洋等費柒萬叁千捌百兩仍在漕米折價運費項下動撥以濟要需而免貽誤其餘銀兩除奏准動撥及湊抵賠款外儘數解部專備撥充恩賞津貼銀兩於部臣初議亦復不相妨礙出自

鴻施逾格所有親貴出洋等款無可籌撥仍懇准將部撥漕折銀兩截留動用緣由謹恭摺具

奏伏乞

皇太后

皇上聖鑒訓示謹

奏

請補河務道員摺

奏爲揀員請補河務道員要缺以重職守恭摺具陳仰祈

聖鑒事竊查淮揚海道兼按察使銜蒯光典業經

奏請開缺管理歐洲各國留學生監督事務光緒三十三年四月

十六日奉

硃批著照所請該部知道欽此應以奉

旨後第五日行文按江蘇省限減半計算扣至五月十五日作爲
接到部文開缺日期歸五月分截缺所遺員缺例應由外揀員請
補查准揚海河務兵備道一缺經管河湖工程分巡淮安揚州海
州等處地方復兼按察使銜事務極爲繁劇加以籌議導淮造端
閱大災稜之後民困未蘇經始善後事事均關緊要非精明幹練
熟悉河務地方情形之員不足以資治理臣等於通省候補道員
班內逐加遴選查有現署江蘇按察使遇缺題奏道朱之榛現年
六十八歲係浙江平湖縣廕生於咸豐四年報捐候選通判同治
三年承廕以知州用加捐同知分發江蘇補用補授蘇州府總捕
同知歷次海運案內遞保以道員在任候補光緒五年開同知缺
以道員候補八月赴部驗放覆奏堪以照例用奉
旨依議十月二十一日回省年滿甄別經前督撫臣會奏以繁缺

留省補用又因光緒四年海運出力奉

旨以道員遇缺題奏二十八年蒙

恩賞給頭品頂戴現委署理臬司篆務臣等查該員志量閎遠處事精詳服官蘇省四十餘年先後委署臬司篆務十一次藩司糧道篆務各一次其操履篤實持躬廉正疊經中外臣工交章論薦久在

聖明洞鑒之中二十五年委辦蘇省清賦事宜剔弊除奸任勞任怨歲增銀米合計伍拾餘萬兩三十年臣方在署蘇撫任內以該員於各州縣情形體察無遺委令辦理擠荒約計增收貳拾餘萬兩庫款有增鄉民無擾尤見才大心細成績可觀綜計在蘇歷任差缺疊膺艱鉅均能措置裕如資望之深通省道員無與倫比且係河員世家於淮揚河工情形最爲熟悉以之請補淮揚海道員

缺人地實在相需與例亦屬符合本年二月臣等以徐州道員缺緊要奏請以候補道袁世廉補授奉

硃批著照所請吏部知道欽此今淮揚海道員缺事務更形繁要合無仰懇

天恩俯准以江蘇遇缺題奏道朱之榛補授淮揚海河務兵備道兼按察使銜員缺實於河工地方均有裨益如蒙

俞允仍照河工道員例試署一年期滿再請實授謹合詞恭摺具陳伏乞

皇太后

皇上聖鑒訓示謹

奏

請獎督辦賑務人員片

光緒三十三年五月

再前福建按察使楊文鼎上年十月間臣等以淮海災情奇重需員鎮撫奏委署理淮揚海道督辦振務維時江北各屬飢民紛紛南下留養清江浦者約五十萬人棚廠沿數十里疫癘譁諫種種堪虞且海州匪警方殷尤慮奸徒煽衆構釁情勢危迫該員獨任艱鉅殫心區畫布置悉協機宜一月之內將留養數十萬衆資遣完竣全活災黎無算大局轉危爲安江淮士民同聲感頌經臣等於奏報資遣完竣案內臚陳該員勞績請俟振務歲事開復臬司降調處分懇

恩優加擢用在案自去冬迄今該員督率所屬官紳籌辦冬春振撫購運平糶米糧修濬河堤兼營並舉其辦事條理精密綜覈尤嚴剔蠹懲姦不辭勞怨正月以來江甯鎮江揚州留養飢民數十萬送至清江亦由該員接收妥爲遣散一律安謐江北民風勁悍

此次災深款絀撫馭尤難臣等夙夜慄懼清江居南北之衝爲流民幫匪出沒之地乃自開辦振務以逮事竣半載有奇市廛不擾四境帖然不至以意外騷動上煩

宸厪實賴該員擘畫之功非臣等始願所及查該員起家州縣迭膺保薦歷練甚深仰蒙

特恩洊擢司道其才堪大用早在

聖明洞鑒之中此次辦理江北振務堅苦卓絕力果心精弭患無形厥功尤偉方今時局艱難得人爲亟該員才猷政績確有實效求之近今司道中洵屬不可多得用敢據實論薦合無仰懇天恩俯准將前福建按察使楊文鼎開復降調處分仍以臬司恭候

簡擢以獎賢能出自逾格

鴻施_臣等爲人才難得起見謹合詞附片具陳伏乞

聖鑒訓示謹

奏

考驗庫儲火藥片

光緒三十三年六月

再江南庫儲無煙火藥每值酷暑間有自焚之事上年閏四月間前署督_臣周馥曾派員督同日本火藥技師石藤豐太逐細查明設法防險並剔除年久變性之無煙藥一萬八千餘磅飭令裝入木桶棄置水中附片奏明在案本年四月間金陵城內華嚴岡庫又有火藥自燃情事幸在事員司勇役撲救得力尙未成災當飭財政局司道會同軍械局道員左念貽等將庫儲各藥切實考驗去後茲據詳稱華嚴岡庫儲各項無煙藥經會同詳細考驗分別等差查有滬造百磅大方無煙礮藥二千九百七十二磅又滬造

百磅大號卽大方無煙礮藥九百二十五磅又滬造百磅大條無煙礮藥五十磅又滬造十二磅小方無煙礮藥四千三百七十五磅以上四種共計八千三百二十二磅上年亦經石藤豐太考驗含酸變質當時因酸質尙輕故未報廢現在時逾一年酸味加重甚屬危險日前既有發火自燃之事值此天氣亢熱不可不思患預防擬請援照上次報廢成案將前項四種礮藥仿照西法裝入木桶棄置水中以免貽害此外尙有滬造百磅大條四十磅小方小號等藥共一萬三百十九磅驗得質性雖變酸味較輕請卽分發各礮台礮艦領作操練之用免再日久廢棄詳請奏咨立案等情前來臣覆核無異除批飭遵辦並咨部查照外謹附片陳明伏乞

聖鑒謹

奏

承襲世職請改文職片

再據江蘇儀徵縣知縣陳誠詳據襲裔吳樹榮稟稱係揚州府儀徵縣人祖父原任湖廣總督吳文鎔於咸豐四年在任勦賊陣亡奉

旨賜卹給騎都尉兼一雲騎尉世職襲次完時給予恩騎尉世襲罔替伯父養原父丙湘先後承襲病故所遺襲職例應樹榮接襲惟自幼讀書不諳武事情愿以文職改用等語查定例祇有恩騎尉世職准改文武生應試其騎都尉雲騎尉等項並無准改文職明文惟據該裔稟稱自幼讀書不諳武事自係實情據實聲明詳請奏咨核辦前來臣伏查原任湖廣總督吳文鎔起家詞館洊陟封圻咸豐三年由雲貴總督移湖廣時粵匪自下游犯田鎮水陸

營皆失利率師督勦進薄黃州力戰捐軀死事甚烈

優詔悼惜贈卹有加其蒞鄂未及半年方調故撫臣胡林翼率黔勇來楚會勦故大學士曾國藩時在衡陽治水軍馳書約夾攻擬俟二軍之至大舉滅賊倉卒趣戰齎志以終卒之胡林翼提一旅之師規復武漢勦伐爛然曾國藩將水陸東征殲除巨憝其規畫皆自該故督臣啟之該裔吳樹榮克守楹書質美悅學現當接襲世職經臣親加考驗見其安詳文秀實爲可造之材據稱自幼讀書不諳武事似宜量改文職俾得有以自效查成案武職廕生如係幼習詩書不諳弓箭皆於送部時聲明聽候錄用今該裔吳樹榮情事相同合無仰懇

天恩准將承襲騎都尉兼一雲騎尉世職吳樹榮以文職改用出自逾格

鴻施理合給咨送部帶領引

見恭候

欽定除將宗圖冊結咨部查照外謹會同江蘇巡撫臣陳夔龍附片具陳伏乞

聖鑒訓示謹

奏

敬舉人才摺

奏爲敬舉人才臚陳事實懇

恩破格擢用以濟時艱恭摺具陳仰祈

聖鑒事竊維時事日艱需材孔亟非學問才智具有兼長且於外交軍事實有閱歷者不足以勝艱鉅而覘成績查候補四品京堂鄭孝胥學術純深才識閎遠素爲已故督臣沈葆楨所賞拔招置

幕中與聞緒論前隨出使日本大臣李經方派充領事在東三年保護商民維持權利毅心敏腕中外推重嗣由考取中書改官江南歷辦洋務局差已故督臣劉坤一前署督臣張之洞遇事諮詢多所贊助時當蘆漢鐵路造端伊始復經張之洞委充駐漢總辦勘估建造用人悉秉大公洋匠局員咸樂爲盡力光緒二十九年該京堂奉

旨督辦廣西邊防經臣派湖北武建八營赴邊歸其調遣該京堂自抵龍州量水土之所宜與軍人之能事凡所規畫無不動合機宜在防三年各軍旣多資其援勦之功而當柳慶一帶匪勢猖獗之時卒以憚其軍威不敢進窺龍州一步三十年復添練武建新軍一營悉用土著以爲久遠之計龍州地方瘠苦復多瘴癘居民窘於生計行旅亦視爲畏途該京堂於整備軍實而外獨能通民

力利轉輸學堂醫院以次設立匪靖民蘇邊事遂以大定法人自諒山之役懲創經營近邊要隘悉置戍兵該京堂出鎮南關按對汛所在分布防守疆場之間悉奉約法嘗謂辦交涉視理直卽應爭先著放手自辦若事機落後則所得者僅矣皆閱歷有得之言方今時局艱危人才銷乏近見

朝廷破格用人遂多驚聲光以鈞名實臣不敢濫采虛聲致誤觀聽該京堂學識閎通於軍事外交均有經驗如能獲膺重寄必可匡濟時艱用敢臚陳事實上達

宸聰仰懇

天恩將候補四品京堂鄭孝胥破格擢用於大局實有裨益儻異時辦事不效臣甘受濫保之咎所有敬舉人才懇

恩破格擢用緣由謹恭摺具

奏伏乞

皇太后

皇上聖鑒謹

奏

甄核條陳代奏摺

奏爲遵

旨甄核條陳選錄代奏恭摺具陳仰祈

聖鑒事竊據安徽旌德縣廩貢生李鴻才呈稱伏讀五月二十八

日

上諭立憲之道全在上下同心內外一氣亟應博訪周諮集思廣益凡有實知所以預備之方施行之序者准各條舉以聞等因欽此凡在士庶無不歡欣不揣冒昧妄貢愚忱以期仰答

朝廷大開言路詢及芻蕘之盛意竊見憲政之基在弭隱患滿漢之界宜歸大同近者不逞之夫昌言革命悖逆狂謬鼓惑人心私放債票密運軍火勾結匪徒蠢然思動甚至戕殺大員擾亂治安設非措置得宜防查有法必至破壞不可收拾其害有難以勝言者推其致患之由則在藉辭滿漢欲弭此患莫若令滿漢大同消泯名稱渾融畛域明示天下無重滿輕漢之意並無以滿防漢之心見諸實事而不託諸空言事事合乎立憲宗旨人知

朝廷意旨之所在食毛踐土具有天良必不敢甘心從逆自罹法網矣謹就管見所及條舉數事如左

一滿漢刑律宜歸一致刑律者天下至公且平者也劃一之謂公不偏之謂平然律載旗人犯笞杖罪照數鞭責軍流徒免發遣分別枷號徒一年枷號二十日每等遞加五日軍罪亦如之至重者

不過九十日一則楮衣道路罪役期長一則略示薄懲安居鄉井顯生區別詎謂公平嗣後滿漢當同罪同罰以歸畫一有駐防之州縣概加理事銜其同知一併裁撤旗民案件務照平民歸地方官辦理庶無出入之嫌矣

一滿臣不宜稱奴才孔子曰君使臣以禮臣事君以忠孟子曰君之視臣如手足則臣視君如腹心古昔聖賢垂訓謂待臣以禮未聞待臣以奴視臣如手足未聞視臣如奴隸我

朝漢人官無論大小自稱則曰臣滿人雖以王公之貴均以奴才自稱伏查道光五年九月十二日奉

上諭向來督撫等奏摺有關地方公務例俱稱臣從前乾隆年間屢奉

聖諭通飭各省自應永遠欽遵近日各省奏摺不能畫一殊屬未

協嗣後各省旗員督撫藩臬除請安謝恩外凡奏事具摺一律稱臣以符體制欽此

聖訓煌煌尤宜欽遵今外人每譏我爲奴隸之國雖非專指乎此而此亦卽其因卽曰稱謂之間無關輕重然名者實之歸名不正則言不順顧名思義其謂之何故滿臣亦宜稱臣而不稱奴才一滿漢通婚宜切實推行英國三島相合則起於蘇格蘭之儲與倫敦公主結婚麥荊來挺生又始於斯克郎特族偕俄郎達族配偶混合血統最足化種族猜嫌故秦越之人肥瘠漠視通以二姓之好則休戚相關有出於不容已者滿漢通婚已奉明詔然行之者鮮聯合綦難多因禮節不同遂致推行不易擬請飭下禮部纂修通禮之時議定滿漢聯姻典禮務求其簡便易行而不偏倚於滿漢致有窒礙將見上行下效草野從風十年以後

滿漢姻婭遍於全國矣

一滿漢分缺宜行刪除向來部院官制分滿缺漢缺自改官制以來此例已廢而軍機爲樞要之地其章京滿漢分缺如故內閣翰林院乃清要之班其學士中書等官滿漢分缺如故他項官制業已全更何獨留此一二班階以存形迹嗣後軍機內閣翰林院應請一如各部院

簡放各缺不分滿漢則無畛域之見矣

一滿洲人士宜姓名並列東亞之人先姓而後名西歐之人先名而後姓未有列名字而無氏系者惟中國隸旗籍者率皆列名而不列姓雖由習慣終非大同今後列旗籍者亦應姓名並列如國姓則用愛新某某其他大族章佳馬佳諸氏亦稱章佳某某馬佳某某餘皆倣此適與漢人歐陽東方等雙姓相同矣其本係漢

姓者並用漢姓尤爲易泯形迹也

一纏足宜垂禁令滿漢顯分者爲漢女多纏足服式不同纏足陋俗已奉

明詔勸令官紳化導無如積習已深不垂爲禁令仍習而罔覺今使一命之官十歲以下幼女不准纏足違者罰金且不得受

封贈但使官爲民倡陋俗自易於革除不數年而風行全國矣

一京營宜改混成旗京營二十四旗向分滿洲蒙古漢軍三部不特滿漢顯分畛域卽滿蒙亦界限分明殊難爲大同表率應請改爲混成旗於正黃廂黃名稱之下編爲左右中三營不分滿蒙漢軍名目仍合二十四旗之制所有官缺不分滿蒙漢軍一體升轉一駐防與徵兵辦法宜歸一律各省駐防其無用與綠營相等又不能自營生業故生計艱難人才亦因而缺乏自今以後其教練

應與徵兵同若干年入伍若干年退伍退伍之後爲農爲工爲商一任其便有事則徵調之所有向日馬甲步甲諸名一律裁撤或發給恩餉一次聽其隨意居住自謀生理久之自有營生之計無需年費巨款矣

以上數則皆爲滿漢大同起見雖云補苴之術實與憲政攸關蘇氏曰天下無事則公卿之言輕於鴻毛天下有事則匹夫之言重於泰山非智有所不及明有所不察緩急之勢異也今當泯滿漢之畛域示天下以大同令悖逆之人無詞可藉弭無形之隱患正不定之人心大局安危實係於此生愚不知忌諱冒昧陳言敢乞選錄代奏不勝悚懼屏營之至等語臣詳加甄核該生所言尙能獨見其大雖措詞或未盡合而命意實爲可嘉用敢代爲陳奏上備

採擇所有遵

旨甄核條陳選錄代奏緣由謹恭摺具陳伏乞

皇太后

皇上聖鑒謹

奏

甄核條陳附奏片

光緒三十三年六月

再據該廩貢生李鴻才呈稱現值列強環伺虎視眈眈冀幸我有內亂得行其瓜分之計者非一日矣彼於逆黨明既保護之陰必利用之以區區亡命之徒而軍火價值動累鉅萬勾結會黨費亦不貲且有人爲之詭秘運送潛通消息竊恐其非以賄賂通他人直得他人資財之助也否則大宗軍火購運綦艱彼之軍械廠非秘密私廠而關吏船主又斷非一無聞見聽其秘密從事之人也

其有所恃而爲之不待智者而知之矣夫無故侵伐人國公法不容昔人有以外攻外之策彼則師其道而行之而以中國攻中國矣是豈有愛於逆黨而保護之哉直利用之耳蓋伺我有自毀自伐之機而陰行其策以坐收漁人之利且彼計亦狡矣其助逆黨也必得逆黨允許事成之後予以特別利權及我大局糜爛彼又將以強迫手段起而干涉藉口助平匪亂事定索我報酬兩得其利一無所失在彼則欲無不遂在我則禍不堪言推原其始皆由於逆黨藉詞滿漢肆意簧鼓無知之徒妄信其排滿邪說暗與勾連有以致之也苟使滿漢之界融合大同則逆黨無所假託以煽惑愚氓外族亦無所覬覦以利用逆黨矣等語臣覆加察核雖無過當之詞尙屬防微之論謹附片密陳伏乞

聖鑒謹

奏

獎勵賢能摺

奏爲知縣清理錢糧積弊革除洲課陋規懇

恩准予破格獎勵恭摺具陳仰祈

聖鑒事竊維吏治首在得人而賢能尤資激勵臣等於所屬僚吏其貪劣不職者業經隨時分別糾參其廉明幹練之材若不破格獎勵亦無以資董勸查有署江都縣知縣候補知縣袁國鈞歷膺繁劇頗著政聲上年秋間委署江都縣事該縣錢糧積弊甚深洲課陋規綦重胥役視爲利藪官吏習若故常上下相蒙牢不可破該員訪知利病毅然清釐將歷年中飽之款和盤托出計清出光緒三十一年秋勘案內浮報款緩漕蘆田上年除去被水款收實應加徵銀肆千貳百捌拾陸兩肆分肆釐米九百二十六石五斗

二升七合三十一一年奏銷案內另報漕蘆熟田民欠上年應加徵銀貳千玖百伍拾兩各業戶歷屆虛報坍江漕田三十二年應加徵銀貳千壹百肆拾貳兩米六百二十二石併將洲課陋規概行革除洵屬沈毅有爲清操拔俗平日復能殫心職守寬猛兼施辦理災民留養事宜尤爲有條不紊實爲牧令中不可多得之員亟應奏請優獎以勵賢能據江寧布政使繼昌詳請奏獎前來伏查江蘇吏治積疲中飽侵欺所在多有臣等現正督飭各屬認真釐剔核計此等款項爲數當不下累萬該員首先破除積習不爲利動風聲所樹觀感攸資如能上邀特恩量予拔擢必將羣知奮勉共礪廉隅儻仍有貪冒侵漁匿不舉報者一經查覺卽由臣等隨時嚴參似此懲勸兼施庶有以重官款而清宿弊實於吏治民生兩有裨益合無仰懇

天恩准將署江都縣知縣候補知縣袁國鈞予以破格獎勵至應如何擢用之處出自逾格

鴻施非臣等所敢擅擬是否有當謹合詞奏陳伏乞

皇太后

皇上聖鑒訓示謹

奏

保薦使才摺

奏爲保薦出使人才以備任用恭摺具陳仰祈

聖鑒事竊近年以來外交日重出使人才關係最爲緊要自非學優才贍不足以資任使而濟時艱往往中學具有根柢者多未能熟悉外情通知時變其精通西文稍識交涉者又或沾沾自喜器識未克閱深專對之才殊難其選查有內閣學士兼禮部侍郎銜

吳郁生學術純正才識通敏於交涉事件尤極究心前在四川學政任內創設東文學堂派遣學生留學日本多所成就通籍逾三十年資望較深士論均翕然推服候選道溫秉忠心地樸誠勇於任事係光緒初年游學美國畢業學生中學亦頗能涉獵歷經前督臣魏光燾前署督臣李興銳周馥四川督臣錫良委辦洋務因應咸宜上年臣奉使各國考察政治派充參贊尤能遇事留心增長知識該二員均屬堪勝出使之選用敢據實臚陳上備採擇至應如何錄用之處伏候

聖裁所有保薦使才緣由謹恭摺具陳伏乞

皇太后

皇上聖鑒謹

奏

歸併釐卡統收分解摺 光緒三十三年七月

奏爲揚州府屬釐捐局卡重複現飭歸併統收分解恭摺仰祈
 聖鑒事竊照各省設局抽釐原爲萬不得已之政疊准部咨欽奉
 諭旨飭令認真整頓籌辦統捐凡有可以裁併之處自應刪繁就
 簡以便商民查江北揚州淮安海州各屬從前本有清淮釐捐局
 卡向歸前漕運督臣管轄所收捐款專濟清淮軍餉名曰漕捐與
 金陵釐捐所收捐款解支京餉洋債及本省協餉各款情形不同
 淮安海州地方素稱瘠苦前因旣設漕捐是以金陵釐捐並未再
 設局卡惟揚州府屬漕捐之仙鎮車邏戚家汊子嬰閘四局並所
 屬各分卡與金陵台捐之仙鎮孔涵灣邵高郵寶應等局卡或並
 列一處或相距匪遙剏辦之初各收各捐各濟各餉章程本極詳
 備無如行之旣久巧僞日滋計其程途僅二三百里兩捐局卡重

復錯雜員司巡役稍不得人動滋流弊即使辦理認真而商貨往來兩局皆須查驗遲延濡滯受累已深於是洋單乘隙日益暢行實於捐務商情均有關係况江北當災稜之後民生彫劫元氣頗傷若不設法拊循誠恐商困日深市廛隱受其患臣廕昌體察情形與臣端方一再晤商除金陵清淮各捐所收大宗貨物應飭由各該總局悉心籌議逐漸改辦統捐以爲徵收出產銷場等稅基礎外其揚州府屬之仙鎮車邏戚家漢子嬰閘漕捐四局及所屬各分卡擬卽先行裁撤所有該四局應收捐款卽歸併附近之金陵台捐局卡查照漕捐舊章代爲統收按月分解專歸江北濟餉仍按四局近年收數比較隨時查核並飭不准稍有需索情弊似此一爲轉移於捐款既毫無短絀而沿途查驗無復留難商賈願出其途捐務亦當有起色臣等爲裕餉恤商起見往返商酌意見

相同除分飭金陵釐捐總局江北收支總局遵照於七月十六日
一律遵辦暨咨部查照外謹合詞恭摺具陳伏乞

皇太后

皇上聖鑒謹

奏

均滿漢以策治安摺

光緒三十三年七月

奏爲均滿漢以策治安遵

旨妥議辦法恭摺仰祈

聖鑒事竊臣伏讀七月初二日

上諭朕欽奉

慈禧端佑康頤昭豫莊誠壽恭欽獻崇熙皇太后懿旨我朝以仁
厚開基迄今二百餘年滿漢官民從無歧視近來任用大小臣工

列宗大公至仁愛民如子立賢無方無間滿蒙漢人惟其材之任
二百來涵濡
聖澤微特滿人以從龍之餘蔭感戴獨深卽漢人亦明率土之大
經忠愛罔替滿漢兩族久無畛域之可言獨惜
國初以來滿漢通婚者尙少交際之間不無隔閡

卽將軍都統已不分滿漢量材任使際茲時事多難凡我臣民豈
可猶存意見不思共保安全現在滿漢畛域應如何全行化除著
內外各衙門各抒所見將切實辦法妥議具奏卽予施行等因欽
此仰見

聖謨廣遠覆幬無私軫大局之憂危弭內訌之隱患凡在臣庶感
服莫名伏念我

列祖

列宗大公至仁愛民如子立賢無方無間滿蒙漢人惟其材之任
二百來涵濡

聖澤微特滿人以從龍之餘蔭感戴獨深卽漢人亦明率土之大
經忠愛罔替滿漢兩族久無畛域之可言獨惜
國初以來滿漢通婚者尙少交際之間不無隔閡

朝廷雖於滿漢并無歧視尙有一二舊制似乎權利義務不甚均平如從前京外諸官缺有專爲滿缺者有滿漢分缺者有滿漢並用者大約滿人較漢人爲多漢人無不納稅滿人則以兵之名額坐領餉糈有分利之人而無生利之人嘗考唐代府兵緣起本爲太原從義之師雖亦別自爲籍要皆散隸各州郡與齊民無異後世衛所之制卽仿於此從未聞龍興舊區疏附先後奔走禦侮之人世世子孫皆仰食於縣官者我

朝取滿洲蒙古漢軍編立八旗以兵政寓民資環衛備征討法至良意至美也入關以來聚之於京師散之於畿輔駐之於各行省歷年旣久生齒日繁一甲之丁衍爲數什百倍一甲之糧不足以贍此數百倍之人於是生計日蹙而無可爲謀

列聖其仁如天於俸餉外添設佐領之官優給養育之糧而衣食

之支絀自若蓋不待種族之說興而謀國之士早有以知其非計矣至於駐防旗營之設在

國初大難甫平人心未靖非八旗勁旅直無可用之兵統以重臣藉資鎮攝迄今薄海內外胥歸版圖留守之職久成旒贅邇來攻戰之術與昔迥殊前此騎射火器凌厲無前今則既雨土龍幾無所用若使四方有變其不能藉旗營以銷兵氣更不待言就國家言之則歲糜鉅帑以養此不能執業之人徒爲財政一大漏卮就旗人言之除仰食錢糧外別無生生之策其懦者無聊坐困其強者悍然爲非遊惰徒滋人材亦因而缺乏上與下兩無所利而徒以衣租食稅爲偏重滿人之口實而授逆黨以簧鼓煽惑之資豈不重可歎哉我

皇太后

皇上仁明天縱用人一秉大公上年改革官制各部尙侍等缺皆已不分滿漢卽各旗都統各省將軍副都統駐藏辦事大臣向來專爲滿缺者均已兼用漢人茲復宣布

明綸破除積習誠以時局艱危非靖內訌不足以禦外患欲靖內訌必使舉國一心休戚一體此實奠安國本之至計而天下臣民所共歡欣鼓舞者也臣歷膺疆寄體察民情去年使事所及復詳考歐美列邦得失之故凡合兩民族以上而成一國者苟利益輕重稍有偏畸相形之閒動生猜貳馴致爾詐我虞人各有心嫌疑日深杌隉日甚則其禍患所及危及國家小則日卽衰頹大則立成分裂奧大利當百餘年前爲歐洲第一強國但國中種族紛歧不能併力一心屢經挫敗降爲第二等國其施行憲政閱五十年至今議院互相傾軋先私利而後公益憲政名實不能相副其與

匈牙利合爲一國者二百年近年革命屢起奧政府以全力鎮壓之僅免分立俄羅斯地跨歐亞睥睨全球然其國中種族最多人無固志故與方興之日本遇一蹶不振近雖採用憲政議者謂其議會之紛亂或將過於奧大利其能否收憲政之成效未可知也比利時與荷蘭原爲一國那威與瑞典原爲一國以兩族積不相能比利時那威先後脫而自立此皆人民種族之見未化遂至分裂其次者雖幸未至潰裂而以猜嫌妬嫉之故百廢無能一興而國勢亦奄奄不振若美國本爲盎格魯撒遜兩族所共建而今已合同而化絕無內訌美國爲歐洲各國殖民尾閭各種之人麇至雜居從未聞區種族分黨派懷私忿忘大計者蓋其立國無論何族人民皆受制於同一法制之下權利義務均平齊一種族雖異利害不殊人人樂於趨公而以閭牆爲大恥其國力因而安全發

達莫之能禦唐臣孟昭圖有言治安之代遐邇固應同心多難之時上下尤當一體此其理無古今中外一也方今列強環伺虎視鷹隣惟有統一人心消弭內亂使有志之士知政府之可以有爲喁喁然思竭其才以應

國家之用上下一心同禦外侮若使種族之見自生厲階則適予外人以絕大機緣將恐滿漢兩敗俱傷同歸於盡誠有如

諭旨所云豈可猶存意見自相紛擾者臣謹就管見所及謀所以平均滿漢之方切實可行之策敬爲我

皇太后

皇上縷晰陳之

一旗人悉令就原住地方照軍籍例編爲旗籍與漢人一律歸地方官管理也向來旗人分編參佐領爲之管轄所在地方官不得

而約束之遇有訟案辦理多歧滿漢意見均由此起就行政而論既動多窒礙就國法而論亦稍失均平自非毅然改之不足以成治體查乾隆間尙書孫嘉淦疏請漢軍罷仕情願在外成家者無論五百里內外皆聽置買田宅居住報明地方官一體納糧當差如有生事犯法地方官卽行究辦沈起元則謂漢軍閑散聽其出旗擇便占籍隸於有司道光初元喀什噶爾參贊大臣武隆阿幫辦大臣秀堃疏言京旗願赴各省謀生者呈明結咨赴各府州縣照商籍例編爲旗籍戶婚田土命盜諸務歸地方官管理今擬師其意而推廣之無論京旗及屯居駐防一律就所在地方入籍歸地方官管理不獨均平齊一天下之觀聽一新卽將來地方議會權利義務均得與漢人一體不致虛懸而無薄矣

一旗丁分年裁撤發給十年錢糧使自謀生理也乾隆間御史柴

潮生請給數年之俸餉以遣漢軍同治間山西巡撫沈桂芬請無論馬甲養育兵閑散聽往各省以舒國用今請將京外所有旗營分年裁撤仍給以十年口糧爲之安頓生計一切善後事宜責成該省督撫妥爲經理其將軍都統依前此裁缺各官以相當之缺另補或謂自來旗人仰官廩以自贍一旦被撤頓致失所不知所領官帑不足爲養徒以禁營他業之故如東溼薪末由自拔今於裁撤之日仍給以十年之糧則自此別謀生理皆有事業以長子孫二百年來屢勞

聖慮之八旗生計問題可以從茲解決焉昔日本維新伊始廢藩置縣裁撤藩士世祿量其舊受之祿予以一紙債券作爲國債歲取息焉分年由政府償還當時士族多怨望十年以後乃感其德蓋前此藩士不能營業微祿不足自給與我八旗人正同及停止

舊祿受領公債始共瞿然興起從事實業不至以游民終其身今
做行之而易債券爲現銀則仁至義盡爲有加矣

一移駐京旗屯墾東三省曠地或自耕或召佃取租以資養贍也
前大學士舒赫德嘗言養人之道在乎因天地自然之利而利之
必使人自爲養斯可以無所不養若按人按戶給衣食雖一州縣
尙不能徧况八旗之衆乎近日列強政策競爭擴張領土實以人
衆日蕃日用之需僅取諸本國而常虞不足據外人之所調查而
定滿洲地面平疇沃野宜於農業現在之農業不過已耕作五分
之一而南北各省無不食其膏粱之酒與其豆類之油今日滿洲
農業首在開墾開墾之要首在移民若將京旗丁壯儘數抽調移
駐東三省盡闢荒墾土之能事不惟經濟發舒兼可以消外人覬
覷之心而杜其占領殖民之計先將可墾地方詳加清查酌量容

積陸續分配官爲備舟車給資糧以供運送設軍備興警察以保安全設男女學堂以宏教育他若農學水利以及拓殖銀行振興實業皆可次第舉辦或謂移屯邊方從前孫嘉淦舒赫德富俊英和諸臣先後條奏罕見實行不知今昔之時勢迥殊卽望礙疑沮之情形亦因之絕異從前旗人依光日下仕進多途選補升轉之遲速考試錄取之難易旗人均較漢人爲優今則在京在外等於齊民官缺不分無所繫戀一也從前交通不便每憚遠行自非遊宦四方或終身不出國門之外今則汽船鐵軌一日千里遠適閩越不以爲艱滿洲本係舊疆尤非邊遠墳墓宗親易於省視二也從前以旗員領旗兵兵與民不能耦居無猜官與官亦復動成嫌怨今則雖編旗籍同隸有司錢穀交涉悉歸管理地方官無所用其調停自無所用其沮尼三也若中外臣工猶有設計阻撓議其

不便者則是挾私畏難應請立予參處

一旗籍臣僚宜一律報効廉俸以補助移屯經費也裁撤旗丁給發錢糧除原有常年經費及裁缺旗員廉俸可以先行提撥應用外我

皇太后

皇上加恩旗僕當不惜

頒發內帑並可飭由部臣疆吏分認籌撥其移駐京旗屯墾東省所有遷徙路費及到地修造廬舍製辦耕具採購牛籽糧料一切需費甚繁應飭由部庫省關照洋防邊防要需派定數目按期分解如有玩誤指名奏參此事係爲八旗籌生計爲滿漢平畛域卽爲

宗社謀治安凡旗籍臣僚世受

國恩移駐之人非其宗族媼親卽其鄉鄰故舊均應互爲勸導共計久長豈宜苟安目前置遠猷於不顧擬請自親貴大臣各部院卿貳丞參至六品以上京官外而督撫司道實缺府州廳縣以上等官每年均各捐廉俸一成以十年爲率各由該管官彙齊匯解如有能不較官階獨捐鉅款者並許從優請獎庶可收通力合作之效而無時絀舉羸之譏矣

以上四條臣蠡舉大綱上備

聖明採擇如蒙

宸斷施行其未盡事宜當隨時殫竭愚誠悉心籌議以期仰副朝廷統籌全局永策治安之至意所有遵

旨妥議緣由謹恭摺具陳伏乞

皇太后

端思政公高

卷八

五十一

皇上聖鑒訓示謹

奏

請定

皇室典範摺

光緒三十三年七月

奏爲憲法與典範相輔爲用懇請

迅飭編定頒布以維國本而遏亂萌恭摺瀝陳仰祈

聖鑒事竊自去年七月欽奉

明綸宣示立憲之預備中外臣庶懍懼同深復讀本年五月二十八日

諭旨立憲之道凡有實知所以預備之方施行之序者准各條舉以聞仰見我

皇太后

皇上博訪周諮務求實際之至意伏查各國之立憲制各不同由

專制朝廷頒行憲法者謂之君主立憲其君主爲萬世不易之統
日本天皇常握全國最高之統治法權是也考日本憲政本源一
在萬機決於公論與人民以參議之權一在振起皇基使天子之
權力不可侵犯故其帝國憲法與皇室典範相輔而行明治二十
二年發布憲法敕語大致謂本祖宗所授之大權對於現在及將
來之臣民制定大憲以示率由子孫當循行不愆臣民當永遠從
順其皇室典範自皇位繼承以及皇室經費條目雖多其綱要不
外推本貽謀總攬治統以示相承一系傳之無窮此卽全國公奉
君主一姓爲永遠不移之皇室其所占之地位實有確不可拔之
基我

朝
聖

聖相承聰聽彝訓

宵衣旰食庶政親裁立國之體與君主立憲國意義多同至於制節謹度杜漸防微其典則之詳明與

宮廷之節儉亦復洪纖畢貫薄海同欽祇以向來未有專書臣民無從研究茲當舉行立憲之初固應原本典章垂爲模範上以昭祖

宗之家法下以作萬世之規型近年不逞之徒倡爲排滿之說與立憲爲正反對臣愚見以爲宜

俯從多數希望立憲之人心以弭少數鼓動排滿之亂黨擬請飭下廷臣迅將我

大清

帝國憲法及

皇室典範二大端提議編纂布告天下必可永固

皇基常昭法守至各省紳商所設地方議會實有關於立憲基本者如主持得人宗旨甚正似可加以考察量爲扶助使信從漸廣皆趨於憲政之一途亂黨煽惑愚氓之力當不戢而自銷嘗考古今制法之原在乎合一國之人能自部勒以立紀綱日進於不可侮辱之域現在內患外侮極爲可憂苟中外臣工仍以敷衍苟安爲計以傾軋排擠爲能恐安危之數不在黨徒之煽亂而在政論之紛歧伏願我

皇太后

皇上施剛斷之天聰責憲政之實際申做臣工力圖挽救以鞏聖祚以遏亂萌天下幸甚臣一得之愚謹恭摺披瀝具陳伏乞皇太后

皇上聖鑒訓示謹

奏

已故職官請卹摺

光緒三十三年七月

奏爲已故職官忠烈未彰請

旨賜卹以資表揚恭摺仰祈

聖鑒事竊據江寧布政使繼昌詳稱據揚州府詳據前署甘泉縣知縣白承頤轉據大挑教職舉人嚴振勳等稟稱前署揚州府經歷徐鴻謨係浙江仁和縣人於道光二十四年由附監生援例報捐從九品指分江蘇試用歷署揚州府屬之時堡司上官司巡檢江都甘泉兩縣典史揚州府經歷各缺生平宦蹟在揚最久揚人愛之亦最摯當咸豐中葉寇亂蠶起揚州屢被圍困其時承平日久攻守之具多疎兵制又極窳敗該故員時正隨營當差乃獻策

於地方文武仿古製造輪機砲連臂弩之法自練一隊名曰忠義軍由該故員親自教練聲威頗壯迨咸豐八年賊復犯揚州聲勢浩大守將空壁出戰忠義軍亦紛紛調撥隨征所餘者僅五十人藉資城守已而我軍失利賊且逼城下該故員知城不可守盡率五十人出與賊戰且預誡諸人曰今日有死而已乃奮身直前大呼陷陣手斬黃旗賊目數人賊驚其勇以火槍擊之中右目撲地一賊擊以刃一賊復刺以槍乃舍之去尋有難民出城識該故員見其臥地撫之尙溫乃解衣爲之裹首負至仙女廟大營飲以水漿始蘇療傷凡十閱月創口始合而右目卒眇鉛丸仍留眶中同治三年署通州呂東司巡檢由海道赴任適遇颶風舟傾側不定右目創口忽裂鉛丸墜出未幾卒於任所其時遺孤皆幼未及稟聞以致湮沒日久揚郡人士追懷遺烈心實不安合詞懇乞轉詳

奏卹等情並由司將該故員事實清冊呈送核辦前來臣竊維盛朝褒忠之典至優至厚凡在軍營因傷身死以及積勞病故者均加優卹矧該故員以文職微員竟能臨陣出奇奮勇殺賊卒之身裹巨創傷發殞命實屬忠烈可風既據揚屬紳耆惜其湮沒環請表揚相應籲懇

天恩將已故前署揚州府經歷徐鴻謨准予

賜卹並准附祀江浙兩省忠義祠以妥幽魂而昭忠烈實於風紀有裨除將清冊咨部外所有請卹已故職官緣由謹會同江蘇巡撫臣陳夔龍署江北提督臣蔭昌江南提督臣劉光才恭摺具

奏伏乞

皇太后

皇上聖鑒謹

奏

駐防要政各款照案籌解摺

光緒三十三年七月

奏爲京江兩防練軍與學習藝各要政無款可籌仍懇照案分認籌解恭摺瀝陳仰祈

聖鑒事竊查京口駐防續備一軍每年在蘇省銅元餘利項下津貼銀八千兩前因蘇省銅元停鑄擬將津貼銀兩飭由江海鎮江兩關分認籌解又擴充京口駐防各學堂經費每歲需銀一萬六千兩前由鎮江關罰款內提撥三千兩現擬每年再提銀三千兩尙短一萬兩飭江海鎮江兩道分認籌撥又江寧八旗各學堂並習藝局每年津貼銀二萬兩擬飭由兩淮鹽運使江海關道各籌一萬兩均請作正開銷各案經_臣等先後奏請欽奉
硃批該部知道欽此欽遵札飭該司道庫照解在案嗣准部咨現

據江寧將軍奏京江兩防萬頃湖牧場改爲屯田將來租賦甯五
京二分成爲兩防練軍興學等項之用應令即將此項牧場屯田
租賦所入酌量提爲該防各項學堂工藝等經費無庸另行籌撥
又准部咨議復_臣等籌撥京口續備軍津貼並各處學堂及習藝
局等項經費提用款項分別辦理以鎮江關稅罰款與正欸有別
自可照准兩淮鹽運司籌撥江寧駐防學堂並習藝局經費亦可
照准關稅爲餉源所繫應令另行籌撥不得提用各等語先後咨
行前來_臣等復查萬頃湖牧場改爲屯田前准江甯將軍清銳咨
開上年正屆收徵半租之期忽值圩破水湮未能起租現又將圩
加高培厚尙未竣工本年能否起租尙無把握且租賦所入京江
兩防按成剖分爲數亦甚有限若遇水旱偏災勢更難支等語是
湖田租賦旣不能撥應急需更不能指爲的款而上年奏准由江

海鎮江兩關分認之京口駐防續備軍每年津貼八千兩京口駐防各學堂經費一萬兩及由上海道認解江甯八旗各學堂及習藝局經費一萬兩忽經部議停解所需經費概歸無著查該兩防興學練軍習藝諸端爲駐防根本至計既不可一日不辦卽不可一日無費近時駐防生計日見艱難其故由於無學無藝自經籌欸整治學務警務逐漸改良兩防旗丁始稍稍自振乃自去歲至今銅元餘利既歸無着部議又不准動用關款各項要政勢將停輟不惟已有之規模棄之可惜而將來之弊害更不待言在部臣欲令本省自籌經費固係慎重度支之意惟湖田租賦一項既准該將軍咨覆爲數有限且無把握此外司局各庫自江北大校羅掘一空昔之所請外銷閒款以蘇省今日情形言之可謂涓滴俱盡臣等仰屋焦思督同司道多方籌畫無如蘇屬自銅元停鑄一

切已辦之新政已甚竭蹶自顧不遑寧局限鑄之後餘利極微復經部提無可接濟再四圖維惟有仰懇

天恩俯念蘇省窘迫情形准將京江兩防興學練軍習藝所需常年經費二萬八千兩仍照原案由江海鎮江兩關分認籌解作正開銷在部庫每年所撥只有此數而兩防子弟教養有資不惟生計可紓且足備他日干城之選出自逾格

鴻施除分咨稅務大臣度支部學部查照外謹合詞恭摺具陳伏乞

皇太后

皇上聖鑒訓示謹

奏

端忠敏公奏稿卷八終

端忠敏公奏稿卷九

請飭維繫僑情摺

光緒三十三年七月

奏爲南洋華僑近日情形敬陳管見擬請

飭下考查專員廣爲勸導以維僑情而弭隱患恭摺仰祈

聖鑒事竊臣伏讀七月十三日

上諭朕欽奉

慈禧端佑康頤昭豫莊誠壽恭欽獻崇熙皇太后懿旨農工商部奏南洋華僑商會成立請派員考查獎勵一摺南洋各埠華僑類以商業自謀生聚現在商會漸次成立朝廷甚爲嘉許著派楊士琦前往各該埠考查情形剴切宣布德意優加撫慰等因欽此仰見宮廷嘉惠僑民振興商業薄海內外欽感同深伏查南洋各島法領者曰西貢柬蒲寨英領者曰馬來卑南麻刺甲新嘉坡及婆

羅洲之北部美領者曰菲律賓荷蘭領者曰爪哇蘇門答臘及婆羅洲之南部華人之僑居羣島者大都以商礦起家睠懷中國咸知內嚮新嘉坡爲之總滙華商最多其人皆係華裝辦綴紅緯至耄不改蓋繫戀祖國雖壯不歸猶自託於童稚其敦本思源之念有足多者源遠流長其來有自皆由我

國家深仁厚澤二百年來聲教所訖莫不尊親海外僑黎類能不忘宗邦偶遇內地偏災無不捐輸鉅款近日創銀行設商會建立孔聖學堂以教子弟間有集資回籍倡立公司爪哇等埠且請派員監視學堂從前醇親王載溥貝子載振溥倫奉使經過殷殷接待上年_臣出洋考查政治歸途所經商人及學校生徒皆列隊歡迎_臣等語以

兩宮廩念僑民勉其遇事當力圖報稱如內地路礦等政皆當効

力興辦毋爲莠言所惑當據該華商等謂宜時派兵輪來往巡查以示保護並稟請於爪哇蘇門答臘麻刺甲等處添設領事九月

臣到任後爪哇僑民請派學生來甯就學旋據視學員董鴻禕等護送二十一人到甯當以該學生等情殷內渡志極可嘉且聞回嚮方殷來者日衆爲之特闢一校名曰暨南學堂補習國文國語及各種科學一年再行分送各學堂肄業嗣據陸續派送現在共有爪哇華僑學生三十一人本年二月間臣會同北洋大臣袁世凱前兼署閩浙總督崇善前兩廣總督周馥電奏以南洋各處華民閩粵居多祇英屬之新嘉坡檳榔嶼暨小呂宋派有領事駐紮其他處並無華官保護既據籲請設官似宜相機撫馭由北洋飭派兵艦二艘往新嘉坡等處巡歷一周宣布

朝廷德意察看情形慰其愛國之忱兼籌後來設領保護之法均

經先後奏奉

俞旨在案茲因商會成立復被

溫綸特派大員前往考查獎勵如有集資回華振興大宗商務者

優予爵賞妥爲保護所以培養而董勸之者至周且渥此我

皇太后

皇上注重實業之盛心而海外僑民之所歡忭頌禱者也臣微聞

近年以來逆黨孫汶時至各埠演說革命宗旨環聽既衆卽不免

有爲所煽惑之人從前華僑皆故土衣冠蓄有髮辮近頗有剪辮

改裝者在僑民以良善殷實之家遠服商賈咸能回面內嚮墨守

華風累次由爪哇派送來甯學生多人樸素謹愿較之內地學生

尤能恪遵規則其風氣之篤謹可知第以海外僑居於內地情形

輒多隔閡近

朝廷銳意維新方實行預備立憲而逆黨則以政府腐敗聳人聽聞

朝廷消弭內訌方力除滿漢畛域而逆黨則以種族不同造爲邪說我

皇太后

皇上母子一心慈孝無間而逆黨則故作疑似之辨以爲搖惑人心之計善政既遠於傳聞謬種乃易於散播隱憂所在可爲寒心擬請

飭下考查大臣農工商部右侍郎楊士琦前赴南洋各島時將朝廷德意及歷年來力圖富強政策廣爲宣布切實勸導俾所在僑民咸知

聖政之日新

宮廷之無間以慰其喁喁望治之心而恍然於逆說之不足信則所以維僑情而弭隱患者大矣愚昧之見是否有當伏候

聖裁謹恭摺具陳伏乞

皇太后

皇上聖鑒訓示謹

奏

禁米出口辦法摺

光緒三十三年七月

奏爲遵

旨酌擬禁米出口辦法恭摺覆陳仰祈

聖鑒事光緒三十三年五月初一日承准軍機大臣字寄四月二十一日奉

上諭翰林院侍讀周爰諏奏請禁米出口一摺據稱江北此次水

災糧缺價貴實由誤弛米禁隄防既撤偷漏遂多等語著度支部江蘇督撫嚴禁米糧出口以重民食所稱修治水利講求種植各節並著體察情形妥籌辦理原摺著鈔給閱看欽此遵

旨寄信前來查原奏內稱上年江皖水災窮其致病之源而知蘇省糧貴且少致成此次奇災實前江督周馥兩次奏弛米禁之流毒方周馥請弛禁時江南米價每石已至四五元較二十載以前下河常在二千錢以內江南常在三千錢以內者業已貴賤懸殊而周馥陳夔龍等不加深察驟爲是請蘇省士大夫皆謂周馥之子某受奸商重賂十數萬金周馥爲其子所朦蔽而陳夔龍又爲周馥所牽率惟此等暮夜之行大抵蹤迹詭秘旁人莫得其實據臣置而不論惟是大禳之後官廩民倉一空如洗縱得一二豐年穀價斷難如曩時之平減臣愚以爲懲既往之禍尤當嚴後日之

防擬請

特旨飭下度支部及兩江總督江蘇巡撫此後十年之內該省不得再請弛米糧出口之禁並著修治水利講求種植庶幾民間儲蓄以完而元氣可漸復等語臣等遵查運米出口向有運往外國運往外省之別咸豐八年英國通商章程善後條約第五款及光緒二十八年中英新訂商約第十四款均經申明米穀不准運出外國惟光緒二十四年總理衙門照會日本公使存案有該國遇有饑荒而中國產米之區年歲豐稔可以運米接濟之議但亦並未辦過是米糧運往外國本爲約章所不許故通商口岸從無運往外國之事惟奸商於不通商小口私運出洋事所難免前督臣劉坤一前署督臣張之洞均經訪聞鹽阜海贛一帶沿海小口間有奸商私用小船乘夜裝運駛至山東等處海灘改裝衛船徑向

朝鮮仁川口對渡裝輪轉運之事歷經奏明派員查禁有案至今循照辦理上年九月臣端方到任會同臣夔龍疊經嚴飭沿海防綠各營及釐捐局卡地方州縣認真查禁並嚴定拏獲私運一半充公一半充賞辦法數月以來尙無私運情弊至運往外省則仍在中國境內互通有無與運往外國不同條約載明華洋商人均准販運二十九年前署督臣張之洞查明江海各口運米情形奏定開禁封禁辦法經外務部戶部逐條核覆極爲詳明果能切實奉行斷不致有偷漏出洋之弊又當時酌定上海米價減至五元上下鎮江米價減至四元上下卽行弛禁上海米價至七元鎮江米價貴至六元卽行封禁酌盈劑虛尤爲操縱得法三十一年春間淮揚下河一帶米價減落商業壅滯前署督臣周馥會同前江准撫臣恩壽前護理江蘇撫臣效曾奏請將鎮江一口及仙濠兩

口暫准開禁是年十月因蘇省內地存米甚多又經前署督臣周馥會同前撫臣陸元鼎奏請將上海一口弛禁三個月截至年底爲止又以北洋冰凍商船出米無多復請展限三個月均經奉

旨勅部議覆截至次年三月爲止不得再請展限旋亦遵照部議依限封禁臣夔龍於三十二年三月二十九日到任維時上海一口已將封禁閏四月間湖南水災長江米船上駛江浙米價日益踊貴卽經臣夔龍會同前署督臣周馥電奏請將鎮江仙濠兩口先期出示封禁奉

旨允准人心稍定是前署督臣周馥請弛米禁之事臣夔龍尙未到任既未與聞卽無所謂之牽率至原奏所稱此後十年不准再弛米禁自爲慎重民食起見現准度支部咨業經遵

旨議復以鄰省因災告糴事所常有應查照前議御史吳鈞摺內

所稱嗣後米禁勿許輕開即使偶弛勿逾半年期限等因奉
旨依議自應欽遵辦理臣等仍請查照前署督臣張之洞原奏察
看上海鎮江米價貴賤情形隨時斟酌不稍遷就倘屆時本省米
價未能低平即使鄰省偶告災荒仍不得率請弛禁以重民食又
原奏請修治水利講求種植庶民間儲蓄以完等語查溝洫河道
爲農田水利所關瀦蓄宣洩稍失其宜非特無功轉滋菑患上年
徐海淮揚各屬辦理工振經臣等分飭各該道府將河堤圩埝各
工或擇要浚疏或按段培築次第興辦先後
奏報有案其未竟工程仍飭隨時考察務於秋冬水涸之時一律
辦竣至種植之學尤爲生民大利上年臣端方到任後卽經查明
江南各屬物產雖富而農林多未講求當於江甯省城酌購地畝
派委專員試種各色樹秧及各項果穀以資提倡而開風氣並於

江陰鎮江吳淞等處地方派員栽種樹木暨通飭各府廳州縣各就該處地土氣候所宜分別購種栽植專以闢地利厚民生爲要義臣夔龍亦疊飭農工商局設法倡導遇有紳民稟請墾荒樹藝者無不溫語獎勵並飭地方官查明保護一面廣購農學專書分飭各屬以資勸課務期野無曠土境無游民以仰副朝廷貴粟重農之至意所有遵

旨酌擬禁米出口辦法及現在辦理情形謹合詞恭摺具陳伏乞皇太后
皇上聖鑒訓示謹

奏

上海推廣巡警添撥經費摺

光緒三十三年七月

奏爲上海推廣巡警籌議開辦情形並援案添撥開辦經費奏明

立案恭摺仰祈

聖鑒事竊查推廣上海華界巡警曾經臣會同撫臣陳夔龍奏派候補道汪瑞闓前往會商江海關道瑞澂妥籌辦理並奏請撥案每月在關稅項下撥銀一萬兩充作巡警經費仍飭照章報部核銷欽奉

硃批著照所請該部知道欽此欽遵在案查上海推廣巡警關係重大開辦伊始頭緒紛繁必須擇要施行庶幾綱舉目張辦事可漸收成效經臣督飭該道等切實籌議現在急需舉辦各事約有四端謹爲我

皇太后

皇上明晰陳之一總局亟宜建造也推廣巡警非建設總局一所不足以立基礎而壯觀瞻目前租賃民房祇一時權宜之計員司

等分科治事實不能容華界又絕無寬敞房屋可以遷徙揆度地勢應卽在北市適中處所擇地建設參用中西形式舉凡辦公裁判拘押各所均須全備局基約需四五畝惟聞北並無官地公產購買民基價值不免稍貴然以每年裁節之租金計之雖似費而實省此建設總局之不容稍緩者也一學堂亟宜分設也上年曾由關道瑞澂創辦巡警學堂暫就城內求志書院設立勦招練警生一百六人今年二月畢業派往北市浦東各區局分段站崗稍著成效現既籌辦推廣自非多招學生分班授課限期卒業不爲功擬就城內原有學堂先招學生一百三十名選派教員開課訓練限期三箇月卒業分派站巡一面酌分地段廣設學堂招練警生及添置製備一切賡續經理庶期警力漸充得以分途而並進程功較速不致曠日而廢時此分設學堂之不容稍緩者也一區

局亟宜擴充也上海城內原設巡警現祇須照章編改劃分區局五處其城外華界近已添設北市兩區局曰北市東北區設正巡官一員曰北市西南區設副巡官一員浦東一區局曰浦東第一區設正副巡官各一員先就去歲招練畢業警生勻撥各段惟既須實力推廣非將華界界綫以內逐漸添設區局加派崗位不足以昭周密現已飭令測繪課員履勘丈量迅將道里方向詳細繪圖以便酌配崗位之多寡定添招警兵之數目一經測繪成圖卽當經營布置此擴充區局之不容稍緩者也一馬巡亟宜添練也

北市毗連租界地極遼濶浦東則與川沙南匯寶山三邑接壤素爲梟匪出沒之區劫奪橫行肆無忌憚所慮者現在招練警生尙須時日值此匪黨伺隙勾結蠢動隨在堪虞僅恃此少數之巡警查緝斷難周匝查上海租界捕房章程設有西捕馬巡書夜輪流

巡察洵足輔捕巡之不逮而於北市浦東仿行尤爲相宜茲擬迅速設立馬巡一百名參訂南洋陸軍章程遴員教練以之分撥北市浦東各處扼要梭巡期捷呼應而壯聲勢應需馬匹及鞍韉等件卽行派員分投採購一切務求全備以便尅期興辦此添練馬巡之不容稍緩者也以上四端均屬急切應辦之事此外如設消防隊及辦理清道各事宜亦須次第規畫所有開辦經費核實估計約需銀八萬兩核計原撥推廣經費按月動支銀一萬兩祇抵放員弁巡士人等薪餉及局用活支馬匹乾糧各項通盤籌算開支尙慮不敷則此項開辦經費萬不能不另行籌撥事關治安全局且爲外人注目之區若不組織完全必致貽譏苟簡擬仍援案在江海關稅項內如數支撥銀八萬兩充作開辦經費俾得悉心經畫迅觀厥成一面由臣督飭該道等分別考察樽節支用總期

款不虛糜功歸實際將來仍照章詳細造冊報部核銷如或款尙有餘卽當悉數撥入常年經費彙冊支銷萬一不敷再隨時察酌辦理臣爲保衛地方消弭隱患起見除咨部查照外所有上海推廣巡警援案添撥開辦經費奏明立案緣由謹會同江蘇巡撫臣陳夔龍恭摺具陳伏乞

皇太后

皇上聖鑒訓示謹

奏

奏保道員片

光緒三十三年七月

再光緒二十九年十一月間欽奉

上諭嗣後如有才識出衆名實相副之員著各省將軍督撫將其辦事實跡臚陳具奏等因欽此仰見

朝廷延攬真才登明選公之至意茲查有奏調兩江差委湖北候補道孫廷林幹練精明才長肆應於時務商情講求有素前在湖北歷辦商務保商各局興利除弊條理秩然鹽務膏捐收數均有起色委署荆宜道篆兼宜昌沙市兩關監督正值川漢鐵路勘定路線該員會商經理措置裕如上年寧軍遵

旨赴江西萍鄉助剿經臣委充行軍兵站總監旋派江南陸軍糧餉局輸運軍儲籌慮精密鉅細不遺現經委辦裕甯官錢局並官膏局務其操履謹嚴長於綜核尤爲整理財政不可多得之員又查有江蘇候補道徐乃昌器宇深沈辦事精細前以知府到省歷辦江甯通州等處釐務剔弊除奸不辭勞怨收數極爲暢旺委權淮安府知府頗著循聲前督臣劉坤一亟稱其賢未幾以禮去官士民至今稱道服闋過班道員兩赴日本考查學務於教育宗旨

頗有心得辦理儀徵淮鹽總棧上年掣鹽五十六萬餘引本年六個月掣鹽二十五萬引大舉緝私確著明效以上兩員經臣隨時考察實爲才識出衆之員既有所知用敢將其辦事實蹟詳細臚陳該員孫廷林曾經臣於湖北巡撫任內奏保該員徐乃昌經前外務部侍郎徐壽朋奏保欽奉

硃批交軍機處存記在案應如何量予擢用之處出自逾格

鴻慈謹附片具陳伏乞

聖鑒謹

奏

江甯駐防旗營改建校舍請仍准動撥漕折片光緒三十三年八月

再臣前以江南建造陸軍中學堂擇用駐防旗地內本有旗營常備軍營房一所本年另造新營原議以舊營房改作開通中學校

舍現在既經劃歸陸軍中學所有營房校舍自應另行籌建需款不貲擬在江安糧道漕折項下動撥銀二萬兩作爲江寧駐防改建校舍營房之用附片奏陳在案頃准度支部咨併案議覆一摺內稱該督所請駐防建校等項銀兩應令另行籌措奏奉

諭旨欽遵咨行前來伏查陸軍部新定章程各省陸軍中學應歸該部自行籌辦前次擇用旗地面積宏敞地氣清曠現在江南奏辦南洋大學堂卽擬用此地段建造其江寧駐防校舍營房仍擬撥銀二萬兩以爲改建之需事關整軍興學非尋常支用可比查江安糧道漕折項下除湊賠款等項外部文雖係儘數撥解本無一定數目且請撥銀二萬兩俾資建造並非常年經費於部庫撥充

恩賞津貼要需亦復兩不相妨仰懇

天恩俯念江南財政支絀無款可籌仍准將江寧駐防改建校舍
用費二萬兩在於漕米折價運費項下動撥以濟要需出自
鴻施逾格謹附片具陳伏乞

聖鑒訓示謹

奏

親貴出洋等費請仍截留漕折銀兩摺

光緒三十三年八月

奏爲親貴出洋等費無可另籌仍懇准將部撥漕折銀兩截留動
用恭摺具陳仰祈

聖鑒事竊本年四月初五日准度支部咨議覆臣奏將親貴出洋
等費請動道庫漕折銀兩一摺內稱江安漕糧一項臣部奏明永
停採買騰出米價運費除還賠款全數解部上年

恩賞津貼奏准歲撥此款行令劃留賠款二十萬兩下餘儘數解

交部庫該督所陳親貴出洋等項銀兩應令另行籌解等語三月二十四日奉

旨依議欽此欽遵咨行前來伏查上年十月及本年二月臣兩次奏陳近年江南財政異常支絀江安道庫出款逐漸加增如親貴出洋等項類皆額支的款全賴漕倉兩項酌籌動給上年江北水災辦賑籌防綜計不下數百萬挪移墊用虧累益增如遵照部議將漕折銀兩儘數解部則各項新政勢將束手懇准將親貴出洋等費七萬三千八百兩仍在漕米折價運費項下動撥以濟要需歷經縷晰奏陳在案茲查部臣議覆原奏亦謂詳加考核誠皆新政要需祇以部庫支絀行令另行籌措臣接准部咨萬分焦灼欲遵照辦理則江南財政奇窘實屬無款可籌欲緘默依違則凡此要政所關誠恐立滋貽誤核計所請動撥江安道庫漕折款項係

親貴出洋經費二萬兩北京巡警費三千兩學堂經費二萬兩黃浦工費一萬八百兩上海機器局添設新廠經費二萬兩若令准予截留在解部之欸不過歲少七萬餘金部庫不致遽形艱窘而江南得此項銀兩爲之挹注一切新政不致無所措手近年江南財政牽補架漏其艱難竭蹶固久在

聖明洞鑒之中卽部臣酌劑盈虛顧全大局亦不肯堅持前議坐視疆吏爲無米之炊惟有仰懇

天恩飭下度支部仍准將親貴出洋等費七萬三千八百兩在於漕米折價運費項下動撥以濟要需而免貽誤其餘銀兩除奏准動撥及湊抵賠欸外儘數解部專備撥充

恩賞津貼銀兩實於部臣初議江南要政兩無妨礙出自逾格鴻施所有親貴出洋等費無欸可籌仍懇准將部撥漕折銀兩截

留動用緣由謹恭摺具陳伏乞

皇太后

皇上聖鑒訓示謹

奏

請賞辦理洋務人員卿銜片

光緒三十三年八月

再前吏部稽勳司主事勞乃宣歷任直隸州縣先後二十餘年所至皆有政聲嗣蒙推升內用補授吏部稽勳司主事因請假回籍修墓照例開缺經前署督臣李興銳奏調兩江委用歷年辦理洋務事件盡心籌畫悉協機宜各前任督臣及臣均遇事諮商以資臂助該員學術純正淹貫中西於交涉尤有心得近來時事多艱列強環伺於外交則事事當權利害於內政則時時宜策富強因應得失之機間不容髮臣自維愚昧若非藉羣策羣力何能因應

咸宜故自抵任以來遇有一切交涉無不與該員熟思討論斟酌施行深資得力且該員前於二十七年間經湖廣督臣張之洞前湖南撫臣俞廉三先後以人才保薦均奉

旨勞乃宣著交吏部帶領引見欽此嗣後前署督臣李興銳奏調該員片內曾以該員文武兼資洪纖瞻舉歷經薦舉久爲物望所推重等語據實上陳是該員賢能卓著久在

聖明洞鑒之中查光緒十三年間前直隸棗強縣知縣方宗誠曾經前安徽學政臣貴恆以正學純行奏請

賞加五品卿銜仰蒙

俞允在案該員學修品詣實久爲物望所推重且襄辦南洋洋務宣力有年合無仰懇

天恩俯准將該員照案

端忠敏公奏稿

卷九

十三

賞加五品卿銜以示優異出自

鴻施逾格除咨外務部吏部查照外謹會同江蘇巡撫臣陳夔龍
附片具陳伏乞

聖鑒訓示謹

奏

變通缺產處分片 光緒三十三年八月

再兩淮各場產鹽缺額處分向按定額十分計算缺額不及一分者罰俸六個月一分以上者罰俸一年二分三分者降一級留任四分五分者降一級調用六分以上者降二級調用七分者降三級調用七分以上者革職歷經循辦前於光緒三十年部咨飭查淮南產鹽考核冊報溢產案內經前運司議以各場大使缺產一至四分即干降調而虛報鹽數並無考成現既加增額產嚴禁虛

報自宜將缺產處分原定四分五分者稍予變通改爲四分者降二級留任五分者降一級調用等情詳請咨部核復並經前署督臣周馥於奏報三十三十一兩年產鹽缺溢分數摺內均經聲明各在案前准部咨議覆三十一年各場缺溢考成經度支部會商吏部以各場實報缺產不蹈從前虛報情弊雖未便徑予免議自應酌量從寬其開辦新章以後如再有缺產四五分以上者卽查照定例咨送吏部核議處分等因是前請變通缺產處分尙未經部議核定伏查兩淮積習虛報產數久已視爲故常自經清查堆鹽以後嚴定虛報章程各場員已不敢復蹈故轍近又加增產額若不將缺產處分稍予變通殊非實事求是之道自宜查照前案請將缺額四分者改爲降二級留任五分者降一級調用以示持平據兩淮鹽運使趙瀆彥詳請具奏前來除分咨吏部度支部查

照外謹附片具陳伏乞

聖鑒敕部覈復施行謹

奏

補救州縣虧累辦法摺

光緒三十三年八月

奏爲蘇省銀價騰貴州縣徵解虧累酌議補救辦法恭摺仰祈

聖鑒事竊據蘇州布政使陳啓泰詳蘇屬近年銀價騰貴州縣徵
錢解銀虧累過鉅上年兩次詳請奏明將規復銀價錢二百文撥
還州縣仍隨忙另收賠款錢二百文均經奉部議駁如果銀價稍
平各州縣賠累不至加重自當謹遵部議照常折收無如近年銀
價益昂各屬虧耗益甚現任者皆意存引退新委者多託故不行
人人視州縣爲畏途以錢漕爲重累幾若一膺民社卽不能保其
身家也者如是而欲望其公爾忘私盡心民事不亦難乎案查蘇

屬徵收忙銀章程自同治四年奏定每徵正銀一兩照市價折收錢一千四百文外加辦公經費六百文共計折收錢二千文聲明設遇銀價翔貴須與時變通於啟徵時奏明辦理嗣於同治七年十一年兩次各奏加二百文又於光緒三年十二年兩次各奏減二百文遂復每兩二千文之舊一切情形具詳前奏大抵隨增隨減莫不因時制宜本非一成不易是以每年二八兩月必由司按照市價分忙核數詳請奏報一次正以市價無定應增者必增應減者卽減也迨二十八年以賠款緊要每兩加收錢二百文併徵分解雖名之曰規復實與牧令公費無關前奉部駁但論規復二字之名義致將賠款與銀價合而爲一因此加收之請議格不行而州縣徵收忙銀每兩仍折價錢二千文內除公費六百文計存錢一千四百文合之目下庫平銀價每兩在一千六百八九十

文是僅得銀八錢二分八九釐中間虧耗不啻三百文上年均已虧累巨數岌岌不能終日由今而觀更不知伊于胡底若不速籌補救必至虧空過鉅無法彌縫查鈔參追亦屬無濟則庫款因之短絀而損及

國計矣又不然而行險僥倖百計取償法律人言均不暇顧則吏治因之些窳而累及民生矣再三審度詢訪衆謀有不得不亟籌補救者查蘇省各廳州縣提捐忙漕銀每兩每石各三四五分平餘每年共計十萬餘兩係專供撥補釐金充提償款之用提捐漕餘每石一百八文每年共計八九萬餘兩係專解部庫充撥新軍之用目下各屬虧累如此實無盈餘可提擬請從三十二年分起暫行免提俟銀價稍平再當照常提解此一策也惟款關軍糈償款遽少此項大宗均須由部另籌指撥以資彌補此時部庫拮据

未必卽能籌撥而司庫搜括淨盡亦屬挹注無資如不能准免提款惟有仍就各屬徵收章程量爲變通江蘇全省田賦本係科銀而不科錢與其以錢合銀每忙核數奏報總未能盡與市價相合何如以銀完銀官民均昭平允刻下銀圓通行民間之向祇用錢者亦已相率用銀事成習慣不至因銀色高低受胥吏之欺抑如大戶完銀較多卽可自向銀莊開寫銀票交納小戶零星無幾亦可以錢易銀赴櫃投完旣免畸重畸輕之弊亦無洋價銀價之殊至辦公經費六百文及賠欸二百文亦應一律收銀每年於開徵前按照各屬市價由司核實酌定詳飭州縣一體遵照並於易知單內將銀價分晰註明俾免弊混而杜浮收如此辦法雖似較上年之請加二百文爲數稍多惟銀價貴賤各有其時貴旣不至累官賤卽可以便民易地而觀兩無窒礙且各邑條銀以全額計之

多或八九萬兩少亦三四萬兩以每畝完數計之多至一錢少僅數分綜此項每兩約三百文之虧耗專責諸州縣一人之身與分攤諸數千百萬戶之糧戶其輕重難易情形迥異此又一策也倘謂以銀完銀事屬改章部議猶有未協惟有仍請查照同治七年十年銀價增漲與時變通兩次奏准每兩各加錢二百文之案將現在規復銀價充撥賠款之二百文給還州縣使辦公經費有著藉免鉅虧其賠款則援案另行徵解此又一策也據各州縣瀝情具稟用特代懇據實陳請能於三策之中酌行其一於大局裨補良多至本年上忙各屬已大半啟徵如邀議准完銀擬請酌照六月分最短之價核數行知將上忙短收錢文歸入下忙代收或加折價亦歸下忙補徵等情詳請具奏前來臣等復加查核該司所詳係屬實情未敢以部駁在前遂

安緘默相應請

旨飭下度支部通盤核議折衷一是俾資遵守謹合詞恭摺具陳
伏乞

皇太后

皇上聖鑒訓示謹

奏

請獎辦賑義紳摺

光緒三十三年八月

奏爲江北水災查辦工振出力義紳擇尤請獎恭摺具陳仰祈
聖鑒事竊照光緒三十二年徐海淮安各屬水災籌辦冬春兩賑
並修疏隄埝河工一案曾於奏請截漕摺內聲明將辦賑得力之
員以及勸募賑捐集有鉅款者懇
恩從優獎勵嗣因工賑一律完竣據實奏報並請將最爲出力之

立
員擇尤保獎奉

硃批知道了欽此所有在事出力印委各員業經臣等查明擇尤奏獎在案查自去年江北告災以後駐滬辦商約大臣呂海寰盛宣懷首先勦辦義捐派紳廣爲勸募並復乞助各省函電交馳聲淚俱下一面籌墊錢一百萬串選派義紳分赴被災較重之區查放義賑維時徐州府屬之邳州宿遷睢甯銅山蕭縣淮安府屬之安東桃源阜甯清河山陽海州沐陽贛榆十三州縣先經臣等分派委員會同地方官切實清查戶口正散賑間適各義紳等先後趕到查得義賑向章係令隨查隨放甚爲簡捷兼可杜絕一切弊端派來各紳均甚熟悉賑務人亦多樸實耐勞遂與呂海寰盛宣懷商明將所有官發賑款飭交該紳等查照義賑章程一併核實散放仍由地方官監視考查呂海寰盛宣懷與臣等籌商賑務

電音日必數至公忠誠懇籌畫周詳各義紳親赴被災各鄉清查戶口力任勞怨昕夕不遑而安東辦賑義紳唐錫晉並親赴清江浦隨同署淮揚海道楊文鼎遣散饑民頗資得力自上年十一月之後江北賑務漸臻就緒實半資義紳之力此外江都丹徒等縣之各沙洲被災亦重經呂海寰盛宣懷酌籌賑款派紳前往查辦並由_臣等加給官款交該紳等彙同散放以拯災黎本年正月冬賑一律完竣責成各義紳將各屬戶口切實清查接放春賑其間有不甚得力者電商呂海寰盛宣懷撤換另派接辦計自正月以至麥秋凡四閱月爲日甚長去冬次貧之戶交春已成極貧又以各處資遣回籍饑民及由山東等省聞賑歸來者人數尤衆事務愈難該紳等極力清查嚴剔冒濫其有因極貧過多請增撥款者情詞無不懇摯各義紳中以睢甯之劉鍾琳邳州之劉康遐銅山

之吳憲奎蕭縣之韓景珪贛榆之胡春澤海州之朱祖蔭桃源之
馮嘉錫辦事最爲結實劉鍾琳吳憲奎馮嘉錫並能各自募捐以
輔官款所不足韓景珪兼辦碭山賑務井井有條悉臻妥協官糶
米糧之外呂海寰盛宣懷復籌款十數萬兩派紳分赴奉天山東
等省採辦雜糧由海道運至海州進口分撥平糶並由臣端方加
籌銀十萬兩轉交呂海寰盛宣懷陸續添購轉運民食得資
接濟市價不致增昂各處災民賴以全活無算六塘河爲宿遷安
東桃源清河海州沭陽各處宣洩要區年久失修一遇盛漲每至
汎濫爲害飭派在籍紳士前山東東昌府知府魏家驊會同署淮
揚海道楊文鼎督同員紳人等分段興修辦理甚爲核實沭陽贛
榆各河工派委在籍紳士安徽候補道許鼎霖爲總查分派委員
會同地方官督率紳董擇要挑疏此外山陽清河安東等縣境內

支河俱係紳士承修官爲監督先後委員驗視一律深通又在滬中西官紳發起華洋義賑公會募集捐款糧食至一百二十五萬之多公舉西員趕運麪粉等物分赴災區減價平糶卽以所得糶資濟河平路以工代賑兼之收養幼孩乳餌得法全活尤多臣等伏查去歲江北鉅災爲數十年來所未有幸賴呂海寰盛宣懷公忠體國首創義捐各該紳或查辦賑撫或經理河工或勸募鉅款與印委人等不分畛域認真辦理均能不辭勞瘁力任其難卒能使災黎實惠均霑咸資安集實屬異常出力綜計在事出力紳士不下二百餘人經臣等與呂海寰盛宣懷往返電商並督飭地方官大加刪減謹擇尤爲出力始終其事者繕具清單恭呈御覽合無仰懇

天恩俯准敕部照擬給獎以昭激勸至呂海寰盛宣懷係屬尙書

侍郎大員可否懇

恩頒賞匾額以示旌獎抑請

交部從優議敘之處出自逾格

鴻慈非臣等所敢擅請除飭取該紳等履歷咨部外謹合詞恭摺具陳伏乞

皇太后

皇上聖鑒謹

奏

籌議長江巡緝章程摺

光緒三十三年八月

奏爲籌議長江巡緝詳細章程恭摺具陳仰祈

聖鑒事竊照本年六月初八日奉

電旨沿江一帶匪徒充斥亟應嚴密查緝着會商妥議詳細具奏

並着程文炳常川梭巡勿得拘牽分閱上下游常例等因欽此又於六月二十日准軍機大臣字寄六月十一日奉

上諭現在人心不靖隱患宜防應如何佈置以期有備無患之處著沿江沿海各督撫體察情形妥籌辦理等因欽此遵經臣等會商升任湖廣督臣張之洞安徽撫臣馮煦江西撫臣瑞良湖南撫臣岑春煇等議嚴密探訪整頓水師預備精兵三條並擬盤查軍火以杜接濟明定賞罰以示勸懲各節擇要電請軍機處代奏奉諭旨所籌尙屬周妥著卽妥速籌辦認真防緝等因欽此隨經臣端方督同督練公所巡警總局擬議詳細巡緝章程與臣夔龍蔭昌往返商酌旋臣文炳由上游巡緝回甯復將整頓長江水師事宜會同詳加釐定正具奏間旋奉

電旨飭令分催各省迅將詳細章程奏報等因欽此又經電催鄂

湘皖贛各省安速籌議具奏一面電請代奏在案查長江古稱天塹自吳淞以至岳州上下數千餘里連亘五省伏莽素多而當江海之衝者尤以江蘇爲最要蘇省海岸東北界山東日照東南至金山場徑途四達港汊紛歧太湖內達支河外通海口兼與浙省界連向有梟匪幫匪及各項會匪往□□聚甚至連檣列械拒敵官兵近來□□□到處煽惑復有孫□□爲之黨魁時由外洋接濟軍火費用踪跡詭祕黨與繁多並有勾結梟匪起事之說非廣設偵探無以探實匪踪非預備精兵無以速平匪亂現將巡緝隊艦隊議訂詳細章程飭令各司司令官及各隊官等切實遵辦平時則分路巡查各專責任有警則彼此知會互作應援惟蘇省自吳淞起歷江陰鎮江金陵抵安徽界爲止地段綿長口岸林立深恐匪黨因水路巡緝嚴緊潛往陸路煽惑並將江南新練陸軍及舊

有之巡防隊劃分地段嚴定章程責令認真查緝至江南第九鎮三十四標步隊上年曾派往江西萍鄉等處會剿匪亂本年復派安慶省城彈壓著有勤勞又三十六標步隊現駐江陰巡緝亦頗得力該二標俱係精練之兵於剿匪弭亂事宜研究有素飭令時常戒備遇有匪徒蠢動立即馳往會同該處防營及艦隊水師合力剿辦該匪初起人必不多心必不一有此勁旅當可立時撲滅第緝匪一事易於騷擾更恐有妄拏平民以邀功者茲經嚴切誥誠並明定懲辦章程如有株累無辜任意擾害等事立即從嚴究懲倘有情節較重者並當奏請明正典刑以昭炯成而杜流弊長江水師自江蘇江陰起至湖南岳州止共有二十二營前督臣曾國藩原訂章程極爲周妥臣文炳忝領水師責無旁貸且欽奉諭旨誥誨諄諄自當督同查照向章實力整飭現將江面劃分六

段派令各鎮將按段巡防以杜推諉並派奏調江南差委湖北候補道孫廷林爲長江水師督查營務處籌辦一切事宜在於提標及瓜湖兩鎮標酌撥師船三十艘交給應用水師舊有礮船形式不免笨重茲經江鄂兩省撥給兵輪由臣文炳不時赴上下游督率巡查一面多購綫勇廣爲查探匪踪密拏務獲解報所有整頓水師詳細章程係臣文炳籌議與臣端方等酌核意見相同擬卽分咨鄂湘皖贛等省一體照辦太湖等處梟匪向爲江浙兩省隱患原統鹽捕等營江蘇候補道徐賡陛現已病故經臣端方夔龍與浙江撫臣張曾敷往返電商卽以江南提臣劉光才兼統鹽捕等營與提標各營及飛划營聯絡一氣查緝較易得手上海吳淞濱海一帶關係重要現雖酌派步隊駐防兵力究嫌單薄已商由提督薩鎮冰協同查緝遙作聲援此外海州等處海口亦爲匪徒

出沒之區經臣蔭昌擇派得力營隊會同統帶淮北緝私營李定明海州營參將戴鶴松協力巡防以禦外匪並責成地方官將巡警事宜切實整頓以清內訌似此水陸兼籌互相策應庶可收通力合作之效而免鞭長莫及之虞日昨欽奉

上諭著雲南提督夏辛酉統帶所部酌量添募營隊前往長江一帶扼要駐紮作爲長江游擊之師等因欽此有此重兵復得威望素著之大員以統率之沿江防務益臻周密

聖謨深遠欽佩莫名惟近來逆匪夥黨之盛半由於邪說之橫行半由於生機之困乏現在迭降

綸音消除滿漢畛域並飭將立憲政體次第實行所有排滿革命一切邪說自可不攻自破上年江北奇災饑民甚衆深恐匪黨糾結爲患幸賴

聖恩廣被工賑兼籌百萬災黎咸資安集然各處無業游民尙屬不少現由臣端方夔龍督率司道酌籌款項設立貧民習藝所收養無業窮民教以各項工藝務令謀生有術俾可消患無形似與緝匪弭亂之道不無裨益所有籌議長江巡緝總章八條及巡緝隊新舊陸營長江水師各詳細章程繕具清單恭呈

御覽臣等仍當會商沿江沿海各督撫及該提臣夏辛酉隨時認真防緝以仰副

朝廷綏靖南服有備無患之至意除鄂湘皖贛等省詳細章程應由該督撫臣另行覆奏外謹合詞恭摺具陳伏祈

皇太后

皇上聖鑒謹

奏

謹將長江巡緝事宜籌擬詳細章程繕具清單恭呈

御覽

長江巡緝總章

一區畫辦法略分五項

第一設立巡緝隊責令偵查□□□□嚴密緝拏並兼伺察各種
會匪梟匪盜匪毋令蔓延

第二整頓水師撥艦換砲籌濟探訪經費由臣文炳督率不分晝
夜切實梭巡

第三暫編長江艦隊專派知兵幹員統帶遇有匪警立即前往查
辦

第四配備軍隊水師艦隊難以兼顧陸路江南舊有陸營汰弱留
強改編巡防隊者計三十餘隊所有沿江重要處所均派巡防隊

駐紮以靜制動其有口岸市場以及匪類出沒之藪隨時輪派棚伍前往巡查

第五分駐新軍近來各處匪亂均係變起倉猝精兵所至匪衆自潰江南第九鎮三十四標及三十六標於剿匪弭亂之道俱能研究有素茲擬作爲遊擊之師俾收首尾相應之效

二巡緝消息固期靈通聲勢更須聯絡凡巡緝隊艦隊水師以及新舊軍隊雖各有所司專其職任然亦須互相聯合援應以收一氣呵成之效不得心存推諉貽誤事機

三近日□□與尋常盜賊不同必須選擇精明幹練之偵探員不盡拘以文法始易得其踪跡現就巡緝隊長江水師認真整飭多養有識綫勇無論何隊均給以一式之憑紙查得匪類應立時掩捕者就近報知該處之兵輪師船或江岸之軍隊合力掩捕各地

方官亦宜隨時協助以資得力

四嚴杜接濟軍火查匪徒軍火多附輪船私運停泊吳淞口外往
往用釣船駁船潛運至崇明寶山交界處所又或停泊江陰口外
僱用民船或旁託奸商或自充賈販潛運內地應飭關道會同稅
務司嚴行盤查至吳淞江陰等口岸並責成水路營隊扼要巡邏
嚴加稽察務使有犯必獲以杜接濟如有藉端騷擾滋累行客者
懲辦

五沿江各省前次電奏聲明詳細章程由各省妥籌分別具奏願
辦法雖難悉合而事機本屬相因擬將現訂章程咨商各省其有
情形相類可以聯合辦理者務宜協同援應以收通力合作之效
遇有警耗迫不及待者亦須一面相機辦理一面關會鄰近各省
不得稍分畛域

六□□□行踪詭祕偵探既難誣陷亦易意存周內固將禍及平人舉動張皇亦恐轉滋騷擾凡一切偵查逮捕之事應依法律究明其根據不可操切從事

七□□近知各關盤查甚嚴輪船難以朦混往往改坐民船闖入內地然若由艦隊水師一律搜查深恐別滋騷擾擬責成各州縣飭由水保正會同船行將境內所有船隻一律清查編號如有外來形迹可疑之船設法盤查勿稍疎縱一面飭由各釐卡凡遇經過貨船於查驗客貨時留意稽察如有夾帶軍火立即會同地方文武將其拏獲並將船隻扣留惟不得藉端需索留難致干查究八明定賞罰以昭懲勸凡訪明拏獲匪類按其情罪之輕重捕拏之難易應分別獎賞計分三項曰奏保曰外獎曰賞格如有通匪故縱知而不拏拏而不力或藉端滋事誣陷無辜誤拏平人等事

應分別參罰計分四項曰抵罪反坐曰參處曰監禁曰責罰
以上八條皆就臣等前次電奏三項辦法推陳其義現已實力舉
行其在通都商埠如上海鎮江江寧等處整飭巡警切實稽查以
輔營隊查緝所不及如有未盡事宜容臣等隨時察看情形斟酌
辦理

江南巡緝隊章程

第一章編制

- 一 巡緝司令官一員
- 一 巡緝管帶官四員
- 一 巡緝隊官十二員
- 一 正巡緝長七十二名
- 一 副巡緝長七十二名

一正巡緝目七十二名

一副巡緝目七十二名

一一級巡緝兵七十二名

一二級巡緝兵七十二名

一三級巡緝兵一百四十四名

一四級巡緝兵二百八十八名

一五級巡緝兵二百八十八名

一書記十八名

一伙夫七十二名

第二章 權限及職守

一司令官之權限及職守

一稟承總督綜理一切巡緝事宜

二巡緝事件遇有關係行政者會同地方官及警局妥商協議以求適宜之處置

三約束部下使其束身自愛

四指揮部下使其實力奉行

五教育部下使其辦理日臻妥善

六善用賞罰使其有所勸懲

二巡緝隊官之權限及職守

一稟承司令官辦理管區之巡緝事宜

二平時於管區之內聯絡地方官及警局汛地以求耳目靈通消息敏捷庶使辦事得手隔膜毫無

三平時於管區之內詳審地方情形細察人類之良莠至通商碼頭及鹽場均爲藏奸之藪尤宜注意

四對於部下如約束指揮教育諸事一如司令官惟升降賞罰須將原因稟候司令官核辦

三正副巡緝長權限及職守

一謹奉命令親率部下以盡探訪搜索逮捕諸事務

二按日率領目兵四出偵探將情形報告隊官一次每月由隊官彙報司令官一次

三隊官或因公離其管區之地卽由巡緝長承認其責任

第三章辦法

一巡緝隊之設立以機關秘密信息靈通爲宗旨務使匪黨隨時破獲奸宄難以隱藏

二巡緝既須秘密則辦事人員不必定其服制惟不論官長目兵隨身須常藏一記認物惟臨時不得由司紙令官爲酌定樣式標明巡緝人員

俾彼此呼應不致錯誤

三凡命令報告之簡紙及外封仿照陸軍意旨定明樣式由司令酌定以昭信守

四巡緝人員既有逮捕之權愈不能擅自逮捕及妄行逮捕茲揭其應逮捕者於左

一由督撫指名訪拿者

一由地方官懸賞緝拏者

一各處通緝有案者

一由司令官因案指名查拏者

一有私運軍火偶遇諸途實因事機緊迫不及報告者軍火須以獲為

火證而據僅不得棄人

五遇有形迹可疑之人須緊尾其後不動聲色覬其行蹤窺其棲

止并旁觀其動作側聞其言語及其朋黨若何家屬若何概行詳細查錄報告上官

六查無實據固不得擅自逮捕如有形迹可疑之確證尤不得任其遠颺如二人同緝則分一人報告上官如緝者僅一人亦須設法通信

七緝拏搜索遇有租界之地須稟候關道察核辦理

租界
捕拿
章程

時巡
尤緝
宜人
研員
究平

八地界之區分及區分之多寡臨時由司令官察酌稟候核定

第四章賞罰

九賞罰之範圍極廣除例內賞罰仍按法律軍律辦理外茲將關於巡緝者開列於後

一拏獲管區內著名匪魁者

一鄰境匪黨探實踪蹟不分畛域協同拏獲者

一拏獲私運軍火者

一事機急迫未奉命令而辦事適合機宜者

以上四項分別案情予以應得之獎賞其有拏獲著匪或查出大批軍火保全治安者並奏請從優給獎以示鼓勵

一陷害無辜致傷生命者

一未奉命令擅用武器傷人致死者

而匪傷先命者械別論捕因

一妄拏平善學生擅捕良家子弟者

一漏洩案情者

一受人賄賂妄報案情以致失實者

一得錢買放者

一上官命令奉行不力因而逸去要犯者

一 招搖及撞騙者

一 借故擾害倡寮酒肆者

一 挾仇而假公報私者

以上十項隨時酌核案情分別懲辦其有情節較重者並當奏請置之重典

長江艦隊巡緝章程

第一章 艦隊編制

一 南洋兵艦向於巡緝一道未有專責現撥給南琛兵艦一艘辰宿列張魚雷艇四號暫編爲一隊以備巡緝之用

二 艦隊司令官一員統轄各艦指揮艦內人員

三 艦長四員

每艦一員

四 每艦應派探訪員若干員在陸地偵探

第二章 艦隊區域

一蘇省江面自吳淞起歷江陰鎮江金陵至安徽省界止劃分四段以辰宿列張四雷艇分任查緝其間要口如徐浦通州張黃港八圩港天星橋三江營七濠口瓜州口大勝關草鞋峽等處均宜按日輪往梭巡仍以南琛兵艦往來督率以除匪患而靖地方如上游蕪湖安慶九江等處設有匪警亦即駛往應援

第三章 艦隊責任

一蘇省界內以及上游之蕪湖安慶九江等處如有匪警該艦隊立即開往撲捕

二遇有往來船隻搭載□□查明確有憑據立即拏獲並將船隻暫行扣留如問明實不知情及並無通匪情節方可將該船釋放

三遇有船隻私運軍火立即扣留聽候核辦

四如已偵察或經人報告某船有私運軍火及裝載等情隨時跟踪追緝毋任逃逸倘相距甚遠恐鞭長莫及卽電知隣艦幫緝

第四章 艦隊權限

一商輪往來有必須查緝者應稟請總督札飭各關道艦隊司令官會同關道查辦

二訪得匪黨蹤跡及其軍火寄頓之處在陸路者由司令官通知各該營縣及警察局查辦

三各該營縣及警察局如訪得蹤跡及私運軍火在大江一帶卽由各該營縣警察局通知艦隊查緝

第五章 艦隊機關

一各艦每月之餉銀煤糧列字雷艇由吳淞南北洋海軍司令部

支領辰宿張三號均由南琛巡緝時便道代領或專員赴滬具領
二艦隊通信機關南琛開行時則在南琛主艦此外沿江駐地及
寄信處所吳淞在巡防營內江陰鎮江在憲兵支部

三各該艦巡緝區域停泊港口不能駛入港內隨時通知該處營
縣派令員弁會同查緝認真清港俾使匪黨無所容留

四沿江各緊要口岸均派有探訪人員隨時察訪設有私運軍火
消息以及匪黨蹤跡卽刻報由就近各艦堵截如已經闖入則跟
踪查緝務獲解究

五各該艦巡緝區內應分設密探若干員以輔助各口岸探訪人
員之不足

第六章 艦隊賞罰

一該艦隊如拏獲著名匪黨以及大宗軍火保全治安者分別保

獎

二平時巡緝得力長江一帶異常安靜按年核計一次分別記功給獎

三如有匪黨在沿江一帶出沒無常及私運軍火上陸該艦隊漫不經心有虧職守分別輕重懲辦

陸營巡緝章程

一新舊各軍隊駐紮沿江一帶者應分區擔任巡緝各專責成仍宜彼此應援以資聯絡

一遵照現頒部章舊軍應分路改營所有軍隊名稱巡防區域俟酌定再行更改

一步隊第十七協馬廠第九標工輜第九營混成協步隊第一營馬隊二隊獨立巡防隊第一隊至第五隊鎮江巡防第三營之左

隊分巡上元江寧江浦句容溧水高淳金壇溧陽六合儀徵宜興
荆溪等縣

一步隊三十五標鎮江巡防隊第一營第二營第三營之三隊江
陰巡防隊第三營之左後兩隊分防丹陽丹徒武進陽湖江都甘
泉高郵寶應泰州興化等州縣

一新軍步隊之三十六標江陰巡防隊第一營第二營第三營之
兩隊分防江陰金匱無錫靖江泰興通州如皋東台等州縣

一吳淞巡防隊及獨立之巡防隊之第十一隊至第十四隊分防
寶山上海華亭婁縣崇明海門嘉定各廳縣

一匪徒踪跡詭祕黨與繁滋務須多派得力線勇嚴密偵探設法
查拏

一遇有艦隊水師密告匪黨在陸路窩藏聚集者立即派隊前往

密拏勿任聞風逃逸

一某營隊所管區內遇有匪徒滋事及一切事變須兵力查拏彈壓者由該地方官申請酌派出隊一面通報查核

一遇重大事故須重兵前往者當先報告督練公所詳請辦法若事機迫切交通不便之時仍由該軍隊官長先行派隊前往隨後補報

一奉命出防之軍隊如地方均已安穩當速回駐屯處所毋使兵力分散以致教練失時廢弛軍紀

長江水師分段巡緝章程

一岳州洞庭荆河等處爲一段責成岳州鎮魯洪達總理其事並督同荊州營副將謝詩才酌選募巡目巡兵認真訪緝

一岳州以下至漢口九江爲一段則以漢陽營遊擊王詩訪爲總

巡官妥募巡兵交都司劉有才把總易傳榮認真訪緝

一九江以下內湖外江至安慶爲一段責成湖口鎮楊福田總理其事並督同卸任遊擊黎受田酌選募巡目巡兵認真訪緝

一安慶以上至大通蕪湖爲一段以大通營參將陳麟書爲總巡官酌選募巡目巡兵認真訪緝

一蕪湖以下至金陵爲一段金陵以下至鎮江江陰以及上海爲一段以上兩段均責成江陰營副將胡忠勝爲總巡官會同瓜州中營遊擊徐金玉金陵營參將丁得貴並督同都司趙鴻禧酌選募巡目巡兵認真訪緝

一派委奏調江南差委湖北候補道孫廷林爲長江水師督查營務處由提標及瓜湖兩鎮共撥給礮船三十艘交給帶領巡查俾得上下聯絡一氣

一多購眼線廣爲偵探務期探實匪蹤密拏解交地方官審辦
一凡內河湖浸蕪蕩港汊濱江沿岸等處爲艦隊所不能到者尤
宜加意梭巡不得稍有疏懈

一遇有艦隊陸營及地方官知會協捕匪黨務須立即兜拏不得
稍涉推諉

一長江水師先經升任督臣張之洞換給後膛洋槍茲復換給後
膛快礮每營五尊責成營哨各官督率勇丁隨時講求施放瞄準
各法尤須勤加擦洗勿任鏽壞

試辦銅冶山礦務片 光緒三十三年九月

再銅煤之利爲用最廣近年銅煤價值日漲伸縮之權操諸洋商
實爲中國一大漏卮非有佳礦自行開採不足以挽回利權茲查
得江蘇句容縣屬之銅冶山礦出產銅煤經臣屢飭兩江礦政調

查局道員翟衡璣派員帶同礦師親往查勘該山中蓄銅質甚厚發現砂石均含寶光其脈穴結聚於龍池老峒須洩龍池之積水以探銅層之厚薄若水洩隆成銅蘊可以畢露該山龍王廟之南煤脈顯露於煎煉尤屬相需惟其火力如何尙須深探試驗始可決定臣查該山既產銅煤礦苗呈露自應速籌開辦庶免棄利於地查有江蘇候補道李宗棠遊歷日本熟悉礦務堪以派委總理銅冶山開礦事宜先行籌備官款五萬兩陸續撥給作爲試辦資本先用土法開採俟漸著明效購機置廠再行擴充辦理現以二年爲限如有成績卽將此項官款劃作股本再由官招商股加籌資本設立公司合力開辦以裕利源除飭妥定章程咨部查照外所有試辦江南銅冶山礦務緣由理合附片具陳伏乞

聖鑒謹

奏

請飭保護華僑片

再查檳榔嶼迤西有地名拔退維亞係荷蘭屬向多中國僑民頗爲荷人所優待乾隆間駐拔退維亞荷官因事激變華民旋用兵攻殺華民無算荷王立拘荷官牒告閩粵總督深致歉忱並擬辦法三條一將荷官送中國懲辦一按荷國律自行嚴辦請中國派員監視一請中國派員會同鞫罪辦理乃閩粵督臣均答以華氓既居海外卽非中國子民如何辦法未便與聞乃大爲荷人所輕至今遂益加藐視在當時撫駁失宜誠足引爲鑒戒聞此次在爪哇句留卽將此事極力演說以爲中國膜視僑民之據一時爲所鼓動者翦辮改裝遂居多數臣現據拏獲□□□鄭先聲供稱有二人在爪哇爲□□辦事一爲喬義生北直人一爲宋仁

湖南人是該□處心積慮專在煽惑華僑若不趁此時僑民內嚮
 方殷尙不致全爲所用善爲勸導實行保護無以堅僑民愛國之
 心而破□□蓄謀之狡擬請

飭下農工商部右侍郎楊士琦前赴爪島時加意考查勸導於大
 局極有裨益謹附片密陳伏乞

聖鑒謹

奏

歸併農工商局事宜摺

奏爲籌議歸併蘇屬農工商局事宜先從農業辦理以重本圖恭
 摺仰祈

聖鑒事竊照蘇省原設農務工藝兩局業經奏明歸併商務局經
 理改爲江蘇農工商務局所有蘇松常鎮太五屬農工商務飭由

該司道切實通籌次第議章妥辦在案茲據農工商務局司道稟稱竊惟厚生利用與正德兼資通商惠工以訓農爲本目下經濟困難皆由實業窳敗農則樹藝未講何以收畎畝之利源工則製造未良何以資社會之通用商則團體未固何以塞歐美之漏卮自非設法整頓斷難希進步而收效果夫商業貴有資本而尤賴工藝物品爲之灌輸工業重在精良而必須種植材料爲之權輿三者名雖有別實則相因而挈領提綱尤以農爲最要農本工商之母財政之源國家之大計在是天下之大利亦在是蘇屬四府一州自兵燹後數十年來各屬荒田統計尙不下一二百萬畝雖經設立農務局出示招墾而從前民智未闢措意者少棄利於地殊爲可惜今則風氣漸開人知實業之足恃亟宜因勢利導由地方官會同紳董先擇適宜荒田開辦試驗場講求種植水利爲之

提倡一面飭令各州縣將境內荒田彙造清冊查明有主無主官
荒民荒分上中下三等從寬定價給領無論土客悉准領種承糧
或種五穀或種桑麻木棉或種果樹茶竹或養菱藕魚苗相其土
宜各收利益姑以荒田一百萬畝計之除有主不計外繳價之田
約居其半果能全行墾種數年之後歲增錢糧爲數甚鉅際此庫
款支絀於

國計固非小補且地無曠土出產自繁則米貴艱食之虞可免野
無游民生計自足則民窮爲匪之患可消推之工得其資料以製
貨物商利其貿遷以廣銷場二者之發達亦基於此於民生亦有
裨益惟興利必先杜弊慎始乃可圖終非有整齊畫一之定章仍
不足以收實效相應擬具領種荒田地蕩章程稟請

奏咨立案等情前來 臣等復查振興農務實爲工商進步之始基

近來迭奉

明詔垂意尤切亟應欽遵辦理該司道等所議開辦試驗場及勸民領種荒地各節尙爲務本之圖應飭照章妥爲經理務收實效除抄奏並照錄章程咨部查核外所有歸併蘇屬農工商局事宜先從農業辦理緣由謹合詞恭摺具陳伏乞

皇太后

皇上聖鑒訓示謹

奏

甄錄條陳代奏摺

光緒三十三年九月

奏爲遵

旨甄核條陳選錄代奏恭摺仰祈

聖鑒事竊據候選內閣中書江西副貢徐敬熙呈稱伏讀五月二

十八日

上諭立憲之道全在上下同心共圖治理應如何切實預備逐漸施行亟應博訪周諮集思廣益凡有實知所以預備之方施行之序者准各條舉以聞等因欽此仰見

朝廷孜孜求治詢及芻蕘莫名欽感竊維治國之道首定國是國是之定在於誠信今憲政固已預備官制固已改革不惟無尺寸之功乃益形棼亂者有變法之名無變法之實故也上以實求下不以實應官制改矣而其重要樞紐仍如故也祇取無甚關繫一二部分裁汰之合併之已耳立憲之

明詔頒矣而頑固臣僚尙有以似是而非之辭熒惑聖聽刑律改良之

德音亦早下矣而有司陽奉陰違且以濫用非刑貽譏他族蓋中

出而思改公侯高

卷七

國積弊相沿非因循卽粉飾一言以蔽之曰不誠不信不誠不信匹夫尙不可行况定天下之大計哉海內皇皇窺見朝廷用人之不專施政之未定羣增疑懼有謂科舉將復而學堂必廢者有謂煙禁亦必弛者人心惶惑莫此爲甚夫至一國之人舉疑其上此國家之大患也况協以謀我者方日伺於外乎然則如之何而可曰速定國是而已

朝廷旣明明以立憲爲國是矣慮其程度未至寬假時期則一日未立憲卽一日在預備之中而非以爲偷安者息肩之地也凡承一令行一政必以憲法精義運於其間而不容妄作者與立憲宗旨相背而馳也有一於此不得謂之定國是夫定國是者上自朝廷下至百官兢兢業業念茲在茲鼓其勇往直前之心持以堅忍不拔之操雖經若何層累曲折不達其所期之地位不止精神

既具而其預備之方法可得言矣夫今日而言預備千頭萬緒然其施行次第必先擇其綱要以全力赴之則其節目可迎刃而解矣所謂綱要者有三一曰行政機關宜整理也夫行政者國家執行之職務欲其圓滿而無滯欲其完全而無缺如人身營養機關循環貫通無一時之或息也中央行政機關爲地方行政之樞紐內閣行政機關又爲中央行政之樞紐宜改軍機處政務處爲內閣以謀政令之統一明責任之專歸立憲各國皆有內閣政廳無政廳者必非立憲之國夫中國欲改造一新內閣直改造之已耳固無假斯須之預備也更何憚而不爲二曰立法機關宜組織也各國憲法著有明文立法之權操於議院現在中國人民誠不能盡有政治上能力然必待人人具有此種能力不惟中國將永無建議院開國會之一日卽歐美號爲文明各國亦難期其一具

有此能力之國民且人人具有此能力矣直接議事可耳又何煩代議士之選舉爲中國各行省其開通較早之區與邊遠樸俶之域其人具有政治能力者第有多數少數之區別有多數能力者選舉多數議員有少數能力者選舉少數議員此公例也

朝廷以立憲詔天下而臣工猶以人民參預政權爲諱言豈知憲法要義卽在於上下一心內外一氣成一有機體國家無議院是無憲法也若先令各省選舉具有政治能力富於經驗之紳董籌辦地方自治事宜備官長顧問凡關於法令之施行及歲計之預算俾令核議機關既立有責任之機能日益精練無責任之議論日益消滅爲國家前途計無以易此三日司法機關宜獨立也司法不獨立則獄訟無由平刑罰無由當此猶就本國統治權言之至於欲伸張國權必先收回治外法權欲收治外法權必先改良

刑律欲改良刑律必先使司法獨立其致力也近其成功也遠且
司法機關獨立固著明於憲法而爲萬國所通行者也夫所謂預
備者必心目中先懸有一標準而後從而規倣之之三權者立憲
之標準也標準既定推行盡力固舍此而無所爲預備矣若夫教
育行政機關不備國民之智識何由而增進地方自治機關不立
國民之能力何由而歷練則實行強迫教育與辨明自治之性質
與權限亦均不容稍緩者也嘗考日本維新之初廷臣阻撓於上
黨派紛爭於下其狀況與我同也而卒毅然改革首以五事自誓
明定立憲年限及期而憲法以成不數年間遂爲第一強國中國
土地最廣文化最古
朝廷勵精圖治不後於明治維新徒以行政方鍼未定廷臣玩愒
泄沓貽悞至今欲定大計首定國是欲定國是首在率下以誠馭

或曰每乃之考和
下以信擬請

頒布詔旨明定立憲年限以十年或十五年先以憲法要義條示
大綱公布海內使臣民咸曉然於

宮廷意旨之所在以堅其信用無敢以似是而非之莠言進者天
下幸甚至詳細節目當博採各國現行法律參酌中國實在情形
非一時所能畢其說職賦性愚直罔識忌諱謹請代奏無任戰慄
隕越之至等語臣詳加甄核該中書所言於預備立憲之方尙能
確有所見用敢代爲陳奏上備

聖明採擇所有遵

旨甄核條陳選錄代奏緣由謹恭摺具

奏伏乞

皇太后

皇上聖鑒謹

奏

謝賞大緞江綢摺

光緒三十三年九月

奏爲叩謝

天恩恭摺仰祈

聖鑒事竊臣於光緒三十三年九月初十日齋摺差弁旋甯奉到

恩賞大緞二卷江綢二卷當卽恭設香案望

闕叩頭祇領伏念臣忝綰疆符略無建樹時鵜濡之自慙竭駑鈍

以滋慙猥蒙

寵賚渥頒

慈恩曲逮雙題絢彩榮逾

華袞之褒五緘裁衣澤帶

天香之馥渥承

殊錫銘感微衷臣惟有仰戴

仁施益勤職守點月中之清露記趨朝而倏已經年被江左以
皇風念授衣而勉思及物閭閻溫飽合絹鄉麻土而咸慶綏豐
綸綍宣昭率武緯文經以共襄

邛治所有臣感激榮幸下忱謹恭摺叩謝

天恩伏乞

皇太后

皇上聖鑒謹

奏

請獎辦賑人員摺光緒三十三年九月

奏爲江北水災辦理工振在事出力人員擇尤請獎恭摺具陳仰

祈

聖鑒事竊照光緒三十二年徐海淮安各屬水災奇重饑民衆多迭經臣等奏蒙

聖恩渥被發帑截漕飭部撥給桂捐溢數並准開辦振捐及七項常捐暨代收免保留省兩項籌辦工振以拯災黎曾於上年十月奏請截漕案內聲明將辦振得力之員以及勸募振捐集有鉅款者懇

恩從優獎勵本年五月各屬工振等項一律辦理完竣又經據實奏報並請將最爲出力之員擇尤保獎奉
硃批知道了欽此查蘇省地處下游潦多旱少而尤以江北爲最甚去年六月霪雨爲災湖河並漲積潦橫溢無計疏消以致徐州之邳州宿遷睢寧銅山蕭縣淮安之安東桃源山陽清河阜寧海

州沐陽贛榆等州縣被水成災情形極重揚州江甯鎮江常州各屬次之江北連年荒歉戶鮮蓋藏小民罹此鉅災愈覺異常困苦流離載道慘不忍聞臣端方於去年九月到任正值災民紛紛外出振務尙無端倪兼之海州土匪山東曹匪先後滋擾拏獲革命匪黨復有勾結饑民響應萍匪之供人心惶惶謠言四起統計各處災民不下二三百萬深慮被匪勾結滋事立即加派營隊先靖地方一面委員分往查勘災情會辦各振並因署淮揚海道丁葆元督辦未能得力將其撤換其玩視民瘼之府縣亦經分別奏革遴委楊文鼎接署淮揚海道督率趕辦冬振兼辦清江留養並委兩淮鹽運使趙濱彥督辦揚州留養江甯藩司繼昌調署鹽巡道朱恩紱督辦江甯省城留養江蘇候補道朱宜振會同調署常鎮通海道榮恆督辦鎮江留養廣搭棚廠安集饑民以免散至四方

爲急則治標之計各處留養饑民以清江爲最多共四十九萬餘口揚州六萬餘口江甯五萬三千餘口鎮江二萬二千餘口均經優給口糧分批遣送回籍就振該司道督率員弁殫力經營沿途安靜毫無逗遛滋擾情事放振之處共計海州邳州宿遷睢甯銅山蕭縣安東桃源阜甯清河山陽沐陽贛榆十三州縣先經委員會同地方官清查戶口正散振間適值駐滬商約大臣呂海寰盛宣懷認籌錢一百萬串選派妥紳來放義振當與盛宣懷等商將官發振款飭交該紳查照義振章程分別大口小口核實散放仍由地方官監視照料冬振放畢接放春振其中義紳有不甚得力者電商盛宣懷等撤換另派接辦維時山陽桃源痞徒先後藉振滋鬧海州匪徒假造振票誑騙災民均經地方官拏獲訊明稟經電飭就地懲辦此外各處因冒振未遂造謠煽惑者不一而足亦

立見每... 年十
經隨時彈壓解散故各該義紳查戶放錢得以安心辦理毫無掣肘之虞此外徐屬之碭山豐縣淮屬之鹽城揚州之寶應江甯之上江句溧等縣亦各受有偏災均經撥給振款動用積穀並就近籌捐擇貧散給其江都丹徒交界之各沙洲被災輕重亦即酌籌款項與盛宣懷等所籌之義振一併散放並在清河沭陽海州贛榆桃源等處施設粥廠由官撥給米糧辦至麥熟爲止惟各處災民所領振款均係錢文若有錢無處購糧勢將坐困臣等督飭司道設法騰挪息借商款派員分赴奉天直隸山東等省購辦雜糧並赴安徽蕪湖四川重慶貴州鎮遠等處購辦穀米平糶數千里輪車轉運倍極艱辛災民得茲接濟領錢一千可暗抵一千數百文之用民食無虞缺乏行店不致抬價居奇卽次貧之家亦復隱受其惠其餘收養幼孩施放棉衣收當牛隻散給穀種酌發醫藥

設局收當貧民田地通飭典商減讓農具息錢等事隨時次第舉行至運河堤岸並揚州車南新三壩暨徐屬民埝各工均經撥款培修藉資保衛淮海各屬之六塘河江甯省城水西門外河道及沐陽贛榆山陽清河安東各河均經擇要疏濬一律深通竊維此次江北鉅災幸蒙我

皇太后

皇上聖德如天周恤民隱凡經臣等籲陳靡不上邀俞允

隆施稠疊百世無儔益以部臣公忠體國遇事維持卒能使數百萬待斃之災民咸登衽席實非臣等始願所及惟綜計籌辦冬春兩振及轉運平糶資遣留養並修疏隄工河道等項經營至七八月之久用款至數百萬之多在事出力人員風餐露宿曉夜奔馳

勞瘁不辭始終奮勉該司道等苦心籌畫督率有方災民實惠均霑匪徒無從煽惑下以消地方無形之患上以廣

朝廷博濟之恩裨益大局良多勞勩實不可泯伏查光緒二十三年湖北宜施之災二十六年秦晉之災均曾將辦賑勸捐出力人員分別保獎有案此次江北災情之重饑民之多款項之窘籌辦之難較之往屆湖北秦晉等省之災殆有過之自應援照辦理且現署淮揚海道楊文鼎前經奏請開復降調處分奉

硃批楊文鼎著准其開復降調處分該部知道欽此所有在事出力之司道知府各員均屬異常出力未便令其向隅合無仰懇天恩俯准將江甯布政使繼昌兩淮鹽運使趙濱彥蘇松太道瑞澂徐州道袁世廉均

賞給頭品頂戴署常鎮通海道本任江甯鹽巡道榮恆加二品銜

署江甯鹽巡道本任常鎮通海道朱恩紱徐州府知府田庚均交部從優議叙在任候補道署江甯府事本任淮安府知府許星璧在任候補道前江南揚州府現調安徽甯國府知府榮普均俟過道員班後加二品銜出自

鴻慈逾格此外印委各員及武弁人等實共有六七百人之多前次咨部單內已經量予酌減茲復督飭司道切實稽攷將勞績稍次或可以酌給外獎者概行刪除謹擇實在尤爲出力各員繕具清單恭呈御覽並懇

恩准敕部照擬獎敘以示鼓勵而昭激勸除辦振各義紳另行開單奏獎並勸募捐款集有鉅款人員應俟各項振捐截數再行奏請獎敘一面飭取各該員弁履歷咨部外所有江北水災查辦工

振出力人員擇尤保獎緣由謹合詞恭摺具陳伏乞

皇太后

皇上聖鑒謹

奏

請褒美外臣片 光緒三十三年九月

再上年江北災振外洋各國官商及僑寓之華商先後寄助捐款自數千元至百數十元不等均經臣端方分別贈給匾額以資觀感惟有日本外部大臣子爵林董勸集各公司行店捐助日金九萬一千元合中國銀元八萬七千二百九十元有零滙華濟振爲數極鉅此皆

聖德遐孚凡外洋各國遇有偏災無不發帑周恤一視同仁故該大臣慕義情殷勸助鉅款其情殊可感佩合無仰懇

天恩傳旨優予褒美以酬睦誼出自逾格
隆施謹合詞附片具陳伏祈

聖鑒謹

奏

運商報効銀兩片

光緒三十三年九月

再近年以來江南財政極形困乏上年江北鉅災籌辦工賑羅掘俱窮而地方新政要需已辦者須逐漸擴充未辦者正亟謀措立若非預籌經費幾致無從著手臣督飭司道百計籌維竊以淮鹽四岸運商素多急公好義飭由兩淮運司趙濱彥傳集勸諭去後茲據運司詳稱各商自光緒十七年以後疊次認繳鉅捐商情疲困原難再事輸將惟當此庫款支絀之時該商等報國情殷不敢不勉爲其難藉資挹注現擬報効銀一百萬兩公借銀八十萬兩

分四限在司庫及各岸督銷局呈繳其公借之款按六年分期籌還不計利息等情具詳前來伏查淮南運商近年疊認鉅捐深明大義此次復報効銀一百萬兩公借銀八十萬兩充作江南辦理新政之需踴躍樂輸尤爲難得雖非常年的款然爲數較鉅實足稍濟時艱查淮南引額自兵燹後短缺尙多前督臣左宗棠議加楚岸引鹽三百票當時部議改爲逐漸加增先後經前署督臣張之洞前督臣劉坤一奏加四十六票現在該商等既經認籌鉅款所有議加引票應行從緩以示體恤其報効銀兩合無仰懇天恩俯准援照淮商歷屆報効成案按照七項常捐及翎枝虛銜貢監

封典實銀請獎如蒙

俞允並懇

勅部隨到隨獎俾昭激勸除飭該運司暨各岸督銷局員依限催繳造報外所有運商報効公借銀款緣由謹附片具陳伏乞

聖鑒訓示謹

奏

請展鹽務交代期限摺

光緒三十三年九月

奏爲鹽務局卡交代限期太促擬請酌予寬展恭摺仰祈

聖鑒事竊查兩淮鹽務各督銷掣驗局卡交代章程經前署督臣

周馥奏定正限三個月作爲初參由前任總辦於一月內將應交正雜各款及存鹽數目造冊移交後任於兩個月內逐款覆核如果數目及鹽數相符經收解支有據並無虧短情事卽行接收清楚出具印結造冊送由運司復核加結詳請咨部如初參限內未能結報應查取遲延職名咨參議以罰俸一年再展限兩個月作

爲二參逾限不結或有虧空據實揭參議以革職等情業經部議照辦旋據各岸督銷局總辦道員先後具稟咸以限期太促礙難依限結報又經前署督臣周馥咨部展緩接准部咨以交代正限業經奏定未便據咨率改所稱分局距總局較遠期票又須遲待專指移交爲難情形是前任交代數過五十萬兩以上僅予正限一月或虞不及應如何分別展限行令察核情形奏明辦理當經飭行運司妥籌詳辦據兩淮鹽運司趙濱彥移會各岸督銷局道員將款目繁簡情形往復考查折中定議詳請奏咨前來復查各岸局銀錢款目本已紛繁分銷道途遠近不一每當前後交接之際前任經手事件既須詳細鈎稽而分銷散漫文牘往來一經駁查動須時日若責前任於一月內將應交正雜各款及存鹽數目造冊移交是遵限既實有不能逾期卽有干吏議殊非綜核名實

之意自應酌展限期以昭平允惟鄂岸積弊則以分銷虧欠已撤之員無從交代辦理棘手又不僅在期限太嚴現當嚴核交代之時自宜酌定畫一章程斷不能稍有歧異所有兩淮鹽務各局卡交代擬請定爲正限五個月作爲初參由前任於三個月內將應交正雜各款及存鹽數目造冊移交後任於兩個月內逐款復核如果款目鹽數相符經手解支有據存儲無虧卽行接收清楚出具印結造冊送由運司覆核加結詳請咨部日後如查有虧短漏交濫抵均惟接收之員是問倘初參限滿未能結報仍照原案查取遲延職名議以罰俸一年再行展限兩個月作爲二參逾限議以革職至鄂岸分銷虧欠前經部議如實係商欠准取具殷實鋪商保結卽作爲交代現款此外未清各款仍著落該督銷賠繳等因是分銷虧欠既不能剔除另籌以歷任遞移之款將歸一任清

償辦理殊難允協然立法之初亦未便稍從寬縱查分銷委員均係總辦道員自行遴委如有虧欠似宜查明何任所委卽責令原委之道員先行賠繳由現辦道員核收歸入交代結報其有未能如數賠繳者由接收之員查明詳請專案參追俾交代結限不致因此延誤仍將虧欠之分銷委員分別參革監追歸還墊款以杜有心侵挪塌騙之弊其運司覆核期限及監盤委員辦法均查照原案辦理各局卡交接之員仍俟此案接准部覆核定後再行起限以歸一律所有酌展鹽務局卡交代限期緣由除咨部外謹恭摺具陳伏乞

皇太后

皇上聖鑒敕部核覆施行謹

奏

請嘉獎洋員片

光緒三十三年九月

再上年在滬中西官紳因江北災重款絀艱辦華洋義振公會勸集捐款共銀一百二十五萬餘兩公舉西員趕運麵粉等項分赴災區平糶復將糶價濬河平路足以輔官義振所不逮並由本地教士妥爲照料辦理公平地方安靜災黎得資接濟裨益良多除該會經理之中國紳商已擇尤彙奏請獎外查該洋員李德立伊德李佳白克敦華殷立斯海格思施畢孟佳蘭貝賀璧理葛爾盟蓋恩明米德安慕賡揚戴德明林亨理林嘉美葛錫萊陶勒李德杜格魏德門巴慎士穆敦等集捐助振竭力經營摯誼熱忱極爲難得相應懇

恩傳旨嘉獎俾資觀感謹合詞附片具陳伏乞

聖鑒謹

奏

請獎敘辦賑人員片 光緒三十三年九月

再已革湖北候補道任子齡前經 臣端方在於湖北巡撫任內會同升任湖廣督 臣張之洞奏參請飭註銷省分勒令回籍奉

上諭尙屬輕縱著卽行革職交地方官嚴加管束等因欽此嗣因
恭逢

皇太后七旬萬壽欽奉

恩赦經宜興縣紳士陳任暘等稟經 臣端方奏請銷去管束字樣
奉

硃批著照所請該部知道欽此上年徐海淮安各屬地方水災極
重籌辦工振事務紛繁該革員籍隸江蘇情形熟悉自銷除管束
後經 臣端方派委會同江寧藩司繼昌設局藩署襄辦振務該革

員盡心經理均協機宜歷時至八月之久夙夜在公始終奮勉嗣後江北工振獲臻就緒該員贊畫之力居多復查該革員前在湖北歷辦教案匪案迭著勤勞經張之洞奏保歸候補班補用奉旨允准嗣於年滿甄別案內復經張之洞稱其吏事老練才具優長亦已早邀

聖鑒原參係因綜核賠款一事與在事司道意見不同恐於要政或生阻力亦因其並無實在劣蹟故僅請飭註銷省分勒令回籍其情似尙可原伏讀本年五月初三日

上諭凡參劾人員遇有勞績保獎准將被參緣由詳細具奏仰見朝廷於慎重名器之中寓愛惜人才之意今該革員任子齡襄辦工振著有勞勩未便壅於上

聞應如何給予獎叙之處出自逾格

奏
恩施謹合詞附片具陳伏乞

聖鑒謹

奏

藉紓商力片

光緒三十三年九月

再通州天生港係在江海鈔關轄境經前署督臣周馥會奏擬請
暫作起下貨物之不通商口岸修築江岸用費由大達輪步公司
息借興辦工竣後卽於所收稅項撥還欽奉

硃批外務部戶部議奏欽此旋准議復以天生港一處應祇作爲
起下貨物之口岸不必預籌開埠通商所設分關卽作爲江海鈔
關之分卡至關埠兩項工程約需銀十萬兩息借大達輪步公司
款項以爲設關築步之用應准照辦等因奏奉
硃批依議欽此咨行前來當經分行遵辦並委員駐工稽核各在

案茲據江海關道瑞澂詳稱迭商稅務司妥訂關章一面將碼頭江岸如何辦理派理船廳與公司商定自上年十月開工至今工程大半告成親詣查勘該處正當江湖要衝施工較難而所做各工穩固如法西人之往觀者亦頗稱許該公司本備有躉船兩號就此接造碼頭浮步其江岸應行修築之處均照案暫借商款興辦惟現據該公司總理翰林院修撰張謇開送各工用款清摺聲稱已辦之工如躉船兩號及鐵浮筒船兩隻木跳兩座共用庫平銀八萬七百四十八兩一錢請別歸大達公司自行籌認其石駁岸碼頭馬路等工程暨員司薪資一切開辦經費又應辦未辦之工各建築關房驗貨場各一所及堤內開港一道造橋二道統需庫平銀十萬六千九百三十四兩三錢均須由官籌認現在商墊竭蹶請迅賜籌款撥還等情查躉船鐵浮筒船木跳等項該公司

請別歸商認係與奏案相符其歸官認還各款雖較原估溢支銀六千餘兩實因員司薪費雜支等項原估皆所未及一切工費諸從節省核與原估有減無增辦理甚爲切實至公司墊用一切工料應歸官認之款照案須在天生港收稅項下陸續提還惟此項息借商款議定周年八釐照公司借墊十萬六千餘兩核算歲需息銀八千四百餘兩若必待該港收有稅數始行撥還無論甫經開作口岸將來稅數能否暢旺尙無把握卽以前次所估每年一萬餘兩收數約計還息之外已屬所存有限不能兼顧還本還愈遲則耗息愈多公款旣不免虛糜商力亦倍形艱窘不如俟全工告竣自明年起統在江海關常稅項下照數先行撥還似屬官商兩便有益無損至該港分卡章程現據稅務司請照大通等六處章程辦理毋須另訂以免歧誤詳請核辦前來 臣查該公司所辦

工程既據江海關道詣勘穩固如法所請將躉船各項別歸公司
籌認與案相符自應照准其由官認還各款均係核實開報現因
商力竭蹶且經年耗息公家不免受虧該關道請俟全工告竣自
明年起統在江海關常稅項下照數先行撥還既可藉紓商力於
官款省費亦多兩有裨益除飭該關道督飭將全工趕緊告竣仍
會商稅務司將該分卡章程復加體察應否斟酌損益妥議稟辦
並將清摺分咨外務部度支部查照外謹會同署理江蘇巡撫臣
陳夔龍附片具陳伏乞

聖鑒訓示謹

奏

籌設寧垣鐵路片

光緒三十三年九月

再江寧省城外下關地方早經開闢商埠現在滬寧鐵路又以該

端思改公長高

卷七

五十

處爲首站轉瞬路工告竣百貨流通商務必日臻繁盛惟城內地
段遼闊市場麇集西南下關濱臨大江遠在城北平日行旅出入
貨物往來每形不便邇際江防緊要徵調頻仍由城內以達下關
往返動須經日尤恐軍行濡滯貽誤事機查浙江鐵路於杭州省
城添闢城門接築支路業經奏准開辦在案寧垣地面較廣自應
仿照辦理擬卽由下關起築一支路開舊閉之金川門接續入城
築至中正街適中之地爲止計路線七英里有奇行駛汽車一切
統歸官辦當經派委現辦江南商務局候補道王燮專任規畫建
築事宜現辦裕寧官銀錢局奏調湖北候補道孫廷林專任籌備
經費事宜並以滬寧鐵路總工程司洋員格林森爲名譽參議員
俾資贊助所需工料等項銀兩統由官銀錢局暫行承任籌借摶
節支用一俟開車收回成本卽陸續撥還歸墊於公款並無出入

從此商民稱便緩急無虞且路經官辦利權在我可免滬寧公司得步進步深入城中似亦不無裨益除飭購料興工並將路線繪圖貼說咨送郵傳部立案外理合附片具陳伏乞

聖鑒謹

奏

認捐振款請核獎片 光緒三十三年九月

再前因江北春賑款項奇絀籌措萬難據調署常鎮通海道榮恆稟稱認捐賑款銀十萬兩先行提借分作十年攤還卽經通飭各司道一體仿辦並由 臣端方認捐銀十萬兩 臣夔龍認捐銀四萬兩以爲之倡嗣據江寧藩司繼昌江蘇藩司陳啟泰各認捐銀二萬兩兩淮鹽運使趙濱彥蘇松太道瑞澂各認捐銀十萬兩調署江南鹽巡道朱恩紱認捐銀四萬兩江安糧道譚啟宇徐州道袁

世廉江西廣饒九南道文炳會同前署道汪瑞闈各認捐銀二萬兩升任江蘇糧道陸鍾琦認捐銀一萬兩助濟江北災賑又升任安徽藩司馮煦認捐銀二萬兩分助江北皖北災賑各一萬兩共湊集銀六十萬兩先於司道各庫正雜款內借支濟急不分正署代理各按十年攤還業已據實奏請立案奉

硃批度支部知道欽此查該司道等目擊沈災慨捐鉅款原稱不敢仰邀獎叙惟時當春賑急迫挪墊俱窮非賴此項捐款接濟大局幾不可支此次各省官紳捐助賑款均經隨時照章奏獎在案該司道攤捐銀兩爲數極鉅似宜分別給獎庶足以資觀感而策將來除_臣端方所認攤捐銀十萬兩_臣夔龍所認攤捐銀四萬兩不敢仰邀獎敘外所有各司道攤捐賑款擬請各按在任年月日期應攤銀數查照現辦賑捐章程隨時咨請核獎並准移獎子弟

叔姪其有尙未遷調所攤捐銀已有成數願照數先行移獎者亦聽其便相應請

旨敕部立案以資遵守謹合詞附片具陳伏乞

聖鑒謹

奏

請開復道員摺

光緒三十三年九月

奏爲已革道員短徵關稅業遵新章賠繳並查明原案實無朦混情弊懇請開復原官恭摺仰祈

聖鑒事竊查已革常鎮通海道郭道直因經徵揚由關稅詳報光緒三十年一屆徵收數目經戶部以未遵奏定章程奏明奉

旨交部議處復經吏部議奏將郭道直先行革職奉

旨依議欽此臣夔龍到任後卽嚴飭該革道遵照新章將是屆短

徵稅銀如數賠繳足額並查明此案當郭道直造報之初正詳而外確係另有附詳前撫臣陸元鼎先以查與新章不符未將附詳具陳但據正詳入奏嗣後補奏補咨輾轉稽延已在部駁之後實非扶同徇隱亦非朦混具詳奏請將郭道直准其本案開復原官經部奏駁咨行飭遵在案上年十二月間臣端方准度支部咨據郭道直呈稱揚由關部定稅額新章奉到之時已在關滿兩月之後支放各款無從收回是以備具正附兩詳請予一併奏報有案可稽似與意存朦混者有間咨行查明該革員當日正附兩詳錄案送部核辦當經照錄原卷正附兩詳咨送復准部咨核其情節該關道尙非有心朦混惟江蘇巡撫奏報該關期滿何以僅據正詳入告並未將附詳隨案聲明且同此一案同日具詳而前後兩奏竟遲延至三月之久現雖將原卷咨送到部尙有應行查核之

處移咨兩江總督將此案原委查清奏明辦理等因臣等伏查此案大概情形臣夔龍前次復奏摺內業經詳細具陳至部咨飭查各節卷查光緒三十一年十一月間前撫臣陸元鼎咨戶部案內聲明該道附詳各節雖係實在情形惟新章原奏係由督臣承准轉行卽經批候督臣主政會奏一面先將正詳照案奏咨又三十二年二月間前撫臣陸元鼎附片具奏案內聲明前據郭道直將徵收四正口稅銀照案具詳當經據情奏報其二十三處分巡稅銀因該革道另詳仍請循舊辦理並不遵照新章詳辦是以未經核奏各等語是該撫臣核奏此案之時係以正詳爲年例具奏附詳爲有關新章當時因關期屆滿奏報不能遲延遂先據正詳入告將附詳批候督臣核奏前署督臣周馥以該關期滿向由撫臣奏報亦批候撫臣核奏兩不接洽迨至該革道赴蘇面陳一切前

撫臣陸元鼎始行據情補奏以致時日有稽此查明撫臣未將該革道正附兩詳同時具奏及前後兩奏遲延三月之實在情形也查戶部原奏以該關道隱匿稅銀有心朦混請

旨先行交部議處經吏部議照官員朦混者革職私罪先行議以革職在部臣就事論事本屬毫無成見故一經該道呈訴錄案咨送以後卽以核明情節尙非有心朦混咨飭將原委查清奏明辦理茲經臣等會同確查該革道郭道直既非朦混具詳前撫臣陸元鼎亦非故爲稽延出奏自應遵照據實奏陳况該革道短徵銀兩前已如數賠繳核與各關監督能於年限內將短額銀兩全完者准將所得處分卽予開復例案亦屬相符該革道前次在任數年辦理內政外交均臻妥洽人才甚屬可用合無仰懇天恩將革任常鎮通海道郭道直准其本案開復原官以資効用

出自逾格

鴻施除分咨吏部度支部查照外謹合詞恭摺具陳伏乞

皇太后

皇上聖鑒訓示謹

奏

端忠敏公奏稿

卷九終

五十四

端忠敏公奏稿卷九終

端忠敏公奏稿卷十

關稅援案議結摺 光緒三十三年十一月

奏爲淮安關征收稅鈔一年關期屆滿災重貨缺稅收銳減情形懇請從寬議結恭摺具陳仰祈

聖鑒事竊查淮安關稅務自裁撤監督改派道員會同淮安府接辦後所有試辦情形業經先後奏報截至三十二年七月底止今自三十三年八月初一日起至三十三年七月底止又當關期屆滿自應照案辦理茲據辦理淮宿海等關稅務署江蘇淮揚海道楊文鼎署淮安府知府羅章詳稱竊照淮宿海三關稅課從前原定正額銀二十五萬四千三百六十三兩六錢二釐又加盈餘銀十一萬兩統共額徵銀三十六萬四千三百六十三兩六錢二釐嗣因黃河改道江海通商內河常稅驟形短絀每年僅征銀五六

萬兩或三四萬兩不等自奉

旨裁撤監督改章派委接辦歷經革除積弊化私爲公逐年收數雖已遞加惟因來源遠遜從前究難規復原額核計前淮安府知府汪樹堂自光緒三十年九月初一日接管關務起至三十一年八月三十日止經徵一年共征銀十七萬四千三百四十九兩五分七釐接辦江蘇候補道穆克登布自三十一年九月初一日起至三十二年七月三十日止連閏扣足一年共收銀二十三萬六千三百九十九兩六釐均經詳請奏報奉部議准免其賠繳上年自十月後災重貨缺所有稅收頓減情形已於上屆詳內據實瀝陳並蒙奏明在案本年二月文鼎奉委兼管於三月初一日接辦認真徵收計自三十二年八月初一日穆克登布接徵起至三十三年二月三十日卸差止計七個月淮安關收銀三萬九千五百

九十四兩七錢七分九釐宿遷關收銀一萬四千四百三十一兩
二釐海關收銀二千一百十九兩七錢三分三釐共收銀五萬六
千一百四十五兩五錢一分一釐文鼎自三月初一日接徵起至
七月底止計五個月淮安關收銀一萬九千四百五十九兩五錢
四分宿遷關收銀四千一百六十五兩八錢七分三釐海關收銀
一千三百五十六兩五錢五分三釐三關共收銀二萬四千九百
八十一兩九錢六分六釐均已連同各口稅銀一併在內兩任合
征一年期滿統共徵收正稅銀八萬一千一百二十七兩四錢七
分七釐內有兩淮鹽鈔銀一萬兩蓆抽銀四兩五錢三分未經解
到又淮安倉項下徵收茶稅銀十八兩六錢四分五釐海關征收
櫟頭鈔銀三百一兩一錢四分四釐以上二款遵例儘收儘解不
入比較另收加徵菸酒稅銀一千八百二十八兩三錢六分六釐

係另款存儲聽候部撥不在正額盈餘之內又收加一火耗銀六千七百五十七兩一錢七分飯食銀一千四百十兩六錢一分八釐查出漏報罰倍銀二千二百五十二兩五錢五分一釐遵照詳定章程儘數抵支經費不再動用正項伏思稅課之盈虧固在辦理之得法尤賴年穀之順成必須天時人事相輔而行詎料上年自夏徂秋始則陰雨連綿二麥腐爛繼則大雨流行河湖並漲先後所種豆糧全行淹沒被災情形以淮徐海爲最重饑民遍野闔閩蕭條以清淮一隅而論懋遷歇業者不下數百家市面清淡百貨滯銷日收不過數兩十數兩不等甚至數日無一貨船過關詢之鄉老僉稱此等奇災不獨目所未睹亦且耳所未聞上屆稅收之旺餅豆收數約居十之七雜貨收數約居十之三乃夏秋霪雨爲災所種早晚各豆固已顆粒無收其餘南北雜貨大率繞由贛

榆之青口海州之臨洪等口出海或由洪湖三河行走他如生油土酒花生金針菜等類亦皆款收間有出售皆爲洋票護送照章沿途驗免此外米麥雜糧一律奉文免稅是以穆克登布在差時雖值九十冬臘極旺之月而每月收數不過五六千兩至七八千兩不等文鼎自三月接辦正當大災以後又值四五六七等月向來稅務極淡之時每月僅收四五千兩上下此本屆水災太重稅務銳減之實在情形也上年關期報滿當已隨案聲明文鼎仰蒙委任敢不力求整頓無如此次江北大災爲從來所未有來源枯竭實非人力所能施本年夏間稅務大臣飭派司員來關調查駐關月餘皆所自覩現在銖積寸釁悉數歸公實已不遺餘力而艱難情形與長淮捐局相同洵屬共見共聞斷難欺飾現查本屆收數雖比上兩屆爲少而比較歷任監督收數尙屬有盈無絀卽以

穆克登布一人經收稅項比較前後亦復懸殊此實迫於時會使然非敢稽征不力擬請奏懇

敕部按照成案從寬議結至部議有試辦三年通計其三年收數並行請

旨欽定稅額等語本屆已滿試辦三年期限惟是年歲有荒歉商貨有盛衰若衡以近三年收數則本屆之八萬餘兩不獨與穆克登布之二十三萬大相懸殊亦且不及汪樹棠十七萬之半且以穆克登布自爲比較則上半年與下半年同係一人經理亦復前後互異是收成之豐嗇既難懸揣卽稅課之盈絀未可預期設或部定之額稍多承辦者無從賠累如定額從少則公家又隱受虧折竊惟本屆大災爲百餘年所罕遇收數之奇絀似亦不能據以爲衡現查本年收成尙稱中稔仰乞奏明暫准展緩一年容再竭

力稽徵俟下屆期滿察核收數多寡再將前兩屆收數併入聽候
由部酌中定額請

旨欽定以重稅務等情詳請具奏前來臣查淮安關稅務自改章
派委接辦以來切實整頓稅務本日有起色本屆因水災奇重商
貨來源枯涸稅收銳減上屆已隨案聲明今該道府等所陳確係
實在情形委非稽徵不力所致核其本屆收數雖較上屆遠遜然
值此大災以後徵收尙有此數衡之未經歸併以前豐稔之年歷
任監督收數尙屬有盈無絀實已竭盡心力涓滴歸公所請將試
辦期限展緩一年亦係爲實事求是起見合無仰懇

天恩俯准敕部援案從寬議結並暫准展限一年再行酌中定額
請

旨欽定以重權務而昭核實除飭將本屆收數造具四柱清冊另

行咨部查核外所有淮安關徵收稅鈔一年關期屆滿懇請援案議結緣由理合恭摺具陳伏乞

皇太后

皇上聖鑒訓示謹

奏

撤銷船會總理片

光緒三十三年十一月

再前准部咨以沿江沿海各省近接通商口岸航業最盛華船冒掛洋旗每致釀成交涉奏准咨行各省籌辦商船公會發給船旗牌照與洋商一律保護等因當有候選同知朱馮壽稟辦鎮江下游商船公會業經咨部核准嗣又據各幫船董胡學里等公稟請在金陵下關設立長江上游總會舉丁憂江蘇泰興縣知縣捐升道員龍璋爲總理又經臣咨部加委並飭取章程送部核復各在

案茲查龍璋所擬章程該會區域界綫下至鎮江上抵湘鄂岳州
宜昌等處包舉五省沿江數千里聯絡節制已屬爲難乃自試辦
以來疊准湖廣贛皖各督撫臣先後咨商或因各省已設公會區
域不分互相爭執或查明並無保護航商實事祇圖肥己包攬抗
公而最可異者爲具稟之胡學思等自稱爲鄂省航業總董乃漢
口各船幫並不知爲何人尤難保無捏詞朦保情弊臣正委員飭
查間復准部咨據鎮江航商楊長標等赴部稟控上游船會侵越
航路濫發旗牌違章索費等情行令併案核覆接據委員查明龍
璋於試辦期內將牌照派人四出攬售索費自一元至三元不等
及該船裝載貨物出口又須視載貨之多寡定索費之數現在船
商交怨羣思退會等情稟復前來臣查船會之設原爲保護航商
抵制洋旗起見開辦未久彼此爭競已難取信於人若又攬售牌

照按貨索捐直以船會爲歛費之媒非特洋旗無從抵制且恐愈
逼愈多實與設會宗旨大相刺謬龍璋以丁憂人員藉辦船會爲
名妄思包攬以致航商怨詬物議繁興亦屬不知檢束惟念該員
前在泰興任內辦理學堂頗爲得力尙非不堪造就之才相應請
旨將丁憂江蘇泰興縣知縣龍璋捐升道員之案

敕部撤銷不准干預船會事務以示薄懲其長江上游商船公會
並撤去總會字樣由各省督撫臣體察情形斟酌辦理至鎮江下
游船會有無流弊仍由臣隨時查明咨部核辦以安船業而順輿
情除咨部外謹附片具陳伏乞

聖鑒訓示謹

奏

水師總兵開缺摺

光緒三十三年十一月

奏爲長江水師總兵傷疾舉發陳請開缺回籍恭摺具陳仰祈
聖鑒事竊據長江水師瓜州鎮總兵高光効呈稱總兵前因感冒
時證觸發舊傷稟蒙批飭加意調理兩月以來延醫服藥時證雖
已就痊惟曩日軍營打仗備受勞傷兼之歷年籌辦營伍事宜心
力交瘁近年精神衰憊步履維艱以致傷疾舉發一時難以全愈
方今時艱孔亟伏莽繁滋整頓江防尤關緊要自維衰病之軀卽
使事事認真督率講究而無形之損失已多惟有呈懇奏請開缺
回籍俾免貽誤等情前來臣等伏查該總兵高光効久歷戎行戰
功卓著自漢陽鎮總兵調補瓜洲鎮總兵先後二十餘年廉明樸
實辦事認真現雖年逾八旬而於所轄水師仍復整飭弗懈前以
傷疾舉發稟請開缺回籍臣等因係老成宿將威望足資鎮懾勸
令加意調攝茲該總兵復因江防喫緊未肯以病軀戀棧實係出

於至誠合無仰懇

天恩俯准長江水師瓜洲鎮總兵高光効開缺回籍出自逾格

鴻慈除所遺總兵員缺另由臣等遵章擬定正陪請

旨簡放外所有長江水師瓜洲鎮總兵高光効因病陳請開缺緣

由謹合詞恭摺具

奏伏乞

皇太后

皇上聖鑒謹

奏

飭解學堂協款片光緒三十三年十一月

再兩江師範學堂經前署督臣張之洞創辦爲造就寧蘇皖贛各屬中小學堂教員之地章程完備規制精宏實關三省教育命脈

所需常年經費奏准每年由江蘇藩司協籌銀四萬餘兩安徽江西兩省各按學生額數每名每年協助龍洋一百元稍資津貼不敷尙多由江寧藩司在銅元餘利項下按數撥支在案自開辦以來蘇藩司每年應協銀兩亦經議定將寧局代蘇增鑄銅元盈餘按年儘數撥充從前銅元暢銷盈餘較厚尙可勉強抵支乃自奉部章限制鑄數兼之銅貴錢賤餘利寢微且又分作十成以四成提充練兵經費以三成撥還造幣分廠欠款僅以三成作爲地方新政之需此項盈餘已成無著是蘇屬議定抵撥之款自銅元改革後徒有協助之名並無抵撥之實至贛省應協之款僅於三十年據江西藩司報解龍洋五千元皖省則迄今五年絲毫未解而該堂經費按月待支不能半途中輟亦難無米爲炊均經飭由寧藩司陸續籌墊本年按章添招新班學生三百人並增派教習各

員額支活支需費更鉅籌措愈難惟念興學爲當今急務而師範尤爲教育本源不得不免爲其難設法推廣第財政困難各省皆然以三省公共之學堂而令江寧一省獨任其費於理固屬不平於力亦有未逮疊據江寧布政使繼昌以該堂經費無款代墊詳請另行核撥前來臣仰屋興嗟持籌乏術惟有按照原案嚴飭蘇皖贛三藩司將應協各款按期報解通力合籌以期衆擎易舉擬令蘇藩司將每年應協銀四萬餘兩分上下兩學期另籌的款滙解上學期應解銀兩限定於正月解到下學期應解銀兩限定於六月解到不准稍有蒂欠皖贛兩省按名津貼之款亦令如此辦理並飭將以前欠解銀兩一併籌解歸墊倘再視爲具文卽行據實糾參以儆玩泄除飭蘇皖贛三藩司遵辦並咨部查照外謹會同署江蘇巡撫臣陳啟泰安徽巡撫臣馮煦江西巡撫臣瑞良附

片陳明伏乞

聖鑒謹

奏

撤銷革員處分片

光緒三十三年十一月

再已革直隸候補知縣洪壽彭前於光緒三十年經前署兩江督
臣李興銳奏調江南差委歷充督署文案三十一年御史黃昌年
奏參前署督臣周馥案內稱道員曾廣祚賄買大通督銷差文案
知縣洪壽彭串通家丁張貴及秦克昌彭文蔚等從中說合該督
殺秦克昌以滅口改秦姓爲岑姓等語奉

旨派升任湖廣總督張之洞查辦當經查明岑盛昌卽岑克昌係
督署衛隊親兵曾給洪壽彭家丁暫代服役旋即回隊因事斥革
串通彭雲蔚等向候補道曾廣祚詐騙謂可託洪彭壽家丁張貴

經手賄說大通督銷差使曾廣祚爲其所愚屢拜洪壽彭接晤一
次時猶未知有岑盛昌等勾串招搖之事嗣經覺察卽稟請澈究
並將家丁張貴交出聽候查辦周馥派兵備參謀處訊出實情將
岑盛昌照軍法處斬彭雲蔚永遠監禁張貴訊不知情保釋候補
道曾廣祚參革張之洞覆奏內稱江蘇近年官場習氣實爲惡劣
賄買差缺營求撞騙之事時有所聞該督承積弊之後嚴刑重典
能令匪徒震悚洵足以挽救頹風請免置議該員洪壽彭不知遠
嫌請

旨交部嚴加議處經吏部照縱容家人長隨在任所招搖詐騙革
職私罪例議以革職行知在案臣查岑盛昌係屬革勇並非洪壽
彭家人其家人張貴訊不知情實無縱容情事卽謂岑盛昌曾經
暫代服役亦僅失察與縱容不同該員雖與曾廣祚晉接稍涉嫌

疑而先不知有招搖之事一經查出立即稟請究辦照例均在免
議之列張之洞原查情形本極公允况周馥承江南官場習氣積
弊之後賴該員於此案自行查明據實舉發得以有所假手嚴刑
示儆是張之洞原奏所稱挽救頽風似該員亦不爲無力伏查該
員服官直隸卓著賢能久爲前大學士直隸總督李鴻章及今外
務部尙書前直隸總督袁世凱所器賞前署督臣李興銳歷任江
西廣東巡撫閩浙總督皆辟置幕僚尤爲倚重臣於三十年署理
兩江總督時洪壽彭曾在署中當差深知其人操履不苟學識優
長爲近今不可多得之員當此需才孔亟之際廢棄殊屬可惜臣
爲愛惜人才起見合無仰懇

天恩俯念該員原查並無縱容家人招搖詐騙情事將四品銜升
用直隸州知州直隸候補知縣洪壽彭所得處分准予撤銷仍留

江南差遣委用出自逾格

鴻慈謹附片具陳伏乞

聖鑒訓示謹

奏

選派學生留學摺

奏爲選派學生赴美留學謹將辦理情形恭摺具陳仰祈

聖鑒事竊臣前次銜

命出洋考察各國政治行抵美洲參觀美國各種學校與各校校長周旋款洽對於中國教育前途極爲關注其耶路榭尼路大學威爾士利女大學均願贈給學額惟須程度合宜方可免收學費臣茲任兩江札飭寧學司就江南各學堂詳慎挑選其蘇皖贛各學生由各該學司及教育總會咨送投考分科考試評定錄取據

署江寧提學司陳伯陶詳請咨送前來臣傳見諸生考其學業氣質均堪造就遴委候選道溫秉忠護送赴美趕於美國學校下半年開學之前按期分送肄業並分咨學部及駐美使臣梁誠各在案該員溫秉忠帶領學生於中歷七月二十六日行抵美國馳赴各校謁商入學事宜男學生胡敦復等十一名已一律收入計耶路大學四名榦尼路大學七名威爾士利大學以女學生胡彬夏王季茝曹芳芸三名程度微有未合令入附設預備學堂俟試驗及格再行升入其宋慶林一名另擇相當學堂送入伏查此次派送留學美洲各學生原因耶路各校贈有學額而其程度能否贈給學額尙須待各校校長察看功課方能定議所有學費及宿膳各費仍應一律照給查學部定章留學美洲大學每人每月美金八十元預備學堂比照大學專門減去五分之一每人每月美金

六十四元此次派送男女學生共十五名除內有旅寧浙江男學生曹雲祥一名學費咨由浙江撫臣籌還不計外共男學生十名每年共需美金九千六百元入預備學堂女學生四名每年共需美金三千七十二元兩項併計美金一萬二千六百七十二元札由寧蘇皖各藩司籌撥滙解援案每人月給贍家銀十二兩由該管學司給摺支領所有治裝費以及川資旅費等項先後札飭寧藩司發銀一萬五千兩交由護送員溫秉忠核實支用造報到美後如有贏餘卽存駐美使署留作各學生學費津貼之用復經咨由駐美使臣派二等參贊候選知府容揆爲江南留美學生監督由江南滙給津貼每月美金一百元以資辦公前項學費卽由該監督收領轉發需用款目應准作正開銷除咨度支部學部查照外所有選派學生赴美留學緣由謹恭摺具陳伏乞

皇太后

皇上聖鑒謹

奏

遷民實邊無庸置議片

光緒三十三年十一月

再准度支部咨議復御史王步瀛等奏江北水災遷民實邊宜乘時會一片奉

旨依議欽此行令欽遵辦理當經電商直隸奉天吉林黑龍江伊犁熱河新疆各督撫將軍都統墾務大臣會籌辦法暨分飭江寧藩司籌賑局淮揚徐州二道一體察酌情形切實籌議並以徙民實邊事體重大非得熟悉邊情之員協同籌議未足以臻周妥經臣奏調記名副都統景賢來寧差遣奉

硃批著照所請該衙門知道欽此嗣該副都統到寧當卽委令馳

赴淮徐海各屬災區會同地方官妥議稟辦先後接准各省電咨
僉以遷民墾荒一事極爲煩難不獨籌給川資及牛糧籽種農具
窩棚各項需款甚鉅一時實無此財力且民間有室家者大都安
土重遷其願遷者類係無業遊民子身遠徙轉恐流而爲匪滋生
邊患窒礙實多又據淮徐二道及該副都統稟稱民情游惰不樂
務農遠行尤非所願勢難強迫昔年銘軍駐徐奉調徵台紛紛脫
逃甲午出關亦多不肯應募可爲明證各等語原奏之王步瀛適
奉

旨補授江蘇常州府現已到寧當令其妥籌辦法據稟前奏陳遷
民實邊宜乘時會一摺係爲當時權宜之計今歲年穀順成災民
已經復業未便過拂輿情且所陳出奏時疏於考查不知茲事體
大未易輕言舉辦臣察核情形現在財力艱窘籌款旣屬爲難民

情又多不順一再籌商飭議僉謂窒礙甚多卽原奏之王步瀛亦且一籌莫展此舉事難實行應請無庸置議所有原派副都統景賢辦理遷民一節應飭銷差查該副都統才識優嫻兼通交涉近來南洋洋務日益繁賾關係均極重要佐理正在需才應請將該副都統仍行留寧由臣派委在兩江洋務局當差俾得隨事匡助裨益交涉除分咨外務部度支部陸軍部查照外理合附片陳明伏乞

聖鑒訓示謹

奏

變通武職補缺摺 光緒三十三年十一月

奏爲兩江武職補缺擬請變通辦理以重營伍恭摺仰祈

聖鑒事竊照各省武職實缺人員本與文員同有地方之責邇來

在符不靖盜賊潛滋整頓吏治固爲治本之法而營務之廢弛亦一最大原因果使地方武職得人則緝捕勤能未嘗不足以消隱患兩江水陸交衝地方遼闊人心浮動伏莽素多卽如浙江邊界之梟匪山東邊界之曹匪贛州府屬之拳匪長江上下之哥老會匪以及巢湖幫洪幫各匪到處勾結防不勝防兼之海外逆匪黨夥潛來內地希圖煽誘滋事雖有精兵重鎮祇能撲滅於事後未能消患於事前是則預弭亂端之責任尤不能不屬望於地方武員無如例章嚴密資格限人雖有軼羣之材不能破除成例以致城守屯防重任盡付之僅能合例不能勝任之人營務安有起色雖經隨時撤換參辦而貽誤地方已非淺鮮現欲因時制宜斷非變通辦理不足以勵真才而責實效查部定武職補缺章程副將參將游擊都司四項以十缺爲一輪一儘先二預保卓異三儘先

四揀發五儘先六應補七儘先八捐輸九儘先十應升守備以十
二缺爲一輪一儘先二預保卓異三儘先四揀發五儘先六應補
七儘先八武進士九儘先十捐輸十一儘先十二應升是都司以
上每輪儘先佔其五缺守備一項每輪儘先佔其六缺在部臣定
章之時適承咸同軍興以後保列儘先者人數極衆且皆在營立
功之員自非寬其出路不足以示優異現距軍務肅清之日業已
三四十年至今日而仍守昔之定章殊非當日部臣之用意且新
案保獎定例綦嚴非有戰功卓著及擒斬大股賊匪者概不得保
儘先字樣是以保尋常者居多保異常甚少定章儘先一班須按
奉

旨日期先後挨次序補如聲敘人地不宜至多不得過二十名此
項名次在前之員大率皆同治初年保案在標已歷多年其中傑

出之才迭經歷屆搜羅無不補有實官而去所餘之候補者半多年力衰憊暮氣潛乘以資格論則均列前茅以才力論則萬難遷就積年愈久積人愈多若仍拘守舊章祇求才於二十名之內竊恐難得其人不免濫竽充數此外卓異一班多因力難赴引以致輪補無人捐納一班人數亦屬無幾現在武科停罷已閱數年將來武進士一班必致無人可補惟應補應升兩班從前人數有限現在人數較多應升人員皆係現任實缺情形較熟歷練較深每輪僅補一人升階未免遲滯守備應補一班乃係各項世職人員名數尤爲擁擠以上各班或人少缺多將不免有乏才之慮或人多缺少亦無以爲鼓勵之資論者或謂各處綠營近議次第裁汰武職補缺何足重輕不知綠營自議裁之後所留者或處邊疆或當衝要或爲華洋雜居之所或爲匪徒出沒之區彈壓巡防倍關

緊要是欲爲地方籌治安之計首在任用賢能爲武職精選擇之方尤貴變通成法伏查光緒二十八年正月十七日欽奉上諭著督撫接見僚屬擇其賢者量加委用不必盡拘資格等因欽此竊維文武兩途

國家並重與其拘泥舊例何如恪秉

宸謨擬請嗣後兩江武職出缺卽由臣會同巡撫提督各臣遴擇人地合宜之員奏請擬補惟在慎選人才不拘班次名次俾強幹者及時自效衰庸者不得倖登如蒙

聖恩允准實與地方營務大有裨益所有兩江武職補缺擬請變通辦理緣由理合恭摺具陳伏祈

皇太后

皇上聖鑒謹

奏

奏

請建已故撫臣專祠摺

光緒三十三年十一月

奏爲已故撫臣遺愛在民懇請

恩准建立專祠以慰忠藎而順輿情恭摺仰祈

聖鑒事據安徽紳士五品銜翰林院編修趙曾重廣西布政使余誠格山西河東道陳際唐布政使銜前江蘇常鎮通海道郭道直歐洲留學生監督前江蘇淮揚海道蒯光典等呈稱已故安徽巡撫恩銘以知縣起家歷官山東山西浙江江蘇等省懋績循聲在人耳目光緒三十二年自江寧藩司擢授皖撫下車之日諮詢利病銳意興革夏秋之交霖雨愆期江湖陡漲沿江圩田岌岌可危廣濟一圩跨越懷寧桐城兩縣向爲產穀之區該故撫以民食攸關派員晝夜防護悉賴安全皖北洪水爲災鳳穎泗所屬十餘州

縣盡成澤國籌辦賑撫不遺餘力集款至百餘萬金活民以千數
萬計鄆陽會匪黃淑性竄擾建德縣境連毀洪家亭等處教堂該
故撫派兵剿辦布置妥速不數日而渠魁授首匪亂以平沿江洲
地久未清理奏准設局清丈意在豁坍糧平爭訟豪強吞併者責
令繳價歸公所有洲民萬口交誦他如興學練兵勸樹藝興墾牧
富強之政次第修舉本年五月間因考驗巡警學堂倉猝被害當
受傷垂危之際尙諭令司道等官專辦首要無事株連並手書告
示徧貼城廂殷殷以安民心爲念遺章口授語不及私奏蒙
皇太后

皇上獎慰忠勞加恩予諡照總督陣亡例從優議卹

朝廷飾終之典固極優隆而士民愛戴之誠願伸酬報禮云有功
於民則祀之以死勤事則祀之爲此開具事實懇請建立專祠等

情呈請具奏前來臣等伏查該撫臣恩銘由舉人知縣歷擢監司洊膺疆寄其忠勤廉介克盡厥職久在

聖明洞鑒之中撫皖年餘賑濟水災防護圩田消弭教案清理洲地以及應辦新政悉能竭力籌維此次因公被害聞者無不感泣查同治九年前兩江督臣馬新貽被刺遇害奉

旨准予安徽建祠在案該故撫臣以死勤事遺愛在民洵屬誼篤匪躬澤被全皖合無仰懇

天恩俯准將前安徽撫臣恩銘在於安徽省城建立專祠春秋致祭以慰忠靈而順輿情出自

鴻施逾格除將事實冊結分咨查照外謹合詞恭摺具陳伏乞
皇太后

皇上聖鑒訓示謹

奏

請飭照解協撥銀兩摺

光緒三十三年十二月

奏爲改練新軍餉源支絀請將贛省原案協撥銀兩仍飭照數籌解恭摺仰祈

聖鑒事竊查江西藩庫向有協撥督標營餉每月銀六千兩江西糧道庫向有協撥漕標營餉每月銀二千兩係前督臣曾國荃前

漕臣松椿先後

奏准歷經照數撥解在案本年十月接准部咨江西撫臣瑞良編改巡防各軍奏請將兩項全數截留經部臣議以江西係兩江兼轄省分漕標改設江北提督練餉亦歸兩江籌給能否准其停解行令妥籌辦理等因是江南財用空虛部臣久已深悉自應統籌併計以期額餉無虧查江南改練新軍款項本不充足原恃舊時

營餉裁節歸併藉資抵補而裁節舊餉中又每年撥濟江北練餉十六萬兩以是展轉騰挪益形支絀猶賴各司道庫奏准協撥之餉源源接濟得以稍事補苴今江西撫臣因編改各軍遽請將司道兩庫原協督標漕標營餉全數截留不知此項銀兩在江南新舊各軍已列作常年計授之款與贛省營制甫將擬改情形迥不相同况陸軍部奏定江北練足一鎮除兩江原案認籌各餉外不敷之數尙多猶須蘇皖東豫各省合力併籌若從前額協之餉再有截留必致兩江所認裁節舊餉之十六萬兩亦半歸無著勢將貽誤要需上年萍薊□亂寧省遣軍會剿裹糧運送所費已多近時南安教案贛省軍隊赴防寧又派軍前往填紮是寧省所練之兵於贛省亦時有協助尤不可不並顧兼籌合無仰懇天恩俯念營餉關係緊要且爲多年奏准協撥之款

飭下江西撫臣仍照原案將兩項營餉每月銀八千兩責成司道兩庫照數籌解其欠解銀兩並令迅籌補解以濟急需而維大局除咨部外謹合詞恭摺具陳伏乞

皇太后

皇上聖鑒謹

奏

捐輸展限摺

光緒三十三年十二月

奏爲江北賑款借墊過鉅請將工賑捐輸暨七項常捐展限一年以資彌補恭摺仰祈

聖鑒事竊照光緒三十一年江南工賑需款奏請開辦銜封貢監翎枝等項捐輸經部議准至三十二年分一年限滿時值江北水災奇重賑款不敷復經奏請展辦賑捐一年並請加辦七項常捐

亦以一年爲限均經度支部議准在案茲自光緒三十二年十一月初五日奏准之日起扣至三十三年十一月初五日止又屆一年限滿本應按照部議截數停止惟上年江北徐海淮安各屬水災之重爲數十年來所未有工賑糶各項用款至數百萬兩之多雖蒙

朝廷發帑截漕

恩施稠疊而有著之的款實不及半維時事機危迫萬分未敢稍滋延誤不得已奏明移用庫帑息借商本權量重輕先其所急本年春賑又經奏准息借農工商部存本銀一百萬兩分撥散放幸蒙

聖恩高厚憫災黎之困苦念籌款之艱難凡有奏請靡不上邀俞允卒能使數百萬待斃之饑民咸資安集匪徒無從煽惑大局

轉危爲安實非臣等始願所及目前賑務雖已告竣而借墊無著之款以農工商部存本一百萬兩爲大宗此外庫帑商本亦共有百數十萬兩舍收捐一項別無彌補之方明知捐務積疲已成弩末之勢猶冀銖積寸累藉以收覆篑之功據籌賑局司道詳請奏懇展限接辦前來合無仰懇

天恩俯念江北賑款借墊過鉅准將工賑捐輸暨七項常捐均予展限續辦一年以資彌補出自逾格

鴻慈謹合詞恭摺籲陳伏祈

皇太后

皇上聖鑒謹

奏

查明局董參案摺

光緒三十三年十二月

器以改公長高

卷下

十一

奏爲查明上海工程局董被參各節遵
旨覆陳恭摺仰祈

聖鑒事竊臣於光緒三十三年七月十五日准軍機大臣字寄光
緒三十三年七月初四日奉

上諭有人奏局董藉端苛斂病商害民列款糾參一摺著端方按
照所參各節確切查明據實具奏原摺著鈔給閱看欽此遵

旨寄信前來當卽派委江南蘇松太道瑞澂奏調江南差委辦理
上海巡警局候補道汪瑞闈按照原參各節逐一查明詳細具復
茲據該道等按款查明具文詳復前來查原奏內稱上海總工程
局自升任蘇松太道袁樹勛開會舉董貢生莫錫綸等私相勾結
得居首列自接辦後勒捐苛罰在原有房捐外另加重捐照明季
間架捐法逐間計算雖貧戶亦不能免偶與理論卽拘局押繳下

及船捐車捐雜捐無一不捐接辦甫及一年怨咨交作民不聊生等語查上海工程局於光緒三十一年七月間由升任上海道袁樹勛改歸紳辦照會縣紳開會公舉經紳士等兩次投票舉得及格者七十六人復由該升道就公舉中派定辦事總董李鍾珏曾鑄朱佩珍郁懷智莫錫綸等五人議事經董姚文枬等三十三人該紳董等於十月十五日接辦局事將從前官辦時原有之工程巡警清道路路燈各項雜捐歸併爲一名曰地方捐無論自產租賃店鋪居民一律按月收取因馬路向無房捐約照房租抽收一成其餘約收五釐仍按市面之繁簡定捐數之多寡自銀元一二元至一二角不等悉充清道路路燈路工巡警等項之用貧苦之戶向皆免捐至房捐係由上海縣收取解交藩司備撥賠款與工程局無涉所有車船各捐均在未經改歸紳辦以前由官核定紳辦以

後悉仍其舊車捐係仿照租界章程船捐係屬包認按年更換此外各種雜捐現均歸併地方捐項下尙無另立名目勒收捐款之事現在所收各捐每年約五萬餘金而局中所需警察新餉修築道路然點電燈及裁判所各項用款每年約需銀七八萬兩兩年以來已虧五萬餘兩皆由公債及紳商錢莊借墊均有年月表簿可查似無濫收情弊又原奏謂米販張嘉年請開米禁運動商會由商部咨南洋大臣札諭商務工程兩局會議張嘉年賄莫錫綸鉅款遂得議准並議由該局發給護照每石抽捐一錢半充英租界公廨費用半充工程局費用嗣是米禁大開由德發洋行運至日本海參威者五百數十萬石內地積穀一空等語查米糧一項由此口運到彼口本屬約章准行前因內地歉收市價貴而來源少民食艱難當經上海道稟定暫禁出口迨三十一年冬間內地

存米較多常昭紳士力請弛禁由藩臬兩司稟經前江蘇撫臣陸元鼎會同前署督臣周馥奏准施行既非由商部咨行核議自無由張嘉年賄送莫錫綸等鉅款之事且弛禁六個月內華洋商人報運通商別口之米共祇一百餘萬石均有印照給令報關限期回繳不准運出外洋海關稅司稽查嚴密斷無准予德發洋行運往日本海參威至五百數十萬石之理至米捐一項係仿照蕪鎮辦法每石收關平銀一錢留充地方公用自開禁以至封禁除洋商報運出口之米不捐外共收華商捐銀十萬三千六百餘兩三十一年十二月准戶部感電上海中牢修費奏准動用米捐升任上海道袁樹勛遵卽酌提四萬兩充作會審公廨中牢修費餘款撥補上海平糶局虧耗曾據報明有案委係涓滴歸公所稱半充工程局費用殆係傳聞之誤又原奏內稱上海城廂街道寬狹不

等欲令畫一自應先事丈量預定丈尺乃該局於業主動工時擅自酌定得以上下其手爲勒索地步新碼頭戴姓之屋藉口與照會不同勒罰鉅款北門城根楊姓之屋因未行賄被勒半年小普渡橋劉姓之屋謂礙路工硬令拆去其餘新造之屋或讓進二三尺或讓進七八尺以賄之重輕爲斷其苛罰之法在動工時佯作不知俟工程將竣突遣探捕將匠頭拘押房主因工敗垂成不得已認罰數百金了事等語查上海城廂內外街道既寬狹不等房屋亦參差不齊自光緒三十一年間馬路工程局及上海縣先後示諭屋主興動工作城外馬路一帶須收讓三尺城內則收讓二尺工程局改歸紳辦後復經明定章程由上海縣曉示遵辦嗣凡新建翻改均須於未動工前赴局報明勘驗給照方准建修間有不先報勘者照章拘罰然罰款定章載明執照至多不過五十兩

亦無數百金之鉅其收進尺寸城內外一律改爲二尺並無工程將竣拘押苛罰之事北門城根楊姓原基係屬城濠公地因屋被焚時值議浚城河預備堆泥之用曾令緩造旋因濬河展緩楊姓仍行起造並未抑勒新碼頭查無戴姓造屋罰金之事小普渡橋並無劉姓房屋或係外倉橋劉姓之誤該處因闢路造橋屋主自願得價拆讓當時契價兩交亦無硬拆強佔情事又原奏內稱黃浦河道向爲萬商起運貨物口岸沿浦灘塗自十六鋪橋以南爲華商起落各貨碼頭完糧升科由來已久乃工程局與大達公司私立合同租與灘塗歲收租銀一萬兩大達以外迤南一帶議定洋尺一丈每年收租銀五十兩如不出租各業不得起落貨物擬馬路以外填地二丈由局出資借爲取租地步各業戶紛議懸掛洋商牌號以圖抵制黃浦比同治年間已填小十之七近年湖水

時時溢上馬路若再填築沿浦必成澤國現因各業控告該董等
又以濬浦爲名稟請上海道欲將樹業木業竹業驅逐他往以爲
有礙浦工按工程限期開到南市樹木竹三業之處約在光緒四
十六七年分何至遽行驅禁且十六鋪橋北亦各業戶管業何以
並不問洋人收租亦不令其輪船碼頭他遷等語查十六鋪南一
帶岸綫光緒六年曾經設立界樁不准業戶居民將界外漲灘私
填佔用嗣因振興南市商務於二十二年將界綫開拓就界樁外
積漲淤灘填築馬路馬路以內寬留餘地以興市廛並於路中建
設官輪兵輪碼頭前經奏咨在案此項路工係由出使經費借墊
將馬路餘地變價歸款既非沿浦業戶捐築則岸綫以外權利自
應由公家主持不得再圖管業惟路工竣後別無餘款以致碼頭
遲久未建迨至二十八年內港行輪載諸條約洋商紛紛索租南

市岸綫以築碼頭升任上海道袁樹勛議將原留建築官輪兵輪碼頭之處由華商墊款興築作爲公共碼頭准華洋各小輪公用以免洋商另設三十一年商部顧問官修撰張謇等創設大達公司呈由商部奏准在十六鋪南建築輪步碼頭工程局將該處岸綫租給大達公司係屬遵照奏案其歲收租銀係抵還工程局推廣路政息借用款亦經袁樹勛詳由前署督臣周馥批准並非私自租借且大達公司指用岸綫工程局祇議准租至滬南海關前爲止其關南至董家渡一段已經收回准衆商租建碼頭復於大達所租岸綫內議明酌留餘地歸局築造小碼頭以備各商家照常起卸貨物於民船商業生計實已兼籌並顧惟招商局以原議官建現歸永裕墊築之公共碼頭適在局產前面上年秋間聯合該處業戶以岸綫與業地子母相生請令工程局交與收回由其

自行轉租冀得歲入租金經上海道瑞澂詳細批駁此外未聞有懸掛洋商牌號抵制之事三十一年冬間上海濬浦開辦准稅司查開南市竹木等行沿浦堆積竹木有礙浦工疊經諭令遷移並指定地段劃明界綫俾各行自行開挖水池堆積木植迄未遵辦據工程師奈格意見須將河道寬狹收束一律工程則約期四年告竣經費則先行借足應用以約載二十年額撥之數抵還並無遲至光緒四十六七年完工之事其工程辦法情形經上海道瑞澂繪圖詳報在案十六鋪河道較前稍狹然按之現定界綫有須設法開闊者亦有再行收束者工程局現擬填寬駁岸二丈係就工程劃定收束界限內之漲灘興築係化無用爲有用較之各行任意停放木植有礙水利者不同至橋北係各國租界既非工程局所應管自不能向其收租既在約准通商地方更無令將輪船

碼頭遷移之理 臣伏查上海工程局之設誠如原奏所謂開自治之權輿爲立憲之基礎責大任重當以得人爲先其局中紳董分議事辦事兩層凡有興革之事先集議董姚文枬等三十三人開會議決稟經上海道批准後由總董行之其總董五人以李鍾珣爲領袖曾鑄郁懷智朱佩珍輪流到局莫錫綸常川駐局李鍾珣既爲領袖莫錫綸無事不與李鍾珣商而後辦訪諸輿論尙稱得人現在屢奉

明綸預備立憲各省州縣逐漸講求自治以地方之人辦地方之事不能不取資於地方之財事有不便徇情勢必因之招怨但使實屬因公自應量予維持俾辦事者不致爲浮言所中該董事等所辦事件均爲公益並非私計質之公正紳士實無閒言原奏所參各節大都得諸傳聞略無左證應請毋庸置議所有查明上海

工程局董被參各款遵

旨覆陳緣由謹恭摺具

奏伏乞

皇太后

皇上聖鑒訓示謹

奏

辦賑報銷摺

光緒三十三年十二月

奏爲江北水災辦理留養資遣及冬春兩賑謹將收支用款列爲
第一案報銷開具清單恭摺具陳仰祈

聖鑒事竊查光緒三十二年江北徐海淮安各屬大水爲災饑民
甚衆仰荷

聖恩頒帑截漕飭部撥給桂捐並准開辦賑捐七項常捐代收免

保留省兩項又息借農工商部存款撥用淮運司庫款借撥湘省歸還江海關賑款一面分電各省廣爲協濟並由臣等率同司道倡捐廉銀益以上海商約大臣呂海寰盛宣懷籌撥義捐俾賑撫平糶河工三者得以從容就緒曾於奏報春賑完竣摺內聲明用過各款開單奏報欽奉

硃批知道了欽此卽經飭委江寧布政使繼昌署淮揚海道楊文鼎等在省設局清釐用款趕辦報銷各在案茲據該局司道詳稱上年江北水災以徐州府屬之銅山邳州宿遷蕭縣睢寧淮安府屬之清河山陽安東桃源阜寧海州沭陽贛榆等十三州縣情形爲最重籌辦賑撫以清江浦爲樞紐人數最多事極棘手始則設廠留養繼則按名資遣令其各回原籍就賑俾免流離四出其未辦冬賑以前有散至揚州鎮江江寧等處者亦皆一律收養至本

年正二月間陸續遣送清江浦由淮揚海道接收遣回就賑所有冬春兩賑辦法先查戶口後給錢文遴派義賑紳士會同各州縣委員隨查隨放官賑義賑併作一起以災情之輕重戶口之多寡定口糧之等差並設施粥廠以救危急開當地局以資接濟極貧者施放棉衣有病者撥給醫藥或酌發籽種或收養耕牛其被災較重州縣春賑查放後距麥熟之期尙遠恐有遺漏又各就地方察看民情補賑加賑不遺餘力其年幼無依子女徐州則設留養所清江則設工藝所妥爲收養免致逃亡失所他如揚州之寶應高郵通州之石港淮安之鹽城徐州之豐縣碭山以及江寧府屬上江句溧高六等縣或有偏災或與災區毗連均經分別撫卹此外如江寧所屬河道洲圩淮揚徐所屬之運河堤岸六塘河工黃河舊堤沐贛各河均大加修治招集附近災黎以工代賑又派員

分赴直隸奉天安徽等省廣購米麥雜糧並遠至四川貴州採運米穀設局平糶減價出售轉輸轉運源源接濟使災民領錢後可以多購糧食藉輔賑務之所不逮以上各情均經先後奏明有案現值清理報銷之際除三十一年江南工賑用款另案造報外所有光緒三十二年江北水災辦理賑撫綜計收到

恩賞部款官賑捐借各項銀三百八十七萬四千二百六十兩二錢二分又收義賑捐款錢九十五萬二千一百七十千文共支留養資遣冬賑春賑等項銀五十四萬六千四百八十二兩二錢四分二釐錢六百八萬七千九百七十四千七百二十六文內以義賑錢九十五萬二千一百七十千文抵支外其餘錢五百十三萬五千八百四十四千七百二十六文合銀三百三十一萬三千四百二十二兩四錢四釐統共支銀三百八十五萬九千九百四十四兩六錢

六釐據各州縣冊報賑濟災民共大小口七百三十萬四千六百四十八口按照賑票逐細核對數目均屬相符所支各款亦皆實用實銷毫無浮濫應請援照順直災賑及江南前辦淮徐海災賑成案將江北賑撫用款列爲第一案開單報銷免予查造細冊其修辦各屬河道堤工及平糶轉運支用各款仍俟查核完竣另行開單奏銷至撥濟蘇屬各州縣工賑用款並蘇屬經收賑捐由蘇藩司另案造報以清眉目又此次義賑一切正雜各款均係紳捐紳辦應由商約大臣呂海寰盛宣懷自行報銷等情詳請具奏前來臣等伏查上年江北鉅災爲從來所未有幸蒙

皇太后

皇上周恤民隱

厚澤頻頒始能使數百萬垂斃之災黎咸資安集

鴻施稠疊曠古無儔當夫上年九十月間災民紛紛南下若非各處設法截留分別辦理留養資遣不特載道流離情堪憫惻且恐匪徒勾串別滋事端各該員苦心籌畫殫力經營事事悉臻妥洽且各深知款項奇絀籌措爲難無不力求核實至各屬冬春兩賑均係義紳查戶印委放錢實惠及民毫無浮冒此外各款亦皆實用實銷查光緒二十三、四等年徐海淮安各屬災賑經前督臣劉坤一分作三案開單奏報均奉

硃批該部知道欽此所有上年江北徐海淮安各屬事同一律理合繕具清單恭呈

御覽除修辦各屬河道堤埂工程及轉運平糶支用各款接續分案開單奏報外謹合詞恭摺具陳伏祈
皇太后

皇上聖鑒謹

奏

捕治梟匪通力合作片

光緒三十三年十二月

再蘇省松太浙省嘉湖交界處所梟匪猖獗業經臣會同蘇浙撫臣奏明認真捕治並奏派江蘇布政使瑞澂督辦在案查松太捕務向由撫臣就近督飭蘇屬營隊專辦歷任督臣均因此事向歸撫臣主政一切選將治兵捕盜事宜勢不得分權限以專責成近日以來梟匪勢燄日張迭出巨案該將領等捕治未能得手勢將蔓延臣目擊情形不敢循舊因仍稍形拘泥且臣前署蘇撫三月餘治梟曾著微效於該處情形尙屬周悉是以電商蘇浙撫臣將治梟事宜向由蘇浙辦理者改由寧蘇浙三處通力合作認真妥辦並奏請

特派布政使瑞澂督辦蘇浙捕務是爲寧屬派兵治梟之始布置經營有同草創必須添置淺水兵輪機器快礮並隨時撥派得力兵隊綜計用款爲數不貲蘇浙財政同一拮据不能盡責該兩處擔任自應協力統籌共擎斯舉所有一切用款應請作正開銷謹先行附片陳明伏乞

聖鑒訓示謹

奏

籌辦地方自治局摺

光緒三十三年十二月

奏爲地方自治事宜先就省地遴委官紳設局籌辦恭摺仰祈

聖鑒事光緒三十三年八月二十三日奉

上諭欽奉

皇太后懿旨上年降旨宣布憲政業經明白申諭視進步之遲速

定期限之遠近朝廷塵懷憲政盼望至殷近已降旨先設資政院以立議院基礎願議院言論之得失全視議員程度之高下非教育普及則民智何由啓發非地方自治則人才無從歷練等因欽此仰見

朝廷講求憲政銳意圖強凡在臣民同深感奮臣等伏念地方自治之制其名詞譯自日東其經畫始於歐美自列強均勢凡政治學家之言皆曰非立憲無以自存非地方自治無以植立憲之基本而疑中國數千年來有官治無自治臣等以爲周之閭胥比長與漢之三老嗇夫雖命自國家事殊團體然其受任自選舉而來其用人又不出本郡揆諸自治之義不啻導以椎輪必謂中外治術不同猶非新舊溝通之論江南地方交通最早士紳智識開明自奉

明詔預備立憲羣情鼓舞望治尤殷誠如

慈諭亟宜擇地試辦地方自治以爲人才歷練之地以速實行立憲之期惟是規畫自治按之法理宜從下級入手中國鄉遂之制既已名存實亡人民程度又復秀野不齊城鄉互異仍應仿照天津辦法於省會設局以官力提倡先謀預備之方徐爲實施之地卽於江寧省城設立籌辦地方自治總局檄委調補奉錦山海道朱恩紱鹽巡道榮恆浙江補用道宗舜年署江寧府知府許星璧爲局長前浙江候補知府伍元芝七品小京官善溥署上元縣知縣田寶榮署江寧縣知縣龍曜樞候補知縣羅良鑑爲參事擬定開辦簡章分設法制調查文牘庶務四課並於總局內附設自治研究所及實地調查所研究所爲預備之始先徵江寧一府之士紳入所授課而遞及於他府縣調查所爲實行之始先從上元江

寧兩邑試辦而次及於他屬一面開辦宣講以曉頽愚畫定區域以行選舉選舉既定議事會與董事會乃得次第組織町村置長近采鄰邦經野之規王道觀鄉遠稽三代大同之治臣等忝爲行政長官幸際

昌期不敢不勉力倡導仍俟民政部頒發自治章程再行察酌地方情形依次籌辦其辦事經費本應由地方公衆擔任惟目前局由官立性質既微有不同且就地籌款亦非俟自治規模大備未能遽責以義務現在該局逐月支銷之款暫飭財政局墊撥俟地方籌款有著再議歸償除開辦簡章分別咨送憲政編查館民政部外所有江南籌辦地方自治緣由謹會同署江北提督臣王士珍合詞恭摺具陳伏乞

皇太后

皇上聖鑒訓示謹

奏

預備議會片 光緒三十三年十二月

再本年五月十一日承准軍機大臣字寄兩廣總督岑春煊奏預備立憲階級一摺奉

旨外省設諮議局各節著各省督撫妥議具奏等因欽此遵

旨寄信前來當經分飭司道核議旋於九月十三日奉

上諭欽奉

皇太后懿旨前經降旨於京師設立資政院各省亦應有采取輿論之所俾其指陳通省利病籌計本省治安並爲資政院儲材之階著各省督撫在省會速設諮議局慎選公正明達官紳創辦其事等因欽此諮議局之設已奉

明旨其岑春煊前奏各節自毋庸更行議復又准資政院咨開諮議局事關重要其詳細章程若由外定恐難畫一此時應先設局所俟由院擬定草章咨商各省議妥後奏請頒布等因查諮議局章程既應俟資政院奏定則各省先設局所自爲討論預備起見臣等現於地方自治局內附設諮議局卽以自治局原委局長參事兼領諮議局事由局廣延士紳詳加研究以爲議會之預備一俟資政院頒發詳章再行遵照妥慎辦理謹合詞附片具陳伏乞

聖鑒謹

奏

實行禁煙摺

光緒三十三年十二月

奏爲詳籌官民禁煙分別遵章實行及礙難遽辦公債票情形恭摺具陳仰祈

聖鑒事竊於光緒三十三年九月初五日欽奉電傳

上諭上年降旨禁煙諭令政務處詳定章程凡官員吸食鴉片准其自行陳請限期戒斷前經予限六個月恐亦未能一律切實遵行朝廷法外施仁著自此次降旨之日始再行展限三個月一體戒除淨盡內外文武各大員凡有嗜好者仍迅卽照章自行陳明其餘京外文武各官仍著各部院堂官各直省將軍督撫各旗營都統等督飭屬員實力奉行毋得悠忽自誤倘或始終怙過或畏難中止逾限未能戒斷卽著按照定章懲處不貸毋謂寬典可屢邀也欽此並准吏部咨行前來仰見

聖明力戒宴安曲加矜恤

恩威並示薄海同欽查寧蘇兩屬於上年欽奉

諭旨實行禁煙並准政務處咨行章程卽經臣端方會商前撫臣

陳夔龍恭錄通行並出示曉諭勸導一面檄飭臬司參酌本省情形查照定章妥擬規則通飭遵辦其一切實行禁煙情形已於本年六月間經陳夔龍縷晰奏陳在案竊以法乃國之綱維官爲民之表率欲除積習先清仕途寧蘇兩屬文武軍學官界迭經通飭一律按照現行規章認真遞查所屬業據文武各衙門取具各員曾吸已戒及向不吸煙冊結詳送查核均仍令隨時嚴密訪查如有嗜好甚深不能遵戒之員不准隨同欺飾臣等每於接見屬僚亦必留心體察時時以刻厲自新相勗勉茲又欽奉諭旨再行展限三個月一體戒除淨盡京外文武各官仍著各部院堂官及各直省將軍督撫都統等督飭屬員實力奉行自應欽遵辦理當經嚴飭各屬文武再行認真確查務須於奉文三個月內將官界煙癖一律廓清如屆限滿仍查有不能戒除之員卽責

成該管上司據實詳揭倘該管上司故爲徇隱不報一經查實定卽分別參處以示懲儆現限期甫經屆滿察看各屬於查禁官員吸煙一事尙能實力奉行應再由臣等隨時留心查察如所屬文武各員仍有始終怙過抑或畏難中止者卽屬自外生成不堪造就自當遵

旨隨時按照定章奏請懲處不敢稍存寬假總期於通省文武軍學官界痛除痼習以爲民倡至民間禁煙政策首在封閉煙館寧蘇兩屬禁期係限至本年六月底止據各屬呈報所有煙館均一律依限禁閉復經派員密查尙無違禁私設情弊間有一二煙戶意存嘗試經各該地方官立時查明提案責懲民間頗知警懼其失業煙戶多由各屬自行籌款設立因利局習藝所以資改營別業各屬紳董有籌設戒煙善會者均由官提倡維持期實惠可以

普及祇以辦理禁煙善後各事宜在在需款若非官紳合力斷難相濟且近自禁煙令下洋土藥稅釐收數已見虧短財力益形竭蹶但爲大局計要未可因噎廢食前於三月間承准軍機大臣抄寄都察院代遞候選道許珏奏請嚴飭各省實行禁煙並准籌辦公債以免稅釐短絀一摺奉

上諭飭令臣端方暨前撫臣陳夔龍妥議具奏當查原奏內稱某省本年短收洋土藥稅釐若干卽由某省咨商度支部准售公債票若干其如何定期還本付息均歸各該省自認如此則帑入不至有虧而禁煙仁政毫無窒礙等語數月以來臣端方迭與升任撫臣陳夔龍及臣啟泰先後督同各司道往返籌商此舉洵爲目前籌款至善之策如能一律實行則各省洋土藥稅釐短收之數得此抵補財力卽可以稍紓卽非有許珏之奏臣等亦未嘗不計

議及此惟查籌辦公債必先以取信便民爲宗旨尤須籌有的款酌定限期備付本息並准交納本省官款關稅各項庶足以規久遠前直隸督臣袁世凱試辦直省公債票辦法卽係照此辦理先經籌定歸還公債本息的款藩運兩庫及永平七屬鹽利銀元局餘利每年共銀一百二十萬兩專備還債之需並奏奉

諭旨作爲永遠定案責成直隸總督及藩運兩司無論現任接任各員一體認真經理實力奉行故募集極爲踴躍現寧蘇兩屬司道局各庫帑藏異常支絀平時入不敷出挹注已萬分爲難實無餘款可以騰挪爲備還此項公債本息之用若未經籌有的款卽行舉辦民間必多觀望無非徒託空言卽使多方勸募集有成數而將來付息歸本各款無從籌還必致失信於民旣屬大乖政體迨至還款無著民間必以所得債票儘數交納本省官款關稅各

項於歲入公帑反致受其影響經此通盤籌畫自未敢遽議舉行
惟禁煙一事係拯民陷溺之要政斷不容以洋土藥兩項稅釐短
收稍存顧惜現在扼要之法祇有將官膏專賣一事切實辦成庶
幾寓禁於征以及稽查吸煙人數暨考核洋土藥銷數產數始均
能確有把握寧屬前已設有官膏專賣局因外務部與英國使臣
正在籌商辦法尙未就緒電飭暫行停辦蘇屬官膏加價本係招
商承辦因寧屬官膏甫設卽停各商遂多觀望均未能辦有端緒
現經度支部派員分赴各省調查洋藥進口及土藥產銷數目再
行酌核議章開辦官膏自應聽候部臣查明核辦至減種罌粟地
畝亦關緊要蘇省種煙地畝以徐海爲最多此外各屬向不恃種
罌粟卽間有一二數亦無幾已勒限嚴飭各地方官迅將所轄境
內種煙地畝查明實數造冊呈報一俟報齊卽行彙案送部查核

以憑遵照定章按年遞減溯查鴉片流入中國已百餘年創鉅痛深萬不可不尅期湔祓

朝廷洞鑒貧弱之原勒限嚴禁爲民除害風聲所布民氣爲之一新現除服官人員均應遵奉此次

欽限實力戒斷不准稍涉怠忽外臣等體察情形卽分居齊民苟屬稍明事理有志上進者亦無不力祛舊染近一年中民間之發奮興起認真戒除者頗亦居其多數但能上下一心堅忍相持煙害廓清之期當不難計日以待也所有詳籌官民禁煙分別遵章實行及礙難遽辦公債票各緣由除分咨各部查照外謹合詞恭摺具陳伏乞

皇太后

皇上聖鑒謹

奏

請給船主寶星片

光緒三十三年十二月

再准外務部咨准德國使臣函稱據漢口領事稟報德國美利輪船船主密來拖納前在鎮江下游見有海關燈船因暴風將致覆沒乃往救華人數名燈船亦遇救未沈懇請奏明

賞給寶星以資獎勵咨行查核辦理等因當經飭令鎮江關道確查去後茲據復稱函准鎮江關稅務司查核飭據理船廳稟稱該關在鎮江下游如皋縣屬張黃港之西相距三里海北港地方設有燈船一隻前於光緒三十一年八月二十二日風大浪湧該燈船被水灌入在船共有燈役三人無法抵禦船將沈沒卽扯號旗求救隨有美利輪船駛來救援該船主密來拖納將燈船拖至穩妥處所方能出險在船燈役三人均獲生全等情申請核辦前來

臣查前德國德瓦翁咨輪船管駕官羣伯樂暨武員內德爾在西貢之南又愛播斯輪船管駕官裴特森在海南之東均因拯救華船遭風危險於光緒二十九年六月十九日經外務部奏請賞給該三員寶星奉

旨允准在案今該德國美利輪船船主密來拖納出力救護海關燈船及在船燈役三人洵屬見義勇爲不分畛域且核與羣伯樂等請獎之案亦屬相符合無仰懇

天恩俯准賞給該船主密來拖納四等寶星以示獎勵除咨部查照外謹附片陳請伏乞

聖鑒訓示謹

奏

製造局添購機器摺

光緒三十三年十二月

奏爲金陵製造局改良製造新式槍子暫將毛瑟槍子停造騰出經費湊撥添購機器情形恭摺具陳仰祈

聖鑒事竊查金陵製造局上年曾經練兵處暨前署督臣周馥派委道員張士珩赴局考查議將該局每年額領經費銀八萬四千兩以六萬二千五百兩專造十一密里口徑老毛瑟槍子供應南洋各軍隊操防之用餘款留爲各防營隨時添配機件及員司匠役薪糧局用之需經練兵處核准咨行飭遵在案本年夏間接辦該局道員劉體乾查得江南軍械局庫存老毛瑟槍通用子彈甚多可備數年撥用而江南編練新軍悉係領用日本六密里五口徑及德國新毛瑟等項槍枝常年需用槍子轉虞不足亟應籌撥款項添購機器改良製造新式槍子具詳請示臣以所請係爲因時制宜裨益軍需起見檄飭江寧藩司繼昌會同上海製造局道

員張士珩復加籌議擬就該局原有機器改造新式槍子惟仍需添購機器二十五部並六密里五七密里九比例規尺樣板兩副格林木大小天秤兩具經臣復行該局詳加考核據稱添購前項機器器具舉凡六密里五七密里九口徑及老毛瑟曼里夏各種槍子隨時均能製造第購機所需經費爲數頗鉅刻值江南財力困難未能輕言另撥祇得請將該局現在額造老毛瑟槍子截至本年秋季止卽行停造自本年十月起停至明年夏季六月底止除代江南軍械局復裝銅壳藥火外約可騰出造子購料經費銀三萬數千兩再將上年張士珩稟奉練兵處核准修換該局西子廠及軋片廠汽機鍋鑪銀七千兩分飭江海關道江南財政局各半分撥一併移作添購新機之用此外不敷之款及搬運安裝等費統由該局在常借儲料銀兩內提撥濟用以竟全功稟經批准

照辦並行關局如數撥款卽由該道劉體乾親赴上海就近會商張士珩將應添購各項機器器具至各洋行逐細考究嗣與德商禮和洋行再四磋商議定由該行承辦德國侶佛廠最新式自行進子小口徑鋼孟頭新毛瑟子機器二十五部又六密里五七密里九各道口徑槍子及較準口徑冲模樣板各一副又格林木大小天秤兩具共計淨價德銀十七萬五千三百三十五馬克連關稅水脚保險等費一併在內當與訂立合同加立清單並先付定價三分之一計德銀五萬八千四百四十五馬克按照本年十月初四日付銀日期上海銀行市價每二百八十三馬克合規平銀一百兩核算共合規平銀二萬零六百五十一兩有奇茲據抄錄合同清單呈請奏咨立案前來臣查該局暫行停造老毛瑟槍子湊撥經費添購新式機器器具改造各項新式槍子實係變通改

良有益軍需所購機件等項亦甚核實除分咨陸軍部度支部查照外理合恭摺具陳再前動用銀兩應俟機器運寧裝齊價款付清後再由該局將支用細數分晰造報咨部核銷合併陳明伏乞皇太后
皇上聖鑒敕部查照立案施行謹

奏

改撥銅本片

光緒三十三年十二月

再光緒三十年准部咨雲南銅本奏准在於江蘇省銀元銅元餘利項下提銀二十萬兩撥解赴滇等因即經前督臣魏光燾以蘇省銀元並無盈餘可撥銅元餘利項下本省用款浩繁亦不能遽撥二十萬之鉅奏明勉力認籌銀十萬兩以應滇省銅本急需旋經飭據江寧藩司認籌銀十萬兩分批解滇應用在案嗣准部咨

仍應查照原奏辦理並准滇省一再催解復經行據江寧藩司繼昌詳稱前次籌解雲南銅本十萬兩乃係息借商本曾經詳請奏明至今尙未歸楚現在銅元局經度支部收回作爲分廠限定鑄數兼之錢價日跌銅價日昂餘利更屬無幾以之彌補歷年虧墊尙屬不敷所有雲南銅本銀十萬兩實屬無從籌解詳請奏懇改撥等情前來臣伏查前准財政處王大臣咨鈔整頓銅元酌量歸併原奏內開餘利一項向由各省認爲練兵經費及學堂新政之用國家本不應屑屑於此是以前請奏停蘇州鑄廠摺內即將該廠所認練兵經費停解由部另籌此次歸併專爲維持團法起見自不應多鑄圖利凡從前以餘利爲籌款者應查照前奏另行籌畫等語是銅元歸併以後本無餘利可言卽重要如練兵經費亦准另行籌撥該司所稱指撥雲南銅本銀十萬兩無款可解尙係

實情相應請

旨飭下度支部將原撥蘇省銅元餘利項下雲南銅本銀十萬兩
另行改撥以免貽誤要需謹會同署江蘇巡撫臣陳啟泰附片具

陳伏祈

聖鑒謹

奏

改獎領事寶星片

光緒三十三年十二月

再前駐滬和總領事阿福柯因在任時恪守約章辦事公允現已

任滿回國據前江海關道瑞澂詳請奏獎業經臣奏請

賞給三等第一寶星欽奉

硃批著照所請外務部知道欽此經外務部欽遵照製寶星並繕
執照咨行飭發江海關道轉送祇領在案嗣准外務部咨准和國

使臣照稱阿福柯係駐滬總領事請改獎二等第三寶星查該總領事阿福柯所請寶星前與比國副領事范璧屋利同案奏給三等第一核之部章尙可再加一等咨行奏請改獎等因臣查阿福柯所請寶星據該國使臣照請改獎二等第三核之部章尙屬相符合無仰懇

天恩俯准將和總領事阿福柯改獎二等第三寶星以昭激勸除咨部查照外謹附片具陳伏乞

聖鑒訓示謹

奏

學堂畢業請獎摺

光緒三十四年正月

奏爲江南高等學堂預科學生江寧府中學堂學生陸續畢業並在堂管理員教員照章請給獎勵恭摺具陳仰祈

聖鑒事竊查江南省城高等學堂江寧府中學堂及上元縣江寧縣高等小學堂均於光緒二十八年十二月開辦時因高等無合格學生考選江安兩省廩增附生補習普通各項科學名曰高等預科學級與中學堂等府縣兩堂學生各八十名高等學生合旗籍客籍共一百二十名三十二年按兩省各府州各加學額一名共百四十五名附課生無定額三十三年添辦高等本科一班額四十名各堂規制課程皆謹遵奏定章程辦理計三十二年上學期縣學堂畢業二十三人下學期高等預科畢業七十一人三十三年上學期府學堂畢業三十五人均經認真考驗分科按等填給憑單除縣小學堂畢業學生現已升入中學堂及初級師範學堂應俟畢業再行請獎外所有高等預科畢業學生及府中學堂畢業學生應照章獎給出身在堂之管理教授各員應分別給予

獎勵據署江寧提學使陳伯陶詳請具奏前來伏查奏定章程中學堂學習年數以五年爲限江南高等學堂於二十八年十二月開學計至三十二年下學期甫閱四年江寧府中學堂自二十八年十二月計至三十三年五月實九學期有零該與中學畢業年限稍有未合惟該兩學堂設立在奏定章程未頒以前且高等預科學生均係素有根柢其入堂肄業已足與中學一年生程度相當府中學堂學生自三十二年下學期始至三十三年五月每日加增授課時間程度均能合格查上年八月間大學士張之洞在湖廣總督任內擬獎畢業學生一摺奏稱有趕加鐘點辦足課程者學期略短而程度相符應照章給予獎勵等語又福建高等學堂係光緒二十八年開學於三十二年七月畢業奏經學部議准照中學堂畢業給獎各在案此次江南省城高等學堂預科畢業

學生江寧府中學堂畢業學生均應請照定章分別給獎各該學堂之管理教授各員在事辛勤頗著成績頭班學生畢業後復接添新班類皆悉心經理認真教課任事均在五年以上核與學部給獎之例相符其辦理學務已逾五年勤勩最著者其成勞實與管理員教員相等自應一併開列請獎以資鼓勵所有擬獎畢業學生並在堂之管理員教員謹開具清單恭呈

御覽應請

敕部核議施行除咨部查核外謹恭摺具

奏伏乞

皇太后

皇上聖鑒謹

奏

請賞辦學人員卿銜片

光緒三十四年正月

再四品銜翰林院編修繆荃孫宅心純篤學識淵通淹貫古今深明教育自光緒二十八年創辦江南高等學堂江寧府中學堂上元縣江寧縣高等小學堂前兩江督臣劉坤一奏派該編修爲總教長當時學章未定創始經營所有商訂規則延聘教員條理精密勞瘁不辭二十九年復偕教員等前赴日本詳加考查力求完備在事六年殫心教課昕夕無間後進經其陶鎔宗旨一主端純成就務臻遠大其勞勩殊未可沒合無仰懇

天恩俯准將四品銜翰林院編修繆荃孫

賞加四品卿銜以昭獎勵出自

鴻慈謹附片具陳伏乞

聖鑒謹

奏

調員差委片

光緒三十四年正月

再兩江政務殷繁需才佐理現值剿辦梟匪之際所有籌防巡緝事宜尤非精強幹練之員不足以資任使查有丁憂湖北補用知府沈銘昌才識優長治事精敏臣前在湖北巡撫兼署湖廣總督任內歷委差缺深資得力合無仰懇

天恩俯准將丁憂湖北候補知府沈銘昌調寧差委出自

鴻慈謹附片具陳伏乞

聖鑒謹

奏

膏捐無礙禁煙摺

光緒三十四年正月

奏爲遵

端忠敏公奏稿

卷十

四十

旨體察江蘇膏捐辦法尙於禁煙無礙擬請仍照現章辦理恭摺具陳仰祈

聖鑒事竊臣等承准軍機大臣字寄光緒三十三年十月二十三日奉

上諭都察院代遞候選道許珏蘇省徵收膏捐有妨禁煙仁政條陳著端方陳夔龍體察情形酌核辦理原呈著鈔給閱看欽此當卽會委調補奉錦山海道朱恩紱候補道王仁東會同署江蘇布政使兼辦牙釐局朱之榛逐一查明妥議具覆茲據會同稟覆前來伏查江蘇膏捐昉於光緒二十六年間曾經奏明有案定章每售膏一兩捐錢二十文其初在省城三縣試辦嗣復推行於蘇松常鎮太各屬統由蘇滬兩總釐局督收省城另設分局稽徵省外卽歸各州縣經理所收款項近年作爲抵充賠款及辦理巡警法

政學堂等項要需統計每年約收錢二十萬一千餘串實不止原呈十二三萬兩之數此蘇省從前徵收膏捐之緣由也上年欽遵諭旨實行禁煙經前撫臣陳夔龍籌設禁煙總局嚴飭省內外各屬將煙館一律閉歇並撥賑款銀一萬兩於省城設習藝所數處因利局一所凡有已閉煙館之業主店夥願習藝者授以工藝願改業者借給資本並非停止開燈卽概作爲膏店但此輩人數甚多不得不寬其謀生之路且政務處章程亦有此時未屆年限煙店難遽禁止之語是以由局詳定有願改膏店者卽發給憑照以爲營業之據又恐其有所貪戀不肯改圖因將膏捐每兩加收二十文計售膏一兩共捐錢四十文省內卽由禁煙局稽收省外仍歸各州縣徵收轉解並查照政務處章程明訂限制之法從光緒三十四年起飭各屬開膏店者所熬之膏減去一成出售所繳之

捐每兩加錢十文至三十五年售膏再減一成捐錢再加十文似此遞減售數遞增捐數庶幾寓禁於征可符政務處十年禁絕之議原呈所云務令銷膏之數不減於前係於該局辦法尙未深悉此蘇省目下禁煙與抽捐並行之緣由也省城長元吳三縣昔有煙館一千九百六十戶日售膏六千數百兩月收捐錢七千餘串現在改設膏店僅九百十餘戶日銷膏三千餘兩月收捐錢三千六百餘串捐數較前銳減許珏原呈似謂省城膏店開設過多不知較諸昔日煙館已減至五成以上祇須照章切實經理將來膏店自必有減無增卽如錫金二縣煙館昔亦不少近日派員考察僅有膏店二百一十一戶核與原呈相符其餘各屬大率類此是抽捐無礙禁煙於此益信至開燈私售目下詳加訪查尙無此等情弊惟近來捐數較少一切支應已覺難於騰挪果能如許珏原呈

由本地紳商另籌抵解以待部臣疆臣統籌抵補臣等亦何樂不爲無如善政得財既非臣等才力所及若取官款以爲挹注當此庫儲匱乏不獨疆臣無能爲役卽部臣亦兼顧不遑此則言之甚易而行之維艱者也總之徵收膏捐固爲協濟要需亦以暗行禁制但求十年以內煙害淨絕屆時雖無捐可抽亦不容顧慮躊躇惟旦夕之間尙未能收此效果自未便任聽各屬藉口短解致誤要需臣等悉心體察蘇省現行膏捐辦法與禁煙旣無妨礙亦與政務處奏案相符自應悉仍其舊至地方官辦理禁煙必須歷久不懈實效乃可終收容隨時責成禁煙局督飭各屬認真諭禁不准勤始怠終以期仰副

朝廷易俗移風之至意所有蘇省膏捐仍請照現章辦理緣由謹合詞恭摺覆陳伏乞

皇太后

皇上聖鑒訓示謹

奏

開挑運河片

光緒三十四年正月

再前准郵傳部咨議覆御史沈潛奏開辦郵政宜修浚運河行令查照原奏將運河工程籌款開濬等因當以清江浦以上運河上接山東其間淤淺之處甚多非兩省合籌不足以資通暢臣隨與署山東撫臣吳廷斌往返電商擬各派委熟悉河務大員會商勘辦庶兩省聯爲一氣卽經飭委新授貴州按察使署淮揚海道楊文鼎徐州道袁世廉徐州府知府田庚於蘇省接境處所會同東省派員查勘商辦茲據楊文鼎等將會勘情形稟復前來臣伏查運河爲南北交通航路所繫自漕船停運後多年未能疏濬節節

淺阻亟應設法疏通惟全河工段綿長一律挑修財力既有未逮而地形高仰數年後仍復淤平虛擲鉅金無裨實際該員等周歷考查現擬將蘇省境內運河工程仿照昔年濟漕章程堵閉七閘越壩各閘河淤淺最甚之處間段興挑其河身寬闊淺灘之處趁春汛未發之先開挑川灘支河較正河加深三尺卽以所挑之土幫厚堤岸大汛水漲兼可奪溜攻沙另購挖河機器船兩艘一泊楊莊一泊清江浦遇河水漲發時分上下游往來撈挖庶商船可以暢行南北不致梗阻與東省委員會商辦法亦復相同除批飭籌款迅速估辦外謹會同江蘇巡撫臣陳啟泰署江北提督臣王士珍附片具陳伏乞

聖鑒謹

奏

改設礦政局片 光緒三十四年正月

再准農工商部咨奏定礦務正附章程咨行查照辦理續准電咨此項章程經奏准以三十四年二月十三日爲宣布施行日期均經轉行遵辦在案查新定礦務正章第二章第三款內稱各省礦政應於省城各設一彙總承轉辦理之區等語是按照新章各省均應專設一礦政總局辦理各項礦務復查江寧省城前於光緒三十一年正月間經前署督臣周馥會同蘇皖贛三省撫臣奏設兩江礦政調查局定限三年查竣撤局開辦以來扣至三十四年正月限期屆滿計三年期內派員分赴三省調查不下三百餘礦商民請照試辦者絡繹不絕間有籌撥公款歸官開採之處是風氣逐漸開通成效業已昭著其前設之兩江礦政調查局現屆期滿應飭撤局一面遵照新章改設江南礦政總局仍委原辦調查

局礦務議員江蘇候補道翟衡璣駐局專辦甯蘇兩屬礦務籌備一切應行事宜惟從前設局經費係由三省分籌現設之礦政總局既專辦甯蘇兩屬礦務所有皖贛兩省協籌經費自應留備各該省湊撥自行設局之用近來甯蘇兩屬礦商領照試辦者固不乏人而礦業究屬萌芽程功未深難期速效所輸礦稅礦租及一切公費局費收數究有若干一時實無把握該局常年經費不敷甚鉅容卽設法另行籌款以濟要需除分咨農工商部暨安徽江西兩省撫臣查照外謹會同江蘇巡撫臣陳啟泰附片具陳伏乞聖鑒謹

奏

官辦煤礦片

光緒三十四年正月

再江甯省城神策門外八里許上元縣屬之佛甯門山產有煤礦

經江甯造幣分廠燒驗比較東洋二號馬崎煤爲佳可合鑄造之用經臣飭由江南財政局籌撥官款銀五萬兩興辦名曰官辦阜甯煤礦派委現辦礦政局江蘇候補道翟衡璣兼任該礦總理其與阜甯礦地毗連之商辦寶華公司因試探期滿無力開採稟請撤銷探照將所領礦地併入阜甯辦理所有商辦寶華公司探礦各費計用去銀三千八百六十一兩七分四釐經臣飭局調核帳簿均係實行動用之款毫無浮冒卽由阜甯如數認給原領礦地概歸阜甯開採經礦政局派委會縣查勘阜甯現定礦界四至連寶華所併礦地在內計六方里均係官荒擬暫用土法人力開採俟成效稍著再仿照西法購辦機器放手大辦該礦係屬官產將來出井出口各稅自應照章完納其運銷內地應概免沿途捐釐所領官荒全地併免按畝納稅茲據該局員擬具章程圖說詳請

奏咨立案前來除將章程圖說一併咨部核辦照章頒發開礦執照給領開辦外謹附片陳明伏乞

聖鑒謹

奏

捐輸展限摺 光緒三十四年正月

奏爲江北災賑息借部款懸欠過鉅請將代收免保留省兩項捐輸展限一年以資彌補恭摺具陳仰祈

聖鑒事竊照前因江北賑糶款項奇絀奏請將異途出身人員應繳捐免保舉銀兩及保舉過班留省人員應繳補交留省銀兩二項由江甯代收一年一半解部一半充賑以一年爲限屆時體察情形奏明停止經度支部議准在案茲自光緒三十三年二月初二接奉部文之日起除去封印一個月扣至三十四年三月初二

日一年限滿本應按照部議截數停止惟查前年江北沈災爲數十年來所未有冬春兩賑之外又復籌辦河工購糧平糶在在需款甚鉅不得已借用農工商部發存滬道生息銀一百萬兩奏明以捐款抵還惟賑捐及七項常捐收數無幾以之歸還因賑借墊各款尙虞不敷專恃兩項捐輸以資歸墊計自第一次請獎至三十三次止共收兩項捐款銀五十萬七千餘兩除以一半解部外僅剩一半銀二十五萬三千餘兩以之歸還息借部款尙不及十分之三揆厥情形固因捐務積疲久成弩末之勢而實由於去秋直隸永定河決口亦經奏准代收部捐無如捐款祇有此數兩省分辦各僅得半之數捐收頓形短絀實非原奏時意料所及此項息借部款關係重要斷難久事虛懸而江南財源枯竭上年因賑移用庫帑息借商本尙苦無從籌還再四籌維自非將兩項捐輸

展辦一年不足以資彌補且展辦之後仍與直省分收是雖有兩年之期限而祇能得一年之捐款但舍此實別無挹注之方據江南賑捐總局司道詳請奏懇展限一年等情前來臣等查核該司道所詳各節係屬實在情形合無仰懇

天恩俯念江北災賑息借部款懸欠甚鉅准將江南代收免保留省兩項捐輸展限一年以資彌補屆時體察情形再行停止出自逾格鴻慈謹合詞恭摺具陳伏乞

皇太后

皇上聖鑒謹

奏

製造淺水巡輪片

光緒三十四年正月

再蘇省太湖地方界連江浙水程遼闊港汊紛歧向爲梟匪出沒

之所近來匪勢日益猖獗往往聚集匪船數十艘四出搶劫日前且出有攔劫內河商輪重案每遇官兵追剿卽行竄入太湖巢穴深邃僅恃蘇省原有緝私礮船斷難制勝必須製造淺水巡輪數艘裝配快礮專令巡察太湖及內河一帶無事則往來查緝有事則駛往剿捕庶足以壯聲威而資利用業經臣等飭令上海船塢妥擬式樣並一切造法擬用檣木船壳船身長六十英尺般寬十一英尺六寸艙深四英尺吃水二十英寸速率約每點鐘九邁當船首安設機器快礮二尊取其能旋轉施放至太湖水內多草行輪每多妨礙該船輪葉週圍力求堅薄務期靈便鋒利鼓輪時可以隨勢刈割自無阻滯每艘估需工料實銀八千三百兩礮價不在其內已飭如式趕造兩艘先行試用造成之後歸甯蘇兩屬各購一艘所需工料銀兩卽由甯蘇照數分撥其需用快礮屆時設

法購配一併核實報銷謹合詞附片陳明伏乞
聖鑒敕部查照施行謹

奏

學務經費動用庫款摺

光緒三十四年二月

奏爲甯屬學務經費短絀甚巨擬懇動用庫款作正開銷以重教
育恭摺仰祈

聖鑒事竊維圖治以興學爲先興學以籌款爲急江南人文稱盛
戶口繁滋頻年推廣學務省城所設大中小及實業各學堂由公
家籌撥經費者歲有增益兩江師範學堂經升署督臣張之洞創
辦規模宏遠學科完善教員皆聘自日東校生則兼收皖贛歲需
經費甚鉅光緒三十三年下學期復添招新班三百人仍於原定
經費內掙節動支并未增益此外如高等省學堂府中學堂元甯

兩縣小學堂模範小學四十區初等小學思益小學江甯初級師
範學堂實業學堂蠶桑學堂農業試驗場方言學堂江甯駐防中
小學堂暨南學堂粹敏第一女學幼稚園陸師水師測繪講武警
察各學堂陸軍小學堂以及民立學堂之由官補助者商業學校
之雖有商款仍由官津貼者以上各學堂每歲領款多者四五萬
金少者亦需一二千金加以派往東西洋留學之費編譯書報設
局之費提學司所設公所員紳薪水之費認籌學部翰林院暨京
師各學堂之費在在皆需鉅款統計江南學務用項每歲額支約
在一百六七萬兩上下其中由藩司衙門籌撥約五十餘萬兩由
歷任督臣按照學部定章分飭運司糧道鹽道關道暨各局所籌
提雜款亦約五十萬兩上下此皆按時支放絲毫不容短少之數
現在開辦法政學堂女子師範學堂亦皆無的款可指茲據甯藩

司繼昌署甯學司陳伯陶詳稱司庫常年所放學務用款約需銀五十七萬七千六百餘兩除動支減成餉平截留新政出洋經費地丁扛脚等項共銀十七萬八千三百餘兩均詳咨有案此外需銀三十九萬九千三百餘兩從前專恃銅元餘利項下開支自銅元限鑄餘利無多業由司庫挪墊五十餘萬兩當此庫儲支絀本已無款可挪無如事關教育各學堂款項一經停放必至輟業半途殊非

朝廷興學育才之意是以三十三年分學堂用款無論如何爲難仍由司局各庫騰挪應付但庫儲多係報部正項暫時挪墊已屬格外通融若日久無款可還年復一年必至積成巨欠且庫藏有盡終亦無可騰挪倘不奏懇作正開銷將來積欠既無可清償而學堂恐亦日形隳廢等情詳請具奏前來臣查江南財政窘困已

極致此之由匪伊朝夕當光緒三十年奉旨查核江南財政其時司局各庫尙略有存儲備用之款是以部臣奏請提撥凡可以勻撥者無不盡力湊解此後儲胥已竭支用愈繁其困難亦遂較他省爲甚學堂爲當務之急既已無從籌措勢不得不出於挪墊愈挪愈虧竟成坐困前年江北奇災救濟稍緩難民棄家轉徙者數逾百萬臣抵任後倉猝辦賑見款卽撥但以先救民命爲主一切不遑兼顧現在賑務雖已辦竣而搜索已盡尤有岌岌不可終日之勢加以銅元餘利經部章限鑄又提四成解充練兵經費此次據報學務專指該項餘利之款幾四十萬悉歸無著司庫墊無可墊委係實情此外各司道庫及各局所分籌學務經費至五十萬兩實已多方搜括力盡筋疲且籌定之款每有不能如期報解者斷無餘力以濟藩庫之窮近數年來興學

之風氣雖開民力之拮据彌甚求補助者如饑如渴可裁省者亦至再至三立學爲自強根本當此多難興邦之日敢忘十年教訓之功譬諸平民之家雖生事極艱必不吝惜膏火修脯之資以自誤其子弟臣前赴歐美考察政治見各國振興學校歲費不貲以江甯省會爲東南之望關於學務用項一切併計歲支百餘萬金似不爲多所有藩庫籌解學務用款指撥銅元餘利現歸無著銀三十九萬九千三百餘兩臣督同各司道一再籌商實無他項雜款可抵惟有仰懇

天恩俯念興學關繫重要江南財政委係萬分艱窘額支之款又難稍緩須臾准於藩庫作正開銷俾濟急用不勝感激屏營之至除咨稅務大臣度支部學部查照外所有學務經費短絀懇准作正開銷緣由謹會同江蘇巡撫臣陳啟泰恭摺具陳伏乞

皇太后

皇上聖鑒訓示謹

奏

奏請歸宗片

光緒三十四年二月

再據奏調江甯差遣丁憂候選道田吳炤稟稱該員幼時承繼胞伯田楨爲嗣近年胞伯生子二人本生父田樸別無子嗣上年九月本生父病歿該員理應歸宗持服惟念自幼受胞伯教育三十餘年將來仍請一體持服三年於心始安等情稟請奏咨立案前來查律載養同宗之人爲子所養父母有親生子及本生父母無子欲還者聽等語該員所嗣胞伯現已生有二子而本生父親生子之惟該員一人自應歸宗持服毫無疑義至將來爲其胞伯仍請持服三年雖禮經未有明文而恩義實爲兼盡相應據情奏請

敕部核議施行除分咨查照外謹附片具陳伏乞

聖鑒訓示謹

奏

故紳請入文苑傳摺

光緒三十四年二月

奏爲浙江已故紳士博學多通潛心著述籲懇

天恩宣付國史館列入文苑傳以彰實學恭摺具陳仰祈

聖鑒事竊據籍隸浙江之二品銜軍機處存記江蘇候補道俞明震等呈稱已故紳士二品頂戴前廣東高廉道陸心源浙江湖州歸安縣人由舉人遵例以知府分發廣東擢升道員補南韶連道調高廉道光緒二十五年卒於家幼嗜讀書喜購秘籍明體達用著作斐然有潛園總集都凡九百四十餘卷歸自粵東創議纂修湖州府志徵文考獻該故紳之力爲多會國子監徵求書籍捐送

家藏舊刻舊鈔書一百五十種附以所刻叢書三百餘卷經前浙江學臣奏奉

諭旨陸心源自解官後刊校古籍潛心著述茲復慨捐羣籍洵屬稽古尙義等因欽此

天語褒嘉士林傳述以爲榮遇該故紳學博識精尤喜讀顧炎武書究心經濟前直隸督臣劉長佑疏稱其才識精明志行清直前山東撫臣張曜疏稱其學識閎深才堪經世前大學士李鴻章疏稱其氣局遠大見義勇爲查該故紳仕學兼優歷膺薦剡著書傳世士論僉孚開列履歷事蹟清冊呈請奏懇史館立傳前來臣伏查該故紳陸心源博學多通潛心著述所著儀顧堂文集議論純正根柢淵深其餘考訂蒐輯之書亦皆綜貫精詳有裨世用洵足標名文苑昭示來茲合無仰懇

天恩俯准將浙江已故紳士二品頂戴前廣東高廉道陸心源
宣付國史館列入文苑傳以彰實學出自逾格

鴻施除將事實清冊及所著書籍分咨查核外謹恭摺具陳伏乞

皇太后

皇上聖鑒訓示謹

奏

故員請卹並宣付史館摺

光緒三十四年二月

奏爲已故大員戰功卓著謹臚陳事蹟懇

恩賜卹並請宣付史館立傳以彰忠蓋恭摺仰祈

聖鑒事竊江蘇狼山鎮總兵吳元愷起家行伍忠勇性成當同治
二年粵匪肆擾江浙前直隸督臣李鴻章奉

命援蘇治軍海上吳元愷投効營次隨同攻克蘇城旋隸前四川

督臣劉秉璋部下隨同攻克浙江平湖乍浦海鹽三城同治三年克復嘉興湖州府城吳元愷皆拔幟先登以一夫爲全軍倡是爲該故總兵立功之始五年奉調赴山東河南一帶追剿逆捻時該故總兵已洊保游擊感激圖報每戰必奮勇當先六年東捻任賴各股肅清西捻張總愚竄擾直東李鴻章檄調該故總兵助剿襄創血戰無役不從七年西捻平積功保至副將光緒八年升任山西撫臣張之洞調吳元愷赴晉管帶練軍十一年復調赴廣東是年法越事起吳元愷奉檄籌濟滇桂邊防餉械迭次冒險解運軍儲無缺十七年奉

旨補授廣東大鵬協水師副將張之洞由粵督移任兩湖電調該故總兵赴鄂差遣日韓肇釁由鄂統帶礮隊北上二十一年正月以前敵失利褫職留營九月奉調入陝征剿逆回二十二年攻克

蘇家堡哆吧逆巢吳元愷接戰最猛關內外一律肅清蒙

恩開復原官並

賞給果勇巴圖魯名號回鄂統帶武愷營張之洞奏保該故總兵廉潔厚重軍律嚴肅請留鄂補用二十四年宜昌施南會匪仇教該故總兵率軍深入山箐沿途搜剿仍以不妄殺爲宗旨擒渠散脅分別良莠饒有方略匪亂旋定鄂中士民翕然頌之二十五年奉

旨以總兵記名二十七年康黨唐才常謀逆創設自立會散放富有票勾結長江兩湖會匪同時作亂時則

鑿輿西幸事機迫切該故總兵稟承張之洞方略嚴密搜捕渠魁授首大局轉危爲安厥功尤偉事竣奏保以提督

記名簡放二十九年俄日事起奏派統領湖北常備軍入衛時吳

元愷在鄂已及十稔威惠甚著其廉平自勵推誠馭衆尤爲諸將最師行之日軍民焚香遮道有流涕者既抵通州防次卽奉

旨補授浙江定海鎮總兵駐通二載約束軍人安戢商旅通州士民刻石頌德撤防回鄂經張之洞奏該故總兵久歷戎行戰功卓著請飭赴定海鎮本任旋奉

旨調補江蘇狼山鎮總兵臣前在湖北巡撫及兼署湖廣總督任內於該故總兵才略知之有素值省城整頓巡緝事宜資其擘畫奏請調署督標中軍副將兼統巡防營該故總兵受事以來銳意緝捕往往匹馬宵巡以勤苦率先士卒其治事力持大體有古良將風烈本年正月遽以微疾不起身後蕭然至不能成殮臣親往唁視爲之失聲一慟近今大員統兵數十載未聞有貧瘁至此者該故總兵之上不負

國下不負民卽此可見時艱方亟宿將彫零臣追懷袍澤之義用
敢臚陳該故總兵助勦仰懇

天恩將已故狼山鎮總兵吳元愷

量予

恩施並

敕部照軍營立功積勞病故例從優賜卹並將生平戰功事蹟宣
付史館立傳以昭激勸出自逾格

鴻慈除將履歷咨部外謹會同江蘇巡撫臣陳啟泰恭摺具陳伏
乞

皇太后

皇上聖鑒謹

奏

官築鐵路物料免稅片 光緒三十四年二月

再江甯省城外下關築造鐵路另由金川門接通入城以築至城內適中地方爲止往來駛行汽車業經 臣奏明在案該鐵路前購日本枕木一萬五千根當查照鐵路物料暫行免稅奏案劄飭金陵關免完稅釐放行現准稅務大臣咨甯省汽車購用日本枕木業經免稅放行姑准無庸追繳嗣後除專案奏明各鐵路材料得准免稅外其餘無論何項物料凡來自外洋者應一律徵稅等因查甯省添築城內鐵路原爲保全利權開通商務起見江南財政奇絀此項築路經費係由各署局分籌借墊本屬萬分竭蹶不得不力從節省現訂購之火車頭客車鐵軌鋼簧螺絲等件及附路之電線電具一應物料無非來自外洋綜計各項購價約銀十餘萬兩若再完納各稅費用益鉅既恐築路經費或有不敷且用項

較大則將來收回成本更覺爲難該路係屬官築倘能減輕成本
受益仍在公家近如江浙皖贛粵漢各鐵路均係商辦所用各項
材料器具與京張等處官築鐵路一律奏明免稅今甯省鐵路既
屬官辦且路綫不過十餘里雖將應用物料全行免稅較各路免
稅之數亦祇百分之一二於稅項既不至受虧而於路務則深
有裨益合無仰懇

天恩俯念甯省官築鐵路籌款不易援照各路成案將購用各項
物料一律免完稅釐以輕成本而裨路政除分咨各部暨稅務大
臣查照外謹附片陳請伏乞

聖鑒訓示謹

奏

端忠敏公奏稿卷十終

端忠敏公奏稿卷十一

籌辦罪犯習藝所摺

光緒三十四年二月

奏爲江甯省城創設罪犯習藝所謹將籌辦情形恭摺具陳仰祈
聖鑒事竊查前准刑部咨嗣後各省徒罪人犯毋庸發配概照所
定年限收所習藝軍流人犯若爲常赦所原者卽在本地收所習
藝等因光緒三十一年四月初二日欽奉

上諭翰林院撰文吳蔭培奏罪犯習藝所新章請責成各省府州
縣一律分設一摺著各直省督撫督飭所屬一體認真辦理等因
欽此當經前署督臣周馥飭司遵議並派員前往天津習藝所詳
細考查飭由江南籌防局在於江甯省城大石橋地方購買民地
五十八畝有奇平迤清曠較遠市廛以之建造罪犯習藝所尙屬
相宜嗣因費鉅難籌未能修建臣到任以來迭與司道等等商擬

參仿天津及日本成規核實建造所內監房大致以能容三百人爲率計雜居監六所分房監二所女監二所病監傳染病監各一所大小工場八座餘如應設之教誨堂看守舍典獄官辦公處員司住室材料器具各庫出品陳列所以及檢訊醫藥消防庖福等項房屋統共二百二十餘間該所基趾西偏原有小河一道再於東南北三面挑挖濠溝內築圍牆四角設瞭望台以資巡守一應程式以無礙衛生而便於防範管理爲主飭據江南財政局司道詳稱核實估計約需工料銀十萬兩惟近年款項空虛本已無可撥付而事關要政亦未可視爲緩圖現經臣飭令各司道於庫存項下無論如何爲難設法籌撥陸續支放應用除咨部查照並俟工竣再將開辦及常年經費一切辦法屆時另行奏報外所有創設江甯省城習藝所緣由謹會同江蘇巡撫臣陳啟泰恭摺具陳

伏乞

皇太后

皇上聖鑒謹

奏

創設南洋方言學堂摺

光緒三十四年二月

奏爲創設南洋方言學堂謹將辦理情形恭摺具陳仰祈

聖鑒事竊查奏定學堂章程內稱譯學爲今日要需向來學方言者於中國文詞多不措意不知中文不深則於外國書精深之理不能確解悉達且成就必不能遠大等語誠以五洲交通譯才重要若使略無根柢僅識西字不特於彼中兵刑食貨張弛治忽之大無從深求卽文詞語氣輕重緩急之間推算格物制器尙象之法亦不能得其本旨所在而閱其未譯之書近年以來京師有譯

學館之設外省如直隸湖北皆有方言學堂兩江爲江海要衝儲
養辦交涉教譯學之人材較他省爲尤亟上年八月間經臣飭署
江甯提學使於省城創設南洋方言學堂一所略仿京師譯學館
附學章程變通辦理先招德文法文兩班學生各六十名以年齡
在十六歲以上二十歲以下國文通暢口音清利品行端正者爲
合格考其程度稍優者作爲甲班五年畢業其餘學生分作乙班
每一學期大考准其推升至於不任推升者畢業時再定年限令
其補習其普通學之目九曰人倫道德曰中國文學曰歷史曰地
理曰算學曰博物曰物理及化學曰圖畫曰體操專門學之目三
曰交涉學曰理財學曰教育學所有分年學科程度悉遵奏定章
程辦理其英文一科因習者已多俄文一科因行用不廣俟財力
稍充再行增設以期完備開辦經費需銀三千九百兩常年經費

務從樽節計每月額支需銀一千二百兩每年活支需銀三千兩均卽飭由江南財政局撥給動用據署江甯提學使陳伯陶詳請具奏前來臣覆核無異除分咨查照立案外所有辦理南洋方言學堂緣由謹恭摺具陳伏乞

皇太后

皇上聖鑒謹

奏

練餉支絀摺

光緒三十四年二月

奏爲練餉支絀贛省原案協撥銀兩請

旨飭部核議籌解恭摺仰祈

聖鑒事竊照江西藩司糧道兩庫向有協撥督標營餉每月銀六千兩協撥漕標營餉每月銀二千兩歷經照數撥解前因江西撫

臣瑞良奏請將兩項銀兩全數截留經部臣議以江西係兩江兼轄省分能否准其停解行令妥籌辦理等因卽經臣會同署江北提臣王士珍將江南江北練餉竭蹶情形縷晰具

奏請仍責成該司道照數籌解欽奉

硃批度支部知道欽此欽遵恭錄咨行在案茲准江西撫臣咨此次協餉現照每年九萬六千兩之數解足三分之一等因自應查

照辦理惟查此項協餉係前督臣曾國荃前漕臣松椿任內先後

奏准協撥已歷多年江南改練新軍款項無著當時原就舊營餉額裁截歸併藉資抵補而截節舊餉中每年又撥濟江北銀十六萬兩以是展轉騰挪虧短愈甚今江西省應解協餉又短解三分之一但使稍能挹注亦何敢一再瀆陳無如新舊各軍均已編爲常年額款稍一脫誤譁潰堪虞查江南向有自強軍餉每年銀二

十二萬兩經北洋改練新軍編入第六鎮充作練餉按年由江南照數籌解誠以計授要需既經列入歲支何敢稍分畛域均經督飭司局隨時照解惟此項銀兩與江西協解江南營餉情事相同而核計銀數尙多至一倍以上若江南應解北洋之餉既須照數解清而應收江西協餉驟令短至三分之二揆諸情理似有未平臣一再籌思惟有仰懇

天恩飭下度支部核議或將江南應解自強軍餉酌予減免俾資周轉或將江西應解之九萬六千兩全數撥解北洋仍由江南將不敷之十二萬餘兩照數籌補其江北應收之每月二千兩另由臣飭局籌撥庶軍餉要需不致或有貽誤關繫大局實非淺鮮至江西省欠解銀兩仍請

飭下江西撫臣嚴飭該司道迅籌補解以應急需除咨部查照外

講會同署江北提督臣王士珍恭摺具陳伏乞

皇太后

皇上聖鑒敕部核覆施行謹

奏

改編巡防營隊摺

光緒三十四年二月

奏爲江南改編巡防營隊遵照部章稍事變通謹將辦理詳細情形恭摺具陳仰祈

聖鑒事竊查甯省於光緒三十二年二月准前練兵處咨行議將江南要塞各標一律改爲巡防隊等因當經前署督臣周馥遵章一律改編報部有案是年五月准陸軍部咨奏定巡防隊暫行章程一摺奉

旨依議欽此咨行前來復准咨覆江南巡防隊章程內開該省前

定巡防營章制係在部章未定以前酌擬辦法是以未能相符此時部章既經頒發應轉飭所司仍照新章於辦法之未合者分別更正以歸劃一如有實須變通之處應卽詳細聲明各等因遵卽劄飭所司遵照辦理一面將頒發章程詳加紬繹復取江南原定巡防隊制兩兩相比誠如部咨所云未能與部章相符自應一律改照辦理惟揆諸江南地勢參以現在情形仍有不能不稍事變通之處卽如部章令各省巡防隊一律劃分中左右前後五路而江南各屬隸於江甯部分者地形狹斜以長實未便強分五路又江北淮徐各屬伏戎在莽飄忽無常非兼設巡防馬隊與步隊相輔不足建威銷萌現擬定就江南原有各巡防營隊按章一律改編以江甯爲一路編步隊七營江常爲一路淞滬爲一路鎮揚爲一路每路各編五營淮徐爲一路馬步共編十一營合計三十三

營其江甯一路就省城原有巡防五隊十二圩六合原有巡防兩隊改照新章編爲七營名曰江甯巡防隊第一第二第三第四第五第六第七營照常分駐鎮揚一路就鎮江原有之巡防三營改照新章編爲五營名曰鎮揚巡防隊第一第二第三第四第五營以鎮江揚州兩府各屬爲該營管理區域江常一路就江陰原有巡防隊三營改照新章編爲五營名曰江常巡防隊第一第二第三第四第五營以江陰常州各處爲其管理區域淞滬一路就吳淞原有之巡防隊三營及原有駐滬獨立巡防隊第十一第十二第十三第十四四隊改照新章編爲五營名曰淞滬巡防隊第一第二第三第四第五營以吳淞上海一帶爲其管理區域淮徐一路其馬隊五營則就原有銘字馬隊三營改編名曰淮徐巡防馬隊第一第二第三第四第五營步隊六營則就原駐江北之元字

三旗鎮字一旗及留防第三十第三十一兩隊改編名曰淮徐巡防步隊第一第二第三第四第五第六營均照常分駐以上統計合共三十三營每路設統領各一員皆自帶一營總計全省原有勇丁數目以之按章改編三十三營以此之盈補彼之絀數目不甚懸殊所應裁者祇原有之排長爲新章之所無除以抵新章之哨長外計尙應裁去七十七員又鎮澄淞三處每處原有司號長一員計三員新章無此名目亦應裁去江北銘字馬隊三營改照新章編制五營應裁兵丁約計一百餘名元鎮四旗又留防兩隊合併改編步隊亦應裁去兵丁數十名又銘字馬隊原有幫辦三員一併裁撤以上應裁各員弁兵丁均發給恩餉一關澄鎮原設協統一員此次一併議裁以符部章各項薪餉按江南江北馬步各營隊原有之餉攤派照章每年仍按十關發給新餉舊餉兩項

相抵尙無短絀其原定薪餉應卽截算至三十三年第九關十一月二十四日止請從三十三年第十關十一月二十五日起一律按照改訂餉制開支常年棚費包巾草帽衣褲操靴以及活支等項均照新章核發核實造報又新章巡防馬步隊一營之制如會計長醫生槍匠三項均爲部章所未載然細加考查此項實爲營中必不可少之人擬請一併增入據督練公所總會辦參議擬議會詳前來臣覆核無異當卽批准照辦並飭將舊有之統領營官逐加考核譽望素著者仍加委任聲名平常者立予汰除新委之員由督練公所遴選試驗必有新軍知識并稍有經驗者始予補充現已一律改編就緒統領管帶大致得人復經嚴定管區專章俾各統領管帶明分權限各專責成其駐屯長江一帶之隊仍令聯絡水陸巡緝隊伍以期互通聲息消弭隱患仰副

朝廷眷顧東南之至意所有遵章改編巡防隊詳細辦法緣由除咨部外理合恭摺具陳并將委充統領管帶各官銜名另繕清單恭呈

御覽伏乞

皇太后

皇上聖鑒謹

奏

查辦江西教案摺

光緒三十四年二月

奏爲查辦江西南康贛縣等處匪徒鬧教獲犯議結恭摺仰祈聖鑒事竊上年八月江西南康贛縣等處匪徒鬧教一案欽奉諭旨派員查辦當經臣端方派江蘇候補道俞明震正任撫臣瑞良派江西候補知府曹樹藩先後馳往會同調署臬司正任贛南

道江毓昌署理贛南道王鵬九督飭各該府縣查拿審辦撫臣瑞良先分飭吉安建昌防軍就近抽隊幫同防範又由省派協統李瑞帶陸軍兩營前往會同南贛鎮總兵蔣雲龍彈壓剿捕歷將起釁滋事勦匪獲犯審定罪名商明賠款立約定議各緣由迭次電奏在案茲據江毓昌王鵬九將拿獲各犯審明分別擬議開錄供摺會稟請奏當飭署臬司慶寬復核無異稟請奏結前來臣等詳加查核緣南康縣大窩裏陳姓教民充當牛牙因勒買攘搶耕牛起釁黃邱謝張王等姓起壇學習神拳聲言仇教糾衆往攻教堂教民開砲打死六人亂民愈聚愈衆八月十八日左營管帶黃壽山率隊至堂保護爲首倡亂之黃泰盛登山吹號邱黃斑虎卽邱德明羅火燒天卽羅興發等率黨擁集該管帶知禍機已迫卽行挾教士江督烈安文思等從教堂側門出外並將哨弁宋芝瑞熊

壽全之馬分給乘騎雨後路滑屢乘屢蹶舍騎徒步督率弁勇前
後擁護繞至堂後數十步適與匪黨羅火燒天邱黃斑虎等相遇
黃壽山上前抵禦槍斃二匪羅火燒天黃日生等先將黃壽山戕
殺黃日生卽被哨弁熊壽全槍斃邱黃斑虎等亦將江教士殺害
哨弁宋芝瑞哨長嚴師賢同時被戕弁勇等保護教士安文思逃
出匪黨當將教堂及教民房屋放火焚燒乘亂分搶物件殺死教
民男婦數十人倉猝之間各村響應自南安至贛縣坪路上教堂
教民房屋多被焚燬十九日贛州城內法國天主堂被匪焚燒二
十日英國耶穌堂兩處亦有莠民往鬧損失房屋器物地方文武
極力彈壓格斃搶匪二名拿獲謝國章等十二名幸而解散教士
均已逃出未傷嗣南康縣城內崇義縣鄉間均有焚燬教堂教民
房屋情事教士均避出未傷二十二日忽有南康匪黨數百人黃

衣執旗攻贛城當卽出隊迎擊槍斃匪首二人生擒一匪陣斬以
徇匪衆大潰乘勢渡河追剿復斃匪十餘人生擒匪黨袁南生吳
家肇羅洪發三名女匪羅豬頭一名奪獲黃旗兵械等件當卽正
法示衆人心大定九月李瑞統兵到贛江毓昌卽會同親率大兵
進駐南康縣境飭傳各堡紳耆來營謁見曉之以

國法鎮之以兵威示之以德意諭令各族自報匪名帶同兵勇分
途搜捕首先鳴鑼滋事之王結巴子聞拿緊急畏罪自盡拿獲南
康縣滋事首要匪犯黃泰盛邱黃斑虎卽邱德明劉南狗卽劉南
斗曹毛狗張麻孜張毛仔周福林吳四狗周仁芳吳文祺郭科生
黃泰標黃癩利頭陳秀淮黃陽牯張亞四張泰和老黃光桂卽黃
北石陳灣脚謝水石孜賴其堂楊盛發劉土生孜陳國連陳厚皮
郭禮玉劉發章明忠賴茂生賴芳桂彭其禮邱花砲陳芳桂卽大

眼牯贛縣滋事匪犯羅盛安鍾隆沛卽鍾矮子劉道益劉二萬鍾彩章卽鍾長子黃岳雷張俊棋卽張羅矮子張俊秧凌大發鄧先莒等四十三名由江毓昌王鵬九督同該府縣等逐一研訊據供糾衆鬧教戕殺官弁教士焚燬搶拆教堂教民家殺死教民及竄攻贛城拒敵官兵並分別乘亂搶奪傷人等情不諱自應按律問擬匪犯黃泰盛爲首糾人倡亂登山吹號致釀戕官鬧教鉅案劉南狗卽劉南斗連日鳴鑼糾衆滋事邱黃斑虎卽邱德明曹毛狗張麻孜張毛孜吳四狗吳文祺周福林周仁芳郭科生均聽糾滋事或戕殺官弁教士勇丁教民縱火焚燒教堂房屋或聽糾搜殺教民羅盛安聽糾竄攻贛州府城均屬甘心從逆厥罪維均除周福林已於取供後在監病故毋庸議外黃泰盛劉南狗卽劉南斗邱黃斑虎卽邱德明曹毛狗張麻孜張毛仔吳四狗吳文祺周仁

芳郭科生羅盛安均合依謀反不分首從律擬凌遲處死遵照新章改爲斬決鍾隆沛卽鍾矮子起意糾衆持械向雷國顯鍾祖才等家強索劉涵古寄存衣物復與在逃之李葆正糾衆行搶教民聶文通家得贓劉道益劉二萬鍾彩章卽鍾長子黃岳雷均聽糾強索復隨同行搶張俊棋卽張羅矮子起意糾搶教民范盛彭家贓物並強索張俊林家穀石張俊秧凌大發鄧先莒均聽糾行搶復隨同強索聚衆均在十人以上實屬倚強肆掠凶暴衆著除張俊棋已於取供後在監病故毋庸議外鍾隆沛卽鍾矮子劉道益劉二萬鍾彩章卽鍾長子黃岳雷張俊秧凌大發鄧先莒均合依搶奪結夥持械聚衆至十人以上倚強肆掠凶暴衆著者照強盜律不分首從例斬立決違章改爲絞決其縱子習拳隨同在場瞭望並未糾人之黃泰標冒充教民攔搶耕牛並乘亂搶奪傷人之

陳秀淮聽從習拳並乘亂搶奪傷人之張泰和老均應貸其一死酌擬永遠監禁其隨同挑草焚堂並聽糾捉人之黃癩痢頭搶奪傷人之黃陽牯張亞四聽從攔歐傷人並幫同捉人之賴其堂乘亂傷人之陳灣脚謝水石攷幫歐傷人之楊盛發乘亂搶奪之黃先桂卽黃北石劉土生攷陳國連陳厚皮郭禮玉劉發及習學神拳肇事之賴茂生賴芳桂幫同捉人之彭其禮邱花砲陳芳桂卽大眼牯均應酌擬監禁十年楊盛發於取供後在監病故應毋庸議其乘亂嚇詐之幸明忠情節稍輕應酌擬監禁五年均俟限滿察看辦理其餘情節較輕之張已龍牯等及謝國章等並事前拿獲學習神拳各犯分飭各該府縣照章擬結分案稟辦除因公殉難之左營管帶黃壽山哨弁宋芝瑞嚴師賢業經奏請從優議卹奉

旨允准並由臣等優給撫卹銀兩暨殉難勇丁分別卹賞外所有此次民教滋事焚搶南康贛縣各耶穌堂並耶穌教民家經江毓昌王鵬九等督同贛州府縣與英教士和爲貴美教士馬設力先行議結贛縣各耶穌堂及教民家並南康縣各耶穌堂共議給卹各款洋一萬六千九百元又搶失衣物書籍器具洋一千八百五十元其南康縣各教民家續經江毓昌於督兵辦匪時督飭該縣知縣毛宗澄與和馬兩教士就近議結共給卹款洋一萬三千五百三元天主教案情節較大經俞明震曹樹藩會同地方官就近與法主教柏勒史法教士徐學德和衷磋商贛縣各天主教堂及各教民家共給卹銀六萬六千兩又洋三萬元南康縣各天主堂及各教民家共給卹銀七萬兩又洋九萬二千元法教士江督烈粹被亂民戕害殊堪惋惜亦經議明從優

另留表記飭據毛宗澄在南康與教士安文思穆林麗議定教堂側空地一塊由縣購送並另給洋三千元以爲建造教堂立記念碑及安葬江教士之用碑文飭縣撰給由該教會自行刊刻江教士之柩亦由教會自行覓地安葬並照中國成例不得昇柩入城均經先後分案立約定議其餘崇義縣教案業經江毓昌委員與教士商明由縣議結大庾縣教案情節甚輕亦經飭縣就近督紳議結稟報惟查江教士籍隸義國充當法國教士南康贛縣教案雖經一律議結迭經電達外務部轉告法義兩公使法使初無異言而義使以未接政府訓條爲詞迄未答復嗣於十二月據法主教柏勒史向吉安府知府許祐身告稱接法使電江教士案歸柏提議既已照結簽約則此案確已議結義使雖未答復亦可作爲罷論等語自可照擬結案除匪首黃泰盛在監患病甚重恐其倖

逃顯戮業經先行批飭正法外所有抵償江督烈之正凶邱黃斑
虎卽邱德明及罪應斬絞之要犯劉南狗卽劉南斗曹毛狗張麻
孜張毛仔吳四狗吳文祺周仁芳郭科生羅盛安鍾隆沛卽鍾矮
子劉道益劉二萬鍾彩章卽鍾長子黃岳雷張俊秧凌大發鄧先
菖等倡亂肇釁情罪重大未便稍事稽遲應卽飭令一併就地正
法以昭炯戒至地方文武各員署南康縣知縣楊寅揆於大窩裏
鳴鑼聚衆圍攻教堂並不親往彈壓解散以致教士江督烈被戕
殞命非止畏葸實屬縱容業經奏叅革職應請再加永不敘用不
准報効他省亦不得別給獎敘南贛鎮總兵蔣雲龍於贛城鬧教
時經道府縣持帖往請四次始到便衣從教堂後門入僅帶護兵
六名實屬保護不力業經另摺奏叅贛州府知府關榕祚贛縣知
縣張學培於贛城鬧教時親臨彈壓均各身受微傷究未能先事

預防南安府知府裕隆雖於大窩裏鬧教之先督隊出巡各屬然
此次鬧事之南康崇義等屬均係該府所轄地方亦難辭咎署崇
義縣知縣張超轄境內亦有焚燬楊眉寺教堂之案除大庾縣知
縣陳守謙業於另案奏參開缺外以上四員均屬防範不嚴應請
一併交部議處以昭懲儆至委署臬司卸任贛南道江毓昌事前
雖不無疏忽事後派兵辦匪護送教士極爲出力署贛南道王鵬
九到任未及半月均請免其議處以示區別所有江西南康贛縣
等處匪徒鬧教獲犯議結緣由除將全案供招咨部查核外謹合
詞恭摺具陳伏乞

皇太后

皇上聖鑒訓示謹

奏

道員辦理教案出力片 光緒三十四年二月

再贛南鬧教一案肇事之初外人責言頗切駐滬法總領事來文請由南洋遴派公正可靠人員辦理等語經臣端方委派江蘇候補道俞明震赴贛查辦該員與吉贛南三府法國主教柏勒史晤商並與柏主教所派之教士穆林麗總教會所派之教士徐學德同赴各鄉查看議辦該教士索償至數十萬兩之多且懲官辦犯均欲干預辦理異常棘手該員開誠布公據理力爭不激不隨磋商多日乃得漸就範圍立約定案贛案以六萬餘兩三萬元康案以七萬兩九萬餘元完結甚爲核實約內於辦犯但稱由地方官按律辦理不枉不縱懲官絕不預聞該處紳商學界諸人以該員議結教案力爭主權不累地方深爲悅服交電稱謝自光緒三十年湖北議結施南教案因應得宜中外翕服後此爲僅見查俞明

震於光緒二十九年經前督臣魏光燾以才識通明志趣遠大明保引

見奉

旨交軍機處記名在案今辦理贛南教案異常出力臣等查該員才長識果任事精能實爲近今不可多得之才應如何量予錄用之處出自逾格

恩施謹合詞附片具陳伏乞

聖鑒訓示謹

奏

參劾總兵不職摺

光緒三十四年三月

奏爲總兵大員庸闇不職據實參劾恭摺仰祈

聖鑒事竊查各鎮總兵有督率標營彈壓巡防之責遇有地方警

亂宜如何身先士卒方期消患無形况江西當屢釀教案之後尤宜隨時防範以遏亂萌乃此次贛屬匪徒滋事南贛鎮總兵蔣雲龍事前毫無覺察已屬職守有虧迨教堂被毀時經道府縣持帖往請四次始到便衣從教堂後門而入僅帶護兵六名以致無人彈壓釀成巨案實屬顛預誤事貽害地方現當整飭營伍之際似此庸闇不職未便稍事姑容相應請

旨將南贛鎮總兵蔣雲龍卽行革職以爲貽誤事機防護不力者戒所遺員缺並請

迅賜簡放以重職守謹會同護理江西巡撫臣沈瑜慶恭摺具陳
伏乞

皇太后

皇上聖鑒訓示謹

奏

派員查辦餘孽片

光緒三十四年二月

再江西贛州吉安南安各屬上年拳匪鬧教經臣派委江蘇候補道俞明震前往議結該處風氣未開民愚且悍迭次分別剿撫並實力查辦清鄉地方雖稱安靜而拳風仍未盡熄近來崇義縣境復有大庾餘孽誘人習拳經營縣查悉拿獲匪徒一名正匪逃逸此外安遠等處亦有拳匪起事仇教之謠甯都州屬天主教民又因事與耶穌教民聚衆滋鬧相持不下臣與護理江西撫臣沈瑜慶迭飭贛州鎮道暨該管各府州嚴密查拿防範甯都兩教不和並飭設法排解竭力彈壓均不准稍涉玩忽復經臣派委上年隨同俞明震赴贛之江蘇候補知縣楊先震北洋水師學生馬廷賡護撫臣派委江西候補知縣洪家衍先後馳往查辦惟查贛南自

上年出有教案地方已屬困敝設查辦稍不得力再生事端無論與外人交涉更難地方善後亦將無從措手贛南僻遠尙少熟諳交涉輕重適宜之員亟應仍派江蘇候補道俞明震前往會同該鎮道等督飭印委各員認真查辦以期周妥除檄飭遵照外謹附片具陳伏乞

聖鑒謹

奏

剿辦梟匪情形摺

光緒三十四年三月

奏爲剿辦梟匪妥籌布置並迭次獲勝暨續獲匪首詳細情形恭摺會陳仰祈

聖鑒事竊照蘇浙交界地方梟匪肆擾前經臣等奏派蘇州布政使瑞澂督辦蘇松太杭嘉湖緝捕清鄉事宜該六屬牧令營汛防

軍歸其節制調遣奉

旨允准嗣將佈置情形及迭次獲勝緣由摘要電奏並聲明嗣後
儻有營官人等畏葸退縮甚或通匪縱逸擬請嚴參治罪其情節
較重者即予明正典刑牧令等官辦理清鄉團練不力一併從嚴
參辦如有剿辦得力文武員弁亦懇從優獎勵至添募水師購置
淺水輪船礮械並犒賞購線一切需用款項請在兩省海關雜稅
項下提撥作正開銷等語奉

旨端方陳啟泰馮汝驥會同電奏悉該督等辦理剿匪尙屬認真
仍著嚴飭水陸各營乘此得手跟蹤搜捕務將各屬積匪悉數獲
懲以淨根株而靖地方所擬賞罰辦法暨在海關雜稅項下開支
犒賞購線等費均著照所請該部知道欽此旋在吳江地方拿獲
匪首余孟亭又經電奏在案查蘇浙梟匪種類不齊浙西之青紅

往松江太倉兩處以第一營駐紮太倉第三營駐紮松江原駐江陰之三十六標統帶杜淮川率帶全標三營馳往嘉興各屬駐紮均經撥給機器快礮以資利用又派三十五標第二營管帶孟平馳往湖州南潯等處臣啟泰飭派管帶傅應璜朱樹聲率帶兩營馳往平望分紮防剿均歸瑞澂節制調遣並派奏調江蘇差委湖北候補道孫廷林爲兵站總監專司各路轉運事宜其江陰地方商由湖廣督臣趙爾巽飭派統帶曾廣大率帶全標三營前來填紮並以匪多皖籍恐由浙之湖州蘇之溧陽遁回皖之廣德甯國等處臣啟泰飭派管帶剛兆麟率領所部一營駐防溧陽東壩臣汝驤嚴飭湖州防營會同甯軍管帶孟平認真巡緝並商由安徽撫臣馮煦飭派陳興鈺率帶所部全營分駐甯國廣德等處以杜竄逸旋因松江各屬僅止一營兵力尙嫌單薄飭令原駐高郵寶

應一帶防緝之第三十四標第一營管帶姜國樑率帶所部一營開往松江助剿一面商由江北提督臣王士珍飭派二十五標第三營管帶何豐裕率帶所部一營前往高寶一帶填紮接防惟是梟匪往來多在支河港汊分投搜剿全賴水師飛划水師統領徐錦堂師久無功且風聞有象匪情事正擬嚴參審辦旋於電奏商輪被劫案內先行奉

旨革職經臣等飭由瑞澂將徐錦堂撤差看管從嚴審辦其飛划水師營遴委前江西二標統帶陳得龍接統責令切實整飭另由瑞澂添募水師一支名曰蘇防新中營計船四十一隻弁勇三百餘人以沈葆義爲管帶歸陳得龍節制會合飛划鹽捕等營巡查剿捕一面另行訂購淺水輪船八艘配置礮械添募水師以備往來巡緝之用嘉防統領李振標係由蕪湖調浙甫經到差情形尙

未能周悉現在迭奉

諭旨整頓長江巡緝蕪湖爲輪船碼頭防務甚關緊要現飭李振標仍回蕪湖嘉防幫統徐人驥樸誠勇敢勦匪甚力應卽改爲統領而以周樹森爲幫統杜淮川孟平等軍並各僱備輪船供其往來行駛兼以各軍分紮地方太廣必須電報迅捷俾可速赴事機商明郵傳部將瑞澂電報改爲一等蕭杜各營電報改爲一作四等提前發遞以期呼應靈通一面由瑞澂督飭蘇松太杭嘉湖各屬牧令議訂章程將清鄉團練事宜切實舉辦凡陸路之鄉鎮村莊水路之民船漁划全行編號清查並選練壯丁扼要防守准赴上海製造局購領槍枝烙印分給應用至鹽捕營營務處淞南營游擊孔德陞鹽捕前營營官游擊銜王士志查有與匪首夏竹林暗通情事並准江南提督劉光才電請澈查究辦業經調甯收禁

由電奏參奉

旨革職懲辦茲經蕭先勝拏獲王士志族人王泰和卽王四把子係夏竹林之姻親又拏獲夏竹林之妻夏李氏均飭解送來寧提同孔德陞質審一經訊明通匪實情卽當欽遵

諭旨從嚴懲辦以昭炯戒又有蘇捕營船長蕭得華於正月二十四日夜間奉命查拏匪船竟敢擁被不起以至貽誤已由瑞澂飭令軍前正法此勦辦梟匪妥籌布置之詳細情形也飛划鹽捕等營原爲捕盜緝私而設而地方遼濶港汊紛歧船數無多不敷分布且自部定新章限制保舉之後殊無鼓勵之資剿捕難期得力兼之各營將領狃於積習不能認真整頓以致匪勢益張職是之故瑞澂任事後明定規條力加整飭賞罰嚴明營務始有起色本年正月十五日徐錦堂尙未交卸飛划統領督率管帶凌秉忠等

剿匪於青浦縣尙民田等處擊斃匪目顧壽根等五人傷八人勇
亡二名受傷二名十三日追至崑山縣陸家橋奮力剿捕接戰約
六小時之久擊斃匪目曹祥生擒獲王得標其餘擊斃者約二十
餘人傷者甚衆匪首夏小辯子受傷竄逸官兵傷者五人臣等接
獲電報飛飭各營合力兜剿十八日匪竄金山縣呂巷市經甯軍
蕭先勝督兵迎擊對敵良久匪傷極衆暗毀橋梁竄逸官兵沿河
奮追擒獲二匪起有金銀贓物十九日匪竄嘉善婁縣交界之楓
涇地方先由嘉境登岸經杜淮川一軍出擊鏖戰至三時之久擊
斃在岸匪八名內有身穿皮袍指揮匪衆之悍目三名當場斬獲
首級棄船落水及傷斃者不少奪獲匪船四隻槍三桿是夜追至
河口復有續來之匪與之對抗適蕭軍來援將匪奮擊潰散時值
黑夜不知匪黨傷亡確數排長潘海秋前往偵探遇匪被害官兵

傷者一人是日另有匪黨大股在南柵口登岸圖劫軍火當經官兵看破開槍向擊蕭軍聞警馳到夾攻其時提標鹽捕飛划等營俱到合力攻剿匪衆勢甚兇猛鏖戰至五六小時之久經蕭軍將匪首夏竹林擊斃並斃悍目施幅三林小老大奮小老大孔小老大沈小老大朱小老大等六名及散匪十餘名生擒六名提標營擊斃四名內有一名認係匪目左小老大餘匪紛紛落水不計其數奪獲匪船二十三隻洋槍數十桿子彈一簍銅礮一尊刀械旗幟號衣各數十件起出銀錢金珠首飾衣物甚多二十日徐錦堂督率水師追匪至嘉善縣楊字圩奮力攻剿斃匪一名擒匪十二名傷者頗衆奪獲匪船十二隻並快槍抬礮旗幟號衣多件內有圓燈一盞信函兩件確係商輪被劫原贓是日杜軍亦奪獲匪船一隻擊斃二名生擒二名當飭將出力弁兵及陣亡受傷者分別

從優犒卹起獲各賊傳主認領無主者變價充賞斬獲匪首及悍
目首級飭令拍照相片備查所獲之匪目顧金標從匪周阿四兩
名解交瑞澂提訊據顧金標供認在夏竹林船上夥同迭劫拒捕
周阿四供認入夥搖船放哨均飭就地正法其餘各匪飭據松江
府知府戚揚分別提訊據汪小周供認在余孟亭名下充當頭目
迭劫油車港袁化等處當舖並在內河夥劫商輪沈阿全林阿四
丁克慶王得標趙良甫同供入夥爲匪行劫商輪當舖蔡阿馬王
春山同供聽從入夥行劫商輪杜開貴供認夥劫袁化等處當舖
姚祥貞供認迭劫太平橋倪姓九里菴夏姓以上十犯情罪重大
均飭就地正法沈阿祥張得標瞿書根夏長庚金阿庚陸秀鳳六
名被脅上盜爲日無幾情尙可原飭令另審擬辦金小二供在松
隱鎮遇匪被擄屢逃未遂郭小六魏才松向在紳士魏家孫家傭

工在途誤拏飭令各匪指認均稱不相認識應飭交保管釋又有馮三和卽馮厚元拏獲之時據獲匪指稱似係余孟亭僞營務處旋經詳加研訊並由瑞澂派員訪查馮三和係紹興人在嘉善種田度日此次赴滬轉回搭坐李七三船隻十九晚過楓涇正值官兵追匪喫緊之際喝令停船馮三和等言語不通未卽停泊致經官兵拏獲查訊確係良民並經浙紳多人赴案具保立即一併開釋船隻交還此迭次剿匪獲勝並將獲匪審明懲辦之實在情形也梟匪自夏竹林擊斃後餘衆竄越惟匪首余孟亭等未獲深恐復又勾結滋擾隨經臣等督同瑞澂嚴飭分投搜捕據上海巡警局江蘇補用道汪瑞闥拏獲匪黨蔡桂士李桂亭衛定香三名起出贓物甚多解交瑞澂提審蔡桂士供認夥劫小輪李桂亭衛定香均供迭次夥劫不諱已飭就地懲辦又據署太倉州知州吳琪

會營拏獲匪首李能掌起有贓物多件提驗身受槍傷據供該匪手下有船十一隻徒黨百餘人同劫大東輪船及迭次搶劫拒捕楓涇之戰被官兵槍傷逃逸現被拏獲等語又另獲匪目王二據供充當李能掌小頭目不諱飭由瑞澂委員前往復審無異已飭就地懲辦又據都司夏鳴皋在上海拿獲匪黨鄭老窩子一名起出洋槍等件汪瑞闈飭派偵捕弁勇查至鎮江會同該處營縣拿獲匪黨任小山吳尙田兩名及販私之尹日新等五名又據瑞澂電稱探得匪首余孟亭竄匿吳江縣屬一帶飭派礮目劉善臣等前往於二月十六日將余孟亭拿獲訊據供稱該匪先在浙省各營當勇旋充旗牌後在上海各處開賭上年經前已擊斃之管老窩子現獲正法之李能掌推爲幫首連搶蘇浙鹽船布船絲行米行當舖等家得贓甚鉅與夏竹林先不認識上年冬間始與聯合

夏竹林爲土幫有船二十餘隻夥黨二百餘人槍一百數十桿該匪爲客幫有船二十餘隻夥黨三百餘人槍二百六十桿相約有事互相接應仍各搶各分楓涇之戰兩幫共四十餘船夏匪當經擊斃該匪逃竄上岸因尋覓各船不遇擬從於潛等處回皖致被拿獲又據瑞激新募之蘇防新中營管帶沈葆義拿獲匪首江北阿四匪巨朱小弟兩名解交瑞激提審據江北阿四供原名張蓬來又名皮匠阿四江北人二十歲後幫人販私嗣在袁化開賭三年前在鹽捕營當勇旋即出營先與夏竹林余孟亭均不認識上年九月始與合幫同爲頭目搶輪劫當拒敵官兵供均在場楓涇戰敗身受槍傷與夏小辦子分帶六船逃至吳淞分手各等供並據朱小弟供認入夥放哨劫當得贓拒捕等情不諱已飭將余孟亭江北阿四朱小弟一併正法出力弁兵分別重賞又據沈葆義

稟稱拿獲匪黨沈阿六該營領哨俞金勝被匪拒捕中槍身死當飭從優撫卹並將沈阿六解交瑞澂審訊至杭嘉湖三屬地方經臣汝駉督同瑞澂嚴飭搜捕本年正月以後據平湖縣獲匪史阿三馮阿龍訊認隨同夏竹林搶劫平邑團防局及商輪袁化鎮當舖各案馮阿龍兩次擄人勒贖屢與官兵接仗已飭就地懲辦又據海甯州獲匪沈文春訊認與夏竹林合搶袁化鎮當舖及戴生昌輪船浙省巡防隊獲匪目張世餘訊認爲夏竹林帶隊又獲匪黨劉士增訊認隨同江北阿四搶劫袁化鎮當舖又據湖州防營獲匪唐老大卽雲蔚吳少初二名訊認夥劫陽泰典拒捕得賊均經飭由浙臬司復核詳辦又據海甯州會營獲匪王卓三俞有元朱壽堂三名又據桐鄉縣獲匪錢坤春錢和尚二名又據海甯州會營先後拿獲浦敘慶朱了頭左敘生陳阿七俞寶順鄒發發李

阿毛錢福三陸懷懷等九名又據嘉防營先後獲匪袁老開張少
五戴月廷鈕子高沈芝鄉張阿金陸阿五黃中根盧中美林平彰
章金大黃阿三等十二名又據甯軍統帶杜淮川獲匪陳雙喜一
名以上名犯亦俱飭令各州縣復審明確稟請懲辦此續獲匪首
余孟亭等及迭獲著匪之實在情形也臣等伏查蘇浙梟匪盤踞
兩省交界處所根蒂深固黨羽繁滋匪首夏竹林余孟亭又各凶
悍狡險頗有賊智動稱劫富濟貧爲籠絡人心之計若非迅速剿
辦恐爲廣西匪亂之續仰賴

聖明眷顧東南

俯准臣等所請畀瑞澂以督辦緝捕清鄉事宜瑞澂在上海道任
內卽已擒獲范高頭宋開美等著名巨匪威望久孚受事以來瑞
澂喘疾未愈強起治事苦心規畫殫力經營信賞必罰寬嚴互劑

甯蘇浙各軍將士無不感奮用命故能迭獲大捷所向有功將匪首夏竹林首先擊斃並生擒擊斃悍目著匪爲數甚衆旋復不惜重貲多方購綫將匪首余孟亭江北阿四李能掌等先後拿獲審明懲辦人心大定航路平安事機尙稱順手現在土客兩幫匪首一已擊斃一已就擒正法餘黨膽寒竄逸臣等仍當嚴飭各營分投認真搜捕並由瑞澂將水師新軍加緊訓練一面實力舉辦清鄉務使殄除積匪安定閭閻以仰副

聖主綏靖東南至意其出力各員弁業經奏蒙

恩允准其從優獎敘藩司瑞澂任事未久聿著成勞雖口不言功未便沒其勞勩應如何破格獎勵出自

聖裁其餘在事各員弁容由臣等查明分別奏獎以示鼓勵所有剿辦梟匪妥籌布置並迭次獲勝暨續獲匪首匪黨分別審明懲

辦情形謹合詞恭摺具

奏伏乞

皇太后

皇上聖鑒謹

奏

請賞假半箇月片

光緒三十四年三月

再臣向患肝風之證每當舉發之時神志昏迷四肢冷厥不進飲食不能動轉直至數小時之久始克蘇醒前在護理陝西巡撫任內曾舉發一次去年四月復發一次病狀較輕隨即醫治就愈本年入春以來天氣陰寒三月初六日復因外感風邪觸發舊疾其病情較前次爲稍重昏厥半日不能言語進以疏風祛痰之劑始漸輕減據醫者云其病源實由勞心太過掣動肝風以致痰入心

包猝然昏厥病後精神疲乏暫時未能復元必須靜養旬日方可
漸臻痊可仰懇

天恩賞假半箇月以資調理出自

鴻慈日行公事臣仍當在內署核辦以免貽誤所有臣舉發舊疾
懇

恩賞假緣由謹附片具陳伏乞

聖鑒訓示謹

奏

創辦法政學堂摺光緒三十四年三月

奏爲創辦兩江法政學堂謹將辦理情形恭摺具陳仰祈

聖鑒事竊近年以來京師及直隸廣東浙江江蘇湖北各省皆有
法政學堂之設誠以爲治端賴乎得人而吏材尤資於培養政治

法律之學非講求有素不足以深明原理措注咸宜江甯省城舊有仕學館一所科學既欠完全辦法亦未周妥前經臣督飭江甯藩學兩司悉心籌畫改爲兩江法政學堂並遴派調甯差委候選道田吳炤爲該學堂監督妥籌辦法茲據詳請具奏立案前來查法政學堂以直隸開辦爲最先學部亦於上年開辦法政學堂其章程均經奏定在案兩江法政學堂辦法謹就江南地方情形參照學部直隸兩處奏定章程略事變通期臻完善其大綱分爲正科別科兩層略與憲政編查館考驗外官章程所稱速成長期之辦法用意相同正科以造就完全法政人才爲宗旨先習豫備學科二年接習專門學科三年共計五年畢業其學生官紳並取須有中學根柢即可考驗錄入本年開辦招取百名嗣後每一學年招考一次均以百名爲定額五年以後每年有完全法政畢業生

一百人招考之時仿照兩江師範學堂成案甯蘇皖贛一律兼收庶規制較閎而法政教育可以徐收普及之效擬定蘇屬二十名皖贛各十名甯屬六十名由各該省藩司按照定額每名每年補助學費一百元畢業之後發歸各省任使其別科係爲甯屬造就佐理新政人才專收甯屬三十六州縣舉貢生員及甯屬候補人員考驗取入二年畢業此爲速成辦法蘇皖贛各有速成法政學堂自應毋庸錄取以省繁複而示區別仍由臣督飭經營剋期開學責成管理員教員認真經理盡心課授以期仰副朝廷作育人才實事求是之至意除將詳細章程咨部查照外其開辦及常年經費俟核定後再行奏明辦理所有創辦兩江法政學堂辦理情形謹恭摺具陳伏乞

皇太后

皇上聖鑒訓示謹

奏

駐防興學練兵照案撥款摺

光緒三十四年三月

奏爲京口駐防興學練軍款仍無著懇再照案分認籌解恭摺仰
祈

聖鑒事竊查京口駐防續備軍津貼及擴充各學堂經費歲需銀
二萬四千兩由鎮江關罰款項下提撥六千兩尙短一萬八千兩
均飭江海鎮江兩關分認籌解經臣會同升任江蘇巡撫臣陳夔
龍一再奏請先後接准部咨准由鎮滬兩關撥給一次當飭該關
道等照解在案茲准京口副都統奎芳以本年興學練軍款仍無
著咨商續撥前來臣查京防興學練軍創議之始本恃銅元餘利
爲挹注自銅元停鑄始復請提關款以應急需部臣慎重度支准

予撥給一次並聲明一俟湖田有收卽在京防二成項下動用等語是湖租一日無著卽關款准予通融已在部臣兼籌並顧之中現在此項湖租自上年被水以後經營繁費全工未完按田起租尙須有待且爲數有限全無把握是湖租一項實未能指爲京防的款况該防各學開辦已及四年所練新軍亦復整齊有法一旦中輟不獨前功盡棄值此駐防生計艱難之日忽失訓練教養之資根本攸關尤難忽置臣等再四籌思惟有仰懇天恩俯准將京防興學練軍經費銀一萬八千兩仍照原案由江海鎮江兩關按年分認籌解作正開銷出自逾格鴻施除分咨稅務大臣度支部學部查照外謹會同江甯將軍臣清銳江蘇巡撫臣陳啟泰恭摺具陳伏乞皇太后

皇上聖鑒謹

奏

淞崇安設無綫電片

光緒三十四年三月

再前據辦理南洋官電局署金陵關道朱恩紱詳報吳淞通崇明海綫在海底中斷當商令上海電局洋工程司毛登森偕同華監工前往測勘疊用騰空實地諸法察得水綫損壞處阻力甚大似因沙淤深埋入土欲確知病綫之所在苦無把握又復轉商大北公司擬命估工包修乃大北不允包修若節節撈試日索英金一百五十磅約銀一千餘兩所費過多既不能預定竣工期限曠日持久終難將病綫起出必致虛糜鉅款如另換新綫則費益不貲實難籌措惟崇島孤懸海外地極重要一旦失此電綫不能通達消息於江海防務深有關繫當經飭令確勘情形酌購無綫電機

兩副在淞崇兩處安設費或可省據該員查得前年廣東瓊州海
綫中斷卽係在上海禮和洋行購辦無綫電機兩副分設瓊州徐
聞兩處雖海面較遠於淞崇而同一靈通較水綫所省實鉅嗣因
朱恩紱交卸金陵關道篆務官電事宜歸併財政局辦理復由該
局提調署江甯府知府許星璧查照廣東成案與禮和行東康達
孚迭次切實磋商議定購買該行得力風根無綫電機兩部一設
崇明一設吳淞其安置吳淞各機件並報台高五十密達均較廣
東放大能通五百華里崇明機件略小報台高三十密達能通三
百五十華里一切零件亦較廣東加多計淞機一部價值德銀二
萬七千零六十馬克崇機一部價值德銀一萬七千三百二十五
馬克電機運到由該行派人安設仿照廣東成案另給工程費洋
二千五百元因許星璧再四商減該行允在工程費內減讓二千

元又查廣東報台羅馬鐵桅桿係官電局自造此次南洋官電局需用桅桿因恐自造不宜商照該行估價計吳淞報台工料各項共銀二千六百兩崇明報台工料各項共洋一千二百五十元均由該行代造訂立合同清單簽押蓋印存案限期付價交貨在淞崇兩處擇地妥爲安設以重防務而裨地方據財政局司道錄摺具報前來臣覆核無異除飭令俟機件安妥再將支用各款彙案核實報銷並照錄合同清單分咨度支部郵傳部查照外謹附片陳明伏乞

聖鑒勅部立案施行謹

奏

上海貧兒院立案片

光緒三十四年三月

再恤貧爲施仁之本慈幼乃養正之基東西各國貧兒院之設所

以使單家孤子皆得教養者也中國戶口之衆甲於全球貧苦小民居其多數地方慈善事業如育嬰義塾雖所在多有大半虛應故事遂致貧窮子女終身廢學良懦者僅備傭工桀驁者間流匪類揆厥原因未始非化導無人幼年失教所致現經上海職董周晉鏞曾鑄等集合同志在上海創設貧兒院一所專收貧寒子女住院宿膳教以粗淺小學兼習各種工藝總以能成一技一業足自餬口爲宗旨現在建院之地已經商約大臣盛宣懷捐助上海西門外西南首基地三十餘畝該員曾鑄捐助建屋費規銀二萬兩樂善同志並允捐集開辦常年經費規銀五萬兩約計歲需不敷甚鉅仍擬陸續籌勸冀垂永久該院辦事大綱係合育嬰義塾爲一事而變通之每次招取孩童以六十名爲一班男女各半教養之法分爲三期自嬰孩至六歲爲第一期以養蒙院章程爲準

七歲至十四歲爲第二期以小學章程爲準十五歲至十八歲爲第三期授以各種技能仍兼習普通文學教養期滿或交家族領回或由本院代謀生計並擬附設孤童感化所一區專收流落街市之乞丐幼童入所留養約束訓導俟及格後再行送入院中分班教育務使貧子孤兒既免流離失所之虞又得化育同沾之樂在個人多一技能卽社會少一游惰似於憲政機關不無裨益呈請立案等情前來臣查該員等所稟係爲孤貧子女將來能謀生計免致失所淪爲廢民起見實屬義重博施自應准其立案除批飭參酌情形妥議詳細章程由臣核定辦理外理合附片陳明伏乞

聖鑒訓示謹

奏

保舉道員片 光緒三十四年三月

再奏調江南差委直隸補用道李葆恂學問淵通才識敏練宅心正大操履清嚴歷辦北洋電報等學堂整頓規畫具有成績該員係已故閩浙總督李鶴年之子隨宦有年練習掌故於吏治河工尤多諳悉前經臣奏調來甯遇事諮詢深資匡助委辦鄂岸督銷淮鹽局務釐剔宿弊涓滴歸公方今時事艱難

朝廷求賢若渴該員學識兼優才堪經世臣相知有素未敢壅於上

聞仰懇

天恩准予破格錄用於時局良有裨益謹附片具陳伏乞

聖鑒訓示謹

奏

開辦商業學堂片 光緒三十四年三月

再振興實業必以研求商學開濬智識爲先近今商務疲滯良由商人見小欲速胸無學理以致各項營業動多失敗南洋多通商巨埠商賈鱗萃而高等商業學堂迄未設立臣抵任後屢經規畫以學科繁重的款難籌未有成議現值

國家廣設銀行需才方亟此項學科雖爲高等商學之一部分而需用急於他科惟是學堂專以銀行爲名取義稍隘自應卽定爲南洋高等商業學堂先辦銀行一科次及於稅則保險又次推及商業應用各科如此則經費可以逐年遞籌學科亦卽逐漸推廣期於商業前途實有裨益已由臣檄委奏調南洋差遣湖北候補道孫廷林爲高等商業學堂監督留日銀行專修科畢業生陳福頤爲教務長候選教諭胡元倓爲庶務長由江南財政局於木釐

長收項下撥款濟用飭令妥訂教習擬具章程即日開辦招考南洋各省學生有中學畢業程度者入堂肄業如度支部銀行欲派學生入校應卽由部考選咨送此項銀行科學生畢業後當由臣送部考驗以備任使除咨學部度支部農工商部外謹附片具陳伏乞

聖鑒謹

奏

運河工程片

光緒三十四年三月

再准郵傳部咨遵議疏濬運河事宜擬請分別辦理一摺原奏內稱江南運河廳三汛所擬堵閉七閘應由該省督臣迅派委員早日興工仍將勘明辦法詳悉奏報等因查蘇省境內運河工程擬仿照昔年濟漕章程堵閉七閘越壩各閘河淤淺最甚之處間段

興挑一切辦法業經臣附片會奏在案奏內聲明另購挖河機器船兩艘一泊楊莊一泊清江浦遇河水漲發時分上下游往來撈挖等語前項挖河機器船兩艘現已購到飭交淮揚道就運河淤淺各處所逐段開挖頗稱靈便適用惟體察情形全河工段甚長船祇兩艘僅敷清江以下運河撈挖之用其清江以上運河淤淺之處甚多自非一律挖深不可現經臣飭令再行添購挖河機器船一艘專在清江以上擇地停泊遇運河水漲時卽逐段往來撈挖庶全河可以通暢於航路不無裨益所有開挑灘河堵閉閘壩以及先後購置機器船三艘各工程用款應俟工竣後彙案核實造報謹會同江蘇巡撫臣陳啟泰署江北提督臣王士珍附片陳明伏乞

聖鑒謹

奏

酌保隄工員弁片

光緒三十四年三月

再運河隄工爲淮揚等屬保障民生財賦關係非輕向來凡遇河水盛漲時均責成隄工局各員弁隨時妥慎防護光緒二十三年水勢甚大迭出險工幸各員弁防護得力得保安全二十四年三月間經前督臣劉坤一奏請將在事出力員弁擇尤酌保數員欽奉

硃批允准在案三十二年伏汛盛漲水逾定誌因壩下早稻未刈駐工各員竭力守護秋後洪湖漲至一丈五尺以外沂泗復漲水逾定誌至四尺有餘隄工岌岌可危經前署督臣周馥前署提臣劉永慶飭令先後開放車邏南關兩壩續撥工需解濟急用並會同電奏在案是年運河水勢之大不獨較二十三年爲甚實爲數

十年來所未有在事員弁晝夜駐工防護櫛風沐雨始終不敢稍涉疏懈得以轉危爲安實未便沒其勞勩茲據前辦隄工局道員王禮等稟請奏獎前來復經臣再三核減擬請援照二十三年成案酌保數員合無仰懇

天恩俯准循案酌保以示鼓勵出自逾格

鴻施除將尤爲出力各員銜名先行開單咨部立案外謹附片陳請伏乞

聖鑒訓示謹

奏

採辦米糧報銷摺

光緒三十四年三月

奏爲江北水災分赴各省採辦米糧轉運平糶謹將收支用款列爲第二案報銷繕具簡明清單恭摺具陳仰祈

聖鑒事竊查光緒三十二年江北沈災饑民甚衆辦理賑糶需款浩繁仰荷

聖恩高厚發帑截漕撥給桂捐溢款並准開辦賑捐及七項常捐暨代收免保留省兩項部捐以資接濟俾賑撫平糶及河隄各工次第辦理就緒百萬災民咸資安集業將留養資遣及冬春兩賑收支用款列爲第一案報銷開具簡明清單具奏並聲明轉運平糶及修辦河道隄埂工程接續開單奏報奉

硃批該部知道單併發欽此欽遵轉行在案茲據江南賑務報銷處司道詳稱江北一帶素鮮蓋藏兼之頻歲歉收儲蓄久經告罄此次大災以徐海淮安爲最重雖經工賑並舉優給錢文然有錢無糧仍恐飢不得食且值湘贛產米之區同時被災歉收來源稀少以致受災較輕之江甯揚州通州等處亦各糧價奇昂搶米滋

鬧之案層見迭出民情惶迫深恐有外來匪徒從中勾結滋事尤非廣籌平糶不足以濟民食而定人心經臣等籌撥鉅款派委幹員分赴奉天直隸山東江西安徽四川貴州等省採辦米石雜糧豆餅麥粉等項在於漢口宜昌鎮江清江海州等處分設轉運局轉轆運濟一面向近處商販分投採買先後運至徐海淮安各災區及甯揚各屬廣爲平糶另有華洋義賑之麥粉等項亦由鎮江清江分起轉運所有辦理情形均經隨時電奏在案綜計各處平糶閱時至八九月之久採運至七八省之遙或值嚴冬風雪或值春雨泥濘或阻海洋或隔數省輪車並用倍極艱辛且各該省米糧等項價值亦不平減又益之以遠道轉運明知虧耗甚深特以災民待食孔急情勢岌岌可危不得不權衡重輕先其所急至各處平糶局均係遴選廉正員紳核實辦理一面體察情形擇要附

設粥廠減價糶售災民得千錢者可暗抵二千及一千數百之用且使奸商無從居奇市價不致陡漲次貧之戶亦各賴以安全其中遇有貧病老弱情極可憫者另於糶售時酌量加給事竣之後公家折耗雖多而數百萬垂斃之饑民同登衽席咸慶更生感戴皇仁淪浹肌骨綜計糧價折耗並轉運等費共支庫平銀二百三十萬五千九百五十九兩四分八釐計收第一次賑款報銷清單內存庫平銀一萬四千三百五十五兩五錢七分四釐撥用各州縣積穀存款並新收賑捐七項常捐代收免保留省兩項部捐直隸統捐又收紳商已捐未獎銀兩共庫平銀二百四十二萬二千兩八錢四分二釐總共收庫平銀二百四十三萬四千三百七十六兩四錢一分六釐除用之外尙存庫平銀一十二萬八千四百一十七兩三錢六分八釐已如數撥歸河隄各工案內支用另行

彙核造報所有採辦米糧轉運平糶支用各款應請援照成案列爲第二次開單報銷至原購黔穀七千石經貴州撫臣龐鴻書誼篤梓鄉作爲協濟等情詳請具奏前來臣等覆加查核此次辦理平糶轉運支用各款均係實用實銷其中毫無冒濫理合繕具簡明清單恭呈

御覽除將疏河築隄用款接續開單奏報外謹合詞恭摺具陳伏乞

皇太后

皇上聖鑒謹

奏

薦舉人才摺

光緒三十四年三月

奏爲薦舉人才以備任使遵

旨切實臚陳恭摺仰祈

聖鑒事竊臣伏讀光緒三十三年九月十三日

上諭朕欽奉

慈禧端佑康頤昭豫莊誠壽恭欽獻崇熙皇太后懿旨振興國勢必先簡拔人才著在京大學士各部院尙書侍郎都御史副都御史在外各省督撫率同藩學臬三司切實薦舉等因欽此仰見深宮宵旰側席求賢之至意欽感莫名查前大學士曾國藩言用人一端有培養之方有考察之法方今時艱日亟論者每瞿然以人才衰乏爲憂不知用當其才志士皆樂於自效舉不以實虛聲何補於時需誠使學識兼優歷試已久自應量加擢用俾展所長臣率同藩學臬三司謹就所知詳加甄擇查有署江甯府知府淮安府知府許星璧前以運判到省於兩淮鹽務利弊所在研究最

精前兩江督臣劉坤一迭委辦理淮南總局儀徵鹽棧等差并以該員義利之界甚明操縱之機最熟官商信服呼應靈通明保送部引

見改官知府後歷署鎮江常州等府知府現署江甯府知府兼充財政局提調該員局量宏遠精力過人而宅心忠赤誠坦不欺尤爲屬僚中所罕見所辦吏治新政無不措置裕如江南財政奇絀尤賴其綜核挹注得以勉爲支持才具實爲一省知府之冠松江府知府戚揚歷官福建江西知縣愛民勤政循績爛然光緒三十一年補授松江府知府到任以來吏畏民懷事無不舉當上年蘇浙梟匪滋擾之際松屬毘連兩省防不勝防該守親帥師船四出巡緝從容部署民情賴以安堵跡其治略實屬緩急可恃之人江蘇候補知府楊鍾幾由翰林保送知府操履嚴正學術宏通臨事

鎮定能持大體臣歷官江楚賴其贊助之力甚多光緒三十一年
經升任湖廣督臣張之洞委署湖北襄陽府知府爲楚邊劇郡水
陸交衝三十二年正月會匪柯了凡等在光化縣老河口地方謀
爲不軌該員先事偵知督飭地方文武卽行撲滅事後調署安陸
府事所至貪墨洗心強梁斂迹循良之績尤足課最一時丁憂山
東東昌府知府魏家驊學問淹通才具開展由編修考取經濟特
科改官知府分發山東旋補東昌府知府講求吏治任事實心該
郡襟河引淮於水利河工尤爲極意考求確有心得現經臣會同
安徽撫臣馮煦奏派辦理皖北河工相度情形督率員役董理極
爲得法丁憂江浦縣訓導陳慶年學修粹博淹貫中西於歷史輿
地之學尤擅專長前充湖北高等學堂分校有年生徒被其教澤
成材極盛近年學部奏調人員及爲各省招致辦理學務者強半

經其指授臣前在湖南巡撫任內派令專辦學務所訂教育管理諸法推行普及之方中外通人無不咸深敬服現在江南辦理編譯調查局事甄綜百氏經緯萬端求之東南學人實不多見以上五員類皆志慮忠純才識敏練洵屬近今傑出之才或以舊學而兼通變之長或辦新政而有經驗之效倘獲薦膺大用必能裨益時艱臣相知甚深用敢將各該員心術才器經歷事實詳細臚陳以備任使所有遵

旨薦舉人才緣由謹恭摺具

奏伏乞

皇太后

皇上聖鑒訓示謹

奏

及時用人片

光緒三十四年三月

再五品卿銜前吏部主事勞乃宣老成練達體用兼賅歷官直隸州縣興利除弊卓著循聲通籍幾四十年資望甚深學問則新舊交融辦事則情形洞悉近年辦理南洋交涉事宜贊畫機要動中官緊臣深資臂助現已遵

旨北上預備

召見其才識品望久在

聖明洞鑒之中查該員年逾六旬精力尙健宣勤效用正在此時如蒙

天恩優予擢用俾得獨當一面展其素蘊庶於時局有所裨益臣爲及時用人起見敬獻葛藟謹附片具陳伏乞

聖鑒訓示謹

端忠政公奏高

卷十一

三十五

奏

胞弟以道員用謝

恩摺

光緒三十四年三月

奏爲叩謝

天恩恭摺仰祈

聖鑒事竊臣伏讀光緒三十四年三月初四日內閣鈔奉

上諭禮部郎中端緒著以道員即用等因欽此伏念臣胞弟端緒

忝廁中儀未嫻獨誦曩歲

彤廷授簡濫叨制舉之榮頻年粉署趨公殊愧望郎之選茲以

皇圖積慶

玉牒時修遂因館職微勞

綸音寵賁逾停年之常格預領道之華資曲荷

鴻施莫名鼇戴臣惟有勛其益勤職守仰答

恩慈六察外膺勉裕經猷於異日一門膺仕彌殷忠愛於平生所
有臣感激下忱謹恭摺叩謝

天恩伏乞

皇太后

皇上聖鑒謹

奏

勸捐員紳請獎摺

光緒三十四年三月

奏爲江北水災勸捐出力員紳擇尤請獎繕單恭摺具陳仰祈

聖鑒事竊照光緒三十二年徐海淮安各屬水災籌辦冬春兩振
採運米糧分赴平糶一面修隄疏河以工代振曾於奏請截漕案
內聲明勸募振捐集有鉅款者懇

恩從優獎勵嗣因工振一律完竣據實奏報請將最爲出力之員

擇尤保獎奉

硃批知道了欽此所有辦振在事出力印委員紳業經臣端方會同前江蘇撫臣陳夔龍查明擇尤分別奏獎在案查前年江北災情之重爲數十年所未有綜計徐州府屬之邳州宿遷睢甯蕭縣銅山淮安府屬之安東桃源阜甯清河山陽及海州沭陽贛榆等十三州縣饑民共數百萬兼之海州土匪山東曹匪先後滋擾拏獲革命匪黨復有勾結饑民響應萍匪之供人心惶惶謠言四起深慮煽惑滋事若非急籌振撫殊不足以除匪患而定人心幸蒙聖恩高厚發帑截漕撥給桂捐溢款並准開辦振捐及七項常捐暨代收免保留省兩項部捐凡有籲求靡不上邀

俞允

鴻施廣被曠代無儔惟是各處籌辦留養資遣冬春兩振分赴各

省採辦米糧運回平糶以及修隄疏河以工代賑共需經費至數百萬之鉅官款無多不敷甚鉅舍勸捐外別無挹注之方第各項捐輸久成弩末當此商民交困物力維艱勸辦之難奚止倍於曩昔且部令新章勸捐人員不准請獎更無以爲鼓勵之資經臣等遴委員紳飭令廣爲勸募嗣經奏明優獎之後又復函電交馳諄諄誥誡該員紳等咸各感奮或遠涉外洋或分赴各省並復自備資斧昕夕奔馳不憚辛勤不避嫌怨熱心苦口設法招徠卒能使殷富人等踴躍輸將集成鉅數並有先行籌借墊解藉濟急需嗣後勸捐歸欸共計振捐截至三十九次止勸集銀四十餘萬兩七項常捐截至三十八次止勸集銀一百餘萬兩代收兩項部捐截至三十八次止勸集銀五十餘萬兩又收紳商已捐未獎銀四十餘萬兩總共銀二百三四十萬兩俾資振撫平糶以及河隄各工

咸得從容辦竣至義振捐款經尙書臣呂海寰郵傳部左侍郎臣盛宣懷力爲提倡各義紳等分投勸導籌集錢一百萬串尤足以輔官款所不逮因思辦振與勸捐二事本屬交相爲用然當事機危迫之時使無各項捐輸爲之接濟勢將停振待款數百萬災民無從得食不獨餓斃堪虞且恐匪徒從中煽誘別滋事端爲患何堪設想今勸捐各員紳於萬難設法之中籌集鉅款其異常出力固與辦振相等而消弭隱患利濟災黎裨益大局尤非淺鮮况息借農工商部生息存款並各司局借墊之款以及息借商款等項爲數極鉅全賴收捐彌補若不擇尤請獎殊無以昭激勸而勵將來查此項勸捐在事出力各員紳實有數百人之多經臣等督同司道詳加核刪擇其最爲出力者數較鉅者繕具清單恭呈御覽合無仰懇

天恩俯准飭部核議給獎以示鼓勵出自

逾格鴻慈除飭取各該員紳履歷咨部並武職千總以下各員另行咨獎外謹合詞恭摺具陳伏祈

皇太后

皇上聖鑒謹

奏

勦辦梟匪得手地方安靖摺

光緒三十四年四月

奏爲蘇浙梟匪勦辦得手匪勢已衰地方安靜擬將甯軍酌量分起調回恭摺仰祈

聖鑒事竊照前因蘇浙梟匪滋擾經臣等奏派甯軍三十五標統帶蕭先勝率領第一第三兩營開赴松江太倉三十六標統帶杜淮川率領全標三營開赴嘉興三十五標第二營管帶孟平率領

所部一營開赴湖州扼要駐紮一面由臣啓泰奏派蘇州新軍一標一營管帶朱樹聲二營管帶傅應璜各率所部分紮平望等處二標一營管帶剛兆麟率領所部扼紮溧陽東壩分別防勦並奏派江蘇藩司瑞澂督辦蘇松太杭嘉湖緝捕清鄉事宜該六屬牧令營汛防軍歸其節制調遣嗣因松江地方遼闊兵力尙嫌不敷復經臣端方飭調甯軍三十四標一營管帶姜國樑率隊前往接應嗣經瑞澂督率勦辦已將梟中積年渠魁夏竹林余孟亭江北阿四即張阿四李能掌次第殲除先後擒獲悍目著匪多名審明懲辦均經奏明在案近來迭據探報各處已無大股梟匪至零星搜捕宜用水師鹽捕飛划等營本爲捕匪緝私而設經瑞澂力加整頓均已壁壘一新而瑞澂新募之蘇防新中營尤爲得力茲復添購淺水兵輪配置礮械編練蘇浙艦隊無事則分投巡查有警

則互相策應不但從前通匪之積習悉予湔除抑且懷於約束之
堅明無分畛域其各屬清鄉事宜並經瑞澂督飭認真舉辦是水
陸各路布置均甚周妥現在甯軍各隊所駐地方尙屬安靖無事
昨接陸軍部來電擬於本年秋間奏請派員檢校所有蘇軍朱樹
聲傅應璜剛兆麟等三營已由臣啓泰飭調回蘇附片奏明甯軍
亦應酌量調回趕緊籌備惟臣汝駉詳加體察嘉湖舊營旣不足
恃新添僅止游擊三隊甫經成軍加以年歲荒歉無業客民時虞
勾結爲患現在蠶事方登爲地方利源所關絲市繁盛之區紳民
方請添兵若遽將甯軍撤回人心先自驚擾且梟匪現雖偪伏餘
黨尙多在逃更恐乘隙蠢動功隳垂成貽誤大局臣等督同瑞澂
往返電商擬先將駐防松太之甯軍蕭先勝所統兩營姜國樑所
帶一營駐防湖州之孟平所帶一營分別調回預備檢校其甯軍

杜淮川所統三營暫留嘉興防緝並令酌撥營隊分駐湖州藉資鎮懾一俟絲市竣事再行察看情形酌量辦理臣等仍當督同瑞澂將緝捕清鄉事宜切實辦理斷不敢因匪勢已衰稍形鬆懈謹合詞恭摺具陳伏祈

皇太后

皇上聖鑒謹

奏

提臣宣付史館摺

光緒三十四年四月

奏爲已故提臣戰功卓著籲懇

恩施以彰忠蓋恭摺仰祈

聖鑒事竊據江蘇紳士前山東東昌府知府魏家驊等署理安徽壽春鎮總兵陶森甲等各呈稱已故太子少保銜江南提督譚碧

理於咸豐六年由武童投効湘軍隨營剿賊其時粵賊分陷皖贛
自湘軍出援江西瑞臨撫建以次收復惟吉安孤城拒守甚堅八
年該故提臣隨同前兩江督臣曾國荃奮勇環攻克復吉安府城
江西境內漸就肅清是爲該故提臣立功之始九年復隨同克復
景德鎮暨浮梁縣城十年楚軍圖皖圍攻太湖與賊相持於小池
驛該故提臣奮呼陷陣有悍酋挺矛傷其左指仍裹創猛撲陣斬
之餘賊驚潰遂克太湖縣城十一年安慶合圍集賢關以外已無
賊蹤而關內菱湖兩岸賊壘密布城賊恃以爲固猝不得下曾國
荃築長濠困之於是悍賊悉衆撲營該故提臣賈勇當先爲賊鎗
傷左臂戰不少卻徑登賊壘餘壘亦次第掃平是年八月遂克安
慶省城該故提臣積功洊保都司同治元年隨大軍攻克沿江城
隘遞保參將並加副將銜三年克復金陵經前兩江督臣曾國藩

奏保奉

旨交軍機處以總兵記名簡放四年曾國藩奉

旨剿捻檄該故提臣率豫字營隨同北征爲游擊之師該故提臣

緊躡賊蹤追剿至上蔡等處屢戰皆捷殲其大股敘功奉

旨以提督記名七年統帶星字左右兩營駐紮金陵彈壓巡防深

資得力光緒元年借補兩江督標中軍副將二年經前兩江督臣

沈葆楨奏保該故提臣心地樸實不染油滑之習堪勝提鎮重任

十二年奉

旨簡授江南提督十三年兼統留防太湖水師全軍二十年蒙

恩賞加太子少保銜二十四年因病出缺在提督任內十有二年

整飭軍紀威惠允孚每歲親率舟師巡緝海洋不辭勞瘁海疆賴

以靜謐太湖梟匪窟穴該故提臣嚴密巡防多方搜捕匪蹤斂戢

松江爲提臣駐所舉凡繕樓櫓濬水道有益地方之舉輒捐廉俸爲之倡軍民感戴久而不忘呈請
奏懇

賜卹俾昭激勸等情前來臣伏念該故提臣譚碧理起家行伍隨曾國荃以鄉團出征立功最早轉戰南北無役不從實爲湘軍宿將及任江南提督感激

恩遇治軍有聲其誠懇不欺尤爲士民所推服輿情之思慕方殷而身後之

恩榮未逮查前江南提督楊金龍前江南狼山鎮總兵曹德慶均以軍營積功後病故奏蒙

恩准褒卹欽遵在案該故提臣事同一律可否仰懇

天恩准於江南地方暨江西安徽立功省分附祀曾國荃專祠並

將生平戰功事蹟

准予宣付國史館立傳以彰蓋績出自

逾格鴻施謹恭摺具陳伏乞

皇太后

皇上聖鑒謹

奏

援案撥補並飭催欠款摺

光緒三十四年四月

奏爲江蘇省撥補鹽貨釐金仍多無著援案請

旨飭部改撥並請飭催各省歷年欠款以濟要需恭摺仰祈

聖鑒事竊查江蘇省鹽貨釐金自光緒二十四年抵還英德借款

歷奉戶部按年撥補各省均未照解截至三十一年綜計已短解

五百二十八萬餘兩經前署督臣周馥奏請改撥臣到任後目睹

江南財政困難無可騰挪節次電商部 臣請援照湖北省撥補成案先撥本省有著各款以資彌補接准部咨以釐金抵還借款一案江南派認獨鉅非他省所可比擬指撥各省既已拖欠頻年積成鉅債不若就該省自有之款酌量撥給所有常年短解銀八十五萬兩准於節省項下挪補銀二十八萬二千餘兩宜昌鹽釐新增食岸溢銷加價銀六萬兩節省一半解部銀九萬兩武衛左軍餘餉銀十萬兩銅元局借籌防局每年應還銀五萬兩皖南茶釐除解長江水師營餉十一萬兩支應局十萬兩外撥補銀十萬兩米釐除報部外撥補銀七萬六千兩又該局應解撥補釐金款內欠解蘇省淮鹽加價銀五萬二千兩丁漕平餘銀四萬兩共銀八十五萬兩作為常年撥補釐金不敷之用於光緒三十二年十一月十一日具奏奉

旨依議欽此又准部咨三十三年循案撥補釐金一案於三十三年二月初四日具奏奉

旨依議欽此先後恭錄抄單咨行欽遵辦理當卽分行司道各局遵照去後茲據江南財政局司道詳稱甯省撥補釐金無著各款截至三十一年已積欠五百二十八萬餘兩之多此次奉部改撥如果實有著落自可稍濟急需乃綜計改撥各款三十二年分除節省挪補約銀十三萬兩宜昌鹽釐新增食岸溢銷加價約銀五萬六千兩解部節省銀七萬九千兩銅元局應還借款銀五萬兩共銀三十一萬五千兩外其餘武衛餘餉茶釐米釐淮鹽加價丁漕平餘共銀五十三萬五千兩則全數無著又三十三年分奉部撥補各款除三十二年所撥核明無著之款仍屬無著外其江甯司庫解部及留用節省銀兩或因局所截併或改新章停減續又

短收銀十七萬九千餘兩又奉撥四川廣東河南安徽等款或從未報解或認解不敷綜計本省外省無著各款銀七十一萬餘兩又廣西梧州關稅銀八萬兩該關舊欠銀二十九萬五千餘兩亦應由部咨行嚴催能否作數尙難豫計如再遷延不解則無著之項幾有八十萬兩之鉅近來庫儲告匱業已墊無可墊挪無可挪若部咨撥補各款再成畫餅勢必貽誤要需致妨大局詳請具奏改撥前來臣復查江南撥補釐金一案各省積欠甚多業經部臣奏准改撥並聲明江南認數獨鉅非他省所可比擬是各省釐金同一撥抵而江南獨形竭蹶已在

聖明洞鑒之中部臣曲諒苦衷准予改撥兼權並顧當亦深費躊躇但使稍可補苴何敢再三瀆請無如改撥各項或昔多而今寡或名有而實無綜計有著之資不及十分之一當此鉅災之後杆

軸久空而添練新軍籌還洋債增設學堂資送游學推廣實業創辦自治諸要政無不立需鉅款臣三十年署任時司局所存各款尙有三百餘萬三十二年九月到任司局存款全已用罄東挪西扯勉支年餘凡有可以挪墊之款無不羅掘一空司局算至本年五月卽已不名一錢而新軍第九鎮刻待點驗應行添補器械軍裝馬匹建造兵房需款四十餘萬豫備秋操需款二十餘萬均無的款可指至於常年應用之款毫無著落者尙不在內臣與司道及各局員通盤計畫常年用款以入抵出事事撙節每年實短二百餘萬推其致此之由實緣銅元餘利頓少八九十萬江北練軍撥濟七八十萬均係江南所恃以爲生活者今則蠲除淨盡而應行籌辦之新政復月異而歲不同求無坐困不可得也查從前戶部奏定撥補湖北宜昌鹽釐七十五萬兩案內凡江漢宜昌兩關

洋稅湖北釐金田房稅契土藥加稅等款均准截留今江南所認之數既較他省爲獨多而他省撥補案內尙准動用釐金關稅江南似應援案辦理合無仰懇

天恩俯念江南地方緊要認抵洋款之數又非他省可比准將改撥無著各款三十二年分共銀五十三萬五千兩三十三年共銀七十一萬餘兩於江海鎮江等關及本省釐金土稅等款內如數截留以濟急需其梧州關稅八萬兩應由部咨行嚴催如不照解仍請一併改撥至從前指撥之四川山西雲南湖北廣東安徽河南等省欠解銀兩並請

飭下各該督撫臣嚴飭各司道局如數速籌撥解毋再延欠庶望積困少甦除將改撥有著無著各款分年開單咨部查核外謹會同江蘇巡撫臣陳啓泰恭摺具陳伏乞

皇太后

皇上聖鑒謹

奏

已故提臣請

卹摺

光緒三十四年三月

奏爲已故提臣戰功卓著籲懇

天恩賜卹以彰忠蓋恭摺仰祈

聖鑒事竊已故色克巴圖魯署理貴州提督潘萬才籍隸安徽阜

陽縣同治四年投効前四川提督宋慶軍營隨同克復光州固始

等處六年擒匪任柱賴汶洸大股深入山東隨同前直隸提臣劉

銘傳在安邱濰縣之交大戰獲勝追至贛榆陣斃任柱復敗賊衆

於濰縣壽光之間賴汶洸旋亦就擒以功洊保都司西擒肅清擢

升遊擊並

賞戴花翎十一年前大學士左宗棠督師西征調防邠州永壽一帶值甘軍五營猝變奉飭相機勦撫時所部均分防在外麾下僅三百人乃以百騎伏要隘潰勇爲首者五人策馬前進伏起悉就擒該故提督親解其縛諭以禍福而縱之歸未幾衆至棄械羅拜願隸麾下潰勇以平關隴肅清蒙

賞給色克巴圖魯勇號洵保副將光緒七年調防正定拏獲熱河竄匪渠魁孫振邦奉

旨以總兵記名簡放九年署正定鎮總兵十六年八月丁父憂交卸署任仍統帶所部馬隊駐紮軍糧城十七年熱河承德府屬教匪倡亂匪首李國貞擁衆數萬出沒於朝陽赤峯之間前直隸督臣李鴻章檄飭該故提督與前提督葉志超合兵會勦一戰於三支箭再戰於瓦房莊斃匪千餘人追至寶家窩鋪地方分隊進攻

自辰至午血戰六時之久擒斬著名悍黨梁啟魁張成穆顧長清
鐵道人李剛五人匪首李國貞逃至大城我軍攻擊歷五時大城
遂破斃匪二百餘人生擒四五百名李國貞由大城逃出佔據札
薩克王府該故提督馳往圍攻擊斃匪百餘人李國貞及匪目六
人同時就擒斬之維時一顆樹地方尙有悍黨屯紮復率隊前往
行至通天溝地方匪首楊老師負隅殊死戰該故提督節節進逼
賊乃大敗楊老師尋爲葉軍所獲教匪悉平十二月初五日奉
上諭潘萬才遇有提鎮缺出儘先簡放欽此是月補授淮揚鎮總
兵十八年三月

賞頭品頂戴二十年海防戒嚴率所部馬隊並添募才字四營駐
防秦王島尋赴淮揚鎮本任二十三四年淮北大災勸募振款
二萬餘金親自散放全活饑民無算二十六年拳匪之變南軍陸

續北上海道梗阻以清淮爲運輸之樞紐該故提督綏輯客軍護
送糧械鎮撫地方心力交瘁二十七年河南人張妙松在宿遷一
帶創設彌陀教將於某日起事劫縣城密遣幹弁偵悉詳情並起
事日期豫飭營隊會縣捕獲匪日夏世成遍張示諭嚴擊會首解
散脅從人心大定二十九年六月補授貴州提督三十年二月到
任時廣西匪氛復熾竄陷黔境四塞關等處該故提督親臨前敵
陣斬匪首李懷春及蘇八宋老培三名餘匪回竄桂邊會同廣西
統領陸榮廷不分畛域竭力勦捕三十一年二月丁母憂開缺回
籍行抵洪江奉

旨署理江北提督及抵江甯奉電傳

諭旨潘萬才現在丁憂著改爲署理貴州提督卽赴新任欽此該
故提督呈由前署督臣周馥奏懇終制旋奉

恩准回籍後因積勞致疾於三十三年正月二十五日在籍病故
伏查該故提督早歲從戎隨征擒匪以驍勇著聞其後收撫甘肅
潰勇之役朝陽之役廣西四寨關之役出奇制勝有名將風近來
中興宿將大半彫零該故提督以憂去官因病不起撫時感逝良
用愴然茲准直隸提臣馬玉崑長江水師提臣程文炳甘肅提臣
姜桂題臚列事蹟並據聲稱與該故提督幼同鄉里知之最深等
情請奏前來伏念軍興以來湘淮名將身歿之後無不渥荷
聖恩優加褒卹合無仰懇

天恩俯准將已故貴州提督潘萬才照軍營立功後積勞病故例
從優議卹並准附祀淮軍昭忠祠將戰蹟宣付史館立傳以彰忠
蓋之處出自逾格

鴻慈所有已故提臣戰功卓著懇

恩賜卹緣由理合恭摺具陳伏乞

皇太后

皇上聖鑒訓示謹

奏

維持茶務片

光緒三十四年四月

再光緒三十二年皖省因奉派新案賠款所籌各捐不敷撥解議於皖南所產洋莊茶每觔加抽制錢二文本省銷賣之茶每觔加抽制錢一文以資補苴雖爲數無多在各商原不難勉力輸納但近年來印度錫蘭產茶日盛華茶卽日見衰滯若不設法減輕成本銷路終難暢旺現經臣將江南應征之款分別釐定另摺奏陳惟是皖省所抽之捐疊據茶商等聯名具稟籲求減免無如皖省財政同一困難舍此別無籌補之術臣與安徽撫臣馮煦往返電

商議將運銷外省及洋莊之茶減收一半每觔改抽制錢一文由
茶稅局隨應征茶捐按引帶征其所減之一文卽在於江南應征
產地稅內照數撥補至在本省銷賣之茶亦納每觔一文在產地
稅內提撥不另加抽統由茶稅局隨時按引分提撥解皖省濟用
如此辦理雖江南歷征稅款不免見絀而商力則可藉此稍紓皖
省亦不致另籌爲難臣爲維持茶務起見除咨部外謹會同安徽
巡撫臣馮煦附片陳明伏乞

聖鑒謹

奏

敬陳軍政大綱摺 光緒三十四年四月

奏爲敬陳軍政大綱懇請擇要施行恭摺仰祈

聖鑒事竊維治軍之道軍制爲體軍政爲用軍制大要以編制保

育經理三者爲主前練兵處奏定章程及陸軍部現行法令皆於此三者兢兢加意大致規模漸臻完備惟軍務行政實精神教育之源泉語其繁難萬緒千端不能盡得其要領臣請就昔年考察所得與夫近時體驗所宜擇其綱要數端爲我

皇太后

皇上陳之一宜首頒徵兵

詔令以風厲天下也徵兵之利臣於軍政摺中備言之吾國因時定制寓募於徵近年江南遵章舉辦徵募土著一時縉紳勸導學子講演咸曉然於當兵義務聞風入伍者類多讀書子弟去歲安慶之變贛州之亂今年江浙之匪深賴徵兵出勦所至敕平成效稍著而風氣漸開矣臣愚以爲徵兵之舉實含有選舉之意義必一國之中人人皆兵乃可用徵徵之云者於普通兵中選舉其現

役者云爾故必先

頒渙汗曉諭天下使天下臣民皆知服兵役之義務而後徵兵之詔乃可下徵兵之令乃可行昔日本立憲制度定計於明治八年實行於二十三年而全國服兵役之制則頒布於明治五年是日本於徵兵一事在豫備立憲以前業已實行恭讀八月初一日諭旨自本年起總在第九年內卽行頒布欽定憲法等因欽此我國立憲時期業經決定則全國服兵役之制尤未便稍緩須臾應請

飭下部臣悉心妥議組其機關詳其條件明定其權利義務奏請特勅宣布普告天下使人人知身爲國民一分子不當兵卽不足爲國民務使此義灌輸於國民人人心中一令徵兵歸如流水矣此臣之所謂綱要者一也一宜明定軍官出身以昭激勸也軍官

者軍隊之師表軍隊教育之良窳視軍官之優劣以爲比例昔普王維廉第三頒將校出身之制凡中學畢業有武官志願者始准於馬步礮工自占一科入營當兵六月以後送入士官學校分科肄習迨畢業後乃充士官日本各兵科士官以士官候補生補充士官候補生之資格除中央幼年學校畢業生外惟官立暨府縣立之中學校畢業者及具有中學校畢業同等之學力者又必經隊長之承認與試驗方爲合格各國造就軍官其嚴謹慎重如此是以不學無術之流皆不得濫廁其列吾國定制必中學畢業入營爲入伍生歷服兵職而後挑入兵官學堂必兵官學堂畢業入營爲學習官期滿覆試實具武官資格者而後可補軍職立法本極嚴明惟各省新軍同時編設需才孔多而中學兵官以及官立府縣立之中學校均未臻乎完備人才尙無所成就用人者於將

校缺乏之際有時不拘資格量能器使稍爲遷就權宜之計或出於情勢之不得不然於是躡等倖進之風遂不能免臣於江南新軍中查有非將校出身而升充下級軍職者必飭鎮統親加裁試不能者立予罷免近則明定限制雖補一排長亦必由臣面加覆勘試可而後予名器攸關不敢不慎應請
明降諭旨頒定軍官出身之例並

飭下部臣速將中學兵官各中學堂次第籌設整頓完備將來中學之人才輩出則軍官之合格者自多不妨明定期限自某年起所有軍職凡自排長以上悉應以兵官出身實具相當資格者充補其目兵出身所有升級除特別勳勞外令限至司務長爲止仿日本兵卒升階限令升至軍曹之例如此則人人以軍職爲重雖下級亦稱命官以軍學爲榮雖中材亦知奮勉軍隊之教育將有

勃然興起不可遏抑者矣此臣之所謂綱要者二也一宜歸併督練公所以爲將來建置陸軍都督府之豫備也軍政爲國家大計其權當自中央主之而於軍鎮配置重要之地應有分畫獨立之部署與中央相維相繫以謀首尾相應之效而分權愈重者兵力愈厚分權愈散者兵力必薄此大較然也查日本軍制陸軍參謀兩部以外另有都督府之設共分中東西三部直隸日皇每部分管四師管至五師管不等主任所管防禦計畫參與國防監督二師團以上之演習並指揮特別大演習之一軍我國督練公所之設略仿此制所屬之參謀兵備教練三處與都督府幕僚參謀副官兩部職掌大略相同惟因事屬創辦故以督練爲名各國並無此制將來軍制完備改督練公所而爲都督府有斷然者惟前練兵處奏定章程各省練兵至一協以上卽准設立督練公所吾國

二十一行省寢寢乎有二十一督練公所在創辦之初經理一切徵募編制教育等事設官不厭其多若既已成軍以後在營兵卒有中下級武官管理教育復有高級武官督飭檢查督練公所或因權限尙未分明或因軍隊規模尙小三處人員多優游伴食無事可爲當此餉需奇絀之時使各省巨款虛糜殊爲可惜擬請分配全國所定三十六鎮分爲八道於總督駐紮省分准設一督練公所管轄鄰近四省或五省新軍所有八道以外之各省其所設督練公所一律可以全裁在目前專辦督練之事照章仍以總督兼充督辦俟三十六鎮練成即請將公所裁撤改設都督府以期駕輕就熟查日本都督府三部分分管四五師管吾國三十六鎮增設八都督府並不爲多其不同者日本之三都督府皆駐東京吾國八都督府分駐八省此則幅員之大小與交通之難易有

以致之亦事之無可如何者也夫兵權既集則責任攸歸各督辦
既兼轄他省軍政則所轄省分之防禦計畫自不能卸其仔肩頃
者一省有事往往以所部兵力之不足借助於他省之兵而客兵
入境常不免市德而驕若統於一督辦之下則兵力有餘而此風
可免矣此臣之所謂綱要者三也一宜編定陸軍刑罰並設立軍
事裁判以保全軍人也陸軍刑罰之宗旨以維持軍紀爲本凡屬
於人爲之事或於軍紀上有所妨礙不得不防遏於未萌故特設
爲刑罰一以禁止其所不當爲一以導令其所必當爲蓋以軍事
動作即一舉手足之細關於勝敗之數者恆多當其未犯法禁以
前設爲嚴法使知警戒是即陸軍刑罰宗旨所在亦所以驅士卒
於礮煙彈雨之中蹈水火而不辭其責任者也而且軍人之性質
行爲常與普通法律相抵觸今既開練新軍而仍參舊法以行裁

判殊與尊重軍人保護軍隊之主義不符是則軍律不可不亟定焉查德國軍律行之於裁判所分上中下三級專理全國軍人獄訟法制至密感應至神設如軍人互有私鬪或損失軍人身分敗壞全體名譽小則由將校團會議責罰大則由裁判所審斷施刑開誠布公輸情悔罪大似一家處理私事平時則敬愛親睦如兄如弟頗有隱惡揚善之風近日社會軍人道德乃益臻於高尚純潔之域而名譽日隆此設立軍事裁判所之明效也吾國新軍入伍普受教育比諸昔日之募兵知識固覺其高而尊重道德服從法律之念尙未能性成習慣敗行失檢之端仍復難於盡免應請飭下軍機大臣會同陸軍部法部將陸軍刑罰陸軍懲罰令速行條議編定

頒示遵守一面將軍事裁判參照德國三級之制分等設立高等

設於京師中等設於省會初等設於軍隊所在地方以爲軍法實行之張本此臣之所謂綱要者四也以上四端皆係就現行軍制之當增當改者言之臣不敢謂治軍之能事盡於此也吾國軍事幼稚在在較遜於列強取法固不宜太高而立法斷不容簡陋惟有因時裁制取其大者而變更之以期綱舉目張軍制逐臻完善以臣之愚續有所見仍當隨時條奏以備

聖明採擇所有敬陳軍政大綱緣由是否有當理合恭摺具陳伏乞

皇太后

皇上聖鑒訓示謹

奏

謝 賞紗疋摺

光緒三十四年五月

奏爲叩謝

天恩恭摺仰祈

聖鑒事竊臣於光緒三十四年五月初八日齋摺差弁旋甯奉到
恩賞青絳藍駝各色紗四疋當卽恭設香案望

闕叩頭謝

恩祇領伏念臣久領封圻慙無報塞際茲槐風入律梅雨知時上
邀

被袵之慈俾應服絺之令仰

殊施於蔭樾人間之綃縠非珍屆

昌運於歌薰

天上之絲綸已賁蒲桃煥采頻叨節物之
頒荃葛生香遠勝輕容之製

龍光渥逮鰲戴難勝臣惟有丹悃銘虔素絲勵節荷
光榮於

閭闔敬賡含風疊雪之詩廣衣被於閭闔冀竭墜露輕塵之報所
有臣感激榮幸下忱謹恭摺叩謝

天恩伏乞

皇太后

皇上聖鑒謹

奏

釐定茶捐摺光緒三十四年五月

奏爲釐定皖南各屬土產茶葉征收稅捐辦法並委員接辦局務
期收實效恭摺具陳仰祈

聖鑒事竊照皖南各屬及江西浮梁等處所產茶葉向係請領部

引配運軍興之後停領部引設局稽征定爲每引完納引課捐釐等項共銀二兩又公費銀八分歸軍餉撥用同治五年改辦落地稅議仍照原定應征銀數由業戶牙棧在配茶之區一處完繳嗣於光緒十四年經前督臣曾國荃奏准減免捐銀二錢二十年遵奉部章加抽二成銀三錢六分除減免外計每引實征銀二兩二錢四分歷經照章征收在案惟查落地稅實卽就地所征出產之稅近來物價騰踊採植工本日增前項稅內原有茶捐一項連續加之二成計每引應征銀七錢二分本係運商應繳之款從前定章尙應予以獎叙今獎案雖停然若與應完引課等項全數責令業戶完納植茶者皆係山農恐擔負過重不無困累於維持本業之道頗有所妨况近年洋商時有請單採運之事若不將應征稅捐劃清界限內地行戶卽不免藉單影射趨避旣工弊將百出且

此項係專供解還洋款及長江水師並各防營月餉之需計授攸關尤須豫防其漸現經臣悉心酌議擬將原征之茶捐銀七錢二分照數劃出歸運茶之商按引完納其餘應征引課等項銀一兩五錢二分卽定名曰產地稅仍歸業戶完納惟業戶零星賣茶勢極散漫應仍查照定章責成經手行號扣收照繳必須俟完清產地稅後方准發販起運俾免弊混其在本省銷賣之茶只完產地一稅概不重征如運往外省或做洋莊須由運商另完茶捐完捐之後經過蘇皖贛三省局卡亦概免抽釐稅照捐單均由臣衙門印發備填並飭將各局卡舊有陋規私費嚴行禁革不准稍有需索其在內地開設經手收茶賣茶之行號等分別有無牙帖由局督同分所董事一律查明註冊給照不許私設以杜虧騙等弊並因該局經征之款以稅項爲重飭令改爲茶稅總局以副名實以

上辦法皆係參考舊章酌量變通使業戶運商各完各款既不致偏重滋累而影射包攬之弊亦不禁自絕惟是茶爲出口大宗近年洋茶日盛華產行銷日滯其焙製之法應如何勸令改良使銷路逐漸推廣內地商情應如何互相聯絡使不受外界挾持均應切實講求加意振興必須遴派廉明幹練熟諳商務之員總司其事乃有實際茲查有奏調江南差委湖北候補道孫廷林幹練精明實心任事在省歷充要差均能認真整頓頗著成效應卽委令前往接辦以期得力除札飭遵辦並咨部查照外所有釐定征收茶葉稅捐並委員接辦局務緣由理合恭摺具陳伏乞

皇太后

皇上聖鑒謹

奏

撫恤風災片 光緒三十四年五月

再據徐州道袁世廉徐州府田庚電據豐縣知縣王之全稟稱該縣於四月二十六日未刻風雨大作兼之冰雹雜下約有一時之久南門城樓被風吹倒城牆亦坍塌三十餘丈南關數里內民間草房瓦屋倒塌無數壓斃男女大小二十一名口傷者甚衆其餘各處麥苗雖間有受傷尙無大礙現已酌給埋費醫資搭蓋席棚以免露宿一面由道府先行捐廉辦理撫恤等語並據該縣稟同前情伏查豐縣風雹爲災以致城樓城牆民房同時倒塌壓斃民命至二十一名之多此外傷者甚衆實爲非常災異當於接電後立即籌錢二千串飭派候補知縣趙祉閱前往該縣會同查明戶口妥爲核實撫恤如有不敷卽在該縣積穀項下動支濟用其倒塌之城樓城牆並飭趕速勘估籌修藉可以工代賑此外淮揚各

屬亦間有被雹之處情形尙輕業經飭令確切查勘量予撫恤總
期災民實惠均霑不致流離失所以仰副
朝廷子惠黎元至意謹合詞附片具陳伏祈

聖鑒謹

奏

搜捕蝗蝻片

光緒三十四年五月

再江北自四月以後天氣久晴二麥收成尙稱中稔惟雨澤稀少
深恐各處灘地蝗蝻萌生貽害禾稼當經電飭確查具覆接據海
州銅山縣先後電稱灘地葦柴之內有蝗蝻出土尙未著翅飛騰
立即馳往該處督同農業人等奮力捕捉一面給價收買以期迅
速撲滅等語當以蝻孽滋生恐非一處復飭詳細查勘已出土者
趕速撲捕未出土者設法挖除並因時正農忙捕蝗難期踴躍飭

令加價收買其因捕蝗踐損之禾苗並准酌給價值以示體恤所需經費准在積穀項下動支濟用近日連接各處來電阜甯縣蝻孽業已撲滅海州銅山縣蝗蝻連日竭力搜捕務期淨盡此外各處尙未蔓延茲於五月十一十二等日江北各屬連得透雨禾苗滋長民情安靜堪以仰慰

宸廑謹合詞附片具陳伏乞

聖鑒謹

奏

端忠敏公奏稿卷十一

三十一

端忠敏公奏稿卷十一終

端忠敏公奏稿卷十二

遵查藩司參欵摺

奏爲遵

旨確查藩司被參各款據實覆陳恭摺仰祈

聖鑒事竊照光緒三十四年三月初八日承准軍機大臣字寄光緒三十四年二月二十六日奉

上諭有人奏江西布政司沈瑜慶結黨營私劣蹟昭著據實糾參一摺著端方按照所參各款確切查明據實具奏原摺著鈔給閱看欽此臣當卽飭派江南鹽巡道榮恆酌帶廉幹委員馳往江西省城按照原奏所參各款分別明查暗訪務得確實情形去後茲據榮恆查明稟復前來臣復博加訪察證以所聞謹將確查所參各款實在情形爲我

皇太后

皇上陳之如原奏江西自沈瑜慶到任後因欲廣招賄賂遂任用候補知縣黃宗敷許大綸施謙高彤等爲爪牙黃宗敷許大綸與沈瑜慶賭博各輸巨資沈遂委黃宗敷署高安縣許大綸辦石灰窰釐差許大綸另餽綢緞等件值五千兩復繕立期票三千兩求署浮梁縣缺沈瑜慶嫌非現銀允而中止許大綸哭訴同鄉傳爲笑柄一節查江西候補人員近年頗形擁擠沈藩司到任後黃宗敷等在省當差時常接見所有委任詳查尙無營利引爲爪牙之據至謂黃宗敷許大綸因與沈瑜慶賭輸巨資而得差缺一再訪詢無人確見皆屬外間懷疑之詞其高安縣知縣唐顯謨調省遺缺應歸輪委沈瑜慶因該縣撫字催科俱稱難治須揀員署理黃宗敷因係酌委致起浮言石灰窰統稅素爲江西優差許大綸無

甚勞績驟然得之不無訾議至稱許大綸另餽綢緞與繕立期票三千兩細加訪查並無實據許大綸委署浮梁縣於三十三年十一月業經下札該員以浮梁地方缺苦民悍械鬪案最多自行繳札辭退謂其另餽綢緞並繕立期票求署浮梁嫌非現銀允而中止哭訴同鄉自係傳聞失實惟黃宗敷前在高安任內因公苛歛怨讟繁興業經前江西撫臣瑞良彙入甄別案內奏參以府經縣丞降補又原奏施謙卑鄙無能因與沈瑜慶姻親初到卽委統稅總巡旋署德化縣餽沈瑜慶禮物千金復調署上饒縣上饒所入歲約三四萬金聞有與沈瑜慶四六分攤之議施謙培克小民審訊訟案藉端漁利以爲取償之計一節查施謙與沈瑜慶並非姻親沈瑜慶到任後於三十二年八月卽委施謙總巡上游各局口商船並兼查木稅差九月復委德化縣次年八月又調署上饒縣

上饒一缺歲入不到二萬金署用一切在內謂與沈瑜慶四六分攤詳查實無其事餽送沈瑜慶禮物千金與審訊訟案藉端漁利查亦未見確實第施謙與沈瑜慶係屬同鄉自沈瑜慶到藩司任後該員得差得缺應如何盡心民事始不負委任乃兩任縣缺毫無政蹟訪諸輿論聲名亦屬平平自係難勝民社又原奏高彤毫無才幹到省未久與沈瑜慶因有戚誼得委署新建縣調署南昌縣公事生疎官紳側目凡以苞苴干進者必有高彤經手官場至稱南昌縣爲藩署之外帳房一節查高彤係舉人以知縣於光緒二十九年十月到省與沈瑜慶同鄉並無戚誼三十二年八月委署新建旋以遇缺先花樣得補雩都縣缺次年三月調南昌現又調署樂平樂平係江西著名優缺該員兩署首要無所表見本年二月於進賢門外白馬廟地方度買營房基地一事不順輿情幾

釀事端始行中止其短於才幹可知謂凡以苞苴干進者必由高
彤經手致稱南昌縣爲藩署外帳房迭經密訪並無根據惟高彤
與沈瑜慶同鄉聞望不足服衆而又意氣用事矜驕凌人以至寅
僚側目器小無識誠所不免又原奏進賢縣文炳堃謀帶江西內
河各營託高彤納賄二千兩沈瑜慶遂力薦文炳堃竟得委充統
領一節查文炳堃係進賢縣實缺前任江西臬司秦炳直緣與該
員姻親奏請行查原籍應否迴避文炳堃因而奏請交卸前江西
撫臣瑞良旋委充內河水師巡警右軍統領月支薪水祇一百二
十兩並不爲優惟此差向亦委用道班局面尙好致招疑忌至得
差之由聞因其父文聚奎係江蘇候補道辦理江西官銀錢局及
田房稅契甚爲得力瑞良因文聚奎屢欲辭退故以統領差使位
置其子冀其感奮當差未聞有託高彤納賄情事文炳堃現已交

卸統領署理新建縣事其父文聚奎辦理財政商民以其綜覈過嚴怨尤實所不免又原奏布經歷陳思忠目不識丁嗜好甚深結納高彤得升補義甯州知州一節查義甯州缺出原以德化縣呂敬直升補因其任內有處分經部議駁沈瑜慶始以陳思忠升補論其資格曾保以知州在任儘先補用此次升補義甯州尙屬合例自非結納高彤而得此次經榮恆會同兼理藩司林開謩在提學使署傳見陳思忠面加考試尙非目不識丁惟文理殊欠清通雖稱戒煙究屬不堪造就又原奏南昌府照磨朱建勳原係浙人改稱閩人賂沈瑜慶銀二千兩委辦義甯州統稅沈之生日復獻厚禮調辦謝埠統稅一節查義甯州統稅本係州縣差使朱建勳以實缺府照磨委充是差復又調辦謝埠統稅議者頗多至謂其賄銀二千兩既無指證調查沈瑜慶生日禮簿亦無朱建勳餽送

禮物且沈瑜慶生日係在十月朱建勳調辦謝埠統稅事在八月
謂因送禮調差事恐未確惟朱建勳久辦稅差不回本任其爲工
於避就可知至謂浙人改稱閩人係屬外間譏誚之語查其履歷
仍係浙江山陰縣籍又原奏沈瑜慶妻舅鄭禮桐子壻王姓均藉
勢招搖遇事婪索一節查鄭禮桐係沈瑜慶妻堂姪並非妻舅由
舉人以知縣分發江西到省未久聲名尙好沈瑜慶之子壻王姓
卽王孝縉曾到江西旋已他往徧加訪詢均無招搖婪索情事又
原奏候補知府席業委辦景德鎮統稅候補通判高維陳委辦良
河稅差皆由賄賂而得一節查席業原辦景德鎮官銀錢局上年
復委兼辦饒州統稅卽景德鎮統稅以有差之員又兼要差故人
言嘖嘖詳查該員席業辦事認真尙無不謹聲名高維陳素善醫
術寅友多有延請者聞沈瑜慶眷屬有病亦曾延請醫治嗣委良

口稅差均未聞有賄賂之事其原奏所稱良河自係良口之誤又原奏沈瑜慶胞兄江蘇候補知府沈璘慶赴贛采辦振米夾帶私米經吳城釐卡拏獲沈瑜慶一力袒庇延擱至今釐局不敢過問一節查上年江蘇候補知府沈璘慶在江西采辦江蘇平糶米五萬石派令江蘇候補巡檢楊澍霖從九品葉大榆二員分批陸續押運及至八月下旬第五批米船五隻共裝米四千五百餘石行經吳城統稅分局中卡卽由該局委員邵之純查其護照內有已蓋湖口稅卡及吳城稅卡戳記之舊照當將米照未符船隻扣留稟經沈瑜慶批飭如係私米一律充公一面札委候補布經歷郭鞠前往會同邵之純詳查據覆係押運委員疎忽誤帶舊照當經該卡將舊照收銷押運委員旋換呈本批護照始行驗放惟查出該船戶夾帶銅錢四百八十餘千全數解省充公是沈瑜慶尙無

袒庇延擱釐局亦無不敢過問情事又原奏撫臣瑞良才本平庸復耽安逸於用人行政概置不問沈瑜慶之貪橫皆瑞良之闇弱有以養之江西民教積讐最深王安之一案可爲寒心瑞良漫不經心聽任沈瑜慶以教民最多民風最悍之南康縣委楊寅揆署理楊寅揆人極頑錮前官四川署榮昌縣時擅放余蠻子釀成巨案倖免參劾改指江西悍然用之迄至該邑匪徒有習拳仇教之舉經督臣一再電請嚴辦而瑞良爲沈瑜慶所蔽聽地方官吏以一稟了事馴至亂民蜂起戕斃官兵暨教士教民計賠卹等欸不下二十餘萬兩現在贛省之人痛定思痛詛呪尙不絕口一節查前江西撫臣瑞良在任時於地方用人行政尙非概置不問至南康縣民情強悍教民最多當該縣出缺沈瑜慶查應歸卽用班輪委楊寅揆係卽用知縣輒循例詳委楊寅揆到任後卽有大窩裏

民教相仇之事該員前在四川余蠻子一案倖免參劾南昌王安之教案尤爲殷鑒不遠自當迅速妥爲調護乃楊寅揆頑劣糊塗釀成巨案以致遺禍地方臣與瑞良原議將該員革職遣戍嗣查條約罪止革職永不敘用因卽照章辦理臣查江西布政使沈瑜慶前在江西服官多年任事勇往饒有幹略現在江西護理撫篆適當地地方多事求治之心太急用人或未盡得宜嫉忌者遂不免橫生怨譴論其心迹實甚光明言者至詆爲納賄營私實不無枉屈此次被參各節旣均查無實據應無庸置議等語都縣知縣高彤升補義甯州知州陳思忠候補知縣施謙降補府經縣丞黃宗敷所查各節均屬不知檢束有玷官箴應請旨一併革職以示懲戒候補知縣許大綸南昌府照磨朱建勳雖查無實據但資望未孚致茲物議應請調省查看其席業文炳堃

高維陳鄭禮桐王孝縉五員并無行賄招搖情事均免其置議所
有違

旨確查大員被參各款緣由謹恭摺具

奏伏祈

皇太后

皇上聖鑒訓示謹

奏

暨南學堂經費作正開銷片

光緒三十四年五月

再華僑久困羣島身受苛待呼籲無門適當

國家豫備立憲之初欣然遣其子弟聯翩內渡來寧就學其愛國
之忱可以考見領其地者現已設法限制特立學堂招華僑子弟
入學冀以教育之權爲籠絡之計蓋各島領主始則以愚用華人

爲其政策今見華人知識漸開愚用之策其勢不能持久則翻然變計特設學堂令其專習各該國文字不使讀中國書浸久則華民內嚮之心必消歸於無有其用意之深如此今既爲特設暨南學堂以獎勵爲鼓舞之地華僑情誼可期其日臻固結惟常年所需經費宜令華僑知所自出擬請

特恩嘉其向學之忱而於應需各款准由閩海粵海江海各關分任籌撥作正開銷以示

朝廷惠愛僑民至意俾知飲食教誨歲費鉅金在在皆出自

皇恩當亦維繫僑情之一道也是否有當謹附片密陳並請勿庸發鈔伏乞

聖鑒訓示鑒

奏

保獎長江水師員弁摺

光緒三十四年五月

奏爲長江水師員弁歷年拏獲盜匪出力援案奏請擇尤保獎恭摺具陳仰祈

聖鑒事竊照長江上下自湖南岳州起至江蘇江陰止袤延五千餘里界連五省伏莽素多從前白晝攔江及黑夜強劫之案動輒每月數起往來商旅咸有戒心光緒二十七年臣文炳到任之初當卽嚴定章程切實督飭自鎮將以至哨弁不准稍有疎虞間有奉行不力員弁立即撤參各將弁等咸知感奮嚴密巡查是年卽獲盜案八起如曾少卿劉四鬍子唐連覺等皆係著名要犯分別審明懲辦自是以後歷年認真查緝共計拏獲盜匪八十餘起正法者數十名此外交地方官訊辦者不下百餘起匪黨潛蹤江防得以安謐上年欽奉

電旨整頓長江緝捕業經會議分段巡緝章程奏明辦理臣文炳
獨乘輪船赴上下游梭巡嚴加督責該將弁等均能實力奉行或
自行偵緝或會同巡緝隊及地方官協緝每於風狂浪湧之時恐
有匪徒乘間出沒不避艱險實力巡查經臣端方等密加察訪並
稽以案卷沿江各處尙無具報搶劫鉅案是該將弁等之查緝得
力卽此可爲明證因思緝捕盜匪綏靖江面固係水師將弁分所
當爲然亦必須賞罰嚴明始足以示勸懲而資鼓舞綜計臣文炳
到任以來參劾游擊以下等官共有五十餘員名之多用能咸知
警惕罔敢或懈惟歷年奮勉出力之員從未聲請獎叙有罰無賞
僅能杜其廢弛之漸究不足生其振奮之心查湖南省擊獲會匪
歷經按年奏獎有案長江地段綿長素爲各處匪徒涵跡之所兼
以華洋雜處人類不齊近復有海外匪黨每思勾結滋事是近年

之江防較湖南一省之防務倍極繁難該將弁等歷年緝捕始終不懈共獲盜匪至八十餘起卒能使江面安靖商旅不驚勞動似不可沒且上年江鄂皖贛湘五省電奏會議整頓長江巡緝事宜聲明倘能拏獲匪首及著名要目者應請擇尤保獎奉

旨所籌尙屬周妥著卽妥速籌辦等因欽此是長江水師人員此後拏獲要匪本在應獎之列然與其懸一獎賞之格使之自奮似不若將歷年緝匪最爲出力之員量爲獎叙尤足以資觀感而勵將來合無仰懇

天恩俯准將長江水師員弁歷年緝獲盜匪異常出力人員由臣等擇尤請獎俾示鼓勵出自

逾格鴻慈謹合詞恭摺具陳伏祈

皇太后

欽定大清會典事例 卷一百一十二

皇上聖鑒謹

奏

暨南學堂辦理情形摺

光緒三十四年五月

奏爲暨南學堂改辦中學附設高等小學瀝陳辦理情形并籌撥經費恭摺具陳仰祈

聖鑒事竊上年據南洋各島視學員學部專門司行走舉人董鴻禕等護送爪哇華僑學生三十一人先後到甯曾爲特設暨南學堂派員管理延訂教員分科教授所有常年支用各款飭由江海關籌撥動用作正開銷業經附片具陳在案原擬俟諸生補習國文國語及各項科學一年再行考驗程度查詢志願分送各學堂肄業刻經體察情形似此辦法未臻完密以諸生程度不齊優者有中學第二二年程度其次或與高等小學第二二年程度相當或與

高等第三年程度相當實難釐爲一致遽欲分送甯中各學堂求一適合之學級蓋不可得本年五月各島新來學生四十六人其程度亦甚參差一時更不能分送他堂臣特飭該堂總理候選道田吳炤會同寧學司陳伯陶妥訂章程豫算應需經費以憑核辦茲據會詳呈請具奏前來查諸生初次回華風俗人情多未習慣管理教授尤當定一合宜之規性情不同辦理亦不能不稍示區別以髫年血氣未定習尙不同之幼童遽令分入他堂既恐造詣未深易沾習氣又恐因散處而有歸思其向學之心轉紛自應就其程度妥籌善法使易於成就現擬將該堂改爲中學附設高等小學分爲中學一班高等小學兩班就所有之學生擇其程度較優已有中學第二年程度者卽從本年起定爲中學第三年級接習中學三年便可畢業次者定爲高等小學第三年級係將新舊

生程度一律者併爲一班次則分爲高等小學第二年級並選內地品行純謹學生十餘人相其程度列入各班俾華僑各生藉以練習官話其課程悉遵奏定章程辦理豫計中學一班光緒三十年下學期畢業再升入法政商業陸軍各項高等學堂高等小學兩班按年畢業後仍接習中學其應得獎勵除屆畢業年限各照定章奏請辦理外查去年八月內閣會議政務處議復御史徐定超條陳大計摺內稱設華僑學堂一條內有寬籌獎勵之法款以登進之榮等語將來學生畢業之時如成績果優擬卽援照此案

奏請破格給獎以資鼓舞蓋羣島華人僑居海外已數百年今已羣殷內嚮之忱有歸國就學之舉諸生性情復極純謹用功甚形刻苦氣象尤爲整肅文筆可觀者亦不乏人自應擇其尤佳者因

其有中學二年程度卽定爲第三年級俾其畢業期近易見成功
先來者旣得優獎繼來者自足歆動誘勸之道莫要於此惟是來
學日衆則經費日增江南財政異常支絀惟有督飭該司道等核
實撙節勉爲維持以期行諸久遠不致因費絀停辦有以失華僑
之心現據該司道等按照先後所到學生人數及此次所定辦法
豫算所需各項用欸以及第一二次回國學生三十一人衣履雜
費每年約共需銀一萬三千二百餘兩又今年新築各室共需銀
六千餘兩又添置校具銀一千餘兩均經設法墊撥以濟急需查
此項學生概係閩粵兩省僑民子弟其所需經費應由閩海粵海
江海各關分任籌撥作正開銷在各關所撥爲數有限而於
國家來遠培材不無關係惟有仰懇
特恩俯如所請如數准撥並定爲常年的欸以敷教育而繫僑情

除將經費額支活支豫算表職員教員一覽表學生姓名表咨度
支部學部查照外所有辦理暨南學堂情形謹恭摺具陳伏乞
皇太后

皇上聖鑒訓示謹

奏

請撥華僑學堂經費片

再據爪哇全島華僑學董梁頤潘炳勳稟稱僑董等雖流寓海隅
猶是

大清赤子遵興學之

明詔盡愛國之微忱近年以來互相勸告各埠學堂陸續成立本
年計數已有五十餘所學生約有四千餘名其間新設者固多而
開辦在數年前者亦復不少卽如巴達維亞一校則開辦已經八

年經費皆由捐助其全島學堂概無的款現經勸學所總董兼視
學員汪鳳翔將各埠學生詳加甄別分爲高初兩等小學每等復
就其程度淺深釐定學年查高等小學將屆畢業者實繁有徒亟
應設一中學堂以爲升學之地屢經提議及時興辦計開辦經費
尙可竭力籌畫惟常年經費殊無著落前歲荷人窺我經費支絀
屢欲伙助以攬教育之權同人婉詞卻之如蒙酌撥常年經費若
干以資補助不惟海隅僑庶沾溉無窮而我
聖朝文教覃敷遠暨赤道之外抑亦曠代之盛事等語具稟前來
查該董等倡辦中華中學堂豫備高等小學畢業升進肄習較高
之學業自係正辦而外人願出貲相助則辭而不受其一意內嚮
之忱尤堪嘉尙自當量爲設法擬請

特恩准由江海粵海閩海各關每年各籌銀二千兩撥給該中學

堂具領以資補助出自

逾格鴻慈謹附片具陳伏乞

聖鑒訓示謹

奏

紳商捐設貧兒院請獎摺

光緒三十四年五月

奏爲上海紳商捐資創設貧兒院援案懇

恩褒獎以昭激勸恭摺仰祈

聖鑒事竊上海職董周晉鑣曾鑄籌集合同志在上海創設貧兒

院一所並附設孤童感化所一區所有籌集經費辦事大綱業經

臣附片陳明在案茲准商約大臣郵傳部右侍郎盛宣懷咨稱據

二品頂戴候選道曾鑄稟該員前捐銀二萬兩爲創建貧兒院等

用該院現將竣工先收二班額生一百二十名核計常年經費各

職董前次籌捐銀五萬兩尙屬不敷茲由該員續捐銀一萬兩交商生息支利不動本以資補助事關公益本不敢仰邀獎叙第念貧兒院之設爲中國勦舉若能辦有成效各省必聞風興起稟乞奏請

恩賞御書匾額懸挂院中以垂久遠而資觀感等情咨請核辦前來臣維慈幼爲王政之一端必教養兼施方收實效貧兒院之設東西各國均視爲切要之圖臣從前考察政治見其法良意美心竊慕之徒以財力艱難尙未及時興辦上海商力較厚又爲中外觀瞻所繫該職等銳意經營爲各省開通風氣洵屬熱心公益於教育裨益良多伏查已故職商葉成忠於上海地方專建澄衷學堂經商約大臣呂海寰奏請賞給御書匾額奉

硃批著賞給御書匾額一方以示獎勸欽此欽遵在案該職等捐建貧兒院事同一律合無仰懇

天恩俯准

賞給匾額一方交臣敬謹轉發祇領懸挂院中以昭激勸出自

高厚鴻慈除取詳細章程咨部查照外謹會同江蘇巡撫臣陳啟

泰恭摺具陳伏乞

皇太后

皇上聖鑒訓示謹

奏

審明縱匪各官定擬摺光緒三十四年五月

奏爲審明庇縱梟匪營哨各官分別定擬恭摺具陳仰祈

聖鑒事竊照江南淞南營游擊兼鹽捕營營務處孔德陞鹽捕營

前營管帶游擊銜王士志前經訪聞有與梟匪渠魁夏竹林暗通情事並據獲匪汪小周等供稱梟匪見孔德陞之族便不打仗而王士志之族人王四把子與夏竹林係屬至親是其通匪一事不爲無因卽經將孔德陞電調來甯並經奏派督辦蘇松太杭嘉湖緝捕清鄉事宜江蘇藩司瑞澂將王士志拏解赴寧一面由電奏參奉

旨孔德陞王士志均著卽行革職並按軍法從嚴懲辦以昭炯戒等因欽此嗣據駐防松江之甯軍三十五標統帶蕭先勝拏獲三把子卽王太和及夏竹林之妻李氏解送來寧飭發巡防營務處迭次提同孔德陞王士志質訊供情狡展改發署江寧府知府許星璧悉心研審據王四把子供稱年四十一歲安徽合肥縣人原名王金生與王士志係同族光緒十七年投入孔德陞營內當

差旋冒已故族兄王太和廢札假充守備奉派副哨娶私販夏老頭子之女卽夏竹林之妹爲妻後因夏竹林爲匪滋擾迭向勸誡不從久已斷絕往來上年充當鹽捕前營領哨帶船八隻因與夏竹林有關戚誼故未查拏據孔德陞供稱年六十四歲安徽合肥縣人同治年間投入軍營游保至淞南營游擊王士志係該革員外甥與夏竹林向不認識素無往來惟從前其故妾趙氏曾僱夏竹林之妹幫工至梟匪見旂便不打仗一節想係光緒二十一年間蘇省裁撤海靖三營均係該革員資遣押送出境嗣後該散勇等難保不仍流而爲匪因係該革員舊部故有是說其實並無與夏竹林暗通之事王四把子如何冒充守備庇縱梟匪亦不知情據王士志卽王耀賢供稱年三十九歲安徽合肥縣人報捐游擊銜充當鹽捕營前營管帶孔德陞是母舅王四把子是族人與

夏竹林素無往來並無得賄通匪情事質之夏李氏供稱年三十
 七歲江蘇華亭縣人夏竹林係伊夫上年搶劫各處伊均知情王
 四把子係伊夫妹婿孔德陞王士志均與伊夫不相認識並無往
 來各等供稟經臣端方親鞫無異臣等伏查蘇浙臬匪盤踞兩省
 交界處所根蒂深固黨羽繁滋總由於營哨或緝捕不力或有心
 庇縱以致釀此鉅患該犯王四把子卽王太和先年娶私販之女
 爲妻已屬甘心比匪繼復假冒職官照例已干駢首且身充哨長
 因與夏竹林有關戚誼遂不查拏實屬有心庇縱罪不容誅應請
 將該犯王四把子卽王太和按照軍法從事審明後先行處斬孔
 德陞王士志一爲鹽捕營營務處一爲鹽捕前營管帶均有緝私
 捕匪之責而乃任聽梟匪恣肆擾害地方縱匪殃民均有應得之
 罪且孔德陞之故妾趙氏曾僱夏竹林之妹幫工人言藉藉未始

無因其於王四把子冒充守備庇縱梟匪不爲舉發厥咎尤重王
士志與王四把子係屬族人其假官縱匪各節更難諉爲不知惟
再三研審均於通匪一層堅不承認質之夏李氏尙無異詞應請
貸其一死將孔德陞發往新疆地方充當苦差王士志永遠監禁
以昭儆戒夏李氏於其夫夏竹林迭次搶劫均屬知情亦難輕釋
應請將其監禁十年限滿再行察看保釋除仍嚴飭查拏在逃各
匪黨務獲究辦以絕根株外所有審明庇縱梟匪營哨各官分別
定擬緣由謹合詞恭摺具陳伏祈

皇太后

皇上聖鑒謹

奏

海軍添造辦公房屋奏銷摺

光緒三十四年五月

奏爲南北洋海軍添造辦公房屋與上海船塢公用籌撥工料款項專案奏銷仰祈

聖鑒事竊南北洋海軍事務前經奏派大員常川駐紮上海總理一切所有海軍人員辦理公務本係暫借江南製造局房屋嗣後添設船塢將廠屋與製造局劃分凡海軍暨船塢兩處時需接待中外官員會議交涉事件塢內洋員學生膳宿處所規模亦嫌狹隘必須添造洋房一座以便公用經前南北洋海軍總理葉祖珪咨由前署督臣周馥核准照辦薩鎮冰接辦海軍事務後遂與上海滙廣公司洋商羅士訂約包造書立合同一切做法工料均照合同辦理就船塢東偏起蓋洋式樓房上下三層區作三十間計需工料銀二萬五千兩卽歸船塢監造於光緒三十二年十二月間由籌防局在海軍活支項下籌撥銀一萬七千兩解交應用其

餘銀八千兩歸船塢承認至籌防局撥發之欸計規元折合庫平銀一萬五千五百十兩九錢四分八釐九毫五忽一微業於籌防二十六案銷冊內照數登除一切洋房工程匯廣公司均已按照合同辦法如期完工現由船塢譯抄原訂合同並繪具圖式轉送核辦據江南財政局詳請奏咨核銷前來臣復查此項工程係由洋商包造工料各款均按合同照付每項動用細數若干洋商並未分晰聲明無憑核悉應請邀免造冊船塢認籌之八千兩該塢係仿商廠辦法無庸請銷至前籌防局撥解之規合庫平銀一萬五千五百餘兩雖已在籌防二十六案銷冊內照數登除仍應專案奏銷以昭核實除將合同圖式分咨各部查照外謹會同北洋大臣署理直隸總督臣楊士驤恭摺具陳伏乞

皇太后

皇上聖鑒勅部核銷施行謹
奏

振款第三案報銷摺

光緒三十四年六月

奏爲江北水災疏河築隄以工代振謹將收支用款列爲第三案
報銷開具清單恭摺具陳仰祈

聖鑒事竊查光緒三十二年江北徐海淮安各屬大水爲災飢民
甚衆當經奏明廣爲振撫以資安集故於冬春兩振留養資遣平
糶之外復招集災民疏築河隄以工代振仰荷

聖恩頒帑截漕撥用桂捐溢款並准開辦各項振捐藉資接濟所
有冬春振撫轉運平糶收支用款業經分爲第一第二兩案開單
奏報均奉

硃批該部知道單併發欽此茲據江南振務報銷處司道詳稱江

甯恩改公奏高

卷十二

十六

北地處低窪爲蒙沂淮泗衆水所歸前年夏秋之間霖雨經旬山
洪暴漲宣洩不及遂成鉅災兼以徐海淮揚等屬河道久未修治
微特六塘諸河隄塌河淺不能容納卽運河亦因平時限於經費
隄岸極形單薄河身大半淤淺故一遇盛漲卽遭泛濫此次災情
之重爲數十年來所僅見沿河隄掃冲刷殆盡一片汪洋盡成澤
國及至水退之後河身淤墊益高若不卽時挑修殊無以資蓄洩
且維時災民四出載道流離拯濟之方尤莫要於以工代賑旣以
救災黎待斃之生又可除地方將來之害最爲一舉兩得當經分
派員紳就近招集災民分別築隄濬河鑿埽建閘並將應修之城
垣橋路擇要修築寓振撫於工作之中藉補冬春兩振之所不逮
其江甯揚州兩府屬被水冲刷各洲圩以及省城之水西門下關
等河或爲田廬保障或爲運道攸關民力不能修復亦經酌量撥

款分別培修挑挖此皆急不可緩之工現已一律濬築完竣委員
勘驗均稱河道深通隄防堅固各取切結存案除六塘河尙有應
建閘洞及運河應大加疏濬均須籌款另辦接續造報又揚州東
南新三壩堵閉經費應歸揚屬隄工局另案造銷外茲就已辦各
項工程逐細勾稽共支正雜經費庫平銀一百六十八萬六千三
百四十四兩一錢四分四釐除收第二次平糶報銷單內所存庫
平銀一十二萬八千四百一十七兩三錢六分八釐外計不敷庫
平銀一百五十五萬七千九百二十六兩七錢七分六釐均係由
司局各庫暫行挪墊及向官商各銀行息借湊撥應用統俟捐案
截清及鼓鑄振款銅元餘利解交足數再行核數分別撥還歸墊
所有此次工振支用各款爲數雖多實由工程浩大所致且僱用
工夫俱係待振之災民尤不能不寬給工價俾使得以贍其身家

詳加察核均係實用實銷毫無浮濫應仍按照振糶成案列爲第三案開單報銷等情詳請具奏前來臣等復核無異理合繕具清單恭呈

御覽再查此次辦理工振曾於上年春間息借農工商部發存滬道生息銀一百萬兩合之不敷銀一百六十餘萬共銀二百六十餘萬兩現尙虛懸無着江南財政困難舍勸捐外別無挹注之前雖收振捐七項常捐及代收兩項部捐奏准展限一年第限滿之後能否收足借墊之數尙無把握除飭振捐局司道督率勸捐各員廣爲募勸俟一年限滿察看情形再行奏明辦理外謹合詞恭摺具陳伏祈

皇太后

皇上聖鑒謹

奏

查明運司參款摺

奏爲查明運司被參各款據實覆陳恭摺仰祈

聖鑒事竊於光緒三十四年四月十一日承准軍機大臣字寄光緒三十四年四月初一日奉

上諭有人奏兩淮運司趙濱彥營私藐法病國虐民一摺著端方陳啟泰按照所參各節秉公確切查明據實具奏勿稍徇隱原摺均著鈔給閱看欽此遵

旨寄信前來臣等往返電商會委准補淮揚海道朱之榛蘇州府知府何剛德馳赴揚州按照所參各節認真確查茲據該員等查明稟覆臣等詳加覆核尙屬切實謹縷晰陳之如原奏稱淮南場鹽悉係煎鹽近年百物昂貴草價較之從前加至兩倍以上場商

稟請酌加牌價該運司堅執不允一節查淮南煎滷成鹽海濱地方專產紅白芒草含有鹹質以供淋漓煎鹽之用竈戶督煎丁購草辦煎即以所煎之鹽計桶售之場商則有桶價場商收鹽運儲儀棧挨輪配引售諸鄂湘西皖四岸運商則有牌價而運商自儀棧運鹽達岸售諸岸販則有岸價層層相因價由官定各視成本之多寡以定價目之高低兵燹以後前督臣曾國藩整頓淮南鹽法首以定價整輪爲主行之四十餘年未嘗或改自海勢東遷昔日斥鹵之區多成膏沃因是產草較少草價遂昂然僅通屬數場爲最甚至泰屬各場草價或少或多尙未加至兩倍以上臣端方因近年場產不旺亟應設法改良疊飭運司籌辦并於今春派委熟悉鹽務人員周歷各場逐細考察據稱整頓場產必從體恤煎丁入手若但加煎丁桶價而不加場商牌價加場商牌價而不加

運商岸價皆屬偏枯無濟於事業據擬議層遞加價辦法另案奏明辦理該運司曾於上年請加煎丁桶價本年復請加場商牌價均有文牘可稽惟以事關全局不能不審慎周詳現正籌議辦理原參謂該運司堅執不允似非確論又原奏稱該運司增船募勇大舉緝私其弁勇皆係無賴之徒其統帶則爲該運司之家丁田天林藉緝私名目於各場境內橫行無忌以致通州如皋泰州東台興化鹽城阜寧七州縣姦淫殺掠之案層見疊出地方據實稟報該運司一味袒護甚至阜寧遊擊因見其緝私勇丁殘虐鄉民出而禁阻竟被擊毀衙署稟報之後該運司亦置不理一節查淮南裏下河一帶港汊紛歧向爲場私出沒之地該運司到任後請就范公堤扼要堵緝以鹽捕營原有炮船十餘號不敷分布議將舊額薪糧暨無關緊要各差迭次裁停計每年節省銀一萬五千

五百餘兩錢二萬二百九十餘串卽以此款訂造舢板大小五十號募勇分紮要隘與陸路緝私營隊相輔而行其常年餉需亦於此指撥該運司銳意經營化無用爲有用誠爲正本清源之計惟裏下河七州縣逼近場竈其人向以販私爲生而居民習慣食私亦以爲分所應爾一旦駐兵堵緝於販私食私者均有所不便於是視緝私營爲仇敵時有尋衅爭鬧情事而緝私營勇成軍未久未嘗受當兵教育亦不免氣燄凌人事端迭起除尋常案件隨時由地方官彈壓懲儆外其案情較重者如原奏所指緝私營勇擊毀阜寧遊擊衙門一案緣本年正月十五日阜寧縣地方三元宮賽會該處遊擊因鄉民太衆派兵巡查見有人戲謔婦女喝阻不聽遂扭獲三人回署訊問忽有緝私營勇多人持械入署搗毀器物并將所獲三人劫去實屬目無法紀業據該運司轉據縣稟飭

訊明確稟請將滋事勇丁劉金標張步高張開金趙得標四名按照軍法嚴懲以昭炯戒并將統帶管帶各官分別撤換查此案滋事勇丁隸虎字營係遊擊徐寶山統帶該遊擊自光緒二十六年經前督臣劉坤一等招撫投効責令帶營緝私其部下弁兵雖勇敢善鬪屢有勞績而紀律殊欠嚴整終難比節制之師每於駐紮處所與民間時有齟齬該運司以該營招撫而來未能造次遣撤故於該營滋事三案無不批飭嚴辦均有案卷可稽謂其有意袒護與該運司歷來稟牘殊覺不侔至家丁田天林徧查并無其人祇有新軍水師中營管帶田景文係湖北附生游學日本警察畢業經該運司委充是差其人名出身均與原奏不符自可毋庸置議又原奏稱分設通州等處售鹽官棧例按牌價提購場鹽乃該運司則飭委員祇照垣價勒提且不納課稅而售鹽則按定價加

倍收取賤入貴出隱與委員分肥一節查淮南近場之泰州興化鹽城阜寧通州如皋六州縣境內鹽官不設禁令向准老弱男婦肩挑四十觔隨地售賣原所以體恤貧民此舊章也三十二年三月該運司稟就范堤駐兵緝私必使顆粒不能偷漏方足以杜私踪又思及緝私加嚴則近場地方肩挑絕跡民間淡食堪虞乃議招商開設鹽棧而商人以利害難覩罔有應者不得已而由官辦理在城設總棧鄉鎮設分棧以便民間就近購食并稟明每引課項照食岸或減半或免繳如銷數能多將來尙有餘利可收再於此中劃提其購買場鹽價值與食岸相同不得稍有抑勒該場商亦不得居奇經前署督臣周馥批准并電飭該運司將課釐等款照商岸一律照繳復據該運司電復遵辦并聲明此項課釐請俟開辦後酌定此官設鹽棧之緣起也調核各鹽棧冊報自前年四

五月先後開辦之日起截至今年二月止統計所得餘利約共十六萬餘串所用運費及各棧開銷約共十一萬餘串而緝私薪餉所需應攤歸各鹽棧分認者尙未計入卽應繳課稅亦未劃提在該運司之意因事屬剏辦成效難期經營之初難免耗費故必俟開辦稍久銷數確有把握方能統計盈虧况官棧既動官本苟有餘利自應歸之公家卽與課稅無異特如何劃提尙未據詳定有案業經臣端方檄催該運司迅卽查明具報以憑

奏咨至官棧購買各場鹽引係按食岸章程自向場商議價出諸兩願無從用其抑勒又官棧售鹽之價稽之冊報訪諸輿評每斤均在二十文上下至多亦不過二十六文尙與定章相符而傳聞有貴至三十文或五十文者蓋盆戶籌販由棧領鹽轉售其離棧較遠地方或不無抬價之弊至謂該運司與委員分肥實無其事

又原奏稱通泰至儀徵之濬河費則侵吞其大半萬福橋沿河繕道之工程則浮冒其大半一節查儀徵濬河費係由淮南總局經收按月解存運庫除支撥濬河築壩灌塘等項經費外另有每季移解上海道加復俸餉銀一千十六兩四錢五分又每月提撥營餉銀八百三十三兩如遇歲時例貢及辦公經費等項不敷亦在此款內借撥該運司任內共經收六萬九千七百十二兩三錢四分六釐除開支借撥外實存庫銀一萬一千一百十兩八錢四分一釐又萬福橋一款係由仙女廟捐局在米捐木捐項下帶收橋釐解司存儲遇有橋工隨時撥濟該運司任內計收錢一萬四千七百零三千七十文除存發商本息等項并開支外現尙懸欠錢一千六百五十千六百十八文又壩工一款亦由淮南總局經收解庫除支撥修築壩工繕道等項外另有撥濟焦山救生經費營

餉練兵經費并墊借鹽價善後等項其堤工局修理小輪經費亦
附入此款開報該運司任內計收錢十四萬九千九百三十三
三十五文除開支借撥外實存庫錢三千五百三十三文濟河工
程向係儀棧道員經理萬福橋及緯道各壩工程向係委員領款
承修隨時開報均有案據非該運司所能侵冒惟近來財政支絀
不免移東補西互有借撥三十年

欽差大臣鐵良考查兩淮運庫出入款項其見諸奏報者卽已如
此情形蓋當局辦事爲難豈局外所能盡喻原參謂該運司侵吞
浮冒自係傳聞之訛又原奏稱加票本一百萬兩及商借銀八十
萬兩聞皆有私行挪用情事一節查准商報効及借款兩項前均
奏明有案截至本年四月止准商報効銀一百萬兩僅收到六十
五萬四千三百三十二兩七錢三分六釐又准商借款銀八十萬

兩僅收到六十七萬七百五十六兩此兩項內除批解江南財政局銀一百萬兩外又墊解測勘海清鐵路經費銀三萬六千六百二十三兩又墊發海州分司收買餘鹽銀四萬八千八百五十六兩七錢五分二釐實存運庫候撥銀十六萬九千二百八兩九錢八分四釐江南財政困難岌岌不可終日如此鉅款耳目昭彰遇有撥用均須稟報豈該運司所能私挪又原奏稱去歲有商人欲興辦江西建昌湖南衡永寶三屬廢岸則飭於報効銀兩外另酬四十萬方能批准該商懼而中止一節查湖南衡永寶三府及江西建昌一府本係淮鹽引地因兵燹借食粵鹽閩鹽遂久爲鄰私所佔淮引不行者垂五十年歷任督臣規畫收回迄未定議緣湘西兩岸舊商明知收復引地必不可緩惟以途險費重憚於遠圖而新商稟請試辦者原不乏人又恐其藉此影射倒灌淮界貽害正

綱且南鹽色低滷重不足以敵鄰私而北鹽又頻年絀收勢難兼顧以致收復廢岸之舉久未有成如果事有可爲則

國課商情關繫甚大豈運司一人所能阻格不行原參所謂飭於報効銀兩外另酬四十萬一節徧查案卷並無飭繳報効明文則另酬之說自難憑信又原奏稱該運司凡事皆與其私戚惲毓昌姚近愷及家丁田天林謀之而署內公事半決於其弟之手故凡任要差者非其私人亦必與此數人交結賄託方能派委一節查惲毓昌係由運判捐升知府與該運司係疏遠姻親前年經臣端方札派該員辦理淮北六岸督銷差使并非該運司所委姚近愷係候補運判查與該運司並無戚誼現充如皋鹽棧差使該兩員均奉差在外謂其交結賄託查無實據該運司有弟二人曾來署內早已先後回籍該運司辦事認真防弊極嚴謂其署中公事半

決於其弟之手當不至此又原奏稱該運司秦侈驕淫尤足駭人聽聞自到任後建造洋房爲藏嬌之所姬妾至六七人其中頗有屬僚夤緣獻媚而來其一爲其友蔡宗瀚養女而竟騙占者一節查該運司到任後以署內二堂之左三堂之右有廳事兩所業已破壞不得不拆卸修造以便辦公平時接見屬僚亦在此處并非住眷之所該運司祇有一妻一妾并無姬妾六七人之多至蔡宗瀚爲湖州舊族只有一女早嫁浙江許氏別無養女原參騙占一節實屬子虛此外亦查無屬僚夤緣獻媚情事臣等伏查運司趙濱彥由部曹改官道員需次武昌歷任湖北督撫臣界以要差操履清嚴寅僚讐服其經辦釐稅用能歲增百萬之多屢經見之奏牘臣端方在鄂時共事有年知之最稔不僅因其爲忠盡之後始加以期望也迨升任兩淮運司到任以後雖竭力籌銷歲逾常額

而頻年水澇場產不豐該運司籌畫焦勞盡心補救卽所辦就堤
緝私近場設棧亦係爲增產便民起見上年冬間江南庫帑奇絀
賴該運司勸諭淮商輸貸鉅款始獲稍紓喘息暫濟急需而該運
司口不言功心甘任怨以視今之仕宦專以脂韋趨避爲能者亦
可謂難得矣乃言者弗察猶加以醜詆之詞而聞者寒心孰肯任
後來之事此_臣等深察互證不得不據實陳明者也所有_臣等遵
旨查明運司被參各節均無實據緣由理合恭摺覆陳伏乞

皇太后

皇上聖鑒謹

奏

續造兵輪配募員役摺

光緒三十四年六月

奏爲南洋續造江亨江利江貞三船一律工竣驗收並配募員弁

勇役支給薪糧銀數恭摺具陳仰祈

聖鑒事竊南洋添造淺水兵輪四艘向日本川崎船廠訂立合同先由該廠造成江元一艘試驗如式仍向該廠續行訂造江亨江利江貞三艘按照原定合同之價日金八十九萬七千九百七十五元分期匯付即以匯豐銀行前存銀一百萬餘兩除去提付江元船礮價款尙存銀七十萬餘兩抵購三船及添置砲械之用不敷款項應將所生利息留備湊撥於光緒三十一年十一月間經前署督臣周馥奏明有案應配礮位價款亦經咨部查照所有續造三船工程當飭派前監造江元船委員千總饒懷文帶同學生赴日駐廠監視現由川崎廠將江亨江利江貞三船陸續製造完竣經海軍總理薩鎮冰派委監造員就近驗收試行速率均與原定合同所載有增無減船機礮位亦皆靈便穩當先後駛抵上海

復由薩鎮冰試驗相符應付船礮價值運保費用並委員學生川資薪水火食船竣試水燕慶等項約共用銀七十萬兩此外撥用北洋海天船存礮應認撈費及配製架座器具等項另行給付統俟另案造報該三船因長江巡防緊要已由薩鎮冰查照江元船員弁勇役名額配募齊全每船需月支薪糧銀一千五百兩業已次第起支惟江亨一船現撥借江西省暫行調遣其薪餉自三十四年三月分起卽由江西省給發江利江貞兩船均在江南駐防遣用餉煤一切全年約需銀五萬兩此項增支係在三十四年分增用十萬餘兩之內前因江海關稅項短絀無可溢抵浙海關欠解之款已另案咨部指撥的款藉濟要需茲據江南財政局將續造三船工竣驗收後配募員弁勇役支給薪餉銀數各情形並造具清冊詳請奏咨前來臣復核無異除將清冊分咨外務部度支

部陸軍部查照外理合恭摺具陳伏乞

皇太后

皇上聖鑒謹

奏

改辦巡警教練所摺

光緒三十四年六月

奏爲江南警察學堂改爲巡警教練所一切辦法及支用經費情形恭摺具陳仰祈

聖鑒事竊江南開辦巡警前於光緒三十二年八月間業經前署督臣周馥將籌辦大概情形奏明在案開辦之初設有警察學堂先行教練頭二班兵學生三百名俟畢業後視其程度與北洋學堂畢業各兵生一併分區派巡擇其才識較優者酌令充當巡官巡長嗣因逐漸推廣北洋畢業兵生不敷派用卽就二班兵生學

堂中騰出講堂齋舍添招官生以在省候補正佐各員爲官費生
候選職官及舉貢生員爲自費生分別考選入堂教練迨二班畢
業後又加添官生名額並於各區設立補習所教練崗兵所有頭
二班官費自費員生上年春閒均已一律畢業惟舊時各區巡士
雖責成各區官設補習所以訓練之而教育既有參差程度自難
劃一旦省城地段遼闊必須組織周密實力擴充臣督同司道再
三籌議將警察學堂改爲江南巡警教練所再行招考新生一面
由各區挑選巡士入所肄業當經酌擬章程切實籌辦除該總監
一員卽由巡警局總監道員何轍章兼充外其餘所長學監舍監
及教習庶務各員均係遴派深通警學之人分任其事學生現額
設二百四十名約計常年經費需用銀二萬二百餘兩均係詳細
計畫實用實銷臣仍當隨時督飭整頓總期教育普及造就多數

巡警人才以資效用而裨地方除將擬定章程分咨度支部民政部查照外理合恭摺具陳伏祈

皇太后

皇上聖鑒訓示謹

奏

改辦女學及幼稚園摺

光緒三十四年六月

奏爲改辦粹敏第一女學附設幼稚園并籌推廣情形恭摺具陳仰祈

聖鑒事竊上年欽奉學部咨行奏定女學章程上邀

俞允仰見

聖謨深遠於啓發知識之中仍寓保存禮教之意準繩既定流弊胥錮端本正裕欽服莫名臣遊歷歐美考察政治曾於各國女學

加意考究其規模教法不必盡同要皆以育道德勸學問務職業爲宗旨美國女學男女合堂并教大小一致其發達在歐西各國之上故其小學教員概係女子中學則男女教員參用至高等學業男女同校講求幾有并駕齊驅之勢此其程度獨高不易則倣惟歐西各國女學注重之處一則以爲家庭教育之本一則以爲補助生計之資二義最爲切實中國初興女學不外乎此臣到任以來亟思辦一完全女子師範學堂并兼重女子職業以培養甄明保育裨補家計之女子力求實際不務浮華爲有益家庭之本圖已購定學堂地基八十五畝但因款項支絀未能及時舉辦深用歉疚然女子教育究不能不先爲倡導以爲將來擴充之基查江甯省城公私立女學甚多女子向學者亦衆皆苦經費不充辦法亦難劃一惟有旅寧第一女學附設幼稚園稍具規模亦係集

資公立因捐款難繼由寧藩庫按月撥銀三百五十兩江南釐捐局每月撥銀一百五十兩以資補助延至上年秋竟因無一捐款不復能支臣見其設立有年不乏用心攻苦之學生與其半途廢墜而有初鮮終曷若設法維持而以因爲艱爰遴選諳練學務之員委令接辦并籌撥款項購置物理化學儀器以爲研究之資又按月設法增撥經費二百兩俾得增聘教員推廣名額改爲官立粹敏第一女學經營一載漸見整齊現在新舊學生共計一百人分爲師範一班豫科一班小學一班選派前在湖北所辦保育科及資送出洋學習女師範各畢業生充當教員又附屬幼稚園有幼稚生五十人另延保姆以教之其教科則謹遵奏定章程自改章開學以來已有二學期教員皆能善爲誘教各學生亦能恪守學規一無近日浮囂習氣現屆暑假應加考驗日

前合大小學生各以所習手工爲游藝會臣親往觀覽頗見成效
惟是寧省官立女學祇此一堂而女子願入學堂者頗不乏人均
以限於學額不能入堂爲憾現又增撥每月經費三百兩添招學
生一百名合舊有學生共二百名編成七班添請教習六員綜計
前後所撥官款每年共需一萬二千兩當此款項支絀之時女學
成立尤爲不易惟有督飭該堂管理員教員認真經理務期規模
完善教育日昌以副

朝廷振興女學之至意所有改辦粹敏第一女學及附屬幼稚園
并籌推廣緣由謹恭摺具陳伏乞

皇太后

皇上聖鑒訓示謹

奏

端忠政公奏高

卷十一

二十一

搜捕蝗蝻片 光緒三十四年六月

再前因海州銅山縣灘地葦柴之內出有蝗蝻當經臣等飭令趕速捕治附片陳明在案嗣據淮安府屬之安東桃源阜寧等縣先後具報蝻孽出土而與山東安徽交界之豐縣沛縣蕭縣亦據電稱飛蝗入境復經電飭已出土者上緊撲捕未出土者設法搜挖仍令設局收買優給價錢以期踴躍一面分電山東安徽鄰省一體捕治並恐該縣等不能得力分派委員前往密查以杜諱飾六月初間各屬連得大雨低窪處所間有被淹據海州電稱飛蝗一律肅清已經撤局銅山鹽城安東桃源各縣出土之蝻多被淹斃已生翅者亦著溼難飛逐日收買甚多可期漸盡稽之委員歷次來電尙無異詞惟徐屬與山東安徽交界各州縣時有飛蝗往來深恐蔓延爲患復飭徐州府田庚親赴邊界查勘旋據電稱周歷

各縣窮搜產蝻處所始知出自山東魚台滕縣與沛縣交界之湖中該湖寬長各數十里葦草叢生一望無際亢旱日久蝗孽潛生地屬荒僻居民稀少迨經趕捕而湖心草深之處蝻漸成蝗成陣飛去現查湖中葦葉食盡積有死蝗是其明證刻下飛蝗四散各處遺子尤多又經電飭分別切實捕挖一面厚價收買勒限於十日之內一律淨盡如因捕蝗踐損之秋糧准優給價值以示體恤所需經費准在積穀項下動支濟用如尙不敷並准稟由臣等籌款接濟倘該府縣等稍事懈延以致貽害田稼卽行從嚴奏參若能迅速撲滅無礙秋成亦當酌給獎敘以示鼓勵一面加電山東安徽兩省嚴飭各屬會同實力撲捕總期蝗蝻迅捷掃除秋收不致有礙以仰副

朝廷軫念民生之至意謹合詞附片具陳伏祈

聖鑒謹

奏

設立衛生學堂及獸醫學堂片

光緒三十四年六月

再軍營以衛生爲重獸醫尤馬政所關各國均設有專門學堂遴選合格營兵充當學生學成歸隊各事所事蓋文明軍隊中人無一人不受軍事教育雖至醫兵工長亦不使未經訓練者濫竽其間是以秩敘整嚴精神發越甯省創辦新軍凡屬於軍事之各種機關自應力求整備經於三十二年正月挑選營兵編爲衛生隊設立衛生學堂造養醫科目兵四月復附設獸醫學堂兼講求蹄鐵之術分延日本技師充當教習學額均定爲六十名現在衛生隊學堂第一班生已經畢業分配新軍錄用獸醫學堂亦稍著成效自應奏明立案所有用款均由臣飭令核實樽節應請准其作

正開銷除將詳細章程咨部外理合附片陳明伏乞

聖鑒謹

奏

願岸銷而保鹽利摺

奏爲淮南鹽引產不敷銷亟須培養商竈并借北濟南以願岸銷而保鹽利恭摺仰祈

聖鑒事竊維東南財賦之源首推鹽務而引地行銷之廣莫若淮南淮南通秦二十場現在產鹽實數每歲約三十六萬餘引近年鄂湘西皖四岸及本省食岸銷數歲約五十萬引以外以產配銷計不敷鹽十餘萬引前署督臣周馥任內曾據升任運司恩銘詳稱飭場歲增產額十萬引乃兩年以來缺產如故蓋各場既未增竈又未修埽是空有增產之名並無收鹽之實臣於前年九月到

任後卽飭運司趕緊設法上年岸銷暢旺需鹽至殷而丙午丁未兩年又值雨水爲災產收益絀不得已借運長蘆山東鹽各五萬引暫濟急需曾據運司詳經臣奏明在案一面遴委熟悉鹽務之署江寧府知府許星璧於本年春間馳往淮南北各場詳細考查認真整頓嗣據該員查明各場產鹽情形並擬議整頓辦法稟經飭司核議詳請奏咨前來查淮南煮海成鹽攤灰淋滷則有埭有池置盤煎鹽則有竈有舍從前產多銷少壅滯爲憂於是司鹽政者限制埭竈以爲禁私政策因此場商安於苟且凡屬荒廢埭竈棄置不修遷延至今一遇歉產暢銷途中其病爲今之計首宜清查埭竈其荒廢者修之距海遠者移之并將埭竈池舍酌定劃一形式通飭改良所謂工欲善其事必先利其器此整頓埭竈者一也場竈地方向有草蕩專產一種紅白芒草含有鹹質以供煎淋

此實天地自然之利故舊制按埵配蕩蓄草供煎私墾售炊均干例禁誠以草爲煎鹽根本也自海勢東遷以後昔日斥鹵之地大半去海已遠其間經官勘明放墾者所在固有而民間影射私墾亦多又或嗣續分承展轉割售此有埵而無蕩彼有蕩而無埵埵蕩兩不相資於是草愈少而價愈貴此於鹽務最有關繫現宜清釐草蕩查照定章按埵指蕩配合均勻其有新淤場分亦卽查明飭商認領視草蕩之多寡定埵竈之增移并嚴禁私墾私售及附近場竈之燒窰燒鍋裕煎之計莫要於斯此整頓草蕩者一也各場境內有串場河又有引潮溝不獨旱潦可資蓄洩卽運鹽亦便交通所以治鹽者必先講求水利查各場溝河大半淤阻是以前年雨水爲患經數月而不消去年溽氣浸衰引鹹潮而無自現飭各場將淤塞溝河逐細查量趁本年冬令潮枯水涸責令一律挑

修其通海口門尤宜疏濬務使潮流四達徧旺鹽豐卽遇旱澇不足爲患此整頓水利者一也產鹽之區素多私梟出沒則緝私必應加嚴前據運司詳請就堤緝私固爲正本清源之計惟淮南通泰二十場綿亙數百里其間通海處所如鬪龍新洋射陽諸港口尤爲私鹽去路現飭運司察度形勢添募勇丁配置槍划扼要駐紮歸分司場官節制調遣無事則勤加梭緝有私則立往捕拏此整頓緝私者一也以上四端如移修埭竈勻配草蕩及疏通溝河皆場竈應辦之事卽就場布置緝私所需經費亦應由場自籌無如場商資本多不充餘竈丁困苦已達極點加之近年以來草貴食昂竈丁益累本重錢賤場商愈虧訪察情形均係屬實若再責以籌備巨資舉辦各事勢必無此力量縱勞文告無補毫釐今爲增產裕收之謀須從培養商竈入手計惟有酌加岸價以遞加牌

價桶價之一法前准度支部電咨普加鹽價每斤四文抵補藥稅當經_臣以江南各項要政需用浩繁請於部加四文之外再加每斤二文并聲明淮南整頓產收津恤商竈亦須酌加岸價由電奏陳在案_臣通盤計畫猶恐所加太多或有窒礙復又督司籌議再行核減擬自本年九月初一日起通飭各岸凡售淮南真正梁鹽每斤加價三文頂梁和碱鹽每斤加價二文按照各場成本分別酌加場商牌價卽於所加牌價之內按真正梁鹽每引扣存錢四百五十文頂梁和鹽及廟灣場鹽每引扣存錢三百文以充各場新案緝私經費其餘發商承領真正梁鹽場分收鹽一桶加桶價二百文頂梁和鹽及廟灣場分收鹽一桶加桶價一百二十文專爲恤濟煎丁除所加桶價外以一半津貼場商成本以一半責令場商趕辦移修埧竈開濬溝河等事如此辦理在各岸岸價加之

食戶以每人日食鹽三錢計之爲數甚屬有限而在運商固毫無出入在場商竈丁則獲益良多一切應辦之事均得同時並舉剋日觀成庶幾原有產額冀可保存如一二年後商竈煎丁元氣得以漸復溝河埽竈修改亦已完全再行體察情形隨時將所加之價奏明酌予停減此就淮南地勢竭力經營辦理果能得宜但所增亦不過五六萬引比較各岸現時銷數仍苦不敷查淮北中正場境內五圖河東灘地方斥鹵淤灘可以增鋪新池業經臣飭司委員查明招商前往開築據報已於春間興工逐段趨辦總以增鋪新池歲可產鹽十萬引爲率卽以之暫濟南銷藉補南額不足之數惟以北濟南究屬一時權宜之計如他日淮南場產有增確敷銷數仍將新池額引移歸淮北以清界限臣綜持鹽政責有攸歸當此鹽務積困之秋若不及早圖維浸至挽回無策則上何以

對君父下何以對商民況鹽務歲入課釐數百萬金卽江南庶政所需亦強半取給於此尤於大局關係綦重現籌整頓各節均係目前迫不容緩之圖合無仰懇

天恩俯准飭部立案施行鹽務幸甚大局幸甚除咨部查照外所有整頓淮南鹽務緣由理合恭摺具陳伏乞

皇太后

皇上聖鑒謹

奏

測繪學堂辦理情形摺

奏爲報明南洋測繪學堂兼地形測量辦理大概情形并開辦三角測量日期恭摺仰祈

聖鑒事竊維地圖爲行軍之要需而測繪實地圖之根本江南測

繪學堂之設經始於三十一年九月其時前督臣周馥議辦第九
鎮新軍籌及野外演習宜有詳細地圖指畫教授飭由參謀處詳
定章程設立測繪學堂招選已畢業普通學者爲學生延聘日本
專門技師三人分授功課課分三股一日三角二日地形三日製
圖三股復別爲兩科專習一股者爲尋常科并習三股者爲高等
科尋常科限一年半畢業高等科限四年畢業開辦之初學生皆
專習一股是以高等科尙未有人計各股學生習三角者二十人
習地形者三十七人習製圖者二十七人同時附設實地測量司
借用將弁陸師兩堂畢業學生充測量人員專辦地形測量定議
先就本省險要區域測繪成圖以便軍隊演習之用此開辦之大
略情形也臣到任後以各國測繪之法無不從三角網入手專用
地形測量萬難精確爰委留學日本士官學校畢業生吳茂節爲

總辦責令設法擴充其時適准前練兵處咨催各省略圖聲明各省祇專辦地形測量無庸採用三角以期速成等因復經臣一再咨商以江南地勢崎嶇專用地形測量差積不免太甚始經允准採用三四等三角網法查江蘇全省面積約三十萬一千五百四十七平方里以採用第三等三角網成法推之每距二千五百米達之遠設一標點全省共應設三萬七千點有奇費鉅工大人才亦不敷用當議定先測全省地域十分之一計應設三千七百點有奇爰於三十三年九月開辦是時測繪學堂尋常生已於是年三月畢業三股共得畢業生八十四人附設之實地測量司已出圖五十餘張足供軍隊演習并經陸續咨部有案當飭令測繪學堂另招新生百名接續辦理一面將原辦之地形測量停止所有前充實地測量司人員連同畢業生八十四人悉以之分配三角

地形製圖三股另添聘日本三角技師一名以資督率當經勘定區域以江寧省城爲起點由江寧府屬之上元江寧渡江經過六合句容及揚州府屬之江都甘泉儀徵泰州鎮江府屬之丹徒丹陽金壇常州府屬之陽湖武進通州州屬之泰興是爲第一區先以三角股設立標點濟以地形股實測地形製圖股繪製成圖約期三年當可竣事計自上年開辦至今所有已測過地段爲江寧六合儀徵江都甘泉五縣以上皆臣到任後規畫之大略情形也惟其中辦法尙有應行聲明更定變通之處查本年正月准陸軍部頒發測繪學堂章程令各省一律遵辦察核本省辦法與部章微有異同前經咨部有案委因本省開辦在前部章奉發在後本應卽時遵改惟新生百名已經歷第一學期再閱一年卽當畢業功課時期分配已定半途改轍窒礙殊多擬請俟此項新生畢業

以後再行改照新章辦理此應陳明者一也又本年四月復准部咨以前練兵處原定三角測量及製圖兩項歸中央舉辦外省祇應專辦地形測量一節改爲各省分辦之法陸軍部專任順屬兼籌內外蒙古辦法各省於省會自立基點將三角地形兩種分令自辦一切條教規則由部主持并頒發速成三角測量及水準測量暫行規則等因查規則內開三角測量之法分爲第一第二第三三種其第三種三角測量各點距離平均以二吉羅米達爲度與本省所採用之三等三角平均距離之點以二千五百米達爲度者不甚懸殊據本省豫算照三等三角網法測量江蘇全省地域所需經費祇標點材料一項已需銀二十萬兩教育及臨時經費尙不在內部章令各省遵辦第一第二第三三種三角爲網羅全國地面之計自應取高掌遠矚之規以期永立根基昭茲來許

惟三角之法頤奧無窮等級愈高則學理愈進人才愈益難得推之儀器材料各種用款以第二種較之第三種其費數倍以第一種較之第二種其費益不貲各省度支奇絀當無異於南洋南洋纔辦一第三種之三角已屬竭蹶不遑若進而更辦第一第二兩種萬萬無此財力南洋如此他省可知且第一第二兩種三角之布設期於統全國區域一氣呵成若由各省各定基點則沿邊之線必多畸零聯合之區多靡標點微臣愚見地形測量宜令各省分辦第一第二第三三種三角測量宜令數省合辦蓋有數利第一合數省之區域聯爲一氣則畸零少而聯合易第二合數省之財力則衆擎易舉第三祇須主任省分講求三角課程亦祇需主任之一省購辦三角儀器則靡費者少否則舉三角測量責令各省獨任分辦斷斷無此財力卽間有規模較大之省力奉行亦

恐得一二而遺八九臣此議如蒙

聖明採擇擬請

飭部將全國區域共分爲若干組或三四省爲一組或四五省爲一組全國共分若干組所有三角測量亦定爲若干組每組酌定以某一省爲主任之省以某某數省爲附屬之省主任者握測量之權附屬者擔協濟經費之責明定章程限期舉辦容或易於蒞事臣一得之愚兼爲江南度支奇絀斷非獨力能支此不得不陳明者二也至前項所需經費當測繪學堂并實地測量司開辦之初由前督臣周馥撥過開辦費銀五千兩復核定常年經費每月銀二千兩嗣因實行製圖購辦機器專司印刷又加撥常年經費每月銀一千八百兩上年開辦三角測量經臣發給開辦經費銀二萬兩又核加常年經費每月銀二千兩又因添購儀器另發給

銀三千兩以上用款均請准其作正開銷除飭令核實造報並分咨陸軍部度支部查照外所有南洋設立測繪學堂辦法并遵辦三角測量籌擬緣由理合恭摺具

奏伏乞

皇太后

皇上聖鑒訓示謹

奏

遵查商約大臣參款摺

光緒三十四年七月

奏爲查明大員被參各款據實覆陳仰祈

聖鑒事竊照光緒三十三年六月初十日承准軍機大臣字寄三

十三年五月二十八日奉

上諭有人奏商約大臣盛宣懷貪鄙近利行同市儈並有擅售公

地勒買民田情事請旨飭查等語著端方按照所參分別密查據實具奏毋稍徇隱原片著抄給閱看欽此遵

旨寄信前來臣當卽札委蘇松太道升任江蘇布政司瑞澂並現任蘇松太道蔡乃煌按照原奏所參各節分別切實密查務得確情去後茲據瑞澂蔡乃煌先後查明詳覆前來臣復詳加察訪互相印證如原奏盛宣懷充招商局督辦用局款購買上海產地弊端百出有用本局及總辦出名者有用福昌行出名者且有假用洋商密爾登出名者皆盛宣懷一人經手推其紛歧錯雜之故無非價漲視爲己業價落則撥歸公產牟利之工至斯而極一節查盛宣懷督辦輪船招商局事於光緒十二年七月到差二十八年十二月交卸招商局所置產業屬寶山者吳淞江地二百四十二畝五分屬上海者租界內外局房市房及浦東貨棧等二百六十

畝有奇共價銀八十四萬八千餘兩係光緒十六年至二十七年陸續購進非一時一人之事是以或由招商局暨總辦出名亦有先經所雇管事洋人密爾登經手後由招商局出名者均有道契及印契爲據由局執業據該局單開各地核之道署底冊副契及英美領事署冊均屬相符間有載在官冊爲局單所無者英冊三紙係洋人担文抵押不贖光緒二十年作銀二萬兩歸局承受二十五年已由局照原價售出故未列局產之名至福昌行出名者美冊二紙係浦東之舊棧基於光緒三十年售於英商隆茂洋行價銀十五萬五千二百餘兩局簿已收有此項其事在盛宣懷交卸局務之後矣至其紛歧錯雜之由實因創局之初官私合股利用衆擎旣而分并不一遂多轉轄光緒十九年招商局買英租界浦灘旗昌洋行房產九座共地三十一畝半價銀四十一萬兩局

款不能獨購以一座歸李慎守堂承買其八座則招商局與盛宣懷之五福堂合資購置各籌其半憑招商局股東公議訂立合同名爲華產公司地契雖用招商局戶名卻非全是局產二十四年將李姓一座買歸招商局二十九年公司分析以前次合購之八座當衆拈鬮分管業招商局與五福堂各得四座自是五福堂之四座與招商局公產無涉不久卽售與洋商其招商局所得四座時價約值七十萬較原本增數倍盛宣懷並無價漲歸己價落歸公之事又原奏將通商銀行公地二畝零擅售與日商三菱公司現在上海道未允稅契不能交易一節查通商銀行之地七畝九分零與招商局毘連亦在旗昌洋行購來之內已於二十九年分歸五福堂次年卽售與法教三德堂又招商局西南有地一畝四分三毫因有馬路隔開於三十一年由該局售與通和洋行該行又賣與

三菱公司所稱盛宣懷擅賣自是傳聞之誤上海道不允稅契亦無其事又原奏與岑春煊合買上海之蘇州河地畝甚多及合置崑山縣田恃勢抑勒民怨沸騰一節查蘇州河在上海英美租界之閘地勢綿長價極昂貴道署契冊各業戶均由洋商掛號未見有盛宣懷與岑春煊購置產業崑山縣在蘇州之東向多荒地有人集股收買設立墾牧公司岑春煊入股無多盛宣懷未經合股其地購自客民非買諸土著皆按市價交易民間無控告之案自無恃勢抑勒情事臣查招商局創始於同治十一年其時屢受外人跌價傾擠前北洋大臣大學士李鴻章遴派盛宣懷殫力經營著有成績該局成本官款商款兼收並蓄議者見局面恢闔地價翔貴不無致疑究竟該局係商業性質出納款項購置房產皆待局董股東商議乃定倘盛宣懷一人專斷罔利於己貽禍於公衆

股東耳目昭然斷無緘默自安甘受剝削之理盛宣懷才長肆應經手事繁百密一疏詆譏難免若有意擅售公地可以信其必無所有違

旨密查商約大臣被參各款緣由謹恭摺具陳伏乞

皇太后

皇上聖鑒訓示再此案款目轉轉輾轉調查致稽時日合并聲明

謹

奏

勒拿戕官兇匪片

光緒三十四年七月

再前據統領兩淮緝私營總兵李定明代理海州直隸州知州謝元洪先後電稟五月二十日定字右旗管帶外委陳有才查得橫溝地方有匪徒張萬銀王其官等窩聚率帶營勇數名親往搜緝

該匪等逃入孫家圩內陳有才當先追捕被匪由牆隙放槍中傷倒地旋即身故勇丁飛報相距十餘里之江北巡防營相距三十餘里之定字旂馬隊各派弁勇前往查捕匪已挖牆逃走等語當經臣飭派江北營務處道員沈佺馳往查辦並將失於救護之勇丁劉懷玉王貴臣殷家富三名發交沈佺審辦一面嚴飭地方文武懸賞購線勒拏兇匪張萬銀等務獲嗣據沈佺將案情查明先行稟復與原報尙屬相符並據署海州營參將戴鶴松會同謝元洪電稱線兵薛從繪沈保傾派往探匪被張萬銀等殺害等情復經加懸重賞飭令嚴拏並商由署江北提臣徐紹楨加派馬隊統領蓋占魁前往會緝拏獲夥犯路五楊小方李小老三名並窩戶楊守茂一名飭由沈佺提訊懲辦其疎於防範之江北巡防隊哨官劉玉廷盛德明哨長何之銘並飭先行撤差看管聽候查訊定

字旂馬隊哨官王輔臣王正綱王春生先行記革仍責成地方文武將匪首張萬銀等按名勒限緝拏並派沈佺認真督捕倘日久無獲卽將承緝員弁從嚴參辦臣復查海州幅輿遼闊伏莽素多陳有才驍勇邁倫素以善捕著稱前以外委末弁拔委定字右旂管帶本爲破格獎擢俾盡其才到營以來屢獲要案均經隨時懲辦匪黨畏之如虎銜之次骨此次竟因奮力捕匪致被暗槍戕斃實可惋惜除飭由兩淮鹽運使籌給撫卹銀兩俾資喪葬外合無仰懇

天恩俯准敕部從優議卹以慰幽魂謹會同江蘇巡撫臣陳啟泰署江北提督臣徐紹楨附片具陳伏祈

聖鑒謹

奏

保獎製造局人員摺 光緒三十四年七月

奏爲江南製造局得力人員擇尤保獎以勵人才恭摺具陳仰祈
聖鑒事竊維強國首在練兵而練兵尤重製械軍器專門之學中
國甫有萌芽培植人才洵爲急務江南製造局設立上海逾四十
年所製槍礮藥彈較之從前確有進境以視西國媲美尙難雖因
財力未能擴充亦由鼓舞之方尙有未至臣自抵任後迭飭該局
總辦力圖整頓近來槍礮子藥鍊鋼等廠成效昭然其辦事勤奮
各員非久留職守難望推陳出新非激勸從優難免半途易轍際
此局款支絀動多限制縱厚頒餼廩未易一概從豐各該員平日
奔走指揮異常勞瘁薪金以外別無希望虛詞獎勉有時而窮是
以歷練稍深講求有得者輒思他往乏術羈縻自非擇尤獎勵無
以收因材器使之效茲查該局在事各員江蘇試用知縣劉原道

任事實心不避嫌怨操守廉介宿弊一清擬請以知縣不論繁簡缺出准予請補揀選舉人劉文煜才識敏練因應咸宜擬請以知縣選用江蘇補用知縣翟佩鐸潔已奉公綜覈精密擬請以直隸州知州仍留原省補用江蘇試用縣丞陳本端供差二十餘年穩練勤能著有成績湖北試用府經歷諸炳星究心利弊勤慎從公均擬請以知縣仍歸原省補用縣丞銜江泰初心思靈敏條理井然擬請以縣丞不論雙單月選用學生郎思謙明習機算資藝並深擬請以從九品不論雙單月選用據總辦江南製造局存記道張士珩詳請奏獎前來臣復加察核劉原道等七員咸規畫有方辦事切實或洞悉款要學識精深均屬卓著辛勞歷久不懈洵屬最爲得力之員合無仰懇

天恩俯准照擬給獎實於製器儲材不無裨益除飭取各該員履

歷咨部查照外所有江南製造局得力人員擇尤保獎緣由謹會
同江蘇巡撫臣陳啟泰恭摺

奏陳伏祈

皇太后

皇上聖鑒謹

奏

日本贈送寶星請

旨片

光緒三十四年七月

再前准駐滬日本總領事文稱奉其本國君主之命以前次日俄
戰事中國辦理中立所有在事出力之總理南北洋海軍事務廣
東水師提督薩鎮冰升任江南蘇松太兵備道袁樹勳均頒給二
等旭日勳章又道署繙譯官三品銜江蘇儘先補用知府萬鍾元
頒給五等旭日勳章南北洋海軍中軍劉傳綬頒給六等旭日勳

章以誌勳績等情當經轉行知照在案查中國官員遇有他國贈送寶星應否收受向係請

旨遵行此次日本贈給該員等旭日勳章內除現任山東撫臣袁樹勳業經自行陳請又海軍中軍劉傳綬係由北洋大臣轉發領受外茲據薩鎮冰萬鍾元先後呈請具奏前來應否准其收受佩帶恭候

命下欽遵轉行遵照除咨部外謹附片具陳伏乞

聖鑒訓示謹

奏

緝匪誤斃多命定擬片

光緒三十四年七月

再去年蘇浙梟匪勢甚披猖經臣調派寧軍三十五六兩標會同各營在楓涇奮擊大勝殲斃匪首夏竹林及悍目多人並派督辦

蘇松太杭嘉湖緝捕清鄉事宜江蘇藩司瑞澂督飭拏獲余孟亭江北阿四李能掌等審明懲辦餘黨四散匪勢遂衰業經迭次奏陳嗣三十五標第一營在新陽縣夏家橋地方查緝梟匪誤將聚賭之王虎金等槍斃當經飭派常鎮通海道劉燕翼憲兵司令官候選道陶駿保松江府知府戚揚提案審訊並將大概情形電達陸軍部在案茲據劉燕翼等審明議擬前來臣復加查核緣楊耀南係江南將弁學堂畢業生給有五品頂戴承充甯軍步隊三十五標第一營管帶光緒三十三年十二月因蘇浙梟匪滋事奏派楊耀南率領本部營隊駐紮太倉州沙溪防緝陳漢卿籍隸鹽城縣本年投入該營充當眼線陳伯仁王良江均係該營排長二月二十一日楊耀南因據陳漢卿報告蓬萊鎮梟匪窩聚帶隊往拏梟已逃逸旋據陳漢卿報稱新陽縣境內夏家橋賭場有梟匪渠

魁董道奎等在內楊耀南再令續探覆稱親見董道奎等尙在賭場楊耀南卽帶同陳伯仁王良江及兵士二十名前往圍擊行至賭場左近令陳伯仁率兵五名同陳漢卿入內餘兵在外埋伏接應該處賭場係王桂山所開同賭者約四五十人一見兵至紛紛驚起推倒後牆逃走在外埋伏之兵因聞牆倒聲厲疑有梟匪拒捕開槍攔擊致將王虎金項均培陶煥章王銀福葉惠成王巧和沈國成王紀生當時中傷身死張阿二張鳳山張阿梅錢福堂趙星根玉福南受傷回家內張阿二張鳳山兩人越日因傷身死另有蔣遠一名因驚殞命拏獲方阿敖唐靜波蔣季良曹建良方梅生史阿銀朱瑞生趙再生李阿貴杭阿榮陳蘭生王寶祥等十二人卽經督辦瑞澂委員查得開賭之王桂山被殺之王虎金等拏獲之方阿敖等均係平民並無梟匪在內必爲眼線所誘電經

飭派前署第九鎮統制官徐紹楨前往復查無異將楊耀南撤差
提案來省訊悉前情伏查梟匪蹤跡詭祕夥黨衆多每藉賭場爲
聚集之所臣前在署蘇撫任內治梟有效卽從辦賭入手至寧軍
遠道防緝人地生疎不能不憑眼線探報以爲鄉導此案管帶楊
耀南先據眼線陳漢卿報稱夏家橋賭場有梟匪董道奎等在內
仍令再探辦理不爲不慎迨據續報始行派隊圍拏詎仍槍斃平
民多命查已死之王虎金等同場聚賭雖均係有罪之人而查明
並非梟匪究無應死之罪是此案誤於陳漢卿探報不實毫無疑
義應請將陳漢卿以軍法從事以昭炯戒管帶楊耀南誤用眼線
致斃多命咎無可辭應請革去五品頂戴與同往之排長陳伯仁
王良江各予監禁三年同往之兵士有服命令之義應從寬免其
置議方阿敖等聽從同賭罪有應得均飭照例發落開賭之王桂

山仍飭勒拏務獲究辦已死王虎金等分別給予葬費以示體恤
該標統帶蕭先勝另駐松江相距甚遠應請免其置議所有查緝
梟匪誤斃多命審明定擬緣由謹會同江蘇巡撫臣陳啟泰附片
具陳伏祈

聖鑒謹

奏

辦理農業試驗場摺

光緒三十四年七月

奏爲江南實業學堂附設農業試驗場謹將辦理情形恭摺具陳
仰祈

聖鑒事竊維世界各國無不以重農爲立國大計中國地處溫帶
爲天然農國祇以有農事而無農學新法新理不知研究以致棄
貨於地百產日絀工商之業因之不進兩江地方肥沃米穀之利

甲於他省光緒三十年就舊有之江南格致書院改設農工實業學堂附設農業試驗場一所創辦之初僅地二十餘畝臣到任以來深念農爲本富非加意振興不足以收實效續購距實業學堂相近之地一百六十畝合計一百八十畝遴選諳練農務人員委令辦理計試驗之事分三種曰水田試驗曰陸田試驗曰木框試驗試作之事分六種曰普通作物如穀菽之類是曰特有作物如麻煙草之類是曰蔬菜曰果樹曰有用樹木曰草花所有實業學堂農科學生均常川赴場考驗另招僱農夫頭二人農夫二十人以田家青年子弟充當月給工食銀四兩半日教授半日耕種以一年爲畢業期限學成之後更番招集但使農學知識普及民間耕夫所獲增於往昔不獨物產可以日益卽游惰亦願歸農富強要圖實無逾此所需常年經費由財政局牙帖捐振捐項下按月

撥解銀三百兩嗣以經費不敷又加籌銀一百兩綜計每年所撥官款共需銀四千八百兩當此款項支絀之時惟有撙節核實督飭該堂員司認真經理以副

朝廷振興農學至意所有實業學堂附設農業試驗場緣由謹恭摺具陳伏乞

皇太后

皇上聖鑒訓示謹

奏

創建圖書館摺

奏爲江寧省城創建圖書館以惠士林恭摺仰祈

聖鑒事竊維強國利民莫先於教育而圖書實爲教育之母近百年來歐美大邦興學稱盛凡名都巨埠皆有官建圖書館閱博輝

麗觀書者日千百人所以開益神智增進文明意至善也臣奉使所至覽其藏書之盛歎爲巨觀回華後敬陳各國導民善法四端奏懇次第舉辦而以建築圖書館爲善法之首仰荷

聖明采擇飭議施行伏念中國開化最先文物茂美自兩漢以來藏書之盛官私譜錄史不絕書然東觀蘭臺大抵珍儲天府至於郡縣圖書罕聞官立元之九路明之南監但有刊書之功仍非儲書之地我

高宗純皇帝宏規大起

特勅於江浙地方建立文宗文匯文瀾三閣盡出

四庫之藏以惠東南人士而揚州鎮江得其二由是江左學風冠冕全國

右文之化謳詠至今臣謬膺重寄日夜以興學育才爲急遠稽

聖朝之家法旁摭列國之良規夙所敷陳敢不力求實踐江寧爲省會重地自經粵匪之亂官府以逮縉紳之家藏書蕩然承學之士將欲研求國粹揚挖古今輒苦無所藉手爰建議於城內創立圖書館舊時揚鎮兩閣

恩賜祕籍久罹兵燹擬卽設法傳鈔次則

四庫未收之書以及舊槧精鈔之本兼羅並蓄不厭求詳至於各國圖書義資參考舉凡專門之藝術哲學之微言將求轉益多師宜廣徵書之路惟是購書經費所需較巨亟應先立基礎徐議擴充適有浙中舊家藏書六十萬卷出售已籌款七萬三千餘元悉數購致此外仍當陸續採購務臻美備並由臣延聘四品卿銜翰林院編修繆荃孫爲圖書館總辦檄委前江浦縣教諭陳慶年爲坐辦候補同知琦珊爲提調其司書編校各員均經分別委派購

到書籍先行借地儲藏一面於城北清曠地方相度建築但求規
制合宜工程堅實無取華侈藏書及觀書章程已飭妥爲商訂其
購書建館經費員司薪水雜支均由臣飭財政局籌撥的款核實
動用事關輔助教育應請作正開銷所有江寧省城創立圖書館
緣由除咨部外謹會同江蘇巡撫臣陳啟泰恭摺具陳伏乞
皇太后

皇上聖鑒訓示謹

奏

請將候選中書革職片

光緒三十四年七月

再本年四月間據蘇松太道蔡乃煌電稟訪聞有華人楊姓私向
吳淞營弁說合擬購營廠官地希圖轉售外人情事請飭查辦等
語當經臣分電嚴飭福山鎮總兵徐傳隆狼山鎮總兵李祥椿分

別確查據實呈復去後旋據該鎮等先後呈稱吳淞口內引翔港向有外海六營船廠基地一處名曰軍工廠建有船塢及修船房屋從前基地本止一百六七十畝迨後江邊灘地逐漸漲高亦成基地現在總計有二百六七十畝三月間曾有職商藍翎同知銜候選中書科中書楊梓以創興實業試辦種棉爲辭稟稱自置有地與營廠基地鄰近因不相連屬願與該營按畝掉換造還船塢廠屋並另報效銀壹萬兩等語經李祥椿札行外海六營確查有無窒礙及該商有無私與外人合股另謀別業情弊六營並未稟覆該職商復向吳淞營參將張炳泉央懇說合事成許另酬各營銀萬餘金張炳泉雖未代爲營謀然竟祕而不宣並不向該管上司據實舉發以致外間人言嘖嘖迨經奉飭嚴查始據將實情傾吐實難保無貪利朦混自便私圖之意呈請核辦前來臣查近來

各處奸民多有句串外人私買基地膠輻紛紜動啟交涉今職商楊梓陽以興辦實業爲名竟敢挾賄鑽謀營廠官地冀遂狡圖居心尤爲詭譎若不加以懲處不足以儆效尤除吳淞營參將張炳泉已另案參革免再置議一面由臣嚴飭外海六營將軍工廠基地勘丈實在畝數繪圖立石永遠不准私行出售外相應請

旨將藍翎同知銜候選中書科中書楊梓卽行革職以示懲儆謹附片具陳伏乞

聖鑒謹

奏

設立調查局片

再欽奉

懿旨著各省設立調查局由該管督撫遴委妥員按照

奏定章程切實經理等因欽此並准憲政編查館咨行調查局辦事章程臣遵於江甯省城設立調查局遴委江南鹽巡道榮恆候補道王燮爲總辦先行咨館查照復經加委會辦提調以及法制統計兩科科長股員飭令遵照館頒章程認真經理伏念調查局之設事理繁蹟歐美各國於審查統計之法研析至精學有專科不容鹵莽中國此項人才尙苦缺乏臣現飭該局員等先行調查省城官署局所各項事件以次推及於各屬至於地方風俗習慣萬有不齊猝難條貫當先飭各屬養成調查之人才各以本籍之士紳任本籍之采訪而省局總其成庶幾蒐討得實理董有資其統計表式尙未准憲政編查館頒行臣飭局粗擬表式發交各屬作爲試辦仍俟奉到館頒表式再行遵照辦理事屬草創臣諄諭局員先以實事求是爲主凡各處覆到文冊有涉敷衍搪塞者卽

予駁回另造有延不具覆者臬由臣量予懲處期仰副

朝廷整齊政俗脩明法典之至意此項調查局開辦經費約需銀一千餘兩逐月額支約需銀二千餘兩均飭財政局籌款動支應請准其作正開銷謹附片具陳伏乞

聖鑒謹

奏

改編長江要塞摺

奏爲改編長江要塞擬請扼重江陰并懇飭籌的款以資開辦恭摺仰祈

聖鑒事竊查防務要塞各國皆區分爲二建威銷萌以有備爲無患是之謂防務設險守國以全力注一隅是之謂要塞要塞之義兵學家所謂重地大易所謂地險大塊資我守禦者也近來武備

學中已自成一種專門獨立於尋常防務之外編制之法皆極祕
密局外無從窺探邇來創辦新軍取法東西洋制度惟要塞尙未
講求不免缺略查東南內地之防自以長江爲門戶古來天塹之
說久不足憑卽前數十年所設之防至於今日因江面形勢之變
遷與火器輪舶之行步合用者少臣履任後兩在長江下游閱視
並迭次委員悉心考察防地形勝與防禦情形并飭研究改良辦
法迭據繪圖貼說稟覆前來臣詳加考究復與陸軍部一再函商
酌定辦法查長江現設防地爲甯鎮澄淞四路均屬險要所在惟
礮臺之位置與礮位之式樣在一二十年以前均尙合用今則武
學日有進步防守因而愈難備多力分不如扼要固守是要塞之
設置實爲萬不可緩之圖考各國要塞分類有三曰口岸礮臺曰
陸地礮臺曰半陸礮臺其築法亦有三曰永久築城曰半久築城

曰臨時築城以甯鎮澄淞四路之形勝而論其於要塞資格均尙
脗合惟處處設置無此財力於四路之中選擇最優形勝莫如江
陰以位置論非港非陸實爲天然半陸之險以形勢論山勢起伏
江面較狹敵不能方舟而進我可以三面環攻正不妨採用永久
主義永久主義者本天然之險要加以人力工程士氣與壁壘同
堅建築與河山並固是曰永久今擬全臺布置分爲永久建築與
臨時建築兩種臨時建築者視敵之所嚮隨時隨地以施工事者
也永久防禦之地帶則東西二山自成主綫臨時防禦之地點則
馬鞍山黃山蕭山一帶豫想戰時情況可定爲副綫他若雷電橋
梁鐵網梅樁之屬防禦工事籌備宜精行軍電綫行軍鐵路一切
交通機關儲材宜豫則要塞工程隊不可不設以攻爲守扼敵於
臺礮未及之前先發制人蹙敵於既已登陸以後則重礮隊不可

不設擬編制臺礮兩營重礮隊一營附以要塞工程一營合爲要塞一標現在要塞營制未奉頒發暫遵

奏定野戰礮隊章程稍事變通務求一律擬定每營三臺每臺之中備礮若干尊以及臺之內容暫時未便豫定俟將來布置既定再由臣隨時密陳至各臺不敷礮位姑擬用甯鎮淞三路礮臺所有及製造局所儲之各式新礮每臺以同式同口徑者酌量分配惟重礮一營礮車器具均須另購至工程一隊已由臣就舊有澄淞鎮水旱雷營歸併裁改編爲要塞工程四隊定以兩隊專治要塞工事一隊專治水雷一隊專治旱雷仍令互相兼習以期調遣靈活其淞鎮甯三處臺壘一俟江陰要塞編成臺勇可以全裁餘存舊壘卽責令陸軍戍守藉備不虞惟是要塞重地既定於江陰則長江命脈卽係此要塞一切建築不可不採用新式以求宏大

堅實他如修築臺壘選購礮械改造兵舍籌辦交通以及推廣要地儲備工程用物與夫臨時防禦之材料無一不當厚集其力以期有恃無恐約計所費在百萬以外現就縮小辦法樽節核計非有的款五十萬兩不足以資開辦江南財力萬分支絀豈能籌此鉅款而時事日艱防務刻不可緩惟有籲懇

天恩飭下度支陸軍兩部會同覈議將所需開辦經費分別籌撥的款以資應用至於常年經費當由臣會商沿江各督撫臣公同籌任隨時接濟江陰爲五省門戶所繫沿江各省利害相同各疆臣公忠體國內固吾圉外顧大局知必有樂於贊助者如能款項應手則立時可以舉辦將來財力稍紓臣仍當隨時推廣按照完全要塞規制逐漸經營妥備以仰副

聖主鎮定東南慎固江防之至意所有改編長江要塞請撥的款

以資開辦緣由是否有當理合恭摺具陳伏乞

皇太后

皇上聖鑒訓示謹

奏

請派員監視要塞工程片

再各國於尋常要塞每以就近之師團長統之若屬於海岸防禦地綫則由海陸軍部大臣會同主持江陰地點雖不濱海而其性質則全屬於海防實與尋常要塞不同現暫由臣經營布置將來必須歸部主持且近來築城之學隨兵器學以進步幾於日新月異而歲有不同南洋軍界中人具要塞學之普通學問者頗不乏人以此辦理建築事宜尙堪勝任惟新法新理研索難窮陸防海防關繫綦重茲事如蒙

欽定大清會典事例 卷一百一十一
二五十一
俞允施行應請

旨飭下陸軍部遴派要塞專門人員前來南洋監視此項工程以昭慎重而期周妥相應附片陳明伏乞

聖鑒訓示謹

奏

謝 賞江綢庫緞摺

奏爲叩謝

天恩恭摺仰祈

聖鑒事竊臣於光緒三十四年九月初一日齋摺差弁旋甯奉到

恩賞江綢庫緞共四匹當卽恭設香案望

闕叩頭祇領伏念臣忝領兼圻未酬寸效惟慄素絲之節免貽赤

芾之譏茲復

恩重授衣

寵邀賜錦頒到

璇宮機杼幸承

華袞之榮褒拜來

丹陛絲綸益仰

垂裳之盛治累膺

殊錫倍篆微衷臣惟有取戒鵜濡程能蠶績五采以觀其象有慚

作服之才一夫或受其寒願體同裳之義際此衣冠萬國羣欽

帝德於文明庶幾襟帶三江共被

皇仁於樂利所有微臣感激榮幸下忱謹恭摺叩謝

天恩伏乞

皇太后

皇上聖鑒謹

奏

請給領事寶星片

光緒三十四年八月

再查德國駐滬副領事兼會審署陪審官師謀在滬有年凡遇中德交涉事宜無不持平辦理其於會審事務與歷任各解員及與上海商會交涉亦均能和衷商辦並在上海創辦德文醫學教授華人德語二者尤與中國學界前途甚有裨益又本年三月初八日德國亨寶公司輪船桑比亞號由日門司地方開往上海在長江口附近遇有中國大漁船遭災破壞經桑比亞船主米樂爾大副郎爾冒險奮勇竭力拯救當將該漁船被難之十五人全數救起得慶更生實屬尙義好仁不分畛域以上三員均應照章獎勵合無仰懇

天恩俯准將德國駐滬副領事師謀賞給三等第二寶星德國亨寶公司桑比亞號輪船船主米樂爾大副郎爾均賞給五等寶星以示獎勵除咨外務部查照外理合附片具陳伏乞

聖鑒訓示謹

奏

皖省榨油公司立案摺

光緒三十四年八月

奏爲皖省內地華商創設機器榨油公司酌定完納稅釐章程咨部立案恭摺仰祈

聖鑒事竊照光緒二十五年經前總理衙門奏准酌定機器製造貨物稅餉一案聲明機器製造之貨均於離廠之先仿照洋貨進口例征收值百抽五之正稅再加征一倍以抵內地釐稅統計每值百兩征銀十兩此後無論運往何處概免抽收以稅課之所盈

補釐金之所絀等因通行在案茲據安徽潁州裕興機器榨油公司總理農工商部議員程恩培稟請援照總理衙門奏案將該公司機器製造之豆餅豆油遵章在出口之鎮江關豫完值百抽十之正稅加稅報明石數請領鎮江關護照雇用民船由內河裝運赴鎮江出口沿途經過內地常關釐卡懇免予重征等情核與成案相符自應照准惟查前總理衙門原奏係指在通商口岸設立機廠者而言且事在光緒二十五年其時尚未有加稅裁釐之說嗣與英美日本等國議訂商約均聲明中國裁撤內地釐金則洋貨進口稅可加抽至值百抽十二五以資抵補此議雖尚未實行而將來實行此約後則在中國設廠用機器製造貨物之稅項必加至值百抽十五方與原奏之意相符今裕興公司遠在潁州距出口之鎮江關遙遙千里若僅在該關豫完值百抽十之正稅加

稅而於經過江皖兩省常關釐卡應收稅釐概致無著揆諸情勢不免窒礙難行茲經酌量變通剴切勸諭該公司於報明出口運銷外洋之豆餅豆油豫領鎮江關護照者令統完值百抽十五之稅擬以一成撥抵皖省淮北兩道之釐金以二成撥抵鳳潁常關之正稅以一成撥抵江北漕捐兩道之釐金以二成撥抵淮安關之正稅以二成撥抵甯屬七道之釐金以二成撥抵揚由關之正稅以五成報完鎮江關出口之正稅共合爲值百抽十五之數查海關稅則每豆餅一石估值銀七錢值百抽十五每石應完銀一錢零五釐每豆油一石估值銀六兩值百抽十五每石應完銀九錢均照關平足銀核計應繳皖省者由鳳陽關統收分解應繳江省者由鎮江關統收分解此外一切雜捐陋規使費概行豁免經過沿途關卡一律驗照放行不准留難需索以恤商艱至該公司

運銷本國內地各處之餅油並無鎮江關護照者沿途關卡仍各照向章征收稅釐以示區別並免他商販運土製餅油者之藉口似此變通辦理在該公司完納稅項似已過重值此財政支絀之際釐金常稅勢不得不並顧兼籌而較諸逢關納稅遇卡抽釐亦尙爲輕減故該公司亦甘願遵從惟該公司完此極重之稅實爲向來機器製貨公司所未有該職商深明時局藉以外樹風聲爲他日杜漸防微之計其意有足多者至正稅外一切雜捐浮費自當蠲除淨盡俾免過於偏枯此項專章如蒙
俞允應候奉

旨之後通飭各該關局一律遵行除分咨度支部稅務處查照立案外理合恭摺具陳伏乞

皇太后

皇上聖鑒訓示謹

奏

織呢請免重徵片

光緒三十四年八月

再職商樊棻葉璋等在上海創設日輝織呢廠上年經臣附片奏明在案現據該職商等稟稱廠屋落成開機在即急須豫籌銷路俾出貨後可暢行無阻所有應行完納稅釐擬援照上海湖北織布局成案辦理在上海本地零售免完稅釐如運往內地及分運通商他口轉入內地者均由上海關完一正稅概免沿途內地稅釐期得暢銷懇請

奏咨前來臣查光緒八年上海初設織布局前北洋大臣大學士李鴻章奏明在上海零星銷售照中西通例免完稅釐如運往內地照洋布花色在上海新關完一正稅概免內地稅釐光緒十九

年湖北創設織布局經前湖廣督臣張之洞援照上海織布局成案籲請均經先後奉

旨飭部核准各在案近年督理稅務處大臣核定新章凡機器仿造洋貨均准於第一關卡按值百抽五收正稅一道沿途概免重徵藉以體恤華商振興實業現在日輝織呢廠用機器製造洋式氈呢冀杜漏卮事同一律合無仰懇

天恩俯准援照歷辦成案將上海日輝廠所出氈呢完納海關正稅後運銷各處免繳內地釐金其在上海本地零售者並予免稅庶幾商力稍紓利源漸擴除分咨農工商部暨稅務大臣查照外謹附片陳請伏乞

聖鑒訓示謹

奏

查明學堂借用祠宇摺 光緒三十四年八月

奏爲遵

旨查明江甯師範附屬小學堂等借用昭忠祠情形恭摺覆陳仰
祈

聖鑒事竊 臣承准軍機大臣字寄光緒三十四年七月初五日奉
上諭有人奏江甯師範附屬小學堂等借用昭忠祠屋宇請飭擇
地遷移一摺著端方按照所陳各節查明情形酌量辦理原摺著
鈔給閱看欽此遵

旨寄信前來當經欽遵轉行查核辦理去後茲據署江甯布政使
陳伯陶署江甯提學使李瑞清詳稱遵查鈔發原奏兩江師範附
屬小學堂等借用昭忠祠宇將其舊制半多拆改以致春饗秋祭
幾不成禮等語伏查兩江師範附設中小學堂原爲本堂畢業生

實地練習而設昭忠祠與該堂毘連前經將備學堂等疊次借用該堂援例稟請前署督臣周馥批准借用西偏屋宇嗣又將東偏花園屋宇借用凡祠內頽敗之處均經補葺完善規制一仍舊貫每屆春秋饗祭則先行讓出以昭誠敬不特不至如原奏所云無以成禮卽與祭者餽餘宴飲亦無所礙江甯士紳咸共聞見惟借祠興學本以財政艱難不得已一時遷就今尋繹原奏實係爲慎重祀典起見自應遵辦擬先設法將講堂之借設在各神宇者一律遷讓其餘旁屋仍暫借用一俟司局籌有款項估造校舍自可將祠宇全行讓出報忠興學庶幾兩全等情詳請覆奏前來查昭忠祠爲崇祀忠義之所光緒三十二年諭旨以忠君尊孔尙公尙武尙實爲教育宗旨該校借用祠宇學子莘莘沐浴忠義遺風忠

君愛國之忱不難觀感興起於教忠之道不爲無補惟是該中小學迭次推廣雖經借用全祠尙苦不足現又讓出正屋僅借旁屋校地尤形逼促自以籌款先建中學校舍爲宜俟財力稍紓再行籌建小學校舍以爲全將祠宇讓出之計所有遵查兩江師範附屬小學借用祠宇緣由理合恭摺覆陳伏乞

皇太后

皇上聖鑒訓示謹

奏

辦理初級師範學堂摺

光緒三十四年八月

奏爲江甯省城辦理初級師範學堂現在情形恭摺具陳仰祈聖鑒事竊維教育普及之基以多設小學堂爲要義小學堂教員應以初級師範畢業生充當甯屬初級師範學堂創辦於光緒三

十二年其大概情形當經前署督臣周馥於縷陳近年辦理學務摺內奏明在案該堂辦法係將原有之江甯師範傳習所改設并將原有之算繪學堂酌量併入額設本科學生二百人四年畢業分四年收足別設簡易科每年收學生一百人一年畢業俟敷派用卽行停收專辦本科初級師範學堂應遵照部章每州縣各設一所其時各府初級師範尙未議辦江甯府又爲省會重地不得不兼籌並顧故所有學額議以江甯府獨得五成外府州縣合得五成其開辦經費係由籌款局撥銀八千兩應用常年經費議以傳習所原定之款銀二萬三千九百餘兩及算繪學堂新舊籌定之款銀五千九百餘兩撥用所有教科及管理事宜悉照奏定章程辦理此該堂開辦時之詳細情形也臣到任之初適值該堂招考足額修葺完竣深惟教育普及爲當今第一要圖初級師範學

堂專爲養成兩等小學教員而設辦理稍有不善則有名無實成效難期屢經檄飭該堂監督候補道梅光遠按照定章切實經理冀廣師資而祛流弊計自開校以來已歷第五學期現在正科已招三班計共學生一百四十餘人又簡科第二班學生四十餘人臣隨時蒞堂察看尙能安分向學不惑歧趨將來充當教員必能勝任於教育普及之方實屬有所裨益所有簡科第一班畢業學生業已飭回本籍充當教員以符定章該堂額支經費除將原撥各項隨時動用外每年額支及活支用項尙不敷銀六千餘兩經臣檄飭財政局撥用均請作正開銷除咨部外所有甯省辦理初級師範學堂緣由理合會同江蘇巡撫臣陳啟泰恭摺具陳伏乞皇太后

皇上聖鑒訓示謹

奏

模範小學辦理情形片

光緒三十四年八月

再江甯省城設立兩等小學堂四所以爲各小學模範當經前署督臣周馥於縷陳近年辦理學務情形摺內奏明在案該學堂開辦緣由係因江甯一省官立私立小學爲數雖多於形式精神大都未臻完備設立模範小學以爲標準則已有學堂之地可望改良未有學堂之區更易仿立其學舍之建造期合於管理及衛生事宜教授訓練方法則師日本尋常高等小學之所長而參以本國道德及地方風俗人情之所宜校長及教員以留東速成師範畢業生爲合格復於第一所中設立教員研究所以爲四所教員研究教授統一之地計自光緒三十二年十二月起四校陸續開學按學期添招新生現在共有高等生一百六十餘名初等生一

百二十餘名所有教科及管理事宜悉遵照部章辦理并檄飭候補道梅光遠爲總理以專責成該四校購地建築開辦經費共銀一萬八千餘兩由前署督臣周馥飭由籌款局撥用常年經費計四堂共銀一萬一百餘兩由臣檄飭財政局撥用該校設立以來規模完備進步頗速省內外各小學亦能相觀而善逐漸改良辦理已著成效所有各項用款均經臣飭令該總理樽節支用核實造報應請作正開銷除將詳細章程咨部外理合會同江蘇巡撫臣陳啟泰附片陳明伏乞
聖鑒訓示謹
奏

端忠敏公奏稿卷十二終

二二二

端忠敏公奏稿卷十二終

端忠敏公奏稿卷十三

杜官虧而重吏治摺 光緒三十四年九月

奏爲甯蘇兩省州縣賠累日深擬請上下兩忙地蘆各款改爲徵銀解銀另收公費以杜官虧而重吏治恭摺會陳仰祈

聖鑒事竊惟官不容貪貪則厲民官不可窮窮亦害事疆臣所以能奔走羣僚責其盡心民事力行新政者祿足以養之故也近年蘇屬各州縣因銀貴錢賤賠累不支迭經臣等奏請將忙銀錢價酌增或改爲徵銀解銀另收公費或請每兩加錢二百文臣知各州縣實係賠累准從每兩加錢二百文之議爾時銀價可合錢千六百文不意近來繼長增高每銀一兩須合錢一千九百文上下是奉部核准之二百文加如未加各屬之苦累如故甯屬原定銀價稍寬上年故未議及今銀貴錢賤至於此極以致江北州縣

其賠累與蘇屬等迭經全省牧令合詞呼籲列表臚陳計收錢解銀每兩已不敷錢十餘文而辦公經費尙全然無著若銀價再昂賠貼直無底止向來著名優缺以糧額多故贏餘多今則反是大缺大賠小缺小賠委檄一下其前甘之如飴者今且畏之如酖在任各牧令入款已竭而支款如故前者酌提中飽以濟餉需今飽者飢矣而提款如故遂致應解者不解當交者不交窮員固自毀其家司庫亦實受其累官場局面至此實爲從來所無夫以子弟讀書尙資膏獎馬牛負重必具芻茭今以親民之官責以撫字責以催科責以攤捐責以聽訟並責以一切應辦之新政而坐視其不名一錢其家不能贍而欲其盡心民事固理之所無其用本不足而猶曰提其有餘亦言之不順候補者無復後望現任者各懷退心將何以策勵羣材修明庶事此臣等所以日夜焦思不能不

早爲之所也查向章上下兩忙本係徵銀解銀同治初年前督臣曾國藩撫臣丁日昌奏改徵錢解銀寬定錢價每兩得餘錢六百文爾時銀價低而錢價高物價廉而用度省故州縣得此餘資無不一意辦公廉隅自飭今則一切反是州縣遂無從措手事有不舉爲上司者亦不能加夏楚於羸弱之徒而強之誦習施鞭策於飢疲之馬而勉以馳驅也欲求補救惟有規復同治以前之舊制所有甯蘇兩省地蘆等項正耗銀兩自本年下忙爲始一律改爲征銀解銀每兩隨收公費錢六百文規復抵解賠款錢二百文此外不准另立別項名目私取分釐及抑勒銀元不收銅元等弊一俟幣制劃一銀幣頒行其以銀計者卽收銀幣以錢計者卽收銅幣圓法無滯而辦公有資卽勻定公費酌籌久任亦皆可次第施行臣等身任封圻斷不忍多取民財市恩屬吏此一事研究數月

深知其有益於官無傷於農緣賦出於田同治間每米一石僅值錢三千文今已貴至七千文是公費賠款僅增八百之數而米價溢出四千之多出入相比多寡相衡民力之不至拮据斷可識矣地方明理士紳亦皆知民非官不治官非民莫養採之輿論均無異言若無缺不虧無官不窘勢必至庫款有征而無解政事有廢而莫興州縣者上下之樞州縣皆承其敝而帑藏得無虧民生得富庶者未之有也據甯蘇兩藩司先後詳請具奏前來臣等往復函商舍此別無善策惟有仰籲天恩俯准照議施行俾彌官虧而勗吏治除咨度支部查核外謹合詞恭摺具陳伏乞

皇太后

皇上聖鑒訓示謹

奏

臚陳賢吏政績摺 光緒三十四年九月

奏爲臚陳賢吏政績援案籲懇

恩施以振吏治恭摺仰祈

聖鑒事竊查江蘇江浦縣知縣鄺兆雷以卽用知縣分發江蘇於光緒三十年補授江浦縣缺三十一年四月到任首以宣通民隱爲務嚴懲痞棍約束書差民間控訴立時訊斷有美國牧師因堂產與民構訟一經訊結兩造翕服於民教輯睦絕少齟齬查拏盜拐多所破獲內外監獄尤注意清理遇有犯病捐資醫治三十二年秋間大水爲災米價翔貴奸民藉口時有搶米之謠該員開導彈壓一面督紳籌辦平糶是年各處搶米之案紛起而浦邑獨安靖如常嗣後辦理工振官款不足復捐廉以繼之此外如助設學

堂購置書籍並振興農工實業辦橋梁水利凡有益於民生者無不極意圖維力求實際方今時事日迫民困日深全在牧令得人方足以培元氣而固邦本江蘇吏治經臣等力加整頓其能自振作者固不乏人而該員實爲之冠伏惟政治之本在牧令而激揚之權在

朝廷查前安徽青陽縣知縣湯壽潛前台灣裁缺嘉義縣知縣鄧嘉纘前江西臨川縣知縣戚揚均以實缺州縣著有循績荷蒙聖恩破格擢用凡在臣僚莫不感奮該員鄺兆雷惻惻無華勞心撫字考驗成績參訪輿論實屬治行昭然不愧循良之選據署江甯藩司陳伯陶江甯鹽巡道榮恆會同學臬兩司詳請援案奏獎前來合無仰懇

天恩俯准將江浦縣知縣鄺兆雷破格錄用該員自當益加奮勉

力圖報稱實於振興吏治鼓舞羣材之道大有裨益所有臚陳賢吏政績懇請破格錄用緣由謹合詞恭摺具陳伏乞

皇太后

皇上聖鑒謹

奏

捕蝗淨盡歲收中稔摺

光緒三十四年九月

奏爲江北各屬蝗蝻一律撲滅淨盡秋稼已登歲收中稔恭摺仰祈

聖鑒事竊照江北徐海淮安所屬各州縣捕治蝗蝻情形業經先後附片奏陳並聲明嚴定賞罰以示勸懲各在案查本年五月間雨澤稀少海州灘地葦柴之內出有蝗蝻代理海州直隸州知州謝元洪督捕甚力已於六月內一律肅清此外銅山阜甯鹽城安

東桃源等縣亦各有蝻孽出土經該縣等捕買交施漸次淨盡惟徐屬與山東安徽交界各州縣時有飛蝗往來飭據徐州府知府田庚親往查勘始知出自山東魚台滕縣與沛縣交界之湖中該湖寬長各數十里葦草叢生一望無際亢旱日久蝻孽潛生地處荒僻居民甚少迨經趕捕而湖心草深之處蝻漸成蝗飛散各處以至沛豐碭蕭宿睢等州縣及山東安徽邊界各屬均有飛蝗停落當經電飭田庚督率各屬實力捕挖仍令設局收買優給錢文如因捕蝗踐毀之秋糧並准量予給價以示體恤所需經費均在積穀項下動支濟用且因節候已遲秋收爭此數日加派補用知府吳憲奎周歷各屬嚴切督查一面分電山東安徽兩省轉飭各屬會同捕治俾期迅速掃除旋據淮揚海道先後電報淮屬之清河山陽安東海屬之沐陽等縣亦有飛蝗過境又經電飭嚴密防

捕去後茲據田庚電稱徐屬蝗蝻遵經督率各屬並會同山東印委各員認真捕買刻已一律殲除禾稼登場歲收較之去年尤爲豐稔糧價平跌是其明證並據山東撫臣袁樹勛來電大致相同至清河山陽安東沭陽等縣蝗蝻亦已據報撲滅盡絕現在節近霜降正蟄蟲咸俯之時當不至於再有萌動復經委員分往查覆俱無異詞臣等伏查本年江北各屬蝗蝻或生於灘地葦柴之內或出於湖心叢草之中旋撲旋生多至十餘州縣迭經臣等嚴飭上緊捕買電檄交馳不遺餘力該府州縣等尙能不辭勞瘁親赴各鄉督率農佃等人實力捕挖並復不惜重貲厚價收買卒使苗禾毫無損傷耗費無多保全甚大現在秋收中稔糧價甚平連日得雨並可乘時種麥民情歡忭地方安靖堪以上慰宸厪至飛蝗停落處所遺子必多茲復責成各州縣設法搜挖以

弭來春之患其捕蝗得力各員經臣等分別酌給外獎俾示鼓勵
謹合詞恭摺具陳伏祈

皇太后

皇上聖鑒謹

奏

工振報銷摺

光緒三十四年九月

奏爲光緒三十一年蘇省松太兩屬風潮爲災辦理工振收支各
款繕具清單恭摺仰祈

聖鑒事竊照光緒三十一年八月初三初四兩日松江府屬之川
沙南滙太倉州屬之崇明寶山各廳縣陡起風潮災情奇慘經前
督臣周馥前撫臣陸元鼎先行電奏欽奉

懿旨賞銀三萬兩並復奏經部議撥給蘇屬漕北銀十萬兩並准

開辦沙洲賑捐附入江南工賑捐輸一起勸募彙辦嗣因工賑事竣由蘇州藩司詳請仍歸江甯司局造報又經轉飭遵辦去後茲據江南振務報銷處司道詳稱光緒三十一年蘇省沿海風潮之災以崇明爲最重川沙寶山南匯次之太倉鎮洋又次之各處淹斃人民多至二萬數千餘人房屋倒塌尤屬無算災民露宿風餐流亡滿野兼之崇明海塘全被冲壞此外塘工隄圩亦被冲坍不少誠爲從來未有之奇災幸賴

聖恩廣被撥帑截漕並開辦賑捐接濟先行分派委員查勘災情籌辦急賑死者給棺掩埋生者搭棚居住一面分別大口小口酌給錢文並因上海義紳辦賑向稱核實撥給款項彙同義賑散放急賑辦畢接辦冬春兩賑並散給棉衣袴以禦嚴寒海塘堤圩均爲田廬保障之資督飭紳董就地籌修由官酌貼經費以工代賑

災民咸慶更生不致流離失所綜計工振等項共支庫平銀二十一萬三千五百二十三兩五錢八分九釐除撥用

恩賞銀三萬兩截漕銀十萬兩又撥收江南沙洲振捐銀三萬八百六十九兩六錢折漕傾耗銀二萬五百三十八兩八錢三分一釐湖北振餘款銀一萬三千五百六十兩統共收庫平銀一十九萬四千九百四十八兩四錢三分一釐外實不敷庫平銀一萬八千五百七十五兩一錢五分八釐已由官紳捐助湊用清款所有收支各數由該司道詳細勾稽均尙符合查光緒三十二年江北水災辦理賑撫平糶工程三項先後詳奉開單奏報均奉

硃批該部知道欽此此案事同一律自應援照開單報銷免予查造細冊等情詳請具奏前來臣等復加查核造報收支各款委係實用實銷其中並無浮冒理合援案繕具清單恭呈

御覽謹合詞恭摺具陳伏祈

皇太后

皇上聖鑒謹

奏

密保將才片

再整頓營務首在將領得人現當伏莽未靖地方多事之時尤須隨時物色將才以收禦侮折衝之效臣於兩江所屬各員留心考察查有署壽春鎮總兵江蘇候補道陶森甲驍勇多謀治軍有律其雍容鎮定尤有古名將之風皖北民俗素強自該員委署鎮篆以來彈壓撫綏悉中肯要地方安靜輿論翕然又查有統領兩淮緝私各營前福山鎮總兵李定明威望夙著久歷行間委充緝私營統領督飭各營於緝私捕盜各事均能切實講求淮南淮北各

處疊獲要案梟匪潛踪尤著成效以上兩員臣於密保將才案內曾先後奏保現復一再考查實屬始終勤奮臣爲將材難得起見既有所知用敢據實密陳應如何擢用之處出自

鴻施謹附片具陳伏乞

聖鑒謹

奏

總兵請卹片光緒三十四年九月

再壽春鎮總兵董履高係安徽合肥縣人同治元年隨前直隸督臣李鴻章大營救援北新涇西江口等處出力賞給六品功牌是冬收復常昭兩縣城衝鋒陷陣首先登城厥功甚著嗣後隨同克復蘇常各府州縣城並攻克浙江楓涇西塘水陸各要隘調援截

勦無役不從以是得薦保遊擊並

賞戴花翎七年於隨同勦平任賴捻匪肅清案內保升副將九年六月前兩廣督臣張樹聲調赴山西保護河防並赴歸化包頭等處搜勦草地馬賊積功保以總兵補用光緒五年調粵差委歷統全州潯州各防營並署潯州協副將勦平鬱林大竹根積匪暨思恩逆苗保以提督

記名簡放並

賞給奇章伯巴圖魯勇號惟時法越事起該總兵督隊分紮甯龍州以顧關外大軍後路兼衛餉道旋進紮越南諒山省城復進駐屯枚連與法軍相遇該總兵督率士卒血戰數晝夜左骹被礮傷幾斷血流不止仍負創前驅在前敵各營號爲勇敢事定經前廣西撫臣李秉衡調署潯州協副將十二年經陞任兩廣督臣張

之洞奏免騎射歷委營務處軍械局統帶廣勝軍各差補廣西慶遠協副將復奏署新設廣西柳慶鎮總兵所在稱職中間因傷發回籍二十二年入都荷蒙

召見垂詢粵省軍務並受傷情形奉

旨發往北洋差遣歷補貴州鎮遠安義直隸正定江蘇淮陽各鎮缺在正定時值拳匪披猖民不聊生之際該總兵巡衛安輯勞瘁不辭尤屬難得經升任直隸督臣袁世凱奏留北洋差委署通永鎮總兵歷委練軍營務處統帶毅字馬步營各差紀綱嚴肅軍民悅服三十一年二月調補今職該總兵到任之後即將標防各營力加整頓以皖北民悍兵單又值淮水成災深慮伏莽伺隙嚴飭將校認真梭巡並輕騎減從鎮撫一切方在得力之時乃於巡視鳳陽泗水等處途次墜馬觸發舊傷請假調理由臣奏明准假並

委江蘇補用道陶森甲署理奉

旨允准在案該總兵回籍後多方醫治卒以從前受創過深元氣
難復日益增劇遽成不起竊惟時艱方亟宿將凋零非激勸多方
不足以振興士氣該總兵以百戰之餘膺專閫之寄其與法軍交
戰受傷情形曾荷

殊恩詢及並於歷次

覃施渥蒙

珍賞是該總兵宣力有年忠勇勞勩久在

聖明洞鑒之中合無仰懇

天恩俯准將已故壽春鎮總兵董履高照軍營立功積勞病故例
從優

賜卹以昭獎勸出自逾格

鴻慈謹會同安徽巡撫臣朱家寶附片具陳伏乞

聖鑒訓示謹

奏

撥款興修運河隄工摺

光緒三十四年九月

奏爲揚州一帶運河隄工險要逐細查勘分年撥款興修恭摺仰
祈

聖鑒事竊查運河隄工爲揚屬裏下河各州縣保障財賦民命關
係匪輕上年伏汛盛漲水勢積久不消待至秋後放壩東西兩堤
土埽磚石各工游蟄殘塌滲漏審潮非擇要間段修整若遇大汛
之時斷難防禦當經辦理隄工局道員會同淮陽海道派員逐段
查勘分別最要次要再次等三項工程核計極要各工內如高郵
汛通湖橋涵洞石工上年大汛疊次走漏岌岌可危幸隨時搶堵

得法始能無恙又高郵茶庵西堤碎石掣亂脫落損壞不堪該處逼近州城地當極要事後該州紳民咸汲汲以折建通湖橋涵洞及修補茶庵堤岸爲請勢難從緩現已提前修竣又郵工大壩係著名最險之處碎石坦坡均已掣亂而土工蟄矮尤甚必須培築土工加砌碎石又甘江汛小六堡正壩西北一面迎風犯浪坍塌最甚非急於補砌碎石坦坡難保無虞以上各工均係極要段落應分爲第一屆辦理又邵伯朱家巷石工坍塌損漏情形極險亟須添砌條石建築完固惟查存工條石堪備工用者不多若開山採購不獨用費浩繁亦且有需時日現擬改砌磚工做坯分窰定燒應用應分爲第二屆辦理此外高郵永安二汛西堤歷被風浪捲掣險工甚多勘明應修碎石工程計有三十一段共工長三千三十六丈除舊存碎石抵用外需添購碎石一萬一千餘方按照

碎石每方價銀五兩五錢核算需銀六萬兩有奇連同各工段工費併計共約需銀八萬七八千兩由局詳請奏咨立案並分年撥款興修前來臣復經派員前往詳細查勘據稱各段工程均係險要所需添購碎石亦應照數購存備用約計石價工需銀兩爲數亦甚核實等情查運河堤工歲修之款每年定以三萬兩爲額如遇水大之年另出險要各工准其添撥款項奏明辦理今江甘高郵永安各汛隄工險要既係萬難緩辦之工自應專案撥款興修藉資保障惟江南財政困乏未易猝籌鉅款除飭藩運道局各庫分作三年認籌以紓財力併飭堤工局道員督同在工各員隨時擇要陸續妥爲修固暨將用款核實造報外謹恭摺具陳伏乞

皇太后

皇上聖鑒勅部查照施行謹

奏

查明勳臣後裔摺 光緒三十四年十月

奏爲查明勳臣後裔援案籲懇

恩施恭摺具陳仰祈

聖鑒事竊 臣伏讀光緒三十四年五月初九日

上諭自成豐同治以來髮捻回各匪擾亂各省其文武大員勳績卓著者皆已懋賞酬庸或錫予爵職現計閱時已五十餘年各勳臣子孫其名位顯達者固不乏人而浮沈下位伏處鄉里者亦復不少方今朝廷保民綏邊銳意尙武聞聲思將彌念前勞當經諭令各省督撫各旗都統將勳績尤爲卓越諸臣後裔查明有何官職彙報等因欽此仰見

朝廷培植世臣策勵戎行之至意凡在臣僚同深欽感 臣伏查咸

同以來立功之臣驟難僂數求其勳績照爛不可磨滅者除
諭旨業經加恩諸臣而外以臣所知尙有前按察使銜候選道王
鑫由諸生與江忠源首倡以鄉勇殺賊是爲湘軍之始咸豐年間
洪逆肆擾東南兩粵土寇分竄湖南邊境冀與聯合時湘軍轉戰
江鄂王鑫獨以一軍專防南路崎嶇萬山之中大小數百戰不使
闕出湖南一步俾出援諸軍無返顧之憂厥功甚偉其後赴援江
西大捷十有二次以積勞病故奉

旨卹贈布政使予諡壯武又前候選同知曾國華於咸豐五六年
間逆匪石達開率衆由湖北通城竄入江西勾結廣東匪徒連陷
瑞臨袁吉等府時大學士曾國藩所部各軍未能得手湖南江西
道路梗塞該故員率鄉勇由武昌咸寧等處分頭勦截所向有功
兩月之間連復六城吳楚軍事始有轉機論者謂曾國藩等削平

大難皆以是役爲樞紐其功最偉八年前浙江布政使李續賓奏該故員幫辦軍務又連下太湖潛山桐城舒城各縣直擣三河鎮進規廬州以兵分賊聚衆寡不敵與李續賓同時殉難奉

旨卹贈太常寺卿予諡愨烈又前河南歸德鎮總兵一等子爵李臣典隨同前兩江督臣曾國荃軍營打仗出力時閱九年每當危險之際慷慨赴敵義形於色有名將之風同治三年克復江寧省城一役李臣典於槍礮叢中搶挖地道誓死滅賊從倒口首先衝入衆軍隨之因而得手旋因傷重病劇卒於雨花臺營次奉

旨追贈太子少保予諡忠壯又前甘肅新疆巡撫劉錦棠爲前廣東提督劉松山之姪隨同松山勦粵擒各匪同治七年間劉松山調勦逆回中礮隕命劉錦棠雪涕誓師諸將感奮三戰三捷軍威益振

詔加三品卿銜接統老湘軍新疆平定前大學士左宗棠奏稱劉錦棠功宣絕域威震諸邊論功由騎都尉世職遞晉一等男爵詔授欽差大臣督辦新疆軍務光緒十年授甘肅新疆巡撫旋以省親乞假回籍二十年日東事起臣條陳時事歷舉劉錦棠勇略冠時在湘淮諸將中實爲魁傑蒙
特旨召用遽以病卒奉

旨照巡撫例賜卹予諡襄勤又前湖南提督周盛波於咸豐年間投効前大學士李鴻章軍營轉戰江蘇安徽山東河南等省積功保至記名提督補授甘肅涼州鎮總兵光緒十年以法越事亟在籍奉

旨就淮北選募十營至天津設防并總統前敵各營拱衛畿輔旋補湖南提督未赴任卒於防次奉

旨照提督例賜卹予諡剛敏又前貴州布政使王德榜於咸豐年間從軍轉戰湖南江西安徽浙江福建等省規復大小城寨無數裹創徧體從未敗挫嗣經前陝甘總督左宗棠奏調會督諸軍追勦回逆出奇制勝所向有功及總統甘肅四百餘營經畫有方全境底定法越事起於諒山之役尤能轉敗爲勝國威以振而和議亦易於就緒於光緒十四年以積勞觸發舊傷出缺奉

旨照布政使例賜卹以上六員均於戡定髮捻回各役卓著勳勞曾國華力戰捐軀忠骸未獲死事尤爲慘烈歷荷

聖明洞鑒褒卹有加現查王鏗之孫同知銜江蘇補用知縣王禮恒曾國華之子二品頂戴江蘇候補道曾紀壽劉錦棠之子江蘇試用道劉篤烈周盛波之孫二品頂戴山東試用道周行景王德榜之子二品頂戴江蘇補用道王漢鵬均能不墜家聲有志上進

李臣典之庶孫前江蘇清河縣知縣李世由因辦振不力經臣以措置失宜屢招物議奏參革職尙無貪劣實蹟該員被參之後深知愧奮長此廢棄亦覺可惜合無仰懇

天恩俯准將王禮垣曾紀壽劉篤烈周行景王漢鵬五員量加擢用李世由一員開復原官並免繳捐復銀兩俾資觀感出自逾格鴻慈除將履歷咨送軍機處備查外理合恭摺具陳伏乞

皇太后

皇上聖鑒謹

奏

謝 賞大緞江綢摺

光緒三十四年十月

奏爲叩謝

天恩恭摺仰祈

聖鑒事竊臣於光緒三十四年十月十三日齋摺差弁旋寧奉到

慈禧端佑康頤昭豫莊誠壽恭欽獻崇熙皇太后萬壽

恩賞大緞二卷江綢二卷當卽恭設香案望

闕叩頭謝

恩祇領伏念臣雙符忝綰寸效無聞際茲

壽宇之宏開復荷

慈恩之下逮拜

璇宮之機杼

治仰垂裳承

丹陛之絲綸榮逾褒袞

龍光屢接鼇戴難名臣惟有勦節素絲書銘大帶逢萬國衣冠之

會祝

聖壽而共慶舒長領三江襟帶之區廣

皇仁而並沾樂利所有臣感激榮幸下忱謹恭摺叩謝

天恩伏乞

皇太后

皇上聖鑒謹

奏

奏留補用知府片

光緒三十四年十月

再前因江南庶政殷繁需員佐理奏調湖北補用知府沈銘昌來
寧差委奉

旨著照所請該部知道欽此查該員操持端潔任事精勤到寧以
來委辦財政鹽務營務及各項要政籌慮周詳措施悉當而於地
方吏治尤極究心實爲蘇省不可多得之員合無仰懇

天恩俯念江南吏治需人准將奏調江南差委湖北補用知府沈銘昌留於江蘇補用並俟補缺後再行送部引

見出自

逾格鴻恩其應繳離省銀兩仍令補繳以符定章謹附片具陳伏祈

聖鑒謹

奏

恭慰 大孝摺 光緒三十四年十一月

奏爲恭慰

大孝仰祈

聖鑒事竊 臣於本年十月二十一二十二等日在安徽太湖閱兵行次後先電傳

大行太皇太后

大行皇帝哀詔伏讀之餘五中摧裂痛惟

大行太皇太后聖明慈孝佑啓

兩朝

淑德徽猷騰今照古

大行皇帝臨御寰宇三十有四年值時會之多艱

乘乾行而不息

玉几末命尤以九年後頒布立憲引爲未竟之志諄諄垂訓開維

新之至治爲史冊所未聞豈期兩日之間迭更大故普天率土遏

密同悲臣猥以庸材忝膺重寄捐糜有志報稱無聞此次奉

命校閱江鄂兩省軍隊秋操正勵戎行遽宣

國恤茹哀將事銜涕遄歸本擬晉京叩謝

大行太皇太后

大行皇帝梓宮敬申哀悃欽奉迭次

諭旨以職守爲重不必奏請來京未遂攀號益增愴慟伏祈

皇上仰體

兩聖付託之至意勉抑三年亮闇之悲思慰安

聖母之起居光大

兩朝之統緒率時訪落方軌成周多難興邦正在今日昔我

世祖

聖祖

穆宗均以冲齡踐阼肇啓治平

聖

聖相傳

成規炳煥願

欽承乎

家法益鞏固夫邦基上慰

兩聖在天之靈下答中外臣民之望臣不勝哀慕籲懇之至謹恭

摺具陳伏乞

皇上聖鑒謹

奏

籌辦南洋勸業會摺

光緒三十四年十一月

奏爲江寧省城擬設南洋第一次勸業會官商合資試辦以開風氣而勸農工恭摺仰祈

聖鑒事竊維富強之策必以實業發達爲要圖而獎勵之方尤以合羣競爭爲進步泰西各國常於農工商各項品物開設博覽會

以資比較以供研求有專門之會聚一類之器具方法而賽之如所謂農業博覽會漁業博覽會者是有普通之會則徧羅各國之工業出產而賽之如所謂萬國博覽會者是日本初仿西法卽注意於此先設內國博覽會專取本國農工商之出品羅列考較拙者勛以改良優者特加獎勵由是農工商競勸商業勃興程功之速各國咸相驚異計其內國博覽會已舉行至二十餘次近已議設萬國博覽會以與各國相頡頏固由其民智易開亦在上所以鼓舞而提倡之者得其道也中國以交通不便之故農工商等多守舊法簡陋相仍利源外溢而無計挽回機軸日新而不知爭勝盱衡時局可爲寒心比年以來幸蒙

朝廷重視實業特設農工商專部一以振興爲主感應之機捷於影響祇以各直省尙未議及舉行賽會凡近來最著之工藝新進

之商業無可觀摩終虞囿塞臣前年奉使歐美察其農工商業之盛無不由比賽激勸而來自蒞兩江任後時兢兢焉以仿行賽會爲急務惟此舉在中國係屬創聞經始擘畫前無所受迭經邀集省內外官紳商董等諮詢籌議意見亦復相同擬卽在江寧城內公園附近紫竹林一帶購地七百畝組織會場所需經費由官商合力擔任並會議一切辦法其中緊要關鍵約有五端一曰宗旨宜純各國舉行賽會所投資本事後取償原屬有盈無絀惟此次賽會本旨係專以振興實業開通民智爲主義事屬創辦但期激勵商情不敢急求近利公家對於此舉當盡實力提倡之責未便存因以爲利之心立信大原全係於此一曰範圍宜小賽會旣屬創舉章程辦法雖有外域之可師物產調查尙無統計之可據事在循名責實不得稍涉鋪張擬定名爲南洋第一次勸業會暫避

博覽之名俾免竭蹶之慮基礎既立自不難徐圖擴充一日體制宜崇會名雖冠以南洋南北各省實無歧視陳賽物品多多益善全賴農工商部總持要領各直省共表同情庶幾收羅閎富蔚爲盛舉並擬請明降

諭旨飭派南洋大臣爲該會正會長以昭慎重自副會長以下另由臣與認股各紳商隨時商酌舉派一日褒獎宜優各國賽會皆經有學識有閱歷之員將陳賽物品逐一審查定其等第優者給以獎牌褒狀擇日舉行褒獎授與式榮譽所在人人鼓舞現擬定褒獎分爲六等一奏獎二超等文憑三優等文憑四功牌五金牌六銀牌以光商標而拓商業一日籌備宜速茲事體大期限不可不寬布置不可不密然非明訂時期妥爲預備誠恐臨事迫促籌辦難以周詳擬卽定於宣統二年四月初一日爲開會之期所有

預備事宜應儘是年三月內一律辦理妥帖如實在籌備不及當於開會前三月預先通告展緩會期以上五端均係體察商情悉心籌議其餘未盡各事另行訂有詳細章程俾資遵守至開會經費豫算各項用款約需洋五十萬元現由本省官商各半分籌均已如數認足在公家維持公益誼不容辭而各紳商等竟能踴躍集資共相贊助實爲難得自應仿照各國通例官任補助不使商本受虧一切均援照部定有限公司辦法官商聯絡一氣屏除積習和衷辦理以期於實業前途大有裨益除將章程分咨查照外謹會同江蘇巡撫臣陳啟泰恭摺具陳伏乞
皇上聖鑒訓示謹
奏

賞穿帶膝貂褂謝

恩摺

光緒三十四年十一月

奏爲叩謝

天恩仰祈

聖鑒事竊讀光緒三十四年十一月二十六日電鈔內閣奉

上諭朕入承大統登極禮成敬謹恭上

皇太后徽號鉅典昭垂允宜覃敷恩澤楊士驤端方均著賞穿帶
膝貂褂等因欽此伏念臣涓埃未效

寵賚優加有過紫綺之華彌厯素絲之懼仰惟

聖意益勵臣衷欲其自愛羽毛故有

賜貂之令取其乃心精白特隆帶膝之名念封疆凡二十一人惟
兩臣得霑

雨露其服章應七十二候愧滿身俱帶星辰在近臣已不數邀而
外吏尤爲僅見此蓋伏遇

端忠政公奏高

卷十三

十一

皇太后徽音克嗣

皇上錫類推仁寄獨重於南北洋

恩遂同於左右輔臣惟有彌勤豹澤愈懍鵷濡視采色之彰於身
當無愧如星之弁問襜褕之何以報豈不如掃雪之奴無慮奪袍
益思補袞映

火龍黼黻之色永垂

堯舜之衣裳方元狐端罩之榮愧乏紀彭之章奏所有臣榮幸感
悚下忱謹恭摺具陳伏祈

皇上聖鑒謹

奏

調補省會知府摺

光緒三十四年十一月

奏爲揀員調補省會要缺知府恭摺仰祈

聖鑒事竊准部咨光緒三十四年九月初三日奉

上諭江蘇江甯府知府員缺緊要著該督撫於通省知府內揀員
調補所遺員缺著劉名譽補授欽此遵查江甯府知府係衝繁難
三項要缺例應在外揀員調補該府地居省會政務殷繁整頓地
方表率僚屬兼之時有發審案件在在均關緊要必須爲守兼優
之員方足以資治理臣等於通省現任知府科甲出身正途人員
內詳加遴選查有現署江甯府准補淮安府知府楊鍾羲年四十
四歲內務府正黃旗漢軍舉人光緒十五年己丑科中式貢士
殿試二甲

朝考一等改翰林院庶吉士庚寅散館授職編修二十四年保送
知府二十五年二月十四日由吏部帶領引
見奉

旨著以知府分省補用欽此遵例捐指浙江領照到省二十九年三月臣端方在兼署湖廣總督任內奏調湖北差委六月奏留湖北補用歷署襄陽安陸等府三十二年十月復經臣端方奏調江南差委三十三年在江南振捐案內捐離原省改指江蘇是年八月十八日到省三十四年三月經臣端方於薦舉人才摺內以該員操履嚴正學術宏通臨事鎮定能持大體前在湖北歷署襄陽安陸等府所在貪墨洗心強梁歛迹循良之績尤足課最一時奉硃批吏部知道欽此四月委署江甯府知府是月二十二日到任是年五月補授淮安府知府經部覆准伏查該員楊鍾義忠信慈惠吏有儒風現署江甯府事已逾半載措施一切均極裕如以之調補江甯府知府洵堪勝任據江甯布政使樊增祥等詳請具奏前來合無仰懇

天恩俯准以淮安府知府楊鍾羲調補江甯府要缺知府實於地方有裨如蒙

俞允該員係現任知府調補首府銜缺相當毋庸送部引

見一切因公處分例免核計所遺淮安府知府員缺應卽遵

旨以劉名譽補授謹合詞恭摺具陳伏祈

皇上聖鑒訓示謹

奏

總兵請卹摺 光緒三十四年十二月

奏爲已故總兵戰績卓著遺愛在民謹據情籲懇

恩施仰祈

聖鑒事竊據海州贛榆沐陽三屬紳士署郵傳部右侍郎農工商部右丞沈雲沛等呈稱已故陝西河州鎮總兵王得勝年甫逾冠

卽以材武著稱當咸豐三年粵匪竄踞金陵捻燄復熾海州僻處偏隅土匪乘機勾煽嘯聚數千人意圖響應海州守備秦懷揚邀王得勝赴海助勦每戰身先斬獲無算渠魁授首內訌以平是爲該總兵立功海州之始六年調赴江南大營隨同攻克江浦十年赴海州辦理團練甫至贛榆捻逆大股猝至該縣城垣半圯危在旦夕該總兵以牛車排列缺處囊土築板率士卒守之捻逆圍攻九晝夜不得下攻愈急該總兵匹馬率敢死士出城立紫陽橋下徑與賊薄殺傷甚衆賊爲少卻時攻城之匪方取木梯百餘具倚城直上賴該總兵先期運磚石置堞間至是礮石並下賊屍枕藉餘衆潰走是役也城中居民不得食者三日煮篋笥敗皮以果腹而軍民併力卒保危城則該總兵忠勇之氣有以激勵之也以守城功奏獎千總署贛榆縣千總甫蒞任捻逆犯海州州人乞援該

總兵率百五十人往環城審視謂城外崗嶺復沓脫爲賊據必不
守乃勒兵守鹽河而設伏於城東之孔望山布置甫定賊大股鬻
至該總兵迎戰陣斬悍匪十餘人於胸山之巔遍設燈旂河西張
蘆棚爲疑兵賊駭我軍勢盛逡巡遁去海州西南與山東沂郯接
壤民圩多叛同治二年該總兵督隊攻破州西之蓮子灣朱洲中
村招降賊圩數十座奏保以守備用捻逆大股肆擾山東該總兵
旣以勦捻屢著奇績遂隸總兵陳國瑞部下進攻白蓮池賊飛矛
中脅裹創復進獲匪首劉雙印奏保免補都司以游擊用三年委
帶得勝營駐防海州清江桃源等處五年奏保參將六年隨同道
員吳毓蘭擒捻首賴汶洸於揚州論功以總兵記名八年統得勝
營赴豫東防勦出力蒙
恩以提督記名

簡放署海州營參將仍統得勝營捐廉俸八千串助海州公車賓興之費爲兵丁子弟籌立義塾彬彬有儒將風駐海旣久屢獲盜魁及幅匪多名前督臣沈葆楨奏保堪勝提鎮光緒四年兼統淮北緝私營其治臬嚴於大幫而寬於肩販受事後綱銷頓旺六年前署督臣吳元炳以緝捕勤能迭獲巨梟奏保九年奉

旨補授江西南贛鎮總兵十一年因病開缺十五年復統淮北緝私營兼漕標營務處十六年馬陵山匪衆嘯聚謀搶海贛富紳該以兵先事得耗率隊馳往俘獲三十餘人自此海州境內盜風爲之斂戢二十一年日東事起前署督臣張之洞檄該總兵募海勝軍八營於青口一帶設防該總兵單騎周歷海濱無間風雨舊疾復作撤防後奉

旨補授陝西河州鎮總兵以疾劇奏請開缺三十四年正月卒於

家海之父老子弟感頌不忘環請奏懇於海州地方捐建專祠藉
申報饗等情臣伏查該總兵勦擒有功守城著績統軍駐海先後
三十餘年勞勩卓著遺愛甚深既有禦災捍患之功宜隆俎豆馨
香之報合無仰懇

天恩俯准該故總兵王得勝於海州地方由紳民捐建專祠地方
官春秋致祭以彰忠藎而順輿情出自逾格

鴻慈謹會同江蘇巡撫臣陳啟泰恭摺具陳伏乞

皇上聖鑒謹

奏

請開復已故運司摺光緒三十四年十二月

奏爲已故革職運司前勞足錄遺愛在民謹據情籲懇
恩施開復原官以昭激勸恭摺仰祈

聖鑒事竊據江甯府屬紳士翰林院侍讀學士黃思永等揚州府屬紳士候補京堂張柳等呈稱已故前兩淮鹽運使洪汝奎志慮忠純夙負時望咸豐粵匪之亂前湖北撫臣胡林翼前兩江督臣曾國藩先後辟參戎幕金陵克復該故運司總理軍需善後事宜勞來安輯一以培元氣固民心爲本勸農興學疲氓復業籌撥善堂經費以卹孤寡議增書院膏獎以惠寒峻掌軍需局最久綜覈名實剔弊懲姦歷年積存局款凡數百萬及同治十三年海疆有事修臺築壘增防勇數十營咄嗟立辦其後協濟新疆軍餉七百萬籌還西征洋款伊犁償款又數百萬該故運司始終其事從容籌濟沛然肆應

朝廷遂收廓清西域之功良由該故運司平日銖積寸累不憚身爲怨府始獲儲巨款以應一日之急歷任督臣交章論薦遂蒙

特恩以候補道員

簡授兩廣運司調任兩淮運司抵任後裕課卹商銳意求治凡爲地方興利事宜如水道橋梁義倉義塾義渡以次建復治未及期百廢具舉時值海嘯奇災該故運司立籌振款分投撫卹躬親省視竈丁羣慶更生場運因以無誤光緒八年因江甯三牌樓一案罷職遣戍期滿釋回卽經升任兩廣督臣張之洞奏請調用奉旨發往廣東差委抵粵後委辦海防以病軀歿於瘴地無愧致身之義宜邀宥過之

恩查已故被議大員生前著有勞動一經疆臣籲請無不立沛殊施如已故廣西巡撫潘鼎新已故直隸清河道史克寬等歷經奉

旨開復有案該故運司政績官聲卓有表見江淮士民謳思弗替

公懇據情奏請

恩施等情前來臣伏查該故運司在江南服官垂三十年忠勤夙著成績爛然雖以承審要案獲咎旋蒙

恩旨錄用是其才堪任使久在

先朝鑒照之中合無仰懇

天恩准將已故前兩淮鹽運使洪汝奎開復原官以順輿情而資觀感出自逾格

鴻慈謹恭摺具陳伏乞

皇上聖鑒謹

奏

徐州舉辦清鄉片

光緒三十四年十二月

再查徐州府所屬各州縣界連東皖伏莽素多近因山東曹州等

處辦理清鄉該盜匪等遂以徐屬爲逋逃藪迭經嚴飭地方文武設法偵緝先後拏獲著匪谷長學楊三郎景辰等及要目多名審明懲辦惟夥黨在逃者尙衆並聞各處不少窩匪之家亟宜趁此舉辦清鄉以爲一勞永逸之計茲經飭派署徐州道爽良爲督辦署徐州鎮總兵楊慕時統領徐淮巡防馬步各隊前署九江鎮總兵陳煦亮爲會辦徐州府知府田庚爲總辦江蘇候補知府吳憲奎爲坐辦江蘇候補知府樊溥霖爲提調均兼巡防營務處仿照曹州清鄉章程設立總分各局選派得力員紳先從銅山縣沛縣清查入手以嚴拏著名盜匪查究窩匪爲要旨遞推豐碭蕭邳宿睢六屬次第切實辦理所需清鄉經費先由正任徐州道袁世廉捐錢二千串財政局撥銀五千兩藉資開辦惟不敷尙鉅應卽飭由江甯藩司財政局各半分籌撥給以應要需臣仍當嚴飭該鎮

道府委員等實心實力妥速辦理務使匪患盡除以仰副

朝廷綏靖地方之至意所有徐州各屬舉辦清鄉緣由謹會同江

蘇巡撫臣陳啟泰署江北提督臣王士珍附片具陳伏祈

聖鑒謹

奏

獲匪審明懲辦摺光緒三十四年十二月

奏爲拏獲戕害營官要匪審明懲辦恭摺仰祈

聖鑒事竊照淮北緝私營定字右旂管帶外委陳有才被匪徒張萬銀等拒傷身死並續又殺害綫勇薛從繪沈保傾等一案當經飭派江北營務處江蘇候補道沈佺馳往查辦並將失於救護之勇丁劉懷玉王貴臣殷家富發交沈佺審辦其疎於防範之江北巡防隊哨官劉玉廷盛德明哨長何之銘一併撤差看管聽候查

訊一面懸立重賞嚴飭購緝查拏嗣據拏獲夥犯路五楊小方李
小考楊守茂四名飭由沈佺提訊擬辦所有辦理情形業經據實
具奏並請將陳有才從優議卹欽奉

硃批着照所請該部知道欽此欽遵在案茲據續獲匪首張萬銀
夥犯李興志李耀懷馬向標等四名到案復飭沈佺督同海州直
隸州知州謝元洪提同先獲各犯查訊得光緒三十四年五月十
六日張萬銀與在逃之劉林趙八會晤劉林等起意邀赴山東行
劫張萬銀允從是月二十日張萬銀糾同現獲之馬向標李耀懷
李興志李小考路五楊小方在逃之王其官王兆居李八斤卽李
興會楊彩卽楊四周玉和偕至李興志家約定同往山東行劫經
陳有才查知率勇撲捕李興志李小考路五楊小方先行逃逸張
萬銀率同馬向標李耀懷王其官王兆居李八斤楊彩周玉和一

共八人分拏檣礮逃入附近之孫家圩內用木槓石塊抵塞圩門將圩內孫士傑夫婦及其幼女關鎖房內各取槍礮上樓抵拒陳有才當先撲捕趕到圩邊被槍中傷倒地嗣因營隊圍攻愈緊王其官李八斤等一面挖穿南圩牆下地道一面拚命抗拒至二更時分先向北面開礮驚動營勇都向北面圍攻張萬銀等趁此均由南面地道帶槍竄出躲避山芋地內俯伏潛逃張萬銀逃至劉家圩地方卽有線勇薛從繪沈保傾趕來探捕亦被張萬銀主令在逃之沈元高等帶人殺害馬向標等逃往楊守茂家藏匿旋被拏獲又訊得李興志李小考楊小方與另案拏獲之楊天印於光緒三十四年正月初十日在海州境內與在逃之溫四等持械攔搶山東客人穆清富車輛得贓又訊得李興志李小考楊小方楊天印與另案拏獲之寇有山桑小六於光緒三十四年五月初四

日夜聽從在逃之劉學山等夥劫海州興谷鎮陳廷華家拒傷陳廷華身死又訊得寇有山桑小六於光緒三十四年三月二十六日夜聽從在逃之周相恆夥劫海州高長發家得賊又訊得寇有山桑小六於光緒三十四年五月二十四日由寇有山起意夥搶海州姚生有之妾徐氏並劫牛驢衣物各案迭經隔別研審各據供認不諱犯係先後拏獲供情如一正盜無疑至楊守茂路五兩犯亦另有與李興志等在山東鄒城縣先後行劫別正平馬光成等家得賊之案再緝私營勇丁劉懷玉王貴臣殷家富訊明於陳有才被戕時僅止失於救護並無別故江北巡防第四隊哨官盛德明劉玉廷哨長何之銘亦僅止疎於防範並無故縱情事由沈佺等議擬稟辦前來臣覆加查核此案張萬銀起意率衆拒捕槍傷管帶陳有才身死並復主使殺害綫勇薛從繪沈保傾兩名實

屬罪大惡極馬向標李耀懷隨同入圩開槍拒敵官兵亦屬同惡共濟李興志李小考楊小方楊天印寇有山桑小六迭次搶劫得贓並有拒捕殺人重情均屬兇暴不法業經電飭按照奏定章程將張萬銀馬向標李耀懷李興志李小考楊小方楊天印寇有山桑小六九犯一併就地正法以昭炯戒楊守茂路五二犯前在山東郟城縣所犯搶劫兩案情節較重飭令移查明確從重擬辦失於救護之勇丁劉懷玉王貴臣殷家富疎於防範之哨官盛德明劉玉廷哨長何之銘訊明均無別故業已斥革一併免予深究拏獲張萬銀出力之員弁董事等分別從優給賞除仍嚴飭該地方文武上緊勒緝逸匪王其官等務獲究報外所有拏獲戕害營官要匪審明懲辦緣由謹會同江蘇巡撫臣陳啟泰署江北提督臣王士珍恭摺具陳伏祈

皇上聖鑒謹

奏

查明司道參款摺

奏爲查明江南司道大員被參各款謹合詞據實覆陳仰祈

聖鑒事竊光緒三十四年九月初九日承准軍機大臣字寄八月二十六日奉

上諭有人奏江南司道趙瀆彥等吸食洋煙甘冒不韙著端方陳啟泰按照所參各節認真查驗毋稍瞻徇據實覆陳原片著鈔給閱看欽此遵

旨寄信前來臣等往復電商當經會委署江甯提學使陳伯陶常鎮通海道劉燕翼馳赴蘇揚按照所參各節認真查驗茲據該司道等查驗確實會同稟覆前來臣等詳加覆核所稟極爲詳切查

原片所參重在吸食洋煙而與其他各款作爲餘事故曰是二人者卽無煙癮亦在罷斥之列矧當禁煙嚴峻之時甘冒不韙等語是當首先嚴查吸煙與否以挈此案之要領再核其餘各款之虛實如原奏所稱兩淮運司趙濱彥署內興造洋樓三間爲吸煙之所准補准揚海道朱之榛于此番禁煙急切置之不理一節查運署二堂之左三堂之右有廳事兩所年久失修趙濱彥到任略仿洋式拆修爲辦公會客之地且多開窗櫺戶牖四達並非秘密幽深實于吸煙不便當甯蘇禁煙之始濱彥在揚之榛在蘇均曾具有切結均言確無嗜好是朱之榛並非置之不理不辯自明且同僚人人具結如該道一人違衆自恣臣等亦豈能聽之乎陳伯陶等復留心查驗趙濱彥面容蒼瘠係患濕痰朱之榛黃瘦頰白係屬老態人或因其顏狀清癯輾轉傳訛遂生疑誤其實均不吸煙

臣等細加詢訪亦無不衆口同聲也至原奏所稱趙濱彥離網廢弛官賣私鹽侵吞緝私銀兩一節原參語意簡略俱未指實查該運司自到任以來鄂湘西皖四岸上年銷至五十餘萬引實爲近時所無似不得謂之廢弛該運司前以通如興泰鹽阜六州縣均與場地毗連私梟充斥建議就范隄緝私並以小民淡食爲虞曾於該六屬動用官本開設鹽棧接濟民食所有售鹽價值由委員按月冊報餘利解庫有案可稽現已招商改辦食岸若以此爲官賣私鹽實屬傳聞失實至緝私銀兩與現在淮南北營隊餉需收放兩抵常年不敷總在十萬兩上下是方有欠餉待其彌縫何有餘款容其侵吞又原奏所稱朱之榛署藩司時其子偽造鈔票事覺以彌縫得免一節查蘇省裕蘇官銀錢局發行鈔票光緒三十二年二月有何杏生與柯升同謀翻印未成時朱之榛署理藩司

先經覺察飭蘇州府查拏訊辦緝獲何杏生到案供出同謀之柯升係朱之榛之子朱景邁家丁卽經該署藩司將柯升發府審辦經前撫臣以朱景邁於此案實不知情惟交游不慎應由朱之榛嚴加管束柯升何杏生兩犯分擬軍流咨部復准結案是朱之榛始終未嘗袒護且既自行舉發自無所用其彌縫又原奏所稱朱之榛總理全省釐務每洋一元照市價減二百餘文商民怨嗟此項洋餘每年數十萬金一節查蘇省釐捐章程向係三項分收綢緞收銀絲繭收洋百貨收錢而收錢者仍聽其錢洋並繳其以錢合洋均由總局按旬頒發洋價近年銅元盛行自光緒三十一年七月起商民完捐改爲五成銅元其餘五成按制錢行市繳洋各局卡搭解洋元該總局卽按洋元列收若報解時以洋易銀均註明照某日銀洋行市於月報冊內詳細開列統入正款涓滴歸公

並非提出另存實無所謂洋餘名目又原奏所稱朱之榛既補淮揚海道二年不赴新任戀戀釐務一節查朱之榛於上年正月交卸署藩司篆務卽經臣等以該員所辦蘇省善後牙釐諸要政未便遽易生手會同奏請暫緩飭赴新任奉

旨照准行令欽遵在案是該員之暫緩赴任出於臣等之奏請並非該員之本心况赴任遲速該員本無自主之權更何有貪戀釐差延不到任之事以上各節經該司道等會同確查均無實據臣等竊以爲時事多艱人才難得任事者每不免於疑謗建言者時或誤於傳聞以趙濱彥之氣性方嚴朱之榛之綜覈精密皆能任勞而任怨因之招忌而招尤原參最重者在吸食洋煙而該司道實無斯痼疾其餘各節卽使小有疵瑕猶當略短取長爲人才惜况一并查無實據自應請免置議以彰公道而勵賢能所有查明

司道被參各節均無實據緣由謹合詞恭摺覆陳伏乞

皇上聖鑒謹

奏

密陳被參司道可用片

宣統元年二月

再趙濱彥朱之榛屢被奏參屢經查辦洗雪原其致謗之由緣趙濱彥自以忠盡之後清正自持專以不畏強禦爲能不徇情面爲事常有介而不和清而近苛之處以故怨謗之聲往往不免實則操履端潔公事認真絕無官場陋習惟綜司財政非其所長臣方此次過蘇與臣啓泰討論人才如趙濱彥之廉公剛銳若使察庶獄飭吏治則固今之能手也應如何另加簡用出自

聖恩非臣等所敢擅請朱之榛久司財政歷署兩司未免局外滋

疑生忌查該員官蘇數十年於吳會情形瞭如指掌才本精覈性復強記人或疵其眊視實能以聰補明歷事上官約十餘任或性殊通介或政異寬嚴而無不倚爲臂助者誠以該員更事最多論事如數家珍辦事具得筭要察弊能見其底理財能挈其綱又能識重輕權利害從不徇己之私授人以柄故雖屢經彈劾卒無所傷臣等以一省之中不可無老成歷練之人以備諮詢而資倚任若朱之榛卽其入也不然該道數數被參豈歷任上司皆如原奏所云遷延將就乎緣奉

飭查謹將該司道等致謗之由與其可用之處謹附片密陳伏乞
皇上聖鑒謹

奏

教務長請獎摺

宣統元年二月

奏爲江南高等學堂教務長辦學期滿循章請獎恭摺仰祈

聖鑒事竊據署江南提學使陳伯陶詳稱准兼辦江南高等學堂
監督候補道李瑞清咨稱該堂教務長翰林院庶吉士林世燾於
光緒三十年中式貢士引

見奉

旨著改爲翰林院庶吉士欽此三十二年正月由前湖南撫臣龐
鴻書奏留辦理湖南全省農業學堂充當監督奉

旨允准在案卽於是月到堂任事在堂兩年三十三年十二月由
臣奏調來甯辦理學堂懇請照章免扣資俸奉

旨著照所請該衙門知道欽此旋於三十四年正月到甯充當江
南高等學堂教務長住堂任事查定章新進士充當學堂教習及
總理學務事宜應由該省督撫先行奏咨立案三年期滿實能稱

職准與在館畢業學員一律辦理等語又查各省開辦學堂凡奏調人員如辛丑壬寅併科庶吉士已照進士館畢業例引

見授職甲辰

恩科庶吉士章棧譚延闓雷恆等均以在京充譯學館監督及湖南充師範學堂監督在甯充兩江師範學堂教務長三年期滿先後分別授職編修檢討各在案該員林世燾自光緒三十二年任湖南農業學堂監督至三十四年任高等學堂教務長事計至年底合之在湘辦學年限實已扣足三年計所成就之學生三十三年上學期湖南農業學堂舊班生畢業一次三十四年上學期高等學堂豫科畢業升入本科又推廣升學新班學生一百餘人比照原額幾加一倍核其年績尙與定例相符據情詳請具奏前來臣伏查庶吉士林世燾經術湛深才猷練達熱心教育成材衆多

自任高等學堂教務長以來著有學約諄諄以敦品勵學正心修身爲勸尤於世道人心有濟合無仰懇

天恩俯准將翰林院庶吉士林世燾照進士館畢業例引見授職出自逾格

鴻施除分咨外理合恭摺具陳伏乞

皇上聖鑒訓示謹

奏

請開復已故撫臣摺

宣統元年二月

奏爲已故撫臣以言獲譴情有可原臚陳事實籲懇

天恩准其開復原官用獎忠鯁而勵方來恭摺仰祈

聖鑒事竊維竭誠據慮者事君之常經棄瑕錄瑜者馭世之妙用自來純臣謀國往往知無不言發之事前誠多駭聽驗諸事後率

可推行若令擯斥以終雖效忠者沒齒無怨而幽忱未白究無以勵謇諤之風有不得不略跡原心贖陳於

君父之前者伏查已故革職湖北巡撫曾鈺正白旗滿洲人同治四年伊父原任甯夏將軍慶昫在軍營積勞病故奉

旨百日後帶領引見五年以主事分工部行走洊升員外郎中河南道監察御史光緒九年

簡放陝西督糧道兩次署理按察使二十年補陝西按察使署布政使補甘肅布政使二十四年九月

擢授湖北巡撫於交卸甘藩時上疏請

朝廷變通成例奉

旨令該衙門議奏旋經已革綏遠城將軍前翰林院侍講學士貽穀前光祿寺少卿張仲忻以擅請變法莠言亂政等語先後奏參

是年十二月初六日奉

上諭曾鈺著革職永不敘用等因欽此維時該革撫在陝西途次聞

命回旗杜門省過迨拳匪猖獗家貲蕩盡賣卜餬口幾絕饗殞顛沛流離痛心時變未幾遂以病歿聞者惜之此該撫歷官始末及以言獲譴之實在情形也該革撫爲外官十餘年以廉靜爲體以勤幹爲用自甘淡泊屏絕浮華雖在仕途仍耽書史禮遇耆宿折節訂交官陝西督糧道時前按察使黃彭年素負儒林重望與該革撫深相契合亟稱其賢關中郡邑各書院向歸糧道主持督課實學士論翕然西同各屬農民納糧例必自繳省倉道遠途難弊端叢出該革撫遴員捐俸設法清釐裁抑猾吏翼寬民力三陳臬事兩縮藩條聽斷公明勾稽翔實理財察吏規畫咸宜初至甘肅

適值回匪跳梁防營失利瘡痍滿目廣集客軍餉振兼籌左支右
絀而駕馭驕將調和漢回孽畫維持尤爲堅苦前陝甘督臣陶模
倚之如左右手用能削平反側安輯西陲秦隴士民至今歌頌此
該革撫政蹟卓著遺愛在民之實在情形也至其奏上條陳在戊
戌八月以後斯時變法之議尙在斟酌未定之時而該革撫見爲
當言卽毅然言之勇於謀

國不顧其私跡其戇直之風朴忠之操實非唯諾趨時者所可比
數臣求其家藏遺稿已經兵燹散失輾轉訪覓僅得殘稿綜其大
概約分四條一請變通設官之例一請變通補官之例一請變通
度支之例一請變通訟獄之例陳義並不過高但就閱歷所得力
籌補救之方慷慨陳詞出於至性貽穀等指爲莠言實屬過當欽
惟我

孝欽顯皇后

德宗景皇帝因時制宜

簡派大臣更定官制修改刑律各要政薄海內外莫不傾心該革
撫所上條陳多與現在推行之新政隱相符合臣伏查該革撫世
篤忠貞心殷報

國所至之地皆有成績可考今當變法圖強之際似此忠鯁之臣
允宜及時湔雪庶足以作伉直敢言之氣而做便佞趨時之風合
無仰懇

天恩俯准將已故革職湖北巡撫臣曾鈺開復原官出自

鴻慈逾格所有已故革職撫臣籲懇開復原官緣由理合恭摺具
陳伏乞

皇上聖鑒訓示謹

奏

懲戒道員片 宣統元年二月

再據江蘇布政使瑞澂自上海差次稟稱本月初一日突有江蘇補用道李本森致緘該司云將拜門次日來謁該司拒而未見詎於初六日忽遣人送信並受業帖一紙內封贄敬一千元正擬將來人扣住遽已潛逃據該司將原信票據等件呈請覈辦前來查該司清介自持風裁峻整從無人敢以私干今該員李本森竟敢以厚贄相投實屬膽大無恥除銀票飭該司發充地方善舉外相應請

旨將江蘇補用道李本森卽行革職以示懲戒謹會同江蘇巡撫臣陳啟泰附片具陳伏乞

聖鑒訓示謹

奏

謝 賞遺念冠服物件摺 宣統元年二月

奏爲恭謝

天恩仰祈

聖鑒事竊宣統元年二月二十一日承准恭辦喪禮王大臣咨開

二月初五日由

內殿交出

德宗景皇帝

遺念冠服物件計熏貂冠一頂藍江綢棉袍一件石青毡棉褂一件玉烟壺一件珮一件祇領之餘倍增感慟當卽恭設香案望

闕叩頭謝

恩欽惟

德宗景皇帝妣鼎長遺

軒弓莫挽

凝旒如在溥士皆挾纊之仁

明德惟馨表玉不去身之度伏蒙

皇上仰承

先志分賚

遺珍哀感舊人旁及疆吏設裳致敬恍親

原廟之衣冠比德增慙永奉

几筵之瑤玉臣彈冠結綬此衷莫罄夫哀榮懷瑾握瑜何一不出

於

推解合兩江而泣淚長戀

龍髯戴三山而不辭誓安鼇軸所有臣哀感下忱謹繕摺具陳伏

乞

皇上聖鑒謹

奏

奏給領事寶星片

宣統元年二月

再各國領事奉派來華辦理交涉事宜如能裨益中外大局准由關道查明照章詳請奏給寶星歷經照辦在案茲據兼管江海關蘇松太道蔡乃煌詳稱前法國駐滬總領事署候補領事賈雅卽蓋雅前於光緒二十五年春間到滬任事隨同總領事襄辦一切均能遵守約章二十六年適值北方多事各國均駐有西兵在滬法總領事謹遵互保之義法兵恪守紀律法租界防護嚴密居民安堵毫無驚擾該候補領事贊助之功頗多現已卸事回國詳請照章奏獎寶星等情前來臣查該候補領事賈雅在滬任事既據

關道查明遇事能遵守約章且二十六七年間法兵駐滬時亦能
謹遵互保之義賈雅贊助有功實於中外大局不無裨益現已卸
事回國自應照章奏請獎敘合無仰懇

天恩俯准賞給前法國駐滬候補領事賈雅三等第一寶星以昭
激勸出自

鴻施逾格除咨外務部查照外謹附片具陳伏乞

聖鑒訓示謹

奏

臚列籌備事宜片

宣統元年二月

再准憲政編查館咨行奏設考核專科章程第三條內開九年籌
備事宜欽遵

懿旨責成內外臣工每屆六個月將籌辦成績臚列奏陳並咨憲

政編查館查核應自光緒三十四年八月起至十二月底止爲第一屆各等語又查憲政編查館原奏九年籌備事宜清單第一年内各項事件惟諮議局一項爲各省督撫專責所有遵設籌備處情形現經詳晰奏陳其第二年應行籌備如籌辦城鎮鄉自治設立研究所調查各省人戶總數暨各省歲出入總數以及創設簡易識字學塾辦理廳州縣巡警各事宜或先經試辦或正在奉行應俟籌辦備具端倪於第二屆限內分晰奏報除咨明外謹合詞附片具陳伏祈

皇上聖鑒謹

奏

請給領事寶星片

宣統元年二月

再准義國署理使臣牟納格函開總領事銜前駐滬領事計細在

法工部局充當會董多年華洋人士服其公平與地方官往來皆能歡洽現已倣裝回國滬上商民頗有感情請據情代奏

賞給二等第三寶星以昭榮獎等情前來臣查該領事計細前於光緒二十六年充義國駐滬領事適值京津拳匪肇衅上海華洋雜處民情惶駭各國領事和衷保護地方以安該領事計細與有力焉經前督臣劉坤一等會奏請

賞給三等第一寶星在案該領事交卸後復在上海法工部局辦事聯絡官商調和中外雖已去任而輿論翕然向來各國領事交卸後皆以得

賞寶星爲榮今該領事來滬甚久睦誼克敦既據該國署理使臣函懇據情代奏情詞諄切未便壅於上

聞合無仰懇

天恩俯准賞給義國總領事銜前駐滬領事計細二等第三寶星
用酬勞動出自

鴻施除咨外務部外理合附片具陳伏乞

聖鑒訓示謹

奏

法政學堂辦法摺

宣統元年閏二月

奏爲兩江法政學堂開學以來一切辦法並動用款目恭摺具陳
仰祈

聖鑒事竊照兩江法政學堂籌辦情形經臣於光緒三十四年三
月具奏四月十四日奉

硃批學部知道欽此嗣以該堂監督候選道田吳炤經學部派充
日本留學生監督遺差遴委江蘇試用道吳璆接充並委鹽巡道

榮恆爲總辦該堂係就江南織造處庫使衙署改用添購附近地基擴充校址增新葺舊均按學校規制並仿日本指定寄宿舍辦法另賃房屋爲學生寢息之所以便管理而示體恤學生分正科別科兩項正科兼收甯蘇皖贛等省學生別科專收甯屬候補人員以及舉貢生監入正科者先習豫科二年接習專科三年上年四月欽奉

硃批之後卽經出示招考其時尙未接准部頒限制新章所取豫科學生係查照京師法政學堂章程及臣前奏章程辦理其中有中學堂畢業憑照者固爲合格其雖無憑照而中學具有根柢者亦得從寬取錄此爲新章未到以前招考豫科學生辦法本年夏季爲第二次招考之期自應查照新章以歸劃一別科原定二年畢業自部章展爲三年業已遵照改訂至附學一節臣前奏章程係

爲別科額外諸生而設其有欲入正科限於額滿而年齡尙富文理較優者亦經仿照別科附課辦法一律繳費附入豫科以副諸生嚮學之忱而期教育普及之效所需經費計建置講堂用銀一萬六千四百八十二兩六錢零圈購地基暨拆讓民房銀二千三百八十二兩九錢零內除由金陵關道籌撥銀七百一十兩外計用銀一千六百七十二兩九錢零又修改禮堂飯廳門牆暨增建休憩室晴操場遊廊圍牆各項工程陸續用銀九千二百八兩四錢零開辦遷移各費共銀四千兩購置書籍暨排印講義機器共銀四千三百八十七兩一錢零開辦學生寄宿舍修葺屋宇添置什物共銀八百九十八兩二錢零其常年經費計額支活支兩項每月約用銀二千四百二十餘兩所有以上各款均由江南財政局支領應請作正開銷據該堂總辦榮恆監督吳璆會同詳請奏

咨前來臣伏維法政爲立憲基礎尤近今切要之圖作事以謀始爲難立法以杜弊爲急察核該堂辦法暨增改章程均尙周妥所用款目亦均核實惟查該堂正科學生前定豫科二年本年正月部咨有各省高等學堂所設豫科如原定期限不滿三年應一律展至三年等語應卽飭令該堂遵照將豫科學生加增功課勻配鐘點俾學修底於完全仰副

朝廷注重法治之至意除將續擬增改章程咨部查核外所有兩江法政學堂開學以來情形理合恭摺具陳伏祈

皇上聖鑒訓示謹

奏

諮議局籌辦情形摺

宣統元年閏二月

奏爲遵設江甯諮議局籌辦處並臚陳辦理情形恭摺仰祈

聖鑒事竊查光緒三十四年六月二十四日欽奉

孝欽顯皇后懿旨憲政編查館資政院王大臣等會奏擬呈各省諮議局及議員選舉章程一摺詳加披閱尙屬周妥均照所議辦理著各督撫迅速舉辦實力奉行自奉到章程之日起限一年內一律辦齊等因欽此並准憲政編查館刷印原奏暨章程清單咨行前來仰見

聖慈好惡同民實行憲政之至意江表臣庶欽感同深臣等遵於十月間將三十三年業經

奏設之江甯諮議局遵照館章改爲籌辦處派委江甯布政使樊增祥提學使陳伯陶爲總辦江甯鹽巡道榮恆江蘇候補道李瑞清趙從嘉熊希齡等爲會辦在籍翰林院修撰張謇爲總理丁憂翰林院編修夏寅官丁憂前廣東高雷陽道段書雲安徽候補道

許鼎霖前陝西富平縣知縣仇繼恆等爲協理並分別遴委科長
科員擬訂章程飭令認真籌辦業經咨報憲政編查館在案茲查
開辦以來距今數月其辦事規程進行秩序亦既稍具崖略粗定
指歸謹條列大概辦法爲我

皇上縷晰陳之一規定期限查館頒章程定正月十五日舉行初
選三月十五日舉行複選當此初辦伊始無成例可循民間知識
不齊未能家喻戶曉非比戶講演勸導則調查資格斷難詳確加
以轉行文書研究疑義動費時日若必拘執初選複選限期恐多
疏舛竊計召集會員定限九月爲日較紆尙可量爲變通略加寬
展但求無誤會期不妨從容將事由籌辦處會同商推擬定以閏
二月十一日爲初選期四月初五日爲複選期又慮奉行者始則
任意因循繼則潦草塞責爰舉初選複選定期以前應行籌備各

事件均爲之配定日數通飭照辦並於交通不便之地以函電佐其不逮總期順序進行剋期集事此籌備之在期限者一也一統一規制按定章選舉調查以及投票細則應由初選複選監督核定查甯屬府廳州縣三十有餘其間守令雖不乏通知時事之才然調查選舉事屬叛行未必盡能了澈且審釋名義斟酌寬嚴政見未必相同卽辦法斷難齊一若不示之標準必致一省之內各爲風氣辦法紛歧爰於開辦之初遴選嫻習法政明白事理之官紳派爲司選科員飭令會集一處將定章公同研究商定畫一辦法卽令分赴各屬會合本地官紳如法籌辦所有各項辦事規則均由省局擬定頒發期於通省一致無牴牾觸背之虞此籌備之在規制者一也一確定名冊查籌辦選舉以審定資格爲最難若徒以調查責之牧令而本地紳耆不爲助理則所查斷難詳確

臣

等於開辦之初卽撰具剴切示諭刊發各屬遍爲張貼以宣布朝廷之德意並由籌辦處以權利之不宜放棄資格之必須審查演爲白話淺解交由出發科員隨處頒發廣爲勸導務使窮鄉僻壤咸曉然於選舉一事爲人民榮幸之途鼓舞歡欣熱心輔助將人名草簿清冊依限造送此籌備之在名冊者一也一籌議建築查諮議局爲議院初基本應次第建設現爲一勞永逸之計略事擴充縱不能立底完全亦必須隱合規制庶備將來議院成立時因以爲用無勞改作亟宜酌仿外邦之制度參合本地之情形臣端方前赴歐美參觀議院大率規模閎壯未能一蹴而幾惟日本地近文同民情亦不甚相遠業據籌辦處呈請選派曾習工科之學生前赴該國就東京議院與各府議會將其形模規制費用逐細調查繪具圖說以憑參酌仿造並就江甯省城北首購備空曠

之地以爲會場基址一俟該員回國卽當參以臣端方考查所見斟酌豐儉刻期營構此籌備之在建築者一也以上各節均係數月以來體察情形斟酌變通切實籌備現在選舉名冊業經逾限確定所有初選複選當可如期舉行臣等仍當督飭在事各員嚴定功過不任稍涉延玩致誤成立其開辦常年額支活支暨司選員出發旅費以及購地建築各項經費均飭由財政局陸續籌撥其各屬調查費用准於地方公款內撙節動支事關憲政懇恩准予作正開銷除咨報憲政編查館查辦外所有遵設江甯諮議局籌辦處暨臚舉辦理情形各緣由謹合詞恭摺具陳伏祈皇上聖鑒謹

奏

駐皖營隊回防片

宣統元年閏二月

再上年十月間安慶兵變臣適奉

命校閱江鄂陸軍在太湖差次得報後當卽飭派標統艾忠琦督率江甯陸軍步隊第三十四標又派協統徐占鳳督率江北陸軍步隊第二十五標及馬隊第七標之第一營馳往援勦一面電商湖廣督臣陳夔龍飭派與操之鄂軍一標同往援應迨抵安慶因該口兵等已被官軍擊潰分股北竄卽商同撫臣朱家寶選派各軍跟蹤追擊並以北路兵力單弱飭由提督程允和派撥浦口巡防馬步隊各一營馳往廬州又調徐防馬隊一營馳往鳳陽迎頭攔勦嗣據各屬稟報各路潰兵均經擊敗散逃無踪已由安徽撫臣添練巡防營隊分路梭巡布置極爲周密當將以上派援各軍分別撤調回防僅留甯軍步隊三十四標第二營及江北步隊一營又由浦口巡防軍另行派撥步隊兩營分駐省城蕪湖藉資鎮

懾各該營自留防以來巡緝尙屬得力現屆春融地方極爲靖謐
皖省軍隊亦已徵募編練所有留皖駐防各營隊已由臣商淮安
徽撫臣先後飭撤仍令各回原駐防所認真訓練除咨部外謹附
片具陳伏乞

聖鑒謹

奏

京察議敘謝

恩摺

宣統元年閏二月

奏爲恭謝

天恩仰祈

聖鑒事竊宣統元年閏二月初二日恭奉電鈔本日內閣奉

上諭三載考績爲國家激揚大典內外滿漢諸臣有能共濟時艱
勞勩最著者允宜特加甄敘兩江總督端方規模宏遠應變有方

著交部議敘欽此聞

命驚慚撫衷悚惕欽惟我

皇上受命維新用人求舊

性仁如堯舜黜與陟一秉大公

達孝嫔武周臣與政兩俱不改

好所好而惡所惡憲法不外同民

親其親而賢其賢列國於茲觀政若臣者寄重東南才慚中下縱

環球周歷曾無益於邦交卽江表救平亦仰承乎

廟略猥蒙

濫諭

錄及微勞

帝天有喜之顏出於望外

日月無私之照旁及江東臣惟有殫竭血誠勉承

天語建樹規乎遠大仍致謹於近小之間因應協乎機宜要不離乎忠信之本領要地於襟江帶海敢抒蚊負之愚忱際

昌期於緯武經文願贊

龍飛之初政所有臣感激勛勵下忱謹繕摺具陳伏乞

皇上聖鑒謹

奏

續籌推廣上海巡警摺

宣統元年閏二月

奏爲上海巡警擬請加撥經費續籌推廣以期漸臻完善而保治安恭摺仰祈

聖鑒事竊查上海華界創辦巡警始於光緒三十一年其時僅就所裁滬軍親兵營挑選壯丁改充巡士先就城廂內外站街邏察

所需經費卽以親兵營底餉撥用旋因南北市相距遼遠不能兼顧奏准添募巡警五百名歲需餉銀三萬八千兩照案在關稅項下動支嗣於三十三年因北市與寶山交界處所市廛日闢浦東一帶匪類滋多又添招巡警二千餘名遴派道員汪瑞闔會同江海關道總理其事每月添撥關稅銀一萬兩以資應用均經奏咨在案惟該處警局所轄地跨兩縣與各國租界處處毘連近來橋寓商民日有增益雖已加添崗位竭力綢繆無如撥款有定不能不計費圖功往往有必須改良之事輒以豫算不足因而中阻以視租界內之財力雄厚日事擴張者究不免相形見絀况上海爲通商要埠警政乃治權所關若仍因陋就簡卽不免予人以訾議之端今欲杜漸防微尤須急起直追力求精進第轄界寬廣建設紛繁又非寬籌經費無所措手現經臣督飭關道局員再四籌商

擬就所管地界劃分四路以城內爲第一路浦東爲第二路北市
縣長剖其東北爲第三路西南爲第四路每路設分局一分區五
共計二十區普設巡警站崗並另設騎巡隊分駐浦東北市兩處
晝夜梭巡以補站崗巡警之不逮又設消防隊以救災扞患設偵
探隊以弋匪緝兇添設巡警學堂以儲弁記警長之選又因黃浦
江與蘇州河交通之處商船麇集宵小潛藏擬增設水巡警局一
所購製舟楫雇募水手劃分河道常川巡緝又慮華洋隔閼易啟
紛爭擬仿北洋警章遴用洋員以便交涉此皆揆時度勢萬難減
省者也所有額支經費樽節估計如薪餉公費工食馬乾等項常
年約需規銀二十萬零六七千兩又學堂經費需銀一萬二千兩
又擬辦水巡薪餉養船等費約銀一萬兩其活支項下製辦軍裝
衣袴靴鞋及緝捕卹賞醫藥等費約銀二萬六七千兩統共需銀

二十五萬五六千兩前經兩次奏定指撥江海關稅銀十五萬八千兩及親兵營底餉銀一萬二千餘兩共銀十七萬兩出入相抵約尙短銀八萬餘兩除前定撥款之外每月至少須加撥銀六千兩遇閏照加方敷布置擬請仍在江海關稅收項下照案動撥以濟要需據上海道蔡乃煌總辦巡警局道員汪瑞闈會稟請奏前來查上海巡警自開辦以來現已漸著成效市廛櫛比日見繁盛祇以限於經費未能實力推廣規模既隘固難饜中外之觀瞻儲備不豐亦奚望經營之周密該道等現擬辦法均屬切要所請加撥之款亦實無可再減合無仰懇

天恩俯念上海警察關係至鉅與他處情形不同准予飭部照撥實於大局有裨除飭取詳細章程咨部查照外所有上海巡警擬請加撥經費續籌推廣緣由謹會同江蘇巡撫臣陳啓泰恭摺具

陳伏乞

皇上聖鑒訓示謹

奏

擬改縣名及城門名片

宣統元年閏二月

再據江甯布政使樊增祥詳據儀徵縣稟該縣舊名揚子縣又名儀真縣雍正元年因避

聖諱嫌名改儀徵縣現以上二字應避

御名並無可以恭代之字應請仍復舊名改爲揚子縣所有該縣印信並教佐各員鈐記均應改換另鑄容飭造呈模冊分別咨部飭司更換再江南省城有儀鳳門並擬改爲威鳳門以歸一律所有擬改縣名及城門名緣由理合會同江蘇巡撫臣陳啓泰附片具陳伏祈

聖鑒謹

奏

密陳力保主權片

宣統元年閏二月

再此次奏請推廣上海巡警實因甯北一帶地方處處與租界壤地相接英工部局蓄謀窺伺已非一日近見我自設巡警馬路增修市廛漸密環繞彼界隱若藩籬遂懷實逼處此之憂彌動狡焉思逞之志乘我組織未盡完備權力未盡伸張急起直追爭攘愈力愆慮領事公使屢申擴界之請觀其措詞輒以華界警政不全衛生不合法藉爲口實其伺隙抵瑕之意已可概見雖迭經外務部與_臣嚴詞拒駁而外人野心迄未少斂近於開常年大會時該局議長又對衆提議欲將滬甯鐵路與蘇州河中間之一段自廣肇山莊起至虹口衛生場止圈入租界各西董多數贊成_臣默

察其提議之隱衷目的所注全在滬甯鐵路夫滬甯鐵路爲蘇省交通之最要機關今雖借款築造將來贖回自辦仍可無礙主權若一經推展則一出鐵路車站卽入彼之轄界是我縱有贖回之路已自失其利用之機關而彼乃以轄界之權隱扼我交通之樞紐有事之時設遇調兵運餉瞬息難延而經過租界非待外人之允許不能逕乘火車道路隔閼所關豈細無事之日則抗納釐金剝我財政甚且傳人拏犯非經領事簽字不能拘提主客易位受患無窮抑臣更有進者查各國通商條例外人入居國境但有居留之名本無租界之說從前閉關時代未諳外情致有斯誤一俟國力稍裕之時爲權利恢復之計則改正條約收回治外法權事在必行苟今日於覬覦之時多保尺寸土地卽將來於交涉之際少費無數磋磨所以無論其如何要求斷不能不堅持峻拒以遏

其謀但彼既詆我警政未臻完密雖係有意吹求藉端嘗試然度勢揆情我警政之規模一日不完則彼展界之狡謀必一日不戢此可斷言也爲今之計惟有速籌推廣力求完善爲杜絕藉口之維一政策昨已將一切情形暨擬擴充巡警辦法密電外務部度支部查照在案臣督同江海關道蔡乃煌暨辦理上海巡警道員汪瑞闔通盤籌畫所擬畫分四路二十區一律設巡站崗另設水巡騎巡消防偵探各隊並設巡警學堂雇用洋員均屬推廣警務中萬難緩辦之舉竭力撙節估算必須按年添籌七萬數千金方能有所措手明知目前庫藏支絀籌撥爲難惟此事關係全局利害非尋常地方建設可比不敢稍存靳惜之心致事機坐誤是以另摺奏懇

天恩俯准敕部照撥又華界自來水一事亦非速籌設置不足以

清界限而杜干涉容由臣督同該道等酌定辦法再行詳細奏陳
臣爲力保主權起見謹附片密陳並請免發鈔以昭慎密伏乞
聖鑒謹

奏

籌撥京防要需片

宣統元年閏二月

再京口駐防續備軍津貼及八旗各學堂經費歲需銀二萬四千
兩原議在蘇州銅元餘利項下指撥嗣因銅元停鑄餘利無著先
後奏請指撥鎮江關罰款銀六千兩其餘一萬八千兩在江海鎮
江兩關洋稅項下分認籌解接准部咨以後應令自行設籌不得
再請動撥關稅等因當經分別咨行在案茲准京口副都統奎芳
以本年興學練軍款仍無著咨請續撥前來臣查京口駐防經該
都統籌辦學堂改練新軍均已漸著成效滬鎮兩關正稅雖未便

再行動撥而現在疊奉

諭旨飭籌旗民生計若因經費無出致令興學練兵廢於半途殊無以副

朝廷作育人才整飭武備至意臣一再籌維惟有遵照部議另行設籌查京口各學堂常年經費銀一萬六千兩鎮江關稅罰款項下前已指撥銀六千兩應再由該關罰款內加撥銀四千兩每年共撥銀一萬兩其餘六千兩連同練兵津貼銀八千兩統由江南財政局在江南要政新加價項下動支均自宣統元年起的按年照數籌撥以濟京防要需除分咨稅務處度支部陸軍部學部查照外謹會同江甯將軍臣清銳江蘇巡撫臣陳啓泰附片具陳伏祈聖鑒謹

奏

遵查皖省參案摺

宣統元年閏二月

奏爲遵

旨查明皖省各州縣被參各節據實復陳恭摺仰祈

聖鑒事竊照光緒三十四年十二月十六日承准軍機大臣字寄
光緒三十四年十二月初六日奉

上諭有人奏皖省吏治窳敗民困貪殘請飭查辦嚴懲一摺著端
方朱家寶按照所參各員確切查明據實具奏毋稍徇隱原摺著
鈔給閱看欽此臣等當卽遴委安徽試用知府曹鼎張茂鏞並由
臣端方加派江蘇候補知府宋學周分別前往各州縣按照原參
各節明查暗訪務得確實情形去後茲據各員查明稟復前來臣
等詳加復核互相印證並檢查案卷參以衆論如原奏壽州知州
趙鏡源該州孤集坊有朱姓誣楊姓爲匪該州帶差勇下鄉火楊

姓之屋波及鄰舍並轟斃四人詳請派兵勦辦皖撫查悉捏報將該州記過一節查壽州東鄉孤堆集有楊化芝孫繼德二匪一係轟斃湯繼茂匪犯一係殺死楊化純匪犯該州訪悉該匪等藏匿處所於光緒三十三年十一月十四日親帶勇役前往該處兜拏該犯膽敢率同黨羽拒捕槍斃什長龍純儉護勇朱應舉並傷該州及哨官張在龍勇役等當時開槍格殺楊澂三楊汶仲二名並獲住楊汶林楊小三子二名餘匪竄逸因申請壽州鎮派兵會拏並將匪居焚燬查孤集坊自係孤堆集之誤楊化芝等均係殺人匪犯有案可稽並非朱姓誣指該州於是役冒險從事身被槍傷係爲緝匪安良起見至稱皖撫查悉捏報將該州記過查無其事又壽州隱賢坊紳姚長富因族人與涂姓鬪毆詞牽姚長富該州將姚管押罰銀始獲釋放一節查姚長富由軍功保升游擊因涂

名士姚應球演戲聚賭糾衆圍毆案內致被牽涉到官姚長富自知咎有應得自願罰繳洋一千元其洋當由該州分撥學堂商會充作公用並非入己又壽州李山廟鄧善林被人誣控該州往拏未獲經其居募人將善林槍斃於路更將田一千五百畝充公經鄉民折價銀三千兩完案一節查鄧善林係槍傷鄭子仁之犯經鄭子仁之父控經該州購線嚴拏鄧善林率衆臨拏拒捕被格殞命並查出鄧善林有遺產田一百六十四石零詳請充公有案並無一千五百畝之多亦無鄉民折價銀三千兩完案之事又炎劉廟監生吳士懷因黃小金仔命案詞牽賈姓之子及士懷之弟賈賄洋五百元獲免士懷不肯行賄該州率役焚其住屋當舖並將其母妻褫辱一節查吳士懷之弟士魁又名吳小拐子因搶奪過路太和縣人阮姓馬匹控州有案旋與賈仲卿等在賭場槍斃

黃小金仔屍親赴州呈控經該州飭拏並以吳士懷賈之榮二人
係案中要證帶州押訊吳士魁與吳士愷吳士樂等向開米行代
當該州以其窩賭釀命並犯搶奪重情勒令封閉事隔月餘該州
路經該處見封條扯去仍舊開賈士魁又在逃未獲因將賭屋焚
燬婦女等在场撒潑各予懲責現在賈之榮已量予保釋吳士懷
經該州詳請監禁勒交吳士魁訊辦又該州朱家集朱澄清村中
失去電桿該州責令朱澄清賠償更傳案訊押格外罰銀三百兩
無力措交於監中瘵斃一節查朱家集地方上年正月失去電桿
由電局函請查追村董朱清臣經該州傳訊追賠當由該董遵令
電桿所在地段業主朱姓湯姓分賠了案後因湯姓與朱姓爲墳
地纏訟該州訪悉朱清臣插身多事令罰洋四百元撥充該集公
用朱清臣未及照繳旋在自新所中因病身死原奏朱澄清自係

朱清臣之誤所謂痍斃監中當卽此事又迎河集紳聶星五之佃戶在道旁設店被差指爲窩匪該州勒罰銀五百兩開釋一節查張李集地方董事聶星五於楊义店地方開設蹄角行該州以該處不通大道不應開設行鋪將牙帖繳銷斥革董事查無勒罰銀兩確據又孟佛寺監生邵維屏因邸姓命案被牽久經斷結該州差傳到署勒令出銀三千兩一節查邵維屏係于邦達命案牽涉之人經前任州訊押因病取保去年該州以維屏病愈飭傳還押旋於十一月省釋至於勒罰巨款之說並無佐證可指似不足信又白洋店居民梁五厚與石邦彥有隙邦彥賄串幕友汛官等誣指五厚爲匪黨該州將五厚站斃五厚之兄赴府控訴又將梁振國監押一節查梁石兩姓本係村鄰因爭奪碼頭積嫌已久梁五厚又名梁五猴子該州以其素不安分訪拏到案旋卽在押病斃

外間因石邦彥與之積有宿嫌遂有賄串之說茲經詳加詢問無從指實殆係浮言梁五厚之兄振國以其弟被押致斃上控求伸經該州移鄰封會拏遞回監押該州辦理此案稍涉嚴切頗不滿於人言又原參穎上縣知縣宋毓衡用已革冊書爲漕總庫總浮收丁漕契稅銅元按七五折收各節查該縣舊有冊書已悉數裁革劉廷俊李樹屏二人從前本由冊書兼充戶書冊書既裁仍充戶書該縣新官到任向在戶書卯冊內挑選一二人派充漕總庫總專司經征丁漕事宜宋毓衡到任係選派劉廷俊李樹屏二人充當近年市面銅元與制錢價值懸殊該邑征收各項係按照穎州府屬稟定通章制錢與銅元各半搭收惟市面現錢缺乏花戶完糧多用銅元縣櫃既有定章不得不以所逾半數銅元退還花戶令向錢店換準制錢方許納庫第以銅元掉換制錢其中不免

折耗此銅元七五征收之說所由來也此外通用制錢民間行使向扣底串完納錢糧則須補足間有攙用小錢申水亦所不免積此數因遂訛傳有浮收之說至謂錢不及分概以錢計漕不及勺須按升收原奏未指花戶姓名無從質究傳詢現辦庫書漕書堅稱並無浮收及以錢包分以升包勺各情弊一再研詰矢口不移當飭出具切實甘結存查又潁上縣文生胡秉忠李永昌因詰責庫書押禁嗣經紳民上摺含混了事李永昌瘵斃監所一節查文生胡秉忠因包攬漕糧一案於光緒三十三年斥革詳查當時起釁之由係該革生出頭霸持意欲多用銅元所致李永昌卽李守本係三十三年秋間前巡撫臣馮煦札拏訟棍案內牽涉逮案並非與胡秉忠糧案干連已於三十四年正月十七日因病保釋至二月十五日在家病故原奏謂爲瘵死監所殆出傳聞之誤又原

參霍邱縣知縣王嶽崧該縣童生汪玉生置買田產爲訟棍勾串
丁役以匿稅朦稟勒索鎖押斃於押所一節查汪玉生係因漏稅
提押取保後服毒自盡惟其所置田產於是年十月成交十一月
初已遭差提追押價買未及匝月投稅實未遲延該縣辦理操切
遂至汪玉生服毒隕命無怪人言嘖嘖羣以爲冤第死由自盡曾
經鄰封驗明通報委無別項傷痕原奏謂爲徧體鱗傷實無其事
又汪振鐸京控抱告汪學基由李春恩賄人謀斃一節查該抱告
由京控遞解回皖路經桐城縣境患病身死經前桐城縣知縣陳
正源驗明稟報有案實無被人謀斃之事此案經屍親汪振鐸京
控省控業已飭將全案卷宗提省發交讞局現正催提人證秉公
訊辦另行議結俾成信讞又原參宿州知州張守誠該州境內著
名巨匪周悖周暴等聚黨數百人白晝搶劫標票勒贖又有牛小

科牛貴生二匪各率徒黨任意擄掠又在老荒地唱戲斂錢其不到者或燒或殺每年送差錢一千貫州衙動靜無不周知該州並不緝捕一節查周悖周暴周丫頭均周金圩子人平日成羣聚夥好勇鬪狠眦睚之怨動輒尋仇搶奪婦女習爲常事老荒地卽在本處湖內唱戲斂錢實有其事周悖與其黨羽牛小科牛貴生等於三十四年十一月間在三陳莊地方盤踞分賊經營兵團勇往拏拒捕當場擊斃周悖等十餘人牛小科竄往亳州牛市賣牛失主追踪拏獲送由亳州訊辦周暴則現尙在逃此項匪徒聞與捕役素有往來原奏謂每年送差錢一千貫州衙動靜無不周知當卽指此又宿州西四鋪地方有王姓被搶親追到窩搜出贓物赴州報案該州以不先報官罪之令與匪服禮一節查四鋪民人王文燦於上年九月間呈稱被五鋪侯占本等行劫衣物伊子玉成

申跟踪探悉次日到侯家廟侯開玉家搜出原贓有福聚恆錢袋
爲證侯開玉則稟稱王文燦白晝行劫等語該州以王姓侯姓皆
開設店鋪不類爲匪之人詢之兩造董保亦各互相辨駁延未定
案原奏謂與匪服禮其事始息者雖非事實然其庸懦無能已可
概見又原參渦陽縣知縣蕭德驥該邑職紳趙學中爲伊弟趙學
志殺死屍妻控縣不理一節查該縣東北鄉民人趙學中兄弟三
人次名學禮三名結石結石於三十四年春間犯竊經趙學中訓
斥懷恨遂於七月初九夜乘伊兄趙學中熟睡用鐵擻頭擊傷身
死卽時逃逸因屍母不願報官並未請驗九月初間屍妻趙王氏
因與夫弟趙學禮口角赴縣互控供詞牽涉趙學中身死一節該
令卽將趙學禮提案訊出前情以趙結石在逃迭次比差勒拏未
獲案懸未結又馬學易之姊萬馬氏爲張姓毆傷張姓賄託千總

關說致萬馬氏控告被責並將馬學易重責監押一節查上年九月間民婦萬馬氏家走失小雞與鄰人張奇等口角互毆經王姓調處勸息氏兄馬學寅卽學易堅不允息遂致互控該令因兩造口角細故訪由馬學寅從中唆使曾予答責旋由鄰保調處銷案馬學寅亦卽具結保釋至謂龍山千總得賄關說原奏並未指明過付之人事無證據且該千總現已交卸無從究詰又該邑劫案屢出不聞緝捕詞訟非賄不行一節查該邑向稱難治之區近歲尙屬安靜上年劫案四五起時有破獲詞訟本不甚多行賄尙無確據以上各節均經臣等悉心體察逐款詳查實屬毫無隱飾署霍邱縣知縣王嶽崧因稅契苛罰致釀人命情節甚重相應請旨革職以昭懲戒宿州知州張守誠捕務廢弛縱盜殃民亦屬咎有應得已經臣家寶另案奏參革職應請免再置議前壽州知州

趙鏡源懲辦匪徒或焚燒房屋或查封田產不免稍涉嚴切迭次
因案罰銀雖係悉數充公亦有不合惟皖北風氣強悍伏莽素多
而壽州尤爲盜藪全在地方官精明強幹艱險不辭乃能震懾兇
頑又安良善趙鏡源嫉惡素嚴到任後竭力整頓緝捕並復親往
捕匪身受槍傷盜風爲之漸戢迨其丁憂離任州治正紳猶以該
員治行卓著再三電陳是其功多過少輿論可憑惟有仰懇
聖恩寬免置議爲地方官敢於任事者勸署潁上縣知縣宋毓衡
渦陽縣知縣蕭德驥被參各節均係傳聞之誤並請毋庸置議霍
邱縣汪振鐸京控一案飭由安徽臬司督同讞局印委迅速審明
擬辦宿州之逸匪周暴暨通匪之差役渦陽縣之逃兇趙結石分
別嚴飭勒拏務獲究報所有遵
旨查明皖省州縣被參緣由謹合詞恭摺具陳伏祈

端忠敏公奏稿卷十三終

五十一

皇上聖鑒謹

奏

端忠敏公奏稿卷十三終

端忠敏公奏稿卷十四

賞給大清會典謝

恩摺

宣統元年閏二月

奏爲叩謝

天恩恭摺仰祈

聖鑒事宣統元年二月初九日准外務部電咨臣蒙

恩賞給大清會典一部當卽派員赴部領賞回甯望

闕叩頭祇領伏以書詳八政用綏建極之猷禮定六官肇啟太平之運上稽中古下逮勝朝各有宏綱鉅目之編奉爲措正施行之本我

大清宅中圖大

累洽

重熙用成會典之專書仰荷

端忠敏公奏稿

卷十四

立
鑑裁於

列聖固已正德厚生利用前規承六府之遺議禮制度考文
邳治邁百王而上欽惟我

德宗景皇帝堯文丕煥

舜孝同符宣

大號於絲綸式

成規於方策從此

十一朝掌故匯淵海而無涯允宜億萬代

心傳懸日星而並耀我

皇上欽承寶祚

宏迪

前光昭

聖孝於羹牆奉

天經於巾机

特頒官本徧逮疆臣聞

命自天銜恩無地臣惟有恪循職守懍戒愆忘忝領襟江帶海之名區勉襄緯武經文之

初政記御書而肅拜惟增攀慕於歐陽觀故事而請行所願步趨於魏相所有臣感激榮幸下忱理合恭摺具陳伏乞

皇上聖鑒謹

奏

籌擬新兵出伍情形摺

宣統元年三月

奏爲續備後備軍制亟宜切實施行謹將江南試辦新兵出伍並籌擬情形恭摺具陳仰祈

端忠敏公奏稿

卷十四

一一

聖鑒事竊查前練兵處原定陸軍營制餉章其分軍制略內開軍分三等一曰常備軍選土著之有身家者充之屯聚教練三年出伍退歸原籍一曰續備軍以常備軍三年出伍之兵充之分期調操三年遞退一曰後備軍以續備軍三年遞退之兵充之仍分期應操四年退爲平民等因具見因時立制籌畫精詳伏念各國軍備之強無不恃有續備後備兩軍爲之補助觀近世列強戰史每一戰役動衆輒數十萬至百數十萬之多卽如日本當光緒二十八九年間其全國所養之兵祇十四師團爲數纔三十萬人及遼東事起徵集兵數不下百萬藉非於續備後備兩軍儲才有素烏覩此偉大之軍容此制之美善其最著者約有數端一則更番訓練民不疲勞在營在鄉皆有朝氣而無暮氣二則三年一更行之十年而一兵之餉可養三兵一鎮之師可成三鎮以現定三十六

鎮五十萬人計之戰時可得勝兵二百萬人三則續備後備之軍人散布於全國設有事變隨時隨地得以徵集成軍足隱消潢池盜弄之萌而內亂可以永定我國創辦陸軍已閱數年待兵之禮視昔加優養兵之餉較前加重凡此禮隆餉厚無非爲收效將來乃因創辦之初新軍之成立多就舊軍改編其中召募居多退無可歸之軍籍以致良法美意未克實行此大可惜者也夫買櫝還珠智者所笑因噎廢食達士所譏有以練之無以儲之於備之之義云何況練兵宗旨重在鞏固國防以國籍論固有本籍外省之異以國防論何有此疆彼界之分兵權統於一尊似不應沿時俗省界之名詞顯分畛域聞陸軍第三鎮退伍辦法其于外籍兵丁因無兵籍可歸暫行變通辦理各加給恩餉兩月送歸原籍遣散等因此固一時權宜之計迫於無可如

何然而三年訓練之功未收實效臨時遣散之費復耗巨資揆諸常備續備之規定名與義實有未符此所以詳繹部章而於第三鎮暫行變通辦法不敢輕率沿用者也現在江南軍隊自成鎮以後至今已滿三年查編練之初亦係就原有防營歸併刪汰空出兵額由江寧鎮江常州揚州各府屬仿照徵兵辦法以勸爲募選擇年體資學合於兵格之士召集補充總計第九鎮全鎮兵士土著之人比較外籍稍多當成軍之初已將前練兵處所定入伍三年退爲續備又三年退爲後備再閱四年退爲平民各條明白宣示若至及瓜之日尙無解甲之期不免失信于民抑祇令土著者先歸外籍者留後是一營之中辦法忽分兩種軍政亦覺紛歧臣與在事各員一再籌商僉謂三年出伍之制限期已屆萬不能稍緩須臾而且一省之中一鎮之兵斷不容有兩種辦法擬卽定以

光緒三十四年十二月底爲新兵第一次出伍之期嗣後每年十二月底皆舉行出伍一次第一次之辦法暫時輔以兩例一例爲新兵自入伍之日始扣至上年十二月底無論或缺數月或少數日均歸于第二次辦理一例爲在營之兵雖已滿足三年其籍貫身家未經考查得實者無論爲土著爲外籍亦均歸於第二次辦理除此二例外本屆實應出伍者計全鎮之中祇有步隊三十三五兩標尙有應退之兵其總數纔五百一十三名甯鎮常揚四府之人俱有其中以丹徒一縣爲最多然尙不滿百名若江都宜興等縣每處祇一名二名此外州縣約在十名上下管理約束均尙簡便易行擬由各地地方官代爲照料應設駐弁暫時從緩以資節省復經擬定續備軍暫行簡章分爲帶送條例駐弁條例徵調條例續備軍在籍條例以資遵守其駐弁條例卽暫由各地地方官代

辦出伍之日臣親詣操場召集各兵面加誥誡教之以矢忠砥節敦品勵行勗之以毋忘

君恩毋忘出身所自以及軍人之身分軍隊教育之宗旨製爲訓詞人給一分俾令時時警省各兵士歌頌

皇仁有至感激泣下者其外籍之兵當入營之初本無鄉人作保迨改編之際亦未遑確實行查應照第二例所規定再行留營一年俟考查得實歸於第二次辦理現已分飭詳查各兵之實在籍貫身家以便屆時遣送惟念續備軍制一日不能實行則軍力無從加厚軍備無自而強一旦有事依然在營有兵在鄉無兵召募有兵徵調無兵夫豈

朝廷不惜巨餉創辦陸軍之本意而且軍政首在統一制度未便參差假使各省之中有一省稍緩施行已足牽動全局相應籲懇

聖慈俯念締造陸軍辛苦已閱數年茲事爲儲備所關萬不容徘徊觀望擬請

旨飭下陸軍部將續後備軍制簡閱點名補充召集各項詳細章程迅速擬訂通行各省一面

明頒渙汗限令各省統於本年以內一律實行庶幾規章齊一畛域潛消凡爲本國之軍人皆有可歸之兵籍不獨江南軍政藉以維持實於全國陸軍均有非常之關係也

皇威而張國勢胥於此制基之矣抑臣更有進者日本之變法圖強實先軍政其常備續備後備之制早並行於開國會之先溯當初令徵兵民間呼爲血稅洎乎退伍之兵日多尙武之風成習下至顛蒙婦孺皆有忠君愛國之心若及歲壯丁則更以不獲執戈爲恥論者謂其憲政成立之速實由軍事教育爲之先河良非虛

譽我

國陸軍辦法大都取法東鄰凡茲出伍之兵皆經過普通教育當此力行憲政之時以日本之前事例之此制之實行洵可爲提倡開通之一助是就豫備立憲而言亦不容或緩者也倘蒙

聖明採擇立斷施行則江南幸甚全局幸甚所有續備後備軍制亟宜實行緣由並江南試辦出伍籌擬情形理合恭摺具奏伏乞

皇上聖鑒訓示謹

奏

捐輸分別停止展限摺

宣統元年三月

奏爲江南賑捐及七項常捐兩年期滿遵限停止並請將代收免保留省兩項捐輸再行展限一年以還部款恭摺仰祈

聖鑒事竊照光緒三十二年江南北所屬各州縣大水爲災饑民甚衆籌辦工賑平糶款項奇絀奏明開辦貢監銜封翎枝捐款及七項常捐以資應用次年春賑需款尤亟又經奏明息借農工商部存本銀一百萬兩暫濟急需並請將異途出身人員應繳捐免保舉銀兩及保舉過班留省人員應繳補交留省銀兩二項由江寧代收一年一半解部一半充賑嗣因一年限滿賑款借墊甚鉅而尤以息借農工商部存本爲大宗復經奏請將賑捐及七項常捐展辦一年以還移用庫帑息借商本等項並將代收兩項部捐展辦一年專還原借農工商部存本先後均經部議允准在案茲查江南賑捐及七項常捐自光緒三十三年十二月初五接展之日起除去封印兩個月扣至宣統元年二月初四日又屆一年限滿近來捐務積疲已成弩末雖經督飭極力勸辦收數終屬寥寥

應卽查照部議依限停止飭將已收銀兩截數分起造冊請獎一面開單報銷其商約大臣盛宣懷墊用義賑錢一百萬串原令勸捐歸墊應由盛宣懷自行截數請獎以足一百萬串之數至江北賑款項下懸欠過多擬請紳民中如有報効鉅款者照案專奏請獎倘再不敷當另由_臣等設法歸補又代收免保留省兩項部捐自光緒三十四年三月初四日接展之日起除去封印一個月扣至宣統元年四月初三日又屆一年限滿本應一併停止第息借農工商部存本銀一百萬兩奏明專以此項抵還統計兩年所收捐數自第一次起至六十三次止共收銀七十九萬六千六百兩除以一半解部之外僅剩一半銀三十九萬八千三百兩以之歸還部款本息尙不及十分之四推原其故由於直隸等省先後奏准代收兩項部捐各省分辦以致捐收短絀此項息借部款關繫

重要斷難久事虛懸而江南財源枯竭羅掘久空別無彌補之法
惟有仍請將代收兩項部捐再行展限一年俾可歸還部款據江
南賑捐總局司道具詳請奏前來臣等覆核無異合無仰懇
天恩俯念江南息借部款懸欠甚鉅准將代收免保留省兩項捐
輸再予接展一年屆時體察情形再行停止出自

逾格鴻慈再各司道攤捐助賑各款應仍照案按年請獎以免向
隅所有江南賑捐及七項常捐遵限停止並請接展兩項部捐緣
由謹合詞恭摺具陳伏祈

皇上聖鑒謹

奏

自來水由官經理片宣統元年三月

再上海內地無自來水光緒二十三年因與租界毗連慮被侵

越經前任江海關道招令商人設立公司集資承辦維時風氣初開安設水管無多售水有限且當經營伊始所定水價未敢取盈因而獲利甚微招股不能應手其購機建置全由借墊而來雖已竭蹶圖成而入不敷支未能推廣其原辦之商又相繼物故積欠累累勢漸不支迨至上年冬間滬市銀根緊迫該公司幾有傾倒之危聞將添招洋股另行組織設爲外商入則交涉易起利權漸失所關匪細自不能不力爲維持當飭江海關道蔡乃煌督同地方紳商公同籌議擬自本年二月十五日起先由官擔任借款從權收回暫行經理以便清釐水價並將招股添機還款各事次第籌商仍俟規模大定卽交由工程局紳董接收按照商律公司章程另舉總理協理改爲地方自辦惟查該公司原置地產房屋渠池橋塔水井以及機器水管各項物業除折減外現已估定作

價規銀一百二十五萬兩內除該公司原欠大清銀行及各商號
並善堂書院所存公款共約銀九十八萬餘兩暫仍認息接借約
尙短銀二十七萬餘兩擬由道庫在於商部生息款內酌提銀二
十萬兩改存該公司照舊生息下餘不敷之款卽由工程局紳董
另爲籌集先將全業收回俾免私行招頂別生枝節其一切調度
均責成江海關道督率各紳妥爲經理俟股款集有成數欠款陸
續還清再將官督名目撤銷專歸公司籌辦以一事權據江海關
道蔡乃煌詳請核奏前來臣查上海地方市面繁盛居民櫛比自
來水爲日用必需之物苟能經理得宜非無餘利可圖乃原定水
價過廉設管又少承辦之商力薄勢渙以致一蹶不振今議設法
改良暫由官督紳辦一俟整頓就緒卽交歸地方自辦旣收衆擎
易舉之效且免主權旁落之虞惟股款一時驟難招集該道擬請

由官擔任並請將商部生息之款酌提借給係爲暫濟急需起見
自應照准除批飭遵照並咨部外理合會同江蘇巡撫臣陳啟泰
附片具陳伏乞

聖鑒飭部查照立案施行謹

奏

從優議敘謝 恩摺 宣統元年三月

奏爲叩謝

天恩仰祈

聖鑒事宣統元年三月初二日恭讀電鈔內閣奉

上諭慶親王奕劻奏遵保恭修

普陀峪

定東陵工程出力人員開單呈覽一摺

普陀峪

定東陵工程自光緒二十一年開工以來歷經十餘載該承修王大臣督率各員悉力經營備著勤勞自應量予恩施離工監督監修辦事官兩江總督端方等均著交部從優議敘等因欽此聞命自天悚惶無地伏念臣起家水部負土

山陵過叨

慈聖之深恩久玷封圻之重寄在昔經營

福壤曾無象鳥之微勞卽今瞻戀

靈宮莫挽

鳳鸞之仙馭乃荷

溫綸下逮甄錄前勛在

朝廷推孝思不匱之恩在微臣有成事因人之愧

端忠每及孝和

卷十四

仙鄉北望遲屑涕於

松扉

佳氣東園祝

安神於

桂寢所有臣感悚下忱謹繕摺具陳伏乞

皇上聖鑒謹

奏

請徵銀解銀另收公費摺

宣統元年三月

奏爲銀價益漲州縣賠累更深仍請將上下兩忙地蘆各款改爲徵銀解銀另收公費以維大局恭摺會陳仰祈

聖鑒事竊臣等准度支部咨議復甯蘇兩屬州縣賠累請將上下兩忙地蘆各款改爲徵銀解銀另收公費應毋庸議一摺光緒三

十四年十一月初十日具奏奉

旨依議欽此鈔錄原奏分咨前來臣等伏查甯蘇兩屬銀貴錢賤州縣經徵錢糧收不敷解加以辦公無著虧巨累深節經合疏詳陳早荷

聖明洞鑒當光緒三十三年秋間臣等奏准暫將蘇屬徵忙加收二百文其時以銀易錢每兩尙祇一千六七百文州縣已不能支迨上年冬間倏漲至一千八九百文今年且二千數十文矣臣等卽恐銀價繼長增高此後靡有底止何敢援照前案再請加收是以一再會商始有查照舊章徵銀解銀之請以爲如此辦理官民兩無所傷此次度支部議復以暫加二百文之奏尙未經年遽爾更張恐失民信且傷政體在部臣衡情論事固不能不遠計深思惟臣等考察情形按之部臣所奏各節似有不必慮者二有不及

待者一而事危時迫大局攸關若不亟籌補苴其影響所至實有
大可憂者三敢再爲我

皇上觀縷陳之查市面銀價今昔不同且早晚各異此殆無人不
知所以百貨價值亦恆有漲落之時民間買賣初未聞有爭執之
說且商業各項貿易有向係錢碼近已改爲洋碼者民間亦安之
若素毫無異言誠知加價改洋均因銀價日昂爲必不得已之舉
至於正供田賦事異實同豈獨故昧天良不論公理本無欺民之
意何來失信之嫌此所謂不必慮者一也我

朝深仁厚澤減賦蠲租實惠及民不能僂計卽如兵燹以後原定
忙銀折收二千文同治七年及十一年因市價翔貴先後兩次增
收至二千四百文嗣後銀價漸平於光緒三年減收二百文二十
二年又減收二百文二十八年因賠款加收二百文上年復經

臣

等奏准加收二百文是折收之多寡向視銀價之高低在官本毫無私心在民亦無所藉口且查戶部則例各省田賦凡地丁耗羨皆以銀數爲定是折錢交納本屬通融而定例具存何傷政體此所謂不必慮者二也部議又以銀幣重量已定此後庫款收發悉歸一律永不准再有補平補色傾鎔火耗名目並飭將地方官及經收官吏辦公經費各款詳擬辦法咨部彙核釐定永絕胥吏侵漁之漸誠屬正本清源意良法美如果通行銀幣則銀價不平自平如果永絕虛糜則州縣不恤自恤無如銀價之貴已非一年州縣之累高於百仞卽以近一年內銀價比較每兩已遞增至五六百文之多迭飭各州縣將漕忙徵解款目及署用攤捐必需之項列表呈送約計大縣歲賠二三萬串小縣歲賠一二萬串自去年以來委缺力辭者十餘人在任求去者數十縣談虎變色捧檄增

愁蓋作宦者多無身家而負累者直同心疾既不能使州縣一身無累又不能使地方一日無官原知銀幣通行其病即可甦息而目前解懸無策救急無方是猶西江之水至而轍魚已枯瓊田之藥來而病骨已朽臣等所謂不及待者此也夫天下者州縣之所積而牧令者民命之所託也我

皇上痼瘵在抱念切民依子惠羣黎責之州縣而爲州縣者理詞訟勤緝捕謀教育恤嬰嫠以及辦自治辦選舉辦團練辦清鄉辦調查辦禁煙無一非爲民之事卽無一非耗費之端如其仰屋興嗟自謀不暇安望盡心民事勵精以圖甚至不肖者巧立名目別思取償藉詞訟以婪贓肆捐罰而爲虐卽或隨時嚴劾而民已先受其殃故凡地方明白士紳見今日州縣之困苦艱難皆莫不引爲深念此關於民生之大可憂者一也一省之中廉吏本不多覩

而貪庸之輩又何事不可以爲在昔州縣各缺原有此優彼瘠之分而爲地擇人亦藉爲調劑獎懲之助是以委充差缺猶能愛惜聲名卽或偶有虧賠亦尙有所希冀乃今則無地不累亦無缺不賠在廉介自愛者則潔身去官而繫戀不去者則肆情無忌縱疆臣從嚴甄別勢難一律剷除蓋徒有懲効之方而無勸賞之道欲其激揚有效澄敘一清蓋戛戛乎其難之矣此關乎吏治之大可憂者又一也以上兩端猶係豫防之患未至之憂而目前最有關係已顯受影響者尤在司庫緣司庫進款向以丁賦爲大宗故奏銷例限綦嚴虧挪處分極重向來各州縣徵解錢糧按期上兌亦恃有錢莊代爲滙納有無尙可通融乃近來州縣收款固不敷應解而錢商知其虧累又拒不往來既私債無可騰挪則難免侵及公款目下雖於正項不敢短少而奉提平餘規復各項或關乎賠

款或指抵要需無不欠解纍纍日勞追迫其間重息借貸以抵解款者有之變賣祖產以結交代者有之雖經看管押追而仍復絲毫無繳者亦有之明知虧累因公顧忍淚下追逋之檄甚至佯狂成疾猶含淒收鬻產之金雖已如此嚴追而司庫短收尙鉅若不亟爲設法更恐日深月久並正項亦將虧挪則司庫又將何以自立邪此關乎國計之大可憂者又一也臣等受恩深重疆寄忝膺何敢不仰體

聖朝愛民之心而轉爲培克病民之舉惟念事關大局不僅爲各州縣計一身之盈虧而水有發源不得不爲地方思萬全之計畫况現在推行新政尤當重親民之官而欲重親民之官必先去切身之累然後責其事效勵以廉隅實於國計吏治民生均有裨益臣等籌商至再別無良圖惟有仰懇

天恩准照前請自本年上忙爲始將甯蘇兩屬地蘆各款一律改爲徵銀解銀每兩隨收公費錢六百文蘇屬並帶收規復錢二百文此外不准另立名目多取分釐及有抑勒洋價不收銅元諸弊仍由_臣等隨時密訪如因徵銀稍滋流弊卽當據實奏陳立行改革務期於民無病於官無虧斷不敢因奏改在前迴護於後以仰副

朝廷體恤民艱之至意據甯蘇兩藩司會詳請奏前來除咨度支部查核外謹合詞恭摺具陳伏乞

皇上聖鑒訓示謹

奏

查明知縣參款摺

宣統元年三月

奏爲遵

欽定大清會典事例 光緒三十四年 卷一百一十二
旨查明江蘇長洲江陰兩縣知縣被參各節據實復陳恭摺仰祈
聖鑒事光緒三十四年十二月初八日承准軍機大臣字寄光緒
三十四年十一月二十六日奉

上諭有人奏江蘇長洲縣知縣蘇品仁濫膺保薦江陰縣知縣孫
友萼昏瞶貪酷各摺片著端方陳啓泰秉公認真查明據實具奏
毋稍迴護原摺片均著鈔給閱看欽此遵

旨寄信前來 臣等當卽飭委江蘇布政使瑞澂按照原參各節逐
一查明務得確實情形去後茲據查明詳復前來 臣等詳加復核
檢查案卷參考輿論如原奏謂長洲縣知縣蘇品仁才本平庸以
奔走逢迎得志升任撫 臣陳夔龍與之同年鄉誼濫加保薦如保
案謂署理崑山縣時適值查辦清賦該員條陳辦法因之銀米兩
項歲增徵銀六十萬兩有奇實則蘇品仁有無條陳採用未見明

文崑山田賤業戶多往購地自行築圩濬港未聞蘇品仁有創興水利之事一節查光緒二十五年蘇品仁署新陽縣兼理崑山縣事是年查辦清賦該員熟察利弊會上條陳八則頗多采用至崑山新陽兩縣勘荒造冊擠查隱匿皆由該員一手經理清賦事竣崑山增徵銀一萬六千一百餘兩米一萬一千九百餘石新陽增徵銀一萬二千七百餘兩米七千九十餘石均有奏銷案冊可稽其保案所云歲增徵銀六十萬兩有奇係就通省增徵總數連類敘及初非歸功於該員一人也新陽東北鄉地勢最低時虞水患光緒二十三年蘇品仁先築圩岸繼開溝潭二十四年疏濬小西門河道二十六年修建正義鎮河岸凡此數端俱係新陽境內之事實於水利農田不無裨益又原奏謂機匠聚衆爲省城所習見保案擬爲定亂之功抑何可笑一節查光緒二十六年拳匪事起

蘇省絲貨滯銷機匠停工恐其失業滋事先已開倉發粟乃莠民
溷迹其中藉口振票之弗及七月二十一日竟聚衆多人分赴絲
經帳房嚴恆豐徐萬泰夏慶記吳新成四家逞兇毀物硬索銀洋
合計人數實不下數百人一時聲勢洶洶居民惶恐與往年罷工
要求情形不同維時蘇品仁知長洲縣事聞信較早會同元和縣
吳縣率勇親往彈壓當場拏獲首要解散附和莠民懾伏市肆乃
安辦理尙屬妥速又原奏謂太倉開濬七浦河紳民合辦早經定
議豈可據以爲功一節查七浦舊名七雅浦距太倉州城三十里
西洩太湖巴城陽城諸河之水東出七雅口以入於海不獨太倉
民田賴以宣洩且爲上流水利所關自同治十二年開濬一次垂
三十年潮汐往來泥沙淤積官紳屢議疏濬以款絀工鉅未果光
緒三十一年知州謝陶集議未成旋即卸事蘇品仁代理斯縣周

歷勘估請撥官款延紳設局舉辦自三十二年二月二十四日開工至三月十四日報竣統計工長三千丈築壩四十座挑土七萬餘方用款二萬餘緡工程迅速經費亦極核實此固由於紳民踴躍風日晴和始克收此效果然督率經營該員實始終之又原奏謂興辦學堂有名無實一節查太倉城鄉各處如公立中學堂高等小學堂公復小學堂初級師範傳習所東門外啓新小學堂北門外啓明小學堂以及六河市九曲鎮璜涇鎮雙鳳鎮浮橋鎮毛家市沙溪鎮暨州城中東西三路蒙學小學或係蘇品仁開辦或係蘇品仁改良前後共計二十餘處尙與原保案據數目相符又原奏謂向萬鏞詐贓一案成於該員之迎合當時擅封民房係長洲縣封條衆目共見一節查光緒二十九年蘇州府知府向萬鏞因其幕友張緯農賭虧公款潛逃訪係朱涵清等糾約同賭特

飭長元吳三縣查封房屋該員知長洲縣事分居僚屬既奉本管
府面諭不得不遵照辦理且朱涵清房屋坐落長洲縣境內故用
長洲縣印條發封以此指爲迎合未免言之過甚此案續經言官
奏參已經臣方澈底查明蘇品仁委屬無干據實復奏有案又原
奏謂蘇品仁清理荒田不清鄉而清城勒限呈報過期入官員司
通同作弊議價出售一節查蘇省自經兵燹糧額未復荒地尙多
故奏請設立農務局嗣與工商兩事併而爲一名曰農工商務局
分別清釐凡城鄉荒廢田地一一查丈入冊有主者限於一年之
內報認無主者酌分等差聽民間領墾所議清荒章程均經奏報
咨部有案蘇品仁接辦局務一切悉照舊章所有清理荒田一事
實係城鄉並舉分等繳價聽民報領員司人等並無私自議售情
事又原奏謂升任撫臣陳夔龍保薦蘇品仁卽令該員屬稿一節

無論封疆大臣保薦人才萬無卽情所保之人屬稿之理且調查
案卷並無蘇品仁筆迹無從指實此查明長洲縣知縣孫友萇煙癮甚大不
參之實在情形也又如原片謂江陰縣知縣孫友萇煙癮甚大不
耐久坐問案卽怒一味濫刑待質所人數常滿丁役凌虐敲詐一
節查孫友萇聽斷素稱勤敏遇有案件尙不難隨訊隨結案旣訊
結人證萬無不釋之理惟差傳兩造每不能同時到案其先到者
自不得不暫行留所待質江陰民風好訟控案極多待質之人日
所恆有然必謂其人數常滿未免言之過甚若控訴之案遇有糾
葛太多屢斷不遵甚或當堂挺撞原被告並予薄責偶亦有之此
乃健訟刁徒有以自取似不得謂該員日以濫刑止訟至差役人
類不齊凌虐敲詐不敢信其必無然無告發案據無從證其虛實
煙癮一層已飭調該員來省由禁煙公所照章查驗五日並未服

食藥丸亦無發癮形迹面色豐腴精神充足其爲確無嗜好尙屬可信又原片謂孫友萼廢止禁煙局灑賣膏捐執照每照十餘元或二十元名曰官膏從前之煙館遂無不領照開燈一節查江陰原有禁煙局一處由在籍翰林院編修章際治經理其事前年查禁煙館酌照省章令煙戶領照一次改設官膏店鋪銷膏認捐抵支賠款要需照由官給不取膏店分文銷膏之數逐年勒減認捐之數逐年遞增查有私設煙燈立時封閉立法本極周密嗣因章際治有事赴甯司事不諳定章查獲私燈並不調照押閉甚且私罰洋元以致人言藉藉孫友萼覺察卽會商章際治分別查究議撤舊局另立新局其新局未成立以前先將禁煙一事附屬於調查所中而以稽查私開煙燈之事責之巡警此事弊在司事非由縣官孫友萼覺察改良辦理似無不合原參所指殆係傳聞之誤

又原片謂江陰丁漕雜稅洋價勒短百文每年婪收約洋六萬元
尙在平餘公費之外一節查錢糧櫃價定章照典當舖價折收江
陰當價分銅元制錢兩種縣櫃酌中核定以制錢七成銅元三成
扯計惟一日之中市價或漲落數次縣櫃則祇能按日懸牌不能
時刻更動其間稍有參差在所不免然綜計江陰兩忙一漕通年
所入澈底查算實祇折收洋三十七萬六千二百餘元錢十九萬
三百餘千核其銀米解款交代攤款忙漕用款共需銀二十萬八
千餘兩洋十八萬五千五百餘元錢六萬三千七百餘千出入互
抵卽以該縣應得之兩忙平餘冬漕公費全數貼入尙苦有絀無
贏則婪收六萬元之確無其事不辯自明此查明江陰縣知縣孫
友萼被參之實在情形也以上各節均經臣等嚴密考查毫無隱
飾查前長洲縣知縣蘇品仁被參迎合向萬鏞詐贓及清荒員司

舞弊兩節查明均無其事所有原保各條考查案據證以地方與
論亦尙相符現該員以卓異捐升道員送部引
見應如何量才錄用之處出自

恩施至江陰縣知縣孫友蓴被參各節亦均查無確據該員歷任
要缺卓有政聲材具實屬可用惟爲人強幹有餘精細不足此次
宰治江陰地方紳士與之情意不洽人地實不相宜擬請將其開
缺俟有相當缺出再行酌量奏補所有遵

旨查明江蘇長洲江陰兩縣知縣被參緣由謹合詞恭摺具陳伏

祈

皇上聖鑒謹

奏

省城巡警情形摺
宣統元年三月

奏爲江甯省城巡警額定支用各項薪餉經費數目暨整頓情形
恭摺仰祈

聖鑒事竊查江甯省城巡警前於光緒三十一年八月間創辦會
經前署督臣周馥將開辦大概情形及約計需用經費奏咨在案
其原奏內稱巡警經費每年約計額支二十六萬餘兩除將裁兵
四營底餉撥充外不敷之數先由銅元餘利牙帖房船各捐湊撥
現在銅元餘利已歸無著他項捐輸爲數無多尙待籌畫等語是
此項經費僅有裁兵四營底餉銀三萬餘兩爲常年指定之款此
外實無的款抵支從前全恃銅元餘利司庫尙有存儲歷經挪撥
濟用迨至三十三年春間據江甯藩司詳稱銅元餘利虧墊甚鉅
無款可撥庫儲又支絀異常請自是年二月分起改由江南財政
局籌備撥給嗣後卽由財政局籌撥並經臣迭次督飭巡警局總

副監等裁節冗費釐定章程按照前署督臣周馥原奏每年額支二十六萬餘兩之數竭力刪減現計常年額支銀十九萬四千餘兩活支銀一萬二千兩製辦軍服等項攤計銀二萬一千餘兩全年核計實需經費銀二十二萬七千餘兩遇閏之年尙需加籌銀一萬七千餘兩實已屢經裁併無可再爲樽節伏念巡警爲保衛治安之要政東西各國凡一切政令之設施無不恃警察爲之鈐轄範圍至廣關係至重是以

德宗景皇帝屢降

綸音飭令各省趕速舉辦江甯爲東南重鎮自防營裁汰所恃以詰姦禁暴捍衛閭閻者惟警察是賴臣抵任之始卽注意於此更換局員嚴加整頓巡官以下各定考成信賞必罰時復親出巡視諄諄誥誡兩年以來省城地面頗稱安靜昔時城北荒僻之地殺

人越貨歲有所聞近則桴鼓不驚閭閻安枕省垣本水陸要衝甯
滬鐵路通行地方尤爲繁盛間有逆黨竄伏及姦拐等重案類能
立時捕獲迭經獎勵有案去年安慶兵變甯皖近接臣又遠駐太
湖風謠四起而省城商民晏然各安生業實亦巡警認真之微效
雖以限於經費規制未臻完密未能與各國高等警察較短絜長
然掃除保甲之具文漸收衛民之實效似已椎輪輟具不無覆篑
之功此項常年經費均額定待支之款除裁兵底餉三萬餘兩撥
充外每年不敷銀十九萬餘兩之鉅自三十三年二月分起均由
財政局設法勻撥當此財力艱困幾同無米爲炊惟事關治安要
政無論如何爲難決不容因噎廢食臣仍當督飭財政局隨時騰
挪支給以濟要需一面仍飭巡警局員加意振作益勵精勤體籌
款之維艱知保安之匪易務使公家耗費一錢民間卽受一錢之

利益并分飭各局員趕將自開辦日起歷年用過款項分晰造報以昭核實至巡警局附設之教練所歲需經費二萬兩有奇業經另行奏咨有案又另設水上巡警係由水師營改編按月薪餉先由支應局撥給三十三年二月分起改由財政局支放應一併隨案造報此外尙有鐵路等處另設之巡邏隊經費均由另籌不在造銷之列除將現定詳細章程及支用各項薪餉經費數目表咨部查核外謹恭摺具陳伏祈

皇上聖鑒訓示謹

奏

暨南學堂添收學生摺

宣統元年三月

奏爲暨南學堂添收學生並動用款項恭摺仰祈

聖鑒事竊甯省暨南學堂改辦中學附設高等小學經臣於光緒

三十四年六月初二日將辦理情形並籌撥經費各節專摺奏明在案伏查該堂自改辦以來在堂學生以班次既有定程受課益知奮勉該堂定章凡教育名數資格教科名目鐘點學生食品衣式逐日寢興盥沐時刻以及學生各科分數每月必分門列表傳示巴達淮亞之中華會館令其布告又星期一周飭由學生各發家信一次藉以練習文字以規程度用是爪哇一埠風聲傳播不獨業經來學各家屬歡欣鼓舞奉頌

皇仁凡附近各埠聞風興起均願選取練習中語合格之學生送甯就學當據爪哇學務總會正總理陳顯源等呈稱爪哇全島現設中華學堂四十區均遵奏定章程辦理惟外洋僻陋不及內地之完全幸逢

朝廷嘉惠僑民特准於江甯省城設立暨南學堂當經分批選送

學生均蒙收錄茲又有各埠學生三十一名自備川資有心來學又窮苦無資求給官費生六名程度較高大可造就均請准送入堂又據新嘉坡署總領事左秉隆呈稱奉學部札開甯省開辦暨南學堂收錄爪哇子弟新埠中國僑民亦可每年酌送合格學生內渡肄業等因當據本埠道南養正啟發應新及檳榔嶼中華雪蘭尊孔霹靂哈埠樂育各學堂開具名冊面加考驗先後錄取五十四名彙送回甯就學各等情均經臣於該生等抵甯後飭該堂分別班次照章肄業伏念爪哇各埠僑民由閩廣出洋已歷數世雖復羈身異域尙能不忘祖國各遣子姓願受裁成皆由朝廷德澤涵濡無遠弗届用能使喁喁內向奔走偕來臣忝領南洋責無旁貸惟有奉宣

德意督飭在堂各員於教授管理諸事認真經理現在到堂各生

學業日進以後陸續選送來者尙多風氣所開實足以廣教思而
聳觀聽惟是名額既添經費較鉅該堂用款除第一二次回國學
生豫算每年約共需銀一萬三千餘兩又新築校舍添置校具共
銀七千餘兩均經奏報有案外現在添收第三四次學生應添額
支費每年銀一萬五百餘兩又添築校舍銀二萬五千餘兩添置
食宿器具及派員赴滬接同來甯各用費銀三千餘兩均經設法
墊給以濟要需該堂經費前經臣奏請由閩海粵海江海各關分
任籌撥作正開銷荷蒙

恩准欽遵在案此次添給經費擬仍由各關分撥作正開銷惟有
仰懇

天恩俯如所請實於昌明國學維繫僑情大有裨益除分咨學部
度支部查照外所有暨南學堂添收學生並動用款項緣由理合

恭摺具陳伏乞

皇上聖鑒訓示謹

奏

遵辦禁煙情形摺

宣統元年三月

奏爲復陳遵辦禁煙各節並籌擬情形恭摺仰祈

聖鑒事竊照宣統元年二月二十日恭閱電鈔奉

上諭禁煙乃今日自強實政教養大端於衛生足民興地利塞漏
卮各節皆有絕大關係特此再行申諭禁吸一事文武職官責之
禁煙大臣及京外各衙門長官認真糾察各營兵夫各學堂師生
責令該管長官嚴行禁絕商民人等責之民政部各省督撫多訪
良方設局施藥酌采東西各國辦法設法減癮由少而無禁種一
事亦責成各省督撫督飭所屬認真禁拔相其土宜改莠爲良定

當考其成績優予獎擢抵補稅釐一事責之度支部悉心擘畫多方籌集迅速施行各省督撫如有抵補良策亦著奏陳備采等因欽此竊維鴉片之害流毒無窮溯當灌入內地之初朝廷以雷霆萬鈞之力欲禁絕而不能浸至罌粟之種布滿天下已無禁之可言至於目前更成積重之勢何幸天佑聖朝與茲事最有關係之國慨然出而相助此誠曠世難得之遭逢千載一時之機遇也伏查光緒三十二年十月外務部原奏內開與英國使臣議定以印土出口洋藥五萬一千箱爲定額按年遞減五千一百箱十年減盡又曰曾經聲明試行三年視中國於裁種及吸食實行減少限滿再行遞減又曰各節全視中國能否切實施行爲準各等因是則遞減雖定十年之限而試行祇有三年後七年之局面全視前三年之試行查試行之期起於光緒三

十三年十二月至於今日已過去一年有半之光陰萬一限滿三年尙無成績足滿外人之望必至功敗於半途上年

先帝垂諭有曰此機一失時不再來若永遠困於沉疴何以爲國等因欽此

聖諭至爲沉痛凡我內外大小臣工所當時時提撕警覺迅赴此難得易失之機臣竊謂中國禁煙必賴友邦協贊此事勢之無可諱言者又况此事爲彼國上下大利所存乃肯舍而從我其政府固出於至誠其商民恐不免缺望彼於十年之中提出三年爲試行之要約以觀我

朝野上下之實行何如用意大可見矣我若無切實辦法足以示信則前功盡棄後患彌長現在過去之時日杳不可追未來之時間祇有此數若不速定統一良策以謀齊一之進行將來進步或

有參差辦法偶分同異皆授人口實之資臣區區之愚以爲禁吸之辦法必當有嚴肅詳備之機關禁種之辦法必當有整齊畫一之法令兩事爲對於國內之辦法皆三年試行期內所當切實施行而示之者也至後此分年遞減之辦法則有關於行商坐賈分銷零售各方面之事件此事爲對於國外之辦法又三年試行期內所當切實豫籌以爲後此七年推行之準備者也請就江南現辦情形并籌擬各節爲我

皇上詳細陳之曰對於國內之辦法禁吸禁種爲我國家自行主權之事朝下令而夕即可行特以禁吸一層人之流品不齊癮之大小不一禁之之法不得不異其設施而需之時日至禁種一層則因時可制履畝可稽但使毒根早一日拔除嘉穀可早一日補種斯卽稍稍急遽要不得以操切相繩臣本此宗旨

復參照禁煙大臣奏定章程先於上年設立江南查驗官員戒煙所派委監督提調並檢察委員訂立檢察章程專辦查驗官員煙癮事宜本年復設立兩江禁煙公所委江甯藩學兩司分充督辦總辦經理其事其下復分五科一曰調查科凡編查吸戶考驗藥料等事屬之一曰禁制科凡發給吸煙憑照及查禁煙具煙館之類屬之一曰產銷科凡關於禁種罌粟及賣買土藥之事項屬之此外兩科一曰文牘則專司冊籍一曰庶務則管理會計現在編戶驗藥各章程煙店吸戶各牌照已飭次第審議刊發復將先設之江南查驗官員戒煙所歸併其中辦理之法於官員之有癮者一經覺察隨時調所查驗勒限戒斷其學堂軍隊中人隨時分派委員嚴密稽查遇有沾染此習者學堂則無論師生軍隊則無論官長目兵均立時黜懲商民之沾此嗜好者飭由各地方官紳董

及里長人等分別勸導并由公所採擇良方廣製善藥分別售送約計吸煙人類大抵以下流社會爲最多其上中社會中人究屬有限自疊奉

諭旨申禁以來舊吸煙人之日少與新吸煙人之絕無則可斷言者也禁種一節本省舉行最早查江蘇種煙地畝以徐州府屬爲多淮海次之自光緒三十二年大災以後創鉅痛深經臣愷切勸諭令減種罌粟多種有益衣食之物緩急足以相資豫爲禁種張本民間頗知信從調查三十三年徐屬種煙地畝已減十之六七去年徐州舉辦清鄉復令清鄉委員會同協力查禁并明定賞罰其勸禁得力者官則優給外獎紳則獎給銀牌功牌違者懲究近據徐州道府先後來電飭查各屬已無種煙之區各地方紳董皆以禁絕爲己任辦理尙無勉強委員稟復大致相同蘇屬地方種

煙者不過一二州縣畝數無多禁絕較易皖省因上年匪亂禁種較遲亦已電商安徽巡撫臣從嚴飭禁惟念禁種與禁吸不同禁種之事至爲單簡部章令煙畝以八成計算按年遞減一成固屬通變宜民之至計惟同一種煙之戶孰宜先禁孰宜後禁最難持以公平同一禁煙功令此省漸進彼省速成未免參差不一卽如徐屬地方據報已一律停種惟因皖豫山東毗連之境禁種較遲其已罷種者望而生羨不免生嘗試之心夫禁種爲我完全無缺之權令出惟行之事若仍號令不一審顧紆迴必且使疑忌者生心而外界或來阻障據部派禁煙會員劉玉麟等聲稱英商員謂東豫等省禁種罌粟不力將來咎不在我云云據所報告實已微露機械現距試行期滿祇一年零數月矣轉瞬卽已屆期萬一仍有煩言恐全局將爲搖動臣以爲宜統天下種煙省分限以一定

禁絕之期方足以收成效而昭大信前接各省來電持一年禁絕之議者計有十七省之同心擬請

聖明博采衆議

獨斷施行飭令各省統自奉

旨之日起以一年爲限限滿不准再種罌粟并定賞罰章程使各國曉然於

朝廷斷在必行而茲事決無反汗則外交之際不至枝節橫生矣
臣所謂三年試行期內當切實施行以示之者此也一日對於國外之辦法查原議洋藥五萬一千箱之定額係準印度出口總數而言其實在進入中國口岸者尙無此數原議派員前往印度監視一切爲必應辦之事而當土藥禁絕以後尤爲不可緩之圖
臣詳細籌維計惟有專賣之一策內之對於人民之減癮外之對於

洋藥之減運皆可以確有把握查各國於南洋各島無不以專賣爲禁煙政策光緒二十七年兩江總督臣劉坤一升任湖廣總督臣張之洞會奏變法摺內曾請官收洋藥專賣當時雖非實行禁煙已隱寓拔本塞源之計畫頃者英使館參贊李智著論亦謂中國禁煙非專賣不能實行臣常集中外深識之士詳加討論亦以是爲禁煙不二之法門惟專賣必先專買擬請仿日本行於台灣之制度設立總分公司招集華股官督商辦每年進口洋藥均歸總公司一手收買照常完稅擬請旨特派煙膏專賣大臣督理其事以各省督撫爲幫辦大臣分任其事總公司設於京師或在通商便利之地分公司各設於省會之地歸督撫直轄每一分公司附設製煉場一所專煉煙膏另設發賣所於各州縣署其所長卽以地方官充之准民間稟設大小

分售所每一市鎮一埠頭准設大分售所一處欲辦此所者必豫
納保證金千元或五百元閉歇之後照數發還小分售所之設亦
須稟奉官准發給小分售所牌照每年應納牌稅若干元不論何
時可持此牌照向大分售所購煙零星售給吸食之人煙膏之製
煉惟總分公司得有此權此外煉者皆爲私製私製者科以極重
之罰金其售膏辦法大略由總分公司將製就煙膏裝罐以百罐
爲一箱運交總發售所者以箱計算由總發售所轉發大小分售
所者以罐計算總分公司不得開箱售罐總發售所不得開箱售
膏以保持大小分售所應得之利其有未經官准私行賣買者一
律議罰停閉開辦以後洋藥逐年遞減吸煙人數亦隨之而減原
設之公司售所即可酌量歸併歸併之法隨時再爲核定總期陸
續停歇至十年而一律肅清公司入款除開銷費用及商人股息

各項外盈餘之款酌提數成歸商其餘概以入官作爲報效竊計此舉其利便蓋有數端一土藥經已禁絕洋藥概歸官賣不許私自授受則私製之弊悉絕任事者易於稽查二專賣以牌照爲憑零賣之鋪領牌吸食之人領照祇須就牌照鈎稽而賣煙之戶吸煙之人一覽而知其數卽每年每處戒吸若干人減癮若干人亦可按籍而稽三洋藥旣歸專賣則主權在我儘可於售賣之時暗寓減癮之法如台灣專賣章程略分三等一等清膏二等土灰攪和三等則將味之濃者使淡厚者使薄各種皆和以減癮之藥粉可以使其煙癮漸輕易於戒斷四專賣本非專利而寓禁於徵定價不妨加重查台灣地方自戊戌年發行專賣之法至壬寅年調查共贏五百七十七萬四千三百四十三元之利而是年該處戒煙人數由十六萬數千人銳減至十二萬數千人此可見禁煙與

集款事屬兩不相妨惟聞洋商間有反對幸禁煙會員皆允協助亦復贊成此舉趁此時機亟宜妥籌進行之法臣所謂三年試行期內當切實豫定以爲後七年推行之準備者此也至此項稅釐入款以洋土藥併計每年減運一成每年卽短銀八十萬兩減至十年每年共短八百萬兩此款爲撥還洋款要需抵補不容稍緩部臣原議各省合籌此減彼加逐年增益以期陸續補足惟各省度支奇絀民困滋深應籌之款無非仍取於民而公私產業未見加增工商運輸未能發達徒益民生之困苦轉增庫款之艱難臣籌商至再竊以爲抵補一事宜分爲兩期籌辦以禁煙限內爲一期禁煙限外爲一期限內之一期如能採用前議卽可以專賣贏餘之所獲暫救目前查贏餘之利雖難豫計而以日本所得于台灣者作爲標準中國全國面積大於台灣數十倍有癮之人稱是

苟辦理得法卽數十倍其所得當不甚難擬請將前項餘利另款存儲專供抵補之用此外虧短之數再責成京外合籌限至第十年期滿爲止限外一期係每年經常之款籌補固益爲難惟念

國家方限定立憲之期迨十年後國會無不告成擬請首提此案以詔議員令其如數籌補夫此舉本爲國民造福所虧之項卽由國民擔承其理至公其事至順而且十年中休養生息吾民之元氣亦已稍蘇決非目前之比各國國會歷史有前例矣吾民之急公好義豈遂後人此固無煩過慮也抑更有進者民足則國不患貧

國家歲絀數百萬收入之釐稅民間卽歲贏數千萬不輸出之金錢以國家歲計論固見其絀以國民生計論則見其贏而且種煙地畝一變而改種嘉禾戒煙之氓悉出而競爭實業以計學家之

公例考之經濟力既有贏餘生活力復將增長而又處於各國公認爲工藝物產極豐富之中國其生殖之發達殆有數倍於今日者則抵補之數可決其有贏無絀矣惟專賣煙膏一事必有種種障害相因而生但兩害相形當取其輕苟見爲實有效力則宜定議舉行一面於障害所在豫謀所以剷除之法庶沈痼可去而大功可成應請

飭下禁煙大臣外務部度支部會同妥議施行以昭鄭重除將籌議禁煙辦法各電錄要咨呈軍機處查照外所有遵辦禁煙各節並籌議情形謹會同江蘇巡撫臣陳啟泰恭摺具陳伏祈

皇上聖鑒謹

奏

請減行豫淮鹽加價摺 宣統元年三月

立凡各入之利
奏爲行豫淮鹽本重銷滯仍懇照案減免加價並撤退鄰邊子店
以維引岸恭摺具陳仰祈
聖鑒事竊查淮北票鹽出湖分銷皖豫兩省向以豫省爲大宗豫
銷暢滯實爲北鹽全局所關汝寧西遂一帶淮鹽引地多與蘆界
相連蘆販侵銷久爲淮邊隱患然溯查近十年壩銷數目每歲常
在一百四五十萬包之譜光緒二十七二十九兩年尤能增至一
百五六十萬包蓋其時京漢火車尙未通行蘆鹽運費較鉅又無
迭次加價科則不平之案是以引界雖處處相連私販尙有可抵
制今則鐵軌大通蘆鹽長驅直入成本已銳減於前而豫省應收
淮蘆鹽釐加價科則又復不一輕重相懸已有淮不敵蘆之勢又
况淮鹽釐價向係按引征收蘆鹽則由商人包繳多銷一引之鹽
卽暗收一引之利凡此種種歧異皆爲蘆侵淮界受病原因今以

光緒三十四年正陽關銷數計之比較往屆已短至二十萬包上下不於此時亟圖補救恐蘆私愈侵愈遠淮鹽邊岸勢將盡失藩籬關係兩省課釐加價爲數甚鉅然補救之方不外疏銷緝私兩事顧疏銷必輕成本減價乃可敵私引界相錯之區本無緝私良法使成本不輕售價不減而欲強居民以舍賤食貴此本人情所難故無論疏銷緝私必均以輕本爲要義查豫省行銷東蘆淮潞四省之鹽從前加價本係各省一律光緒二十七年前直隸督臣李鴻章因蘆商困苦奏准免收加價二文於是淮蘆同一行銷加價遂有多寡之別前年三月臣因淮鹽豫銷疲滯曾奏請將舊案加價按照蘆引減免二文當時部臣卽有北鹺積困情形不能不並顧兼籌之議徒以豫省有待支專款未能遽行定議今正陽銷市日滯影響所及業已確著明徵是豫省虛負加收之名而江省

實受滯銷之患權衡輕重何如略予減免使岸銷得以暢旺收數
或能增多此固利害之顯然無庸深計者也至邊岸緝私又以引
界劃清爲切要辦法查乾隆六十年因河東池鹽與淮鹽界址相
連淮鹽每觔售價三十餘文池鹽每觔售價二十餘文運池之民
越界圖利食淮之民避貴趨賤奉

旨查辦經河南巡撫阿精阿奏復請將切近淮境二三十里之鹽
店移撤三十里之外毋許多積鹽觔以絕其偷運越界之弊欽奉
飭部議准通行有案仰見

睿慮周詳維持鹽務至意嗣後浙商在貴溪界牌等處及安徽祁
門婺源江西浮梁德興等縣邊界設店均經先後遵照押令遷移
誠以淮網居各省腹地之中四面受侵不得不嚴爲限制今汝甯
陳州一帶蘆商於近淮邊界又復私設子店密布如林雖經嚴飭

緝私各營認真堵截而越界偷運之案仍復時有所聞且近時淮
蘆鹽價相懸更非從前河東池鹽僅隔十文可比食戶避貴就賤
防不勝防若不查照定案將蘆鹽淮邊子店一律撤退三十里以
外不足以杜逾越侵銷之患臣迭經委員考查僉以堵緝鄰私非
邊店撤退後無從著手以上兩事均爲補救淮鹺萬不可緩之務
明知庫藏支絀各省皆同豫省減免二文於支放餉需未必不稍
形虧損然與其多取而見絀何如少取而有盈且江省亦非敢專
事責人昔時籌備償款產銷省分各加四文前督臣劉坤一卽以
淮商過形喫重於江省四文內減去二文上年臣奏准於淮鹽各
岸加收江南要政二文又將行豫之鹽暫請停止是江南因北鹽
疲滯先後已免去四文酌盈劑虛當亦爲豫省所深諒至邊境子
店稽諸成法本在應行遷移之列並非稍事苛求據兩淮鹽運使

趙濱彥詳請具奏前來合無仰懇

天恩俯念淮蘆成本輕重不敵准將淮鹽行豫舊案加價減免二
文並懇

飭下長蘆鹽政河南巡撫將蘆鹽近淮邊界三十里內子店查照
成案一律勒令撤退以保引岸而維全局出自

逾格鴻慈所有請減行豫淮鹽加價並撤退邊岸子店緣由除分
咨查照外理合恭摺具陳伏乞

皇上聖鑒訓示謹

奏

開辦清理財政局片

宣統元年三月

再清理財政爲籌備立憲之基豫算決算之本江南新政待舉事
非一端用款浩繁倍於疇昔既不能因噎以廢食又不能無米以

爲炊，就目前情勢論之，自非綜通省之度支合數年而比較無以
定量入爲出之經求酌盈濟虛之法。前經度支部奏准清理財政
章程，咨行到甯，當經遵章飭設江南甯屬清理財政局，檄委藩司
爲總辦，運司糧鹽關道淮揚海道現辦釐捐官錢各局道員爲會
辦，並以總會辦或係實缺或屬要差或在省外不能駐局，因派坐
辦駐局及委提調文案各員認真辦理。刊刻關防於本年閏二月
十五日先行設局開辦。在案續准度支部咨奏定各省清理財政
局辦事章程，應設編輯審核庶務三科，各科長科員復經照章分
別派委以專責成。茲據該局總會辦江甯布政使樊增祥等督同
局員擬訂該局辦事細則具詳前來。臣覆加查核，尙屬妥協。如有
未盡事宜，隨時增改，仍俟正副監理官到甯，飭再會同一切查照
部章悉心經理，劃分新舊現行三案，調集出入各款，澈底清查，研

究利弊實圖改良比較盈虧妥商辦法期於財政實有裨益除將
辦事細則并局員職名咨送度支部查核備案外所有設局開辦
日期謹會同江蘇巡撫臣陳啟泰附片具陳伏祈

聖鑒謹

奏

密陳華僑事宜片

宣統元年三月

再據爪哇學務總會正總理陳顯源等呈稱江蘇省城設立暨南
學堂當經分批選送學生均蒙收錄乃荷人特設籠絡之計議將
於該島設立學堂四十三區每區專收華生二百名已於巴達維
亞三寶壟泗水等處開辦三區日本脾睨其旁亦議踵行徧設并
有革命黨人在新嘉坡地方開設中興日報館煽惑華僑阻人送
生入內地就學計惟有多選合格學生隨時送甯肄業庶有以端

其趨向免入歧途等語查本年二月間據暨南學堂呈閱爪哇商學界公啓稱華人僑居荷屬平時已虐待不堪今荷人又訂新律擬將華僑收入殖民地民籍始必假以便宜稍弛苛政久之入籍者多惟所欲爲納諸陷阱他人不能顧問請設法保護又據巴達維亞三寶壟日惹梭羅渤良安望加錫岑釐安班瀾坤甸泗水各中華商務總會爪哇全島學務總會諫義里中華學堂暨華僑全體等稟稱荷蘭國國會議定新律將南僑民久居彼島者分別收入殖民地民籍商學人等異常惶急在有知識者決不墮彼術中究竟愚昧者多實在可慮因互相函訂於光緒三十四年十二月初八日各舉代表齊集泗水商會共圖善後事宜請速設領事并采血統主義速頒國籍法除出使大臣外請設法保護各等情均經臣據情咨請外務部查照辦理在案臣竊惟華民僑寄南洋從前

風氣屯蒙雖經外人之壓制欺凌日久相習嗣以
皇仁遠被政體日新屢荷

特簡重臣出洋宣撫該僑民等溯源返本遂益堅內向之心凡在
商界中人咸能集合資財研求國學領其土者以其新知日啟團
體日堅深虞從前政策不可復用遂有另訂新律將華僑收入殖
地民籍之議該僑民等請設領事及頒國籍法兩端實足以定羣
心而破狡計除國籍法業蒙

欽定頒行外所有添設領事一節擬懇

天恩密諭外務部與荷使切實磋商早日派設似於設法保護事
宜較有實際至選生內渡就學一事現在暨南學堂開辦將及三
年風氣既開尤應擴充辦法此項學生目前明倫勸學既聯以家
人骨肉之情將來守正效忠即可爲海外腹心之寄明知財政支

絀籌撥維艱惟此事關繫重要臣惟有盡力維持隨時督飭以期
仰副

朝廷惠愛僑民有加無已之至意謹附片密陳并請勿庸發鈔伏
乞

聖鑒謹

奏

籌辦南洋印刷官廠摺

宣統元年三月

奏爲籌辦南洋印刷官廠規模已具發行有期謹將大概情形恭
摺具陳仰祈

聖鑒事竊維民智日進則文字之用愈繁文字愈繁則印刷之事
亦愈廣東西各國於印刷一業不特視爲振興工藝之一端且常
藉爲範圍法律之要具故日本有國家印刷廠專屬內閣總理大

臣管理凡法令全書官報印紙郵便切手證券諸項均歸印刷美國則各部均設印刷專科凡發明新理實驗工業一切統計報告書皆由官刊印頒發推求其意蓋以出版列入法規之中必自印刷隸於官司爲始然後奸私詐僞之事乃有檢查消滅之方是於行政關係甚多非僅爲專利起見也現在中國修訂法律注重版權度支部有鑒於斯已於光緒三十三年奏明創設印刷局其後各省亦漸有踵而行之者江南夙號繁庶作僞之風勝於他處近年上海一埠商辦印刷雖多然祇爲營業之謀仍於行政無補若不將印刷官廠迅速圖維實足爲改良行政之阻礙顧事屬創舉經畫爲難風氣初開推行宜漸迭經臣遴派熟悉商務人員督同曾習印刷之學生詳細研求購置機器適其時江甯省城造幣廠奉文停鑄房屋甚多閒廢可惜因將造幣廠之中廠略事改修期

於合用定名爲南洋印刷官廠計自光緒三十三年四月朔始經營至今將及兩載規模粗立發行有期謹將辦理大概情形爲我皇上縷晰陳之查該廠之設本以杜弊爲宗旨倘能推行有效銷用日多則籌款之道自在其中以杜弊言必先酌定程式便於檢查稽察始能收整齊畫一之功以籌款言必先體察人情使其信用樂從始能臻默化潛移之妙是該廠第一要務首在於釐訂物品經臣悉心參考定爲三項一曰官用品如糧串鈔票及署局文書簿冊鹽務釐金各種票照之類是也二曰民用品如呈詞狀紙契券合同婚帖當票帳簿經摺之類是也三曰商用品卽商民通用品物託廠代印之件是也三項之中除商用一項事屬貿易其如何程式應聽自便外至官用民用則統由該廠定式印行凡非該廠所印行者於法律上視爲無效到官卽置之勿理至其定價

發售則又分甲乙兩類甲類如官用品中之糧串票照民用品中之呈詞狀紙契券合同本有由官發行之權即可由廠酌定價值乙類如官用品中之鈔票文件民用品中之當票簿摺本爲商業交通之品仍照工本計值但須由廠畫定格式以杜向來簡陋弊混之習又以事方經始俗尙不齊自應順習慣之人情以定施行之次序復飭該廠細加考察將各種用品分別先後逐漸發行俾臻盡善而免窒礙此制定出品之大概情形也又設廠規則名雖官辦實係工商欲求廠務之振興必盡去官場之習氣故該廠所定章程悉仿日本工場之例將全廠事務畫分爲商務工務兩大部商務專管營業工務專管製造商務部之下則以會計書記庶務營業四課隸之工務部之下則以製版圖案活版印刷四課隸之各部之中又分各系部有部長課有課長系有系長而以總辦

提調總其成另設甯蘇發行所委會辦以分筦之務使全廠之中各有統屬互負責成權限既不相侵事機亦無隔闕此釐定章程之大概情形也至該廠經費創辦之初飭由財政局隨時籌撥計購置機器修改廠房共用湘平銀六萬五百九十三兩七錢九分二釐六毫又自籌辦至今薪資廠用等項共用湘平銀二萬五千一百八十餘兩該廠本屬商業性質自應權衡本利力戒虛糜惟印刷用品未經發行以前是該廠尙無入款之可言而月支款項仍須陸續籌付擬仿商業公司之例以所用機器廠房等項湘平銀六萬五百九十三兩零作爲該廠資本週年七釐官息年終結算解交財政局收存并飭另籌營業活本湘平銀二萬兩作爲該廠購辦印刷材料周轉之用其業經陸續支銷薪費之款概作爲該廠借項俟該廠印品發行獲利漸豐則此項借款卽於每年餘

利項下提還此劃定資本之大概情形也以上各端均由臣督同
廠員反復籌計雖明知目前財政支絀籌款維艱然既關於改良
行政爲除弊興利之要圖又何敢故步自封存惜費畏難之成見
現在印刷機件大致完全官民用品次第籌備擬定於本年六月
初一日爲發行之期以後仍當督飭該廠委員認真辦理以期風
氣開通遙爲部廠輔助除將章程咨部外所有籌辦南洋印刷官
廠大概情形理合會同江蘇巡撫臣陳啓泰恭摺具陳伏乞
皇上聖鑒訓示謹

奏

請頒發圖書集成片

宣統元年三月

再石印圖書集成前蒙

德宗景皇帝頒賞直省各一部江蘇省早經祇領尊藏高等學堂

伏查江甯省城創建圖書館業經臣奏明爲通省士紳觀書之地
擬懇

聖恩再行賞給石印圖書集成一部俾蘇省承學之士皆得窺圖
書之淵海沐

聖澤於無涯如蒙

俞允當由臣派員赴外務部祇領謹附片具陳伏乞

聖鑒謹

奏

藩司呈請開缺代奏摺宣統元年三月

奏爲藩司因病呈請開缺謹據情代籲

天恩恭摺仰祈

聖鑒事竊據廣西布政使余誠格呈稱上年誠格在桂藩任內因

職父年近八旬不服水土請假三月奉親歸里業將到籍日期呈請代奏在案近者親病略痊假期將滿本應勉供職守藉效涓埃伏念誠格於光緒二十九年蒙

恩簡放南甯府知府爾時邊烽方熾土匪蔓延自念待罪諫垣久承

殊遇一麾出守何敢辭難既至左江日親師旅清鄉剪匪首尾三年仰託

廊廟威福疆臣謀畫剿撫互用粵亂救平自顧何功三遷迭荷方謂桂林山水藉可娛親藩翰光榮差能養志既爲子爲臣之兼盡幸一勞一逸之相償何意衰親不宜炎土日視醫藥懼曠職司乞假送親情非得已自還鄉里親病較痊而甫從籃輿之遊已滿蒔菜之假夫親年八十本懼多喜少之時粵路七千非朝發夕至之

比耄期新愈恐因遠別而心傷

高宗御批復以終養爲不孝誠格弟兄終鮮脮厠躬親欲什心曠
官欲去則不忍事無兩全心攢萬慮先是身履兵間積受霜露旣
膺不次之擢益殫夙夜之心不自惜其精神已隱滋夫疾疢今以
出處不定昕夕焦愁牽動從前寒溼諸疾筋骨酸痛飲食銳減臥
不安席形似怔忡醫家皆云勞慮傷脾法當靜養夫辦事恃精力
尤恃心思若心懸兩地力疾到官不惟有進退失據之譏更恐抱
君親兩負之疚惟有據實自陳懇祈代籲

天恩俯准開缺調理一俟病體就痊卽當泥首

宮門求賞差使等因呈請代奏前來臣覆查廣西布政使余誠格
爲御史則著直聲爲監司則饒幹略當粵氛正熾地方糜爛之時
則勇往圖功及粵亂救平庫儲有餘之日則奉親乞假其忠孝有

足多者今以積勞致疾有似怔忡若勉強赴官誠如原呈所云恐致

君親兩負該員材器英異渥受

殊恩決不甘於自棄欲圖報稱收榆之日方長暫予寬閒勿藥之占亦易合無仰懇

天恩俯念該員在粵著有微勞准其開缺調理出自

逾格鴻施所有藩司因病懇請開缺緣由謹據實代陳伏乞

皇上德鑒謹

奏

戊申綱展緩奏限片 宣統元年三月

再淮北票鹽從前每綱額行二十九萬六千九百八十二引以十個月爲一綱嗣於甲辰綱加增新額五萬引本請作爲試辦不入

原額旋經部議仍令併入原額限期之內前署督臣周馥復請變通新引定爲三十六萬引請以一年造報部議改爲十一個月歷經循辦在案惟查北鹽銷路向以正陽關爲大宗而正陽關銷又以豫省各岸爲最要自京漢火車通行蘆鹽成本銳減售價較廉凡豫省蘆淮引界相錯之地無不因淮鹽本重暗受蘆侵且因嚴緝鄰私與鄰省交涉之案亦已層見疊出臣節飭在事各員設法挽救無如淮蘆鹽價多寡相懸終不免隱受侵佔前年臣因豫省加價輕重不一曾經奏請減免淮鹽加價二文當時以豫省有待支專款未經定議本年又復援案陳奏並請將淮邊三十里內蘆鹽子店一律撤退是蘆侵淮岸情形業經先後奏陳在案茲據兩淮鹽運使趙濱彥查明戊申綱鹽自上年六月初一日起至本年閏二月十二日止共計壩銷六十七萬六千餘包未銷之數尙鉅

相隔奏限僅五十日無論如何設法萬難依限銷竣且受病之原既由豫岸蘆私侵佔又以歷屆奏銷多以在壩訂售開除大票之數爲斷不必全綱盡運出湖於是歷綱套搭至丁未綱壩銷報竣之日前綱已售未運出湖之積引爲數已鉅若不稍寬奏限將積引澈查疏通不足以清界限而杜壅積詳請具奏展緩三個月奏限以資整頓等情前來臣復查同治四年光緒十年因淮北壩銷壅滯均經前督臣先後奏請展緩三個月奏銷在案本年戊申綱壩鹽積壓事同一律尙非出於無因合無仰懇

天恩俯念北鹽積滯准將戊申綱奏限展緩三個月俾得設法疏銷以清引限出自

鴻慈除咨部查核外謹附片具陳伏乞

聖鑒謹

奏

試辦建昌官運片 宣統元年三月

再江西建昌一府本係淮鹽引岸兵燹以後久爲閩私侵佔淮鹽片引不行前署督臣周馥曾於光緒三十一二兩年先後委員考查擬令設法收復咸以南鹽成本太貴售價較昂運商不務遠圖又不肯減價出售年復一年迄未開辦當時委員條陳卽有試運淮北餘鹽藉收廢岸之議旋值淮北因災缺產餘鹽無存此議遂暫從緩前去兩年北產頗旺調查閩私價值近來又復增昂及此試運淮北餘鹽減價敵私實爲收復廢岸萬不可失之機查有江蘇候補知府饒士端籍隸建昌情形熟悉堪以委試辦建昌官運事宜並於兩淮運庫撥存淮商借款項下籌墊官本銀三萬兩交由該員具領仍責成於餘利內陸續歸還一俟引岸全行收復商

情踴躍再行由商認運以符定章除咨部查照外謹附片具陳伏
乞

聖鑒謹

奏

以工代賑撥案報銷摺

宣統元年三月

奏爲江北挑濬運河及建造南六塘河南岸閘洞以工代賑支用
各款開單報銷恭摺仰祈

聖鑒事竊查光緒三十二年江北淮徐海各屬大水爲災飢民甚
衆當經奏明廣爲賑撫以資安集仰荷

聖恩頒帑截漕撥用桂捐溢款並開辦各項賑捐藉資接濟所有
賑撫平糶疏築河隄以工代賑各款業經分爲三案開單奏報均
奉

硃批該部知道單併發欽此茲據江南賑捐局詳稱江北災賑第三次報銷以工代賑案內曾經聲明六塘河尙有應建閘洞及運河應大加疏濬均須籌款另辦接續造報在案查江南運河以上游之宿遷桃源兩縣境內爲最高淤墊亦最易從前江北運漕每歲尙略加疏通自漕糧停運以後久未挑濬愈墊愈高水小則舟楫不通水大則泛濫爲患前次江北水災半由運河不能容納所致當時署淮揚海道楊文鼎履勘河形應於宿桃二汛內大加修治督飭委員估挑一百二十四段工頭築做攔水柴土壩一道壩上抽挑引渠一道並於邳州宿遷縣境內堵修河定河成匯澤利運漕流等五閘均於光緒三十四年三月十二日工竣共用料土夫工等項銀四十九萬八百一十一兩六錢二釐八毫又六塘南北兩河先經前山東東昌府知府魏家驊重建長堤四道卽議於南

六塘河南岸擇要建造閘洞河內水漲得有分洩田間雨多得有去路既保堤岸亦衛田廬皆必不可緩之工亦經楊文鼎在署淮揚海道任內督同委員勘估於三圩閘金家口兩處建石閘兩座大澗河丁家口王家沖涵洞口四處建石涵洞四座先於各閘洞開槽築壩然後興做石工於光緒三十四年十一月二十九日一律工竣共用土木磚瓦料土夫匠等銀五萬五千五百五十五兩七錢六分三釐六毫以上河工石工兩項共支庫平銀五十四萬六千三百六十七兩三錢六分六釐四毫內扣除六分餉平實支銀五十一萬三千五百八十五兩三錢二分四釐四毫查照原案在於賑捐款內動支除收賑捐第四十次起至第五十一次止共銀三十六萬二千二百二十三兩四錢又七項常捐第三十九次起至第四十三次止共銀十一萬五十二兩總共收庫平銀四十

七萬二千二百七十五兩四錢外計不敷庫平銀四萬一千三百九兩九錢二分四釐四毫暫行設法挪濟俟續收賑捐截數後歸補至前項工需銀兩係除平實支並無扣存餉平銀兩查照江北賑濟平糶河工三案開單報銷詳請具奏前來臣等復查此次挑河築壩在邳州宿遷桃源三州縣境內建造閘洞在清河安東兩縣境內均係光緒三十二年災重之區三十三年秋成後民甫生聚元氣未復此兩項工程本係以工代賑專爲接濟災民做過工段均已派員驗收委係工堅料實所用各款亦係實用實銷毫無浮濫自應援照江北賑濟平糶河工各案繕具清單恭呈御覽謹合詞恭摺具陳伏乞

皇上聖鑒謹

奏

籌備南洋勸業會摺 宣統元年四月

奏爲縷陳南洋勸業會籌備情形籲請明降

諭旨宣示開會綱要明定責成以資觀感而昭慎重恭摺仰祈
聖鑒事竊 臣於光緒三十四年十一月間奏設南洋第一次勸業
會一摺欽奉

硃批該部知道欽此遵卽督飭省內外官紳商董等趕速籌備先
於江甯上海兩處分設南洋勸業會事務所及董事會派委職員
舉任商董以專理籌備進行方法江蘇事務所暫設庶務文牘調
查建築四科酌定先後緩急約分三期辦理以議定各項章程繪
具建築圖樣爲第一期規畫會場調查物產爲第二期建築完竣
賽品齊集爲第三期其第一期應辦各事已大致就緒現正選派
官紳分往各地調查物產聯絡工商以爲勸業會之先導一面參

仿日本成例酌定規章通飭兩江所轄各府屬中先於本年擬設物產會以各府知府爲監督蒐集農產工藝美術教育諸物品就地訂期開會展覽此外各省及各著名商埠均設出品協會以各關道勸業道爲監督徵集漁牧物產機械圖書及各項製造新奇物品以立勸業會之基礎更聯合各省紳學商界開通練達之才設立協贊會籌畫交通補助出品以作勸業會之機關至會場布置擬分設農學工學商學衛生電學體操踢球賽馬各會所分門別類陳列以資研究以供觀摩並擬設別館准外國人攜物與會俾得見聞略廣風氣漸開於範圍限制之中仍收比例競爭之益此近日籌備辦法之大略情形也臣查勸業會之設發起雖在南洋若能辦理得法豫計將來效果正賴鼓舞全國實業之進步是以體制既宜加崇豫備更須周密且對於會場賽品運集勸

立見錄之三十一
卷一
四十一

獎補助均應格外從優庶籌集較易而程功可期向來東西各國
凡遇賽會無不明奉國君敕令先期頒告全國誠以事極重大非
此不足以新一時之觀聽振通國之精神迨至開會有期復敕任
親貴大臣爲該會總裁或審查總長以備臨時蒞會舉行開幕及
授與褒狀證書諸禮主任審查賽品與辨別器用良楛諸事且有
國君親臨召集內外國人躬行開會典禮者此皆各國通例故其
未賽之先皆視爲特別鄭重之舉既賽之後無不收文明進化之
觀中國向未仿行賽會今由南洋勦辦一切章程規則前無所受
締造之法既較各國爲難集合之機又較各國爲塞若不仿照各
國通例則凡籌措諸端均有艱於著手之慮臣近時諮詢僚友審
查商情通達者咸一意贊成拘墟者尙不無觀望蓋以誘掖獎勵
之道猶有所未盡也竊見比年以來凡關於憲法教育軍備諸要

政迭奉

明詔頒布不啻三令五申薄海臣民同深感奮賽會一事實與開
濬智識導揚風化具有無形之感應而於國計之盈虛民生之豐
嗇尤息息相通其關係良非淺鮮應請明降

諭旨宣示開會綱要並設正會長一員專任籌備該會一切進行
事宜審查總長一員專任臨時蒞會審查酌定褒賞事宜審查總
長應俟開會前期奏請

簡派其正會長有豫爲籌備各事該會既名爲南洋勸業會臣應
卽督飭官紳妥爲辦理至現距開會日期不過一年事屬艱行一
切須早爲部署仍懇

敕下各省督撫不分畛域豫爲籌辦協會出品等事一體實力贊
助庶幾海內臣庶咸曉然於

朝廷振興實業優予提倡之至意將見內外一心上下相應爭先恐後相與圖成得因勢利導之方自能收事半功倍之效臣參仿有時攷查既確不敢不據實陳請伏維

聖明垂察准予施行洵於中國實業前途大有裨益除飭取副會長以下任事各員銜名另行咨部查照外謹會同江蘇巡撫臣陳啓泰恭摺具陳伏乞

皇上聖鑒訓示謹

奏

赴賽物品免完稅釐片

宣統元年四月

再准度支部咨江甯設立南洋勸業會自係振興實業起見查章程內開各省赴賽物品先由出產處運至南京請南洋大臣奏定概免釐稅一節當經行查稅務處據覆赴賽物品彼此售賣核與

尋常商貨趁赴市場無異該會場所擬報運各省赴賽物品沿途概免釐稅之處礙難照准等語既經稅務處核駁未便准予照辦等因在部臣就事論事專意慎重稅課固屬一秉至公惟查各國通則無論大小賽會從未有招人赴賽而轉征賽品稅之例中國既仿行賽會似此緊要關鍵若首先與各國辦法顯有不同固足貽人口實且卽以中國現勢論各處實業既未見振興商情孤離又久成積習今日卽明言概免稅釐尙恐赴賽者未必踴躍猶必待廣籌招徠倡導之法若復限之以稅釐勸引稽征同時並舉商民將聞風裹足却顧不前蓋商人經營生計無不惟利是圖凡各項赴賽物品半係由遠道運送費用已屬不少再加以沿途稅釐一經通盤籌算受虧過甚存顧惜資本之心易阻其增益見聞之志理有固然勢有必至况現設南洋第一次勸業會本係特別規

辦迴與他處勸工陳列等所運集貨品者不同而運賽貨物又全
爲特別賽會而來亦與本地日用要需應銷之貨有異卽予概免
稅釐既與尋常徵額仍不相妨一至賽會期竣實業漸興銷路加
增此後徵額亦將與之俱進此所謂因民之利而利之也將來賽
會之功效何若全視稅釐之征免以爲轉移若因此一事阻礙必
使全局解散羣情觀望且恐已集之會款難與收齊未來之實業
無由發達功廢半途深爲可惜此臣所慄慄危懼而尤不敢不據
實上陳者也合無仰懇
天恩俯念賽會關繫極爲重要准將赴賽物品概免沿途稅釐以
示提倡而資興感出自

鴻慈逾格除飭妥擬免完稅釐專章及運貨聯單辦法另行咨部
查照外理合會同江蘇巡撫臣陳啟泰附片具陳伏祈

聖鑒訓示謹

奏

賽會有裨實業片

宣統元年四月

再光緒三十四年三月間准學部咨議復閩浙總督松壽奏請
飭籌款興辦實業學堂一摺奉

旨依議欽此咨行欽遵前來當查原奏內稱中等初等各項實業
學堂現各省已經設立咨報到部者尙不多見似應明定期限兩
年之內每府應設中等實業學堂一所每州縣應設初等實業學
堂一所每所應收學生百名由部嚴催各省督撫督飭各府州縣
認真辦理毋得延宕等語卽經飭屬一體遵照本年三月間復准
學部咨查江甯報到光緒三十四年學堂一覽表所列各項實業
學堂均經逐一檢核分別簽明應飭各遵簽明各條修改切實辦

理併飭各府州縣遵照上年奏案及時增設每設一堂即將課程辦法報部核定等因又經通行遵辦各在案臣查中國民風愚塞地產荒廢製造不精凡農工商業各界無不拘守成法故步自封良民終歲勤動尙可以自謀其生莠民專好游閒遂不覺流而爲匪誠非由直省各府州縣一律開辦實業學堂不足以廣造就而阜民生所難者中國於實業一途向無專門之學近年經管學大臣奏定高等中等農工商實業學堂章程商部首先開辦嗣於三十年間經前督臣魏光燾就甯省原有格致書院奏明改設實業學堂計分農工電礦諸科按班教授臣到任後察看該堂課程多未完善學生程度更覺參差不齊立即遴選深明教育之員派充監督由臣督飭整頓改良如農科之農具土壤作物及農用工學電科之電氣磁氣及電氣工學礦科之化學實驗地質學測量學

及野外演習各項功課一律改習專門增多授課時間並將各科學生確切考驗礦科一班多格致書院舊生於二十八年入堂各種普通科學均有根柢皆能直接聽講英文其農科電科兩班於三十年正月入堂第一第二兩學期內因兼習專門普通學業未足卽令補習普通一學期一面酌定各科所需之器具藥品書籍擇要購備以爲實驗之用現經學部考核簽明以該堂課程皆知注重實習科目採用圖書亦見精擇較之他處學堂但以實業爲名者自屬優勝惟學堂未經訂明等級農電礦及應用化學各科課程揆之定章不免闕略所闕各科是否勻在前後各學期教授應考查學生程度將學堂等級規定並將各科課程分年程度分別列表具報備核其本係闕略之課程應卽遵章補授等因應由

臣督飭考查辦理另行咨報此外如高等中等商業及蠶桑學堂

省城均早經設立其外府州縣祇鹽城縣設有民立蠶桑學堂一所至中等初等各項實業學堂尙未據報設有案近來各府州縣明達官紳見省城各項實業學堂辦理已有成效亦頗思從而仿行惟風氣未盡開通教育尙難普及必須乘此時機設法提倡使人人知實業之利可以挽回貧弱爭進富強自能踴躍從事此臣所以反復籌思而特以勗辦賽會爲請也蓋賽會一事本係參仿各國成法現派員分赴各府州縣勸辦出品協贊等會宣布宗旨並演說中外實業競爭之理由各地商民咸知感奮將來開會時徵集全國天然工藝美術機械圖書各項物品彙齊羅列較短挈長優者勉以進行必且出奇以制勝劣者從而比較亦思化窳以爲良由是而勸業之效旣中於人心向學之機漸形爲風俗屆時再飭令各州縣參酌省城實業學堂辦法會商公正紳董切實妥

籌仿辦人知觀感則事易推行是必有賽會以開其先始能有學堂以踵其後似此因勢利導勸誘兼施革游惰之風而進文明之化當可於中國實業前途大有裨益除由臣體察情形隨時督飭辦理外謹會同江蘇巡撫臣陳啓泰附片陳明伏祈

聖鑒謹

奏

解送京師圖書館書籍片

宣統元年四月

再臣曩年奉使回國條陳導民善法四端首以剏建圖書館爲請比蒞江南搜羅圖籍擬於江甯省城建築圖書館奏奉俞旨欽遵在案竊惟京師爲首善之區中外觀瞻所繫圖書館之設所以敷宣

聖治嘉惠藝林尤宜從速觀成力求美備惟是善本祕籍羅致爲

難東南各省夙稱文物薈萃之區雖經兵燹之摧殘不少縉紳之藏弄不脛而走時有所聞自應代爲購求冀以免流失而資補助當經飭由藩學兩司會同購定浙紳姚氏藏書一千零十一種皖紳徐氏藏書六百四十一種兩項書籍計共十二萬九百餘卷分裝一百八十箱共編目錄一分於光緒三十四年十二月委員領賚解送學部驗收所有兩項書價共銀二萬兩均由臣飭由財政局分別籌給除咨部外謹附片陳明伏乞

聖鑒謹

奏

請給華僑學生官費片

宣統元年四月

再據歐洲留學生監督蒯光典呈稱留英自費學生葉秀憲係爪哇華僑原籍廣東自費赴英留學已屆六年現在倫敦蓋史醫院

醫學專門學校去年春季第二級大考試驗及格因資斧告絀求給官費俾資卒業以期深造等情并將該生所得英國皇家醫科大學暨倫敦蓋史醫院醫學專門學堂稱其成績優美報告二紙呈驗前來查南洋華僑自經

朝廷遣艦出洋加意撫慰眷懷祖國之誠益加肫篤前年臣於江南創辦暨南學堂教育華僑藉資提倡該僑民等漸知於南洋各島興辦學堂自謀教育近年以來爭慕漢學并能內渡延聘教員期同文軌而風氣所趨其秀者遂能留學歐西具有大學學生資格此誠轉弱爲強之機亦卽內嚮輸誠之本自應准給官費以示鼓勵燕副

皇上惠愛僑民之德意除咨部查照外理合附片具陳伏祈

聖鑒謹

奏

請建殉難知縣專祠摺

宣統元年四月

奏爲已故知縣殉難慘烈遺愛在民籲懇

天恩俯准建立專祠以彰忠藎而順輿情恭摺仰祈

聖鑒事竊據署徐州道爽良轉據徐州府沛縣詳據邑紳趙玉理等十六人聯名稟稱竊查已故前任沛縣知縣丁吳河南永城縣人由副貢就職州判歷署沭陽安東銅山等縣丞咸豐八年署理縣事時值捻匪縱橫徐屬處四戰之區沛邑尤爲衝要同官多畏避不往該員夙以風節自勵奉檄卽毅然請行蒞任以後於地方事宜悉心經畫尤以賊蹤飄忽防守維艱用訓練精壯修築堡塞冀以自固會山東客民與土著械鬪該員率團練數十人親往彈壓不意客民豫勾捻匪大股數千人乘所不備突起環攻練勇旣

以衆寡不敵潰散該員獨義不返顧罵賊被戕與尸返城鱗傷徧體時咸豐九年七月二十七日也事經上聞奉旨賜卹入祀本籍昭忠祠給予雲騎尉世職光緒三十一年重建京師昭忠祠並准附祀自該員殉難至今垂五十年耆老謳思往往隕涕伏思該員死事之烈屢荷恩綸賜卹是其忠蓋大節早在

聖明洞鑒之中惟是本籍及京師雖已先後入祠而沛邑爲該故員禦賊捐軀之地士民愛戴尤深至今祠祀闕如實不足勸忠烈而伸報享爲此合詞籲請轉詳奏懇將已故前沛縣知縣丁炅准其在沛縣城內由地方籌建專祠編入祀典地方官春秋致祭等情並造具事實冊結由府申道詳請具奏前來臣悉心察核該故員丁炅守土授命大節凜然遺愛在民久而不泯馨香之報出於

至誠查光緒三十一年前兩廣督臣岑春煊奏請將已故廣西龍川縣知縣札倫布建立專祠光緒三十四年前安徽撫臣馮煦奏請將已故安徽合肥縣知縣張文斌建立專祠均蒙特旨允准該故員官職相同効忠一致既據士民籲懇未便壅於上聞合無仰懇

天恩俯准將已故前署沛縣知縣丁炅准其於沛縣城內建立專祠由地方官春秋致祭以彰忠蓋而順輿情出自逾格鴻施除將冊結分咨查照外謹會同江蘇巡撫臣陳啟泰恭摺具陳伏乞

皇上聖鑒訓示謹

奏

捕治蝗蝻不致損稼片

宣統元年四月

再查上年徐海淮安各屬蝗蝻孳生經臣等切飭各州縣認真撲捕收買田禾無損蝗不爲災業經奏陳在案惟生蝗之處遺子甚多兼之冬間雨雪稀少又經通飭搜挖蝻子並摘錄古人挖捕蝗蝻成法彙刊分發各屬認真仿辦本年三月以後天氣亢晴久未得雨山陽清河海州寶應銅山等處湖河各水涸淺灘邊葦草之中蝻孽發現卽經嚴飭切實捕挖給價收買一面選派委員分往幫同逮捕並分電山東安徽河南等省一體飭捕嗣宿遷邳州睢甯安東鹽城桃源阜甯上元江甯高郵州泰州東台等州縣及海泰各鹽場並江北提標所轄之葦蕩營均有蝗蝻萌動復經分別嚴電申做已出土者上緊撲捕未出土者設法搜挖並因時值農忙集夫不易飭令加價收買其因捕蝗踐損之蔬麥准其酌給價值以示體恤所需經費在於積穀項下動支濟用如有不敷或無

積穀之處卽稟由臣等籌款接濟其葦蕩營及各鹽場捕蝗經費由署江北提臣王士珍及淮運司分別撥用一面加派委員分投幫辦徐州府知府田庚並親赴各屬督捕以資得力東皖等省亦經迭次電商飭令趕捕擬補銅山縣知縣朱枚署宿遷縣知縣汪寶增辦事甚勤捕蝗最力數日之間卽將境內蝻孽挖除淨盡海州直隸州知州謝元洪捕蝻露宿感受寒疾加派海州商埠委員江蘇候補道宋康復就近督捕謝元洪仍力疾從公不遺餘力四月十五日以後大雨連番土脈深透邳州睢甯清河山陽上元江甯等處蝻孽均已據報撲盡其餘亦各十去八九旬日之內當可一律殲除惟豐沛交界之山東魚台縣湖邊出有蝗蝻飭派田庚前往會同濟甯州魚台滕縣兩縣詳細查勘南陽湖坐落魚台滕縣銅山沛縣等縣界連兩省湖面極寬現惟魚台境內湖灘出有

小蝻約十餘里該處地極荒僻四無人居葦草瀰漫一望無際集夫挖捕事極繁難斷非一縣之力所能集事田庚遂與濟甯州魚台等縣商訂四縣合捕章程飭由豐縣沛縣各集人夫前赴魚台協捕一面由山東撫臣袁樹勛飭派堯沂道前往督飭魚台等縣上緊多集人夫認真捕挖收買似此兩省通力合作當不難於廓清此外徐淮各屬交界之安徽盱眙縣洪澤湖出蝻甚衆近據宿遷睢甯兩縣電報有飛蝗經過由南而北卽係洪澤湖邊所出之蝗迭經電致安徽撫臣朱家寶嚴飭捕治並飭淮徐邊界各州縣一體掩捕以杜蔓延不准稍涉疎懈現在各屬二麥收成尙稱中稔連得大雨民情安靜臣等仍當嚴飭各州縣印委人等將未盡之蝗蝻竭力搜捕務使淨絕根株禾稼不致有損以仰副

朝廷廬念民生之至意謹會同江北提督臣王士珍附片具陳伏

祈

聖鑒謹

奏

已故大員籲懇

恩施摺

宣統元年四月

奏爲已故褫職大員宣力有年前勞足錄據情籲懇

恩施量加矜卹恭摺仰祈

聖鑒事竊據常熟縣紳士翰林院檢討陸懋宗等呈稱已故革職戶部尙書協辦大學士翁同龢於光緒二十四年罷官歸里嗣復
恭奉

嚴旨革職三十年五月身故當經奏報在案紳等伏查翁同龢係已故大學士翁心存之子一門兩世俱入綸扉歷事四朝並參機務同龢遭逢

顯廟擢冠瓊林既乃侍

穆宗毅皇帝於宏德殿侍

德宗景皇帝於毓慶宮前後三十餘年再爲師傅兩預機衡

恩遇之隆世無倫比迨奉

旨罷斥以後閉門思過教督子孫念及時艱輒復流涕不食身故

之後家無餘財吳中士民見其忠清莫不嗟惜今者

沖皇御極首布

恩綸昔年緣事罷譴諸臣每荷

聖慈曲予瀚被翁同龢舊臣世德効力多年迹其講畫之勞宜在

矜原之列合詞懇爲奏請

恩施等情前來臣伏念翁同龢以甘盤舊學我

穆宗毅皇帝恩禮甚至

德宗景皇帝眷顧尤隆當甲午戊戌之交時局艱危

宮廷旰食翁同龢身膺樞要責有攸歸乃循繹二十四年十月

嚴旨獨咎同龢輔導之無方仰見

聖人責躬之微意蓋當五洲交通之時代本中華未有之艱難在

當時不可寬責備之文在今日似宜有原情之論翁同龢起家世

胄博學能文屢典文衡得人最盛天下英雋之士多出其門我

朝厚澤深仁最隆師傅同光

兩朝之

聖學既已垂曜千秋

經筵啓沃之世臣或當掩其一眚我

皇上繼志述事

至孝至仁上體

在天降鑒之心定深故舊不遺之感合無仰懇

天恩俯准將已故革職戶部尙書協辦大學士翁同龢開復原官以昭

恩意至可否

特予優卹之處出自

聖裁非臣所敢擅請所有已故褫職大員據情籲懇

恩施緣由謹恭摺具陳伏乞

皇上聖鑒謹

奏

陸軍第一案報銷摺

宣統元年四月

奏爲江南陸軍第九鎮徵收新軍收支用款列爲第一案報銷繕單恭摺具陳仰祈

聖鑒事竊查光緒三十年間練兵處咨送奏定陸軍營制餉章令各省次第編練等因當經前署督臣周馥特設兩江督練公所委員辦理兵備參謀教練三處事宜續後添設參議並照章設立鎮統先就江南原有各防營汰弱留強委員勸辦徵兵分別改編步隊四標馬礮工輜軍樂各營隊先成一鎮其餘作爲留防巡防各營隊遵照練兵處擬定名次暫編爲江南陸軍第九鎮其營房器械服裝戰馬各項派員次第購辦旋因兵房建造需時徵兵尅期卽至先搭草兵房以爲權宜之計服裝未辦以前仍照向章發給單夾帳房操衣靴帽以備臨時操練並分設騎礮工輜衛生獸醫各學堂教授專門之科學附設雜誌印刷研究等社所講求兵事之內容兼於本省外省畢業學生中考送奧國分入營校練習以儲將才派充各營見習士官以資實驗所需開辦經費及新軍用

款事屬創始無例可循或以舊餉抵支或另籌新軍餉項藉資支應以上各情經前署督臣周馥及臣端方先後

奏明在案營制既定編練成軍一切用過各款自應趕緊清釐報銷又經飭催去後茲據督練公所總參議開缺奉天奉錦山海關道朱恩紱等詳稱江南陸軍遵奉練兵處議定名次當將原由武衛左右翼改編之第一標全換徵兵暫編爲第三十三標原由護軍正四旗改編之第二標與常備右軍改編之第三標歸併合一暫編爲第三十四標另用徵兵暫編爲第三十五標又原由老湘合字五營改編之第五標簡存精銳添補徵兵暫編爲第三十六標是江南陸軍步隊四標其原由常備左右軍馬隊及常備右軍礮隊工程隊改編之馬礮工程各一營復加考察除馬隊一營尙屬合格外餘皆悉數裁撤換用徵兵編立馬隊礮隊各一標工程

輜重各一營軍樂一隊此外南字三營原編之第六標挑編合格兵丁一營兩隊分別歸併其餘裁撤當以原編第四標之武威新軍六營兵丁程度太低改爲第六標而與新湘五旂所編第七標盛字五營所編第八標同爲要塞兵又護軍正四旂剔出不合新兵資格簡其年力富強者連同護軍副左副右兩旂分編爲留防第一至第五隊奇兵左旂分編爲留防六七兩隊盛軍餘兵分編爲留防八九十三隊奇兵右營分編爲留防第十一至第十四等隊又督標新兵前營分編爲留防第三十二三兩隊至原擬改編留防馬步隊之督標新兵中左右後四營及滬軍親兵營均奉留辦江甯上海等處警察又駐紮上海之撫標滬軍營駐紮清江之銘字馬隊三營元鎮步隊四旂並徐防馬隊二營步隊三營一哨均因防務緊要暫緩改編他若續由要塞標兵挑編留防隊者旋

奉歸併巡防以節餉糈所有前項改編各防軍統領營哨官弁兵夫薪費口糧等款截至光緒三十一年三月初六十二四月十八十月十八等日住支止已由江蘇留防第三十四案內分晰造報並聲明陸軍餉章營制均與留防向章不符應歸另案辦理是此次造報江南徵練第九鎮新軍報銷應自三十一年三月爲始內除建造兵房及添配馬匹器械雖係三十三年分借款應付但有開辦經費之款皆不得提前造報至各營局所學堂薪費口糧並全鎮常年服裝仍一律造報至光緒三十二年底止以清界限現經督同委員逐款勾稽分別釐剔核計本案舊管上屆實存無項新收金陵防營支應局三十一二兩年經放各款連同江南銀銅元局借撥籌防局備購淺水輪船價銀歸還支應局借款奉撥抵充新軍開辦經費規平銀三十萬兩一併在內共於江蘇留

防第三十四五兩案先後登除庫平銀二百十五萬六千六百五十三兩一錢三分四釐八毫八絲九忽九微又由留防案內劃歸新軍入收之江南海關蘇松太道金陵釐捐木釐兩局鄂湘西皖四岸督銷局江南機器局奉撥新軍專款共庫平銀八十五萬八千六百九兩零又由公所借作開辦經費計共借撥蘇松太道江甯藩庫江南財政局洋火藥局陸軍糧餉局官銀錢局並混成協開辦經費共庫平銀四十萬二千六百四十六兩零又收回各營呈繳病馬變價購辦上海三井洋行槍礮定銀回息製造一分平餘共庫平銀二千一百五兩零總計入收庫平銀三百四十二萬十五兩零內登除撥解江南陸軍小學初級高等小學江南測繪將備各學堂並建造營房出防江西招募混成協等項經費共計庫平銀五十一萬二千六百五十四兩三錢二分又附列四冊共

請銷庫平銀六十五萬九千九百八十兩六錢三分六釐五毫三絲八忽內應歸度支部核銷江南要塞兵四標並兩江留防各隊薪費口糧留奧學生薪水學費津貼等款庫平銀六十四萬二千二百六十九兩九錢六分陸軍部核銷送奧學生整裝費川資房飯並製辦服裝馬鞍用物等款庫平銀一萬一百四十二兩三錢九分民政部核銷憲兵司令部官佐兵夫薪費口糧服裝用物等款庫平銀七千五百六十八兩二錢七分七分以上登除並附列請銷二共庫平銀一百十七萬二千六百三十四兩有奇實計收用庫平銀二百二十四萬七千三百八十兩三錢一分支應江南陸軍第九鎮步馬礮工輜軍樂各營隊學堂局所薪費口糧馬乾勸徵新兵建搭草兵房採買馬匹槍礮服裝製造帳房並操衣藥費什物等項折價病故恤賞見習士官薪水各款遵照部議酌定軍需

報銷章程各歸各部核銷計應歸度支部核銷庫平銀一百三十二萬二千九百四十七兩八錢三分五釐九毫二絲三忽七微陸軍部核銷庫平銀九十二萬二千九百六十四兩七分三釐七毫六絲七忽九微統共請銷庫平銀二百二十四萬五千九百一十八兩九錢九釐六毫九絲一忽六微實存庫平銀一千四百六十八兩四錢七釐八毫二絲二忽六微已接支光緒三十三年分購辦常年服裝等項之用歸於後案舊管項下滾接造報等情詳請奏咨前來臣等查此次江南徵練陸軍事屬剏辦一應用款多無例章可循復核冊報收放各款尙屬核實並無浮冒理合繕具清單恭呈

御覽合無仰懇

天恩俯准敕部照數核銷以清款目謹合詞恭摺具陳伏祈

端忠敏公奏稿卷十四終

皇上聖鑒謹

奏

臣等謹將... 奏

端忠敏公奏稿卷十五

酌加湘鄂引票片 宣統元年五月

再淮南鹽引向係行銷鄂湘西皖四岸而四岸之中尤以鄂湘兩岸銷數居其大半兵燹後各處鄰私乘機侵佔以致南鹽引額比之從前短缺尙多光緒八年前督臣左宗棠會議規復舊額奏加楚岸引鹽三百票當時部臣以湖南北銷數每年僅約二十餘萬引上下若驟加三百票恐不能按輪銷竣議令暫加六十票其餘引額逐漸加增期於

國課商情兩有裨益嗣經前署督臣張之洞暨前督臣劉坤一先後奏加四十六票較之左宗棠原請之數尙短一百九十餘票臣到任後疊次嚴飭各督銷局道員整頓緝私設法疏引近年湘鄂銷市日益暢旺每歲均在三十餘萬引上下是從前加票部議以

歲銷二十餘萬引而暫停者今且增銷至十萬引以外其爲銷數溢於票數已可概見據總辦江南財政局江甯布政使樊增祥以財政局本年支放各款豫計約短二百餘萬非急切籌維無以濟目前之急而各省應解江南撥補釐金款項積年虧欠已短解七百餘萬之多尤爲餉項竭蹶之一大原因稟請酌加湘岸引鹽七十票合鹽三萬五千引鄂岸引鹽三十票合鹽一萬五千引遵照定章每票飭繳捐銀一萬兩又以近時湘鄂商票獲利較豐請於正項外每票加捐銀二千兩一併歸入江南財政局暫抵撥補釐金各省欠解之項俾充本年應放要需其餘不敷銀兩另再設法籌濟等情臣查核所稟體察岸情若照該司所擬酌加湘鄂引鹽一百票合鹽五萬引洵屬無礙鹺綱有裨餉項卽經批飭兩淮運司查照招商認領去後茲據署兩淮鹽運使江安糧儲道吳封分

別招商認足應繳銀兩亦均陸續繳齊援案歸入現行綱分與舊票一律挨售三綱以內免予輸捐舊商無積壓之虞新引得轉輸之利商情亦屬翕然詳請具奏前來臣復核無異除咨部查照外謹附片具陳伏乞

聖鑒訓示敕部立案施行謹

奏

蘇撫出缺代遞遺摺摺宣統元年五月

奏爲江蘇撫臣因病出缺代遞遺摺恭摺具陳仰祈

聖鑒事竊照江蘇巡撫臣陳啟泰於宣統元年五月初三日因病出缺當經臣電請軍機大臣代奏在案茲據該家屬交到遺摺呈請代遞前來臣伏查江蘇巡撫陳啟泰由翰林起家官御史時遇事敢言多所論列外任山西大同直隸大名保定等府知府升任

雲南迤東道調任直隸通永道旋授安徽按察使兼署提學使所
在整飭吏治勤恤民依任事實心悉稱厥職光緒三十二年八月
補授江蘇布政使逾年補授江蘇巡撫該故撫臣在蘇藩司任內
於地方利弊研究精詳洎領專圻益復勞怨不辭盡心規畫恭值
豫備立憲庶政維新按照憲政編查館單開逐年籌備事宜除選
舉一項依限舉辦外如籌備城鎮鄉地方自治設立自治研究所
調查戶口總數調查歲出入豫算決算籌辦省城及商埠等處各
級審判廳刑設廳州縣簡易識字學塾廳州縣逐警各項事宜應
由各省督撫同辦者遵照光緒三十二年新定直省官制通則第
六條於本署設立會議廳傳集省城司道及各局所總會辦各屬
地方官吏分別先後緩急爲實行之方法所有會議議決草案實
能提綱挈領循序圖功於憲政前途大有裨益本年春夏之交以

積瘁有年感觸時疾荷蒙

恩准賞假仍於緊要事件力疾舉辦與臣咨商函電動中機宜未嘗以老病侵尋稍形曠廢驟聞溘逝惋惜殊深該故撫臣服官內外四十餘年平時砥礪廉隅講求正學身歿以後家無餘財亮節清風尤堪矜式謹將交到遺摺恭呈

御覽應如何量加

恩卹以彰勞勩出自

鴻施逾格該故撫長子繼鸞江西試用同知次繼鶚民政部學習郎中繼鶴候選鹽經歷繼鵬直隸試用知縣繼鵠分部主事繼鷗候選郎中繼鵠二品廕生孫八人合併查明附陳所有江蘇巡撫因病出缺代遞遺摺緣由理合恭摺具陳伏乞
皇上聖鑒訓示謹

奏

寬免道員處分片

宣統元年五月

再降調二品銜江蘇候補道沈邦憲前因辦理銀元局務應交盈餘銀兩不敷比較輕吏部比照關稅正額銀兩欠二分以上降四級調用公罪例議以降四級調用無級可抵遂致實降查盈餘之多寡本以市價漲落爲衡該員承辦局務僅及半年其比較不敷實由市價無定是以部議處分係屬公罪其爲並非該員侵蝕可知臣前年到任後接見僚屬僉以該員爲守兼優通達治體爲監司中不可多得之選留心考察洵屬名實相符且升任署督臣張之洞及前督臣劉坤一均經專摺奏保是該員才具可用早在聖明洞鑒之中現在時事多艱需才孔亟若令其久置閒散殊屬可惜該員所得公罪處分恭逢

恩詔本在准其寬免之列合無仰懇

天恩俯准將該員沈邦憲銷去公罪降調處分仍以原官原銜留
於江蘇補用出自逾格

鴻慈謹附片具陳伏乞

聖鑒訓示謹

奏

查明知縣參款摺

奏爲查明知縣被參各款據實覆陳恭摺仰祈

聖鑒事竊臣於光緒三十四年十二月二十六日承准軍機處字
寄十二月十四日奉

上諭有人奏江蘇丹徒縣知縣王得庚迴護劣紳亂法便己等語
著端方陳啟泰按照所參各節確切查明據實具奏毋稍徇隱原

片均著鈔給閱看欽此欽遵寄信前來臣當卽札委江甯藩司按
照原參各節逐款詳查據實具覆茲據該司詳稱遵卽密派候補
知縣左杖周前往丹徒縣逐一訪查並將全案卷宗提省查閱復
加派候補知府應德閔馳往復查案中原委均已詳備如原參李
遵義承辦清荒悖謬多端大失原奏釐剔虛糧之意王得庚到任
後歆於李遵義糧賦加多之言驟請據新冊以征錢糧上忙由單
初出鄉民大譁該令利其浮收威怖計誘迫民完納冬漕啟征操
之尤蹙勢將激變一節查徒邑清荒局務經邑紳嚴良霈等公舉
江都縣教諭李遵義回籍承辦所造新冊額消則案誠與原奏釐
剔虛糧之意大相刺謬王得庚到任後與李遵義函牘往還逐層
駁詰李遵義乃瀝陳舊冊之害新冊之利並謂虛糧一日不去衆
情一日不安如有謬誤願歸一手更正王得庚因徒邑開漕已非

一次下車之始，愆後懲前，曲徇所請，此中頗具苦心。查核新冊，啟征銀米額數較舊冊，且有短絀，則非歆於加賦利其浮收，固已不辯自明。惟新冊歧誤實多，羣情不洽，李遵義勸誘愚民，先完忙銀，給以冬漕更正，雖非迫以強權，不免愚以柔術。蓋亦騎虎之勢，迫而出此者也。原奏又謂廩貢生何長慶等數十人，以李遵義改則加賦私收荒田等款，控經督撫批飭嚴究。蘇藩司委候補縣張鎔萬往查，盡得李遵義奸狀，惟於該令之縱庇浮收，舞文肆虐，則同官相護，毫未揭發。藩司知清荒局務糜爛屢飭更正，而該令一味玩延，八月中復經嚴檄始草，草辦理爲搪塞之計，而於清荒之一切弊端，則始終力爲護持，一節查何長慶等原稟，臚陳七弊，指控李遵義辦理不善，並無一語涉及縣令。且同時稟縣請究，卽經王得庚據稟，照會李遵義明白具復查核。卷中月日確在，未奉督撫

批示以前足見並未縱庇張鎔萬奉委會縣查辦業將李遵義種種悖謬情形會縣稟復蓋此案原委本可據事直陳不必同官相護王得庚試用新冊以後卽出示曉諭民間如有錯誤隨時赴局更正嗣恐局中遲延又經迭諭赴縣更正而業戶懷疑仍多觀望迨至李遵義董事革退經縣集紳妥議善後辦法各事乃有端緒稽之案牘證之輿論尙非一味玩延卽清荒一切弊端該縣迭次駁詰語頗切直往來函件存案可證亦非始終迴護原奏又謂上年冬詳請奏免荒糧三萬餘畝合米八百餘石該令初無一字曉諭民間蓋其田已無一畝屬於民戶恃上官不能履畝而稽竟捏造花戶名冊上詳夫豈尋常欺罔可比一節查光緒三十三年詳免荒糧三萬餘畝卽秋勘冊列已報未墾已墾復荒等田蠲銀一千三百四十一兩五錢四分九釐米八百四石二斗六升八勺細

核清荒局官民荒冊內開民荒三萬一千四十一畝一分一釐三毫花戶姓名裒然在列核與縣詳冊報數目無異詳免銀米兩項擠查啟征熟田糧額核算流水堂簿查對串根及報解文牘均屬相符所免民糧委無私弊蘇屬勘報向無花戶名冊亦無所用其捏造雖事前事後未經專案將蠲免銀米數目花戶畝分詳細示諭然於常案曉諭完漕示內備述此次清荒查出已報未墾已墾復荒各等田地項下應征錢糧漕米一律蠲免則對於花戶並無欺隱可知原奏又謂原有民荒八萬餘畝李遵義概奪爲官荒以冀自收其利旣被控告該令知徒邑前遭兵燹民間契券盡失則出示責民持券呈官始准發還且西南鄉被奪荒產最多並此示亦未張貼一節查該縣光緒三十三年分清荒案內查見未墾拋荒各等田地八萬餘畝當時並無的戶認繳自應列入官荒惟查

出之後由清荒局訂立界石並不稟明府縣擅自墾種雖田地未盡入己而李遵義之不避嫌疑不明權限誠百喙無以自解嗣經府縣會同出示清荒案內查見荒山田地如果確係民業但執完糧單串概准憑糧認領墾復即使有人冒墾一經查實統歸原業承領其或單串遺失並准取具董保切結核明給領各在案初無責民持券呈官始准發還之語西南鄉距城較遠或不免有漏貼之處自係差保怠玩所致且荒地歸於公司於王得庚毫無利益何必巧奪民田以利他人原奏又謂此案草草更正除公正善士所辦兩三區外仍付冊書代辦且仍令李遵義私黨及所創設之區長圖長暗中主持弊多未革然應續減浮糧又及八百餘石之數是爲原辦改則加賦之明證且內多已輸在官合忙漕兩項浮完勢必逾萬理當准民留抵該令必不實辦又必巧爲朦詳一節

查李遵義革退以後經該縣官紳會商妥議斟酌新舊二冊之間另造準冊所舉總董郭振鵬及十七區董柳昕均係鮑紳心增所薦非李遵義私黨惟三區吳士錡七區吳鴻英十三四區吳士宏係原辦清荒局內之人前據何長慶等稟控吳士錡柳昕把持含混等情卽經蘇藩司駁斥在案緣善後事宜係郭振鵬領袖辦理吳士錡等分領一區仍受成於總理權非專屬無從把持當時查造準冊原議兩月歲事由縣墊款數千串期限甚迫經費較少田畝科則尙未絲絲入扣原參謂弊多未革誠所不免至續減浮糧應辦留抵一案總以辨別額內額外爲斷原參所指爲浮糧者比較三十四年續減之數則見爲溢收查核三十三年勘報之案則屬於正額且征解各數早經彙案詳咨祇能儘征儘解以符原案原奏又謂李遵義霸墾民荒所招客佃多雜匪徒一年以來盜竊

奸拐搶麥偷牛等案迭出民受擾害不敢報官如上塘嶼岡官塘
橋及石馬廟連劫三家各案該令勒令改盜爲竊捕役跡獲佃首
張姓賊證明確該令反故縱去鄉民獲匪送官概不懲辦匪愈仇
民鄉間竟有獲匪私埋之事一節查李遵義所招客佃徐海居多
該處民風強悍難保無匪徒混雜其中原參所指盜劫各案除上
塘地方徒邑查無其名祇有上黨讓王廟僧人圓覺稟報三十三
年十月二十五日夜被劫拒傷一案業經勘報外其三十四年八
月初五日嶼岡保嬰局一案勒限比緝無獲嗣經訪獲佃首張家
祥到案堅稱實不知情因賊無明證訊無確供經紳董吳士筠民
人紀寶泉保釋取有保結等附卷並非無端故縱此外如距官塘
橋二里許之蔡巷村蔡元道家於光緒三十三年十月初三夜被
劫拒傷事主又石馬廟恆源雜貨布店湯恆年德森昌雜貨布店

貢立德飯店王家義同日被竊各案或劫或竊均憑事主稟報有案可稽雖賊盜尙未緝獲而實無縱匪不辦情事委員徧詢鄉耆亦無紳民獲匪私埋之說以上各節經該藩司一再委員密查覆加考核具詳前來臣伏查丹徒自遭兵燹魚鱗冊籍久已無存征收錢糧屢遭物議當開辦清荒之始公舉李遵義總理其事誠以縣官在任久暫既難豫定情形未必周知故紳任清查官爲監督李遵義如果公正無私調查得力則所造清冊必能妥實周詳乃竟利令智昏名與實異改舊時之科則收荒地於公司官受其愚民苦其擾其辦清荒也糜薪自養端坐邑中而使其黨分行四境以致怨謗紛乘悔尤叢集推原禍始咎無可辭應請將江都縣教諭李遵義卽行革職以示懲儆丹徒縣知縣王得庚心術純正歷任繁要頗有政聲當丹徒受篆之初啟征在卽彼時清荒局新冊

已成舊冊已廢既不能停征以待查計惟有變通以從事是以一面詳請暫用新冊啟征一面示諭民間如有錯誤准其更正其駁詰李遵義之書累牘連篇皆爲覈實恤民起見蓋既顧考成又顧糧戶其居心有可原者丹徒土客雜處時有僥民流爲盜賊不得專咎李遵義之招佃更未便謂爲王得庚所縱容至各案盜賊尙未弋獲部中緝捕不力處分例限綦嚴均經臬司查照向章辦理至該縣清荒事宜當由臣會同新任撫臣檄飭蘇藩司督同該府縣邀集本地明白公正士紳將所造準冊再行詳審釐剔不得復有歧誤其拋荒各地應卽察酌情形分別領墾招徠之客佃亦應斟酌去留毋使奸宄混跡總期實事求是宿弊一清庶於國計民生兩有裨益此案卷牘紛繁且經一再調查是以奏復稍遲所有遵

旨查明丹徒縣知縣王得庚革退董事江都縣教諭李遵義被參各緣由謹恭摺據實覆陳伏乞

皇上聖鑒訓示再江蘇撫臣陳啟泰因病出缺是以未經列銜合併聲明謹

奏

審明革員按例定擬摺

宣統元年五月

奏爲審明已革鹽庫大使彭慶善指稱買缺誑騙銀兩按例分別定擬恭摺具陳仰祈

聖鑒事竊據兩淮鹽運使趙濱彥稟揭准補廣盈庫大使彭慶善以營幹差缺等詞誑騙候補鹽經歷潘熙昌銀兩一案經臣端方附片奏參請將該二員一併革職歸案訊辦奉

硃批著照所請該部知道欽此欽遵轉飭兩淮鹽運使趙濱彥飭

委縣局會同提訊詳辦去後茲據署江都縣知縣袁國鈞淮南局員兩淮候補運判陳康審明議擬解由江蘇按察使左孝同覆審解勘前來經前江蘇撫臣陳啟泰就近提犯覆勘無異臣端方詳加查核緣彭慶善潘熙昌分隸江西廬陵浙江嘉興等縣彭慶善由監生報捐運庫大使潘熙昌由監生報捐鹽經歷先後到淮彭慶善於光緒三十三年咨補廣盈庫大使尙未飭令赴任在逃之汪時順向在揚州城內開設寶興油坊與彭慶善素識三十三年九月間潘熙昌由上海措資回揚與汪時順同船認識因此往來汪時順探悉潘熙昌家道殷實先央彭慶善居中借過潘熙昌銀三百兩嗣又串同彭慶善誑騙潘熙昌令其出銀二千兩聲稱代爲打點謀署草堰場缺潘熙昌信以爲真先後交給汪時順銀一千七百兩連汪時順前借之三百兩合成二千兩均由汪時順書

立收據彭慶善畫押彭慶善兩次用銀三百兩洋錢一百元還過銀二百兩洋錢九十元嗣潘熙昌見無消息向汪時順追問彭慶善捏造運司電報搪塞潘熙昌在外探知被騙復向汪時順追還前款彭慶善令汪時順立給期條允至光緒三十四年三月底歸還屆期汪時順先已遠逃彭慶善亦避不見面潘熙昌慮恐訪獲辦罪卽赴鹽經歷衙門自首稟經兩淮鹽運使將彭慶善潘熙昌提案督同府縣暨淮南局員審訊供認詳經奏參發縣看管旋由署江都縣知縣袁國鈞將寶興油坊房屋器具查封會訊通詳飭緝汪時順無獲由該縣局復提現犯訊鞫據供前情不諱究詰不移議擬解司轉解臣復核無異案無遁飾應卽擬結查例載指稱買官買缺誑騙聽選官吏已成財已入手無論贓數多寡不分首從於該衙門門首枷號三個月發烟瘴地方充軍其央浼營幹致

被誑騙者免其枷號亦照前發遣又律載犯罪未發而首者免其罪又光緒三十三年通行條例內載由軍罪附加之枷不論月日多寡各折罰銀五兩各等語此案已革廣盈庫大使彭慶善聽從逸犯汪時順指稱買缺誑騙候補鹽經歷潘熙昌銀二千兩財已入手自應按律問擬彭慶善合依指稱買官買缺誑騙已成財已入手無論贓數多寡不分首從於該衙門枷號三個月發烟瘴地面充軍例擬枷號三個月發烟瘴充軍係職官改發新疆効力贖罪違章飭繳罰金免其枷號該官犯事在恭逢光緒三十四年十一月初九日

恩詔以前雖不在不准援免之列第有祿人誑騙買缺得贓情節較重應否援免請

旨敕部核議已革候補鹽經歷潘熙昌央浼營幹致被誑騙既於

未經發覺之先自行首告律得免罪惟係候補人員究屬有玷官箴業已革職應毋庸議所得贓銀追繳入官封存房屋器具俟追清贓款再行分別發給逸犯汪時順飭緝獲日另結除將供招咨部查核外理合恭摺具陳伏祈

皇上聖鑒敕部查照核復施行再新授江蘇巡撫臣瑞澂尙未到任未經會銜合併陳明謹

奏

審明營弁懲辦摺

宣統元年五月

奏爲營弁詐索平民致斃人命並復交通匪類包庇私梟審明就地懲辦恭摺仰祈

聖鑒事竊據升任兩淮鹽運使趙濱彥稟據統帶淮南緝私各營候補遊擊徐寶山稟揭新勝營幫帶哨弁孫志貴於駐巡鹽城縣

一帶聲名甚劣並有索詐民財致斃人命情事卽經飭將孫志貴撤差發交趙濱彥督同江都縣知縣袁國鈞集證審辦茲據審明議擬稟請懲辦前來臣詳加查核緣孫志貴從前本係梟匪光緒二十一年經前督臣劉坤一嚴飭拏獲發交前江都縣知縣朱江訊供不認旋據該縣紳民稟請保釋由升任兩淮鹽運使柯逢時詳經劉坤一提交徐寶山差遣立功自贖當差數年尙稱勤慎三十三年徐寶山因孫志貴諭知梟匪蹤跡委充新勝營幫帶哨弁責令查緝私梟詎孫志貴故智漸萌先後勒詐鹽城縣民人徐萬典及已故之孫如高共得贓洋四百四十元旋主使哨弁方應祥將鹽城縣民吳萬榮鎖拏到營非刑拷逼以致吳萬榮因傷斃命棄屍河中裝點溺斃經鹽城縣知縣席伯連驗訊詳報正札飭提訊問卽據徐寶山查出前情又訪聞得該弁交通匪類包庇私梟

民怨沸騰大率畏其報復不敢首先舉發等情據實揭報飭由趙
濱彥督同江都縣袁國鈞提集人證面面環質案情確鑿無疑並
據趙濱彥電稱近聞孫志貴舊日徒黨有勾結私梟希圖劫犯之
事應請迅速就地懲辦等情據此伏查此案孫志貴以梟匪發營
効力宜如何奉公守法自贖愆尤乃輒怙惡不悛迭次詐索平民
得贓甚鉅並主使哨弁拷逼致傷吳萬榮身死按之律例已應駢
誅且復包庇私梟交通匪類事發到官其徒黨猶欲勾匪圖劫似
此種種不法未便稍稽顯戮業經電飭將孫志貴就地正法以昭
炯戒吳萬榮被拷身死案內之哨弁方應祥等已飭淮揚海道提
訊一俟訊明確供另行照例擬辦統帶徐寶山本有失察之咎惟
係自行稟揭尙非有心徇庇現已飭令將其淮南緝私營統帶差
使撤去應請從寬免議除飭地方文武嚴拏該革弁夥黨務獲究

報外所有營弁詐索平民致斃人命審明懲辦緣由謹恭摺具陳
伏祈

皇上聖鑒再新授江蘇巡撫臣瑞澂尙未到任未經會銜合併陳

明謹

奏

徐屬清鄉情形摺

宣統元年五月

奏爲徐州各屬舉辦清鄉拏獲要匪多名審明懲辦謹將辦理情
形恭摺具陳仰祈

聖鑒事竊照徐州所屬各州縣界連東皖伏莽素多前因山東曹
州等處辦理清鄉該盜匪等遂以徐屬爲逋逃之藪迭經嚴飭地
方文武設法偵緝先後拏獲著匪谷長學楊三郎景辰等及要目
多名審明懲辦惟夥黨在逃者尙衆並聞各處不少窩匪之家飭

令仿照山東曹州辦法籌辦清鄉派委署徐州道甯良爲督辦前署徐州鎮總兵楊慕時統領徐淮巡防馬步各隊前署江西九江鎮總兵陳煦亮爲會辦徐州府知府田庚爲總辦江蘇候補知府吳憲奎爲坐辦江蘇候補知府樊溥霖爲提調均兼巡防營務處提調在於徐州設立總局籌議章程分別次第舉辦清鄉經費先由正任徐州道袁世廉捐錢二千串一面飭由江甯藩司財政局分籌濟用業將大概情形擇要奏陳欽奉

硃批知道了該督卽嚴飭所屬各官妥速籌辦欽此查徐州八屬幅幘遼闊村戶畸零盜匪易於潛蹤往往此拏彼竄清鄉一事必須各屬同時舉辦方不致有顧此失彼之虞遂派樊溥霖督辦豐縣沛縣蕭縣碭山四屬吳憲奎督辦銅山邳州宿遷睢甯四屬每州縣各設分局一處以地方官爲坐辦加派明白穩練耐習勞苦

之委員一人酌用員司督率董保分投清查戶口以緝拏盜匪查
究窩家爲宗旨如有大股匪徒聚集立即調派營隊圍捕倘敢持
械拒捕准予格殺勿論所需用費飭由江甯藩司籌撥銀八千兩
財政局籌撥銀一萬二千兩陸續撥給飭令核實開支毋許稍有
浮濫一面明定賞罰嚴加責成各該文武員弁咸思振奮均能認
真遵辦而吳憲奎樊溥霖兩員尤屬辦事實心不辭勞瘁計自上
年十一月開辦起至本年五月初間已將各屬戶口一律查竣先
後拏獲盜犯閻四妮卽閻廣文闕六卽洪文朱麻杭李敦須劉榔
周慶言張得勝彭四馬連文卽馬二頭郝四王羣張魚李思五李
螞蟻王方振張念典趙小黑劉爾標張體桂張得勝卽張世玉齊
合謝五卜查根孟廣居李春和胥順李套徐二李保珠劉五孫傳
百唐四爛眼子秦柱張玉真周老花陳大良趙得紀合全崔玉山

魯小房呂成光徐得勝卽徐案吉林炳科范玉田蔣振平趙老美
邵興連田三尹三劉娃王布任四徐得勝焦廣修徐義蟾耿文元
胡蠻子夏邦元王元振王邦選朱尙富徐慎嶺卽徐黑虎劉水張
四老虎褚二玉景連李溺仇六闔成煥楊小貴張所韓田石狗祝
建臣共七十三名均經徐州道府督同印委人等詳加研訊內積
慣匪首及會匪游勇居其十分之三其餘或迭刦多案或拒捕殺
人甚且臨拏執持洋槍恃蠻抗拒證據確鑿正盜無疑稟經臣先
後電飭就地正法以昭炯戒又拏獲盜匪龐二道周茂江孫六卽
孫茂勝王得周張三纓帽子王孟春六名均訊據供認迭刦得贓
及拒捕殺人等情不諱先後因病在監身死委員驗訊禁卒亦無
陵虐情弊又有孔現時卽孔廣香商永魁張臭卽張伯興趙黑妮
劉玉喜五名均係事主董保供指及已獲正法之盜犯供出正盜

乃敢於營隊圍擊之時先後持槍拒捕致經當時格傷身死飭由地方官驗訊無異據徐州道府將辦理情形稟請具奏前來臣伏查徐屬民情強悍盜賊繁滋積久相沿已非一載臣於光緒三十二年到任正值江北大水爲災廣籌振撫次年雖值豐收民情仍屬困苦譬如大病之餘元氣未復礙難投以猛烈之劑幸值上年蝗不爲災秋收豐稔遂經奏明酌籌款項大舉清鄉期爲一勞永逸之計坐辦吳憲奎提調樊溥霖及文武員弁等辦理均能切實署徐州道甌良前署徐州鎮總兵楊慕時現任徐州鎮總兵段日陞統領陳煦亮徐州府知府田庚督率亦極有方統計先後拏獲格斃盜匪八十餘名匪窩悉除盜風漸戢現在各屬戶口雖已清查完竣而整頓團練一切善後事宜均須次第籌辦且轉瞬高粱茂盛爲歷來盜匪出沒之時尤未便稍涉鬆懈致使功虧一簣現

將查戶各員一律裁撤酌留總局分局委員接辦善後諸事責成
吳憲奎樊溥霖分投督率並嚴飭各營協同查緝務使匪患盡除
地方綏靖以仰副

朝廷戢匪安民之至意所有辦事最爲出力之江蘇候補知府吳
憲奎樊溥霖仰懇

天恩賞加鹽運使銜署徐州道爽良前署徐州鎮總兵楊慕時現
任徐州鎮總兵段日陞統領徐淮馬步各隊陳煦亮徐州府知府
田庚並懇

恩傳旨嘉獎其餘在事出力員弁均由臣分別酌給外獎以示鼓
勵謹恭摺具陳伏祈

皇上聖鑒再新授江蘇巡撫臣瑞澂尙未到任未經會銜合併陳
明謹

奏

籌辦工科大學摺

宣統元年五月

奏爲籌辦工科大學先行購置校舍以立基礎恭摺具陳仰祈
聖鑒事竊據農工商部頭等顧問官翰林院修撰張謇等呈稱竊
惟虞廷命共工之官周禮有考工之記歐美各國工列專科日本
崛起先圖工業轉換生熟之貨溝通農商之郵合古今之政書證
中外之學說未有不致力於工而能國者也我國宮室車服之程
日用飲食之器累代因仍概從質樸卽有精良之製作難供多數
之取求自海禁大開歐風東漸於是稠載麇至日月相續瑰文麗
采奇技神工闐塞都會下逮鄉愚嗜之者無貴無賤歡迎樂用日
人謂我市情投以賤值其貨輸入尤形騰蹕而我之出口但有生
貨偶興製作則化學分析而成之資料又無一不購自外洋由是

以推工苟不興國終無不貧之期民永無不困之望可以斷言矣
苟欲興工必先興學光緒三十三年正月間曾經奏請建設南洋
大學堂并聲明於各岸准鹽督銷酌提盈餘每年籌的款四五萬
兩爲開辦大學堂之豫備等情奏明有案顧大學全備六科科目
既煩規模至大言乎建設非百萬不可言乎學額非數千不可言
乎秩序非先有中學高等之畢業生不可權衡形勢而先其所至
急莫若就上海製造局相近先建工科大學卽以已成之中國公
學爲高等工學之豫備次第經營四五年後卽可希成效之發生
有完全之工學更三數年後各省熱心從事工業之處得有相助
爲理之人不至如今之實業索埴冥行難言進步其於國計民生
關係實爲重要等情呈請前來臣等惟富國之本訓農保商而外
莫亟於勸工近年商務疲敗民生困窮尤宜以振興工業爲當務

之急查工科大學現經學部奏設荷蒙
恩准仰見

朝廷開物成務爲工學力啟新機惟京師首善旣已肇啟宏規而
南洋係工商業最盛之區因勢利導似亦應及時建設就南洋之
轄境計之廠場機械之富江海交通之利教習易於物色學生便
於觀摩莫宜於上海查有上海縣治小南門外前設中國圖書公
司自造之西式房屋計三層洋樓共二十八幢二層洋樓共二十
幢屋基空地共二十畝情願出售此項房屋均皆工料堅實光綫
通明極合校舍之用基地尙多將來添設各項應用場廠亦便分
布且與上海製造局中國公學距離均不過遠於參觀升學各事
諸形利便當經議定價銀十二萬兩由臣等飭由財政局陸續籌
撥其常年經費卽於前奏設南洋大學請提盈餘鹽款內提充除

將開辦工科大學事宜飭司妥爲籌備並分咨度支部學部農工商部查照外所有籌辦工科大學先行購置校舍緣由謹合詞恭摺具陳伏乞

皇上聖鑒訓示謹

奏

模範監獄開辦摺

宣統元年五月

奏爲撥款建設江甯省城模範監獄擬定開辦章程恭摺具陳仰祈

聖鑒事竊維周官以圜土聚教罷民而施職事其他言欽恤言哀矜以及明恥弼教之訓悉數難終莫不惻怛肫懇雖下至於罪人猶復冀其變化蓋卽詔獄以寓教養不忍棄民以入獄禁後世教養不施而卹囚之文日詳宋詔獄掾五日一檢視灑掃獄戶洗滌

租械貧給飲食病給醫藥法循至今然明代章疏言宜禁獄卒需索嚇詐穢污叢積瘟氣傳染之弊正與今等數百年痼習相尋由來已久此非徒有司奉行不力抑亦監獄之法未能盡善有以致之臣奉

命考察政治游歷歐美見其監獄規模之宏廠房宇之堅潔罪犯之整肅教術之完備直不啻以獄舍爲學堂近年欽奉

諭旨令各省設罪犯習藝所仰見

聖朝矜恤庶獄化莠爲良之至意飲服莫名查江南擬建此項習藝所經前署督臣周馥飭在江甯省城大石橋地方購買民地五十八畝有奇因費鉅難籌未能修建臣到任以來迭與司道等籌商以事關要政未可視爲緩圖擬參仿天津及日本成規核實建造曾於上年二月間奏明飭令各司道於庫存項下無論如何爲

難設法籌撥陸續支放應用欽奉

硃批法部知道欽此旋在江安糧道庫籌撥銀十萬兩派員勘估繪圖鳩工興造監獄一所其中建置曰雜居監曰要犯分居監曰官犯分房監曰女監曰病監曰教誨堂曰課室曰工場曰提調室曰辦公廳曰典獄室曰待問室曰搜檢室曰罪人接見室曰訊問室曰教務所曰材料庫曰製品庫曰器具庫曰糧食庫曰囚人攜帶物品庫曰醫室曰藥局曰暗室曰屍室曰看守所曰瞭望臺曰物品陳列所曰保安水龍室此外庖湏盥浴之處員役居住之房都二百二十餘間約可收留五百餘人牆壁堅高規模完備查省城習藝所實爲郡縣之領袖允宜首定程式以爲規範宜名爲江南省城模範監獄擬定監獄管理章程凡監獄之區畫工業之種類習藝之課程工資罪犯之勤惰勸懲衛生醫藥教育之方法與

夫一切規則共四十七條又職員辦事章程十三條派委現任江甯府知府楊鍾羲前淮安府知府許星璧充當提調督飭管監各員按照章程卽於本年五月開辦其開辦經費除購地建屋外現尙須購辦員司兵役器物監房器物工廠器物消防器物至常年經費如員役薪水衛兵衣糧犯人衣被薦席飲食藥物作工原料成本以及監獄歲修用項甚夥應仍照案由江安糧道籌撥銀十萬兩約以萬金內外爲置器之需其餘截數儲存官銀錢局行息卽以息銀充作常年經費如有不敷再由司庫及財政局庫分認籌撥足數總期力求撙節實用實銷此項監獄幾經籌畫經營始得創辦成立所有管理各員尤須淬勵精神以善其繼而策其效務使各犯謀生有術薰德有資爭自濯磨進於悔過遷善之域以

副

朝廷曲成在宥之仁除咨部查照外理合會同江蘇巡撫臣瑞澂
恭摺具陳伏祈

皇上聖鑒謹

奏

勦梟由甯用款奏報摺

宣統元年五月

奏爲勦辦梟匪由甯支用各款開具清單恭摺具陳仰祈

聖鑒事竊照前因蘇浙梟匪滋擾派兵勦辦經臣會同前江蘇巡

撫臣陳啟泰前浙江巡撫臣馮汝駉奏請將添募水師購買小輪

礮械並犒賞購線一切需用款項在於海關雜稅項下提撥作正

開銷奉

旨所擬在海關雜稅項下開支犒賞購綫等費著照所請該部知
道等因欽此旋准度支部電詢當以蘇省勦□經費約需銀六七

立止...
十萬兩擬在洋藥稅釐洋船及長江船各項半稅子口半稅等款
項下動支電經部覆允准在案查蘇浙□□蔓延至六府州之廣
黨與衆多勢甚猖獗光緒三十三年冬間奏奉
諭旨飭派甯軍三十五六兩標分赴蘇省之松太浙省之嘉湖扼
要駐紮防勦當卽設立兵站購備小輪運載以利軍行一面添購
快礮快槍及子彈等項並加給行軍薪費口糧俾資鼓勵兼恐外
洋□□□□及長江會□暗中勾結選派得力員弁廣購的實眼
線分赴沿江上下及日本各埠嚴密偵查以憑相機因應上年正
月甯軍各營迭次勦□獲勝擊斃匪首夏竹林及悍目要□爲數
甚衆旋復先後將□首余孟亭江北阿四李能掌夏小辦子及匪
目多名拏獲懲辦□徒斂戢航路平安嗣因雲南匪亂奉
旨協助軍械遵在豫備勦臬項下酌撥快礮快槍配用子彈等件

委員解送滇省查收濟用業經奏明有案茲自光緒三十三年冬間起至三十四年年底止購造槍礮輪船加給弁兵薪餉並緝捕偵探薪水川資獎賞電費解犯養傷醫藥撫恤以及各輪船煤糧修理等項又協滇槍礮之解費川資統計實用庫平銀二十二萬一千九百一十七兩有奇已收到江海關道撥解庫平銀二十萬兩尙不敷庫平銀二萬一千九百一十七兩有奇據江南財政局詳請援照振捐局成案開單奏報等情前來臣覆查各款均係實用實銷其中毫無浮濫相應繕具清單恭呈御覽所有不敷銀二萬一千九百一十七兩有奇應仍照案飭由江海關道如數撥還以資歸墊除蘇屬用過勦梟經費另行奏報外所有勦辦梟由甯支用各款開單奏報緣由謹會同江蘇巡撫臣瑞澂恭摺具陳伏祈

皇上聖鑒謹

奏

鐵路渡淮修建轉橋片

宣統元年五月

再淮爲四瀆之一經流千里向無橋梁平時帆檣如織自皖達揚凡土貨之輸出引鹽之上運皆出其途此次津浦鐵路勘由鳳陽府之蚌浦渡淮議建呆橋以通軌道雖工費較造活橋爲省然舟楫往來阻滯甚多且於皖豫水利亦極有妨礙疊據安徽紳商及淮北票販湖販等先後具稟籲請改修活橋以利航運當經派員帶同熟諳路工之洋員格林森前往勘議茲據復稱淮河發源於豫之南境至信陽以下乃通舟楫衆水匯注其流甚巨京漢鐵路造橋渡軌係在上游尙於行船無礙其下游因向無橋座故來往大小船隻其桅桿皆永豎而不下今若建造呆橋則民船行經是

處必須卸去貨物乃能下桅而過費時失利於航業商情均有不
便審度形勢宜改造極高之平橋或建造轉橋方爲便利惟平橋
工費較鉅若建轉橋其價值並不過昂於路工亦無妨損等情前
來_臣查淮河係南北商船及鹽船通行之路若在蚌浦建造呆橋
不獨於行船水利均有阻礙卽淮北鹽運亦必大受損害關係國
計民生實非淺鮮今經該洋員詳細查勘議請修建轉橋工價既
不甚昂似可酌量改造應請

旨飭下督辦津浦鐵路大臣詳加勘度妥籌定議庶於路工航利
兩有神益除咨部查照外是否有當謹會同安徽巡撫_臣朱家寶
附片具陳伏乞

聖鑒訓示謹

奏

立
敬陳管見摺

奏爲請選文武侍從各員備

監國攝政王隨時顧問敬陳管見恭摺仰祈

聖鑒事竊臣前以五洲強國其君主無不親習戎韜今者

賢王監國甄采羣言請遴選武學大員爲侍從大臣置

監國左右以備朝夕顧問電請軍機處王大臣代

奏在案誠以軍政切屬國防武學至爲精奧必平時有切問近對
之人斯臨事多違覆得中之用繼思國之大政不止戎事一端際
茲時勢多艱庶政均關重要欲昭

聖主平明之治必賴事無大小之咨在昔周公監國有聖不自聖
之心其言曰吾所執贄而見者十人還贄而相見者三十人於是
吾得三士焉以正吾身以定天下又曰士至而後見物見物然後

知是非之所在其戒成王立政之篇云常伯任以爲左右言其輔
補袞闕道可常尊嗣是以降漢有掌贊導衆事顧問應對之官唐
有左右散騎侍從規諫之選參考東西各國歷史古瑪西敦國主
大亞利山德爲太子時有大博士亞立斯多德爾常侍左右指陳
得失俄彼得大帝有瑞士國人勃發侍左右備顧問惟不干涉行
政權限日本一國則樞密院爲天皇親臨咨詢重要事務之所雖
規制不同而其延訪通人集思廣益爲用一也明仁宗謂侍臣楊
士奇曰卿等各有職務朕欲得學行端謹老儒數人日侍燕閒備
顧問蓋天下至大萬幾至殷召對廷臣大抵講求事實之時多而
研究事理之時少必於退朝燕閒之頃親近老成練達之人時於
泛論學問之中自有裨益治理之實我
皇上冲齡御極百度維新

監國攝政王遺大投艱中外屬望誠荷

聖明垂察遠師歷代粲陳之迹旁考列邦興盛之由

特簡優於學問深於閱歷之員爲文武侍從以備

監國攝政王以時顧問將見吐哺握髮上追負扆之隆規明目達
聰肇啟

闢門之令典其爲裨補良非淺鮮現求堪勝此任之人以臣所知
若鐵良植品素稱廉正武事極有研求以資顧問必能使將士之
精神日形淬厲軍事之制度日進精完若升允陳寶琛勞乃宣梁
鼎芬沈曾植鄭孝胥趙啟霖陶葆廉志慮素極忠純時政富於經
驗以資顧問必能使人才之邪正不淆庶政之綱紀無紊若梁敦
彥施炳燮一則洞悉外情一則深明條約以資顧問必能使敦槃
樽俎日益協和盟府簡書多所參證以上諸臣僅就臣所知竭誠

論薦此外通才碩德當尙有人應請

聖明博訪周諮斟酌選用臣區區之愚欲於

監國攝政王每日聽政之暇勻撥二三小時令諸臣分班輪值
便殿進見揚權古今綜論中外用資獻替而廣

聰明諸臣但宜朝夕論思恪守納言之職於

朝廷用人行政之大權毫無干涉臣管蠡之見如蒙

俯加採擇應請立見施行不勝惶悚籲懇之至謹恭摺具陳伏乞
皇上聖鑒訓示謹

奏

商業學堂款項立案摺 宣統元年五月

奏爲陳明南洋高等商業學堂辦法並將原設之中等商業學堂
合併辦理並動用款項懇

恩飭部立案恭摺仰祈

聖鑒事竊照江甯省城創辦南洋高等商業學堂附設銀行專修科次及稅則保險各科等情經臣於光緒三十四年三月二十七日附片奏明奉

硃批學部知道欽此嗣准部咨飭令照章辦理自係爲畫一學制起見臣惟銀行稅則保險三科誠爲商科大學專門際此商戰時代三項學科實握全國財政實業最要之關鍵中國於此項人才最爲缺乏現在競爭劇烈需用尤殷現經詳訂課程遵照高等本科科目加授各專門學問於定章雖微有出入然分科肄習則心志專一程功自易收效自速查上年度支部會同學部奏設財政學堂並另設稅務專科銀行講習科以養成稅務銀行之人材部臣洞明時局故能辦法扼要堪應急需江南暫設銀行等科亦係

爲目前變通之計揆諸部 臣用意似尙不相刺謬此項專科原訂二年畢業未便援案請獎現飭展長一年與法政學堂別科年限相同所有肄業專修科三年畢業各生擬請比照法政別科請獎并由 臣分別咨送度支部農工商部稅務處考驗以備任使而資鼓勵又查部章高等商業學堂分豫科本科該堂除開辦專修科外並遵章開辦豫科查上年部頒各學堂招考限制章程內載高等學堂自戊申六月爲始不准招考未經各中等學堂畢業之學生等語此項豫科生係由中等商校撥入其入中等商校本科係在戊申正月應請以入中等本科之年月作爲入高等豫科之年月所有原定豫科一年現飭遵照部章展至三年以厚根柢又查部章實業教員講習所有商業一種並就該堂附設商業教員講習所以期造就商業教員爲將來推廣中等商業及初等商業之

豫備此辦理高等商業學堂之情形也。臣於光緒三十年署督任內曾飭由商務局司道撥款訂章就該局餘地建設中等商業學堂一所先辦豫科二年畢業升入本科三年畢業咨部有案現查以商學之階級言之則高中兩等均有需用之途以本省之情形論之則高中兩校應以合併爲便當經檄飭委辦江南商務局道員將南洋高等商業學堂與江南商務局原設之中等商業學堂合併辦理定名爲江南高中兩等商業學堂校舍但稍事增添管理則倍形利便分科講授教員可酌予省併循序推升學生亦易形感奮中等商校本隸屬於商務局現在兩校併辦卽以該局總辦兼充監督就近主持一切所有經費分飭財政商務釐捐官錢等局隨時籌撥濟用此高中兩等商業學堂合併辦理之情形也。茲據該道詳稱遵將高中兩等商業學堂妥爲歸併籌設各專修

科兼辦教員講習所分別延訂教員陸續添招學生按照表列科目分班教授並將各項章程課程表一併詳送所有高中兩等歸併開辦費銀二千九百七十兩添建校舍工程銀六千五百兩添置校具銀八百六十兩又高等常年月支經費銀二千一百五十餘兩中等常年月支經費銀一千三百四十餘兩請准照案籌撥作正開銷並予奏咨立案等情前來臣惟江南當揚子江流域之衝民物殷繁舟車利便互市以來實爲各國商人貿易必爭之點以華商墨守舊習故步自封遂至生計日艱利權外溢若不及早研求商學懼無以操勝算而杜漏卮近來江南財政支絀異常然此事爲興商根本無論如何艱窘未可置爲緩圖覆核豫算表開列各項均係核實支用毫無浮濫應懇天恩俯如所請作正開銷實於興商育才大有裨益除分咨度支

部農工商部學部稅務處查照外所有陳明南洋高等商業學堂辦法並將原設之中等商業學堂合併辦理並動用款項懇恩勅部立案各緣由理合會同江蘇巡撫臣瑞澂恭摺具奏伏乞

皇上聖鑒訓示謹

奏

酌保水師出力各員摺

宣統元年五月

奏爲遵

旨酌保長江水師歷年拏獲盜匪出力各員恭摺具陳仰祈聖鑒事竊臣等前因長江水師歷年巡緝認真拏獲盜匪八十餘起正法者數十名此外交地方官訊辦者不下百餘起匪黨潛蹤江防得以安謐奏請援照湖南省獲匪獎案將異常出力人員擇

尤請獎奉

硃批准其酌保毋許冒濫欽此仰見

朝廷慎重江防激勵人才之至意伏查長江流域素爲盜匪出沒之區近年票會各匪及革黨潛入內地又多於沿江一帶勾結煽惑隱患滋深地方官及巡緝各隊雖經跟蹤緝捕而匪徒散布各處百密終虞一疏全賴水師各營分段駐紮就地巡查鎮懾匪徒保衛商旅得以消患無形曲突徙薪其功已不可沒且卽就擊獲要案計之先後亦已八十餘起隨時解交地方官審辦者尙不在內在各員職守攸關固皆分所當盡第念歷年已久該員等不憚辛勞往來於風濤雨雪之中寒暑無間實屬異常奮勉茲旣仰荷殊恩准其擇尤保獎允足以資觀感而策將來謹查長江水師計五標二十二營實缺大小將弁共有七百餘員嗣又辦理江防隨

營巡緝員弁人數尤夥兼之事越數年獲案多起應行列保者先後不下數百員之多經臣等一再核減擇其尤爲出力文武各員共四十名計尙不及十分之一酌擬獎敘開具清單恭呈御覽合無仰懇

天恩俯准照擬分別給獎俾昭激勸出自

鴻施至湖口鎮總兵楊福田漢陽鎮總兵張有亮調度有方不辭勞怨擬請

賞加提督銜瓜洲鎮總兵陶樹恩岳州鎮總兵魯洪達田鎮營副將陳麟書署荊州營副將正任江陰營副將謝詩才署江陰營副將正任荊州營副將胡忠勝整頓營務不遺餘力擬請

敕部從優議敘以彰勞勩除飭取各員履歷咨部並將其餘各員弁由臣等的給外獎外謹合詞恭摺具陳伏乞

皇上聖鑒訓示謹

奏

禁種鴉粟情形摺

奏爲甯屬禁種鴉粟一律淨絕臚陳辦理情形並請將在事各員分別勸懲恭摺仰祈

聖鑒事竊禁煙爲自強之圖而禁種實禁煙之本外來洋藥雖已議定分年遞減然僅允試行三年轉瞬卽屆限滿其內地所產之士若不先自禁絕則外人之責言將至中國之沈痼難除竊恐此機一失流毒將至無窮所關至鉅有恐稍縱卽逝者本年閏二月間臣於籌擬禁煙情形摺內曾經縷陳在案查甯屬栽種鴉粟之區向以徐州爲最盛他如淮安海州等處亦居多數各該處地方偏瘠民情強悍而種煙之利又較種植禾黍所獲豐厚小民習於

近利憚於改圖操之過蹙既恐易滋事端法令稍疏又慮意存嘗試其禁之之道要在籌之以豫持之以恆庶法立而民不疑令行而民不擾前於光緒三十二年大災以後臣卽經愷切勸諭飭令減種鶯粟以裕衣食之源嗣迭奉

明諭復一再飭屬切實勸導限令卽時停種並於上年八月間派委多員徧歷村莊明白曉示諭以

朝廷此舉係爲吾民剷除毒害使自知做悟嚴定賞罰章程分別勸懲又飭徐屬清鄉委員幫同辦理本年二月乘春事方興之際查明甯屬向種鶯粟如徐州屬之銅山宿遷睢甯邳州豐縣沛縣蕭縣碭山淮安府屬之清河桃源安東海州及所屬之贛榆沐陽等十四州縣每處專派一員會同地方官周歷境內按畝踏勘並飭各該管道一體委員會辦由臣鑄造銀牌頒發備賞其有改種

淨盡實力奉行者優加獎賞其間有一二強梁抗持不遵不得不嚴加督率卽時勒令拔除其與山東河南安徽等省接壤之處有瞻顧遷延者亦先後電商各省飭屬一體嚴禁以杜觀望旋據各屬印委稟報向種鴛粟地畝均已禁種淨絕卽隴畔畦頭亦無寸株餘植成就土性所宜改種豆麥棉麻等物民情甚爲安貼安徽爲兼轄省分並經派員前往交界之宿州泗州靈璧等州縣會同查禁嗣度支部奏派候補四品京堂方碩輔與部派司員王應堂一同抵甯親往江北一帶巡歷查勘臣恐各屬積重難返或有敷衍塞責之處復飭兩江禁煙公所派員微服密查現據稟覆各屬尙無欺飾情事實已一律淨盡方碩輔等來電亦以江北禁種拔除最爲認真是各該員等辦理此事均甚得力伏查江北一帶民間栽種鴛粟久已視同恆產積習甚深漸除本已匪易况地方風

氣強勁措置稍有不慎亦最易生事臣督飭各員相機化導寬猛兼施仰賴

朝廷威德得以半年竣事實非臣始願所及恭讀本年二月二十四日欽奉

上諭禁種一事責之各省督撫酌量本省情形督飭所屬認真禁拔定當考其成績優予獎擢等因欽此仰見

聖朝爲民除害獎勵勤能之至意莫名欽感茲查有邳州知州應祖錫睢甯縣知縣邵式善署銅山縣知縣藍光策署碭山縣知縣左杖周候補同知方悅魯候補知縣陳仕揚陳周慎試用按經歷任其焯辦理禁種事宜或朝夕勸導竭盡心思或風雨奔馳備嘗艱苦用能廓清沈毒洵屬著有微勞應懇

恩傳旨嘉獎以示鼓勵又查有蕭縣知縣劉重堪於委員到境履

查並不偕行實屬意存膜視未便姑容應請
旨卽行革職以爲玩視禁煙者戒所有甯屬辦理禁種鴉粟一律
淨盡並分別勸懲緣由謹恭摺具陳伏乞

皇上聖鑒訓示謹

奏

改設高等巡警學堂摺

宣統元年五月

奏爲江甯省城改設高等巡警學堂仍附設教練所一切籌辦情
形恭摺具陳仰祈

聖鑒事竊准民政部咨奏擬各省巡警學堂通行章程繕單具陳
一摺奉

旨依議欽此咨行欽遵前來原奏內稱所有各省會未經設立巡
警學堂者統限三個月內設立已有者應按照此項奏明章程更

定其有仍名警務學堂警察學堂者亦令一律更名高等巡警學堂至各府廳州縣應設教練所當由各督撫督同地方官按章設立等語查江甯省城前係於光緒三十一年間開辦巡警卽經設有警察學堂在堂官兵各生早分兩班畢業嗣因各區巡警教育未能普及程度不免參差經臣飭將警察學堂改爲江南巡警教練所督同總監各員酌擬章程學生額設二百四十名常年經費需用銀二萬二百餘兩據實奏明在案現在按照部章甯省應設之高等巡警學堂自應卽就已辦之巡警教練所酌量改設庶幾因仍舊規可以剋期成立且與部臣原奏已有者按章更定之意亦相符合現經督飭巡警局員再三籌議擬定江南高等巡警學堂暫設學額五十名招生肄業仍於該堂附設巡警教練所將原定學生額數減爲一百五十名並參照部章妥擬各項章程遴派

道員包發鶴充當該堂監督其餘教務提調庶務提調學監舍監
教習各員均係選擇深通警學之人分任其事計學堂教練所兩
項需用常年經費均在奏准巡警教練所經費項下動支復經切
實核減暫定額撥各款每年實需經費銀一萬六千六百兩有奇
較前定二萬二百餘兩之數可節省三千餘兩由財政局照數籌
撥濟用按年核實造冊報銷至省外府廳州縣均應遵章設立教
練所已通飭各屬一體遵照辦理臣仍當隨時嚴加督飭逐漸實
力推行總期警學日興人才輩出以仰副
朝廷振興民政之至意除將現定章程分咨度支部民政部查照
外謹恭摺具陳伏祈
皇上聖鑒訓示謹
奏

臚舉所知片

再時局艱難需材孔亟臣承乏江南瞬經三載任用各員有才具素優勞勩較著者不敢不臚舉所知以備

聖明任使查有江蘇試用道李瑞清學問淵雅志量清純由庶吉士改道員於光緒三十一年委辦兩江師範學堂並赴日本考察學務該員於教育原理研究詳明任事以來凡教授管理各事宜無不實力講求悉臻完備上年檄署江甯提學使釐定學科整頓士習亦能措置裕如直隸候補道王崇烈精明幹練任事勤能前年奏調來甯辦理實業學堂整理規章督率教課全校精神氣象遂爲一變委辦江西督銷適當西岸歷年短銷之後該員整頓緝私疏通引岸卒能使私梟斂迹官引增多裨益兩省課釐尤非淺鮮丁憂江蘇補用道許星璧穩練精詳才識優裕歷署江甯常州

鎮江各府知府興利除弊毅然有爲前年_臣奏請裁併籌防支應籌款各局規設江南財政局該員殫心規畫條理秩然當財用極絀之時獨能力求核實不辭勞怨委查兩淮增產情形於移埭配蕩開濬溝河體恤商竈各事條舉利弊均切實可行保升道員江蘇補用知府沈銘昌才大心細操履端嚴前在湖北署理沔陽州知州盡心民事卓著循聲辦理學堂倡捐多款於他項新政亦有成績可觀前年奏調來甯值江南鹽務疲滯財政艱窘該員任事精密長於綜覈抉剔利弊裨助良多此外吏治軍政亦均能遇事研求深中竅要江蘇補用直隸州知州洪壽彭宅心正大體用兼賅從前久官直隸歷任繁劇州縣所至有聲前署督_臣李興銳稔知其賢辟之入幕由廣東閩浙以至江南無不相從深資贊畫_臣到任延治洋務公牘歷辦各案均能沈思遠慮不激不隨遇事能

見其大洵爲辦理交涉不可多得之選以上五員均經臣考察有素如蒙

聖恩因材器使必能裨益時艱謹將各該員才具事實撮舉大略據實奏陳應如何量加錄用之處出自

鴻慈謹附片具陳伏祈

聖鑒謹

奏

保獎辦匪清鄉員弁摺

宣統元年五月

奏爲勦辦蘇浙梟匪及辦理清鄉出力員弁遵

旨擇尤保獎恭摺會陳仰祈

聖鑒事竊查光緒三十二年冬間蘇浙交界地方梟匪肆擾時臣

瑞澂在江蘇藩司任內經臣端方會同前江蘇巡撫臣陳啟泰前
浙江巡撫臣馮汝驤奏奉

諭旨飭派督辦蘇松太杭嘉湖緝捕清鄉事宜該六屬牧令營汛
防軍歸其節制調遣旋將布置情形及迭次獲勝緣由摘要電奏
並聲明嗣後倘有營官人等畏葸退縮甚或通匪縱逸擬請嚴參
治罪其情節較重者卽予明正典刑牧令等官辦理清鄉團練不
力一併從嚴參辦如有勦辦得力文武員弁亦懇從優獎勵奉
旨辦理勦匪尙屬認真仍著嚴飭水陸各營乘此得手跟蹤搜捕
務將各屬積匪悉數獲懲以淨根株所擬賞罰辦法著照所請該
部知道等因欽此嗣拏獲匪首余孟亭江北阿四卽張蓬萊並匪
黨多名審明懲辦據實奏陳奉
硃批瑞澂著賞給正一品封典欽此本年五月拏獲匪首夏小辦

子訊供不諱將其就地正法電請軍機處代奏並請將出力員弁查明保獎奉

旨電奏悉著照所擬章程彙案核實酌保毋許冒濫欽此查蘇省之蘇松太浙省之杭嘉湖六屬各州縣內濱太湖外通海口地方遼闊港汊紛歧梟匪巢窟其間者由來已久歷年議撫議勦大都敷衍將就未得要領以致裹脅益多蔓延益廣連檣列械勢甚鴟張其中分爲土客兩幫夏竹林爲土幫首領余孟亭爲客幫首領各有匪船數十艘快槍數百枝最爲強悍夏小辯子江北阿四次之此外李能掌王老四蔡老三石老大吳小麻子等亦爲匪中渠魁夥黨多寡不等迭次搶劫蘇浙當鋪絲行鹽船布船及各處居民鋪戶並拒敵官兵之案不一而足光緒三十三年冬間梟匪先在浙屬滋事正值桐鄉等處有匪徒鬧漕之案謠言紛起馮汝驤

商由臣端方奏派甯軍赴浙防緝旋奉

諭旨飭派姜桂題率帶營隊來浙會勦當以

禁旅遠來情形不熟奏懇

收回成命由臣端方力任派撥甯軍會同蘇浙兩處防營勦辦而

調鄂軍來甯填紮奏派臣瑞澂督辦蘇松太杭嘉湖緝捕清鄉事

宜是年臘月大東公司戴生昌輪船被匪搶劫並致斃招商輪船

搭客臣瑞澂正患喘疾聞電力疾啟行先在蘇州省城設立公所

提綱挈領爲入手之始基一面分飭六府州縣繪造輿圖悉心考

核何處宜設防勦之隊以扼其衝何處宜派游擊之師以期策應

其時小輪被劫風鶴頻驚人心彌覺惶惶外人遂思干涉自應先

保航路爲急則治標之計當由臣瑞澂租雇商輪選派得力弁兵

商由臣端方撥給快礮分投梭巡保護航路並派飛划左營陳嘉

玉將全營開往松江會商松江府知府戚揚妥籌布置一面由甯
飭派甯軍三十五標統帶蕭先勝率帶該標第一、第三兩營馳往
松江太倉兩處以第一營駐紮太倉第三營駐紮松江三十六標
統帶杜淮川率帶全標三營馳往嘉興各屬三十五標第二營管
帶孟平率帶本部一營馳往湖州南潯等處均經撥給快礮小輪
以資利用另由蘇飭派管帶傅應璜朱樹聲率帶兩營駐紮平望
以作兩省聲援惟匪多皖籍深恐防勦嚴緊由浙之湖州蘇之溧
陽遁回皖之廣德甯國等處並由陳啟泰飭派剛兆麟率帶所部
一營駐防溧陽東壩馮汝驤嚴飭湖州防營會同甯軍管帶孟平
認真巡緝並商由前安徽巡撫臣馮煦飭派陳興鈺率帶所部全
軍分駐甯國廣德等處以杜竄逸旋因松江各屬僅止一營兵力
尙嫌單薄加派甯軍三十四標第一營管帶姜國梁率帶所部一

營開往松江助勦飛划水師統領徐錦堂師久無功業於商輪被
劫案內奉

旨革職改委前江西二標統帶陳得龍接充統領責令切實整頓
另添募水師一支名曰蘇防新中營以千總沈葆義爲管帶歸陳
得龍節制會合飛划鹽捕等營巡查勦捕至勦匪之關鍵全在信
賞必罰方足以示勸懲臣瑞澂受事之初卽經明定賞罰規條嚴
切誥誡並商由臣端方奏明將通匪之鹽捕營營務處淞南營游
擊孔德陞鹽捕前營營官游擊銜王士志革職審辦並將違抗軍
令貽誤事機之船長蕭得華軍前正法以儆效尤軍威旣振營務
始有起色三十四年正月十二日飛划營管帶凌秉忠勦匪於青
浦尙民田等處斃匪顧壽根等五人傷八人十三日追至崑山縣
陸家橋奮力勦捕擊斃匪目曹祥生擒獲王得標其餘擊斃者約

二十餘人傷者甚衆十八日匪竄金山縣呂巷市經蕭先勝率軍迎擊傷匪甚衆擒獲二人起有金銀贓物十九日匪竄嘉善婁縣交界之楓涇地方先由嘉境登岸經杜淮川率軍出擊槍斃匪目三名悍黨五名落水及受傷者不少奪獲匪船四隻槍三桿是日另有匪黨大股在南柵口登岸圖劫軍火當經杜軍看破開槍向擊蕭軍聞警馳到夾攻其時飛划鹽捕提標等營先後俱到合力圍勦匪衆甚悍鏖戰至六小時之久經蕭軍將匪首夏竹林擊斃並斃悍目施幅三林小老大陸小老孔小老大沈小老大朱小老大六名散匪十數名生擒六名提標等營擊斃悍目左小老大一名散匪三名餘匪紛紛落水不計其數奪獲匪船二十三隻洋槍數十桿子彈一簍銅礮一尊刀槍旂幟號衣各數十件起出銀錢金珠首飾衣物甚多二十日飛划營水師追匪至嘉善楊字圩

斃匪一名擒匪十二名傷者頗衆奪獲匪船十二隻並快槍抬礮
旂幟號衣多件內有圓燈一盞確係商輪被劫原賊自迭次大勝
之後匪黨雖已潰散而渠魁余孟亭夏小辯子江北阿四李能掌
等尙未弋獲又經臣瑞澂一再激勸各營將士必須趕緊搜捕以
竟全功旋據飛划營會同浦左柘林營都司朱大斌等在太倉州
地方將李能掌拏獲礮自許欽雲劉雲臣等在距金澤鎮之後興
菴將余孟亭拏獲沈葆義在浙江嘉善縣丁家柵河中將江北阿
四卽張蓬萊拏獲均經提審明確就地正法此外蘇省另獲匪目
朱小弟李桂亭衛定香蔡桂士卽阿彩任小山吳尙田錢阿七鄭
老窩子顧金標周阿金汪小周沈阿全林阿四丁克慶王得標趙
良甫杜開貴萬祥貞蔡阿馬王春山薛阿四倪阿金王二等二十
三名浙省拏獲匪目沈文春張世餘李阿毛卽呂阿毛史阿三馮

阿龍等五名均經審明懲辦其餘脅從各犯分別情罪重輕酌定年限監禁一面實力清鄉以善其後由臣瑞澂分飭各屬地方官選舉正紳編查戶口裝釘門牌並將各項船隻編號烙印船尾釘立橫牌俾與匪船有所區別其民間防匪打獵槍枝亦經編烙字號給予執照並飭各屬分別造具詳細清冊呈候委員馳往調查又分飭各州縣酌就地方情形辦理團練庶足以固民氣而清匪源上年夏間甯軍撤防適訂購之小輪八艘次第造成購配礮械編爲艦隊派委補用千總博順爲管帶責令與飛划鹽捕等營合力巡緝迄今已將一載匪徒斂戢航路平安第渠魁夏小辯子迭經懸賞查拏久未弋獲深恐日久防務解嚴仍爲地方之害飭據江蘇候補道劉體乾不惜重資廣購眼線查至安徽灣沚地方將夏小辯子拏獲訊據供認迭次聚衆販私搶劫抗拒官兵等情不

諱當即將其就地正法據實電奏在案臣等伏查蘇浙梟匪盤踞兩省交界處所已非一載根蒂深固黨與繁滋□首夏竹林余孟亭夏小辮子江北阿四等又各兇悍狡險頗有賊智動稱劫富濟貧爲籠絡人心之計兼之各營將領狃於積習不能認真整飭以致匪勢益張論者咸恐其爲廣西之續且蘇浙爲東南財賦之區居江海要衝之地時有外來□□□希圖勾結迴與廣西邊省不同若不迅速勦辦萬一滋蔓難圖爲患何堪設想幸賴

朝廷眷顧東南准照所擬賞罰辦法文武各員人人感奮咸思立功自效是以屢戰獲勝陣斬匪首夏竹林及悍目要匪爲數極衆嗣復多方購緝先後將□首余孟亭江北阿四夏小辮子及匪黨多名拏獲審辦使數十年蟠結之積□悉數廓清裨益地方殊非淺鮮所有文武各員或奮擊獲勝或手縛渠魁或贊畫機宜或運

解軍火均能不辭勞瘁共奏膚功辦理清鄉團練各員振奮精神
始終罔懈足以輔兵力所不逮亦未便沒其勤勞惟查此案出力
文武員弁共數百名之多茲特欽遵

諭旨力求核實大加刪減擇其尤爲出力者酌擬獎叙開具清單
恭呈

御覽合無仰懇

天恩俯准照擬給獎以彰勞勩出自

逾格鴻慈此外各員另行咨部給獎其次者由臣等或酌給外獎
或致送匾額俾昭激勸而免向隅所有遵

旨酌保勦辦梟匪並辦理清鄉出力各員弁緣由謹合詞恭摺具

陳伏祈

皇上聖鑒謹

奏

請賞紳士卿銜片

再江西新建縣在籍紳士四品銜工部虞衡司員外郎程志和風裁峻整學有本原由同治戊辰進士籤分工部遞升虞衡司員外郎在部二十餘年歷充要差以廉幹著稱嗣因請假回籍呈請開缺里居以來澹於榮利不求仕進主講鵝湖書院於象山之學多所發明尤嚴於義利之辨學者翕然宗之迨後

詔改書院爲學堂壬寅癸卯之間江西學風囂然不靖官紳引爲深憂堅聘該員爲師範學堂監督並充學務公所議紳兩年以來修明正學啟迪新知漸染觀摩學風丕變至今談江西學務者無不盛推該員獎進之功洵足坊表羣倫轉移風氣合無仰懇天恩俯准將四品銜前工部虞衡司員外郎程志和

賞加五品卿銜以資矜式出自

鴻慈逾格謹會同江西巡撫臣馮汝驤附片具陳伏乞

聖鑒訓示謹

奏

保薦武員片

宣統元年五月

再自強以練兵爲要練兵以選將爲先欲驗材猷必歷考其事實
查有總兵銜兩江督標中軍副將何師程以襲廕出身秉志堅貞
深明武略由安徽壽春鎮標右營都司洊升今職並護理壽春鎮
總兵篆務營規整肅辦事勤明歷經委辦練將學堂及武弁巡警
學堂盡心經理造就甚宏實屬著有成效又兩江補用副將借補
皖南鎮標燕采營參將李振標以戰功洊保今職並蒙
賞給勦勇巴圖魯在皖帶勇捕匪卓著勤勞經前安徽撫臣鄧華

熙奏保堪膺專閫有案近來委統皖省南路巡防等營緝捕勤能迭獲要匪而於新法操練尤能加意講求以上兩員器局才具均屬堪膺專閫之選遇有各省總兵缺出應如何加恩擢用之處出自

聖裁非臣所敢擅擬謹附片具陳伏祈

聖鑒謹

奏

請將職商革訊片

宣統元年五月

再前准度支部咨據職商尹克昌等呈請集資在鎮江開設信義儲蓄銀行令卽查覆等因當經飭據鎮江關道查明該職商資本不實覆部核辦在案乃該職商尹克昌不候註冊給照輒在沿江沿海各埠開設分行多處濫發鈔票而又毫無準備於本年四月

間被擠倒閉江海關道蔡乃煌慮其牽動市局督同商會以該行在鎮江受抵之造紙機廠先後向和蘭銀行等處押借銀八萬兩將該上海分行所出鈔票先行兌付現計上海一埠尙虧欠儲蓄存款等項洋銀十八萬餘元鎮江一埠虧欠儲蓄存款及未兌鈔票一萬四千餘元該行除受押鎮江造紙機廠之外別無所有而紙廠中尙有輾轉未清之事且先已押借和蘭銀行等款加以鎮滬兩處虧欠之項全須指此償還斷不敷抵况該漢口分行虧欠之數聞亦甚鉅經江海關道飭縣將尹克昌傳案看管勒限清理迄今毫無頭緒非從嚴究追難期了結據江海關道蔡乃煌詳請奏參查辦並以各債戶存款摺據除尹克昌列名蓋章外尙有馬湘伯之名又據登報聲明自宣統元年起歸新總理道員李輔青接手現在行已倒閉莫可收拾馬湘伯李輔青兩人均難置身事

外請分飭一併清理等情前來臣等覆查無異除飭查明該行經理及夥友等有無捲逃寄頓情弊分別查封勒追並分飭馬湘伯等趕緊設法清理及咨部查照外相應請

旨將該職商內閣中書尹克昌先行革職如該職商捐有升階並請褫革俾便從嚴訊追謹合詞附片具陳伏乞

聖鑒訓示謹

奏

道員被參免議片

宣統元年五月

再承准軍機大臣字寄宣統元年閏二月二十五日奉

上諭陳啟泰奏蘇松太道蔡乃煌膜視公款藐玩綱紀一摺其中究竟係何情形著端方按照所指各節確切查明據實具奏毋稍迴護原摺著鈔給閱看欽此當卽札派江甯藩司樊增祥確查去

後茲據查明稟覆前來臣詳加確核參以平日見聞頗知梗概緣該故撫臣陳啟泰與蘇松太道蔡乃煌本係舊交自蔡乃煌蒞任後各循職分初無一毫芥蒂此次奏參係爲上海元源錢莊倒欠之案而起該錢莊於上年十月間倒閉虧欠華洋官商各款爲數甚鉅內有淞滬釐局存款庫銀六萬二千餘兩貨捐局銀八千餘兩又制錢一萬八千餘串催繳無著該故撫臣因係抵解洋款要需批飭將該店東及經理人趙松坪一併押追而蔡乃煌因上海道庫及度支部銀行亦有被倒鉅款係奏明發放之項請俟併案追起後再酌分先後提還並以該莊被欠欠人各款頭緒紛繁非令趙松坪在外不能清理爰從商會之請僅將店東沈尙之發押而趙松坪則准其具保此原參所以指爲膜視公款也迨後該故撫臣批飭提省訊追又適有德商克魯森洋行控沈尙之虧欠購

貨定價一案德國領事照請在滬會訊蔡乃煌復請俟將此案理清再行解蘇此原參所以指爲藐玩綱紀也該故撫臣批詞愈厲而蔡乃煌申辯亦不復稍屈故遂有此奏其實趙松坪之取保乃商會所請正爲清理帳項德商控案在滬會訊亦係照約辦理原參以漢奸目之實爲過當現在元源莊倒欠松滬釐捐及貨捐兩局之款已由該道督飭上海縣上緊催追不足之數卽責成局員賠繳公款不致虛懸蔡乃煌歷次具稟剖辯雖措詞稍激不無失檢之處然略迹原心究係出於因公原參各節應請免其置議所有查明道員被參情形謹附片據實具陳伏乞
聖鑒訓示謹
奏

文科高等學堂立案摺

宣統元年五月

奏爲江陰南菁學堂改設文科高等學堂謹將大概辦法懇
恩敕部立案恭摺具陳仰祈

聖鑒事竊於光緒三十三年七月准學部咨開據江蘇教育總會
函稱南菁高等學堂程度既不符合改爲優級師範於蘇省情形
經費地勢均不相宜仍請改辦文科高等請飭司就近考查詳細
情形酌擬辦法等情當經飭據前江蘇提學司毛慶蕃詳稱遵往
江陰詳加履勘并集深通中西教育員紳一再籌議僉謂甯蘇省
會早設師範各府直隸州亦多分設目前辦法仍擬設文科高等
其學科遵照奏定章程高等學堂第一類課程法文德文暫請緩
設軍政學一門則陸軍已有專門學堂毋庸兼設學科既稍有減
省所習各科必可深造詳請核辦等情具詳前來臣查江蘇教育
總會會長學部頭等諮議官張謇等原擬江陰南菁高等學堂改

設文科高等學堂辦法係依據高等學校第一類并文科大學之
主要科目參酌配置以保存國粹并溝通中西文學塗徑養成完
全文學家發揮各科學之義蘊俾國學日有進步爲宗旨實能洞
明學理造就通才據開科目名額班次及招錄生徒添修校舍各
事宜亦均條理秩然可資採用現在京師開辦分科大學文科高
等卽爲升入文科大學之豫備亟應釐定名目次第圖成合無仰
懇

天恩俯准將江陰南菁學堂改設文科高等學堂

敕部立案實於國學前途大有裨益除將開辦事宜及豫算不敷
經費飭司妥爲籌辦及咨部查照外謹會同江蘇巡撫臣瑞澂恭
摺具陳伏乞

皇上聖鑒訓示謹

奏

請補河務道缺摺

奏爲請補河務道員要缺以重職守恭摺仰祈

聖鑒事竊照淮揚海道兼按察使銜朱之榛因病出缺業經臣附

片

奏明四月十八日奉

硃批吏部知道欽此所遺員缺例應由外揀員請補查淮揚海河
務兵備道一缺經管河湖工程分巡淮安揚州海州等處地方兼
按察使銜幅幘遼闊事務紛繁加以淮南北整鹽務海州開埠
通商以及籌辦一切新政在在極關緊要非精明幹練熟悉河工
地方情形之員不足以資治理臣於通省候補班道員內詳加遴
選查有

特旨發往江蘇遇缺即補道爽良年五十九歲鑲黃旗滿洲奇車
布佐領下人由廕生候選知州光緒四年揀補奉天復州知州調
補岫巖州知州

大計保薦卓異遵海防例報捐道員在任候選十四年經前

盛京將軍臣慶裕以熟悉洋務邊務堪以任使奏保奉

旨開缺以道員仍留奉天補用十五年七月奉

旨補授奉天東邊道十九年十二月奉

旨調補山西河東道二十三年二月丁母憂回旗二十五年五月

服滿七月奉

旨補授湖北荆宜施道因案以同知降選二十七年九月赴河南

鄭州迎

鑾三十日

召見十月初一日奉

上諭昨日召見之前湖北荆宜施道奭良著開復降調處分仍以道員發往江蘇遇缺卽補欽此十二月初五日到省三十一年八月丁父憂回旗三十三年十一月服滿到省該員純謹老成實心任事歷官數省聲望素孚上年經臣等委署徐州道篆正當籌辦清鄉嚴禁鴛粟之際該員盡心籌畫措置咸宜地方賴以乂安煙苗一律淨絕洵屬成效昭彰有裨時局且於河工情形亦甚熟悉查光緒三十三年五月臣以朱之榛請補是缺奉

硃批著照所請吏部知道欽此欽遵在案該員奭良係

特旨發往遇缺卽補人員資序已深勞勩素著以之請補准揚海道要缺洵堪勝任與例亦屬相符合無仰懇天恩俯念員缺緊要准以

特旨發往江蘇遇缺卽補道爽良補授淮揚海河務兵備道員缺仍兼按察使銜實於吏治河工均有裨益如蒙

俞允仍照河工道員例試署一年期滿再請實授除飭取履歷咨部外謹合詞恭摺具陳伏祈

皇上聖鑒謹

奏

暨南學堂添籌經費摺

宣統元年五月

奏爲甯省暨南學堂籌定畫一辦法添撥經費畢業以後並請從優給獎酌派官費以慰僑情恭摺具陳仰祈

聖鑒事竊照甯省開辦暨南學堂緣由及籌撥經費辦法歷經奏咨在案茲據署理江甯提學使陳伯陶詳稱該堂現收學生一百六十七名學科規則漸臻完備辦理已有成效惟華僑子弟向

學情殷據爪哇各董事來函下學期續至者約共七十餘名此後隨時內渡數難豫定來學各生年齡不一程度參差亟應豫爲規畫定一持久辦法現擬限定額數五百名足額以後不復增收仍暫分中學及高等小學兩級一自華僑自辦兩等小學畢業後內渡就學者皆高等小學畢業學生始准升送屆時該堂卽改爲完全中學不再附設高等小學目下該堂每年額支活支各經費約共二萬八千餘兩將來添足學額五百名每年須六萬餘兩建築校舍添置校具各項又須另爲籌撥請查照原案奏懇由閩海粵海江海各關分撥作正開銷並稱華僑子弟去國萬里不憚重洋跋涉聯袂來歸將來中學畢業應得獎勵請照奏定章程變通從優給獎并擇學力較優各生選送西洋留學酌給官費其自費生之貧乏者亦請酌加津貼等情詳請奏咨前來 臣查華僑出洋謀

生世羈異域幸荷

皇仁遠被撫慰優加遂動其喁喁內向之心各遣子姓擔簦請業計自該堂開辦以後凡一切用項經臣奏請均荷

天恩俯准准予栽培該僑民等浹髓淪肌益復聞風興起惟是懷遠固以招徠爲要興學須爲久遠之圖該司所請現在限定名額將來改成中學係屬因時制宜力求畫一辦法名額推廣經費增添請援案由閩海粵海江海各關分任籌撥作正開銷亦係實在情形合無仰懇

天恩俯如所請實於昌明國學維繫僑情大有裨益至該堂學生中學畢業應如何從優給獎酌派官費之處併懇

敕下學部核覆施行除咨部外所有甯省暨南學堂籌定畫一辦法添撥經費畢業以後並請從優給獎酌派官費各緣由謹恭摺

具陳伏乞

皇上聖鑒訓示謹

奏

會奏籌備憲政情形摺

宣統元年六月

奏爲遵

旨會奏籌備憲政辦理情形恭摺具陳仰祈

聖鑒事竊臣等恭讀光緒三十四年八月初一日

懿旨逐年應行籌備事宜必須秉公認真次第推行各部院領袖

堂官各督撫及府尹遇有交替後任人員應會同前任將前任辦

理情形詳細奏明以期各有考成等因欽遵在案臣人駿自行抵

江甯省城於六月二十六日接篆任事旋准臣端方以任內籌備

憲政情形咨會遵章奏報臣人駿復經查核案卷證以事實謹合

詞爲我

皇上縷晰陳之查憲政編查館考核專科章程本年籌備事宜上屆截至六月爲止應俟八月內分別奏咨茲值交替之時自當將臣端方交卸以前經辦情形據實具報計第二年期內督撫應籌備者凡有八項內除資政院選舉章程未經頒布尙未議辦外其一爲舉行諮議局選舉甯省自上年十月遵設籌辦處當飭審釋名義釐訂規章發交司選員携赴各屬會合官紳審查資格確定名冊並變通定制以閏月十一日舉行初選四月初五日舉行複選更訂定初複選以前進行日期通飭遵辦其建築事理一面派員赴日本調查一面相度地址籌款價購計自第一屆奏報之後初選複選均已如期竣事各屬議員暨候補當選人一律選足現正在照章造冊分咨九月開會之期決可不誤召集卽室屋會場

亦已招工承估於五月間擇吉開工趕速營造此遵章籌備者一也其一爲籌辦城鎮鄉自治設自治研究所查甯省於光緒三十三年遵

旨設局定名籌辦自治卽係籌辦處性質當於十二月奏報在案開辦之後首從設立研究所入手自江甯府辦起以次及於各屬研究所學生每府均分別定額作爲官費並招自費生另班肄業本年二月以前江甯官費自費各生陸續卒業並飭令回籍講演自治法理籌辦自治學社以期普及其揚通海三屬選送學生亦已於本年二月開校凡此規畫以及設立宣講所調查慈善事業多在未奉部飭以前自定章頒行到甯卽經通飭各屬一體遵辦並查照憲政編查館逐年成立期限單析爲逐月籌備之期限督促各屬依限進行而以省局爲嚴核考成獎勤懲惰之地甯省籌

辦自治大略具此惟部飭自治籌辦處併設於諮議籌辦處甯省自治籌辦在先所辦事理頭緒正繁諮議選舉業將告竣不久卽須裁撤是以未議歸併此遵章籌備者二也其一爲調查各省人戶總數查部章調查戶口未設巡警道各省暫以布政使爲監督甯省於未奉部飭之前先經自治局豫爲籌議頒章旣至該局本係布政使督辦因卽以該局爲總監督辦事之機關定擬先自省城開辦由局自任調查以爲各屬之倡導當附設總分調查處釐定辦事細則調查須知及部章所未備之調查表式各種卽於三月內開查並撰發白話告示廣爲諭導其省外府廳州縣並經分別飭行更訂發調查通則一律遵照仍由局隨時考核期免各爲風氣之弊而收整齊劃一之規此遵章籌備者三也其一爲調查歲出入總數查入款如丁漕鹽課關稅釐捐雜稅受協等項出款

如廉俸軍餉京餉協餉洋款製造工程教育警察興辦實業等項至爲繁賾近年舉辦新政興學練兵費爲最鉅其餘應辦事宜次第施行用款日增入不敷出歲虧甚鉅自非認真調查無以爲酌劑盈虛之地自度支部奏定清理財政章程臣端方卽遵章設立江南甯屬清理財政局派藩司爲總辦而以運司鹽糧關道釐捐官錢兩局道員爲會辦並委駐局坐辦分設編輯審核庶務各員員悉心經理業將設局情形奏報並飭訂該局辦事細則咨部在案現經分年調查大要分舊案現行案新案年報季報月報等項數者之中尤以飭造本年季報爲要著爲現在實行清理之基礎自監理財政官到甯督飭局員分催各署局所將出入各款分類造報並令該局隨到隨核隨編隨送庶審覈不致積壓編造可免遲延此遵章籌辦者四也其一爲籌辦省城商埠等處各級審判

廳查中國行政司法混合不分歷年已數千載此時定議更張執
行之樞紐未完防範之機關尙缺創制伊始誠不能不出以審慎
臣端方於通飭遵辦之後與原任江蘇巡撫臣陳啟泰往返函商
並飭由藩臬司再三核議更於蘇州臬署設立籌辦處以爲挈領
提綱之地並派員調查中外規制以備參仿總期力除扞格粗具
規模又以創制需才爰於江甯省城設立裁判研究所考取通知
時事之官紳入所肄業所以養成審判之人才爲實行開庭之豫
備此遵章籌備者五也其一爲創設廳州縣簡易識字學塾查人
民知識非識字者日有增加則國民程度驟難進步江南雖號開
通然下級人民能具國家思想者仍居少數恐不加強迫斷難程
教育普及之效惟蒙養之始必須有劃一純粹之課本據以講授
庶根本既植不致誤入於歧途臣端方於部飭頒到之時卽通飭

各屬豫爲籌備一俟簡易識字暨國民必讀各課本由部編定頒發即可分發各屬依期開辦此遵章籌備者六也其一爲廳州縣巡警限年內粗具規模查江甯省城巡警於光緒二十八年創辦曾經前署督臣周馥將開辦情形分別奏咨臣端方抵任以來逐加整頓漸就完密其通商埠岸水陸衝衢如上海鎮江清淮揚州等處或專案奏辦或派員創設此外各廳州縣亦據陸續稟請舉辦仍恐陽奉陰違虛應故事並隨時派員周歷查考此項人才前於光緒三十一年卽經設有警察學堂嗣因教育未能普及復經臣端方改爲江南巡警教練所加撥經費增添學額本年復遵照部飭改爲高等巡警學堂各廳州縣應改之教練所亦已通飭一體遵辦此遵章籌備者七也以上七項除諮議局選舉已將次竣事外其餘或久經議辦或正在推行臣端方罄竭智能僅僅具此

基礎此後事端至蹟定限復嚴臣人駿惟有急起直追期臻完備固不敢稍涉骫骳致觀成之無日亦不敢過事操切致形式之徒存所有臣端方交替以前籌備憲政情形由臣人駿會同詳奏各緣由是否有當理合恭摺具陳再此摺係臣端方主稿會同臣人駿辦理合併聲明伏乞

皇上聖鑒謹

奏

端忠敏公奏稿

卷十五終

端忠敏公奏稿卷十五終

端忠敏公奏稿卷十六

到津接印謝 恩摺 宣統元年六月

奏爲恭報到津接印日期叩謝

天恩仰祈

聖鑒事竊 臣 欽承

恩命調補直隸總督兼北洋大臣當經趨詣

闕廷仰蒙

聖訓周詳莫名欽感 臣 遵於六月二十三日起程來津於二十四

日准大學士署督 臣 那桐將關防文卷委員賚送前來當卽恭設

香案望

闕叩頭謝

恩祇領任事伏念 臣 封疆久寄報稱無聞忝膺重任於近圻實樹

風聲於列服際茲時艱孔亟憲政維新撫萬方輻湊之區爲四國
觀瞻所集讀管子安攘之策未效微長仰太保平格之勳有慙
殊遇臣惟有力除積習殫竭愚誠務因時而制宜益整躬而率物
勉爲蚊負難酬

高天厚地之恩幸接

龍光冀昌

奮武揆文之治所有臣到津接篆日期及感激下忱理合恭摺具
陳伏乞

皇上聖鑒謹

奏

胞弟記名謝 恩摺 宣統元年六月

奏爲恭謝

天恩仰祈

聖鑒事竊臣胞弟禮部郎中端緒於宣統元年五月初十日欽奉
上諭此次京察二等端緒著交軍機處記名以道府用等因欽此
嗣於五月十七日欽奉

諭旨禮部奏保恭辦

德宗景皇帝大事典禮出力各員端緒著以道員記名等因欽此
跪誦之餘莫名感悚伏念臣久荒家學世荷

主知同氣分榮欣值

虞陛激揚之典

殊恩錫類益切

鼎湖攀戀之忱臣惟有共懷持盈相期競爽東郊敷政友于遠效
夫君陳北府輸忠舊德勿忘夫士行所有感激下忱理合具摺叩

謝

天恩伏乞

皇上聖鑒謹

奏

賞給寶星謝

恩摺

宣統元年六月

奏爲恭謝

天恩仰祈

聖鑒事竊臣於宣統元年六月十六日奉

上諭直隸總督兼北洋大臣端方著賞給一等第三寶星欽此跪

聆之下感悚莫名伏念臣移守近圻覲

光禁鑲徽章

特賁仰瞻四方同軌之隆

恩命榮頒儼昭五等分封之序比錫圭以作寶製重雙龍懷庶民
之惟星馭嚴六馬臣惟有勤思職守冀佐

重熙宣

恩析木之津用贊

光華之治視此聯珠曜彩敢忘觝佩之榮從茲束帶治賓益壯敦
樂之色所有微臣感激下忱謹恭摺叩謝

天恩伏乞

皇上聖鑒謹

奏

請選碩德通才以備顧問摺

宣統元年六月

奏爲請設禁中顧問官爲弼德院之預備慎選碩德通材以備顧
問而救艱危恭摺仰祈

聖鑒事竊惟今日天下一至艱至危之局也內憂外患相逼而來存亡之機間不容髮

皇上冲齡踐阼未克親理萬幾

宗社安危之責悉集於

監國攝政王一人之身仰惟我

監國攝政王憂勤惕厲昕夕焦勞於用人行政理財經武諸大端莫不悉心擘畫挈領提綱而於憲政進行尤爲注意勵精圖治薄海同欽惟是天下至大萬事至蹟一人之心思耳目至爲有限欲圖扶危定傾之計必求集思廣益之方蓋帝王之治必本於帝王之學明乎誠正修齊之理而後出治有大原通乎古今治亂之故而後應變有特識洞察乎列邦之情勢而後外交無失誤熟諳乎憲法之要領而後新政有準繩以學問爲之本則凡所設施皆舉

而措之沛然莫禦是執簡御繁之要道也雖然日理萬幾不遑宵
旰與其求之簡編之迹而極費研尋不如求之鴻達之才而可資
討論苟於聽政之餘常與魁儒碩士時時接見商榷古今講求治
理薰陶漸染日異月新進德之速當有不期其然而然者昔周公
攝政一沐三握髮一飯三吐哺起以待士猶恐失天下之賢人故
一朝見七十士而負屨之治坐致太平以周公之聖猶汲汲於見
賢如此則賢者之有益於聖德也可知日本於憲政未行以前先
設宮中顧問官選元勳練達之人以備諮訪憲政實行之時卽改
爲樞密顧問爲君主最高諮詢之府專資討論而不干行政之權
皆所以爲啓沃君心弼成主德之用也上年八月初一日我
孝欽顯皇后

德宗景皇帝特沛綸音宣布立憲於籌備事宜單內開列第九年

設弼德院顧問大臣卽仿照日本樞密顧問辦法自應欽遵屆時
設立惟日本於樞密院未設以前先設宮中顧問官以爲樞密院
之預備而我於議院未設以前亦先設資政院以爲議院之預備
則弼德院未設以前亦當仿照日本宮中顧問官之例先設禁中
顧問官以爲弼德院之預備伏聞

監國攝政王以東華門內三所地方爲退朝休息之處擬請

監國攝政王每日退朝之後必至三所留駐數時延攬碩德通材
爲禁中顧問官與之從容坐論虛心延訪凡道德之精微政事之
體要經史之蘊奧國家之掌故以及中國各處之民情風俗閭閻
疾苦外國各邦之政教工藝商業兵謀勢力之盛衰國情之嚮背
隨事諮諏不拘一格各令掃除忌諱暢所欲言

監國攝政王察其言之是者則俯予嘉納以備參稽其言之未盡

是者亦曲賜包容不加責讓如有所疑不妨反復辯論以求至當之歸如是日日行之不稍間斷日計不足月計有餘積以歲時則蘊蓄既多學識自富施於有政自有措正施行之妙所操者約而所及者廣造端者微而成功者鉅實今日第一根本至計也至選擇顧問官之道專取其德高望重通達古今不必拘以官職如在位大臣齒德兼隆者自應派爲領袖卽業經致仕及職位較卑年齒較少者苟學識明通堪資啓迪卽可入選其大臣請由特簡小臣則令廷臣保薦

監國攝政王延見之時不論官職尊卑一律賜坐一切體制量予從優比照南書房上書房人員辦理惟不准干預行政之權此項人員學派無論新舊但以察其心術純正操履不苟爲重如有持論奇袤居心躁妄之輩立予斥退不可姑容仍請將三所附近閒

房量加修葺作為顧問官值班之所令其輪流入值以均勞逸而示體恤此為預備立憲期內暫行辦法俟宣統八年設弼德院之時再酌照日本樞密院官制另行更定臣受

恩深重蒿目時艱仰見

監國攝政王憂國之深求治之切亟思竭其愚慮裨補萬一反覆沈思凡一事之補苴一人之進退皆非全局所繫不足以仰助高深惟此本原之地實為握要之圖不揣冒昧披瀝上陳敬祈特敕施行天下幸甚如蒙

俞允一切詳細章程應請

飭下憲政編查館核議具奏為此恭摺具陳伏乞

皇上聖鑒謹

奏

請蠲旂租並給籽種銀兩摺 宣統元年七月

奏爲本年恭備

奉移大差經過各州縣應徵旂租旂產兩項請隨同民糧一體蠲免並賞給籽種銀兩恭摺仰祈

聖鑒事竊查前准度支部咨本年三月十七日奉

上諭

德宗景皇帝梓宮奉移

山陵所有橋梁道路皆歷年

輦路經行萬姓瞻依之地宜加渥澤用廣

恩施著將沿途經過之宛平良鄉涿州房山涇水五州縣地方本年地丁錢糧蠲免十分之五易州蠲免十分之七該部遵諭速行欽此同日又奉

上諭

德宗景皇帝梓宮奉移

山陵沿途州縣方春東作正麥苗滋長之時所有由京至易州一帶經過地方除隙地不計外凡有平毀麥苗者著再加恩每畝賞給銀一錢俾農民購買籽種補植新禾卽於直隸藩庫節年耗羨款內動支給領核實報銷欽此經前督臣楊士驤轉行遵辦嗣據藩司詳查光緒二十八九年恭辦謁

陵大差經由各州縣應徵錢糧欽奉

諭旨蠲免十分之三應徵旂租隨同民糧一律蠲免欽遵在案此次恭辦

德宗景皇帝梓宮大差經過宛平等州縣本年地丁錢糧已蒙恩旨分別蠲免其旂租旂產兩項地畝應徵銀兩應否隨同民糧

一律蠲免尙未奉有明文惟旂租旂產與地丁錢糧同爲正賦擬請援照成案將宛平等州縣本年旂租旂產應徵銀兩隨同民糧一律蠲免並賞給籽種銀兩以廣

皇仁詳請具奏等情前署督臣那桐未及核辦臣到任接交覆核無異仰懇

天恩俯准照辦理合會同兼管順天府府尹臣陸潤庠順天府府尹臣凌福彭恭摺具陳伏乞

皇上聖鑒訓示謹

奏

報撥俸餉米折銀兩摺

宣統元年七月

奏爲報撥本年夏季分供應

陵工員役俸餉米折等項銀兩恭摺仰祈

聖鑒事竊查接管卷內據布政使崔永安詳稱豐潤縣供應

惠陵並

妃園寢暨

淑慎皇貴妃園寢員役俸餉米折豆草車價等項銀兩向係由司按季專案詳請題報一面由該縣赴司請領供應歷經遵辦在案茲據豐潤縣請領宣統元年夏季分供應

惠陵並

妃園寢暨

淑慎皇貴妃園寢兵役月餉米折豆草車價等項銀三千七百兩三錢三分一釐改折八成實銀二千九百六十兩二錢六分五釐內扣豆草車價六分部平銀四十六兩七錢三分四釐實發銀二千九百十三兩五錢三分一釐核與歷辦成案相符應請在於司

庫地糧銀內動撥開具清單詳請核奏並聲明

陵工員役增減無定難以豫計應照急需錢糧之例一面具奏一面先行撥給俾該縣得以及早領回供應其實在支領數目統歸於奏銷案內核實銷算多則解還不敷找給等情前來前署督臣那桐未及核辦臣到任接交覆核無異除將簡明細數清單咨送度支部查照外理合恭摺具

奏伏乞

皇上聖鑒敕部核覆謹

奏

報撥 西陵兵丁錢糧摺 宣統元年七月

奏爲報撥本年秋季分

西陵八旗養育兵丁錢糧銀兩恭摺仰祈

聖鑒事竊據布政使崔永安呈稱易州供應

西陵八旗養育兵丁應需錢糧向係按季專案詳請題撥歷經遵辦又於光緒二十九年二月十九日轉准戶部議復守護

西陵大臣載潤等奏

莊順皇貴妃位前四旗兵丁生齒日繁請添設恩缺養育兵四分一摺奉

旨依議欽此等因行知到司當經轉行遵照均經詳明按季撥發在案茲據易州請領宣統元年秋季分養育兵五十六名每名季支銀四兩五錢共銀二百五十二兩又新添養育兵四名每名季支銀四兩五錢共銀一十八兩以上共銀二百七十兩照章改折八成實銀二百一十六兩覆核數目相符應在司庫地糧銀內照數動撥給發按照新章詳奏前來臣覆核無異除咨部查照外理

合恭摺具陳伏乞

皇上聖鑒敕部核覆謹

奏

遵查知縣參款摺 宣統元年八月

奏爲遵

旨查明直隸懷來縣知縣被參各節據實覆陳恭摺仰祈

聖鑒事竊照宣統元年六月二十七日承准軍機大臣字寄宣統

元年六月二十六日奉

上諭有人奏直隸懷來縣知縣王錫光聽從劣紳藉籌學堂經費
侵奪動裔地畝請飭查辦一摺著端方按照所參各節確切查明
據實具奏原摺著鈔給閱看欽此遵

旨寄信前來 臣當卽飭委正任保定府知府王守堃按照原參各

節逐一查明並酌傳人證詳加研訊去後茲據查明稟覆前來臣
詳加復核並檢查案卷參考輿論如原奏懷來縣煖泉灣豬窩堡
等地方有孫姓地畝係

世祖章皇帝賞給功臣孫德功孫思克額駙孫承運之家者並有
上賞公主莊田前於光緒十八年經該功臣後裔一等男爵銳齡
呈請戶部劄飭勘丈在案一節查該地前於嘉慶四年間該前縣
張廷賢奉戶部牌飭以據正白旗漢軍佐領惟精呈稱縣屬煖泉
灣有祖遺河灘地一段於乾隆年間被水沖塌現已涸出行令勘
明報部核辦等因當經張廷賢勘丈得該地河中高崗處有涸出
荒灘一頃三畝五分其南有荒灘十二頃八十七畝二分訊據地
鄰僉稱此項荒灘均不知有惟精家之地在內惟當年原是白姓
後來白姓投充公府等語繪圖造冊詳經戶部飭縣確查前項地

畝究竟是否實係惟精家產業抑係別姓地畝或官荒民荒出結
送部復經張廷賢以此地是否官荒抑係別姓之地案卷霉爛無
憑稽查可否在該地內先撥四頃五十畝給予惟精收領詳經戶
部以該地前據惟精稱係公主陪嫁產業而該縣詳係百姓投充
地畝情節支離咨准該旗飭據惟精呈稱公主陪嫁地畝數目年
久無案可稽僅止白冊內載有地四頃五十畝並未開載陪嫁投
充字樣不敢指實妄報咨部等語是此項地畝惟精尙不知詳細
部中更無憑核斷將惟精白冊咨回該旗令再確查前地究係何
項產業檢查老年旗存印冊或由旗出具印結再行核辦至前項
灘地飭縣暫行召佃官爲徵租等因轉行該縣遵照光緒十八年
間據正白旗漢軍佐領一等男爵銳齡先後赴部赴縣呈控時稱
煖泉灣緒窩堡時稱煖泉灣夾河村有

恩賞旗地十三頃九十畝七分攬頭李久明等隱匿不報霸地抗租等情經該前縣何承緒核與原案情事迥異又無印冊印結可憑查訊夾河村鄉約地戶人等均呈有印契糧串並無旗地至煖泉灣緒窩堡灘地年年被水沖塌所賸無多並未升科既無業戶又無長佃究係是否銳齡家產業毫無確實證據是以何令未經撥領原參謂該地係

賞給功臣孫德功孫思克額駙孫承運之家並有公主莊田在內係屬影響之詞又原奏直隸懷來縣知縣王錫光於辦理學堂籌款事宜每信任劣紳之言以學董王瑾志李際泰爲腹心蠹役王七等爲爪牙欺壓良善民不堪命竟將勳裔地畝誣爲官荒黑地撥作學堂經費該功臣之裔遺丁持據呈明並非荒地該知縣貪其荒租欺其懦弱置之不理一節查王錫光於光緒二十九年曾

任宣化府屬萬全縣知縣從未署過懷來縣知縣之缺惟三十年間前任懷來縣知縣周世銘任內因民人程緒芳與于則喜等爭種煖泉灣荒地呈控傳訊均願認租承種卽經周世銘以前項灘地疊經前縣示諭迄無民人呈領至惟精銳齡等雖經先後呈報而戶部因其無印結可據飭縣召佃官爲徵租自不能任聽鄉民私自爭種致釀鉅案諭令警董王繼志之父王均協同刑書並原差張存誠等前往丈量得該處共涸出灘地二十頃六畝四分內已開地五頃七十畝未開地十四頃三十六畝卽將已開之地仍分租與于則喜等佃種立約議租並因是時興辦學堂籌款維艱飭將此項地租撥充學費俟惟精銳齡家持有印冊印結或另有業主呈驗印冊再行撥還執業嗣王均病故各佃戶多有添墾隱匿經其子王繼志呈經周世銘復勘歸王繼志李際泰分認租種

光緒三十一年並宣統元年復疊據正白旗漢軍一等男爵麟光先後赴該縣呈控經周世銘並現署縣王忠蔭均以毫無確切證據無憑根究查卷批復在案以上各節均經王守堃親訪查詢並酌傳人證查訊彼此印證情形相同取有切實供結附卷至王瑾志想卽係王繼志之訛與李際泰同爲承種荒地之人再三察訪該前縣周世銘委無因籌辦學款信任李際泰等爲心腹蠹役張七等爲爪牙欺壓良善民不堪命情事臣覆查原參之王錫光並未任過懷來縣事自係傳聞之誤至該縣煖泉灣地畝前據佐領惟精等疊呈戶部因無印冊印結尙不肯主持撥給况迄今又百有餘載此沖殺漲變遷無定該縣不敢以銳齡等無據之詞遽行撥領尙無不合至此項地畝部中本令該縣暫行召佃官爲徵租該前縣周世銘召佃承租撥充學費係屬以公濟公仍俟銳齡等

呈有旗存印冊或由旗出具印結再行核辦並非貪其荒租置之不理此外亦尙無信任劣紳欺壓良善之事應請毋庸置議所有查明直隸懷來縣知縣被參緣由理合恭摺具陳伏祈

皇上聖鑒謹

奏

臚陳籌備事宜摺 宣統元年八月

奏爲遵章臚陳直隸第二年籌備事宜恭摺仰祈

聖鑒事竊查憲政編查館奏定考核章程內開九年籌備事宜責成內外臣工每屆六個月將籌辦成績臚列奏聞並咨報憲政編查館查核應自光緒三十四年八月起至十二月止爲第一屆以後每年六月暨十二月底各爲一屆限每年二月內及八月內各具奏咨報一次等因咨行遵辦在案直隸自本年閏二月奏報以

後各項籌備事宜經前督臣楊士驤督飭所屬依次籌辦進行無懈五月間前署督臣那桐到任以後節經認真催辦成績尤多自臣蒞事分飭接續籌備策勵前進期成日新月異之觀因閏二月以後各前任督臣任期未久不及分核成績循章會奏茲屆八月奏報之期謹將本年歷辦各項事宜詳晰臚陳用備考核計第二年期督撫應辦者凡有八事內除資政院選舉章程簡字學塾課本未經頒布尙未舉辦外其一爲舉行諮議局選舉直隸幅員遼闊兼辦京旗駐防選舉專額議員頭緒紛繁調查籌商多需時日前定於三月初一日宣示選舉人名冊五月初一日舉行初選七月初一日舉行複選均經按期蒞事總核選舉名冊分配當選額數衡量審察力策精詳冊登與選各員尙均合格選舉既畢應豫籌諮議局開辦事宜經臣咨明憲政編查館定於八月十六日召

集臨時會照章互選假定議長副議長各員提掣會議豫訂各項規則庶屆九月朔日正式開會乃有軌轍可循其建築事宜業於五月間開工仍飭切實經營按圖締構務令如期告成此遵章籌備者一也其一爲籌辦城鎮鄉自治設立自治研究所直隸自治事宜自光緒三十二年已經設所研究先由天津府試辦次年卽爲全省之規畫歷次研究畢業者將近千人上年飭定自治學社章程通行舉辦卽令前項畢業學員遞相傳習計已成立學社五十餘處本年四月接准奏定自治研究所章程復飭照章改定近數月間各屬廣續舉辦又得二十餘處統計前後設所研究已有七十九處其未報成立者仍不時嚴切督催年內可望徧設至於推行自治應從城鎮鄉入手自奏章通行以後卽由自治總局擬定施行細則就疑義而加以解釋審習俗而略事變通務以因地

制宜仍不失自治精神爲主現已分飭各屬準備推行其分割區域清理款項調查選格均爲自治要領尤須先事妥籌並經通飭設立自治豫備會令本地士紳議具辦法由地方官詳送核定期除窒礙而收實效惟部擬籌辦自治歸諮議局籌辦處經理查直隸自治總局久經開辦頗具規模應仍飭籌辦全省自治以專責成諮議局選舉告竣其籌辦處卽行裁撤無庸再議歸併此遵章籌備者二也其一爲調查人戶總數戶籍登記之法曲折繁重未易一蹴而幾先由調查戶數入手實爲執簡馭繁之道卽委布政使爲監督本年十月以前爲第一次彙報之期自當加意督催務令按期舉辦此遵章籌備者三也其一爲調查歲出入總數直隸遵設清理財政局按照部章別爲舊案新案及現行案三種該局先事調查分案彙編年報季報按期造送全省款目糾紛疊飭迅

速清查認真鈎覈一俟報冊彙齊會商監理官審定卽行分別咨部以資考核惟直隸係缺額省分近年籌辦要政增支添撥儲胥耗絀滋多未及開源先彌罅漏現正力裁浮濫將各局所冗員冗費逐漸廓清此遵章籌備者四也其一爲籌辦省城及商埠各級審判廳天津改良裁判籌議最先自光緒三十二年冬間經前督臣袁世凱奏訂章程經始構造分設高等地方初級各廳規制粗備因在部章未布以先一切官制員數未能合符經前署督臣那桐飭司妥議改定七月間甫據稟覆由臣詳加審核大致均合新章惟從前各級審判廳合設檢察廳一所係屬權宜之計尙非完備之規當飭照章分別籌設以符定制此次改置實官卽應次第成立惟各省情形不同一俟擬議盡善再行奏咨辦理省城應設高等審判廳現已擇地建築仍飭作速籌備以無誤來歲成立之

期此遵章籌備者五也其一爲各廳州縣巡警限年內粗具規模查直隸巡警自光緒二十八年經前任督臣袁世凱創始籌辦保定天津及海口一帶均派專員分投經理警規漸臻整肅歷經奏明在案其推行於各屬者先由地方官選送學員入警務學堂肄習以養成官長由廳州縣遵設教練所照部定學科期限以教成警兵其經費所需咸係就地籌集專由巡董經辦官任稽核民情均尙翕洽統計廳州縣巡警名額約有二萬六千餘名疊經加意整頓一切保衛公安等事略有成績可觀其在偏遠各區縱未一律完備而隨時督飭自可漸次整齊全省統籌現已規模粗具惟警察係專門學問內政要圖此後當令淬厲精神無封故步以期漸進有功此遵章籌備者六也以上各事或積累程功業已辦有就緒或初基甫植急待次第推行全在毅力堅心與爲貫注伏查

前督臣奏設憲政籌備處一片欽奉

硃批畿輔重地凡關於一切豫備憲政事宜皆當切實籌辦以期依限無誤俾作各省模範等因欽此仰見

朝廷奮勵新猷而於首善要區尤爲注重臣甫從南服移掌北門念夫馮翊依京觀瞻攸繫此後程期踵接事理愈繁祇當實心實力黽勉圖功以爲憲政進行之準所有遵章臚列第二屆籌備事宜緣由除分咨查核外謹恭摺具陳伏乞

皇上聖鑒訓示謹

奏

搶辦險工添撥經費摺宣統元年八月

奏爲東明黃河南隄大汛期內新出險工竭力搶辦另案添撥經費恭摺仰祈

聖鑒事竊據大順廣道文沖詳稱東明黃河南隄六十里地勢北高南下鄭工失事以後中洪淤墊愈高大溜趨重南隄勢同建瓴本年春間各汛低矮埽段擇要加鑲並將臨黃各甄壩酌度加拋甫交桃汛各汛當衝埽段紛紛蟄陷隨即搶鑲穩固其稍可從緩者因歲款支絀未能一律加鑲土工一項係河防營兵挑築用鐵車運取遠土幫寬壩基追壓埽面入夏以來河流屢漲剽悍異常臨黃各埽此鑲彼蟄應接不遑下汛四五鋪一帶本爲近數年最險之工全河擁注絕不外移迎溜各埽或蟄與水平或沈蟄入水督率廳營汛委各員竭力搶鑲原估歲防料物業已用罄六月十五六等日河水陡長三尺浩瀚奔騰盈隄拍岸下汛四鋪第二道挑水壩前大溜忽然提注維時風狂雨驟水勢擡高刷陷埽段掣動壩基危險萬狀趕卽搶還新埽四段幸獲穩定詎是月二十六

七等日河水續長五尺六寸中汛十九鋪第四道挑水壩前大溜頂衝直撞迴環搜刷該壩原有舊埽多年朽腐一經抽掣全行脫胎蟄卸危在呼吸隨又相機搶還新埽始臻平穩計中汛十九鋪第四道挑水壩前搶還新埽四段下汛四鋪第二道挑水壩前搶還新埽四段埽前均水深三四丈不等共搶還新埽八段需用稽料葦麻柳檝夫工等項統共合銀一萬六千二百兩此項工程委係新出險工並非原估所及請歸另案添撥等情前來臣查東明黃河南隄工程重要防守極艱從前每屆歲款銀七萬三千餘兩尙多不敷自光緒三十年起在於歲款內酌提歸公銀一萬兩每屆祇領銀六萬三千餘兩愈形竭蹶是以三十一年而後無歲不請另案經費本年入夏以來黃流屢次盛漲下汛四鋪第二道挑水壩中汛十九鋪第四道挑水壩或壩基刷動或舊埽脫卸情形

危殆共搶還新埽八段始克轉危爲安另案用銀一萬六千二百兩委係核實動用並無浮冒現飭藩司練餉局各撥銀八千一百兩照章另案造報不與歲款牽併以清界限所有東明南隄新出險工竭力搶辦照章另案添撥經費緣由理合恭摺具陳伏乞皇上聖鑒勅部查照謹

奏

永定河大汛安瀾摺

宣統元年八月

奏爲永定河伏秋大汛搶護平穩獲慶安瀾恭摺馳陳仰祈聖鑒事竊本屆永定河凌汛安瀾經前督臣楊士驤奏報在案並飭該河道呂珮芬幫辦道員張愷康將伏秋大汛事宜妥籌布置臣到任復飭該道等督率員弁加謹防護節據稟稱伏秋汛內上游山水迭發奔騰匯注計共長水五十四次連底水深至一丈九

尺河底久經淤墊並無正槽本屆水來甚驟遂至兩岸險工迭出如盧溝司之南岸六號九號南上之三四號六七號十五六號南下之頭號三四號六號至十一號南二之三四五號七八九號十二號十四五六七號南三之七八九號十六七號南四之三四號十二三號二十五號南五之八號十號十五號二十二號南六之六號八號十號十二號十七八號南七之西小隄四號七號北上之十號十四五號北下之十三四號十七號北二上之五六號北三之五六號十二三號北四上之頭二三號北四下之十七號北五之頭號十一號北六之頭號五號八九號十五號北七之大壩二三號十號各處新舊險工或坍塌近隄或突鑽漏洞或埽段陡蟄入水甚有隨鑲隨蟄暨坍塌潰隄埽段沈沒之處情形均極險要尤爲棘手者自秋汛以來北七大壩以下正河淤塞大溜由工

立見每入之利
尾小埧直注遙隄之十三四號旋折而下順北洪之老河形至工尾挑水壩漫入正河小埧工尾三里暨遙隄三十餘里皆成要險變生倉猝危殆異常均經該道等督率文武員弁無分風雨晝夜相機搶辦拋石搪護挂柳抵禦或添築子埧或幫寬隄身或接做新埧簽釘大椿沈壓厚土鑽漏處所搶挑越埧填堵堅實北七之小埧遙隄趕運椿料加雇卯工勸集民夫酌加埧段搶築柳壩一面啓放盧溝橋減壩南二工金門閘北三工求賢壩分洩盛漲始得一律搶護平穩節逾秋分河流順軌盧溝橋現存底水七尺五寸獲慶安瀾等情稟報前來伏查永定河尾閘擁塞多年失濬不能順其就下之性以致胸腹節節受病愈形高仰昔年減水灰草各壩漸次廢棄中游之賴以分洩盛漲者僅存金門閘求賢壩兩處一則壩身酥裂一則龍骨過低啓放爲難已同虛設一遇汛漲

即有全河莫容之勢經前督臣楊士驤奏撥另案加培隄身重修金門開求賢壩俾資宣洩而本屆伏秋盛漲之際水與隄頂相距仍不及尺險工林立臣電飭該道督率工員撒手搶護卒能保全危局獲慶安瀾沿河各州縣民生得免昏墊堪以仰慰

宸廑在事出力員弁容俟查明照章保獎理合恭摺由驛馳陳伏乞

皇上聖鑒訓示謹

奏

酌保陸軍小學堂員弁摺宣統元年八月

奏爲遵照定章酌保陸軍小學堂在事出力文武各員弁繕具清單懇

恩給獎恭摺仰祈

端緒政公長高

卷一八

一八

聖鑒事竊照光緒二十九年九月間遵

旨建立保定姚村兩小學堂開辦以來造就頗有成效除歷次選派優等學生由部考驗合格咨遣東西各國留學不計外其頭班學生應截至三十三年九月三年期滿照章舉行畢業因准部咨以陸軍中學尙未議設無從升入暫行撥入速成學堂補習武學延展畢業期限至三十三年六月間經陸軍部派員考試畢業共九十二名分別補授軍職二班學生亦於三十三年十一月間三年期滿經前任督臣楊士驤派員蒞堂考試畢業共九十名由部撥歸陸軍專科師範講習所肄業綜計頭班二班畢業學生一百八十二名所有兩小學堂教習執事文武各員弁數年以來黽勉從公辛勤授課寒暑罔間昕夕不遑卒使成材衆多不無微勞足錄伏查政務處奏定武備學堂請獎章程學生畢業成就在六七

十人以上准獎文武各員十六員內准獎異常二三員此次成就學生至一百八十二名之多自應照章擇尤請獎前准督理陸軍各學堂副都統段祺瑞開具清單咨請具奏前來臣嚴加酌核兩小學堂計請獎異常八員請獎尋常二十七員核與請獎定章人數有減無增委無冒濫謹繕清單恭呈御覽合無仰懇

天恩照擬給獎以資激勵除飭取各員履歷咨部並將千把六員另行咨獎外理合恭摺具陳伏乞

皇上聖鑒訓示謹

奏

查明喇嘛參款摺

宣統元年九月

奏爲查明善因會宗兩寺掌印喇嘛被參各款恭摺會陳仰祈

聖鑒事竊承准軍機大臣字寄宣統元年二月初九日奉

上諭翰林院侍讀榮光奏喇嘛橫行兇惡藐法妄爲請飭查辦一摺著理藩部會同楊士驤按照所奏各節查明具奏原摺著鈔給閱看欽此遵

旨寄信前來當經前督臣楊士驤札委候補知府王錫光前往確查嗣據查明稟覆楊士驤旋卽因病出缺前署督臣那桐在任未久均未核辦臣端方到任接交咨商臣壽耆等派委承辦司員外郎文哲輝等檢查案卷由臣等會同覆核謹將查明情形爲我皇上縷晰陳之如原奏內稱善因會宗兩寺掌印喇嘛剛朱拉巴諾盟漢三吉扎布橫行兇惡出於尋常之外其最重者曰僭越非分查頂戴榮身本

國家賞功之典該喇嘛於光緒二十八年六月竟敢擅賞黑徒那

音太都爾基色巴等三品頂戴給以執照爲憑並於出入時有擅用九龍黃傘情事一節查兩寺掌印喇嘛係幹珠爾瓦諾們汗非剛朱拉巴諾盟漢三吉扎布之名蒙人之有髮辮者在寺服役謂之黑徒那音太都爾基均在寺當差有年據那音太稱於光緒二十七年蒙烏珠穆沁王賞給三品頂戴又據都爾基稱於光緒二十九年蒙阿巴哈貝子賞給四品頂戴並非該喇嘛所賞然無執照可驗未足爲據其中或有隱情匿不吐實色巴則查無其人該喇嘛於出入時曾用黃傘不聞用九龍黃傘詢之士人言亦相同如果實有其事難掩衆人耳目當係傳聞之訛又原奏謂其賄賣差缺查額設差缺或量才拔補或敍資擢升辦事方能得力乃該喇嘛竟敢賄放得木齊二缺一名喀拉僧丹經一名羅來全坡落勒索賄銀七百五十兩之多事後旋經該二得木齊控告是該喇

喇嘛之貪賊現又有案可稽一節查兩寺各設印務得木齊一缺得木齊二缺遇有印務得木齊缺出卽以得木齊推升光緒三十二年善因寺出有印務得木齊一缺先以得木齊喀拉僧丹經擬補未經送揀旋又以得木齊羅來全坡落擬補喀拉僧丹經心懷不甘遂疑有賄賣情事究其有無受賄喀拉僧丹經亦未能指實詢之羅來全坡落則稱並無行賄亦無控告有案又原奏謂其虐待僧衆勢力壓人輕則鞭責重則處死以致兩寺喇嘛情急曾於本年正月來京呈控當經理藩部劄察哈爾都統查辦在案該都統旋派總管公喀爾詳查不料該喇嘛行賄賣囑敷衍了事一節查理藩部原案內有該喇嘛與章嘉呼圖克圖因廟產互控經部查照例案參以案情持平斷結嗣以兩造互訐不休枝節橫生復經咨准察哈爾都統派員查得善因會宗兩寺廟產應屬章嘉呼圖

克圖接管該幹珠爾瓦諾們汗仍係一味強詞不交等因咨覆核辦復查兩寺僧侶有爲幹珠爾瓦諾們汗之徒者有爲章嘉呼圖克圖之徒者現因廟產成訟各爲其師勢成冰炭該喇嘛亦存彼此歧視之見以致善因寺達喇嘛會宗寺副達喇嘛皆因生釁辭差而去該喇嘛旋以潛逃報部原奏謂其勢力壓人不爲無因至鞭責處死各節詳查尙無其事又原奏內稱該喇嘛曾霸佔民女陵阿巴如喇瑪那三喇瑪等三名留住寺內多日寺僧無敢過問一節查該寺時有蒙古婦女入廟燒香或求療疾病等事間與僧衆有戚誼者亦或在廟暫息信宿而去並無留住寺內多日之事陵阿巴如喇瑪那三喇瑪等三名現經遍訪不知所往事涉曖昧無從查悉又原奏謂其私佔廟產盜賣官房並將所佔廟宇窩藏馬賊官役雖知因有該喇嘛保護亦皆莫可如何以致地方不靖

百姓驚慌赤城縣一帶幾有日不聊生之勢一節查理藩部則例內開章嘉呼圖克圖圓寂其所管嵩祝寺法淵寺智珠寺法海寺等四廟卽交該呼圖克圖商卓特巴扎薩克喇嘛照管西甯之廓隆寺廣濟寺兩廟咨行西甯辦事大臣轉飭吹布藏呼圖克圖照管多倫諾爾會宗寺善因寺兩廟卽交多倫諾爾扎薩克達喇嘛照管其各處倉上一切事宜亦交該呼圖克圖之商卓特巴扎薩克喇嘛經理等語詳譯例意是其十廟事同一律且自現輩之章嘉呼圖克圖來京展

覲後所有嵩祝寺等八廟均已交歸章嘉呼圖克圖管理惟會宗善因兩寺該幹珠爾瓦諾們汗至今強詞不交核與察哈爾都統查覆相符原奏所謂私佔廟產實有確據至官房則各蒙旗皆有爲僧徒棲止之所界址毗連或被該寺所佔則有之盜賣實無其

事至將所佔廟宇窩藏馬賊詳加訪查土人皆無聞知多倫廳治
距兩寺不過數里如果實有窩賊情事官役既知無不往緝斷不
致因該喇嘛保護竟至莫可如何訪聞口外地方靖謐盜賊潛蹤
赤城縣一帶又在邊牆以內百姓安堵並無日不聊生之勢此查
明該喇嘛被參各款之實在情形也臣等會查得多倫諾爾掌印
扎薩克達喇嘛幹珠爾瓦諾們汗被參擅賞黑徒頂戴賄賣差缺
虐待僧衆勢力壓人窩藏馬賊各節或事出有因或查無實據或
傳聞之訛均請毋庸置議惟把持廟務擅用黃傘容留婦人在廟
信宿各節均屬有違定制自應照例擬結查理藩部則例內開喇
嘛所住廟宇內不准婦人行走若喇嘛等住房內令婦人行走者
容留之喇嘛罰二九牲畜又辦理蒙古案件如蒙古例所未備者
准照刑例辦理查刑例內載盜賣換易及冒認侵佔他人田宅者

田一畝屋一間以下笞五十每十畝田屋三間加一等罪止杖八十徒二年又奉

制書有所施行而違者杖一百又內外大小文武官犯私罪該杖一百革職離任又二罪以上俱發以重者論罪又斷罪無正條者援引他律比附定擬各等語此案該扎薩克達喇嘛幹珠爾瓦諾們汗除犯容留婦女輕罪不議外其把持廟務核其情節尙非據爲己有若照冒認他人田宅之例以屋三間遞加一等擬罪未免情輕法重至所用黃傘雖非九龍理藩部例內旣無喇嘛應用旂仗傘扇明文卽係擅用合之把持廟務均係違

制自應按例比附定擬該諾們汗係掌印扎薩克達喇嘛應比照文武官犯違

制私罪杖一百律革職離任擬請革去扎薩克達喇嘛之職以示

懲做其善因寺達喇嘛巴色爾會宗寺副達喇嘛巴音濟勒噶爾均飭令回廟當差那音太都爾基三品頂戴四品頂戴據供係烏珠穆沁王暨阿巴哈貝子賞給應由理藩部劄查明晰另行核辦其所遺掌印扎薩克達喇嘛差缺恭候命下再由理藩部照例辦理所有查明善因會宗兩寺掌印喇嘛被參各款謹合詞恭摺具陳伏乞

皇上聖鑒謹

奏

劃撥牧地摺

宣統元年九月

奏爲北洋孳生馬場辦理漸有起色請仍將商都河以東牧地劃撥北洋以資游牧而收成效恭摺仰祈

聖鑒事竊准陸軍部咨開軍牧司案呈案照宣統元年六月二十

九日本部具奏議覆左右兩翼牧羣積弊情形酌擬辦法藉資整頓一摺本日奉

硃批依議欽此欽遵恭錄鈔奏咨行查照在案查本部前准該統轄總管副都統崑源咨稱右翼鑲藍旗商都河以東牧地於光緒三十二年經察哈爾都統撥爲北洋馬廠地一千一百頃南自十號梁北抵沙井子河計二十里有奇西自商都河東抵石門子河計十五里有奇查兩翼牧場原以儲備各鎮軍馬之需北洋陸軍並隸軍部似可無須另有馬廠別爲部居擬請咨會北洋將該地收回以資游牧等因當於議奏摺內另單聲明業經奉旨允准相應專案咨明將前項牧地如何歸併酌定見覆等因前來查北洋需用軍馬向赴張家口外草地一帶採購遠隔數千里長途跋涉類皆疲瘦不堪宜在口外擇地一區牧養臄壯始收任

重致遠之效倘不另籌馬廠卽無牧放處所是以前督臣袁世凱派員在於多倫附近一帶逐處審度勘得商都河以東牧地水草豐美堪作牧場咨商察哈爾都統劃撥在案於是北洋孳生馬廠基址始能成立當以辦理尙未就緒未經具奏立案臣蒞任以後調查該廠實存馬匹數目清冊據署理多倫諾爾協副將兼管馬政陳永祿稟報前來共計七羣內實存駃騠馬二千六百五十七匹所有光緒三十三年新生幼馬不過三十五匹三十四年新生幼馬不過四十五匹本年六月分新生幼馬已至三百二十二匹逐年比較加增數倍從此認真整頓三四年間生息日繁卽無須購自口外計已足敷二四兩鎮戰馬之用兼可節省經費以裕軍儲似此漸著成效自未便遽議歸併功廢半途且查東西文明各國創辦育馬之所官私林立其不惜重資以經營牧場者類因

產馬事業必以爭競力劇而後始能進步改良卽此次議奏摺內所稱擬就兩翼各羣挑選高大臚壯馬若干匹特設模範一羣用資視倣等語是欲整飭馬政卽不得不多設坳牧以爲考驗改良地步北洋孳生馬廠自經劃撥商都河以東地段作爲基礎歷年講求渡種扈養之方旣已日有起色留此作爲北洋養馬之地俟將來辦有成效正可與左右兩翼牧羣互相比較藉資改良似此辦理亦與陸軍部議奏宗旨並行不悖至兩翼牧羣現旣特簡大員專理應有統轄之權所有三年屆滿均齊一次事關大典北洋馬廠應請與兩翼一律遵照辦理以昭畫一而符定制臣爲北洋牧政關繫軍備冀資熟手以收成效起見是否有當除咨陸軍部查照外理合恭摺具陳伏乞

皇上聖鑒訓示謹

奏

遵查知縣參款摺 宣統元年九月

奏爲遵

旨查明直隸束鹿縣知縣被參各節據實覆陳恭摺仰祈

聖鑒事竊查接管卷內光緒三十四年十二月十五日承准軍機

大臣字寄光緒三十四年十二月十四日奉

上諭有人奏束鹿縣知縣閻駿業在國服期內爲伊妻做壽並有

信用門丁招搖索詐等情事著楊士驤按照所指各節確切查明

據實具奏毋稍徇隱原片著鈔給閱看欽此遵

旨寄信前來當經前督臣楊士驤飭委補用知府張道源按照原

參各節逐一查明並親傳人證詳加研訊一面飭由禁煙局檄調

閻駿業赴局查驗去後嗣據禁煙局詳稱閻駿業不服查驗擅自

離局經楊士驥批飭將其撤任並據張道源查明稟覆楊士驥未及核辦因病出缺由前署督臣那桐移交前來臣詳加覆核如原奏閻駿業當

國服期內於十一月十五日爲伊妻做壽各集鎮皆有請帖一節張道源微服入束鹿縣境所過村莊集鎮密加訪問嗣入縣城復詢諸同城文武及商民人等均稱閻駿業之妻久已身故去年

國服期內實無做壽之事且徧問各家並無請帖其爲訛傳可知又原奏門丁劉治平招搖索詐無所不爲一節嚴密訪查並檢核卷宗均無實據惟查和息案件向有規費京錢四千至十數千不等歷任門丁均所不免原奏劉治平招搖索詐或卽指此又原奏押舉人李中桂一節查李中桂係雙井村人因該舉人同村張洛談父子開賭於去冬訪拏到案今正李中桂赴縣求釋未允後經

罰令張洛談父子繳京錢三百吊了案發交公務局充用取有該局收條調查案卷並未將李中桂收押自係傳聞之誤又原奏加派差徭一節查束邑均差始自該前縣張鳳臺迭據上控經閻駿業會同兩次委員議定章程凡遇大差並駐防米豆各項祭祀向有各村鎮經紀牙行承辦者仍照舊辦理所有疇差按畝交制錢十五文惟縣北疇石家莊等十七村莊每畝照案交制錢十三文稟明批准並經出示曉諭有案尙無加派差徭情事又原奏包繳當地稅銀故擡銀價警學解散一節詢據勸學總董李靜湖焦增麟王紹虞邊椿蔭等聲稱束邑稅契多係減價報稅相沿已久惟當契一項如照買契減價投稅則恐原主照契回贖如照當價實數填寫不特當時多出稅銀且恐地方官從此追究稅契減價之伎倆亦將敗露不行是以四鄉聚議來城求包當稅閻駿業未允

致起風潮遂有刁民欲以解散警務學堂希圖抵制當經警學兩界紳董勸止復親至巡警局細加詢問大略相同此委員張道源查明東鹿縣知縣閻駿業被參各節之實在情形也臣伏查原參前署東鹿縣知縣本任望都縣知縣閻駿業在

國服期內爲妻慶壽及加派差徭查明均無其事鄉民所請包繳當契稅銀閻駿業未經應允尙係爲整頓稅契起見惟因賭科罰雖係發交地方公用辦理究有不合家丁得受和息規費閻駿業毫無覺察亦屬形同聾瞶至嗜煙一節經楊士驤飭由禁煙局調驗詎閻駿業不服查驗擅自離局其爲嗜好甚深不能斷戒毫無疑義現當嚴禁吸食之際未便稍事姑容相應請旨將前署東鹿縣知縣本任望都縣知縣閻駿業卽行革職永不敘用以昭儆戒該縣稅契減價及和息規費兩事責成接任縣分

別切實禁革以除積弊而紓民累遣出望都縣知縣缺應俟接准部覆再行揀員請補所有查明束鹿縣被參各節理合恭摺具陳伏乞

皇上聖鑒謹

奏

陵差報銷摺

宣統元年九月

奏爲恭辦

山陵大差收支各款繕單報銷恭摺仰祈

聖鑒事竊查宣統元年正月初七日欽奉

上諭三月十二日

大行皇帝梓宮奉移

西陵暫安所有經由道路著各該衙門及直隸總督敬謹豫備是

日

皇太后恭送梓宮禮畢於十三日啓鑾乘坐火車行抵梁格莊行宮駐蹕勿庸另備

蹕路十四日恭謁

各陵十五日恭迎

大行皇帝梓宮暫安禮成十六日仍乘火車迴鑾其沿途地方一切應備事宜務從簡省所需經費楊士驤核實摺節辦理准其作正開銷絲毫不許攤派民間以免擾累欽此等因當經前督臣行司檢查成案確核經費飭由藩運兩庫各籌撥銀二十萬兩共銀四十萬兩摺節支用一面督飭印委恪遵諭旨力求摺節絲毫不資民力即在事官吏往來薪糧車馬均由公款給發不准役使一民以仰副

朝廷崇儉黜華體恤黎元至意現在綜計供辦

德宗景皇帝梓宮由

觀德殿奉移

西陵暫安

隆裕皇太后乘坐火車恭送禮畢回鑾各差務沿途地方修墊橋梁道路並應需車馬駝隻棚座豆草人夫以及恭備

梓宮槨夫人等一切供應雜支等項共實用銀四十萬五千九百四十兩二錢三分六釐據藩司崔永安開單請奏前來臣覆加查核均係實用實銷毫無浮冒此項經費除原撥銀四十萬兩照數動用外尙不敷銀五千九百四十兩二錢三分六釐應由藩庫設法籌補謹將收支各款繕具清單恭呈

御覽仰懇

天恩俯准照單開銷以清案款伏乞

皇上聖鑒訓示謹

奏

覈減局所薪費摺

宣統元年九月

奏爲查明直隸局所款絀員浮覈實裁減以節公用恭摺仰祈

聖鑒事竊維理財之道以祛浮費爲先用人之方以汰冗員爲要
我

皇上嗣位之初卽以京外各衙門於舉辦要政奏調人員請加經
費往往未能綜核名實或以微員而膺不次之擢或以一人而兼
多處之差

諭飭該管各官切實考核裁汰釐定薪費務祛冒濫虛靡之習並
因清理財政歸併局所等事

申儆再三至嚴且切本年七月

頤和園八品苑副永麟以死陳言切中時病於官場一切浮濫之弊尤能痛切言之仰蒙

特旨褒揚

飭部從優議卹闡揚忠直卽所以激勵羣僚臣循省之餘不勝欽悚伏念今日仕途龐雜登進多門或由捐納或由保舉分發既實繁有徒投効亦比比皆是推論其故固由於教育未能普及實業未能廣興生利者少分利者多不得不趨於官之一途以博利祿爲長官者或徇於請託或庇於親私不得不廣爲位置於是任不量才餽不稱事明以開奔競之習隱以啟幾倖之心卽如直隸各局所中總辦以外復有會辦幫辦坐辦種種名目多或二三十人少亦五六人七八人員司以下猶所不計尤濫旣甚靡費自不待

言夫

國家詔精之典所以獎勵勤能若人人存干祿倖進不肯事事之心則潔身自好勇於任事之員必將相率遠引此在財力充足之時尙不宜揮霍任情有隳士氣况北洋各局所從前號稱有餘今則無一不左支右絀幾於挪墊俱窮凡此浮濫之薪資無非庫藏之虧累與其博寬大之虛名徒耗國用何如毅然省罷俾知廩糈不能倖獲爭自濯磨或能杜貪黷之原而挽惰偷之習臣前在兩江總督任內首以甄汰冒濫裁併局所爲務者蓋以此也今直隸道府以至州縣佐貳候補候選各項差委名目繁多較之南洋加至數倍財政支絀入少出多斷非先從祛浮費汰冗員入手不可
臣歷與司道遂加裁度凡原有局所其事之可併者則併之其可歸實任司道及向無責任者則撤之其虛耗薪費並不辦事之員

則裁減而更易之約計歲省之數已三十餘萬兩此外應行裁減之處仍當隨時清查認真整頓用以省無益之繁費免益增庫帑之實虧怨讟之來皆所弗恤是否有當謹恭摺具陳伏乞

皇上聖鑒謹

奏

請賞游學生監督京堂摺

宣統元年九月

奏爲歐洲游學生監督辦理留學事宜卓著勞勩恭摺具陳仰祈聖鑒事竊光緒三十三年臣於兩江總督任內會同前湖廣督臣張之洞奏請以前淮揚海道蒯光典充江鄂兩省游學生監督嗣經學部以旅歐學生衆多奏派該監督一律管理該員深知朝廷派送學生游學西洋爲強國儲才之本養成有法均屬幹濟時局之良故奉派之始卽以整頓學風成就人材爲宗旨惟舊日

學生向無管理方法驕縱所積不獨囂張之患易涉畸邪卽浮慕文明不知悅學覘國者亦將視此以爲重輕且世變需材異日將何所取用故整理之法首在稽核功課詳查校外豫備情形校內修業成績實行部頒表式轉飭填註該生等放任既久干涉綦難僅此入手之設施就範已自匪易復念各國學制不同各學科級又極繁賾非親歷調查學制尋其統系考其學堂章程教科用書接見學務人員往還論議不能得其教育原理所在於學生就學利弊斷難洞見癥結因應咸宜該員考查游歷勞瘁不辭要領既窺規程斯備都其辦法如入大校本科始給全費如學生不准改校改科改國如與德國學部訂定入大學規則均經學部通咨各省照辦在案而其成效昭著者尤在於學生成績調查精審依據詳實聯絡各國學校由各校據實報告不以學生自填表式爲憑

其閒品行之良否術藝之精疏指掌可陳開卷卽得一旦畢業歸國考德掄才自能有所鈎索以爲取舍而學生等鑒於尺寸程功皆能自見益復劬學敦行爭自濯磨期備

國家緩急之用是該監督督率認真爲功實非淺鮮伏念該員學識淵通忠於任事留歐年餘盡心留學事宜復以其暇博採各國圖書分別部居爲內輸文化之助迹其熱心教育凡關學務皆在周諮博訪之中今事竣回國自應懇

恩優加擢用以策方來查光緒三十一年尙書戴鴻慈與臣奉

命出洋考察政治奏調湖南長沙府知府劉若曾派充頭等參贊旋授江蘇常鎮道返國之日卽蒙

恩命以三品京堂候補蒯光典係實缺久任淮揚海道奏請開缺充歐洲游學生監督較論資勞尤爲過之可否請

旨以三四品京堂候補用昭激勸出自逾格

鴻施是否有當謹恭摺具陳伏乞

皇上聖鑒謹

奏

武員憂憤捐生請卹摺

宣統元年九月

奏爲武員効忠志切憂憤捐生懇

恩褒卹恭摺具陳仰祈

聖鑒事竊本年九月初九日有隨營學堂副監督兼武學教習郝志英開槍自擊身死衣袋內遺有稟函二件一上陸軍第四鎮統制附有改良軍事條陳底稿一與學堂正監督等公函大旨皆謂時勢艱難勢如累卵願以一死感動羣情庶幾知所振作轉弱爲強並引古名臣忠義大節自況由陸軍統制飭正執法官軍醫官

警察隊官會同勘驗並由正執法官親至其家暨隨營學堂詳查
委係憂時憤世捐生効忠並悉其平日教授諸生每言及列強環
伺外患紛乘輒淚隨聲下初九日早晨親至學堂既爲學兵演說
忠愛大義復以人心詐僞上下相蒙天下岌岌有不可終日之勢
垂涕而道欲令諸生將來擔任鉅艱共紓忠悃蓋百折不回之志
已決於此時矣傍午託辭外出遂於舊礮臺上用槍自斃據統制
吳鳳嶺詳請表揚前來臣伏查該員忠義奮發感念時艱冀以一
死震動天下人之耳目其心雖愚其志可憫迹其平日踐履正大
服膺岳飛文天祥之爲人而又洞明時局日棘國步日艱不敢苟
同於世俗操心慮患獨具深衷臣忝領畿疆失此良將輒爲痛惜
久之夫人情孰不畏死該員獨一瞑不顧捨寡妻弱息不恤愬然
無復有樂生之心則世局之艱危可知古人有言非死之難處死

之難若由此而朝野上下憂勤振奮知因循不可以爲國泄沓不足以圖存人人以忘身報國之心起而爲扶危定傾之計則該員之死有重於泰山者矣查本年七月苑副永麟以死建言仰邀賜卹該員厠身軍職蒿目時艱孤憤捐軀情事相等倘蒙

特詔褒嘉風示天下庶幾發斯人之猛省而振全國之精神裨益大局實非淺鮮除將該員所擬軍事條陳並履歷咨送軍機處軍諮處陸軍部查照外所有武員憂憤捐生緣由理合恭摺具陳伏乞

皇上聖鑒訓示謹

奏

請給洋員寶星片

再奧國武員申達雷在津統帶衛隊辦理奧界巡警輯和軍民力

敦睦誼上年英商順天輪船碰沈華民孫德旺鹽船該洋員曾爲公正人秉公判斷責令英輪賠償出力尤多現在該洋員奉調回國據津海關道詳請奏獎前來查各國洋員在華出力或辦事持平歷經奏請

賞給寶星有案今該洋員申達雷在津辦事頗著辛勤擬懇天恩賞給該員三等第二寶星以示褒嘉而資觀感除咨外務部查照外謹附片具陳伏乞

聖鑒訓示謹
奏

陵差沿途預備情形摺 宣統元年十月
奏爲恭辦

山陵大差謹將沿途預備情形恭摺具陳仰祈

聖鑒事竊 臣欽奉

上諭本年九月二十七日

孝欽顯皇后梓宮奉移

山陵一切應辦事宜著端方敬謹預備所需經費准其作正開銷不許絲毫攤派民間以免擾累等因欽此伏查此次

山陵大差典禮綦重當飭藩司崔永安先將槓夫雇妥其沿途橋道工程遴派妥員幫同藩司加工修築一律堅平此外一切事宜亦飭印委分投備辦所需經費均發官款不准絲毫攤派民間並刊發告示宣布

朝廷德意俾使周知 臣先期進京會督提 臣姜桂題藩司崔永安將各事部署就緒一面派撥督標營正定練軍暨淮軍中路及駐紮小站之親軍等營並咨由提 臣姜桂題飭派武衛左軍左路步

隊各兵丁分段站道供差九月二十七日臣先至京營直隸交界之定福莊恭迎

隆裕皇太后鑾輿復折回護送

孝欽顯皇后梓宮起程是日安抵燕郊二十八日至白澗二十九日至桃花寺三十日至隆福寺十月初一日至

普陀峪

定東陵

隆恩殿暫安連日天氣清明一切應備事宜均臻妥洽承辦人員亦均各恪恭將事毫無貽誤堪以仰慰

宸廕臣俟初四日

永安禮成即當隨

扈回京趨詣

端忠政公奏稿

卷十六

三十四

闕廷跪聆

聖訓理合恭摺具陳伏乞

皇上聖鑒謹

奏

查辦鄉民聚衆情形片

宣統元年十月

再遷安縣轄境遼闊所屬口外各村莊均與熱河接壤風氣素稱強勁本年七月間因遵奉部章清查戶口經該縣知縣劉道春選派自治畢業生張桂枝等前往調查突有無知愚民布散流言謂查戶係爲抽捐而設一唱百和以張桂枝等斂費爲詞聚衆臨城要求免查當經該縣出示勸諭解散並將張桂枝等一律革換臣接據稟報後復電飭通永鎮總兵雷震春及永平府知府恩佑就近彈壓並派員前往確查在案惟查該縣口外地方向有散帖喫

會之風動輒糾衆滋事惡習相沿已非一日此次調查戶口係籌備立憲應行要政即使局董辦理不善該處鄉民儘可稟官究治乃竟聚衆暴動藉端抗阻其爲首造謠之人自應查明拏究以儆頑梗至自治畢業生張桂枝等雖經革退究竟有無斂費入己情事亦應澈底查究俾昭折服除再札飭永平府分別確查究辦並出示嚴禁散帖喫會以挽澆俗外所有遷安縣口外鄉民聚衆已經解散及現飭查辦大概情形理合附片具陳伏乞

聖鑒謹

奏

請速設禁中顧問摺

宣統元年十月

奏爲籲請速設禁中顧問官以重根本而維大局恭摺仰祈聖鑒事竊臣於六月十八日奏請設禁中顧問官爲弼德院之豫

備以備顧問而救艱危一摺並於

監國攝政王前面陳悃款蒙

監國攝政王諭俟斟酌施行仰見

監國攝政王慎重周詳之至意今既數月未見施行議者或以爲迂闊不急之務謂可置爲緩圖或慮有流弊之潛滋或慮夫得人
之匪易竊謂天下事有似迂而實切似緩而實急者夫尊禮師儒
考求道藝此國家全盛潤色太平之舉似非今日之急務然當此
內憂外患紛至沓來千端萬緒應之者惟賴

當展之一心此心之明無以濬之則識易淆無以養之則意易蔽
措之政事必有不能適當其可者欲祛此患舍親賢其曷由乎宋
儒程頤之言曰一日之間接賢士大夫之時多親寺人宦官之時
少則氣質自化德器自成其言深切著明非迂闊而遠於事情之

論也今天下事變夥矣人心日壞風俗日偷何以轉移閭閻日匱
伏莽日多何以挽救吏治之頽敝教化之陵夷軍事之渙散財政
之紊亂何以振肅而澄清強鄰勁敵環伺逼處蹈瑕抵隙待時而
動何以察於先事防於未然而因應於當幾凡此鉅艱之責舉皆
萃集於

王躬我

監國攝政王雖秉上智之資欲於視朝俄頃之間措施悉當竊恐
有未易言者是非講求於平日不可矣此臣所以有設禁中顧問
官之請也顧問官之設非以博禮賢典學之虛名也良以好問察
言聖神所尙集思廣益先哲所崇誠能延攬通儒博求俊彥退朝
之暇便坐論思不獨漸摩道義商略治平至於人情物態稼穡艱
難外域國情環球大勢日積既久自能瞭然於胸中以之施諸庶

政將見左右逢原取之不竭非無本之治所可同日語也根本之計至關重要與一時一事小小補苴者不同焉得視爲不急之務謂可置爲緩圖哉至其流弊或慮生妄言淆聽之漸夫選擇之初卽以察其心術純正操履不苟爲重既用之後又於持論奇袤居心躁妄者立予斥退則妄言之弊不足慮也或慮開借端倖進之門則此項顧問官但當加以禮貌不必優異升階庶抱道自重之士不以爲嫌而熱中躁進之徒自然卻步倖進之弊亦不足慮也或又慮其干預行政之權則當比照日本樞密院之制不得與他官署往復文書於國民不行命令權不直接政治非奉諮詢不得自陳意見則干預之弊更不足慮也若夫遴選則尤不患無人在位及致仕之大臣齒德兼隆者平日自早

簡在

聖心其官職較卑年齒較少者責成廷臣保薦各舉所知不拘一格苟其學術足任諮詢不必求全責備自不致有乏才之歎况不稱職者隨時可以罷遣更不必總總過慮也日本之制典兵多用皇族而顧問則專用儒臣文武並重無所偏倚近者禁衛軍軍諮處籌辦海軍均以懿親管理草茅私議頗有偏任親貴之處今若特設禁中顧問優禮儒賢置諸左右則親賢並進大公無私足以消釋羣疑昭示海內尤於大局所裨匪鮮臣愚昧之見擬請

俯照臣前摺所請卽日

明降諭旨設立禁中顧問官以重根本而維大局其辦理詳細章程仍所

飭下憲政編查館核議具奏臣念切憂時一再冒瀆不勝戰慄待命之至謹恭摺具陳伏乞

皇上聖鑒訓示謹

奏

軍鎮籌擬辦法摺

宣統元年十月

奏爲臚陳北洋軍鎮情形並籌擬改良辦法恭摺仰祈
聖鑒事竊維近年時勢艱難

朝廷銳意圖強飭令通國編練陸軍共分三十六鎮整軍經武實
爲今日切要之圖北洋練軍最先現除第一第三第五第六各鎮
係歸陸軍部直轄外第二第四兩鎮應由北洋督率訓練該兩鎮
成立已久經歷任督臣悉心規畫並於河間彰德兩次舉行演習
均蒙

欽派大臣校閱成績已有可觀實足爲各省新軍之先導惟軍事
進步本無止境東西各國凡於軍事之歷練軍學之研究無不刻

意求精故能日見優勝中國勢處積弱各省財力又同一困難致原定三十六鎮尙未能編練完全自非就已成軍鎮振刷精神大加整飭不足以示標準而收效果臣自蒞任以來卽隨時認真考察並於接見各鎮將校時諮詢討論知北洋兩鎮軍政缺略頗多當經切實籌畫擬就改良辦法數端謹爲我

皇上縷晰陳之查練兵之道非注重教育不可有官長之教育有目兵之教育而各營兵士教育之良窳又視全鎮官長之學問程度以爲衡北洋創練一鎮之初在外洋留學歸國人員爲數無幾雖招用各處陸軍畢業生亦僅勉敷分布嗣因外患迭乘內備空乏旋由一鎮擴成六鎮人材遂愈見其少因之全鎮官長學生與行伍出身者參差互用在當時辦事之苦心自不得不因陋就簡惟行伍出身者固於軍學素乏講求卽各處陸軍學堂之畢業生

學問程度亦不無參差不齊之弊雖有講武堂及隨營學堂先後設立無如教育未能一時普及故全鎮官長之學問程度仍難收畫一之效至各營日兵從前倉卒成軍徵募本多遷就常有不識字者蝨居其間致於教育之進步頗有阻礙臣竊以爲欲使全鎮官長之學問程度實行畫一必須將毫無軍事智識之官長逐漸淘汰現第五第六兩期在日本及德法留學畢業歸國者已不乏人擬請嗣後二四兩鎮軍官缺出卽於前項學生中選擇委充既使各學生等得所效用益增軍事上之經驗而全鎮官長之學問程度亦自然悉臻畫一此外並經臣飭由教練處創辦兵事雜誌凡關係軍事之論說學術與夫各國軍事上之經驗分類編輯月成一冊使各鎮官長隨時購閱以漸增長見聞交換智識用輔教育之不足各鎮日兵分年退伍續徵各兵自可嚴格挑選就其有

普通學問者徵之入伍庶令目兵之教育易於進步至平時之教練以實地練習與實彈射擊爲最要二四兩鎮礮標雖屢行實彈試放而演習及戰鬪射擊均未實行教練其故一由於礮彈購自外洋恐實彈射擊糜費過鉅一由於各鎮無射擊場演習實彈射擊易滋弊害擬令該兩鎮相度合宜地勢各建築一大射擊場以爲教練射擊之地其射擊所用實彈必使製造局自置機廠陸續製造庶幾取不盡而用不竭此關於軍學上之改良辦法也士氣之盛衰係於軍紀之張弛其中緊要關鍵外觀固貴整齊內務尤須完善東西各國凡一軍隊必先籌建合式兵房務取軒廠閱大實能於衛生管理兩項兼籌並顧今北洋二四兩鎮兵房建築均不甚合法四鎮兵房尙屬粗具規模其二鎮屯駐永平撫甯之兵房湫隘過甚因之內務亦難整理現正擬豫籌款項酌將四鎮兵

房擴充添建不求粉飾外觀但期綜合法度務於衛生管理兩項加意整頓庶幾有形式卽有精神規則漸臻完備此關於軍紀上之改良辦法也全鎮之配合計分步騎礮工輜重五項無一不關重要二四兩鎮均係按照奏定章制編練配合尙稱全備然日俄之戰俄軍之用重礮隊機關槍隊較日軍爲多故南山旅順各戰日軍雖勝傷亡之數實衆蓋火器之勝利斷非肉薄者所能當其衝日人於戰後乃竭力研究重礮隊機關槍隊之用法並購買德法兩國槍礮使礮兵工廠參仿改造分別訓練其重礮隊則分爲野戰重礮隊要塞重礮隊兩種其機關槍則每聯隊中必有一隊更番練習使各兵士人人通曉其用法又因戰時之動作瞬息萬變非輸送迅速消息靈捷難以制勝故又特設交通旅團分練鐵道氣球電信各隊以妙軍事上之運用以上各種隊伍均爲近數

年間各國最新發明視爲軍隊萬不可少之要需前此陸軍部奏定軍制之時尙未之及臣曾經派員前赴日本考察各隊辦法擬即酌量購備添練重礮隊機關槍隊交通隊以立基礎如能就此實力經營庶可爲將來實戰之準備此關於軍制上之改良辦法也抑臣更有進者創練軍隊非徒爲平時演習及巡防之用當以施之真戰確能殺敵致果爲要義故戰時後方勤務之準備不能不於平時立定計畫如被服糧秣彈藥器械馬匹等項東西各國均於平時豫爲數倍或數十百倍之儲以免戰時缺乏今北洋二四兩鎮退伍之兵亦既年增一年軍裝器械卽僅供目前操練尙虞不足一旦有事而使無被服無糧秣無彈藥之兵與敵人相見於疆場臣竊憂之擬請由陸軍部豫爲規畫嗣後務令內而部庫外而各省一律籌撥常款將前項戰時之被服糧秣彈藥器械各

項漸次購儲以備取用然後平時之教練可以見之實戰由是緩急足恃豫備不虞固圉圖強基於此矣臣智識有限而願力無窮謹將平日考查所及區區一得之愚據實上陳伏祈

皇上聖鑒訓示謹

奏

端忠敏公奏稿卷十六終